

Stiidxa Dios didxazá (El Nuevo Testamento de  
nuestro señor Jesucristo en el Zapoteco del  
Istmo)



New Testament in Zapotec, Isthmus (MX:zai:Zapotec, Isthmus)

# **Stiidxa Dios didxazá (El Nuevo Testamento de nuestro señor Jesucristo en el Zapoteco del Istmo)**

## **New Testament in Zapotec, Isthmus (MX:zai:Zapotec, Isthmus)**

copyright © 1988 Wycliffe Bible Translators, Inc.

Language: Zapotec, Isthmus

Translation by: Wycliffe Bible Translators, Inc.

Zapoteco, Istmo [zpi], Mexico

### **Copyright Information**

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Zapotec, Isthmus

### **© 1988, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 20 May 2025 from source files dated 29 Jan 2022

b5d51533-ccc2-5e9d-9d14-405b17456af4

## Contents

SAN MATEO . . . . .	1
SAN MARCOS . . . . .	66
SAN LUCAS . . . . .	106
SAN JUAN . . . . .	171
HECHOS . . . . .	218
ROMANOS . . . . .	277
1 CORINTIOS . . . . .	304
2 CORINTIOS . . . . .	330
GALATAS . . . . .	346
EFESIOS . . . . .	356
FILIPENSES . . . . .	366
COLOSENSES . . . . .	372
1 TESALONI-	
CENSES . . . . .	378
2 TESALONI-	
CENSES . . . . .	383
1 TIMOTEO . . . . .	386
2 TIMOTEO . . . . .	393
TITO . . . . .	398
FILIMÓN . . . . .	401
HEBREOS . . . . .	403
SANTIAGO . . . . .	425
1 PEDRO . . . . .	432
2 PEDRO . . . . .	440
1 JUAN . . . . .	445
2 JUAN . . . . .	452
3 JUAN . . . . .	453
JUDAS . . . . .	454
APOCALIPSIS . . . . .	457

# STIIDXA JESUCRISTU NI BICAA SAN MATEU

*Tu dé za Jesucristu  
(Lc. 3.23-38)*

<sup>1</sup> Lu gui'chi ri zeeda irá lá xfamilia Jesucristu, xiiñi David ni za de Abraham.

<sup>2</sup> Abraham gupa Isaac, ne Isaac gupa Jacob, ne Jacob gupa Judá ne ca bi'chi'.

<sup>3</sup> Ne Judá ne Tamar gupa ca Fares ne Zara, ne Fares gupa Esrom, ne Esrom gupa Aram.

<sup>4</sup> Ne de Aram ma zeeda Aminadab, ne Aminadab gupa Naasón ne Naasón gupa Salmón.

<sup>5</sup> Ne Salmón ne Rahab gupa ca Booz, ne Booz ne Rut gupa ca Obed, ne Obed gupa Isaí.

<sup>6</sup> Ne de Isaí ma zeeda rey David, ne David gupa Salomón, xiiñi ni guca xheela Uriás.

<sup>7</sup> Ne Salomón gupa Roboam, ne Roboam gupa Abías, ne Abías gupa Asa.

<sup>8</sup> Ne de Asa ma zeeda Josafat, ne Josafat gupa Joram, ne Joram gupa Uzías.

<sup>9</sup> Ne de Uzías ma zeeda Jotam, ne Jotam gupa Acaz, ne Acaz gupa Ezequías.

<sup>10</sup> Ne de Ezequías ma zeeda Manasés, ne Manasés gupa Amón, ne Amón gupa Josías.

<sup>11</sup> Ne de Josías ma zeeda Jeconías ne ca bi'chi', ne bibani cabe ca dxi yené ca binni Babilonia laacabe xquidxi ca'.

<sup>12</sup> Ne dxi ma nuu cabe Babilonia la? gupa Jeconías Salatiel, ne Salatiel gupa Zorobabel.

<sup>13</sup> Ne de Zorobabel ma zeeda Abiud, ne Abiud gupa Eliaquim, ne Eliaquim gupa Azor.

<sup>14</sup> Ne de Azor ma zeeda Sadoc, ne Sadoc gupa Aquim, ne Aquim gupa Eliud.

<sup>15</sup> Ne de Eliud ma zeeda Eleazar, ne Eleazar gupa Matán, ne Matán gupa Jacob.

<sup>16</sup> Ne de Jacob ma zeeda José xheela María ne de María gule Jesús ni rabi cabe Cristu.

<sup>17</sup> Rarí ridu'ya nu modo za Cristu de Abraham. Gupa Abraham xiiñi', de xiiñi Abraham la? gupa xiiñi', de xiiñi xiiñi be gupa xiiñi ne zacá zeeda ni. De dxi bibani Abraham para dxi sti rey David la? ma bizaa catorce familia. Ne dede dxi sti David para dxi yené ca binni Babilonia ca binni Judá xquidxi ca la? nga sti catorce familia. Ne dede dxi que para dxi sti Cristu, laca sti catorce.

*Ra gule Jesucristu  
(Lc. 2.1-7)*

<sup>18</sup> Sicarí nga gule Jesucristu: Ma chi iluxe enda xheela sti José ne María peru ca'ru idxiña be laa, bihuinni ma naca xiiñi María xiiñi Espíritu Santu.

<sup>19</sup> Ne ora gunna José ma naca xiiñi be la? na nusaana laabe naga'chi purti nacha'hui ne qué ná ireeche ni guidxi.

<sup>20</sup> Ngue cá ique José guni, mala uní' né ti ángel sti Dios laa lu bacaanda', na rabi laa:

—José xiiñi David, gucuua María xheela lu' ne ma cadi ucaa ique lu usaana lu laabe, partí xiiñi Espíritu Santu naca xiiñi be.

<sup>21</sup> Ne zapa be ti badu huiini ne zabee lá lu laa Jesús, partí zulá ca xpinni de irá ni huachee ca'.

<sup>22</sup> Ne cayaca ni sicarí ti iree ni modo uni' Dios de ruaa dxa profeta ni uni' chiqué:

<sup>23</sup> Laguuya ni chi gaca ri': Ti binni dxaapa zaca xiiñi ne zapa ti badu huiini', ne zabee lá cabe laa Emanuel.

Ni rini' Emanuel la? nuu né Dios laanu.

<sup>24</sup> Ne ora bibani José bi'ni ni gudxi ángel que laa, ne biluxe enda xheela que.

<sup>25</sup> Peru qué ñuu be cue' María dede dxi ma gule badu huiini que ne ulee lá be laa Jesús.

## 2

*Ra beda yubi ca hombre  
nuu xpiaani Jesús*

<sup>1</sup> Gule Jesús ndaani guidxi Belén de Judea dxi zuba rey Herodes. Ne ca dxi que bedandá caadxi hombre nuu xpiaani ne riene de luceru, ndaani guidxi Jerusalén, beeda ca de neza rindani gubidxa.

<sup>2</sup> Ne cananaba diidxa ca paraa gule rey sti ca judíu, partí na cabe biiya cabe ra biree luceru stibe neza rindani gubidxa ne ngue runi zeda ganna cabe laabe para usisaca cabe laabe.

<sup>3</sup> Ne ora gunna rey Herodes xi zeeda cabe la?

bidxibi, laa ne irá ca binni Jerusalén.

<sup>4</sup> Para bisenda caa be ca judíu, cani jma riene de ni cá lu Xqui'chi Dios ne ca xaíque sti ca sacerdote, ne gunaba diidxa be laaca paraa nexhe gale ni rabi cabe Cristu.

<sup>5</sup> Para na ca rabi ca laabe:

—Ndaani guidxi Belén de Judea, partí sicarí bicaa ti profeta sti Dios chiqué:

<sup>6</sup> Lii Belén, neca jma nahuiini lu lade ca guidxi de Judá, peru nabé risaca lu' partí de lii zaree tobi ni guni mandar ne gapa ca xpinne ni za de Israel.

Nga nga ni uni' profeta que.

<sup>7</sup> Oraque bisenda caa be ca hombre ni riene de luceru que naga'chi', ne gunaba diidxa be laaca padxí ti biiya ca luceru que.

<sup>8</sup> Ne gudxi be laaca che ca Belén, ne raqué inaba diidxa ca', ne ora ma bidxela ca badu huiini que la? gueda tidxi ca laabe, para che be chi usisaca be laa.

<sup>9</sup> Ngue si gudxi rey que laa cabe, biree cabe ze cabe, ne mala biiya cabe za niru dxa luceru que lú cabe, luceru ni bi'ya cabe neza rindani gubidxa que. Para yenanda cabe ni dede ra biaana dxí ni ra nuu badu huiini que.

<sup>10</sup> Nabé bieche cabe ora bi'ya cabe luceru que.

<sup>11</sup> Ne ora biuu cabe ndaani yoo, biiya cabe badu huiini que ne María jñaa. Para bizuxibi cabe, bisisaca cabe laa ne óraque ulee cabe irá

ni bedané cabe, bisiga'de cabe laa oro, gu'xhu' ne nisa rindá' naxhi.

<sup>12</sup> Ne ora ma chi ibigueta cabe xquidxi cabe, uní' né Dios laacabe lu bacaanda ma cadi ibigueta cabe neza ra nuu Herodes. Para bigueta cabe adxé neza.

*Ra uyé José ne María Egípto*

<sup>13</sup> Biree si ca hombre ni riene de luceru que ze', uní' né ti ángel sti Dios José lu bacaanda', na rabi laabe:

—Biasa gucuua badu huiini ca ne jñaa, laché Egípto ne laguiaana raqué, ne naa gabe laatu padxí ma zanda iree tu de raqué, purti zuyubi Herodes badu huiini ca para guuti.

<sup>14</sup> Huaxhinni queca biasa José gucuua badu huiini que ne jñaa ne ze ca Egípto.

<sup>15</sup> Biaana cabe raqué dede dxi guti Herodes ti iree ni modo pe uní' Dios de ruaa dxa profeta que ra na Dios: "De ndaani guidxi Egípto bisenda caa Xiiñe".

*Ra bisenda guuti Herodes ca ba'du'*

<sup>16</sup> Biiya si Herodes gudxite ca hombre ni riene de luceru que laa la? gudó dí laa ne bisenda guuti irá ba'du ni chi usaa ru chupa iza, irá ni nabeza ndaani guidxi Belén ne idubi neza que, purti ulee be cuenta mayaca izaa chupa iza dede dxi bi'ya ca hombre nuu xpi-aani que luceru que.

<sup>17</sup> Ne ra guti irá ca badu huiini que la? biree ni modo

pe uní' Dios de ruaa profeta Jeremías chiqué ra na:

<sup>18</sup> Bina diaga cabe ucuá ti ridxi ndaani guidxi Ramá, Cayuuna caadxi gunaa de Judá, cani za de Raquel.

Bizulú biina ca dede uyuu yuuba ladxidó' ca', ne qué na ca igani ca purti ma guti xiiñi ca'.

<sup>19</sup> Peru dxi ma guti rey Herodes la? uní' né ti ángel sti Dios José lu bacaanda ndaani guidxi Egípto, na rabi laabe:

<sup>20</sup> —Biasa gucuua badu huiini ca ne jñaa ne laibigueta xquidxi tu, purti ma guti cani gucala'dxi ñuuti badu huiini ca.

<sup>21</sup> Para biasa be gucuua be badu huiini que ne jñaa ne bigueta cabe Israel, xquidxi cabe.

<sup>22</sup> Peru ora gunna be ma Arquelaو zuba jlugar bix-hoze ndaani guidxi Judea la? bidxbi be ñe be raqué, ne laca uní' xcaanda be cadi che be. Ngue runi biyubi be Galilea.

<sup>23</sup> Ne beda ndeza be Nazaret ti iree ni modo pe bizeete ca profeta que de Jesús, na ca': "Zabi cabe laabe binni Nazaret."

### 3

*Ra canayuí' Juan Bautista stiidxa Dios  
(Mr. 1.1-8; Lc. 3.1-9, 15-17;  
Jn. 1.19-28)*

<sup>1</sup> Ca dxi que beeda Juan Bautista, canayuí' stiidxa Dios ndaani gui'xhi Judea.

**2 Ne na rabi ca binni que:**

—Lainaba perdón Dios, purti ma zeda dxiña dxi guni mandar.

**3 Sicarí nga uní' Dios de ruua profeta Isaías chiqué, na:**

Zuna diaga cabe cucaa tuuxa ridxi ndaani gui'xhi cayabi binni:

"Lausiá neza tidi Señor; lauxhele ladxitdó' to casi ñaca cuxhele tu ti neza para laabe."

**4 Ne irá ni uní' profeta que la? guca ni dxi beeda Juan Bautista. Riaana be ndaani gui'xhi', ne de guicha ladi camellu xhaba be, ne xi' ti cinturón de guidi ndaani be, ne endaró stibe nga usú ne dxiña yaga.**

**5 Ne idubi naca guidxi Jerusalén uyé ra nuu be, ne irá xixé binni de Judea ne de irá ca guidxi ni dxaaga guiigu Jordán.**

**6 Ne ulee ruua ca diidxa de irá ni huachee ca', ne guluu nisa be laaca ndaani guiigu Jordán que.**

**7 Peru ora bi'ya be cayeeda stale fariseu ne saduceu ra nuu be para chu' nisa ca la? na be rabi be laaca':**

—Binni nexhená ca', ma runebia'ya laatu, zeeda tu ra nuua purti zácxaxa tu tisi chu' nisa tu, ma qué zusaba ná Dios laatu.

**8 Yanna lasá jneza ti ihuinni ma unaba tu perdón Dios de idubi ladxitdó' to.**

**9 Ne cadi ma iree né tu na tu: "Xiiñi Abraham laadu." Gabe ca' laatu, pa qué guni tu jneza casi bi'ni be la? dede**

lade guie ri zanda indisa Dios xiiñi be.

**10 Ti yaga ni qué ricá cuananaxhi lú, rugá cabe laa ne ruzaaqui cabe laa. Zacaca nga ma zeda dxiña dxi sti irá cani qué runi jneza, laca maca zilá ca lu bele.**

**11 Naa caguua ni'sa laatu casi ti seña ma unaba tu perdón Dios, peru nuu stobi ni gueeda ru', ne ngue jma risaca que naa. Naa qué risaca dia' nin para indade xquela guidi be ñee be. Laabe zudii be Espíritu Santu cani guni cre, ne zulaa be cani qué runi cre lu bele.**

**12 Zeda guni be casi runi tobi ni riguibi semiá, zutopa be ca semiá para uchá be ndaani sacu ne zundaa be ca guixi que lu ti gui ni qué ziuu dxi gyui'.**

*Ra uyyy nisa Jesús*

(Mr. 1.9-11; Lc. 3.21-22)

**13 Ca dxi que biree Jesús de Galilea, beeda ra nuu Juan ra guiigu Jordán para cu' nisa Juan laa.**

**14 Peru qué na gá Juan cu' nisa laabe, sínunque na rabi laabe:**

—Jma naquiiñe cu' nisa lu naa, yanna nou' cuaa ni'sa lii la?

**15 Para rabi be laa:**

—Zaa, peru bi'ni ni yanna, purti jma naquiiñe guni nu irá ni gudixhe Dios gaca'.

**Oraque ru guná Juan guluu nisa laabe.**

**16 Ne casi biluxe uyyy nisa be, biree be de ndaani nisa que, ne mala bixale ibá' ne biiya be zeeda yete Espíritu**

Santu de ibá', casi ti paloma,  
biaana dxí luguiá be.

<sup>17</sup> Oraque ucuá ti ridxi de  
ibá':

—Ndi nga Xiiñe ni nadxiee  
ne ni rusieche naa.

## 4

*Ucalá'dxi binidxaba nus-  
aba Jesús*

(Mr. 1.12-13; Lc. 4.1-13)

<sup>1</sup> Ne óraque yené Espíritu  
Santu laabe ndaani gui'xhi ti  
gu'ya binidxaba pa zuni be  
ni na.

<sup>2</sup> Ne biaana be raqué  
cuarenta dia sin ño be ne ma  
candaana dxita be.

<sup>3</sup> Oraque beeda binidxaba  
ra nuu be, na rabi laabe:

—Pa dxandí Xiiñi Dios lii  
la? gudxi ca guie ca gaca ca  
pan.

<sup>4</sup> Para na be rabi be laa:

—Maca cá lu Xqui'chi Dios,  
cadi pan si nga ibani né binni  
sínuque irá ca diidxa ni iree  
de ruaa Dios.

<sup>5</sup> Oraque yené binidxaba  
que laabe ndaani guidxi  
Jerusalén ni rabi cabe Guidxi  
sti Dios, ne bidxiiba laabe  
ique yu'du ro' ra jma nasoo

<sup>6</sup> ne na rabi laabe:

—Yanna, pa dxandí Xiiñi  
Dios lii la? uyuu bi de  
racá, purti cá lu Xqui'chi Dios  
zuseenda ca ángel sti para cu'  
ná xi'que lu ti cadi gacaná lu  
lu guie.

<sup>7</sup> Para rabi be laa:

—Peru laca cá lu Xqui'chi  
Dios, cadi inaba cabe xiixa  
Dios para quite si cabe laa.

<sup>8</sup> Peru ucuua ru binidxaba  
que laabe, yené laabe lu ti  
dani ni jma nasoo, ne bilui'  
laabe irá xixé guidxi de idubi

naca guidxilayú para gu'ya  
be pabiá' sicarú cani.

<sup>9</sup> Ne na rabi laabe:

—Zudiee lii irá ni pa  
guzuxibi lu xañee' usisaca lu  
naa.

<sup>10</sup> Oraque na be rabi be laa:

—Biree de ra nuaa binidx-  
aba', purti cá lu Xqui'chi  
Dios, Dios si nga naquiiñe  
usisaca cabe ne guni cabe ni  
na.

<sup>11</sup> Oraque ru bixale binidx-  
aba que de laabe, para beeda  
caadxi ángel bidii ni gudó be.

*Ra bizulú xhiña Jesús*

(Mr. 1.14-15; Lc. 4.14-15)

<sup>12</sup> Dxi gunna be ma  
yeguyoo Juan Bautista la?  
bigueta be neza Galilea,

<sup>13</sup> peru qué ñaana be  
Nazaret xquidxi be sínuque  
yendeza be sti guidxi lá  
Capernaum ni nuu uriá ti  
nisa ro' lá Galilea lade ca layú  
sti Zabulón ne Neftalí.

<sup>14</sup> Ne ra yendeza be ti  
guidxi de Galilea, guca ni  
casi uní Dios de ruaa profeta  
Isaías chiqué, ra na:

<sup>15</sup> Galilea nga xquidxi Zab-  
ulón ne Neftalí  
ni nuu neza ze cabe nisadó',  
cherica guiigu Jordán,  
xquidxi cani qué ñunibiá' gá  
Dios.

<sup>16</sup> Bibani ca binni que ndaani  
guelacahui,  
peru yanna ma biiya ca ti  
biaani ro'.

Chiqué uyuu ca lu ná enda  
guti,  
peru yanna ma biiya ca

ximodo zanda iree ca de  
laani,  
casi ñaca para laaca ma birá  
gueela

ne ma nuu biaani guidxi-layú.

<sup>17</sup> Yendá si be guidxi que la? bizulú byuí' né be binni stiidxa Dios, rabi be laaca':

—Lainaba perdón Dios purti ma zeda dxiña dxi guni mandar.

*Ra guridxi Jesús tapa hombre rie guuze'*

(*Mr. 1.16-20; Lc. 5.1-11*)

<sup>18</sup> Ti dxi canazá be uría nisa ro' que, biiya be chupa hombre iropa bi'chi ca', cusaba ca ti tarraya ro' ndaani nisa, canaaze ca benda purti nga xhiiña ca'. Tobi que la? lá Andrés, ne stobi que la? Simón ni rabi cabe Pedru.

<sup>19</sup> Para rabi be laaca':

—Lata nanda naa ne laca zune laatu guuze peru para chi yubi tu binni quedané tu ra nuua'.

<sup>20</sup> Ne oraqueca bisaana ca tarraya stica zinanda ca laabe.

<sup>21</sup> Ra ze be que biiya be xhupa hombre, ne laca iropa bi'chi ca', Jacobo xiiñi Zebedeu, ne Juan bi'chi'. Nuu né ca bixhoze ca ndaani ti canuá, cayuni chaahui ca ca tarraya stica'. Para na Jesús rabi laacabe:

—Lata nanda naa.

<sup>22</sup> Ne oraqueca bisaana cabe bixhoze cabe ne bisaana cabe canuá que, zinanda cabe Jesús.

*Ra bisiidi Jesús stale binni*  
(*Lc. 6.17-19*)

<sup>23</sup> Uzá Jesús irá guidxi sti Galilea, bisiidi ndaani ca yu'du sti ca judíu, ne byui' né laacabe ximodo runi mandar Dios ca xpinni. Ne irá ra

uyé be bisianda be irá enda huará ne irá yuuba sti ca binni que.

<sup>24</sup> Ne zaqué bireeche sti-idxa be de yendá ni irá guidxi sti Siria, ne bedané ca binni que irá binni lidxi ca ni huará, cani napa yuuba', ne cani caguite binidxaba ique, ne cani rudii ataque laa, ne cani ma guti galaa. Bisianda be de irá ca'.

<sup>25</sup> Stale binni uzá nanda laabe, cásica binni Galilea, zaqueca binni de Decápolis, ne de Jerusalén, ne de Judea, ne de cherica guigu Jordán.

## 5

*Ni bisiidi Jesús lu dani*

(*Lc. 6.20-23*)

<sup>1</sup> Biiya si Jesús ma rí binni laa, gudxi'ba lu ti dani ne gurí raqué. Oraque bidxiña irá cani jma riuu nú laabe para iziidi ca'.

<sup>2</sup> Para bizulú be bisiidi be laaca', na be:

<sup>3</sup> —Dichoso ni nanna gastin ga laa nezalú Dios, purti stica irá ni napa Dios ladxi ná'.

<sup>4</sup> Dichoso ni nuu triste yanna, purti zuguijhe dxí Dios ladxitidó' ca'.

<sup>5</sup> Dichoso ni nadó' purti zudii Dios laaca guidxi-layú.

<sup>6</sup> Dichoso ni rinaba ladxitidó' guni ni na Dios, ne qué ganda chu' dxí dede qué guni ni,

purti zacané Dios laa guni ni, ne zieche'.

<sup>7</sup> Dichoso ni riá stobi, purti laca ziá Dios laa.

<sup>8</sup> Dichoso ni nayá ladxitidó'

purti zuuya Dios.

<sup>9</sup> Dichoso ni riguixhe dxí  
enda ridinde,

purti runi xiiñi Dios laa.

<sup>10</sup> Dichoso ni riladxi binni  
laa,

ti cayuni ni na Dios,

purti sti irá ni napa Dios  
ladxi ná'.

<sup>11</sup> Ne dichoso laatu ora rulaa  
binni diidxa laatu,  
ne riladxi ca laatu ne ribee  
ca falsu luguiá tu purti  
xpinne laatu.

<sup>12</sup> Laguieche' neca cazaaca tu  
irá nga,

purti nabé sicarú ni chi gudii  
Dios laatu ibá',  
ne nanna ca tu zacaca bi'ni  
cabe ca profeta sti  
Dios chiqué.

*Zidi ne biaani sti guidxi-  
layú*

(Mr. 9.50; Lc. 14.34-35)

<sup>13</sup> Riuu zidi beela para cadi  
guiu'dxu', ne laatu zeda gaca  
tu casi zidi, ne nuu tu ndaani  
guidxilayú para cadi initilú  
pe ni. Peru pa nidi'di enda  
naxí sti zidi que la? ma  
qué niquiiñe ni para gasti  
sínuque para ixii ni layú ne  
ñutu ñee cabe ni.

<sup>14</sup> Ra usihuinni tu enda  
nacha'hui sti Dios lade binni  
la? casi ñaca cuzaani tu.  
Laudii lugar ihuinni biaani  
stitu casi rihuinni biaani sti  
ti guidxi zuba ique dani.

<sup>15</sup> Purti qué rucaa gui cabe  
lámpara ne cu' cabe laa xa'na  
dxumi, sínuque ruzuhuaa  
cabe ni lu ti mexa' para gudii  
ni biaani irá binni ni nuu  
ndaani yoo que.

<sup>16</sup> Yanna laatu, lagaca casi  
biaani que ti gu'ya binni

pabiá' jneza runi tu ne  
usisaca ca Bixhoze tu ni nuu  
ibá'.

*Ra bisiidi Jesús xi na ley*

<sup>17</sup> Cadi zácxaya tu zeda  
uchiaya ley ni bidii Dios  
Moisés, ne ni bicaa ca  
profeta lu Xqui'chi Dios,  
purti cadi nga zeda gune'  
sínuque zeda gune' cumplir  
irá xixé ni bicaa cabe que.

<sup>18</sup> Peru gabe ca' laatu, laga  
nuu ru ibá' ne guidxilayú,  
qué ziaana nin tindaa lu ley  
sin gaca cumplir, nin ti letra  
ne nin ti puntu.

<sup>19</sup> Nga runi tutiica uchiá  
neca ti guisi si lu tobi de ca  
mandamiento ne zacá gusi-  
idi ni binni la? huaxié'  
zasaca lade ca xpinni Dios.  
Peru ni guni irá ni na man-  
damiento, ne usiidi ni binni  
la? laa huaxa zasaca lade ca  
xpinni Dios.

<sup>20</sup> Purti gabe ca' laatu, pa  
qué guni tu jneza jma que  
modo runi ca maistru de ley  
ne ca fariseu ni nuu yanna  
la? qué ziuu tu lade ca  
xpinni Dios.

*Enda ridxiuchi*

(Lc. 12.57-59)

<sup>21</sup> Huayuna diaga tu xi  
gudxi Dios ca bixhoze gola tu  
chiqué, cadi guuti ca', ne pa  
guuti ca ziaba ná ca'.

<sup>22</sup> Peru naa rabe laatu, tu-  
tiica gapa né stobi xiana la?  
laca ma bichee ne ziaba ná'.  
Ne tutiica gabí stobi binni  
guidxa la? zusaba ná justicia  
sti yu'du laa. Ne tutiica  
gabí stobi didxa guidxa la?  
cuyubi che gabía.

<sup>23</sup> Ne pa zeda saanu ti ofrenda lu altar para Dios ne guietenala'dxu bichee neu tuuxa la?

<sup>24</sup> bisaana gá ofrenda stiu' raqué, uyé biene né ni bichee neu que, ne óraque bigueta yetixhe ofrenda stiu' lu altar.

<sup>25</sup> Pa chiné tuuxa lii ra nuu justicia la? biyubi gaca neu laabe tobi si laga ze ru tu neza, ti cadi uchiña be lii lu juez, pacaa zutiidi juez lii lu ná ca gendarme ne zaguu ca lii lidxi guiba'.

<sup>26</sup> Gabe ca' lii, qué zaree lu raqué dede qué qui'xu irá ni nuzaabu'.

*Enda riuu né ni cadi xheela'*

<sup>27</sup> Laatu nanna tu xi na ley: "Iruti chu' né ni cadi xheela'."

<sup>28</sup> Peru naa rabe laatu, neca chu'la'dxi si tuuxa ti gunaa ni cadi xheela', ne icá ique chu' né laabe la? ma bichee, neca qué ñuu né pe laabe.

<sup>29</sup> Pa nuu xiixa ruuya lu ne ruquiinde ni lii gu'nu ni cadi jneza la? bixele de laani, partí jma huaxié' naná zaca para lii ixele lu de laani bia' naná zaca para lii pa cheu' gabiá, partí qué ziuu dxi ireeu de raqué.

<sup>30</sup> Ne pa nuu xiixa ni racala'dxu tidi lu ná lu', ne pur laani chi uchee lu la? bixele de ra nuu ni, partí jma huaxié' naná zaca para lii uniti lu ni, que initilú lu' pa cheu' gabiá. Nga runi pa nuu xiixa ni runi pur gu'nu ni cadi jneza la? bisaana ni nagueenda, pacaa zuchee

lu', ne ora ma bichee lu la? zusaba ná Dios lii.

*Enda rilaa né xheela'*  
(Mt. 19.9; Mr. 10.11-12;  
Lc. 16.18)

<sup>31</sup> Laatu huayuna diaga tu na lu ley: "Tutiica gacala'dxi gusaana xheela la? gaca divorciar ne laabe."

<sup>32</sup> Peru naa rabe', ni usaana xheela', neca qué nuchee né xheela laa la? cuchee, partí cayuni pur gapa xheela jnadxii. Ne zaqueca tutiica ichaganá ti gunaa ni ma bisaana xheela la? cuchee, partí ma nuu né xheela binni.

*Xi naca enda runi jurar*

<sup>33</sup> Laca huayuna diaga tu xi gudxi Dios ca bixhoze gola tu chiqué: "Tutiica guni jurar chi guni xiixa para Dios la? naquiiñe guni cumplir ni ma uní."

<sup>34</sup> Peru naa rabe laatu, cadi lica pe guni jurar tu, nin pur ibá', partí racá nga zuba Dios,

<sup>35</sup> nin pur guidxilayú partí racá zuhuaa ñee be, ne nin pur Jerusalén, partí nga nga xquidxi Rey ni nandxó' ne nga nga Dios.

<sup>36</sup> Ne zaqueca cadi guni jurar tu pur ique tu, partí qué zanda guni tu pur indani guicha ique tu adxé color, gaca ni naquichi o nayaase'.

<sup>37</sup> Ora riní' tu la? lainí' "ya" pa huandí zuni tu ni, o pa qué zuni tu ni la? lainí' "co'", peru cadi usigui tu ne cadi cu' ru tu jma juramentu lú ni, partí cadi de Dios zeeda irá nga.

*Enda ruquixe ni guni stobi laa*  
(Lc. 6.29-30)

<sup>38</sup> Huayuna diaga tu xi cá lu ley: "Pa gaxha cabe ti chu lú lu la? guxha ti chu lú cabe. Ne pa gaxha cabe ti laya lu la? guxha ti laya cabe."

<sup>39</sup> Peru naa cayabe laatu, pa ucaa lú cabe laatu la? cadi ucaa lú tu laacabe. Ne pa chu' tu capa ti ladu xhaga tu la? laudii ca né sti ladu.

<sup>40</sup> Ne tu gacala'dxi tinde né laatu para gaxha xcamixa tu la? lausaana né ca laa xhamarra tu.

<sup>41</sup> Ne pa chu' tobi de cani runi mandar uguá' laatu bultu sti' ti kilómetru la? laguá' ni chupa kilómetru.

<sup>42</sup> Ni inaba xiixa laatu, laudii ni laa, ne ni qui'ñé laatu, lautiíñe laa.

*Enda ranaxhii ni nanala'dxi laa*  
(Lc. 6.27-28, 32-36)

<sup>43</sup> Laca na ley ganaxhii tu cani nadxii laatu, ne gaca nanala'dxi tu cani nanala'dxi laatu.

<sup>44</sup> Peru naa rabe': Laganaxhii cani nanala'dxi laatu, ne lainí' né Dios pur cani riguu dí laatu. Lagacané cani runi pur uchiichi laatu, ne lainaba lu Dios pur cani riladxi laatu.

<sup>45</sup> Laguni zacá ti chi ndee tu Bixhoze tu ni nuu ibá', partí laa rudii lugar guzani gubidxa sti ra nuu cani nacha'hui ne ra nuu cani nadxaba', ne rusaba nisa guie ra nuu cani runi ni na, ne ra nuu cani qué runi ni na.

<sup>46</sup> Purtí pa ganaxhii tu cani nadxii si laatu la? ñee na tu zacaa tu xiixa de Dios pur nga la? Cadi xa laca nga ca runi cani ruquixe impuestu, ne napa tu laaca de malu.

<sup>47</sup> Ne pa gulabi tu cani ridxaaga si laatu la? xi caguu tu lú ni ya'. Cadi xa laca nga ca runi cani qué runibiá' Dios.

<sup>48</sup> Nga runi lagaca nacha'hui ne irá binni, cásica nacha'hui Bixhoze tu ni nuu ibá'.

## 6

*Enda nacha'hui ni risaca*

<sup>1</sup> Laguuya gá qué chi guni tu ni nacha'hui nezalú si binni para si gudxiiba ca laatu. Purtí pa guni tu ni para si gu'ya binni la? qué zacaa tu gasti de Bixhoze tu ni nuu ibá'.

<sup>2</sup> Nga runi cadi guni tu casi runi cani na nacha'hui peru cadi dxandí ni laa, partí ora chi gudii ca guna ndaani yu'du o lu calle, rucaa ca ridxi para ganna binni xi bidii ca', peru ngue si nga laani.

<sup>3</sup> Peru laatu ora gudii tu guna la? laguni ni pa ganda nin cadi ganna ti chu ná tu xi cayuni sti chu,

<sup>4</sup> ne zacá qué zanna iruti pa cudii tu guna sínunque Bixhoze si tu ni ruuya ni runi binni ra naga'chi', ne laa nga quixe ni bi'ni tu que.

*Ximodo iní' né binni Dios*  
(Lc. 11.2-4)

<sup>5</sup> Ne ora iní' né tu Dios la? cadi guni tu casi ca binni ni na nacha'hui peru cadi dxandí ni laa. Riula'dxi

ca uzuhuaa ca ndaani yu'du para ini' né ca Dios. O pacaa la? runi ca ni lu calle para gu'ya binni. Gabe ca' laatu, zaa usisaca binni laacabe peru ngue si nga laani.

<sup>6</sup> Peru laatu, ora chi iní' né tu Dios la? lachuu ndaani lidxi tu, lauseegu ra puerta ne lainí' né Bixhoze tu ni qué rihuinni, ti laa ruuya ni runi binni ra naga'chi', ne zaguixe laatu.

<sup>7</sup> Ne ora ma caní' né tu laabe la? cadi utale tu diidxa casi runi ca binni ni qué runibiá' Dios, purti zácxaxa ca tisi iní' ca stale diidxa zucaa diaga be laaca'.

<sup>8</sup> Nga runi cayabe laatu, cadi gaca tu casi laacabe, purti maca nanna Bixhoze tu xii nga caquiiñe tu ante inaba tu ni laa.

<sup>9</sup> Peru laatu la? sicarí nga lainí' né Dios:  
Bixhoze du ni nuu ibá',  
rinaba du gusisaca irá binni lii.

Ne idxiña dxi guni mandar lu'

<sup>10</sup> ne gaca ni na lu'.

Cásica raca ni ibá',  
zaqueca gaca ni ndaani guidxilayú.

<sup>11</sup> Dané laadu endaró tidi né du dxi.

<sup>12</sup> Bisiaanda ni ruché' né du lii,  
casi rusia'nda du ni ruchee né cabe laadu.

<sup>13</sup> Ne cadi udiiu lugar cuba  
yu binidxaba laadu,  
sínuque bilá laadu de lu ná  
be.

Purti lii nga jma nandxó' lo'  
ne jma risaca lu que irá xixé,

ne qué ziuu dxi guiaana dxí lu de guni mandar lu'. Amén.

<sup>14</sup> Pa guni perdonar tu ni guni binni laatu la? laca zuni perdonar Bixhoze tu ni nuu ibá' laatu.

<sup>15</sup> Peru pa qué guni perdonar tu ni guni binni laatu la? laca qué zuni perdonar Bixhoze tu ni nuu ibá' laatu.

### *Xi na Jesús de enda riaana sin go*

<sup>16</sup> Ne ora gusaana tu de go to para iní' né tu Dios la? cadi guni tu lí tu nayati casi runi cani riula'dxi udxiiba binni laa, purti runi ca lí ca nayati para si gu'ya binni biaana ca sin̄ ño ca'. Gabe ca' laatu zaa usisaca binni laacabe peru ngue si nga laani.

<sup>17</sup> Peru pa guiaana tu sin go to la? lauzaa begu ique tu, ne laquiibi lí tu,

<sup>18</sup> ti qué ganna iruti pa biaana tu sin ño to sínuque Bixhoze si tu ni qué rihuinni, ti laa nga nanna ne ruuya ni runi binni ra naga'chi ne laa nga quixe ni laatu nezalú binni.

### *Ni dxandí risaca (Lc. 12.33-34)*

<sup>19</sup> Cadi guyubi tu gapa tu stale ni risaca ndaani guidxilayú ri', purti zanda go bandaa ni ne icá tini ni ne chu' gubaana cuana ni.

<sup>20</sup> Sínuque laguyubi gapa tu ni risaca ibá' purti ngue qué zo bandaa laa ne qué zacá tini ne qué ziuu gubaana cuana laa.

<sup>21</sup> Purti ra nuu ni risaca para laatu la? raqueca nuu ladxidó' to.

*Biaani sti cuerpu*  
(Lc. 11.34-36)

<sup>22</sup> Guielú tu nga zeda gaca casi biaani stí cuerpu stitu. Nga runi pa ruyubi tu gu'ya tu ni jneza la? ziaani xquenda biaani tu.

<sup>23</sup> Peru pa ruyubi tu gu'ya tu ni cadi jneza la? zacahui xquenda biaani tu. Ne pa ñui' ni napa tu de biaani ca la? pabiá' nacahui ñaana tu.

*Dios o bidxichi*  
(Lc. 16.13)

<sup>24</sup> Iruti zanda gapa chupa xpixuaana ne guni ni na iropa cabe tobi si tiru, purti jma zanaxhii be tobi ne zaca nanala'dxi be stobi, o pacaa jma zacá nú be ngue ne qué zazaala'dxi be stobi que. Zaquea qué zanda di ganaxhii tu Dios ne ganaxhii ca tu bidxichi.

*Rapa Dios ca xiiñi'*  
(Lc. 12.22-31)

<sup>25</sup> Nga runi cayabe laatu cadi cu' xa ique tu ximodo ibani tu, xi go to o xi gue tu, nin cu' xa ique tu xi cuaqui tu. Purti cadi para go si tu napa tu enda nabani, ne cadi para cuaqui si tu lari nuu tu.

<sup>26</sup> Laguuya ca mani huiini ni ripapa. Qué riguu ca biní ne qué ribee ca guela, ne qué ruchá ca troja, peru rudii Bixhoze tu ni nuu ibá' ni go ca'. Ñee cadi jma risaca tu que laacame la?

<sup>27</sup> Necá ñuu tu xizaa ne tuyubi tu modo nibani tu

xcaadxi, ñee ñanda nibani tu jma que bia' dxi nexhe ibani tu la?

<sup>28</sup> Ne xiñee riuu tu xizaa pur ni gacu tu ya'. Laguuya modo rigaa ca liriu ni nuu ndaani gui'xhi', neca qué runi ca dxiiña ne qué riguiba ca',

<sup>29</sup> Peru nin rey Salomón qué ñanda nuzuchaahui casi laacani neca nabé bisaca.

<sup>30</sup> Ne pa ruzuchaahui Dios ca guie' gui'xhi neca yanadxí si nagá' ca' ne ixí ma bibidxi ca para icá gui ca la? ñee qué runi cre tu pa zudii be ni cuaqui tu la?

<sup>31</sup> Nga runi cadi chu' tu xizaa ne cadi na tu: "Xi idó' no, o xi idé' nu, o xi gacu nu ya'."

<sup>32</sup> Purti nga nga ni ruyubi ca binni ni qué runibiá' Dios, peru ma nanna Bixhoze tu ni nuu ibá' xi irá cayaadxa laatu.

<sup>33</sup> Peru nirudó' laguyubi guni mandar Dios ndaani ladxidó' to ne sa tu modo na, ne óraque zudii laatu cani riuu tu xizaa pur laa.

<sup>34</sup> Nga runi cadi chu' tu xizaa de ni chi gaca ixí', purti ixí ru nga gu'ya tu xi gaca'. Lagucaa ique si de ni naquiiñe tu yanadxí.

## 7

*Enda rudxiiba donda ique stobi*

(Lc. 6.37-38, 41-42)

<sup>1</sup> Cadi gudxiiba lu donda ique stobi, ti qué quiba donda ique lu'.

<sup>2</sup> Parti donda ca gudxiiba lu ique stobi que, ngue ca guiaana luguiá lu'. Parti cásica gu'nu stobi la? za-queca gaca lu'.

<sup>3</sup> Pa nuu tindaa bandadi ndaani lú lu la? ximodo zanda gu'ya lu tindaa guixi nuu lú stobi ya'.

<sup>4</sup> Ñee za'bu stobi que: "Dané cuee guixi nuu lú lu ca", ne lii zaa nuu bandadi que lú lu la?

<sup>5</sup> Cadi quite lu binni, gulee ca bandadi nuu lú lu ca, ti ganda gu'ya chaahui lu para cueeu guixi ni nuu lú stobi.

<sup>6</sup> Cadi gudii tu xiixa ni zeeda de Dios cani qué iquiiñe para laani, casi ñaca nudii tu ni bi'cu'. Zanda ca guni cabe casi runi bi'cu', ucaa lú cabe laatu ne guxuixe cabe laatu. Risaca stiidxa Dios casi ti perla, ne qué ñuu dxi nundoou perla lu bihui para guxhaata ñee si ni.

*Lainaba, lauyubi ne lauxhidxi ná'*

(Lc. 11.9-13; 6.31)

<sup>7</sup> Lainaba lu Dios, zudii laatu. Lauyubi, zadxela tu. Lauxhidxi ná', zaxele chu' tu.

<sup>8</sup> Parti tutiica inaba zacaa, ne ni uyubi zadxela, ne ni uxhidxi ná zaxele chu'.

<sup>9</sup> Lácaxa nuu tuuxa lade tu, pa ninaba xiiñi laa ti gueta, nudii ti guie.

<sup>10</sup> O pa ninaba be laa ti bendia, ñee nudii laabe ti beenda la?

<sup>11</sup> Pa laatu cadí nacha'hui tu casi Dios ne nanna tu gudii tu ni galán xiiñi tu la? lágaxa

Bixhoze tu ni nuu ibá' qué gudii ni galán cani inaba laa.

<sup>12</sup> Nga runi, irá ni racala'dxi tu guni binni laatu la? ngue ca laguni laaca', partí zacá nga na ley ne nga ca bicaa ca profeta.

*Chupa neza nuu*

(Lc. 13.24)

<sup>13</sup> Laguiuu neza ni napa puerta nabé', partí neza ni xilaga puerta sti la? nga neza ladu rinitilú binni, partí ru-luí' jma galán neza que, ne stale tu riuu ladu que.

<sup>14</sup> Peru neza enda nabani la? jma nabé puerta ne na-gana neza sti', ne huaxié' tu ridxela ni.

*Pur ni guni binni zahuinni tu laa*

(Lc. 6.43-44)

<sup>15</sup> Laguuya gá laatu ne ca profeta ni na zeeda de Dios peru cadi dxandí ni, partí casi guiuu cabe laatu ru-luí' nadó' cabe casi dendxu', peru ndaani ladxidó' cabe naduxhu cabe casi gueu'.

<sup>16</sup> Peru zahuinni lu xhiiña cabe tu laacabe ne pa dxandí zeeda cabe de Dios. Ñee na tu zanda icá uva lu yaga guichi biruba', o icá du'ga lu yaga bii la?

<sup>17</sup> Ndi nga laani: ti yaga ni nazaaca, zudii cuananaxhi galán, peru ti yaga yuudxu la? zudii cuananaxhi ni qué zaquiiñe'.

<sup>18</sup> Ti yaga ni nazaaca la? qué zacá bi'xhu cuananaxhi sti', ne zaqueca ti yaga qué iquiiñe la? puru bi'xhu ricá lú.

<sup>19</sup> Irá yaga ni qué rudii cuananaxhi cha'hui la? rugá cabe laa para icá gui.

<sup>20</sup> Nga runi rabe laatu, pur ni guni cabe zacabiá' tu tu laacabe.

*Cadi irá ziuu ra runi mandar Dios*  
(Lc. 13.25-27)

<sup>21</sup> Cadi irá ni gabi naa, Señor, Señor, ziuu ra runi mandar Dios, sínunque cani guni si ni na be.

<sup>22</sup> Stale tu zabi naa dxi que: "Señor, ñee cadi byuí du stidxa lu la? ne cadi pur lá lu gulee du binidxaba de binni la? ne cadi laca pur lá lu bini du stale milagru la?"

<sup>23</sup> Oraque zabe laaca': "Qué runebia'ya laatu. Laguiree de ra nuaa', partí qué ñuu dxi ñuni tu jneza."

*Ti hombre nuu xpiaani ne tobi nahuati*

(Lc. 6.47-49; Mr. 1.22)

<sup>24</sup> Nga runi tutiica gucaa diaga ca diidxa ri' ne guni ni na cani la? zeda gune laa casi ti hombre ni nuu xpiaani', bicuí lidxi lu guie.

<sup>25</sup> Biaba nisa guie bidxá guigu', biete bi yooxho', ne irá nga bidxela saa yoo que, peru qué ñaba ni partí zuba ni lu guie.

<sup>26</sup> Peru tutiica gucaa diaga ca diidxa ri' ne qué guni ni na cani la? zeda gune laa casi ti hombre huati ni bicuí lidxi lu yuxi.

<sup>27</sup> Biaba nisa guie, bidxá guigu', biete bi yooxho' bidxela saa yoo que, ne dede uxidxi ra bixá ni.

<sup>28</sup> Ne ora biluxe uni' Jesús irá nga, nabé bidxagayaa ca binni que modo bisiidi be,

<sup>29</sup> partí bisiidi be casi rusidi tobi ni zanda guni mandar, ne cadi casi rusidi ca maistru de ley.

## 8

*Ra bianda tobi napa lepra*  
(Mr. 1.40-45; Lc. 5.12-16)

<sup>1</sup> Ne ora biete Jesús de lu dani que, yenanda stale binni laa.

<sup>2</sup> Lade ca binni que zeeda ti hombre huará, napa lepra. Bidxiña be bizuxibi be xañee Jesús ne na be rabi be laa:

—Señor, nanna zanda guienda lu naa, pa na lu'.

<sup>3</sup> Para gudixhe ná Jesús luguiá be ne rabi laabe:

—Zusianda lii.

Ne oraqueca bianda be ne nayá biaana ladi be.

<sup>4</sup> Para na Jesús rabi laabe:

—Biiya gá qué chi tidxu ni iruti', sínunque uyé ra nuu sacerdote ne bidii ti ofrenda casi bicaa Moisés guni binni ora ma bianda, para ulu' lu binni ma bianda lu'.

*Ra bianda jmozo ti capitán*  
(Lc. 7.1-10)

<sup>5</sup> Ne ora ziyyuú Jesús ndaani guidxi Capernaum, bidxiña ti capitán ne na rabi laa:

<sup>6</sup> —Señor, rinaba lii guienda lu ti mozo stinne'. Nexhe be ralidxe', ma guti galaa be, ne cayudu yuuba laabe.

<sup>7</sup> Para rabi be laa:

—Ziaa' ne zusianda laabe.

<sup>8</sup> Oraque na capitán que rabi laabe:

—Iruti nga naa para cheu' ralidxe'. Uní si, ne zacá zianda mozo stinne'.

<sup>9</sup> Purti nuu tu runi mandar naa ne laca nuu ca soldadu ne rune mandar laaca'. Pa gabe tobi che la? zie, ne pa gabe stobi gueeda la? zeeda, ne pa gabe mozo stinne', bi'ní ndi la? zuni.

<sup>10</sup> Ora bina diaga be xi uní xaíque que la? bidxagayaa be ne na be rabi be cani nanda laabe que:

—Laguuya', nin lade cani za de Israel qué huadxela nin tobi ni napa fe bia' napa hombre ri'.

<sup>11</sup> Ne gabe ca' laatu ziuu dxi gueeda stale binni de idubi naca guidxilayú ne ziuu né ca Abraham ne Isaac ne Jacob ra runi mandar Dios.

<sup>12</sup> Laga cani nexhe ñuu, ca ngue pe qué ziuu, sínunque zalá ca lu guelacahui partí qué ñuni cre ca', ne raqué gu'na ca' dede go yaa ca guidi ruua ca'.

<sup>13</sup> Ne óraque rabi be capitán que:

—Guyé yanna, ne cásica bini cre lu ca, zacá zaca ni.

Ne dxandí oraqueca bianda mozo que.

### *Ra bianda suegra Pedru*

(Mr. 1.29-31; Lc. 4.38-39)

<sup>14</sup> Oraque guyé Jesús ralidxi Pedru, ne biiya nexhe né suegra be xindxá'.

<sup>15</sup> Para guda'na Jesús ná suegra be ne biree xindxá' que de laa. Ne oraqueca bisa gunaa que bidii ni gudó cabe.

*Bisianda Jesús jma binni huará*

(Mr. 1.32-34; Lc. 4.40-41)

<sup>16</sup> Huaxhinni que bedané cabe stale binni ni caguite binidxaba ique, ra nuu Jesús. Ne ti diidxa si uní be biree ca binidxaba que. Ne laca bisianda be stale binni huará.

<sup>17</sup> Ne guca ni zaqué ti iree ni modo pe uní Dios de ruua profeta Isaías chiqué:

—Gucuaa be irá yuuba stinu ne ziné be ca enda huará.

*Cani racala'dxi sa nanda Jesús*

(Lc. 9.57-62)

<sup>18</sup> Ti tiru biiya Jesús ma rí binni laa, para gunaba tidi sti ladu nisa Galilea que.

<sup>19</sup> Peru nuu ru be raqué beeda ti maistru de ley ra nuu be, na rabi laabe:

—Maistru, racaladxe chi nanda lii ratiica che lu'.

<sup>20</sup> Para rabi be laa:

—Ca mistu gui'xhi napa ca ra guiaana ca', ne ca mani huiini laca napa ca lidxi ca', peru naa nga Hombre Biseenda Dios ne qué gapa nin ra quixhe ique'.

<sup>21</sup> Ne laca beeda tobi de ca discípulu stibe ra nuu be, na rabi laabe:

—Señor, bidii lugar ucaache sia' bixhoze ti chi nanda lii.

<sup>22</sup> Peru na be rabi be laa:

—Dananda naa. Bisaana nga guni cani qué na gueda nanda naa.

*Gudixhe dxi Jesús bi yooxho'*

(Mr. 4.35-41; Lc. 8.22-25)

<sup>23</sup> Biuu be ndaani canuá que ne laca biuu ca discípulu stibe.

<sup>24</sup> Ne mala biete ti bi yooxho', ne biasa ola dede biuu nisa ndaani canuá que, peru ma nisiaasi be óraque.

<sup>25</sup> Para bicuaani ca laabe, ne na ca rabi ca laabe:

—Gucané laadu, pacaa zati nu.

<sup>26</sup> Para rabi be laaca':

—Xiñee cadxibi tu. Aque huaxié' napa tu fe xa, hombre ca'.

Oraque biasa be ne gudxi be bi yooxho que guiaana dxí, ne zaqueca gudxi be ca ola que, ne oraqueca guta dxí cani.

<sup>27</sup> Nabé bidxagayaa ca hombre que ne na ca':

—Tu naca hombre ri pue, dede bi ne nisa runi ni na.

*Chupa hombre riguite binidxaba ique*

(*Mr. 5.1-20; Lc. 8.26-39*)

<sup>28</sup> Ra yendá cabe cherica nisa que, biuu cabe neza Gadara. Ne raqué bidxaga lú be chupa hombre ni riguite binidxaba ique, biree ca de lade ba'. Iruti randa ridi'di neza ra nuu ca' purti ricá ca luguiá binni.

<sup>29</sup> Ne bicaa ca ridxi laabe, na ca':

—Xi napa né du lii, Jesús, Xiiñi Dios. Ñee zeda guniná lu laadu ante ganda dxí la?

<sup>30</sup> Zitu huiini de ra nuu cabe que, canayó jma bihui.

<sup>31</sup> Para na ca binidxaba que rabi laabe:

—Pa chi ndeeu laadu de ca hombre ri la? bidii lugar chu' du luguiá ca bihui rica'.

<sup>32</sup> Oraque rabi be laaca':

—Laché.

Ne oraqueca biree ca yechuu ca luguiá ca bihui que, ne mala biete ti ca bihui que de ra dxi'ba ca', yeguiba ca ndaani nisa ne raqué guti ca'.

<sup>33</sup> Oraque bixooñe cani cayapa laacame, de yendá ca ndaani guidxi que, ne byui' né ca irá binni xi guca', ne ni bizaaca ca hombre ni udxite binidxaba que.

<sup>34</sup> Para biree idubi guidxi que yechaga lú ca Jesús ne gudxi ca laabe iree be de xquidxi ca'.

## 9

*Bianda ti hombre nayati galaa*

(*Mr. 2.1-12; Lc. 5.17-26*)

<sup>1</sup> Oraque biuu Jesús ndaani ti canuá ne udi'di sti ladu nisa que, para biuu xquidxi.

<sup>2</sup> Raqué nuu be bedané cabe ti hombre nexhe lu ti luna', ma guti galaa. Ora bi'ya be pabiá' napa cani bedané binni huará que fe la? na be rabi be laa:

—Bieche, xiiñe', purti ma bine perdonar xpecadu lu'.

<sup>3</sup> Nuu caadxi maistru de ley raqué ne caní' ca ndaani ladxidó' ca', na ca': "Cayuni ndi laa Dios."

<sup>4</sup> Peru ma nanna Jesús xi caní' ique cabe, para na rabi laacabe:

—Xiñee caní' tu ni cadi jneza ndaani ladxidó' to.

<sup>5</sup> Yanna lagabi naa, uná nga jma qué igana ya', gabe laabe ma uca perdonar

xpecadu be la? o gabe laabe  
guiasa be ne sa be.

<sup>6</sup> Naa nga Hombre  
Biseenda Dios ne para ganna  
tu zanda gune perdonar  
pecadu ndaani guidxilayú ri  
la? laguuya ni chi gune ri'.

Oraque na be rabi be ni  
huará que:

—Biasa, undisa jluuna lu'  
ne uyé rali'dxu'.

<sup>7</sup> Oraqueca biasa hombre  
que, zibí'.

<sup>8</sup> Ora bi'ya ca binni rí  
raqué ni bi'ni be que la?  
bidxibi ca ne bisisaca ca Dios  
pur enda nandxó' ni gudixhe  
lu ná binni guni.

*Ra uni' né Jesús Mateu  
(Mr. 2.13-17; Lc. 5.27-32)*

<sup>9</sup> De raqué biree Jesús ze',  
ne neza ze be que biiya be ti  
hombre lá Mateu zuba ruua  
ti mexa ra ritixe binni im-  
puestu. Para rabi be laa:

—Dananda naa.

Ne oraqueca biasa, zi-  
nanda laabe.

<sup>10</sup> Ti dxi zuba be ruua  
mexa ndaani ti yoo. Raqué  
zuba be beeda caadxi de cani  
ruquixe impuestu ne cani  
qué rulabi ley, gurí né ca  
laabe ne ca discípulu stibe.

<sup>11</sup> Ne ora bi'ya ca fariseu  
zuba né Jesús laacabe la? na  
ca rabi ca ca discípulu que:

—Xiñee zuba né jmaistru  
tu ca malu ni ruquixe im-  
puestu ne cani qué rulabi ley  
pue.

<sup>12</sup> Ngue bina diaga Jesús,  
para na rabi laacabe:

—Cadi caquiñe cani  
nazaaca doctor sínunque cani  
huará.

<sup>13</sup> Ndi nga ni gudxi Dios  
binni chiqué: "Jma racaladxe  
guiá tu binni, que quedané tu  
ni gusiga'de tu naa." Yanna  
cayabe laatu laché ne laiziidi  
xi na ca diidxa ca, partí cadi  
zeda yube cani nacha'hui  
sínunque cani cuchee.

### *Ejemplu sti novio*

*(Mr. 2.18-22; Lc. 5.33-39)*

<sup>14</sup> Oraque beeda ca  
discípulu sti Juan Bautista  
ra nuu be, ne na ca rabi ca  
laabe:

—Xiñee laadu ne ca  
fariseu, stale tiru riaana du  
sin idó' do, peru ca discípulu  
stiu' qué runi ca zacá.

<sup>15</sup> Para rabi be laaca':

—Ziuu xa cani nuu ra enda  
xheela triste laga nuu novio  
lade ca'. Peru ora ma bi-  
aaxha cabe novio que la?  
óraque huaxa ziaana cabe  
triste.

<sup>16</sup> Iruti ruquiidi tindaa lari  
cubi ra ma gureza ti lari  
yooxho', partí ora guia'ri lari  
que, zadopa lari cubi que ne  
zareza ra bidiiba que, ne jma  
rusi qué zaquiñe ni óraque.

<sup>17</sup> Laca qué rigaa cabe vinu  
cubi ndaani guidi yooxho'  
partí nireza guidi que, ne  
nixii vinu ne niniti guidi que.  
Peru ni runi cabe la? rigaa  
cabe vinu cubi ndaani guidi  
cubi ne óraque nin tobi nin  
stobi qué zaniti.

*Ra bisibani Jesús xiiñi  
Jairu ne bisianda ti gunaa*

*(Mr. 5.21-43; Lc. 8.40-56)*

<sup>18</sup> Caní' ru Jesús ora biuu  
ti hombre naca xaíque sti  
yu'du', bizuxibi xañee be ne  
na:

—Nagasi du' guti xiiñe', perú pa che lu quixhe ná lu luguiá be la? zabani be.

<sup>19</sup> Para biasa né be ca discípulu stibe, zinanda cabe laa.

<sup>20</sup> Ne ra zidi'di be que biree ti gunaa ma napa doce añu de caxii rini, bidxiña neza deche be ne guda'na ñee lari ni nacu be,

<sup>21</sup> partí na neca xhaba si be cana, zianda.

<sup>22</sup> Ne ora guda'na gunaa que xhaba be la? bidxigueta lú be, biiya dxí be laa ne na be:

—Cadi idxibi lu, xiiñe'. Bianda lu partí bini cre lu'.

Ne oraqueca bianda gunaa que.

<sup>23</sup> Ora bedandá be ralidxi xaíque que, biiya be ma nuu músicu cuxhidxi son gue'tu ne rí jma binni raqué cayuni ruidu.

<sup>24</sup> Para na be rabi be laaca':

—Laguiree, partí cadi guti di dxapa huiini ri', sínunque nisiaasi si.

Ne óraque bixidxi ca binni que laabe.

<sup>25</sup> Biree si ca binni que fuera biuu be ndaani yoo, ne gunaaze be ná dxapa huiini que para biasa.

<sup>26</sup> Ne bireeche ni bi'ni be que idubi naca guidxi que ne xcaadxi guidxi ni nuu gaxha de raqué.

*Bianda chupa ni nacheepa lú*

<sup>27</sup> De raqué biree be ze be, ne yenanda chupa ni nacheepa lú laabe, bicaa ca ridxi na ca':

—Xiiñi David, biá laadu.

<sup>28</sup> Oraque biuu be ndaani ti yoo ne beeda cani nacheepa lú que ra nuu be. Para rabi be laaca':

—Ñee runi cre tu zanda gusianda laatu la?

—Runi cre du, Señor, na ca'.

<sup>29</sup> Oraque guda'na be lú ca ne na be:

—Pa dxandí runi cre tu zanda gune ni la? zusianda laatu.

<sup>30</sup> Ne oraqueca bixeles lú ca', ne biinda ca be lú ca cadi gabi ca ni iruti'.

<sup>31</sup> Peru laaca laga bicheeche ca stiidxa be idubi naca guidxi que.

### *Bisiní' Jesús ti mudu*

<sup>32</sup> Nécati ziree cani bianda que, biuu xcaadxi binni, né ca ti hombre ni qué randa riní' partí riguite binidxaba ique.

<sup>33</sup> Peru casi gulee Jesús binidxaba que la? uní' be. Ne nabé bidxagayaa irá binni ni nuu raqué ne na ca':

—Qué huayuu dxi ihuinni cosa sicarí lade ca xpinni Israel, pa cadi yanna ru'.

<sup>34</sup> Peru ca fariseu na ca':

—Nuu né be xaíque sti binidxaba', nga runi randa ribee be ca binidxaba ni riguite ique binni.

### *Modo biá Jesús irá binni*

<sup>35</sup> Ne guzá Jesús irá guidxi ro' ne irá guidxi huiini', canausiidi ndaani ca yu'du', ne canayuí' né laacabe ximodo runi mandar Dios ca xpinni, ne canausianda irá enda huará ne irá yuuba ni napa ca binni que.

<sup>36</sup> Ora bi'ya be irá ca binni que la? biá be laaca', partí qué ganna ca xi guni ca ne iruti cayaca né laaca'. Nuu ca casi dendxu ni qué gapa pastor.

<sup>37</sup> Para rabi be ca discípulu stibe:

—Ma stale binni cabeza si ucaa diaga stiidxa Dios. Tu güi ni nga huaxié'.

<sup>38</sup> Yanna lainaba lu Dios useenda stale tu guni dxiiña ca, ti laabe nga xpixuaana ni.

## 10

*Ra zeeda lá irá apóstol*

(*Mr. 3.13-19; Lc. 6.12-16*)

<sup>1</sup> Oraque guridxi be doce discípulu stibe que ne gudixhe be irá ndi ladxi ná ca': cuee ca binidxaba ni riguite ique binni, ne gusianda ca intiica enda huará ne yuuba'.

<sup>2</sup> Ndi nga lá doce apóstol que: primé ca Simón, ni rabi cabe Pedru, ne Andrés bi'chi', raqué ma nanda Jacobo xiiñi Zebedeu, ne Juan bi'chi'.

<sup>3</sup> Raqué ma nanda Felipe, ne Bartolomé, ne Tomás ne Mateu ni biquixe impuestu chiqué, ne Jacobo xiiñi Alfeu, ne Lebeu ni rabi cabe Tadeu,

<sup>4</sup> ne Simón ni guyuu lade ca cananista chiqué, ne Judas Iscariote ni bitoo Jesús que.

*Ra yegüí ca apóstol stiidxa Dios*

(*Mr. 6.7-13; Lc. 9.1-6*)

<sup>5</sup> Biseenda be idubi doce que, peru ora ma chi iree ca', na be rabi be laaca':

—Cadi che tu ra nuu cani cadi judíu, ne cadi guiuu tu xquidxi ca samaritanu.

<sup>6</sup> Laché ra nuu cani za de Israel, cani ruluí' dendxu ni cananiti.

<sup>7</sup> Ne lagabi laaca ma zeda dxiiña dxi guni mandar Dios.

<sup>8</sup> Lausianda cani napa lepra ne xcaadxi enda huará, ne lausibani cani ma guti, ne lacuee ca binidxaba ni riguite binni. Qué niguixe tu saca gudixhe irá ndi lu ná tu guni tu. Yanna laguni cani sin guiaxa tu.

<sup>9</sup> Cadi chiné tu oro, nin plata, nin cobre,

<sup>10</sup> ne cadi chiné tu ra idxá ni iquiñe tu ladu ze tu, nin chiné tu chupa muda lari, nin chupa par guela guidi, nin bastón, partí naquiiñe udii cabe ni go ni canayuni dxiiña'.

<sup>11</sup> Ne guidxi tiica chu' tu, pa guidxi huiini o pa guidxi ro', lainaba diidxa ralidxi tuuxa ni nacha'hui', ne laguaana ralidxi be de ora ma ixele tu de guidxi que.

<sup>12</sup> Ne ora guiuu tu ralidxi cabe, laugapa diuxi.

<sup>13</sup> Ne ora ma nuu tu raqué, lacuu ndaaya yoo que, ne pa aca cabe nacha'hui ne laatu la? ziaana ndaaya stitu ndaani yoo que, peru pa co' la? zabigueta ni luguiá tu.

<sup>14</sup> Pa nuu paxaraa qué na cabe guiaana tu, ne qué na cabe gucaa diaga cabe laatu la? laguiree de ra yoo que, o de guidxi que, ne ora ma chi iree tu de raqué la? laquibi ñee tu, ti cadi chiné tu nin yu stícabe.

<sup>15</sup> Ne gabe ca' laatu, dxi cuidxi Dios cuenta binni guidxilayú la? jma pe zusaba ná be ca binni guidxi que, que ca binni Sodoma ne Gomorra.

*Zadi'di cabe ra nagana*

<sup>16</sup> Cuseenda laatu casi naca nuseenda dendxu lade gueu'. Nga runi lagataná casi nexhená beenda'. Peru laca lagaca nadó' casi nadó' paloma.

<sup>17</sup> Laguuya gá laatu ne ca binni que partí ziné ca laatu ra nuu ca justicia stica ni nuu ndaani yu'du ne zaguine ca laatu raqué.

<sup>18</sup> Zuchiña cabe laatu ra nuu ca gobernador ne ra nuu rey partí xpinne laatu, ne zacá laca zanda güi tu stiidxa nezalú cani cadi za de Israel.

<sup>19</sup> Ne ora uchiña cabe laatu raqué la? cadi chu' tu xizaa xi iní' tu nezalú cabe o xi gabi tu laacabe. Partí ora ma zuhuua tu nezalú cabe la? zadxela tu xi iní' tu,

<sup>20</sup> partí cadi laadi tu chi iní' tu sínunque Espíritu sti Bixhoze tu ni nuu ibá' nga che de ruaa tu.

<sup>21</sup> Zadxiña dxi neca bi'chi cabe zuluí' cabe para gati', ne zaqueca zuluí' bixhoze cabe laacabe, ne laca ziuu tu guiasa luguiá bixhoze ne gului' bixhoze para gati'.

<sup>22</sup> Zaca nanala'dxi cabe laatu partí xpinne laatu. Peru cani qué ixhacala'dxi dede dxi iluxe irá ni la? zalá.

<sup>23</sup> Pa iladxi cabe laatu ndaani ti guidxi la? laché sti guidxi partí gabe ca' laatu neca guni tu zacá, ca'ru iluxe tidi tu irá guidxi sti Israel dxi

ibigueta Hombre Biseenda Dios.

<sup>24</sup> Qué risaca ni caziidi jma que maistru sti', ne zaqueca qué risaca mozo jma que xpixuaana'.

<sup>25</sup> Nga runi cadi quiche ruua ni caziidi pa guni cabe laa ni runi ca cabe maistru sti'. Pa gabi cabe xpixuaana ti yoo binidxaba la? irá cani nuu né laa ndaani yoo que laca zabi cabe ni laa.

*Tu naquiiñe idxibi nu  
(Lc. 12.2-9)*

<sup>26</sup> Nga runi cadi idxibi tu laacabe, partí ziuu dxi ihuinni irá ni ye'gu lú yanna, ne zaqueca ziuu dxi ganna binni irá ni ga'chi'.

<sup>27</sup> Ni gabe laatu naga'chi', laatu lainí' ni nezalú binni, ne ni usiide laatu xa diaga si tu la? laqui'ba ique yoo ne lainí' ni reciu.

<sup>28</sup> Ne cadi idxibi tu cani ruuti cuerpu si, partí qué zanda guuti cabe alma, sínunque laidxibi ni zanda unitilú alma ne cuerpu ndaani gabia.

<sup>29</sup> Laaca tu nanna tu rido chupa mani huiini pur chupa domi', peru neca qué risaca came, qué ziaba si tobi de laacame layú pa qué na Dios.

<sup>30</sup> Zaqueca ma bigaba be irá xixé guicha ique tu.

<sup>31</sup> Nga runi cadi idxibi tu, partí jma risaca tu que ca mani huiini'.

*Ni qué rituí lú gaca xpinni  
Cristu  
(Lc. 12.8-9)*

<sup>32</sup> Tutiica iní' xpinne laa nezalú binni la? laca zanié xpinne laa nezalú Bixhoze ni nuu ibá'.

<sup>33</sup> Peru ni qué ná iní' pa xpinne laa nezalú binni la? laca qué zanié pa xpinne laa nezalú Bixhoze ni nuu ibá'.

*Beda ndaa saa Jesús binni  
(Lc. 12.51-53; 14.26-27)*

<sup>34</sup> Cadi zácxaxa tu zeda gune binni guidxilayú tobi si, partí cadi nga zeda gune sínuque casi ñaca zedaniá ti espada.

<sup>35</sup> Partí zeda ndaa saa hombre ne bixhoze, ne badu dxaapa ne jñaa, ne gunaa ne suegrá.

<sup>36</sup> Ne ca binni lidxi pe hombre zaca nanala'dxi laa.

<sup>37</sup> Tu jma nadxii bixhoze o jñaa que naa la? qué zaquiiñe para xpinne', ne zaqueca tu jma nadxii xiiñi que naa la? qué zaquiiñe para xpinne'.

<sup>38</sup> Ne tu qué na gacaná ra gueda nanda naa la? qué zaquiiñe para xpinne'.

<sup>39</sup> Ni guyubi ilá xpida ndaani guidxilayú la? zuniti ni ibá', peru ni guniti xpida pur naa guidxilayú la? zadxela ni ibá'.

*Tu irá guiaxa lu xhiña  
Dios*

*(Mr. 9.41)*

<sup>40</sup> Tu uchagalú laatu la? casi ñaca nicaa naa, ne tu icaa naa la? casi ñaca nicaa ni biseenda naa.

<sup>41</sup> Pa nuu tuuxa uchagalú ni canayuí' stiidxa Dios partí Dios biseenda laa la? bia'ca quixe Dios ni canayuí' stiidxa que la? bia' queca quixe laabe. Ne pa nuu

tobi ni ruchagalú tutiica ni nacha'hui la? bia'ca quixe Dios ni nacha'hui que la? bia' queca quixe laabe.

<sup>42</sup> Tutiica uchagalú tobi de ca xpinne ni jma nahuiini ri' ne gudii laabe neca ti vasu nisa partí xpinne laabe la? qué ziaana sin qué quixe Dios laa.

## 11

*Ra uyé ca xpinne Juan  
Bautista ra nuu Jesús  
(Lc. 7.18-35)*

<sup>1</sup> Ne biluxe gudxi si Jesús ca discípulu que xi naquiiñe guni ca la? biree de raqué ze', ziisiidi ne zigüí stiidxa Dios ndaani xquidxi irá cabe.

<sup>2</sup> De ra yeguyoo Juan Bautista gunna de irá ni cayuni Cristu, para biseenda chupa discípulu sti ra nuu be.

<sup>3</sup> Ne ora yendá ca ra nuu be, na ca rabi ca laabe:

—Na Juan pa lii nga ni nexhe gueeda o pa zabeza du stobi.

<sup>4</sup> Para rabi be laaca':  
—Lachitidxi Juan irá ni cayuuya tu ne ni cayuna diaga tu.

<sup>5</sup> Lagüí' né laabe ma riná cani nacheepa lú, ma rizá cani nachiita ñee, ma bianda cani gupa lepra, ma runa diaga ca diaga cuaata', ne ma bibani cani ma guti, ne ma cayuna diaga ca pobre stiidxa Dios.

<sup>6</sup> Dichoso cani guni cre Dios biseenda naa.

<sup>7</sup> Biree si cani biseenda Juan que, bizulú Jesús bizeete laabe lú ca binni que, ne na rabi laacabe:

—Tuu nga yeguuya tu ndaani gui'xhi chiqué. Ñee yeguuya tu tobi ni rulú' ti gueere lase ni runiibi bi laa ladu na la?

<sup>8</sup> Pa cadi nga la? tuu nga yeguuya tu. Ñee yeguuya tu ti hombre zuchaahui la? Co' nja', partí ni zuchaahui zadxela tu laa ndaani lidxi rey.

<sup>9</sup> Tu pe nga yeguuya tu ya'. Ti profeta la? Nga nga laani, ne jma que ti profeta.

<sup>10</sup> De laabe nga ruzeete Xqui'chi Dios ra na:

Zuseenda ti xpinne sa niru lú lu' para guni chaahui neza tidi lu'.

<sup>11</sup> De lade irá binni, qué huaree tobi jma nandxó' que Juan Bautista, peru nuu tu jma nandxó' que laabe ne nga nga tutiica guiuu lade ca xpinni Dios, neca huaxié' laa.

<sup>12</sup> Dede dxi beeda Juan ma cadale xpinni Dios ndaani guidxilayú, ne cayuuya ca stale enda nandxó' stibe, peru laca stale tu racala'dxi gaca xpinni be peru modo na, cadi modo na be.

<sup>13</sup> Ma xadxí uní' ca profeta ne laca cá ni lu ley sti Moisés zadxiña dxi gu'ya binni gaca irá ni cayaca yanna ri'.

<sup>14</sup> Ne pa na tu guiene tu ca diidxa ri la? ziene tu Juan nga Elías ni uní' ca profeta que gueeda.

<sup>15</sup> Tu racala'dxi guiene la? gucaa diaga.

<sup>16</sup> Tu zanda gusaca ca binni nuu yanna ri'. Rusaca laacabe casi xcuidi ni ribí

luguiaa ne rucaa ridxi xcompañeru:

<sup>17</sup> "Bixhidxi du saa Peru qué niná tu nuyaa tu, ne bixhidxi du son gue'tu ne laca qué niná tu ñuuna tu."

<sup>18</sup> Zacá ca runi ca binni ri', partí beeda Juan, ne biiya cabe qué ño ne qué ñe', para na cabe nuu né be binidxaba'.

<sup>19</sup> Yanna ma benda lade cabe. Naa nga Hombre Biseenda Dios, ne ruuya cabe rahua ne ree', ne ma na cabe nalaya ne binigüé' naa, ne ridxaaga ca malu ni ruquixe impuestu ne cani qué rulabi ley. Peru casi na dichu que: "Pur ni runi binni rihuinni tu laa."

*Ca guidxi chi guiana ná'  
(Lc. 10.13-15)*

<sup>20</sup> Oraque bizulú Jesús gudinde né ca binni de ca guidxi ra jma uzá, partí qué niná ca ninaba ca perdón Dios neca biiya ca irá milagru ni bi'ni be.

<sup>21</sup> Na be rabi be laaca':

—Laguuya gá laatu, binni Corazín ne binni Betsaida, partí nabé huahuinni enda nandxó' sti Dios lade tu, peru naguidxi ru ladxidó' to. Pa ñaca nizaya ñune milagru ndaani guidxi Tiro ne ndaani guidxi Sidón bia' ma bine ndaani xquidxi tu ca la? biaa padxí ma ninaba ca perdón ne ñuu ca triste pur irá ni huachee ca'.

<sup>22</sup> Gabe ca' laatu, dxi cuidxi Dios cuenta binni guidxilayú la? jma zusaba ná laatu que ca binni de Tiro ne de Sidón.

<sup>23</sup> Ne laatu, binni Capernaum ca', laatu cabeza tu usisaca Dios laatu, peru jma pe nagueenda guseenda be laatu ra nuu binidxaba'. Purti pa ñaca ñuuya binni Sodoma ca milagru ni ma biyya tu ca la? ma nusaana ca de nuchee ca' ne ma qué nunitilú Dios laaca'.

<sup>24</sup> Peru gabe ca' laatu, dxi cuidxi Dios cuenta binni guidxilayú la? jma zusaba ná laatu que ca binni de Sodoma.

*Latá' irá ni ma bidxaga  
(Lc. 10.21-22)*

<sup>25</sup> Oraque uní' né Jesús Dios, na:

—Bixhoze', lii nga runi mandar lu ibá' ne guidxilayú. Rudiee diuxquixe lii purti cuacaachi lu ni cayuni lu ri' para cadi guiene cani nuu xpiaani ne cani na riene, peru culuí' lu ni cani zeda gaca casi ba'du'.

<sup>26</sup> Ne zacá cayuni lu ni purti zacá guyuula'dxi lu gaca ni.

<sup>27</sup> Oraque rabi be ca binni que:

—Ma gudixhe Bixhoze irá xixé cosa ladxi naya'. Naa nga Xiiñi be ne iruti runibiá' naa jma que laabe, ne zaqueca iruti runibiá' laabe jma que naa ne cani racaladxe gunibiá' laabe.

<sup>28</sup> Latá' ra nuaa irá ni ma bidxaga de cuyubi modo guia ladxidó', cani ma qué ganda guni irá ni rucaa cabe laa guni, purti para laa rului' naguixhe cabe ti ayubu xa

yanni. Latá' ra nuaa', zazila'dxi ladxidó' to.

<sup>29-30</sup> Laudxiiba ayubu stinne xa yanni tu purti nasisi ni, cadi nanaa ni casi ni nua tu ca. Laudii lugar usiide laatu purti qué zaca nia laatu naduxhu' ne qué zadinde nia laatu.

## 12

*Bichuuugu ca discípulu zee  
dxi enda riziila'dxi*  
(Mr. 2.23-28; Lc. 6.1-5)

<sup>1</sup> Qué nindaa de ngue, ti dxi enda riziila'dxi zidi'di Jesús ne ca discípulu sti ndaani ti ñaa. Nabé ma candaana ca discípulu que para bizulú undadi ca zee gudó ca'.

<sup>2</sup> Ora bi'ya caadxi fariseu ni cayuni ca discípulu que la? na ca rabi ca Jesús:

—Biaa ca xpinni lu', cayuni ca ni cadi jneza guni binni dxi enda riziila'dxi'.

<sup>3</sup> Para na Jesús rabi laaca':

—Ñee qué huayuunda tu ra cá xi bi'ní David dxi candaana, laa né ca xpinni la?

<sup>4</sup> Biuu be ndaani yu'du sti Dios ne gudó be ca pan ni ma uyuu ndaaya' ni nexhe cadi go cabe, nin laabe nin cani nuu né laabe que, sínuque ca sacerdote si.

<sup>5</sup> O laca qué huayuunda tu ra cá lu ley sti Moisés xi runi ca sacerdote ni nuu ndaani yu'du ro' la? laca qué rapa ca dxi enda riziila'dxi peru qué rigui'ba donda ique ca'.

<sup>6</sup> Gabe ca' laatu, ma nuaa lade tu ne jma risaca que yu'du que né cani nuu ndaani ni.

<sup>7</sup> Nuu ra cá lu Xqui'chi Dios ra na: "Jma racaladxe guiá tu binni que quedané tu ni usiga'de tu naa." Yanna rabe laatu, pa ñene tu xi na ca diidxa ca la? ma qué nudxi-iba tu donda ique ca discípulu stinne, purti cadi cuchee ca'.

<sup>8</sup> Naa nga Hombre Biseenda Dios ne zanda gabe binni xii nga jneza guni dxi enda riziila'dxi'.

*Tobi hombre nabidxi ti chu ná'*

(Mr. 3.1-6; Lc. 6.6-11)

<sup>9</sup> Biree Jesús de raqué biuu ndaani yu'du stícabe.

<sup>10</sup> Ne nuu ti hombre raqué nabidxi ti chu ná'. Para gunaba diidxa caadxi binni ni nuu ra yu'du que Jesús pa jneza gusianda cabe binni dxi enda riziila'dxi'. Uní' ca zaqué peru para gapa si ca xi pur cu' ca xqueja be.

<sup>11</sup> Para rabi be laaca':

—Pa ñapa tobi de laatu ti dendxu' ne ñaba me ndaani ti barranca dxi enda riziila'dxi', ñee qué niguu ná laame ne nibee laame la?

<sup>12</sup> Ñee cadi jma risaca hombre que dendxu la? Jma pue, ne zacá rihuinni cadi cuchee né cabe ley pa gacané cabe binni dxi enda riziila'dxi'.

<sup>13</sup> Para rabi be hombre ni nabidxi ti chu ná que:

—Bisigaa nou'.

Ne ora bisigaa ná hombre que la? bianda ni ne guca ni casi sti chu que.

<sup>14</sup> Para biree ca fariseu yení' stiidxa ca ximodo zanda guuti ca laabe.

*Ra uca ni bicaa profeta Isaías*

<sup>15</sup> Peru ma nanna be xi chi guni ca', para bixele be de raqué, ne yenanda stale binni laabe para bisianda be laaca'.

<sup>16</sup> Ne biinda be lú ca' cadi uzeete ca tu laabe.

<sup>17</sup> Ne zacá guca ni ti iree ni modo uní' profeta Isaías dxi bizeete de laabe, na:

<sup>18</sup> Ndi nga ni gulié para guni xhiiña'

ne laabe nga nadxiee' ne ni rusieche ladxiduá'.

Zudiee Espíritu stinne laabe ne zusiidi be dede cani cadi za de Israel ximodo rune mandar.

<sup>19</sup> Qué zucaa lú be ne qué zucaa be ridxi, ne iruti zuna diaga caní xhaata be lu calle.

<sup>20</sup> Qué zusaba chaahui be cani ziyaba, cani rului' ti gueere ni ma caluuza,

ne qué zadinde né be cani rului' ti mecha ni ma qué ganda gudii biaani'.

Peru qué ziaana dxí xhiiña be dede gu'ya be gaca ni jneza ndaani guidxilayú.

<sup>21</sup> Ne zacá lú ca binni ni cadi za de Israel ulá be laaca'.

*Na cabe nuu né Jesús binidxaba'*

(Mr. 3.19-30; Lc. 11.14-23; 12.10)

<sup>22</sup> Oraque bedané cabe ti hombre ra nuu be udxite binidxaba ique ne ma nacheepa lú ne qué randa riní'. Para bisianda be laa,

ne óraque ma gunda biiya ne uní'.

<sup>23</sup> Bidxagayaa irá binni ni nuu raqué, ne na ca':

—Nagana pa cadi ndi nga ni na cabe gueeda de lade familia sti rey David que.

<sup>24</sup> Peru ora bina diaga ca fariseu ni caní' cabe la? na ca':

—Randa ribee be binidxaba partí nuu né be Beelzebú, xaíque sti ca binidxaba'.

<sup>25</sup> Peru nanna be xi caní' ique ca', para rabi be laaca':

—Intiica gobiernu ni tinde saa la? zanitilú. Ne zaqueca intiica guidxi o intiica familia ni tinde saa la? laca zanitilú.

<sup>26</sup> Nga runi pa ma cadinde saa ca xpinni binidxaba la? qué zandaa initilú.

<sup>27</sup> Pa naa ribee ca binidxaba partí nuaa nia Beelzebú casi na tu ca la? laga ca xiiñi tu ya', tu pur ribee ca ca binidxaba'. Lagabi laacabe iní' cabe ximodo nga laani.

<sup>28</sup> Peru naa la? ribee ca binidxaba partí napa Espíritu sti Dios ne zacá rihuinni ma cayuni mandar Dios lade tu.

<sup>29</sup> Zanda xa chi ndana cabe ralidxi ti hombre ni nadipa' pa ca'ru iliibi. Peru ora ma liibi be la? óraque huaxa zanda cuana cabe ni napa be.

<sup>30</sup> Tu cadi nuu pur naa la? cucaa lú naa, ne tu cadi cayacané naa gapa xpinne la? cabee laacabe de naa.

<sup>31</sup> Ne gabe ca' laatu, zuni perdonar Dios cani ruchee, ne cani riguu dí, peru qué ziuu dxi guni perdonar be

cani gusaca Espíritu Santu binidxaba'.

<sup>32</sup> Naa nga Hombre Biseenda Dios ne zuni perdonar be cani gucaa lú naa, peru cani gucaa lú Espíritu Santu la? qué zuni perdonar be laaca', nin ora nabani ca nin ora ma guti ca'.

*Pur ni guni binni zahuinni tu laa*  
(Lc. 6.43-45)

<sup>33</sup> Laaca tu nanna tu qué zanda udii ti yaga cuananaxhi pa cadi nazaaca, peru pa nazaaca ni la? zudii ni cuananaxhi ni iquiiñe' partí pur cuananaxhi sti yaga rihuinni ximodo laa.

<sup>34</sup> Ne laatu, binni malu ca', ximodo zanda iní' tu jneza pa cadi nayá ladxidó' to ya'. Partí de ndaani ladxidó' cabe nga riree diidxa ni riní' cabe.

<sup>35</sup> Binni nayá ladxidó' la? zaní' ni jneza partí dxandí nayá ladxidó'. Peru binni cadi nayá ladxidó' la? zaní' ni cadi jneza partí zacá laa de ndaani ladxidó'.

<sup>36</sup> Peru naa rabe laatu, dxi cuidxi Dios cuenta irá binni guidxilayú la? zabi be laaca xi pur bindaa ruaa ca ca diidxa ni cadi jneza ca.

<sup>37</sup> Partí stiidxa piou' nga usihuinni pa dxi'ba donda ique lu o pa nayá ladxidó' lo'.

*Ra canaba binni gu'ya xi-ixa seña*  
(Mr. 8.12; Lc. 11.29-32)

<sup>38</sup> Oraque na caadxi maistru de ley ne caadxi fariseu, rabi laabe:

—Maistru, xiñee qué uluí lu laadu ti seña xaibá' para ganna du dxandí nandxó' lo'.

<sup>39</sup> Para rabi be laaca':

—Laatu qué na tu guni tu ni na Dios, sínunque ni na tu, ne yanna ma canaba tu gu'ya tu seña. Peru qué zudiee rua' seña laatu sínunque gabe sia' laatu guietenala'dxi tu de profeta Jonás.

<sup>40</sup> Purti cásica uyuu Jonás ndaani benda ro' que chonna gubidxa ne chonna gueela la? zaqueca ziaana Hombre Biseenda Dios ndaani yu chonna gubidxa ne chonna gueela'.

<sup>41</sup> Ne dxi uzuhuaa irá binni nezalú Dios, ziasa ca binni Nínive ne zuseegu ca ruua ca binni nuu yanna ri', purti laaca ucuaa ca stiidxa Jonás ne unaba ca perdón Dios, peru yanna ma nuua lade tu ne jma risaca que Jonás ne qué na tu iccaa tu stiidxa'.

<sup>42</sup> Chiqué beeda ti reina de neza guete' de ti guidxi lá Sabá. Beeda be ra nuu Salomón purti bina diaga be pabiá' riene ne nuu né Dios laa. Ne dxi cuidxi Dios cuenta binni la? zuseegu be ruua ca binni nuu yanna ri' purti laabe beeda be de zitu, beda guna diaga be Salomón, ne naa jma risaca que Salomón ne nuua ca' lade tu ne qué na tu iccaa tu stiidxa'.

*Ra biqueta né binidxaba xcadxe*

(Lc. 11.24-26)

<sup>43</sup> Ora iree ti binidxaba de ndaani ladxidó' binni la? riree, ma canazá ndaani gui'xhi', canayubi ra

iziila'dxi'. Gu'ya si qué idxela, óraque na': "Zabigueta ralidxe ra biree".

<sup>44</sup> Ne ora guedandá gu'ya ma nayá ladxidó' ngue, casi ñaca ti yoo ma iruti nabeza, ma biluuba, ma zuchaahui'.

<sup>45</sup> Ibigueta, chi caa xcadxe jma rusi nadxaba que laa, riuu ca ndaani ladxidó' binni que, ne riaana ca raqué. Ne pa huaxié' malu binni que ora nuu stubi si ti binidxaba la? jma rusi yanna. Zacaca zazaaca ca binni qué runa ni nuu yanna ri'.

*Jñaa Jesús ne ca bi'chi'*

(Mr. 3.31-35; Lc. 8.19-21)

<sup>46</sup> Cayú' né ru be ca binni que diidxa', bedandá jñaa be ne ca bi'chi be, bizuhuaa ca ra puerta', ne racala'dxi ca iní' né ca laabe.

<sup>47</sup> Para na tobi de cani nuu raqué rabi laabe:

—Rarica zuhuaa jñoou' ne ca bi'chi lu', caquiiñe ca lii.

<sup>48</sup> Para rabi be ni gudxi ni laabe que:

—Tuu nga jñaa', ne tuu nga ca biche'.

<sup>49</sup> Oraque biluí' ná be ca discípulu stibe, ne na be:

—Ca ndi nga jñaa ne biche'.

<sup>50</sup> Purti irá tu guni ni na Bixhoze ni nuu ibá', ca ngue nga biche ne bizana ne jñaa'.

## 13

*Cuentu sti hombre yenduu bini*

(Mr. 4.1-9; Lc. 8.4-8)

<sup>1</sup> Dxi queca biree Jesús de ndaani yoo que, yetí uriá dxa nisa ro' que.

<sup>2</sup> Ne biiya si be ma rí binni laabe, yetí be ndaani ti canuá.

<sup>3</sup> Ne idubi zuba be ndaani canuá que, bizulú bisiidi be laaca stale cosa peru puru ne ejemplu, na be:

<sup>4</sup> —Sicarí bizaaca lú ti hombre biree zinduu biní. Ne ra cusaba be xuba que, biaba caadxi ni uriá neza ne beeda mani huiini gudó cani.

<sup>5</sup> Ne biaba xcaadxi ni lade guie, ne ca ngue gundani nagueenda, partí luguiá si napa ni caadxi yu.

<sup>6</sup> Peru casi biree gubidxa bizaaqui ni ne bibidxi ni partí qué ñapa ni xcu ni guete'.

<sup>7</sup> Ne biaba xcaadxi ni lade guichi ne gundani, peru jma bisoo guichi que para laacani ne biiti ca guichi que cani.

<sup>8</sup> Peru biaba xcaadxi ni ra nayá, ne ca ngue huaxa ucuá lú. Nuu ra bidii dede ti gayuua carreta niza, ne nuu ra bidii sesenta, ne nuu ra bidii treinta.

<sup>9</sup> Irá ni racala'dxi guiene la? ucaa diaga.

*Ra uní Jesús xiñee riguixhe ejemplu*

(Mr. 4.10-12; Lc. 8.9-10)

<sup>10</sup> Biree si ca binni que ze', bidxiña ca discípulu que ra nuu be ne na ca rabi ca laabe:

—Xiñee puru si ejemplu caguixhe lu para laacabe pue.

<sup>11</sup> Para rabi be laaca':

—Purtí laatu la? cudii Dios lugar guiene tu modo runi mandar, dede ni naga'chi', peru ca xcaadxi la? co'.

<sup>12</sup> Tu ma riene caadxi la? ziene xcaadxi ne ziene ru jma stale. Peru tu qué riene nin caadxi la? dede ni ma biene zusiaanda'.

<sup>13</sup> Nga runi riguixhe ejemplu para laacabe, partí neca zuxele lú cabe, qué ruuya cabe, ne neca zuxele diaga cabe, qué runa diaga cabe, ne qué riene cabe.

<sup>14</sup> De laacabe nga bizeete profeta Isaías ra na:  
Zuna diaga ca peru qué ziene ca',

ne zuyubi lú ca peru qué zuuya ca'.

<sup>15</sup> Purtí ma biguidxi ladxitdó' ca',

ne ma biseegu ca diaga ca'.  
Ne biseegu ca lú ca  
ti cadi gu'ya ca' ne guna diaga ca'  
ti cadi guiene ca',  
uyubi ca naa para ula'ya laaca, na Dios.

<sup>16</sup> Peru laatu la? na Jesús rabi ca discípulu sti', dichoso laatu partí nanna tu xi cayuya tu ne riene tu xi cayuna diaga tu.

<sup>17</sup> Purtí gabe ca' laatu, yuu stale profeta ne hombre cha'hui ni gucalá'dxi ñuuya ni cayuya tu ri' Peru qué ñuuya ca', ne gucalá'dxi ca ñuna diaga ca ni cayuna diaga tu ri' Peru qué ñuna diaga ca'.

*Xi riní' cuentu sti hombre yenduu biní*

(Mr. 4.13-20; Lc. 8.11-15)

<sup>18</sup> Yanna laucaa diaga xi riní' ejemplu sti hombre ni uluu biní que.

<sup>19</sup> Ni biaba uriá neza que la? zeda gaca casi tobi ni rui' né cabe laa ximodo runi mandar Dios, peru qué riene ni, ne reeda binidxaba raxha ni ma biaba ndaani ladxidó' be que.

<sup>20</sup> Ne ni biaba lade guie que, ngue zeda gaca casi tobi ni runa diaga stiidxa Dios ne oraqueca ricaa ni ne enda nayeché'.

<sup>21</sup> Peru qué gapa ni xcu ni guete' sínuque luguiá si, ngue runi casi gueeda xiixa naná, o sa nanda cabe laa pur ca diidxa que la? maca ziyaba.

<sup>22</sup> Ne ni biaba lade guichi que la? ngue zeda gaca casi tobi ni guna diaga stiidxa Dios peru jma cá ique ximodo ibani ndaani guidxilayú ri', ne rudii lugar quite bidxichi ique, ne irá nga ruuti stiidxa Dios ni nuu ndaani ladxidó' be que.

<sup>23</sup> Peru ni biaba ra nayá que la? ngue nga zeda gaca casi cani runa diaga stiidxa Dios ne riene xi rini' ni parti riree ndu ca'. Nuu de laaca ni zeda gaca casi layú ni bidii ti gayuua que, ne nuu de laaca casi ni bidii sesenta que, ne nuu de laaca casi ni bidii treinta, peru irá ca bidii ca'.

### *Baladxi biaba lade semiá*

<sup>24</sup> Bigueta bisiidi be ca binni que, gudixhe be xcaadxi ejemplu, na be:

—Modo runi mandar Dios zeda gaca casi ti hombre bisaba semiá ndaani ñaa sti',

<sup>25</sup> peru laga nisiaasi binni, beeda tuuxa nanala'dxi laabe ne bidxiiba baladxi lade semiá que ne ze'.

<sup>26</sup> Dxi ma biniisi semiá que, ma cabee guie' bihuinni nuu baladxi que lade.

<sup>27</sup> Oraque beeda ca mozo que ra nuu xpixuaana ni, ne na ca': "Señor, cadi ladxa semiá si bidxiiba lu la? Xi guca xa yanna, nucha ni baladxi'."

<sup>28</sup> Para na xpixuaana ni: "Laca tu laa nanala'dxi naa, beda guni ni."

Oraque na ca mozo que: "Racala'dxu chi gaxha du cani la?"

<sup>29</sup> Para na be: "Co', zaa nuu cani, pacaa ra cayaxha tu cani, zanda ca gaxha tu ne semiá.

<sup>30</sup> Lausaana cani, zaa iniisi cani tobi si ne ora ma gula semiá ca, naa ma gabe cani chi chuugu semiá, utopa ca ca baladxi que gundiibi ca para chaqui'. Ne óraque ru gutopa ca ca semiá idxá sacu."

### *Biiddxi mostaza*

(Mr. 4.30-32; Lc. 13.18-19)

<sup>31</sup> Ne bigueta gudixhe be sti ejemplu, na be:

—Modo idale ca xpinni Dios zeda gaca casi guca ti biiddxi mostaza ni gucuua ti hombre ne yeusaba rañaa sti'.

<sup>32</sup> Laani jma nahuiini ni lade irá xixé biiddxi', peru undani si ni la? biniisi ni ne guca ni yaga ro', dede beeda mani huiini bizá' lidxi lu rama stini.

### *Ejemplu sti levadura*

(Lc. 13.20-21)

<sup>33</sup> Gudixhe ru be sti ejemplu para laaca', na be:

—Modo idale ca xpinni  
Dios zeda gaca casi guca  
levadura ni gucuaa ti gunaa  
ne biguucha chonna kilu harina,  
ne irá ni biasa ni. Zaca  
caca nga idale ca xpinni Dios.

*Ra riete xiñee biquiñé  
Jesús ejemplu*

(Mr. 4.33-34)

<sup>34</sup> Puru ne ejemplu bisiidi  
be ca binni que. Qué nusiidi  
di be laaca sin ejemplu.

<sup>35</sup> Bi'ni be zacá ti iree ni  
modo pe uní' Dios de rúaa ti  
profeta chiqué, ra na:

Zaguixhe stale ejemplu ra  
güe nia laacabe di-  
idxa'.

Zabe laacabe ni ga'chi dede  
dxi bizá' Dios guidxi-  
layú.

*Bisiene Jesús stiidxa bal-  
adxí ne semiá*

<sup>36</sup> Biluxe si bisiidi be ca  
binni que, biuu be ndaani  
yoo, ne bidxiña ca discípulu  
stibe ra nuu be, gunaba ca  
laabe gusiene be laaca xi-  
riní' ejemplu sti baladxi bi-  
aba rañaa que.

<sup>37</sup> Para rabi be laaca':

—Ni bisaba semiá pe que  
la? nga Hombre Biseenda  
Dios.

<sup>38</sup> Layú que nga guidxi-  
layú. Semiá que zeda gaca ca  
xpinni Dios, ne baladxi que,  
xpinni binidxaba'.

<sup>39</sup> Ne ni bisaba baladxi que  
nga binidxaba'. Dxi iruugu  
semiá que nga iluxe guidxi-  
layú, ne cani chi uchuugu ca  
semiá que nga ca ángel.

<sup>40</sup> Ne cásica idopa baladxi  
que chaqui la? zaqueca zaca  
ni dxi iluxe guidxilayú.

<sup>41</sup> Naa nga Hombre  
Biseenda Dios ne zuseenda  
ca ángel stinne para gueda  
ndee irá ni cuchiña ca  
xpinne' ne irá cani qué runi  
jneza.

<sup>42</sup> Zundaa cabe laaca lu  
bele ne raqué nga gu'na ca  
dede go yaa ca guidi rúaa ca'.

<sup>43</sup> Ne dxi ca nga guzaani  
cani nacha'hui ra runi man-  
dar Dios, casi ruzaani gu-  
bidxa. Cani racala'dxi guiene  
la? gucaa diaga.

*Tesoro ga'chi'*

<sup>44</sup> Ne laca rabi be laaca':

—Enda runi mandar sti  
Dios zeda gaca casi ti tesoro  
ni bidxela tobi hombre ga'chi  
ndaani yu. Biiya be ni ne  
bicaachi be ni sti tiru, ne  
ziyeche be yeutoo be irá ni  
napa be para sí be layú que  
ne icaa be tesoro que.

*Perla ni jma risaca*

<sup>45</sup> Laca rabi be laaca':

—Enda runi mandar sti  
Dios zeda gaca casi ti perla  
ni bidxela ti hombre ra  
canayubi perla cha'hui para  
sí'.

<sup>46</sup> Ora bi'ya jma risaca ni  
que irá xixé perla la? yeutoo  
irá ni napa para uzí' ni.

*Ejemplu sti tarraya*

<sup>47</sup> Ne gudixhe ru be stobi,  
na be:

—Enda runi mandar sti  
Dios zeda gaca casi tarraya  
ni rusaba cani rie guuze  
ndaani nisadó'. Rutopa tar-  
raya que irá clase benda

<sup>48</sup> Peru ora ma bidxá ni, rití  
né cabe ni uriá para ribí cabe  
ique ni. Rusa'bi cabe ni qué

zaquiiñe', ne ruchá cabe cani  
zaquiiñe que ndaani dxumi.

<sup>49</sup> Zacaca zaca ni ra gueeda  
iluxe guidxilayú ri', zeda  
ndee ca ángel cani qué  
iquiñe lade cani nacha'hui'.

<sup>50</sup> Ne zundaa ca laacabe  
lu bele, ne raqué nga gu'na  
cabe dede go yaa cabe guidi  
ruaa cabe.

### *Tesoro cubi ne tesoro yooxho'*

<sup>51</sup> Oraque unabá diidxa be  
ca discípulu stibe pa biene ca  
ni gudxi be laaca que. Para  
na ca':

—Biene du, Señor.

<sup>52</sup> Para rabi be laaca':

—Tobi ni ma riene chaahui  
ley sti Moisés ne óraque  
gueda iziidi ni rusiide de  
modo runi mandar Dios la?  
zeda gaca casi ti ricu ni ribee  
de lu irá ni napa, caadxi  
nacubi ne caadxi nayooxho'.

### *Ra nuu Jesús Nazaret*

(Mr. 6.1-6; Lc. 4.16-30)

<sup>53</sup> Biluxé si byui' né Jesús  
laacabe irá nga, biree de  
raqué,

<sup>54</sup> uyé xquidxi ne biuu  
ndaani yu'du', bisiidi ca  
binni xquidxi. Nabé bidxa-  
gaya ca laabe ne na ca':

—Paraa ulee be irá enda  
biaani ni napa be ri pue, ne  
irá enda nandxo' ni runi be.

<sup>55</sup> Ñee cadi laabe nga xiiñi  
carpinteru que la? ne María  
lá jñaa be, ne bi'chi be nga  
Jacobo ne José ne Simón ne  
Judas.

<sup>56</sup> Lácaxa cadi rarí nabeza  
ca biza'na be. Paraa ulee be  
cabi cayuni be ri'.

<sup>57</sup> Ne pur ni caní ique cabe  
que, ma qué ñanda ñuni cre  
cabe laabe. Para na be rabi  
be laaca':

—Stobi stobi lugar risaca  
profeta, peru ra qué risaca  
be nga ndaani xquidxi pe be  
ne lade binni lidxi be.

<sup>58</sup> Ne huaxié' bisihuinni  
be enda nandxo' stibe raqué  
purti qué ñuni cre ca laabe.

## 14

### *Ra guti Juan Bautista* (Mr. 6.14-29; Lc. 9.7-9)

<sup>1</sup> Bireeche stiidxa Jesús  
ca dxi que, ne ora gunna  
Herodes, gobernador de  
Galilea, irá ni la?

<sup>2</sup> na rabi ca xpinni:

—Laguuya irá ni cayuni  
hombre ca. Nanna pa cadi  
laabe nga Juan Bautista ma  
bibani, ne nga runi cayanda  
cayuni be irá nga.

<sup>3</sup> Uní' Herodes zacá purti  
nanna xi ma bi'ni Juan  
Bautista. Gunaaze be laa ne  
bindiibi be laa ne biseguyoo  
be laa, runi Herodías xheela  
Felipe bi'chi be.

<sup>4</sup> Bidxiichi be purti gudxi  
Juan laabe cadi jneza chu' né  
be xheela bi'chi be.

<sup>5</sup> Gucala'dxi be ñuutí be  
Juan oraqueca, peru bidxibi  
be purti nabé nadxii ca binni  
que laa ne napa cabe laa de  
profeta.

<sup>6</sup> Peru dxi guca lani xpidó'  
be la? beda uyaa xiñi dxaapa  
Herodías nezalú be ne nabé  
uyuula'dxi be modo biyaa.

<sup>7</sup> Para na be rabi be laa:  
Intiica inabu naa, zudiee  
lii.

<sup>8</sup> Oraque gudxi jñaa badu dxaapa que laa xi inaba'. Para uyé ra nuu be ne rabi laabe:

Racaladxe udiuu naa ique Juan Bautista ndaani ti bladu'.

<sup>9</sup> Ne ora gudxi badu dxaapa que nga laabe la? ucaná ladxidó' be, pa ñanda si qué nudii be ni canaba badu dxaapa que, peru pur ma bidii stiidxa be laa nezalú irá cani zuba né laabe ruua mexa que la? uní' be icaa badu dxaapa que ni.

<sup>10</sup> Para bisenda tidxi be ugá ca xpinni be yanni Juan ndaani lidxi guiiba que.

<sup>11</sup> Ne bedané cabe ique que ndaani ti bladu', bidii cabe ni badu dxaapa que, de laa ma bidii ni jñaa.

<sup>12</sup> Oraque uyé ca discípulu sti Juan, yecaa ca cuerpu que ne yeucaachi ca ni, para yetidxi ca Jesús xi guca'.

*Ra biyaana Jesús gaayu mil*

(Mr. 6.30-44; Lc. 9.10-17; Jn. 6.1-14)

<sup>13</sup> Casi gunna Jesús ni, bixele ca de raqué, uyuu ndaani ti canuá, uyé ndaani ti gui'xhi ra iruti guinni. Peru casi gunna binni paraa ze be la? biree ca de ndaani guidxi que, zizá ca dede yendá ca ra nuu be.

<sup>14</sup> Ne ora ziyete be de lu canuá que, biiya be mápeca ri binni raqué ne biá be laaca'. Para bisianda be cani huará ni nuu lade ca'.

<sup>15</sup> Ne biaana ca binni que raqué dede ma huadxí. Biyya si ca discípulu stibe ma

huadxí ngue la? bidxiña ca ra nuu be, ne na ca':

—Ndaani gui'xhi ndi nuu nu, ne ma caxhinni, xiñee qué ga'bu ca binni ca che ca yanna, ti ganda che ca ndaani ca guidxi huiini ca, chi sí ca ni go xhi ca'.

<sup>16</sup> Para na be rabi be laaca':

—Cadi naquiiñe che cabe. Laudii ni go cabe laatu.

<sup>17</sup> Oraque na ca':

—Qué gapa di du gasti rarí jma que gaayu pan ne chupa benda.

<sup>18</sup> Para rabi be laaca':

—Latané cani naa.

<sup>19</sup> Oraque bicuí be ca binni que lú ca guixi huiini nuu raqué ne ucuaa be gaayu pan ne chupa benda que ne undisa lú be ibá' bidii be diuxquixe Dios. Para gundaa be cani ne bidii be cani ca discípulu que para gudiizi cani lú ca binni que.

<sup>20</sup> Irá xixé binni que gudó dede bidxá ndaani ne biaana ru nandahui. Para bitopa cabe ni biaana que dede bidxá doce dxumi de ca nandahui ni biaana que.

<sup>21</sup> Ne irá ni gudó que bia'si gaayu mil hombre sin igaba gunaa ne ba'du'.

*Ra uzá Jesús lu nisadó'*

(Mr. 6.45-52; Jn. 6.16-21)

<sup>22</sup> Oraque ru gudxi be ca discípulu stibe chu' ca ndaani canuá que, che gó ca sti ladu nisa que, laga gabí si be ca binni que ma che be.

<sup>23</sup> Ne gudxi si be ca binni que ma che be la? udxi'ba be lú ti dani yení né be Dios, dede bixhinni be raqué, stubi lucha be.

<sup>24</sup> Peru ma bixele canuá ra ze ca discípulu que zitu de uriá, ne nabé canaaaze ola ni purti cudxigueta bi ni.

<sup>25</sup> Ne nuxcanda que bidxiña Jesús ra nuu canuá que, zeda za lu nisa.

<sup>26</sup> Ne ora bi'ya ca discípulu que zeda za be lu nisa la? bidxibi ca' ne bicaa ca ti ridxi muxe', na ca':

Zeeda ti bultu racá.

<sup>27</sup> Peru óraque na be rabi be laaca':

—Lachuu dxí. Cadi idxibi tu, naa ndi'.

<sup>28</sup> Para na Pedru rabi laabe:

—Señor, pa lii nga la? guridxi naa guenda ra nuu lu', saya lu nisa.

<sup>29</sup> Para na be rabi be laa:

—Gudá'.

Oraque biete Pedru de ndaani canuá que zizá lu nisa, ze ra nuu be.

<sup>30</sup> Peru biiya si Pedru pabiá' reciu nuu bi que la? bidxibi ne bizulú biaazi', ne bicaa ti ridxi:

—Bilá naa, Señor.

<sup>31</sup> Oraqueca bisigaa ná Jesús gundisa laabe ne na rabi laabe:

—Aque huaxié' fe napu xa. Xiñee bidxibi lu, hombre.

<sup>32</sup> Ne casi udxiba' cabe ndaani canuá que, biaana dxi bi que.

<sup>33</sup> Oraque bizuxibi ca xcaadxi ni nuu ndaani canuá que xañee be ne na ca':

—Dxandí pe Xiiñi Dios lii.

*Bisianda Jesús binni Genesaret*  
(Mr. 6.53-56)

<sup>34</sup> Ne ora yendá cabe sti ladu que, biuu cabe ti lugar lá Genesaret.

<sup>35</sup> Ne casi gunna ca binni ni nuu raqué tu laabe la? bicheeche ca stiidxa be irá guidxi ni nuu neza que, ne bedané cabe irá binni huará ra nuu be.

<sup>36</sup> Dede gunaba cabe udii be lugar neca ñee xhaba si be cana ca', ne irá ni uda'na xhaba be que bianda.

## 15

*Ni runi dxaba binni*  
(Mr. 7.1-23)

<sup>1</sup> Ti dxi biree caadxi fariseu ne caadxi maistru de ley Jerusalén, uyé ca ra nuu Jesús, ne na ca rabi ca laabe:

<sup>2</sup> —Xiñee cuchaa ca discípulu stiu' ca costumbre stinu pue, purti qué riguiibi ná ca ora go ca' casi bisaana ca bixhoze gola nu.

<sup>3</sup> Para rabi be laaca':

—Laatu ya', xiñee cuchaa tu mandamientu sti Dios pur ca costumbre ni napa tu ca.

<sup>4</sup> Purti ndi nga ni na Dios guni tu: ganaxhii tu bixhoze tu ne jñaa tu. Ne laca na, tutiica cu' dí bixhoze o jñaa la? naquiiñe gati'.

<sup>5</sup> Peru laatu rabi tu bixhoze tu ne jñaa tu: "Ni ñacanía laatu ca, ma bidiee Dios."

<sup>6</sup> Ne ma qué rulabi ru tu laaca', ne zacá pur ca costumbre ni zeda za lade tu la? napa tu stiidxa Dios casi xiixa de enda riguite.

<sup>7</sup> Nanaxhi ruua tu peru rusigui si tu. Para laape tu nga ni uní' Dios de ruua profeta Isaías, ra na:

<sup>8</sup> Ca binni ri', nanaxhi ruaa  
ca ne naa,  
peru ladxidó' ca nuu zitu de  
naa.

<sup>9</sup> Pur gana si rusisaca cabe  
naa,  
purti de laasi cabe riale ni  
rusiidi cabe.

<sup>10</sup> Oraque guridxi Jesús irá  
binni nuu raqué ne na rabi  
laaca':

—Laucaa diaga ne  
laguiene chaahui ndi':

<sup>11</sup> Cadi pur ni chu' ndaani  
ruaa binni nga guni pur  
uchee né Dios, sínunque pur  
ni riree de ndaani ruaa cabe  
nga runi pur uchee né cabe  
Dios.

<sup>12</sup> Ratu si que bidxiña ca  
discípulu ra nuu be ne na ca  
rabi ca laabe:

—Ñee biiyu pabiá' naná bi-  
aba ni uníu' ca ca fariseu la?

<sup>13</sup> Para na be rabi be laaca':

—Irá yaga ni cadi Bixhoze  
bizuhuaa la? ziaaxha dede  
xcu.

<sup>14</sup> Zaa nuu cabe nacheepa  
lú cabe, peru racala'dxi cabe  
inaaze cabe ná stobi. Ne pa  
inaaze ti lú cheepa ná sti lú  
cheepa la? iropa ca ziaba ca  
ndaani barranca.

<sup>15</sup> Para na Pedru rabi  
laabe:

—Bisiidi laadu ni uníu'  
numbá que.

<sup>16</sup> Oraque na be:

—Ñee nin laatu ca'rú  
guiene tu la?

<sup>17</sup> Qué ganna tu pa irá ni  
chu' ndaani ruaa binni riaba  
ndaani', ne de raqué ridi'di  
ni la?

<sup>18</sup> Peru irá ni riree de ruaa  
cabe, zeeda ni de ladxidó'  
cabe ne nga ni runi pur  
uchee né cabe Dios.

<sup>19</sup> Purti de ndaani ladxidó'  
cabe reeda ni cadi jneza ni  
cá ique cabe guni cabe: guuti  
cabe binni, o chu' né cabe ni  
cadi xheela cabe, gapa cabe  
jnadxii cabe, cuana cabe, in-  
disa cabe falsu luguiá stobi,  
cu' dí cabe binni.

<sup>20</sup> Zacá huaxa ruchee né  
cabe Dios, peru pa go cabe  
gueta sin qui'bi ná cabe la?  
nga cadi cuchee cabe.

*Ra unaba ti gunaa de  
Canaán guianda xiiñi'*  
(Mr. 7.24-30)

<sup>21</sup> De raqué biree be uyé be  
neza Tiro ne Sidón.

<sup>22</sup> Raqué nuu be beda  
nanda ti gunaa de Canaán  
laabe, zeda yuni ridxi:

—Biá naa, Señor, xiiñi  
David, purti naaze binidxaba  
xiñe dxaapa ne cayuuti  
laabe.

<sup>23</sup> Peru qué niní' be gasti'.  
Para biree ca discípulu, na  
rabi laabe:

—Gudxi laabe che be, purti  
zeda yuni be ridxi nanda be  
laanu.

<sup>24</sup> Para na be rabi be laaca':

—Ra nuu si cani za de  
Israel biseenda Bixhoze  
naa, purti cananiti ca casi  
dendxu'.

<sup>25</sup> Peru óraque bidxiña gu-  
naa que ra nuu be bizuxibi  
xañee be na rabi laabe:

—Señor, ucaneé naa.

<sup>26</sup> Para na be rabi be laa:

—Cadi jneza gaxha cabe  
pan xiiñi cabe para gudii  
cabe bi'cu'.

<sup>27</sup> Oraque na:

—Nanna, Señor, peru laca  
ro bi'cu bigú ni riaba xa  
mexa sti xpixuaana'.

<sup>28</sup> Para na be rabi be laa:

—Rihuinni dxichi runi cre lu', zune ni canaba lu ca.  
Ne oraqueca bianda xiiñi gunaa que.

*Bisianda Jesús stale binni huará*

<sup>29</sup> Biree Jesús de raqué, uzá uríá nisa Galilea que, ne de raqué udxi'ba lu ti dani ne gurí.

<sup>30</sup> Raqué zuba be bidxiña jma binni laabe, bedané ca cani nachiita ñee, ne cani nacheepa lú, ne cani qué rini', ne cani nachanga ná' o ñee, ne stale ru binni huará. Gudixhe ca binni que laaca xañee be ne bisianda be laaca'.

<sup>31</sup> Nabé bidxagayaa ca binni que ora bi'ya ca ma bianda irá ni bedané ca que. Cani qué ñanda niní' ma rini', ne cani qué ñanda nusigaa ná', ma rusigaa ná'. Cani qué ñanda nizá ma rizá, cani qué ñanda niná ma riná, ne irá xixé ca cusisaca ca Dios sti Israel.

*Ra biyaana Jesús tapa mil  
(Mr. 8.1-10)*

<sup>32</sup> Oraque guridxi be ca discípulu stibe ne rabi be laaca':

Caya'ya ca binni ri purti ma chonna gubidxa nuu né cabe naa ne qué gapa cabe ni go cabe. Qué na'ya guseenda laacabe sin go cabe, paxa ora gueda guiaza cabe neza.

<sup>33</sup> Para na ca discípulu que rabi laabe:

Peru ndaani gui'xhi ndi nuu nu. Paraa ndi chi ndee nu ni go irá binni ri'.

<sup>34</sup> Oraque rabi be laaca':

Panda ga pan napa tu ya'.

Para na ca':  
Gadxe, ne chupa chonna benda huiini'.

<sup>35</sup> Oraque gudxi be ca binni que cui ca layú.

<sup>36</sup> Ne gucuaa be gadxe pan ne ca benda que, bidii be diuxquixe Dios ne gundaa be ni lú ca discípulu que, de laaca ma bidii ca ni ca binni que.

<sup>37</sup> Gudó ca binni que dede bidxá ca', ne biaana ru jma nandahui dede bidxá gadxe dxumi de ni biaana que.

<sup>38</sup> Bigaba bia' tapa mil hombre ni gudó dxi que, sin nigaba gunaa ne ba'du'.

<sup>39</sup> Ne óraque gudxi be ca binni que ma zanda che ca', para udxi'ba be ndaani ti canuá dede yendá be neza Magdala.

## 16

*Trampa sti ca fariseu ne ca saduceu*

(Mr. 8.11-13; Lc. 12.54-56)

<sup>1</sup> Nuu be raqué bidxiña caadxi fariseu ne saduceu laabe, beda guuya si ca pa ñanda nusaba ca laabe. Para unaba ca laabe uluí' be laaca ti seña xaibá' ti ganna ca pa dxandí nandxo' be.

<sup>2</sup> Peru laabe laga rabi be laaca':

—Ora ma chi guiaazi gubidxa ne gu'ya tu naxiñá ibá', óraque na tu: "Qué ziaba nisa guie ixí' purti naxiñá ibá'."

<sup>3</sup> Ne zaqueca pa gu'ya tu naxiñá ibá' siadó' la? óraque na tu: "Yanadixí ziaba nisa guie purti naxiñá ibá' ne nachuundu nuu." Laatu riene tu xi na ca seña ni

rihuinni ibá', peru ca seña ni cayuuya tu yanna ri', nga qué riene tu.

<sup>4</sup> Qué na tu guni tu ni na Dios sínunque ni na tu, ne yanna ma canaba tu udiee laatu ti seña, peru qué zacaa tu sti seña sínunque seña si sti profeta Jonás.

Ne óraque biree be ze be.

*Ra udixhená Jesús ca discípulu*  
(Mr. 8.14-21)

<sup>5</sup> Ne ora yendá ca discípulu que cherica nisa, bedasilú laaca qué niné ca pan.

<sup>6</sup> Ne óraque pe rabi be laaca':

—Lagataná ne laguuya gá laatu ne ca levadura sti ca fariseu ne sti ca saduceu.

<sup>7</sup> Oraque na ca':

—Cayabi be ndi laanu tisi qué ñedané nu pan.

<sup>8</sup> Peru nanna be xi caní' ca', para na be rabi be laaca':

—Hombre ca', xiñee nabé huaxié' napa tu fe naa. Xiñee nuu tu xizaa qué ñedané tu pan.

<sup>9</sup> Ñee de yanna ca'ru guiene tu la? Ñee ma biaanda laatu de gaayu pan ni gudó gaayu mil que la? ne panda dxumi bitopa tu de ni biaana.

<sup>10</sup> Ñee laca ma biaanda laatu de gadxe pan ni gudó tapa mil que la? ne panda dxumi bitopa tu.

<sup>11</sup> Xiñee qué ñanda ñene tu cadi cuzeete dia' de levadura sti pan pe' ora gudxe laatu lagapa laatu ne levadura sti ca fariseu ne sti ca saduceu.

<sup>12</sup> Ne óraque ru biene ca xi cayabi be laaca', purti cadi cuzeete be levadura sti pan pe' sínunque cuzeete be ni rusiidi ca fariseu ne ca saduceu, ne nga nga levadura ni cayabi be laaca guuya gá ca'.

*Ra uní' Pedru tuu nga Cristu*

(Mr. 8.27-30; Lc. 9.18-21)

<sup>13</sup> Dxi ma bedandá Jesús neza Cesarea de Filipo, na rabi ca discípulu sti':

—Tu na binni naa.

<sup>14</sup> Para na ca rabi ca laabe:

—Nuu tu na Juan Bautista lii, ne nuu tu na Elías, ne xcaadxí na Jeremías o tobi de ca profeta.

<sup>15</sup> Para rabi be laaca':

—Laatu ya'. Tu rabi tu naa.

<sup>16</sup> Oraque na Simón Pedru rabi laabe:

—Lii nga Cristu, Xiiñi Dios ni nabani.

<sup>17</sup> Para na be:

—Dichoso lii, Simón, xiiñi Jonás, purti cadi binni guidxilayú bisiene nga lii, sínunque Bixhoze ni nuu ibá'.

<sup>18</sup> Ne ma gulee la'ya lii Pedru, ne ni riní' lá lu ca la? "guie". Ne lu guie ca chi ucué ti yu'du', ne yu'du ca nga, ca xpinne'. Ne gasti qué zanda uxhá ni, gueeda ni gueeda, neca enda guti.

<sup>19</sup> Zusaana ca llave sti ibá' ladxi ná lu', ne intiica cuee lu de gaca ndaani guidxilayú la? laca qué zaca ni ibá'. Ne intiica na lu gaca ndaani guidxilayú la? laca zaca ni ibá'.

<sup>20</sup> Ne óraque gudxi be ca discípulu stibe cadi gabí ca iruti pa laabe nga Cristu.

*Bizeete Jesús chi gati  
(Mr. 8.31-9.1; Lc. 9.22-27)*

<sup>21</sup> Dede óraque bizulú be bisiá be stiidxa be, rabi be ca discípulu stibe:

—Naquiiñe chaa Jerusalén ne zuniná ca xaíque sti guidxi naa raqué, laaca né ca maistru de ley ne ca xaíque sti ca sacerdote, dede zuuti ca naa, peru zabane ra guionna gubidxa.

<sup>22</sup> Oraque guridxi Pedru laabe ti ladu ne bizulú cayabi laabe:

—Dios gu'ya qué izaaca lu ni nou' ca.

<sup>23</sup> Peru óraque biiya dxí be Pedru ne na be:

—Biree de ra nuua, binidxaba'. Qué gueda uchenda lu naa purti cadi de Dios di zeeda ni cá ique lu ca sínuque de binni guidxilayú.

<sup>24</sup> Ne na be rabi be irá ca discípulu stibe:

—Tu gacala'dxi gaca xpinne la? gusiaanda laca laa, cadi lica guiá xpida, ne sa nanda naa.

<sup>25</sup> Purti tu gacala'dxi ulá xpida zuniti ni, peru tu guniti xpida pur naa la? zalá.

<sup>26</sup> Paraa iquiiñe ni binni pa guni ganar idubi guidxilayú peru guniti xhialma. O pagala zanda quixe binni saca ulá xhialma.

<sup>27</sup> Naa nga Hombre Biseenda Dios ne zadxiña dxi ibigueta nia enda nandxó' sti Bixhoze'. Zedaniá ca ángel stinne ne dxi ca nga quixe cada tobi bia' ni bi'ní'.

<sup>28</sup> Gabe ca' laatu, caadxi de cani nuu rarí' qué zati dede qué gu'ya guenda guidxilayú

sti tiru, peru ma para guna ganar.

## 17

*Ra biiya cabe bidxaa Jesús  
(Mr. 9.2-13; Lc. 9.28-36)*

<sup>1</sup> Gudi'di xhoopa gubidxa de ngue, yené Jesús Pedru ne Jacobo ne Juan bi'chi Jacobo, ne idapa si cabe uyé cabe lu ti dani soo.

<sup>2</sup> Ne raqué mala biiya cabe ma adxé modo bihuinni Jesús purti bizaani lú casi ruzaani gubidxa, ne bihuinni xhaba be casi biaani'.

<sup>3</sup> Né mala bihuinni caní' né Moisés ne Elías laabe.

<sup>4</sup> Oraque na Pedru rabi laabe:

Aque galán nuu nu rarí nja'. Pa racala'dxu la? zucui du chonnan ranchu huiini', tobi para lii, ne stobi para Moisés ne stobi para Elías.

<sup>5</sup> Caní' ru Pedru, mala biseegu ti za laacabe. Nabé ruzaani za que, ne ucuá ti ridxi lade ni:

—Ndi nga Xiiñe ni nadxiee ne ni rusieche naa. Laucaa diaga laabe.

<sup>6</sup> Casi bina diaga ca discípulu ridxi que, biaba rilú ca layú ne nabé bidxibi ca'.

<sup>7</sup> Oraque bidxiña Jesús ne uda'na laacabe, na:

—Laguiasa, cadi idxibi tu.

<sup>8</sup> Para gundisa lú cabe ne ma qué ūuya ru cabe iruti sínuque Jesús si.

<sup>9</sup> Ne ora ziyyete cabe de lu dani que, gudxi Jesús laacabe cueza cabe guiasa si Hombre Biseenda Dios de lade gue'tu ti iní' cabe ni biiya cabe que.

<sup>10</sup> Oraque unaba diidxa ca discípulu stibe laabe, na ca':

—Xiñee na ca maistru de ley zeeda Elías ante gueeda ni nexhe guseenda Dios que ya'.

<sup>11</sup> Para rabi be laaca':

—Dxandí nexhe gueeda Elías primeru para quixhe chaahui irá cosa.

<sup>12</sup> Peru cayabe laatu, ma beeda Elías ne qué ñacabíá' cabe laa sínuque bi'ni cabe laa ni ucalá'dxi cabe. Ne zacaca zuni cabe Hombre Biseenda Dios.

<sup>13</sup> Oraque ru biene ca discípulu cuzeete be Juan Bautista nga Elías.

*Ra bisianda Jesús ti hombre buiini napa ataque*

(Mr. 9.14-29; Lc. 9.37-43)

<sup>14</sup> Ora yendá cabe ra nuu binni la? bidxiña ti hombre ra nuu be, bizuxibi xañee be, na rabi laabe:

<sup>15</sup> —Señor, rinaba lii guíá lu xiiñe ri', purti rudii ataque laabe ne nabé racaná be. Stale tiru riaba be lu gui, o pacaa ndaani nisa.

<sup>16</sup> Ma bedaniá laabe ra nuu ca discípulu stiu' peru qué ñanda nusianda ca laabe.

<sup>17</sup> Oraque na Jesús:

—Aque qué runi cre tu xa, binni ca', ne naguidxi ladxitó' to. Dede padxí naquiiñe guiaana nia laatu ne gune huantar laatu ya'. Latané laabe rarí yanna.

<sup>18</sup> Casi bidxiña hombre huiini que, udinde né Jesús binidxaba ni napa be que, para biree de laabe, ne oraqueca bianda be.

<sup>19</sup> Birá si binni que bireeche, beeda ca discípulu sti Jesús ra nuu, ne na ca rabi ca laa:

—Xiñee laadu qué ñanda nibeet du binidxaba que pue.

<sup>20</sup> Para rabi be laaca':

—Ti huaxié' napa tu fe xa. Laucaa diaga chaahui ni chitidxe laatu ri': Pa ñapa tu fe, neca bia' ti biidxi mostaza la? ñanda ñabi tu dani ri iree de ra nuu, che sti ladu, ne ñe ni, ne gasti qué ñaca nagana para laatu.

<sup>21</sup> Peru binidxaba zacá la? qué riree ca pa qué iní' né binni Dios ne guiaana sin go.

*Bigueta bizeete Jesús zati*  
(Mr. 9.30-32; Lc. 9.43-45)

<sup>22</sup> Dxi canazá cabe neza Galilea, na Jesús rabi laa-cabe:

—Naa nga Hombre Biseenda Dios. Zutoo cabe naa lu binni guidxilayú,

<sup>23</sup> ne zuuti ca naa, peru zabane raguionna gubidxa.

Ne ora bina diaga ca discípulu ni uní' be que la? nabé ucaná ladxitó' ca'.

*Ra udixe Jesús impuestu sti yu'du'*

<sup>24</sup> Ora yendá cabe ndaani guidxi Capernaum, beeda caadxi hombre ni ruquixe impuestu sti yu'du ro' ra nuu Pedru, ne unaba diidxa ca laabe pa riguixe xpixuaana cabe impuestu.

<sup>25</sup> Para na be:

—Riguixe pue.

Ne ora biuu be ndaani yoo ra ñabi be ni Jesús la? laga Jesús gudxi ni laabe. Na Jesús rabi laabe:

—Xi na lu ya', Simón. Tu ruquixe ti rey impuestu, ca xpinni la? o cani zeeda de sti guidxi.

<sup>26</sup> Para na be:

—Binni si ni zeeda de sti ladu.

Para na Jesús rabi laabe:

Entonce qué riguixe ca xpinni be pue.

<sup>27</sup> Peru neca cadi naquiiñe quixe xpinni rey la? zaguixeu nu ni ti qué gapa cabe xi pur iní' cabe laanu. Yanna uyé uria nisa ne bisaba anzuelu stiu'. Primé ca benda inaaze lu ulee, ne bixhele ruua me. Zadxela lu ti moneda. Ucuua ni, ne uyé ra nuu cabe, guidixe stiu' ne stinne'.

## 18

*Tu laa jma risaca*

(*Mr. 9.33-37; Lc. 9.46-48*)

<sup>1</sup> Ca dxi queca bidxiña ca discípulu sti Jesús ra nuu, ne unaba diidxa ca laabe:

—Tuu nga jma risaca lade ca xpinni Dios.

<sup>2</sup> Para guridxi be ti ba'du, bizuhuaa be galahui de laaca

<sup>3</sup> ne na be:

Gabe ca' laatu, pa qué gaca tu casi ba'du la? qué zanda chu' tu lade ca xpinni Dios.

<sup>4</sup> Nga runi tu qué udxiiiba laca laa sínunque gaca casi ba'du ri la? laa jma risaca lade ca xpinni Dios.

<sup>5</sup> Ne tutiica gacané tobi de cani nahuiini ru lu neza stinne', ne guni ni pur naa la? cásica ñaca ñacané naa.

*Pabiá' naxoo nuu ni guni pur uchee stobi*

(*Mr. 9.42-48; Lc. 17.1-2*)

<sup>6</sup> Peru tutiica guni pur uchee tobi de cani deru zeda yuni cre naa la? gapa gá si laa, partí cadi tan naná ñaca para laa pa nundiibi cabe ti guiche ro' yanni, ne nundaa cabe laa galaa nisadó', bia' nga naná ni gueeda luguiá pa guni pur uchee cabe.

<sup>7</sup> Gapa gá si binni guidxi-layú laa, partí pur ni runi ca' ruchee stobi. Qué ziaadxa tu guni zacá, peru gapa gá si ni guni ni que laa.

<sup>8</sup> Pa nuu xiixa cuchiña nou' lii guni lu ni cadi jneza, o ra cuchiña ñeeu lii cheu' para chi ucheeu siou' la? bixele de laacani partí jma huaxié' naná zaca para lii ibani lu sin laacani, bia' naná gaca para lii gu'nú irá nga ne cheu' gabia.

<sup>9</sup> Ne zaqueca pa nuu xiixa cayuuya lu' cuchiña lii gu'nú ni cadi jneza la? bixele zitu de laani, partí cadi tan naná zaca para lii ixele lu de laani ne gapu enda nabani, bia' naná ñaca ni pa nicoou ni cayuuya lu ca, ne nilá lu lu bele.

*Cuentu sti dendxu biniti*  
(*Lc. 15.3-7*)

<sup>10</sup> Laguuya gá cadi udxii deche tu ca nahuiini ni runi cre naa ri', partí zuhuua ca ángel ni rapa laacabe nezalú Bixhoze ni nuu ibá'.

<sup>11</sup> Naa nga Hombre Biseenda Dios, ne benda para gula'ya cani cananiti.

<sup>12</sup> Xi na tu de ndi ya': pa ñapa ti hombre ti gayuua dendxu ne niniti tobi, ñee qué nusaana be noventa

y nueve que ne ñaazi be  
gui'xhi niyubi be ni biniti  
que la?

<sup>13</sup> Ne ora ma bidxela be  
laame, ñee cadi jma ñeche  
né be laame que ca xcaadxi  
dendxu ni qué niniti que la?

<sup>14</sup> Zacaca qué racala'dxi  
Bixhoze tu ni nuu ibá' initi  
nin tobi de ca nahuiini ri'.

*Xi guni né binni cani uchhee  
né laa  
(Lc. 17.3)*

<sup>15</sup> Pa uchhee né ti hermanu  
lii la? yetidxi laabe xi bi'ni  
be, peru lii siou' ne laabe. Ne  
pa icaa be stiidxa lu la? ma  
guca neu laabe ngue.

<sup>16</sup> Peru pa qué na be icaa  
be stiidxa lu la? biyubi tobi  
o chupa chinéu ra nuu be ti  
guna diaga ca ngue xi bi'ni  
be.

<sup>17</sup> Ne pa qué na be chu' be  
razón la? gudxi ni irá ca her-  
manu. Ne pa nin zaqué qué  
na be icaa be stiidxa tu la?  
óraque ma cadi gapa tu laabe  
casi hermanu sínuque casi  
tobi ni qué runi cre Dios o  
casi cani ruquixe impuestu.

<sup>18</sup> Gabe ca' laatu, tutiica  
guni perdonar irá ca her-  
manu rari la? laca zaca per-  
donar ibá'.

<sup>19</sup> Ne laca pa chu' chupa  
hermanu tobi si ndaani  
guidxilayú ne inaba ca xiixa  
lu Bixhoze ni nuu ibá' la?  
zudii ni laaca'.

<sup>20</sup> Purti ra nuu chupa  
chonaa ni cusisaca naa la?  
galaa de laaca nuaa'.

<sup>21</sup> Oraque bidxiña Pedru ra  
nuu be ne na rabi laabe:

—Señor, panda tiru gune  
perdonar ti hermanu ni

uchee ne naa. Ñee bia' gadxe  
la?

<sup>22</sup> Para rabi be laa:

—Cadi gadxe si, sínuque se-  
tentra de gadxe.

*Sti hombre ni qué niná  
ñuni perdonar*

<sup>23</sup> Nga runi modo runi  
mandar Dios xpinni zeda  
gaca casi ti rey ni gucala'dxi  
niguixe ca xpinni irá ni nuza-  
abi laa.

<sup>24</sup> Ne casi bizulú be  
bisenda caa be laaca',  
bidxiña tobi ni nuzaabi laabe  
stale mil.

<sup>25</sup> Peru qué gapa ngue ni  
quixe ni, para na rey que  
idoo cabe, laabe ne xheela be  
ne ca xiñi be, ne irá ni napa  
be, para quixe be ni nuzaabi  
be laa que.

<sup>26</sup> Oraque bizuxibi be xa  
ñee rey que, ne na be rabi  
be laa: "Señor, biá naa, uleza  
naa caadxi, ti quixe ni."

<sup>27</sup> Ne biá rey que laabe,  
bindaa laabe, ne ma qué  
nuquixe laabe ni nuzaabi be  
laa que.

<sup>28</sup> Peru casi pe biree be de  
raqué, bidxaaga be sti xpinni  
rey que, ne ngue nuzaabi  
laabe bia' ti gayuua bexu,  
para biruuxha be ndaani  
yanni, rabi be laa: "Gudixe ni  
nuzaabu naa."

<sup>29</sup> Oraque bizuxibi ngue  
xañee be ne na: "Biá naa,  
uleza naa caadxi, ti quixe ni."

<sup>30</sup> Peru qué niná be, laga  
bidxiga be laa ndaani lidxi  
guiiba ne na be quixe si irá  
ni ti iree.

<sup>31</sup> Ngue bi'ya ca xcaadxi xpinni rey que, biá ca hombre que ne yetidxi ca ni rey que.

<sup>32</sup> Para guridxi rey que laabe sti tiru, na rabi laabe: "Hombre ni qué iquiiñe". Xíñee naa bine ni unaba lu naa, bine perdonar lii irá ni nuzaabi lu naa.

<sup>33</sup> Yanna lii, qué ñanda ñá lu stobi ca casi bia'ya lii la?"

<sup>34</sup> Ne pur ni bi'ni be que, bidxiichi né rey que laabe ne bitiidi laabe lu ná cani rapa ralidxi guiba', ne na guiaana be raqué dede ora ma gudixe be irá ni nuzaabi be que.

<sup>35</sup> Zacaça zuni Bixhoze ni nuu ibá' laatu pa qué guni perdonar tu ca hermanu stitu ni uchée né laatu, de idubi ladxidó' to.

## 19

*Xi na Jesús de enda rilaa né xheela'*

(Mr. 10.1-12; Lc. 16.18)

<sup>1</sup> Biluxé si uní' Jesús ca diidxa ca, biree de Galilea uyé neza Judea cherica guigu Jordán.

<sup>2</sup> Yenanda jma binni laabe ne raqué bisianda be laaca'.

<sup>3</sup> Oraque beeda caadxi fariseu ra nuu be, cuyubi ca modo usaba ca laabe pur ni iní' be. Para na ca rabi ca laabe:

—Ñee nou' jneza ilaa né cabe xheela cabe pur intiica cosa la?

<sup>4</sup> Oraque rabi be laaca':

—Qué xa huayuunda tu ra cá xi bi'ni Dios dxi bizulú bizá' binni. Bizá' be hombre ne gunaa,

<sup>5</sup> ne na be: "Pur nga runi zusaana hombre bixhoze ne jñaa, ne zadxaaga xheela ne zaca ca tobi si."

<sup>6</sup> Ne zacá ma cadi chupa cabe sínique tobi si laacabe. Pur nga runi ni ma bichaaga Dios la? ma cadi indaa binni guidxilayú.

<sup>7</sup> Para na ca fariseu rabi laabe:

—Peru xiñee bisiidi Moisés laadu naquiiñe indisa du acta de divorcio ne óraque ma zaa ilaa né du xheela du ya'.

<sup>8</sup> Para na be rabi be laaca':

—Purti naguidxi ladxidó' to, nga runi gudxi be laatu zaa ilaa né tu xheela tu, peru cadi zacá guca ni dxi bizulú ni.

<sup>9</sup> Peru naa rabe laatu, tutiica gaca divorciar né xheela ne ichaganá stobi, neca qué nuchee xheela la? ma enda rapa jnadxii ngue. Ne tu ichaganá ti gunaa ma guca divorciar né xheela la? laca zaqueca cayuni.

<sup>10</sup> Para na ca discípulu stibe rabi laabe:

—Pa zacá nou' guni hombre ne xheela la? jma nagueenda guiaana cabe sin ichaganá cabe.

<sup>11</sup> Oraque na be rabi be laaca':

—Cadi irá zanda guiaana sin ichaganá', sínique cani ma nexhe ni para laa.

<sup>12</sup> Purti nuu hombre riale maca para cadi ichaganá', ne nuu xcaadxi ni nuu pe tu runi ni laa para cadi ichaganá'. Peru laca nuu ni riale ni de laa si guiaana sin ichaganá', purti jma cá ique guni

xhiiña Dios ni nuu ibá'. Cani zanda guiaana sin ichaganá la? cadi ichaganá'.

*Ra uluu Jesús ndaaya caadxi ba'du'*  
(Mr. 10.13-16; Lc. 18.15-17)

<sup>13</sup> Oraque bedané cabe caadxi ba'du ra nuu Jesús para quixhe ná luguiá ca' ne ini' né Dios pur laaca'. Ne ora bi'ya ca discípulu que zeeda cabe la? udinde né ca laacabe.

<sup>14</sup> Peru óraque na Jesús rabi laaca':

—Cadi ucueeza tu ca ba'du ca, zaa gueeda cabe ra nuua', purti stícabe irá ni napa Dios ladxi ná', laacabe ne irá casi laacabe ca.

<sup>15</sup> Ne óraque gudixhe ná Jesús ique ca ba'du que, ne biree ze'.

*Ra uni' né ti ricu Jesús*  
(Mr. 10.17-31; Lc. 18.18-30)

<sup>16</sup> Bidxiña ti hombre ra nuu Jesús ne na:

—Maistru cha'hui', xi enda nacha'hui naquiiñe gune para gapa enda nabani ni qué zaluxe.

<sup>17</sup> Para na Jesús rabi laabe:  
—Xiñee gudxi lu naa zacá. Iruti ru nacha'hui jma que tobi lucha Dios. Pa racala'dxu gapu enda nabani la? bi'ni ni na ca mandamiento.

<sup>18</sup> Oraque na be:

—Uná mandamiento.

Para na Jesús rabi laabe:

—Cadi guuti lu binni, cadi chu' neu ni cadi xheelu', cadi cuana lu', cadi cueeu falsu luguiá stobi.

<sup>19</sup> Gunaxhii bixho'zo ne jñoou', ne gunaxhii stobi clásica nadxii lu lii.

<sup>20</sup> Para na be:

—Irá nga huayune dede dxi nahuiine'. Yanna xi ru riaadxa'.

<sup>21</sup> Para na Jesús rabi laabe:

—Pa qué racala'dxu usi-aadxa lu nin caadxi la? yeutoo ni napu', ne bidii ni ca pobre ne zapu stale ni risaca ibá'. Oraque dananda naa.

<sup>22</sup> Ne ora bina diaga be xi na Jesús la? uyuu yuuba ladxitdó' be ne biree be ze be purti nabé ricu laabe.

<sup>23</sup> Oraque na Jesús rabi ca discípulu:

—Gabe ca' laatu, nabé nagana zaca para ricu chu'lade ca xpinni Dios.

<sup>24</sup> Ne chi tidxe ni laatu sti tiru. Jma qué igana chu' ti camellu xa'na ti aguxa' que chu' ti ricu lade ca xpinni Dios.

<sup>25</sup> Nabé bidxagayaa ca discípulu ni uni' Jesús que, ne na ca':

—Tu zanda ilá pue.

<sup>26</sup> Biiya dxí Jesús laacabe ne na rabi laacabe:

—Nabé nagana ndi para binni guidxilayú peru para Dios gasti ni nagana.

<sup>27</sup> Oraque na Pedru rabi laabe:

—Laadu ya', xi zacaa du, ma bisaana du irá xixé ne ma beda nanda du lii.

<sup>28</sup> Para na be rabi be laaca':

—Chi tidxe ca' ndi laatu: dxi guzulú guidxilayú cubi ne guseenda Dios naa cue casi rey la? dxi que laca zudiee laatu ra cui tu para guni mandar tu cani za de

idubi doce xiiñi Israel, purti uzá né tu naa.

<sup>29</sup> Ne tutiica gusaana lidxi o bi'chi o biza'na o bixhoze o jñaa o xheela o xiiñi o xquidxi pur naa la? zacaa ti gayuua tantu de ni bisaana que, ne zapa enda nabani ni qué zaluxe.

<sup>30</sup> Peru stale de cani za niru ziaana atrá ne zaqueca stale de cani za atrá, zazá niru.

## 20

*Ejemplu sti ca ni bi'ni xhiña tobi hombre*

<sup>1</sup> Modo runi mandar Dios xpinni zeda gaca casi ti hombre, xpixuaana ti layú. Siadó' ro' biree ziyubi tu guni dxiiña lu jlayú.

<sup>2</sup> Ne biaana né be caadxi ni bidxela be óraque quixe be laaca ti denariu ti dxi. Para biree ca ziguni ca dxiiña que.

<sup>3</sup> Dxi queca biree be uyé be galahui bia' las nueve, biiya be zuhuua caadxi, gasti cayuni.

<sup>4</sup> Para rabi be laaca': "Napa dxiiña guni tu ne zaguixe laatu bia' jneza guaxa tu." Para biree ca ze ca' ziguni ca xhiña be.

<sup>5</sup> Biree be sti tiru bia' galaa dxi ne sti tiru bia' las tres, ne casi bi'ni be primé que zaqueca bi'ni be óraque.

<sup>6</sup> Biree ru be sti tiru bia' las cincu ne bidxela be xcadxi zuhuua, gasti cayuni. Para na be rabi be laaca': "Xiñee idubi dxi nuu si tu."

<sup>7</sup> Para na ca': "Purti iruti nudii dxiiña laadu." Para na be: "Lachiguni dxiiña lu layú stinne', ne zaguixe laatu bia' jneza guaxa tu."

<sup>8</sup> Huaxhinni que na be rabi be ni rapa xpidxichi be: "Guridxi cani cayuni dxiiña ca ne gudixe laaca". Bizulú né cani biuu últimu ne biluxe né cani biuu primé."

<sup>9</sup> Ne ora bidxiña cani uyé bia' las cincu que, ucuaa ca ti denariu cada tobi ca'.

<sup>10</sup> Ne ora beeda cani uyé siadó' que, zácaxa ca nicaa ca jma stale, peru laca bia' queca ucuaa ca'.

<sup>11</sup> Ne ora bi'ya ca bia' queca ucuaa ca la? bidxiichi né ca laabe.

<sup>12</sup> Ne na ca': "Ca ndi ti hora si bi'ni ca dxiiña ne gudixe lu laaca bia' ca gudixe lu laadu, laa nda du bidxuí du idubi dxi."

<sup>13</sup> Para na be rabi be tobi de laaca': "Xhamigua", qué niguite dia' lii. Ñee cadi biaana nia lii icoou ti denariu la?

<sup>14</sup> Ucuaa stiu' ne uyé. De naa pia' beeda ni bidiee laacabe bia' bidiee lii.

<sup>15</sup> Ñee qué zanda gunen stinne ni racaladxe la? o cadxiichi tu tisi guca nacha'hui ne laacabe la?"

<sup>16</sup> Zacá nga laani, stale de cani biaana atrá zazá niru, ne zaqueca stale de cani za niru, ziaana atrá. Ne stale tu raca invitar, peru huaxié' tu zanda guiuu.

*Ra bigueta bizeete Jesús zati*  
(Mr. 10.32-34; Lc. 18.31-34)

<sup>17</sup> Ti dxi ze Jesús neza Jerusalén, ucuaa idubi doce discípulu sti' ne biree chu ne laacabe ti ladu, ne na rabi laacabe:

18 —Laguuya', mayaca guiu' nu Jerusalén, ne raqué inaaže ca xaíque sti ca sacerdote ne ca maistru de ley naa, ne zanaba ca gate'. Naa nga Hombre Biseenda Dios.

19 Zutiidi ca naa lu ná cani cadi judíu para guxidxi ca ngue de naa ne quiñe ca naa ne ucaa ca naa lu cruz, peru raguionna gubidxa ziasa de lade gue'tu'.

*Ra uyé xheela Zebedeu ra nuu Jesús*

(Mr. 10.35-45)

20 Oraque bidxiña né xheela Zebedeu iropa xiiñi ra nuu Jesús, ne bizuxibi xañee Jesús ne na rabi laabe pa zuni be xixa para laa.

21 Para na be rabi be laa:

—Xi racala'dxu gune'.

Oraque na gunaa que:

—Xiñee qué cueeu ti orde cui iropa xiiñe ri cue' lu dxi guni mandar lu', tobi ladu derechu ne stobi ladu biga'.

22 Peru na be rabi be ca xiiñi gunaa que:

—Qué ganna tu xi canaba tu. Ñee zanda gacaná tu casi chi gaca na'ya', ne tidi tu ni chi tide ri la?

—Zanda, na ca'.

23 Oraque na be:

—Dxandí zacaná tu ne zadi'di tu casi chi tide', peru para cui tu cuee ladu derechu ne ladu biga la? cadi nexhe ni lu naya para gudiee', purti maca gudixhe Bixhoze tuu nga icaa ni.

24 Ne ora bina diaga xhii discípulu que de ni guca que

la? bidxiichi né ca xhupa que.

25 Peru guridxi Jesús laa-cabe ne na rabi laacabe:

—Nanna tu modo sti cani runi mandar ndaani guidxi-layú, runi stica irá binni ni runi mandar ca'. Ne za-queca ca hombre ni risaca, riula'dxi ca guni binni ni na ca'.

26 Peru laatu cadi guni tu zacá lade tu, sínuque tu gacala'dxi isaca jma la? napa xidé gaca casi jmozo ca xcaadxi.

27 Ne zaqueca guni tutiica gacala'dxi sa niru,

28 casi huayune lade tu. Naa nga Hombre Biseenda Dios ne benda cadi para gacané cabe naa, sínuque para gacanía laacabe ne para udiee xpida para ilá stale binni.

*Bianda chupa lú cheepa'*

(Mr. 10.46-52; Lc. 18.35-43)

29 Ora biree cabe de Jericó, yenanda jma binni laabe.

30 Ne ruua neza ra zidi'di cabe que zuba chupa hom-bre nacheepa lú. Ne ora gunna ca zidi'di be raqué la? bicaa ca ridxi ne na ca':

—Señor, Xiiñi David, biá laadu.

31 Oraque udinde né ca binni que laaca para nigani ca', peru laga jma rusi reciu bicaa ca ridxi ne na ca':

—Señor, Xiiñi David, biá laadu.

32 Para bizuhuaa dxí Jesús ne guridxi laaca', ne na rabi laaca':

—Xi racaladxi tu gune para laatu.

<sup>33</sup> Para na ca':  
—Señor, racala'dxi du ixele lú du.

<sup>34</sup> Oraque biá Jesús laaca ne uda'na lú ca'. Ne oraqueca bixelete lú ca' ne yenanda ca laabe.

## 21

*Biuu Jesús Jerusalén*  
(Mr. 11.1-11; Lc. 19.28-40;  
Jn. 12.12-19)

<sup>1</sup> Ma zeda dxiña cabe Jerusalén, bedandá cabe Betfagé, cue' dani lá Olivo. Ne de raqué na Jesús rabi chupa discípulu sti':

<sup>2</sup> —Laché ndaani guidxi huiini ni nuu checá ca, ne casi chindá tu raqué zadxela tu ti burra cá yaga ne cá ti burru huiini cue' me. Lauxhedxe laacame ne latané laacame ra nuua'.

<sup>3</sup> Ne pa chu' tu gabi laatu xiñee cuxhedxe tu laacame la? lagabi laaca caquiiñe Señor laacame, ne óraque zudii ca lugar guedané tu laacame.

<sup>4</sup> Irá nga guca ti iree ni modo pe uní' Dios de ruaa profeta que, ra na:

<sup>5</sup> Lagabi ca binni guidxi Sion gu'ya ca', zeeda rey stica ra nuu ca'. Nadó' zeeda be ne dxi'ba be deche ti burru huiini', xiiñi ti mani ni rigu'ba carga.

<sup>6</sup> Para biree ca discípulu que ze ca' ne bi'ni ca casi guidxi Jesús laaca'.

<sup>7</sup> Bedané ca burra ne burru huiini que, ne guidixhe ca xhaba ca deche came, para udxi'ba Jesús deche nahuiini que.

<sup>8</sup> Stale binni ni rí raqué bichiaa ca xhaba ca lu neza ra zidi'di be, ne xcaadxi bichuugu rama ne gudixhe ni lu neza que.

<sup>9</sup> Ne ca binni ni za niru, ne cani nanda atrá, cucaa ca ridxi, na ca':

—¡Lacuu viva sti xiiñi rey David! ¡Lausisaca laabe ti Dios biseenda laabe ne lausisaca Dios ni dxi'ba ibá'!

<sup>10</sup> Ne ora ziyuu be ndaani guidxi Jerusalén, bi'ni ca binni guidxi que bulla ne na ca':

—Tu hombre ri pue.

<sup>11</sup> Para na ca xcaadxi binni que:

—Ndi nga Jesús profeta ni biree de Nazaret de Galilea que.

*Bisiá Jesús yu'du ro'*

(Mr. 11.15-19; Lc. 19.45-48; Jn. 2.13-22)

<sup>12</sup> Oraque biuu be ndaani yu'du ro' sti Dios, ne guladxi be irá cani cutoo ne ni cazí' ndaani yu'du que, ne bitiixhi be jmexa cani cuchaa bidxichi ne xpangu cani cutoo paloma.

<sup>13</sup> Ne na be rabi be laaca':

—Maca cá ni lu Xqui'chi Dios ra na: "Lidxe nuu para iní' né cabe naa ndaani'." Peru laatu laga ma bi'ni tu ni lidxi gubaana'.

<sup>14</sup> Nuu ru be ndaani yu'du ro' beeda caadxi ni nacheepa lú ne caadxi ni nachiita ñee ra nuu be, para bisianda be laaca'.

<sup>15</sup> Peru cayuuya ca xaíque sti ca sacerdote ne ca maistru de ley irá ca milagru ni cayuni be que. Ne laca cayuna diaga ca modo cucaa

ca ba'du ni nuu ndaani yu'du que ridxi: "Lausisaca xiiñi rey David." Ngue runi bidxi-ichi né ca laabe.

<sup>16</sup> Ne na ca rabi ca laabe:

—Ñee cadi cayuna diaga lu ni caní' ca ba'du ca la?

Para na be:

—Cayuna dia'ga pue. Qué xa huayuunda tu lu Xqui'chi Dios ra cá:

Gudixhe lu usihuinni ca xcuidi huiini ne ca badu huiini enda nandxó' stiu'.

<sup>17</sup> Ngue si uní' be, bisaana be laaca' bixelete be de guidxi que, uyé be Betania ne raqué biaana be huaxhinni que.

*Ra udinde né Jesús yaga du'ga'*

(Mr. 11.12-14, 20-26)

<sup>18</sup> Siadó' que biree be ze be Jerusalén sti tiru. Ze be neza, bindaana be.

<sup>19</sup> Ne biiya be zuhuua ti yaga du'ga uriá neza que, para bidxiña be ra nuu. Peru qué nidxela be nin ti du'ga', nisi bandaga cá lu ni. Para na be rabi be yaga que:

—Qué ziuu dxi ru icá nin sti du'ga lú lu'.

Ne oraqueca bibidxi yaga que.

<sup>20</sup> Ora bi'ya ca discípulu ni, nabé bidxagayaa ca ne na ca':

—Ximodo gunda bibidxi yaga ca casi ze'.

<sup>21</sup> Para na be rabi be laaca':

—Gabe ca' laatu, pa gapa tu fe ne qué ichaacha tu de laani la? cadi ni bine sia' ri' zanda guni tu, sínunque zanda gabi tu dani ca iree de racá

guiaba ndaani nisadó', ne zi-aba ni.

<sup>22</sup> Irá ni inaba tu ora iní' né tu Dios, pa inaba tu ni ne fe la? zacaa tu ni canaba tu que.

*Xiñee cayuni Jesús ni cayuni*

(Mr. 11.27-33; Lc. 20.1-8)

<sup>23</sup> Bigueta ru be ndaani yu'du ro', ne laga cusiidi be bidxiña ca xaíque sti ca sacerdote ne ca xaíque sti guidxi que ra nuu be, na ca rabi ca laabe:

—Tu naca lu para cayu'nu irá ndi', o tu gudxi lii gu'nu cani.

<sup>24</sup> Para rabi be laaca':

—Naa laca napa xiixa inaba diidxa laatu, ne pa gabi tu naa ni chi inaba diidxa laatu ri la? laca zabe laatu tu naca para cayune cani.

<sup>25</sup> Xi na tu de ni bi'ni Juan ra beda nduu nisa binni ya'. De Dios zeeda ni la? o de binni guidxilayú.

Oraque ucuaa yu né ca ni ne na ca':

—Pa gabi nu laabe zeeda ni de Dios la? zabi be laanu xiñee qué fñuni cre nu ni.

<sup>26</sup> O pa gabi nu laabe zeeda ni de binni guidxilayú la? gapa gá si nu laanu ne idubi guidxi ri' partí napa cabe Juan de profeta sti Dios.

<sup>27</sup> Para na ca rabi ca laabe:

—Qué ganna di du.

Oraque rabi be laaca':

—Nin naa qué zabe laatu tu gudxi naa gune ni rayune ri'.

*Sti chupa bi'chi'*

<sup>28</sup> Xi na tu de ndi ya'. Ti hombre gupa chupa xiini', ne

ti dxi rabi be ni jma huani-  
isi que: "Uyé rañaa yanadxí,  
xiiñe'."

<sup>29</sup> Para na rabi laabe: "Qué  
ziaa dia'." Peru ratu si que  
uca arrepentir, ne biree uyé.

<sup>30</sup> Oraque bidxiña be ra  
nuu stobi que, ne zaqueca  
gudxi be laa. Para na rabi  
laabe: "Nagasi ma chaa',  
apá." Peru qué ñe.

<sup>31</sup> Yanna xi na tu. Uná de  
lade iropa cabe bi'ni ni na  
bixhoze.

Para na ca':

—Primé que.

Oraque na be rabi be  
laaca':

—Gabe ca' laatu, jma  
nagueenda ziuu cani  
ruquixe impuestu ne ca  
gunaa dxaba ra runi mandar  
Dios que laatu.

<sup>32</sup> Purti beda usiidi Juan  
Bautista ximodo sa tu jneza  
ne qué ñuni cre tu laa. Peru  
cani ruquixe impuestu ne ca  
gunaa dxaba la? bini cre ca'.  
Laatu neca biiya tu irá, qué  
nuchaa tu xpio' tu ne qué  
nuni cre tu.

*Sti ca hombre qué iquiiñe'*  
(Mr. 12.1-12; Lc. 20.9-19)

<sup>33</sup> Lauca diaga sti ejemplu  
chi tixhe ri'. Sicarí biza-  
aca lú xpixuaana ti layú.  
Bizuhuaa be yaga uvas lu  
layú que, ne guluu be le' ni,  
ne bi'ni be pila para ixii uvas  
ndaani', ne bicui be ti torre  
ra guiaana ni gapa ni.

Biluxé bi'ni si be ni,  
bisaana né be ni caadxi  
hombre gapa ni, ti ora udii  
ni la? icaa né be ni laaca'. Ne  
biree be yendeza be zitu de  
raqué.

<sup>34</sup> Dxi ma gunda dxi iruugu  
uvas que, biseenda be caadxi  
xpinni be, chi caa ni raca  
cabер laabe.

<sup>35</sup> Peru cani bisaana né  
be ni que, laga udiñe ca ti  
xpinni be que ne biiti ca stobi  
ne bichá ca guie stobi.

<sup>36</sup> Ne óraque biseenda be  
jma stale que cani uyé que,  
peru laca zaqueca bi'ni ca  
hombre que laaca'.

<sup>37</sup> Ultimu na be: "Chi  
guseenda xiiñe', zanda ca  
gapa xpio' cabe ne laa."

<sup>38</sup> Peru ora bi'ya cani  
cayapa layú que xiiñi be la?  
uní' stiidxa ca na ca': "Ndi  
nga ni icaa irá ni. Laguuti  
laa ti guiaana né nu irá sti'."

<sup>39</sup> Ne ulee ca laabe de  
ndaani le' que para biiti ca  
laabe.

<sup>40</sup> Yanna xi na tu, xi gaca xa  
de cani biaana né layú que  
dxi gueeda xpixuaana ni ya'.

<sup>41</sup> Para na ca xaíque sti ca  
sacerdote ne ca xaíque sti ca  
judíu:

—Qué lica ziá be laaca  
para guuti be laaca'. Ne  
zusaana né be layú que  
xcaadxi ni zaná gudii laabe  
cuananaxhi ni iree ndaani  
le' que.

<sup>42</sup> Oraque na be rabi be  
laaca':

—Qué huayuu dxi gu'nda  
tu lu Xqui'chi Dios ra cá ca  
diidxa ri la?

Guie ni bisa'bi cani cucuí yoo  
que,  
guie que pe naaze yoo que  
yanna.

Nga nga ni bi'ni Dios,  
ne para laanu  
ma enda ridxagayaa ni.

<sup>43</sup> Pur nga runi cayabe laatu ziaaxha tu de lade ca xpinni Dios ne ma adxé tu guiuu jlugar tu, tobi ni zanda iquiiñe para laabe.

<sup>44</sup> Ne tu guiaba lu guie ni bisa'bi cabe que zacadé, ne zaqueca tu guiaba guie que luguiá laca zacadé.

<sup>45</sup> Ne biluxe si bicaa diga ca xaique sti ca sacerdote ne ca fariseu ca ejemplu gudixhe be que la? biene ca cuzeete be laaca'.

<sup>46</sup> Ne óraque ucaladxi ca ninaaze ca laabe Peru bidxbi ca ca binni guidxi que purti napa ca laabe de profeta.

## 22

### *Sti enda xheela'*

<sup>1</sup> Bigueta gudixhe ru Jesús xcaadxi ejemplu para laacabe, na:

<sup>2</sup> —Enda runi mandar sti Dios zeda gaca casi ti rey ni guluu saa ra biluxe xquenda xheela xiiñi'.

<sup>3</sup> Bisenda tidxi be cani maca bini invitar be ñeeda, Peru qué niná ca'.

<sup>4</sup> Bigueta rabi be xcaadxi xpinni be: "Laché lachitidxi cani bine invitar gueeda ra enda xheela ri' purti ma nuu irá ni, ma biite yuze ro' ne yuze huiini ni bisiruaa, ne ma nuu endaró."

<sup>5</sup> Peru nin óraque qué nulabi ca stiidxa be, lágalá biree tobi ze rañaa ne stobi ziutoo,

<sup>6</sup> ne xcaadxi de laaca guaaze ca cani biseenda be que, udiñe ca dede biiti ca'.

<sup>7</sup> Ne ora gunna be xi bi'ni ca la? nabé bidxiichi be ne

biseenda be ca soldadu stibe, yeguuti cani biiti xpinni be que ne bicaa gui be xquidxi ca'.

<sup>8</sup> Oraque na be rabi be ca xpinni be: "Dxandí ma nuu enda xheela ri para gaca', Peru qué iquiiñe cani bine invitar para laani.

<sup>9</sup> Yanna, laché lu calle ne tutiica idxaaga tu lacuidxi laa para enda xheela ri'."

<sup>10</sup> Para biree ca xpinni be que lu calle ne bitopa ca irá ni bidxaaga ca', cásica ni nacha'hui zaqueca ni nadxaba', ne zaqué de bidxá ra chi gaca enda xheela que de binni.

<sup>11</sup> Oraque biuu be cayuuya be irá ca' ne biyya be nuu ti hombre cadi nacu lari para enda xheela'.

<sup>12</sup> Para na be rabi be laa: "Amigu, ximodo biuu lu rari pa cadi nacu lu lari para enda xheela'." Peru qué nidxela hombre que xi niní'.

<sup>13</sup> Oraque rabi be cani canaguiizi': "Laundiibi ná be ne ñee be, ne laundaa laabe lu guelacahui ne raqué nga gu'na be dede go yaa be guidruaa be."

<sup>14</sup> Ne óraque na Jesús: —Stale tu raca invitar Peru huaxié' tu zanda guiuu.

*Enda riguixe impuestu  
(Mr. 12.13-17; Lc. 20.20-26)*

<sup>15</sup> Oraque biree ca fariseu yení' stiidxa ca ximodo zanda usaba ca Jesús lu stiidxa'.

<sup>16</sup> Ne biseenda ca ca discípulu stica ne caadxi de ca judíu ni nuu pur Herodes

ra nuu be, ne na ca rabi ca laabe:

—Maistru, nanna du jneza runi lu' ne dxandí neza sti Dios rusiidi lu', ne qué rugá lu iruti tutiica naca.

<sup>17</sup> Gudxi laadu xi na lu de ndi': Nee jneza quixe nu ca impuestu sti César la? o co'.

<sup>18</sup> Peru ma nanna be cuyubi si ca usaba ca laabe, para rabi be laaca':

—Xiñee cuyubi tu usaba tu naa, binni rusiguii ca'.

<sup>19</sup> Latané ti moneda ni riguixe tu impuestu ca, guuya'.

Para bidii ca laabe ti denariu.

<sup>20</sup> Oraque rabi be laaca':

—Tu cá lú ni.

<sup>21</sup> Para na ca':

—César.

Oraque na be:

—Laudii César sti César, ne laudii Dios sti Dios.

<sup>22</sup> Ne ora bina diaga ca xi na be la? nabé bidxagayaa ca ne biree ca ze ca'.

*Pa dxandí zabani gue'tu'  
(Mr. 12.18-27; Lc. 20.27)*

<sup>40</sup> <sup>23</sup> Dxi queca beeda caadxi saduceu, cani na qué riasa binni de lade gue'tu', ne unabu diidxa ca laabe,

<sup>24</sup> na ca':

—Maistru, uní' Moisés pa chu' ti hombre ichaganá', ne gueda gati qué ñapa xiiñi la? naquiiñe ichaganá bi'chi be xheela be ne gapa xiiñi casi ñaca xiiñi be.

<sup>25</sup> Guyuu gadxe hombre lade du, irá ca bi'chi ca'. Bichaganá lugola que, ne guti qué ñapa xiiñi'. Para biaana né bi'chi be xheela be.

<sup>26</sup> Ne zaqueca bizaaca rabiropa que ne rabionna, dede ra birá cabe.

<sup>27</sup> Ne ra birá cabe que raqué guti gunaa que.

<sup>28</sup> Yanna, xi na lu'. Dxi ibani gue'tu ya'. Uná de lade gadxe que xheela gunaa que, purti irá cabe bichaganá cabe laa.

<sup>29</sup> Oraque na Jesús rabi laabe:

—Cuchee tu purti qué ganna tu xi na Xqui'chi Dios nin pabiá' nandxo' be.

<sup>30</sup> Purti dxi ibani gue'tu la? qué zachaganá cabe ne qué zucheela cabe sínueque zaca cabe casi ca ángel sti Dios ni nuu ibá'.

<sup>31</sup> Laatu canaba diidxa tu de enda ribani de lade gue'tu'. Qué xa huayuunda tu ra cá xi gudxi Dios laatu ra na:

<sup>32</sup> "Naa nga Dios sti Abraham, ne sti Isaac ne sti Jacob." Ne dxi uní' Dios nga la? ma guti cabe para binni, peru para Dios nabani ru cabe.

<sup>33</sup> Ne ora bina diaga irá binni ni nuu raqué ni la? bidxagayaa ca modo cusiidi be que.

*Mandamiento ni jma risaca  
(Mr. 12.28-34)*

<sup>34</sup> Ora gunna ca fariseu ma biseegu Jesús ruua ca saduceu la? uyuu ca tobi si ne uní' stiidxa ca'.

<sup>35</sup> Nuu ti maistru de ley lade ca' ne uyé ngue ra nuu be para gu'ya pa ganda usaba laabe. Ne na rabi laabe:

**36**—Maistru, uná nga mandamientu ni jma risaca lade idubi ley.

**37** Para na be rabi be laa:

—“Gunaxhii Dios stiu' de idubi ladxidó' lo' ne idubi xhalma lu' ne idubi xquenda biaani lu'.”

**38** Nga nga primé mandamientu ne ni jma risaca.

**39** Ne rairopa ri zeda gaca casi primé ca: “Gunaxhii stobi cásica nadxii lu lii.”

**40** Iropa ca mandamientu ca nga xcu idubi naca ley ne ni bicaa ca profeta.

*Tu xiiñi Cristu*

(Mr. 12.35-37; Lc. 20.41-44)

**41** Ne laga rí ru ca fariseu raqué

**42** rabi be laaca':

—Yanna xi na tu de Cristu, tu dé za be.

Para na ca':

—Lade ca xiiñi David.

**43** Para na be rabi be laaca':

—Pa zacá nga laani la? xiñee dxí bisiní' Espíritu Santu David, na Señor sti laabe ya'. Purti ndi nga ni uní' David óraque:

**44** Na Dios rabi Señor stinne': “Gurí cuee dede ora ma gudixhe dxie cani nanala'dxi lii xañee lu'.”

**45** Pa rabi David laabe Señor sti la? ximodo zanda gaca be xiiñi David ya'.

**46** Peru nin tobi de laaca qué nidxela xi niní', ne dede dxí que bidxibi ca ninaba diidxa ca laabe xiixa.

## 23

*Bidxiiba Jesúus donda ique ca fariseu ne ca maistru de ley (Mr. 12.38-40; Lc. 11.37-54; 20.45-47)*

**1** Bizulú uní' né Jesúus ca binni que ne ca discípulu sti',

**2** na rabi laacabe:

—Nuu ca maistru de ley ne ca fariseu para gusiidi ca ley sti Moisés.

**3** Nga runi cayabe laatu guni tu ni na cabe. Pa gabi cabe laatu chi nanda tu xiixa la? lachinanda ni, ne laguni ni. Peru qué chi guni tu casi runi cabe, purti riní' cabe peru qué runi cabe.

**4** Modo runi cabe ca zeda gaca casi ñaca nundiibi cabe xiixa nanaa ne nudxiiba cabe ni yanni stobi, peru laacabe qué racala'dxi cabe cana cabe ni, nin ne ti bicuini na cabe.

**5** Riula'dxi cabe gu'ya binni pabiá' zinanda cabe ley sti Moisés, dede ricaa cabe ca gui'chi ra cá ni, rundiibi cabe ni lu ná cabe ne lucuá cabe, ne ruzigueda cabe jluxu lu xhaba cabe.

**6** Ne zaqueca runi cabe ra chi tó cabe, riula'dxi cabe cui cabe lugar ni nuu para binni ni jma risaca. Ne zaqueca cui cabe lu ca banca ni jma galán ndaani yu'du'.

**7** Riula'dxi cabe ugapa diuxi binni laacabe lu calle ne irá binni gabi laacabe maistru, maistru.

**8** Peru laatu cadi chu'lá'dxi tu gabi cabe laatu maistru, purti tobi si maistru nga nuu, ne laa nga Cristu. Laatu la? bi'chi irá tu.

<sup>9</sup> Ne cadi guni bixhoze tu nin tobi de cani nuu ndaani guidxilayú partí tobi si nga Bixhoze tu ni nuu ibá'.

<sup>10</sup> Zaqueca cadi chu'la'dxi tu guni cabe laatu xaíque partí tobi si nga xaíque stitu, ne laa nga Cristu.

<sup>11</sup> Ni jma risaca lade tu la? napa xidé gaca casi jmozo ca xcaadxi.

<sup>12</sup> Ni gudxiiba laca laa la? jma huaxié' zasaca, peru ni qué gudxiiba laca laa la? ngue zusisaca Dios laa.

<sup>13</sup> Lagapa gá laatu, maistru de ley ne fariseu ca', partí nisi rusiguii tu. Ne pur laatu qué ganda chu' binni lade ca xpinni Dios. Qué na tu chu' tu, ne nin qué na tu chu' cani racala'dxi chu'.

<sup>14</sup> Lagapa gá laatu, maistru de ley ne fariseu, binni rusiguii ca', partí raxha tu lidxi cani ma guti xheela' ne para cadi ului' pa laatu cayuni tu ni, runi tu resá xadxí. Nga runi jma ziaba ná tu.

<sup>15</sup> Lagapa gá laatu, maistru de ley ne fariseu, binni rusiguii ca', partí ridi'di tu nisadó' ne rizá tu zitu para idxela tu tu chu' lade tu. Ne ora ma nuu be lade tu la? runi tu laabe xiiñi binidxaba chupa de bia' naca tu ca.

<sup>16</sup> Lagapa gá si laatu partí nin laatu qué ganna tu, peru racala'dxi tu usiidi tu stobi, ne rabi tu laaca': "Tu guni jurar pur yu'du ro' la? gasti naca pa qué guni ni ma uní". Peru tu guni jurar pur ca oro ni nuu ndaani ni la? laa huaxa naquiiñe guni ni iní".

<sup>17</sup> Binni huati ca', qué riene tu nja'. Ñee cadi jma risaca yu'du que, que oro ni nuu ndaani ni la? partí pur yu'du que nga guca ndaaya oro que.

<sup>18</sup> Ne laca na tu: "Tu guni jurar pur altar la? gasti naca pa qué guni ni ma uní", peru tu guni jurar pur ni nexhe lu altar que la? laa huaxa naquiiñe guni ni iní".

<sup>19</sup> Binni huati ca', qué riene tu nja'. Lácaxa cadi jma risaca altar que, que ni nexhe lú, partí pur altar que nga raca ndaaya ni nexhe lú.

<sup>20</sup> Ndi nga laani: tu guni jurar pur altar la? cayuni jurar pur laani ne pur ni nexhe lú ni.

<sup>21</sup> Ne zaqueca tu guni jurar pur yu'du ro' la? cayuni jurar pur Dios partí Dios nga nuu ndaani ni.

<sup>22</sup> Ne tu guni jurar pur ibá' la? cayuni jurar pur ra zuba Dios ne pur Dios partí laa ná zuba raqué.

<sup>23</sup> Lagapa gá si laatu, maistru de ley ne fariseu, binni rusiguii ca', partí dede ca guixi rindá' naxhi casi menta ne anís ne cominu runi tu cani chii ndaa, ne rudii tu tindaa Dios, peru qué rulabi tu ni jma naquiiñe guni tu ni zeeda lu ley. Ruchee né tu binni ne qué riá tu laaca', ne qué runi cre tu Dios. Ca nga nga ni jma naquiiñe guni tu, peru laca cadi gusaana tu de guni tu ca xcaadxi ca.

<sup>24</sup> Binni lú cheepa ca', racala'dxi tu ului' tu stobi

peru nin laatu qué ruuya tu. Zeda gaca ni casi ñaca nibee tu biuxi lu endaró peru ñabi tu idubi ti camellu.

<sup>25</sup> Lagapa gá si laatu, maistru de ley ne fariseu, binni rusiguii ca', partí zeda gaca tu casi vasu ne bladu ni ria'ri ladi si, peru ndaani cani nabiidi'. Zacaca laatu, de luguiá si ruluí' nacha'hui tu, peru ndaani ladxidó' to nabiidi partí riba'na tu sti binni né nalá tu.

<sup>26</sup> Fariseu lú cheepa ca', lagaca nacha'hui de ladxidó' to ne cadí de luguiá si.

<sup>27</sup> Lagapa gá si laatu, maistru de ley ne fariseu, binni rusiguii ca', partí zeda gaca tu casi ba', naquichi bé idubi ladi ne sicarú, peru ndaani dxá dxita gue'tu', ne irá ni nayuudxu'.

<sup>28</sup> Zacaca laatu. Para binni la? ruluí' nacha'hui tu partí ruuya ca de luguiá si, peru ndaani ladxidó' to dxá de enda rusiguii ne de enda nadxaba'.

<sup>29</sup> Lagapa gá si laatu, maistru de ley ne fariseu, binni rusiguii ca'. Runi tu xpa' ca profeta ne ruzuchaahui tu xhiu'du ca xpinni Dios ni ma guti,

<sup>30</sup> ne na tu: "Pa nibani nu dxí bibani ca bixhoze gola nu la? qué ñacané nu ra biiti cabe ca profeta."

<sup>31</sup> Ne racá rihuinni laca laatu cabee ruaa tu diidxa tu xiiñi laatu partí laatu nga xiiñi cani biiti ca profeta que.

<sup>32</sup> Yanna laatu lausaa chaahui ni biaadxa ñuni ca bixhoze gola tu.

<sup>33</sup> Binni malu ca', ruluí' pe tu beenda gubizi. Zácaxa tu zanda ilá tu de che tu gabiá xa.

<sup>34</sup> Nga runi zuseenda profeta ne hombre nuu xpiaani ne maistru ra nuu tu. Peru zuuti tu caadxi de laaca', ne nuu dede zucaa tu laa lu cruz, ne xcaadxi zaguiñe tu laaca ñdaani xhiu'du tu ne zaladxi tu laaca de ti guidxi para sti guidxi.

<sup>35</sup> Ne luguiá tu guiaana donda pur ca rini bixii sti irá hombre cha'hui ni huayuuti cabe dede dxí guti Abel para dxí guti Zacarías xiiñi Berequías, ni biiti cabe lade yu'du ro' ne altar ni nuu lu patiu.

<sup>36</sup> Gabe ca' laatu, irá nga ziaba luguiá ca binni nuu yanna ri'.

*Ra ucaná ladxidó' Jesús  
pur Jerusalén  
(Lc. 13.34-35)*

<sup>37</sup> Ne óraque na Jesús:

—Ah binni Jerusalén, Jerusalén, xiñee ndi ruuti tu ca profeta ne ruchá tu guie cani ruseenda Dios ra nuu tu. Panda que tiru gucaladxe ñapa laatu ndaani naya casi runi bere ne ca xiiñi xa'na xhiaa, peru qué niná tu.

<sup>38</sup> Para si yanna ma biaana stubi lidxi tu ne iruti culabi laa.

<sup>39</sup> Ne gabe ca' laatu, dede yanadxi ma qué zuuya ru tu naa, dede ganda dxí gu'ya tu naa ne na tu: "Lausisaca ni biseenda Dios."

## 24

*Na Jesúz zaxá yu'du ro'  
(Mr. 13.1-2; Lc. 21.5-6)*

<sup>1</sup> Biree Jesúz de ndaani yu'du ro' ne ma che be sti ladu, beeda ca discípulu stibe ne bilui' ná ca laabe ca yoo sti yu'du que.

<sup>2</sup> Para rabi be laaca':

—Ruuya tu irá ndi la? Gabe ca' laatu ziuu tu guxhá ni ne qué ziaana nin ti guie luguiá sti guie, de irá ni zanitilú.

*Xi gaca ante iluxe guidxi-layú*

*(Mr. 13.3-23; Lc. 21.7-24; 17.22-24)*

<sup>3</sup> Biree cabe raqué uyé cabe lu dani Olivo ne raqué gurí be, para bidxiña ca discípulu ra nuu be ne na ca rabi ca laabe:

—Laga nuu nu laasi nu, racala'dxi du ganna du padxí nga nou' gaca irá ni gu'dxu laadu que. Ne xi seña ihuinni dxi mayaca gueedu ne iluxe guidxlayú ri'.

<sup>4</sup> Para na be rabi be laaca':

—Laguuya gá qué chu' tu quite laatu.

<sup>5</sup> Purti zeeda stale ni usiguii, zaná ca laaca nga Cristu, ne zabee chu ca stale binni.

<sup>6</sup> Ne zanna tu cayaca guerra ti ladu ne nuu de gaca ni sti ladu, peru cadi idxibi tu purti naquiiñe gaca irá nga. Peru neca ne nga la? ca'ru idxiña dxi iluxe pe guidxilayú.

<sup>7</sup> Purti zucaa lú ti gobiernu sti gobiernu ne zucaa lú ti guidxi sti guidxi, ne ziuu

enda huará zaguixhe idubi naca ti guidxi, ne zaca gubiña ne xu stale lugar.

<sup>8</sup> Ne neca ma cayaca irá nga la? laganna raqué ru nga bizulú enda naná que.

<sup>9</sup> Zutiidi cabe laatu lu ná cani guniná laatu ne zuuti cabe laatu, ne zaca nanala'dxi binni de irá ladu laatu purti xpinne laatu.

<sup>10</sup> Ne stale tu zaxelete de naa ne zuluí' saa ca laaca' ne zaca nanala'dxi saa ca'.

<sup>11</sup> Laca ziasa stale profeta ma na ca de Dios zeeda ca', para usiguii si ca ne zabee chu ca stale binni.

<sup>12</sup> Ne ora ma bidale enda ruchee ndaani guidxilayú la? casi irá binni zusaana de ganaxhii saa.

<sup>13</sup> Peru tu qué ixhacala'dxi dede dxi iluxe irá ni la? zalá.

<sup>14</sup> Ne zui' cabe stiidxa Dios de idubi naca guidxilayú para ganna irá xixé guidxi modo runi mandar, ne dxi que ru nga iluxe guidxilayú ri'.

<sup>15</sup> Bizeete profeta Daniel de dxa ni runi yuudxu ne ni runitilú que, ne ora gu'ya tu ma zuhuaa ni ndaani yu'du ro' lugar ra jma risaca la? laguxooñe'. (Tu gu'nda gui'chi ri la? guiene.)

<sup>16</sup> Cani nuu Judea, che lade dani.

<sup>17</sup> Ne ni dxi'ba ique yoo la? cadi guiete chi caa xiixa ralidxi.

<sup>18</sup> Ne ni nuu rañaa cadi ibigueta yoo para chi topa xhaba.

<sup>19</sup> Peru naná zaca para ca gunaa ni naca xiiñi' ne cani cugadxi ca dxi que.

<sup>20</sup> Lainaba lu Dios cadi dxi pe guxooñe tu ca guiaba nanda, nin gaca ni dxi enda riziila'dxi'.

<sup>21</sup> Nabé naná zaca ni ca dxi que. Qué huayuu dxi gaca ni naná bia' qué, dede dxi bizá' Dios guidxilayú, ne ma qué ziuu ru dxi aca ni sti tiru.

<sup>22</sup> Pa qué ucueeza dxí Dios lú ni la? irá xixé binni zati, peru pur ca xpinni be la? zucueeza be ni.

<sup>23</sup> Pa chu' tu gabi laatu ca dxi que: "Laguuya', rarí nuu Cristu" o "Rarica nuu be" la? cadi guni cre tu laaca',

<sup>24</sup> purti ziasa stale iní' Cristu laa o profeta laa ne zuluí' ca laatu seña nandxó' ne milagru, pa ñanda si nusiguii ca nécaca cani ma ulí Dios.

<sup>25</sup> Cayabe ca' ni laatu de ca yanna.

<sup>26</sup> Nga runi pa gabi cabe laatu nuu Cristu ndaani gui'xhi la? cadi chi guuya tu. O pa na cabe nuu be ndaani yoo la? cadi guni cre tu.

<sup>27</sup> Purti dxi ibigueta Hombre Biseenda Dios la? zaca ni casi ora riuu xpiáani rayu, riguu ni biaani dede ladu rindani gubidxa hasta ladu riaazi',

<sup>28</sup> ne laca zaca casi ora ribí zisi so'pe ratiica nuu mani ni ma guti.

*Modo ibigueta Hombre Biseenda Dios*

(Mr. 13.24-37; Lc. 21.25-33; 17.26-30, 34-36)

<sup>29</sup> Casi pe tidi enda naná ni gaca ca dxi que la? zacahui lu gubidxa ne ma qué zuzani bee, ne ziaba ca luceru

de ibá', ne zaniibi dxacha irá ni nuu ibá'.

<sup>30</sup> Oraque zahuinni seña ibá' ma chi ibigueta Hombre Biseenda Dios sti tiru, ne dxi que nga gu'na irá binni guidxilayú ne zuuya ca zeda yete be de ibá' lade za, ne stale enda nandxó' dede ri-aqui biaani'.

<sup>31</sup> Oraque zaxidxi trompeta reciu ne zuseenda be ca ángel stibe gueda topa irá ni ma ulí be de idubi naca guidxilayú.

<sup>32</sup> Laicaa ejemplu sti yaga du'ga'. Ora ma gulee ni rama ri'ni ne ma cayapa ni bandaga la? nanna tu ma zeda dxiña tiempu nandá'.

<sup>33</sup> Zacaca ora gu'ya tu cayaca irá ni ma gudxe laatu ca la? nanna tu ma bidxiña dxi iluxe irá ni.

<sup>34</sup> Peru gabe ca' laatu zaca irá nga ante gati ca binni nuu yanna ri'.

<sup>35</sup> Ziuu dxi initilú ibá' ne guidxilayú peru stiidxa qué ziaana sin gaca'.

<sup>36</sup> Peru padxí ne pora la? iruti ganna, nin ca ángel ni nuu ibá', dede nin naa qué ganna' sínunque Bixhoze sia' ngan nanna.

<sup>37</sup> Ne dxi ibigueta Hombre Biseenda Dios la? zaca ni casi dxi bibani Noé.

<sup>38</sup> Purti ante gaca fisiu que la? cayó ca binni que ne cayé' ca', cachaganá ca' ne cucheela ca', dede dxi biuu Noé ndaani arca que.

<sup>39</sup> Ne ca'ru guiene ca xi chi gaca dede ora beeda nisa que, ziné irá ca'. Zacaca nga

zaca ni dxi gueeda Hombre  
Biseenda Dios que.

<sup>40</sup> Dxi gueeda be que la?  
zándaca nuu chupa rañaa,  
zie tobi ziaana stobi.

<sup>41</sup> O ra nuu chupa gunaa  
tobi si ra cayuutu ca', laca zie  
tobi ziaana stobi.

<sup>42</sup> Nga runi lagataná partí  
qué ganna tu pora gueeda  
Señor stitu.

<sup>43</sup> Peru ganna ca tu pa  
ñanna xpixuaana ti yoo pora  
gueeda gubaana ralidxi la?  
ñapa, ne qué nudii lugar  
niba'na cabe ralidxi.

<sup>44</sup> Zacaca naquiiñe gataná  
tu. Pacaa mala zuhuua Hom-  
bre Biseenda Dios gu'ya tu.

*Mozo cha'hui ne mozo qué  
iquiiñe'*

(Lc. 12.41-48)

<sup>45</sup> Uná nga mozo ni zanda  
gusaana xpixuaana laa gu'ya  
irá xpinni ne gudii ni iquiiñe  
cabe ya'. Ti mozo ni nuu  
xpiaani ne ni runi jneza.

<sup>46</sup> Dichoso de mozo que pa  
cayuni zacá ora gueeda xpix-  
uaana'.

<sup>47</sup> Gabe ca' laatu zusaana  
né xpixuaana be laabe irá ni  
napá.

<sup>48</sup> Peru pa qué iquiiñe be  
ne na be zandaa ru gueeda  
xpixuaana be,

<sup>49</sup> ne uzulú be quiñe be  
xcaadxi xpinni xpixuaana  
be, ne iree be chi to né be  
ne chi gue né be binigüé' la?

<sup>50</sup> nin ganna be mala  
zuhuaa xpixuaana be ne cadí  
cabeza be laa.

<sup>51</sup> Zuniná laabe de bia'  
ganda ti' sin guiá laabe,  
ne zuseenda laabe lade ca  
xcaadxi ni qué iquiiñe casi

laabe. Raqué nga gu'na be  
dede go yaa be guidi ruua  
be.

## 25

*Ejemplu sti chii binni dx-  
apa'*

<sup>1</sup> Bigueta gudixhe Jesús sti  
ejemplu de modo runi man-  
dar Dios, na rabi laacabe:

—Sicarí bizaaca lú chii  
binni dxaapa', ucuaa ca  
lámpara stica', biree ca  
zindeza ca ti novio para  
chiné ca ra xquenda xheela'.

<sup>2</sup> Gaayu de laacabe guyuu  
xpiaani', peru xcaayu que  
co',

<sup>3</sup> partí ucuaa ca lámpara  
stica peru qué ñuuya ca  
pabiá' aceite napa cani.

<sup>4</sup> Peru xcaayu que bichá ca  
lámpara stica ne yené ru ca  
xcaadxi ndaani botella.

<sup>5</sup> Qué ñeeda gá novio que  
ne ucuá bacaanda laacabe,  
gusi cabe.

<sup>6</sup> Bia' galaa gueela ucuá  
ridxi: "Ma zeeda novio.  
Lairee, lachichagalú laabe."

<sup>7</sup> Oraque biasa irá ca badu  
dxaapa que ne bini chaahui  
ca lámpara stica'.

<sup>8</sup> Para na cani nahuati que  
rabi cani nuu xpiaani que:  
"Lacuee la' caadxi aceite lu  
stitu latané laadu, partí may-  
aca gyui' lámpara stidu."

<sup>9</sup> Peru cani nuu xpiaani  
que, laga na ca rabi ca laa-  
cabe: "Para cadi irá stitu ne  
stidu la? laché lachisí para  
laatu."

<sup>10</sup> Peru laga zesí cabe que  
beeda novio, biuu né cani  
cabeza laa que ra chi gaca

enda xheela que, ne bieegu ra puerta'.

<sup>11</sup> Ratu si que beeda xcaayu badu dxaapa que ne na ca': "Señor, Señor, bixhele guiu' du."

<sup>12</sup> Para na be rabi be laaca': "Tu laatu ya'. Qué runebia'ya laatu."

<sup>13</sup> Nga runi, na Jesús rabi laaca', naquiiñe gataná tu purti qué ganna tu padxí nin pora ibigueta Hombre Biseenda Dios.

*Hombre bisigapa xpidxi-chi*

<sup>14</sup> Ne gudixhe ru be sti ejemplu para laaca', na be:

—Enda runi mandar sti Dios zeda gaca casi ti hombre che viaje, pero ante iree be de xquidxi be la? guridxi be ca xpinni be, bisaana né be laaca xpidxichi be.

<sup>15</sup> Tobi bidii be laa bia' gaayu mil moneda, ne stobi bidii be laa chupa mil, ne stobi bidii be laa ti mil si. Cada tobi ucuua bia' laa. Oraque biree be ze be.

<sup>16</sup> Ni ucuua gaayu mil que la? bi'ni né ni dxiiña de bisaan chii mil.

<sup>17</sup> Zaqueca ni ucuua chupa mil que, laca bini ganar xhupa, bisaan ni tapa.

<sup>18</sup> Peru ni ucuua tobi que la? undaa ndaani yu ne raqué bicaachi bidxichi sti xpixuaana'.

<sup>19</sup> Bindaa para beeda xpixuaana cabe que, beda guuya xi bini né cabe xpidxichi.

<sup>20</sup> Para bidxiña ni ucuua gaayu mil que, ne bedané xcaayu ne na rabi laabe: "Señor, gaayu mil bidiiu naa,

peru bine nia ni dxiiña dede bisaan chii."

<sup>21</sup> Para na xpixuaana be rabi laabe: "Galán, jneza bi'ni lu xhiiña'. Pa nga caadxi si bisaana nia lii ne bi'nu jneza la? yanna jma rusi stale zudiee lii. Biuu, guieche nia lii."

<sup>22</sup> Oraque bidxiña ni ucuua chupa mil que, na rabi laabe: "Señor, chupa mil bidiiu naa, ne bine nia ni dxiiña dede bisaan ni tapa."

<sup>23</sup> Para rabi be laa: "Galán, jneza bi'ni lu xhiiña'. Pa nga caadxi si bisaana nia lii ne jneza bi'nu la? yanna jma rusi stale zudiee lii. Biuu, guieche nia lii."

<sup>24</sup> Oraque bidxiña ni ucuua ti mil que, ne na rabi laabe: "Señor, runebia'ya lii, ne nanna pabiá' naduxhu né lu xpinni lu', ne ribeeu guela neca cadi lii guluu lu biní, ne rutopa lu ra cadi lii bidxiiba lu'.

<sup>25</sup> Nga runi bidxibe', ne bicaache xpidxichi lu ndaani yu."

<sup>26</sup> Para rabi be laa: "Aque qué iquiiñe lu xa hombre, ne nachaaba lu'. Pa nannu ximodo naa, ribee guela neca cadi naa uluua biní ne rutopa ra cadi naa bidxiiba la?"

<sup>27</sup> xiñee qué niguu lu bidxiichi stinne lu bancu, ne ora ñenda la? ma ñaca ni jma stale."

<sup>28</sup> Ne na be rabi be ca xpinni be: "Lagaxha laabe ni né be ca, ne lagudii ni ni napa chii mil que."

<sup>29</sup> Purti cani napa, zacaa ca xcaadxi ti idale stica', peru

cani qué gapa la? laga zi-aaxha ca dede ni napa ca'.

<sup>30</sup> Ne hombre qué iquiiñe ri la? laundaa laa lu guelacahui. Raqué nga gu'na be dede go yaa be guidi ruaa be."

*Ra cuidxi Jesúis cuenta irá guidxi*

<sup>31</sup> Dxi ibigueta Hombre Biseenda Dios la? zeeda casi rey, zedané irá ca ángel stí, ne zabí para guni mandar.

<sup>32</sup> Ne zadxiña binni de irá guidxi ra nuu be. Zabee chu be caadxi lade xcaadxi, casi ribee chu pastor chiba lade dendxu'.

<sup>33</sup> Ne zuzuhuaa be ca dendxu ladu derechu stibe ne ca chiba ladu biga'.

<sup>34</sup> Oraque zabi be cani zuhuaa ladu derechu que: "Ma guluu Bixhoze ndaaya laatu, yanna latá' laic和平 ra ma nexhe chaahui para laatu dede ante cha guidxilayú.

<sup>35</sup> Purti bidii tu ni gudahua dxi candaana', ne bidii tu ni güee dxi cayate nisa, ne bichagalú tu naa dxi canazaya xquidxi binni.

<sup>36</sup> Bigacu tu naa lari dxi nuu xie lade', ne yeganna tu naa dxi huara'ya', ne uyé tu ra nuu dxi yeguayuaa."

<sup>37</sup> Oraque zaní' cani nacha'hui que: "Señor, padxí bidu'ya du lii candaanu', bidí' du ni gudó lo', ne cayati lu nisa bidí' du nisa güe' lu'.

<sup>38</sup> Ne padxí bichagalú du lii dxi canazá lu xquidxi binni ne bigacu du lii lari dxi xie ladi lu ya'.

<sup>39</sup> O padxí yeganna du lii huará lu' o yedu'ya du lii ra yeguyoo lo'."

<sup>40</sup> Ne óraque zabi be laaca': "Ndi nga laani: ora bi'ni tu ni ti hermanu stinne neca huaxié' laa la? casi ñaca bi'ni tu ni naa."

<sup>41</sup> Ne dxi queca zabi be cani nuu ladu biga que: "Lairee de ra nuaa', ni dxiba dí ca'. Lachiguiaba lu gui ni qué ziuu dxi gyui', ni nexhe para binidxaba ne ca xpinni.

<sup>42</sup> Purti qué nudii tu ni ñahua dxi candaana', ne qué nudii tu nisa ñee dxi cayate nisa.

<sup>43</sup> Ne qué nuchagalú tu naa dxi canazaya xquidxi binni, ne qué nugacu tu naa lari dxi nuaa xie lade', ne qué niganna tu naa dxi huara'ya' nin dxi yeguayuaa."

<sup>44</sup> Oraque laca zaní' ca ngue: "Señor, padxí bidu'ya du lii candaanu' o canazá lu xquidxi binni, o xie ladi lu', o huará lu' o yeguyoo lo', ne qué ñacané du lii ya'."

<sup>45</sup> Ne zabi be laaca': "Ndi nga laani: purti qué ñuni tu ni cani caquiiñe ni la? casi ñaca qué ñuni tu ni naa."

<sup>46</sup> Ne cani gudxi be laa chi guia lu bele que la? qué ziuu dxi iree ca de raqué, perú cani nacha'hui que la? zapa ca enda nabani ni qué zaluxe.

## 26

*Udixhe cabe inaaze cabe Jesúis*

(Mr. 14.1-2; Lc. 22.1-2; Jn. 11.45-53)

<sup>1</sup> Biluxé si uní' Jesús ca diidxa ca, na rabi ca discípulu sti':

<sup>2</sup> —Ma nanna tu xhupa si gubidxa riaadxa para saa pascua, ne lade ca dxi que zanaaze cabe Hombre Biseenda Dios para icá lu cruz.

<sup>3</sup> Ne zaqué guca ni, bidxiña ca xaíque sti ca sacerdote ne ca maistru de ley ne ca xaíque sti ca judíu ndaani patiu ralidxi sacerdote gola Caifás.

<sup>4</sup> Ne raqué uní' stiidxa ca inaaže ca Jesús sin ganna binni, ne guuti ca laabe.

<sup>5</sup> Peru na ca cadi gaca ni ndaani pe saa que, ti qué cui zisi binni.

*Bichá ti gunaa nisa rindá' naxhi ique Jesús*

(Mr. 14.3-9; Jn. 12.1-8)

<sup>6</sup> Ca dxi que uyé Jesús Betania, ralidxi Simón ni gupa lepra que.

<sup>7</sup> Raqué nuu be bedané ti gunaa ti frascu dxá de aceite rindá' naxhi ni nabé risaca, ne bichá ni ique be ra zuba be ruua mexa'.

<sup>8</sup> Ora bi'ya ca discípulu ni bi'ni gunaa que, bidxiichi ca ne na ca':

—Xiñee gudxite si be aceite que.

<sup>9</sup> Parti ñanda nidoo ni ne niree stale vueltu para ñaazi lu ca pobre.

<sup>10</sup> Peru ma nanna Jesús xi caní' cabe, para na rabi laa-cabe:

—Lachuu dxí, cadi guchiiña tu gunaa ri' parti nabé sicarú ni bi'ni be naa ri'.

<sup>11</sup> Ca pobre la? qué zi-aadxa ca lade tu, peru naa zadxiña dxí guiaadxa lade tu.

<sup>12</sup> Ra bichá be aceite ri lade la? cayuni chaahui be naa para igaache'.

<sup>13</sup> Ne gabe ca' laatu, ratiica güi cabe stiidxa Dios ndaani idubi naca guidxilayú ri', zuzeete cabe ni bi'ni be, ti cadi guiaanda be.

*Ra bitoo Judas Jesús*

(Mr. 14.10-11; Lc. 22.3-6)

<sup>14</sup> Oraque uyé Judas Iscar-iote, tobi de ca discípulu sti Jesús que, ra nuu ca xaíque sti ca sacerdote.

<sup>15</sup> Ne na rabi laaca':

—Pagala udii tu naa saca gulué laabe laatu.

Ne óraque bidii ca laabe treinta moneda de plata.

<sup>16</sup> Ne dede dxi que nisi cuyubi be modo guluí' be Jesús laaca'.

*Ra gudó xhi né Jesús ca discípulu sti'*

(Mr. 14.12-25; Lc. 22.7-23; Jn. 13.21-30; 1 Co. 11.23-26)

<sup>17</sup> Primé ca dxi bizulú saa ra ro cabe pan sin levadura, beeda ca discípulu sti Jesús ra nuu, ne na ca rabi ca laabe:

—Para racala'dxu guni chaahui du para gó xhi lu pascua ri'.

<sup>18</sup> Para na be rabi be laaca':

—Laché ndaani guidxi ra nuu tobi hombre ne lagabi laa: “Na maistru ma bidxiña dxi sti' ne racala'dxi utiidi pascua ri rali'dxu', laa ne ca discípulu sti'.”

<sup>19</sup> Ne óraque uyé ca discípulu que casi gudxi Jesús

laaca', ne gudixhe chaahui ca endaró xhi para pascua que.

<sup>20</sup> Casi bixhinni, gurí né be idubi doce discípulu stibe ruaa mexa que.

<sup>21</sup> Ne ora cayó xhi cabe na be rabi be laaca':

—Gabe ca' ndi laatu, tobi de laatu zutoo naa.

<sup>22</sup> Nabé triste biaana cabe óraque, ne bizulú cayabi cabe laabe:

—Naa la? Señor.

<sup>23</sup> Para na be rabi be laaca':

—Ni naguu ná ndaani bladu ra naguaa naya ri' nga ni chi utoo naa.

<sup>24</sup> Huandí maca cá lu gui'chi naquiiñe gati Hombre Biseenda Dios, peru ni chi gului' laabe la? gapa gá si laa. Jma galán ñaca para laa pa qué ñuu dxi ñale.

<sup>25</sup> Ne óraque na Judas ni yeutoo laabe que, rabi laabe:

—Ñee naa la? Maistru.

Para rabi be laa:

—Lii caniu' ni.

<sup>26</sup> Ra cayó xhi cabe que, ucuaa be pan guluu be ndaaya', ne gundaa be ni lú ca discípulu stibe ne rabi be laaca':

—Laicaa ne lagó. Ndi nga cuerpu stinne'.

<sup>27</sup> Oraque ucuaa be ti copa ne bidii si be diuxquixe Dios bidii be ni laaca', ne rabi be laaca':

—Lagué' ni, irá xixé tu.

<sup>28</sup> Purti ndi nga rini stinne ni chi ixii para ixá stonda stale binni. Ne ra ixii ni la? zaguixhe Bixhoze ti modo cubi chu' né binni laa tobi si.

<sup>29</sup> Gabe ca' laatu, ma qué zee rua' nisa uvas dede dxi ibigueta guee nia ni laatu

sti tiru ra runi mandar Bixhoze'.

*Na Jesús zaní' Pedru qué runibiá' laa*

(Mr. 14.26-31; Lc. 22.31-34; Jn. 13.36-38)

<sup>30</sup> Biluxe biinda si cabe ti cantu, biree cabe ze cabe lu dani Olivo.

<sup>31</sup> Oraque na Jesús rabi laabe:

—Irá tu zaxele tu de naa yanna gueela', purti maca cá ni lu Xqui'chi Dios: "Zunena'ya pastor sti ca dendxu' ne zareeche ndase ca'."

<sup>32</sup> Peru dxi guiasa de lade gue'tu la? ziaa Galilea ne raqué cueza laatu.

<sup>33</sup> Oraque na Pedru rabi laabe:

—Neca ixele irá cabe de lii, peru naa qué ziuu dxi ixele de lii.

<sup>34</sup> Para rabi be laa:

—Gabe ca' lii, yanna gueela ca, ante gu'nda gallu, zaniu' chonna tiru qué runibiá' lu naa.

<sup>35</sup> Para na Pedru rabi laabe:

—Neca gate nia lii, peru qué ziuu dxi inié qué runebia'ya lii.

Ne ngue ca na irá discípulu que.

*Getsemaní*

(Mr. 14.32-42; Lc. 22.39-46)

<sup>36</sup> Oraque yené be laaca ti lugar lá Getsemaní, para na be rabi be laaca':

—Lacuí rarí laga chaa raria', chi inié nia Dios Bixhoze'.

<sup>37</sup> Ne uzá né be Pedru ne iropa xiiñi Zebedeu stindaa,

ne óraque uyuu be triste ne  
uyuu yuuba ladxidó' be.

38 Para na be rabi be cani  
né be que:

—Nabé naná yuuba ni nuu  
ndaani ladxiduá' ri', yuuba  
para guuti. Laguaana gá  
rarí ne cadi gasi tu.

39 Ne óraque bixele huiini  
be caadxi de laaca', ne raqué  
bizuxibi be gudixhe ique be  
layú, ne uní' né be Bixhoze  
be ni nuu ibá', na be:

—Padre stinne', pa zanda  
la? ulee enda naná ri de naa,  
peru cadi aca ni rabe sínunque  
ni na lu'.

40 Ne bigueta be ra nuu ca  
discípulu stibe. Bedandá be  
laaca nisiaasi ca'. Para na be  
rabi be Pedru:

—Nee qué zanda gataná  
né tu naa neca ti hora la?

41 Lagataná ne lainí' né  
Dios ti qué uquiinde binidx-  
aba laatu. Necá ndaani  
ladxidó' to racala'dxi tu guni  
tu jneza peru cuerpu stitu  
nagueenda riguudxi.

42 Bigueta uyé be yení' né  
be Dios rairopa tiru, na be:

—Padre stinne', pa qué  
zanda tidi enda naná ri  
luguia'ya sin qué aca ni la?  
bi'ní ni na lu'.

43 Ne óraque beeda be ra  
nuu ca discípulu stibe sti tiru.  
Ne laca bedandá be laaca  
nisiaasi ca' partí nabé nuu  
bacaanda lú ca'.

44 Para bisaana be laaca  
yení' né be Dios raguionna  
tiru ne laca zaqueca uní' be.

45 Oraque ru bigueta be ra  
nuu ca discípulu stibe ne na  
be rabi be laaca':

—Lagasi yanna ne laizi-  
ila'dxi'. Ma bidxiña ora tidi

Hombre Biseenda Dios lu ná  
cani qué runi jneza.

46 Laguiasa, ma chuu nu.  
Laguuya mápeca zeda dxiña  
ni chi uluí' naa.

*Ra bigaa Jesús*

(Mr. 14.43-50; Lc. 22.47-  
53; Jn. 18.2-11)

47 Caní' ru be, mala zeeda  
Judas, tobi de lade doce  
discípulu stibe que. Zedané  
stale binni ni biseenda ca  
xaíque sti ca sacerdote ne ca  
xaíque sti ca judíu, ne naaze  
ca espada ne palu.

48 Ne maca gudxi Judas  
laaca':

—Ni gu'ya tu gahua ti bix-  
idu lucuá la? ngue nga laabe,  
ne zanda inaaze tu laabe.

49 Ne casi yendá be ra nuu  
Jesús, bigapa diuxi be laa, ne  
na be rabi be laa:

—Maistru.

Ne gudó be ti bixidu lucuá.

50 Para na Jesús rabi laabe:

—Xhamigua' xi zeda gunu'.

Oraque bidxiña irá cabe  
guluu ná cabe Jesús para  
chiné cabe laa.

51 Peru mala bisigaa ná  
tobi de cani nuu né Jesús  
raqué, guxha espada sti',  
bigá diaga ti xpinni sacer-  
dote gola.

52 Oraque na Jesús rabi  
laabe:

—Guluu espada stiu' jlu-  
gar, partí irá ni cu' ná espada  
la? zati né espada.

53 Nee na tu qué ñanda  
ninié nia Bixhoze nagasi  
ne nuseenda stale mil ángel  
para ñacané naa la?

54 Peru pa ñune nga la?  
ximodo ñanda ñaca casi cá lu

Xqui'chi Dios ra na naquiiñe gaca ni sicarí ya'.

<sup>55</sup> Oraque na Jesús rabi ca binni que:

—Casi rie cabe luguiá gubaana zeeda tu luguiá'ya', né tu espada ne palu. Inqué ti dxi gurié ndaani yu'du ro', bisiide' ne qué ninaaze tu naa.

<sup>56</sup> Peru cayaca irá ndi ti iree ni casi cá ni lu ca gui'chi ni bicaa ca profeta.

Ne óraque bixooñe irá ca discípulu bisaana ca laabe.

*Ra zuhuua Jesús nezalú justicia*

(*Mr. 14.53-65; Lc. 22.54-55, 63-71; Jn. 18.12-14, 19-24*)

<sup>57</sup> Yené ca binni que laabe ra nuu sacerdote gola Caifás ne ma nuu ca maistru de ley ne ca xaíque sti guidxi raqué.

<sup>58</sup> Zinanda Pedru laabe zitu zitu dede biuu ndaani patiu sti sacerdote gola que, ne raqué gurí né ca gendarme para gu'ya xi gaca be.

<sup>59</sup> Ne óraque bizulú biyubi ca xaíque sti ca sacerdote ne irá ni naca justicia sti ca judíu tuuxa iní' paraa pe bichee Jesús, neca cadi dxandí ni, ti chu' xi pur gati be.

<sup>60</sup> Peru neca stale tu ulee falsu luguiá be, qué nidxela ca paraa bichee be. Ultimu beeda xhupa zeda ndee falsu luguiá be.

<sup>61</sup> Na ca rabi ca ca binni que:

—Bina diaga du uní' be ñanda nuxhá be yu'du ro' sti Dios ne lu chonna gubidxa nucuí be ni sti tiru.

<sup>62</sup> Oraque bizuhuaa sacerdote gola, na rabi laabe:

—Xi na lu de ni cugaani cabe luguiá lu ri ya'.

<sup>63</sup> Peru qué niní' be gasti'. Para na sacerdote gola que rabi laabe:

—Pur Dios ni nabani nga cayabe lii ga'bu laadu pa lii nga Cristu Xiiñi Dios.

<sup>64</sup> Para rabi be laa:

—Naa, casi nou' ca. Ne gabe ca' laatu dede yanna zuuya tu Hombre Biseenda Dios zuba cue' Dios ni nandxo', ne zuuya tu zeda yete be de ibá' lade za.

<sup>65</sup> Oraque ucheza sacerdote gola que xhaba ne na:

—Yanna huaxa ma uní' be, cayuni be laabe Xiiñi Dios. Ma cadi naquiiñe uyubi nu tu iní' paraa bichee be purti ma bina diaga tu biree ni de ruua be, cayuni be laabe Xiiñi Dios.

<sup>66</sup> Yanna ya', xi na tu.

Para na cabe:

—Gati be xa.

<sup>67</sup> Ne óraque bichá xhinni cabe lú be ne gudiñe cabe laabe ne udapa cabe ruua be.

<sup>68</sup> Ne na cabe rabi cabe laabe:

—Pa nou' lii nga Cristu la? gudxi laadu tu cagapa lii ti idu'ya du pa nannu'.

*Ra uní' Pedru qué runibiá' Jesús*

(*Mr. 14.66-72; Lc. 22.56-62; Jn. 18.15-18, 25-27*)

<sup>69</sup> Zuba Pedru ndaani patiu que ora bidxiña ti criada laa, na rabi laa:

—Lii laca xpinni Jesús de Galilea lii nja'.

<sup>70</sup> Peru qué niná Pedru niní' pa xpinni be laa sínuque na rabi badu dxaapa que nezalú irá binni rí raqué:

—Qué ganna xii nga caní lu'.

<sup>71</sup> Ma ziree Pedru ra puerta', biiya sti badu dxaapa laa, para na rabi ca binni que:

—Ndi laca xpinni Jesús de Nazaret laa.

<sup>72</sup> Bigueta uni' Pedru sti tiru dede bini jurar:

—Qué runebia'ya dia' hombre ca.

<sup>73</sup> Qué nindaa de ngue bidxiña caadxí de cani zuhuua raqué, na rabi laabe:

—Dxandí de laacabe lii, partí de modo riníu' ca ri-huinni.

<sup>74</sup> Oraque bizulú be caguu dí be ne cayuni jurar be:

—Gunidé Dios naa pa cusiguiee', ma gudxe laatu qué racabia'ya laabe.

Ne casi pe biluxe uní' be, biinda gallu.

<sup>75</sup> Oraque bietenala'dxi be ca diidxa ni gudxi Jesús laabe que, ante gu'nda gallu zaní' be chonna tiru qué runibiá' be laa. Para biree be de raqué yeguuna be, dede guyuu yuuba ladxitdó' be.

## 27

*Udi'di Jesús lu ná Pilatu*

(Mr. 15.1; Lc. 23.1-2; Jn. 18.28-32)

<sup>1</sup> Casi birá gueela', uni' sti idxa ca xaíque sti ca sacerdote ne ca xaíque sti guidxi que guuti ca Jesús.

<sup>2</sup> Ne bindiibi ca laabe yené ca laabe ra nuu gobernador Poncio Pilatu.

*Ra guti Judas*

<sup>3</sup> Biiya si Judas ni yeutoo laabe que ma chi gati be la? beeda malaya laa, para yeudxii treinta moneda que ca xaíque sti ca sacerdote ne ca xaíque sti guidxi.

<sup>4</sup> Ne na rabi laaca':

—Naa bichee parti bituua tobi ni nayá ladxitdó'.

Para na cabe rabi cabe laa:

—Xi runi importar laadu ya'. Lii gu'yu xi gu'nu'.

<sup>5</sup> Ne óraque bizu'nda be ni ndaani yu'du ro' que, ne biree be yenduu be doo yanni be.

<sup>6</sup> Gundisa ca xaíque sti ca sacerdote ca moneda que, peru na ca':

—Qué zanda cu' nu moneda ri lade ofrenda sti yu'du', parti bixuí' né ni rini sti ti hombre.

<sup>7</sup> Ne óraque uni' stiidxa cabe xi guni né cabe bidxichi que. Para uzí' cabe ti layú lu ni ruzá' guisu ne na cabe iquiiñe ni para igaachi judíu ni gueeda de sti ladu.

<sup>8</sup> Nga runi gulee lá cabe layú que Layú de Rini ne nga lá ni dede yanna.

<sup>9</sup> Ne zacá guca ni modo uni' Dios de ruaa profeta Jeremías dxi na:

<sup>10</sup> Ca xiiñi Israel gudixhe idoo be treinta moneda de plata, ne dxi bigueta moneda que lu ná cabe, ucuua cabe ni,

uzí' né cabe ni ti layú lu ni  
ruzá' guisu.

Zacá nga gudxi Dios naa.

*Zuhuaa Jesús lu Pilatu  
(Mr. 15.2-5; Lc. 23.3-5; Jn.  
18.33-38)*

<sup>11</sup> Ne ora zuhuaa Jesús nezalú gobernador, na gobernador que rabi laabe:

—Nee lii nga rey sti ca judíu la?

Para na be:

—Casi na lu ca, nga laani.

<sup>12</sup> Peru óraque neca gudixhe irá ca xaíque sti ca sacerdote ne ca xaíque sti guidxi xqueja be, ma qué niní' ru be gasti'.

<sup>13</sup> Para na Pilatu, rabi laabe:

—Cadi cayuna diaga lu irá ni cugaani cabe luguiá lu ri la?

<sup>14</sup> Peru qué nicabi be laa nin ti diidxa'. Ne nabé bidx-agayaa gobernador que.

*Guta gati Jesús*

*(Mr. 15.6-20; Lc. 23.13-25;  
Jn. 18.38-19.16)*

<sup>15</sup> Chiqué, cada iza ra cayaca saa, rundaa gobernador que ti presu para ca binni que, tutiisi gapa ca gana.

<sup>16</sup> Ne iza que nuu ti presu ni za'bi stiidxa irá ladu, lá Barrabás.

<sup>17</sup> Ngue runi, ora bidxiña cabe, na Pilatu rabi laacabe:

—Tu racala'dxi tu undaa para laatu ya', Barrabás la? o Jesús ni rabi cabe Cristu.

<sup>18</sup> Nanna ca Pilatu bedané cabe Jesús ra nuu partí si qué na cabe chi nanda binni laa.

<sup>19</sup> Ma zuba Pilatu ra juzgadu stí', bisenda tidxi

xheela laa, na xheela rabi laa:

—Cadi gu'nu hombre cha'hui ca gasti', partí pur laabe nabé bine sufrir lu bacaanda nuchi'.

<sup>20</sup> Peru ucuá ca xaíque sti ca sacerdote ne ca xaíque sti guidxi tema lú ca binni que para inaba ca ilaa Barrabás ne gati Jesús.

<sup>21</sup> Oraque na gobernador que rabi laacabe sti tiru:

—Tu pe de laacabe racala'dxi tu undaa para laatu pue.

Para na cabe:

—Barrabás.

<sup>22</sup> Oraque na Pilatu rabi laacabe:

—Yanna xi gune nia Jesús ni rabi cabe Cristu ri ya'.

Para bicabi irá cabe:

—¡lcá be lu cruz!

<sup>23</sup> Para na gobernador que:

—Xiñee, xi huayuni be.

Peru laacabe jma rusi bicaa cabe ridxi, na cabe:

—¡lcá be lu cruz!

<sup>24</sup> Biiya si Pilatu pur gana si caní' ne mayaca uzulú ti bulla la? gucuua nisa ne gudiibi ná nezalú ca binni que, para na rabi laacabe:

—Cadi luguiá'ya dia' nuu donda partí chi ixii rini sti hombre cha'hui ri'. Laatu laguuya xi iree xa ni laatu.

<sup>25</sup> Para na ca binni que:

—Zaa guiaana donda ca luguiá du ne luguiá ca xiiñi du.

<sup>26</sup> Oraque bindaa be Barrabás para laaca', ne bini mandar be quiñe cabe Jesús para bidii be laa icá lu cruz.

<sup>27</sup> Oraque gucuaa ca soldadu sti gobernador que Jesús, yenduu ca laabe ndaani palaciu para bidxiña idubi batallón ra nuu be.

<sup>28</sup> Gulee ca xhaba be ne bicua'qui ca laabe ti lari xhiñā'.

<sup>29</sup> Ne bizá' ca ti la'pa de guichi uluu ca ique be ne bigaasa ca tindaa gueere ná be ladu derechu. Oraque bizuxibi ca xañee be ne bini burla ca laabe, na ca':

—¡Viva rey sti ca judíu!

<sup>30</sup> Ne bichá xhinni ca lú be ne guxha ca gueere que ná be, bichenda ca ni ique be.

<sup>31</sup> Biluxe si bini burla ca laabe zaqué la? gulee ca lari que ne bigacu ca laabe xhaba be, ne ziné ca laabe para icá be lu cruz.

### *Ucuá Jesús lu cruz*

(Mr. 15.21-32; Lc. 23.26-43; Jn. 19.17-27)

<sup>32</sup> Ra ze cabe que bidxaaga cabe ti hombre de Cirene lá Simón ne bicaa cabe laa gua cruz sti Jesús

<sup>33</sup> dede yendá cabe ti lugar lá Gólgota. Ni rini' díidxa Gólgota ca la? Lugar sti Calavera.

<sup>34</sup> Raqué bidii cabe laabe vinagre nucha nisa xculá'. Peru ora bi'ya be xi naca ni la? qué niná be ñe' be ni.

<sup>35</sup> Bicaa si cabe laabe lu cruz guluu cabe xhaba be lu rifa, ne cada tobi ucuaa ni gulee. Guca ni zaqué ti iree ni modo pe uni' Dios de ruaa ti profeta de laabe, ra na: "Gudiizi cabe xhaba', ne uluu cabe laa lu rifa."

<sup>36</sup> Para guri cabe cayapa cabe laabe.

<sup>37</sup> Ne bicaa cabe ca diidxa ri xaíque be: "Ndi nga Jesús Rey sti ca judíu." Purti na cabe pur laani cá be lu cruz.

<sup>38</sup> Oraque bicaa né cabe laabe chupa gubaana', tobi ladu derechu ne stobi ladu biga'.

<sup>39</sup> Ne cayuni burla ca binni zidi'di raqué laabe, cuniibi ique ca lú be,

<sup>40</sup> na ca':

—Lii nou' zuxhá lu yu'du ro' ne zucuí lu ni lu chonna gubidxa. Yanna bilá laca lii. Pa dxandí Xiiñi Dios lii la? biete de lu cruz ca.

<sup>41</sup> Ne zaqueca na ca xaíque sti ca sacerdote ne ca maistru de ley ne ca fariseu ne ca xaíque sti guidxi, cuchá ca ni lú be:

<sup>42</sup> —Stobi bilá be peru laca laabe qué zanda ulá be. Na be rey sti Israel laabe, ne pa dxandí ni la? guiete be de lu cruz ca yanna, ne zuni cre nu laabe.

<sup>43</sup> Ucuá lú be Dios, yanna cueza be ulá Dios laabe, pa nadxii laabe, purti na be Xiiñi Dios laabe.

<sup>44</sup> Ne zaqueca cayuni burla ca gubaana ni cá né be que laabe.

### *Ra guti Jesús*

(Mr. 15.33-41; Lc. 23.44-49; Jn. 19.28-30)

<sup>45</sup> Bia' galaa dxi bicahui xaibá' dede bia' las tres.

<sup>46</sup> Mayaca ganda las tres bicaa Jesús ridxi:

—¡Elí, Elí, lama sabactani! Didxzazá la? nini' be: Dios stinne', Dios stinne', xiñee ma bisaanu naa.

<sup>47</sup> Ne ora bina diaga cani zuhuua raqué ni uni' be que la? na ca':

—Cucaa ridxi be Elías.

<sup>48</sup> Oraqueca biree tobi de laaca yecaa ti esponja bigadxe de vinagre ne bidxiiba ni ique ti gueere', ne bigué' ni laabe.

<sup>49</sup> Peru na xcadxi que rabi laa:

—Zaa nuu be, idu'ya nu pa zeda ulá Elías laabe.

<sup>50</sup> Bigueta bicaa be sti ridxi ne raqué guti be.

<sup>51</sup> Ne mala guca cortina sti yu'du ro' chupa ndaa de punta punta, ne guca xu, gulaa stale guie.

<sup>52</sup> Ne bixale caadxi ba', bisasa stale de ca xpinni Dios ni ma guti.

<sup>53</sup> Ne dxi ma biasa Jesús de lade gue'tu que la? biree cabe de ndaani ca ba' que, uyé cabe ndaani guidxi Jerusalén ne biiya stale binni laacabe.

<sup>54</sup> Nabé bidxagaya capitán ni cayapa Jesús que, laa ne ca soldadu sti', purti bini sentir ca guca xu ne biiya ca irá cosa ni guca que, para na:

—Dxandí Xiiñi Dios ndi'.

<sup>55</sup> Zitu huiini de raqué zuhuua caadxi gunaa ni beda nanda Jesús de Galilea, beeda ca para gacané ca laabe. Zuhuua ca cayuuya ca ni cayaca que.

<sup>56</sup> Lade cabe nuu María Magdalena ne María jñaa Jacobo ne José, ne jñaa ca xiiñi Zebedeu.

*Ra bigaachi Jesús  
(Mr. 15.42-47; Lc. 23.50-56; Jn. 19.38-42)*

<sup>57</sup> Huaxhinni que beeda ti hombre ricu de Arimatea lá José, tobi de cani uzá né Jesús chiqué.

<sup>58</sup> Ne uyé be ra nuu Pilatu, yenaba be cuerpu sti Jesús laa, para bisenda tidxi ca xpinni gudii cuerpu que laabe.

<sup>59</sup> Ne ucuaa si be cuerpu que, bichenda be laa ti lari gueela nayá,

<sup>60</sup> ne gudixhe be laa ndaani ti ba' cubi ni maca gundaa be para laabe lu ti guie, ne biseegu be sti guie ngola ra puerta ba' que, para biree be ze be.

<sup>61</sup> Ne zuba María Magdalena ne sti María gaxha ra puerta ba' que.

*Cani cayapa xpa' Jesús*

<sup>62</sup> Udi'di si viernes que, bidxiña ca xaíque sti ca sacerdote ne ca fariseu ra nuu Pilatu,

<sup>63</sup> na ca rabi ca laabe:

—Señor, cayetenala'dxi du ni uni' hombre rusiguii que dxi nabani, na raguionna gubidxa ziasa de lade gue'tu'.

<sup>64</sup> Nga runi canaba du lii guseendu tu chi gapa ra ba' que dede ganda chonna gubidxa quenquita gueeda ca discípulu stibe cuana ca xcuerpu be ne gabí ca binni biasa be de lade gue'tu'. Ne zacá jma rusi zusiguii cabe, que dxi bizulú ni.

<sup>65</sup> Para na Pilatu rabi laabe:

—Racá laic和平 caadxi soldadu, lachiné, ne lauseegu

chaahui ruaa ba' que, bia' ganda ti'.

<sup>66</sup> Oraque biree cabe uyé cabe ne biseegu dxiichi cabe ruaa ba' que ne bisaana cabe ca soldadu que gapa ni.

## 28

*Ra bibani Jesús*

(*Mr. 16.1-8; Lc. 24.1-12; Jn. 20.1-10*)

<sup>1</sup> Udi'di si dxi enda rizila'dxi que, ma para irá gueela domingu, dxi ruzulú semana, beeda María de Magdala ne sti María que, beda guuya ca ra ba' que.

<sup>2</sup> Ne ma guca ti xu ro' raqué, purti biete ti ángel sti Dios de ibá', beda ndee guie que, ne gurí lú ni.

<sup>3</sup> Rihuinni ángel que casi biaani sti rayu, ne naquichi bé xhaba be casi nieve.

<sup>4</sup> Ne de tantu bidxibi ca soldadu que laabe la? guca diti ca ne biaana ca casi ni ma guti.

<sup>5</sup> Peru na ángel que rabi ca gunaa que:

—Cadi idxibi tu. Nanna cuyubi tu Jesús ni ucuá lu cruz.

<sup>6</sup> Qué guinni di be rari purti ma bibani be casi uní be. Latá' gu'ya tu lugar ra guta be,

<sup>7</sup> ti che tu nagueenda chi tidxi tu ca discípulu stibe ma biasa be de lade gue'tu', ne ma chi sa niru be lú ca', che be Galilea. Ne zuuya ca laabe raqué. Nga nga ni napa gabe laatu.

<sup>8</sup> Oraque biree guxooñe ca gunaa que de ra ba' que,

zidxibi ca' ne ziyeche ca', zitidxi ca ca discípulu stibe ni gudxi ángel que laaca'.

<sup>9</sup> Ze ru cabe neza, mala biree Jesús lú cabe, bigapa diuxi laacabe. Para bidxiña cabe laa gudiidxi cabe ñee, bisisaca cabe laa.

<sup>10</sup> Oraque na Jesús rabi laa-cabe:

—Cadi idxibi tu. Laché, lachitidxi ca biche che ca Galilea ne raqué gu'ya ca naa.

*Ni byui' ca soldadu*

<sup>11</sup> Laga ze cabe biree caadxi de cani cayapa ra ba' que, uyé ndaani guidxi yetidxi ca xaíque sti ca sacerdote xi irá guca'.

<sup>12</sup> Oraque bisenda caa ca sacerdote que irá ca xaíque sti guidxi, guyuu ca tobi si ne bidii ca stale bidxichi ca soldadu que.

<sup>13</sup> Ne gudxi ca laacabe:

—Pa inaba diidxa cabe laatu la? lagabi nisiaasi tu beeda ca discípulu stibe lu gueela' gula'na ca laabe.

<sup>14</sup> Ne pa ganna gobernador ni la? laadu guiene né du laa, ti qué gudxiiba donda ique tu.

<sup>15</sup> Para gucuaa ca soldadu que bidxichi que, ne bi'ni ca modo gudxi cabe laaca'. Ne ni uní' cabe que nga bireeche lade ca judiú, ne runi cre ca ni dede yanna.

*Ra biseenda Jesús ca apóstol sti'*

(*Mr. 16.14-18; Lc. 24.36-49; Jn. 20.19-23*)

<sup>16</sup> Uyé idubi once discípulu sti Jesús Galilea, lu dani ni gudxi Jesús laaca'.

<sup>17</sup> Casi bi'ya ca laabe, bisisaca ca laabe, peru nuu caadxi de laaca qué ñuni cre gá.

<sup>18</sup> Para bidxiña be ra nuu ca ne na be rabi be laaca':

—Irá xixé ni nuu ibá' ne ni nuu guidxilayú ma nexhe ladxi naya'.

<sup>19</sup> Nga runi laché irá xixé guidxi, lachiusiidi irá xixé binni sa nanda naa, ne lacuu nisa laaca casi ñaca Dios Padre ne Xiiñi ne Espíritu Santu ñuni ni.

<sup>20</sup> Lausiidi laaca guni ca irá ni ma gudxe laatu, ne ganna ca tu qué ziuu dxi ixele de laatu dede dxi iluxe guidxilayú. Amén.

# STIIDXA JESUCRISTU NI BICAA SAN MARCU

*Ra bizulú byui' Juan  
Bautista stiidxa Dios  
(Mt. 3.1-12; Lc. 3.1-9, 15-  
17; Jn. 1.19-28)*

<sup>1</sup> Sicarí nga bizulú evan-  
geliu sti Jesucristu Xiiñi Dios.

<sup>2</sup> Chiqué bicaa profeta  
Isaías ni gudxi Dios laa ucaa,  
ne ndi nga laani:

Zuseenda ti xpinne sa niru lú  
lu'  
para guni chaahui neza tidi  
lu'.

<sup>3</sup> Zuna diaga cabe cucaa  
tuuxa ridxi ndaani  
gui'xhi',  
cayabi binni: "Lausiá neza  
tidi Señor;  
lauxhele ladxidó' to,  
casi ñaca cuxhele tu ti neza  
para laabe."

<sup>4</sup> Zacá nga laani, beeda  
Juan Bautista, beda nduu  
nisa binni ndaani gui'xhi',  
ne gudxi laaca naquiiñe  
inaba ca perdón Dios ti aca  
perdonar ca', ne chu' nisa ca'.

<sup>5</sup> Ne biree irá binni Judea  
ne binni guidxi Jerusalén,  
yeucaa diaga laabe, ne  
gulee ruaa ca diidxa de irá  
ni huachee ca', para uluu  
nisa be laaca ndaani guiigu  
Jordán.

<sup>6</sup> Xhaba be la? de guicha  
ladi camellu ne xi' ti cinturón  
de guidi ndaani be, ne ro be  
usú ne dxiña yaga.

<sup>7</sup> Rusiidi be binni ne rabi  
be laaca':

—Nanda tobi atrá de naa  
jma risaca que naa. Naa  
la? dede nin para ñata udaa  
nibee xquela guidi be qué  
risaca'.

<sup>8</sup> Naa caguua ni'sa sia'  
laatu, peru laabe zudii be  
Espíritu Santu laatu.

*Ra uyuu nisa Jesús*

*(Mt. 3.13-17; Lc. 3.21-22)*

<sup>9</sup> Ca dxi que pe' biree  
Jesús Nazaret, ti guidxi sti  
Galilea, ne uluu nisa Juan  
laabe ndaani guiigu Jordán.

<sup>10</sup> Casi biree be ndaani nisa  
biiya be bixelete ibá' ne zeda  
yete Espíritu Santu luguiá be  
casi ti paloma,

<sup>11</sup> ne ucuá ti ridxi de ibá':

—Lii nga Xiiñe ni nadxiee  
ne ni rusieche naa.

*Ra ucaladxi binidxaba us-  
aba Jesús*

*(Mt. 4.1-11; Lc. 4.1-13)*

<sup>12</sup> Oraque yené Espíritu  
Santu laabe ndaani gui'xhi',

<sup>13</sup> ne biaana be raqué  
cuarenta dia lade mani  
duxhu'. Laga nuu be raqué  
ucala'dxi binidxaba nusaba  
laabe. Ne udi'di si irá nga  
beeda ca ángel, beda saana  
ca ni gudó be raqué.

*Ra bizulú Jesús xhiiña'*

*(Mt. 4.12-17; Lc. 4.14-15)*

<sup>14</sup> Bieguyoo si Juan la? uyé  
be Galilea yegüí né be ca  
binni que stiidxa Dios,

<sup>15</sup> na be rabi be laaca':

—Ma bidxiña dxi gudixhe  
Dios guni mandar, ne ma chi  
aca ni. Yanna la? lainaba  
perdón laabe ne laguni cre  
stiidxa be.

*Guridxi Jesú斯 tapa hombre  
rie guuze'*

(Mt. 4.18-22; Lc. 5.1-11)

<sup>16</sup> Ra zidi'di be uriá ti niña ro' lá Galilea biiya be Simón ne Andrés bi'chi', cusaba ca ti tarraya ro' ndaani nisa, canaaze ca benda partí nga xhiiña ca'.

<sup>17</sup> Para rabi be laaca':

—Lata nanda naa ne laca zune laatu guuze', peru para chi yubi tu binni gueda né tu ra nuua'.

<sup>18</sup> Oraqueca bisaana ca tarraya stica' ne zinanda ca laabe.

<sup>19</sup> Guzá ru be stindaa ne biiya be iropa xiiñi Zebedeu, Jacobo ne Juan, nuu ca ndaani ti canuá cayuni chaahui ca tarraya stica'.

<sup>20</sup> Para gudxi be laaca chi nanda ca laabe. Ne óraque bisaana ca bixhoze ca ndaani canuá que ne cani runi né laa dxiiña', ne biree ca zinanda ca laabe.

*Sti ti hombre riguite  
binidxaba ique*

(Lc. 4.31-37)

<sup>21</sup> Yendá cabe ndaani guidxi Capernaum ne yeusiidi Jesú斯 ndaani yu'du dxi enda riziila'dxi'.

<sup>22</sup> Nabé bidxagayaa ca binni que ni cani' be partí cusiidi be casi tobi ni zanda guni mandar ne cadí casi ca maistru de ley.

<sup>23</sup> Ndaani yu'du que nuu ti hombre riguite binidxaba ique.

<sup>24</sup> Ne bicaa ridxi:

—Xi napa neu laadu, Jesú斯 de Nazaret. Ñee zeda unitilú lu laadu la? Runebia'ya lii.

Lii nga hombre cha'hui sti Dios.

<sup>25</sup> Oraque gudinde né Jesú斯 binidxaba que, na rabi laa:

—Bigani ne biree de hombre ca.

<sup>26</sup> Ne ora ziree binidxaba que de hombre que, bidii ataque laa, ne bicaa binidxaba que ti ridxi reciu, ne biree ze'.

<sup>27</sup> Bidxagayaa ca binni nuu raqué ne gunaba diidxa saa ca', na ca':

—Xii ndi pue. Xi nacubi ri canausiidi hombre ri'. Nandxo' be dede runi mandar be binidxaba ne ruzuuba ca stiidxa be.

<sup>28</sup> Ne qué nindaa bireeche stiidxa Jesú斯 idubi Galilea.

*Ra bianda suegra Simón  
Pedru*

(Mt. 8.14-15; Lc. 4.38-39)

<sup>29</sup> Ora biree cabe de ndaani yu'du que, yené Jesú斯 Jacobo ne Juan ralidxi Simón ne Andrés.

<sup>30</sup> Ne ora yendá ca raqué gudxi cabe Jesú斯 huará suegra Simón nexhe né xindxá'.

<sup>31</sup> Oraque bidxiña Jesú斯 nuu be ne unaaze ná be, undisa laabe ne oraqueca biree xindxá' que, ne bidii be ni gudó ca'.

*Bisianda Jesú斯 stale binni*

(Mt. 8.16-17; Lc. 4.40-41)

<sup>32</sup> Huadxí que casi biaazi gubidxa, bedané cabe stale binni huará ne ni riguite binidxaba ique ra nuu Jesú斯,

<sup>33</sup> dede bidxiña idubi naca guidxi que ra puerta yoo que.

<sup>34</sup> Ne bisianda be stale binni ni napa adxé adxé enda huará, ne ulee be stale

binidxaba de laaca'. Peru qué nudii be lugar niní ca binidxaba que pa runibiá' ca laabe.

*Byui' né Jesús binni Galilea stiidxa Dios*  
(Lc. 4.42-44)

<sup>35</sup> Nuxcanda ru biasa be biree be de ndaani guidxi que, uyé be ndaani gui'xhi', ne raqué uní' né be Dios.

<sup>36</sup> Para uyé Pedru ne ca xcompañeru yeyubi ca laabe.

<sup>37</sup> Ne ora bidxela ca laabe, na ca rabi ca laabe:

—Irá binni canayubi lii.

<sup>38</sup> Peru óraque, na be rabi be laaca':

—Chuu ca xcaadxi guidxi huiini ni nuu gaxha ca, para güe stiidxa Dios, partí para nga nga zenda'.

<sup>39</sup> Ne uzá be idubi naca Galilea canayuí' be stiidxa Dios ndaani ca yu'du que ne canabee be binidxaba de binni.

*Sti ti hombre napa lepra*  
(Mt. 8.1-4; Lc. 5.12-16)

<sup>40</sup> Ti dxi bidxiña ti hombre huará napa lepra ra nuu be, bizuxibi xañee be ne rabi laabe:

—Pa na lu la? zanda usianda lu naa.

<sup>41</sup> Oraque biá be laa, udixhe ná be luguiá' ne rabi be laa:

—Zusianda lii ne zia ladi lu'.

<sup>42</sup> Ne casi biluxe uní' be, oraqueca binitilú ca gui'dxu que ladi ne bianda.

—Para na be rabi be laa:  
—Uyé yanna.

<sup>44</sup> Peru biiya gá qué chi tidxi lu ni iruti'. Uyé ra nuu sacerdote, ne bidii ti ofrenda

casi bicaa Moisés guni binni ora ma bianda, para ganna binni ma bianda lu'.

<sup>45</sup> Para biree ze', ne bizulú byui' de irá ni uca que. Ngue runi ma qué ñanda ñuu Jesús ndaani guidxi, sínuque bi-aana ndaani gui'xhi'. Peru uyé binni de irá ladu ra nuu.

## 2

*Sti ti hombre guti galaa*  
(Mt. 9.1-8; Lc. 5.17-26)

<sup>1</sup> Gudi'di si xhupa xhonna gubidxa, bigueta biuu Jesús ndaani guidxi Capernaum sti tiru. Ne ora gunna cabe ma nuu be yoo la?

<sup>2</sup> oraqueca bidopa stale binni ra nuu be que, dede bidxii ra puerta yoo que, ne bizulú byui' né be laaca stiidxa Dios.

<sup>3</sup> Oraque beeda tapa hombre, nua ca ti hombre nexhe lu ti luuna, ma guti galaa.

<sup>4</sup> Peru qué ñanda ñuu né cabe laabe ra nuu Jesús pur irá binni que. Para gudxi'ba cabe ique yoo ne ulee cabe caadxi teja ique yoo que, neza ra nuu Jesús, ne raqué undete cabe luuna ra nexhe hombre que.

<sup>5</sup> Ora bi'ya Jesús pabiá' napa cabe fe laa la? na rabi binni huará que:

—Ma bine perdonar xpecadu lu, xiiñe'.

<sup>6</sup> Zuba caadxi maistru de ley raqué, ne caní' ique ca':

<sup>7</sup> —Xiñee caní' hombre ri sicarí pue. Cayuni be laabe Dios, partí iruti ru zanda guni perdonar pecadu jma que tobi lucha Dios.

<sup>8</sup> Peru maca nanna Jesús xi caní' ique cabe para na rabi laacabe:

—Xiñee caní' ique tu zacá.

<sup>9</sup> Xii nga jma qué igana gabe laabe, ma bine perdonar xpecadu be la? o gabe laabe guiasa be, indisa be jluuna be ne sa be.

<sup>10</sup> Peru para ganna tu naa nga Hombre Biseenda Dios ne zanda gune perdonar pecadu ndaani guidxilayú la? laguuya ni chi gune ri'.

Ne óraque rabi be ni huará que:

<sup>11</sup> —Biasa, undisa jluuna lu', ma zanda chibí lu'.

<sup>12</sup> Oraque biasa hombre huará que, undisa jluuna', ne biree de raqué nezalú irá binni que. Nabé bidxagayaa ca binni que ne bisisaca ca Dios ne na ca':

—Qué huayuu dxi idu'ya du xiixa sicarí.

### *Guridxi Jesús Leví*

(Mt. 9.9-13; Lc. 5.27-32)

<sup>13</sup> Bigueta uyé Jesús uría nisa ro' que sti tiru ne uyé irá binni ra nuu be para bisiidi be laaca'.

<sup>14</sup> De raqué biree be ze be, ne biyya be zuba Leví xiñí Alfeu ruaa mexa ra ritixe binni impuestu, para rabi be laa:

—Dananda naa.

Oraqueca biasa zinanda laabe.

<sup>15</sup> Ne bini invitar Leví laabe chi to né be laa ralidxi ne laca uyé stale de cani ruquixe impuestu ne xcaadxi ni qué rulabi ley. Gurí né ca laabe ne ca discípulu stibe ruaa mexa',

purti nabé stale de laaca nanda ca laabe.

<sup>16</sup> Peru ora bi'ya ca fariseu ne cani naca maistru de ley, cayó né be ca binni que tobi si la? na ca rabi ca ca discípulu stibe:

—Xiñee zuba né jmaistru tu ca malu ni ruquixe impuestu ne cani qué rulabi ley.

<sup>17</sup> Ne bina diaga Jesús ni uní' cabe que para na rabi laacabe:

—Cadi caquiiñe cani nazaaca doctor sínueque cani huará. Cadi zeda yube cani nacha'hui, sínueque cani cuchee.

### *Enda riaana sin go*

(Mt. 9.14-17; Lc. 5.33-39)

<sup>18</sup> Ti dxi biaana ca discípulu sti Juan Bautista ne sti ca fariseu sin go, casi runi ca stale tiru. Ne dxi que uyé caadxi binni ra nuu Jesús, ne na ca rabi ca laabe:

—Xiñee ca discípulu sti Juan ne sti ca fariseu riaana ca sin go ca' peru ca discípulu stiu' co'.

<sup>19</sup> Oraque na be rabi be laaca'.

—Lácaxa ziaana cani nuu ra ti enda xheela sin go laga nuu novio lade ca'. Laga nuu né novio que laacabe la? qué zanda guiaana cabe sin go cabe.

<sup>20</sup> Peru ora ma biaaxha cabe novio que la? óraque huaxa ziaana cabe sin go cabe.

<sup>21</sup> Iruti rucaa remiendu tindaa lari cubi lu ti lari yooxho'. Purti pa ñuni cabe zacá la? casi ña'ri ni nidopa

lari cubi que ne jma rusi  
xirooba nireza ni óraque.

<sup>22</sup> Ne zaqueca iruti rigaa  
vinu cubi ndaani ti guidi  
yooxho'. Purti pa ñuni cabe  
ni la? nicheza vinu cubi  
que guidi yooxho que. Ne  
óraque ninitilú vinu que ne  
laca ninitilú guidi que. Nga  
runi naquiiñe cá' cabe vinu  
cubi ndaani ti guidi cubi.

*Undadi ca discípulu zee dxi  
enda riziila'dxi'*  
(Mt. 12.1-8; Lc. 6.1-5)

<sup>23</sup> Ti dxi enda riziila'dxi  
zididi né Jesús ca discípulu  
sti ndaani ti ñaa. Ne óraque  
bizulú ca discípulu que un-  
dadi ca zee ra zidi'di ca'.

<sup>24</sup> Para na caadxi fariseu  
rabi laabe:

—Xiñee cayuni ca discípulu  
stiu' ni cadi jneza guni binni  
dxi enda riziila'dxi'.

<sup>25</sup> Peru rabi be laaca':

—Ñee qué huayuunda tu  
xi bi'ni David dxi gasti ni  
go né ca xpinni, ne ma can-  
daana ca la?

<sup>26</sup> Biuu be ndaani yu'du sti  
Dios dxi naca Abiatar sacer-  
dote gola, ne ucuaa be ca pan  
ni ma uyuu ndaaya'. Gudó  
be ne bidii be cani canazá né  
be que, gudó ca' neca na ley  
ca sacerdote si zanda go cani,  
peru laacabe gudó cabe ni.

<sup>27</sup> Ne laca na Jesús rabi  
laaca':

—Uca dxi enda riziila'dxi  
para binni, cadi binni uca  
para laani.

<sup>28</sup> Naa nga Hombre  
Biseenda Dios ne zanda gabe  
binni xii nga jneza guni dxi  
enda riziila'dxi'.

*Sti ti hombre nabidxi ti  
chu ná'*  
(Mt. 12.9-14; Lc. 6.6-11)

<sup>1</sup> Ti dxi biuu Jesús ndaani  
ti yu'du ne raqué nuu ti hom-  
bre nabidxi ti chu ná'.

<sup>2</sup> Cundaachi ca binni ni  
nuu raqué pa zusianda be ná  
hombre que dxi enda riziila'dxi,  
ti gapa ca xi pur cu' ca  
xqueja be.

<sup>3</sup> Oraque rabi be hombre  
ni nabidxi ti chu ná que.

—Biasa bizuhuaa galahui  
ri'.

<sup>4</sup> Ne rabi be cani nuu  
raqué:

—Xii nga nexhe aca dxi  
enda riziila'dxi', gacané nu  
binni la? o guniná nu laa; ulá  
nu xpida binni la? o guuti nu  
laa.

Peru iruti nicabi.

<sup>5</sup> Oraque biiya tuxhu be  
laaca ne triste biaana be  
purti naguidxi ladxidó' ca'.  
Ne rabi be hombre que:

—Bisigaa nou'.

Para bisigaa ná hombre  
que ne bianda.

<sup>6</sup> Oraqueca biree ca fariseu  
ne uní né ca ca xpinni  
Herodes para uyubi ca xi-  
modo guuti ca laabe.

*Uriá nisa Galilea*

<sup>7</sup> Peru óraque ucuaa be  
ca discípulu stibe yené be  
laaca uriá nisa que, ne  
yenanda stale binni laabe,  
binni Galilea, ne binni Judea,

<sup>8</sup> ne binni de Jerusalén ne  
de Idumea ne de sti ladu guigu  
Jordán, ne binni de Tiro  
ne de Sidón. Ma bina diaga

ca irá ni bi'ni be, nga runi uyé ca ra nuu be.

<sup>9</sup> Ne gudxi be ca discípulu stibe guni chaahui ca ti canuá para laabe ti cadi uquiichi ca binni que laabe.

<sup>10</sup> Purti nabé stale binni huará ma bisianda be ne rí ru jma ni ca'rú guiana dede cayaba ca luguiá be para ganda cana ca laabe.

<sup>11</sup> Ne casi gu'ya ca binidxaba ni riguite ique binni laabe la? ruzuxibi ca xa ñee be ne rucaa ca ridxi:

—Lii nga Xiiñi Dios.

<sup>12</sup> Peru udinde né be laaca cadi uezete ca tu laabe.

*Ra ulí Jesús doce apóstol*  
(Mt. 10.1-4; Lc. 6.12-16)

<sup>13</sup> Lade ca dxi que uyé Jesús lu ti dani, ne raqué guridxi cani racala'dxi che ra nuu.

<sup>14</sup> Ne ulí doce para sá né laa ne para chi güi stiidxa Dios.

<sup>15</sup> Ne bidii poder laaca para usianda ca cani huará ne cuee ca binidxaba ni riguite ique binni.

<sup>16</sup> Ndi nga lá doce ni ulí be que: Simón, ni na be iree lá Pedru;

<sup>17</sup> Jacobo ne Juan xiiñi Zebedeu, iropa bi'chi ca'. Ulee lá be laaca Boanerges. Pa niní' be ni didxazá la? ñabi be laaca Xiiñi Rayu.

<sup>18</sup> Ne laca lade cabe zeeda Andrés, Felipe, Bartolomé, Mateu, Tomás, Jacobo xiiñi Alfeu, Tadeu, Simón ni uyuu lade ca cananista,

<sup>19</sup> ne Judas Iscariote ni bitoo laabe que.

*Na cabe nuu né Jesús binidxaba'*

(Mt. 12.22-32; Lc. 11.14-23; 12.10)

Biete si cabe de raqué biuu cabe ndaani ti yoo.

<sup>20</sup> Ne bigueta gurí zisi binni laacabe sti tiru, de qué ñanda ño cabe gueta.

<sup>21</sup> Ora gunna xfamilia be ni la? beeda ca para niné ca laabe purti na ca ma cayaca ique be.

<sup>22</sup> Ne na ca maistru de ley, cani beeda de Jerusalén:

—Nuu né hombre ri Beelzebú, xaíque sti ca binidxaba', ne laa racané laabe para cuee be ca binidxaba ni riguite ique binni.

<sup>23</sup> Oraque guridxi Jesús laacabe ne gudixhe ti ejemplu, na:

—Ximodo zanda cuee binidxaba laca laa ya'.

<sup>24</sup> Pa tinde saa ca binni de ti guidxi la? nagueenda zanitilú guidxi que.

<sup>25</sup> Ne pa tinde saa ti familia la? laca nagueenda zanitilú familia que.

<sup>26</sup> Zacá nga laani, pa cucaa lú saa ca xpinni binidxaba la? laca nagueenda zanitilú.

<sup>27</sup> Iruti zanda chi ndana ralidxi ti hombre ni nadipa pa qué undiibi laabe primeru. Peru pa undiibi laabe la? óraque huaxa ma zanda cuana ni napa be.

<sup>28</sup> Gabe ca' laatu, zuni perdonar Dios binni de irá enda ruchee ne irá enda riguu di,

<sup>29</sup> peru pa chu' tu usaca Espíritu Santu binidxaba la?

ngue qué ziuu dxi guni perdonar Dios laa, sínunque zi-aana donda luguiá'.

<sup>30</sup> Gudxi be laaca zacá purti na ca nuu né be binidx-aba'.

*Jñaa Jesús ne ca bi'chi'*

(Mt. 12.46-50; Lc. 8.19-21)

<sup>31</sup> Ratu si que beeda jñaa be ne ca bi'chi be, ne biaana ca fuera peru bisenda tidxi ca laabe.

<sup>32</sup> Para na cani zuba né laabe raqué:

—Racá nuu jñoou ne ca bi'chi lu', zeda yubi ca lii.

<sup>33</sup> Peru óraque rabi be laaca':

—Tuu nga jñaa ne tuu nga ca biche'.

<sup>34</sup> Ne óraque biiya dxí be cani zuba né laabe raqué ne na be:

—Ca ndi nga jñaa ne biche'.

<sup>35</sup> Purti irá tu guni ni na Dios la? ca ngue nga biche ne bizana ne jñaa'.

## 4

*Sti tobi hombre uluu biní*

(Mt. 13.1-9; Lc. 8.4-8)

<sup>1</sup> Bigueta bizulú Jesús bisiidi uriá nisa que sti tiru, ne bidopa stale binni laabe. Biyya si be nabé stale binni la? biuu be ndaani canuá ni nuu ndaani nisa que, gurí be. Ca binni que la? biaana ca lu yuxi,

<sup>2</sup> ne byuí' né be laaca stale cosa Peru puru ne ejemplu. Ra cusiidi be laaca que, na be:

<sup>3</sup> —Laucaa diaga ndi': Ti hombre biree zinduu biní.

<sup>4</sup> Ra caguu be biní que biaba caadxi ni uriá neza ne beeda mani huiini gudó cani.

<sup>5</sup> Xcaadxi de ca xuba que biaba lade guie ne undani cani nagueenda purti luguiá si napa ni caadxi yu.

<sup>6</sup> Peru casi biree gubidxa bizaaqui cani ne bibidxi cani purti qué gapa cani xcu cani guete'.

<sup>7</sup> Xcaadxi de laacani biaba lade guichi ne laca undani ca', peru jma bisoo guichi que para laacani ne biiti guichi que cani ne qué nudii cani gasti'.

<sup>8</sup> Nuu xcaadxi de laacani biaba lu layú ra nayá, ne ca ngue huaxa gundani ne bisoo. Nuu layú ra bidii treinta carreta niza ne nuu ra bidii sesenta ne nuu ra bidii dede ti gayuua.

<sup>9</sup> Oraque rabi be laaca':

—Irá ni racala'dxi guiene la? ucaa diaga.

*Ra uní' xiñee riguixhe ejemplu*

(Mt. 13.10-17; Lc. 8.9-10)

<sup>10</sup> Biree si irá binni que biaana Jesús stubi. Oraque bidxiña cani nuu gaxha de laabe ne doce discípulu stibe que, gunaba diidxa ca laabe xi rini' ejemplu que.

<sup>11</sup> Para rabi be laaca':

—Laatu la? cudii Dios lugar guiene tu modo runi mandar, dede ni naga'chi', Peru cani cadi xpinni be la? puru ejemplu si riguixhe be lú ca',

<sup>12</sup> ti cadi gu'ya ca neca cayuuya dxí ca', ne cadi guiene ca neca cayuna diaga

ca'. Pacaa tuyubi ca naa ne ñaca perdonar ca xpecadu ca'.

*Xi rini' cuentu sti hombre yenduu biní*

(Mt. 13.18-23; Lc. 8.11-15)

<sup>13</sup> Ne laca rabi be laaca':

—Pa qué ñene tu ejemplu ri la? ximodo ga ganda guiene tu pa udiee laatu xcaadxi ejemplu ya'.

<sup>14</sup> Ni guluu biní que la? ngue nga zeda gaca casi ni rui' stiidxa Dios.

<sup>15</sup> Ne xuba ni bisaba be que nga zeda gaca casi binni ni runa diaga stiidxa Dios. Nuu de laaca zeda gaca casi xuba ni biaba uriá neza que, purti nécati guna diaga ca stiidxa Dios, reeda binidxaba raxha ni de ndaani ladxidó' ca'.

<sup>16</sup> Ne nuu xcaadxi binni zeda gaca casi xuba ni biaba lade guie que. Purti casi guna diaga ca stiidxa Dios, ricaa ca ni ne enda nayeche'.

<sup>17</sup> Peru qué riaazi pe ni ndaani ladxidó' ca', sínunque luguiá si. Ngue runi casi pe gueeda xiixa ni naná, o iladxi cabe laaca pur stiidxa Dios que, maca zixale ca de laani.

<sup>18</sup> Ne nuu xcaadxi zeda gaca casi xuba ni biaba lade guichi que. Runa diaga ca stiidxa Dios,

<sup>19</sup> Peru jma rucaa ique ca irá ni nuu ndaani guidxilayú, ne rudii ca lugar quite bidxichi ique ca ne riula'dxi ca gapa ca stale cosa. Irá nga ruuti stiidxa Dios ni nuu ndaani ladxidó' cabe que. Nga runi qué zanda iquiiñe cabe para Dios.

<sup>20</sup> Peru nuu xcaadxi binni zeda gaca casi xuba ni biaba ra nayá que, purti runa diaga ca stiidxa Dios ne ricaa ca ni, ne rudii ca lugar inicii ni ndaani ladxidó' ca', ne óraque zanda iquiiñe ca para Dios. Nuu de laaca zeda gaca casi ni bidii treinta carreta niza que, ne nuu de laaca casi ni bidii sesenta que, ne nuu de laaca casi ni bidii dede ti gayuua que.

*Ejemplu sti linterna*

(Lc. 8.16-18)

<sup>21</sup> Laca rabi be laaca':

—Lácaxa rucaa gui cabe ti linterna ne cu' cabe laa xa'na cajón o xa'na luuna'. Iruti qué runi zacá, sínunque rugaanda cabe ni luguiá para uzaani ni.

<sup>22</sup> Zacaca irá ni ye'gu lú yanna, napa xidé ixele'. Ne zaqueca irá ni naga'chi yanna, laca qué ziaana sin qué ganna binni.

<sup>23</sup> Irá ni racala'dxi guiene la? ucaa diaga.

<sup>24</sup> Ne laca rabi be laaca':

—Laucaa diaga chaahui ni cayabe laatu, purti bia' rucaa diaga tu, bia' cá nga gusiene Dios laatu. Ne zusiene ru be laatu jma pa ucaa diaga chaahui tu.

<sup>25</sup> Ni ma biene caadxi la? ziene jma, ne ni qué riene la? dede ni ma biene zusiaanda'.

*Ejemplu sti biidxi rindani ne rigaa*

<sup>26</sup> Ne laca rabi be laaca':

—Enda runi mandar sti Dios zeda gaca casi ora riguu binni biní.

<sup>27</sup> Purti inque bisaba cabe xuba que la? ma zasi cabe

huaxhinni ne ziasa cabe ridxi', ne zaqué ridi'di dxi, ne xuba que candani ne caniisi, perú qué ganna cabe ximodo raca ni.

<sup>28</sup> Stubi layú que rusiniisi ni. Primeru riree bandaga, ne óraque dú, ne de raqué ma zee.

<sup>29</sup> Ne ora ma niza ni la? rindadi cabe ni partí ma bizaan dxi stini.

### *Biidxi mostaza*

(Mt. 13.31-32; Lc. 13.18-19)

<sup>30</sup> Ne laca rabi be laaca':

—Xi zanda usaca nu enda runi mandar sti Dios, ne xi ejemplu zanda quixhe nu de modo chi dale xpinni be.

<sup>31</sup> Zeda gaca ni casi ti biidxi mostaza ni rudxiiba cabe. Jma nahuiini ni que irá bidxi ni nuu ndaani guidxilayú.

<sup>32</sup> Peru ora ma udx'i'ba ni la? rirooba ni, dede raca ni yaga ro'. Ribee ni stale rama dede reeda mani huiini ruzá' lidxi lu rama stini ne riziila'dxi lu xpandá ni.

<sup>33</sup> Puru ejemplu gudixhe be ra bisiidi be laaca', dede bia' ra gunda biene ca'.

<sup>34</sup> Qué ñui' né be laaca gasti sin qué niguixhe be ejemplu, perú ca discípulu stibe la? bisiene be laaca xi rini' cani.

### *Gudixhe dxí Jesús bi yooxho'*

(Mt. 8.23-27; Lc. 8.22-25)

<sup>35</sup> Dxi queca casi bixhinni, na be rabi be ca discípulu stibe:

—Chuu cherica nisa ri'.

<sup>36</sup> Para bisaana ca ca binni que, biuu ca ndaani canuá ra zuba be que, ne biree cabe

ze cabe, ne yenanda xcaadxi canuá laacabe.

<sup>37</sup> Peru laga ze cabe ndaani nisa que biete ti bi yooxho ne nabé naro'ba biasa ola stini de bilá nidxá canuá que de nisa.

<sup>38</sup> Laga cayaca irá nga, nisi-aasi Jesús atrá naguu xa ique ti almoizada. Para bicuaani cabe laabe na cabe:

—Maistru, ñee cadí caza-alá'dxu gati nu la?

<sup>39</sup> Oraque biasa be gudinde né be bi yooxho que ne rabi be nisa que:

—Guta dxí.

Ne biaana dxí bi que ne ma qué ñasa ru ola.

<sup>40</sup> Oraque rabi be ca discípulu que:

—Xiñee cadxibi tu. Xiñee ca'ru gapa tu fe naa.

<sup>41</sup> Nabé bidxibi ca óraque, ne unaba diidxa saa ca':

—Tu laabe pue, dede bi ne nisa ruzuuba stiidxa be.

## 5

### *Ti hombre riguite binidxaba ique*

(Mt. 8.28-34; Lc. 8.26-39)

<sup>1</sup> Udi'di cabe nisa que, biuu cabe xquidxi ca gadareno.

<sup>2</sup> Ne casi pe biete Jesús de ndaani canuá que, bidxiña ti hombre riguite binidxaba ique ra nuu be,

<sup>3</sup> biree de lade ba' partí raqué nabeza, ne iruti randa rundiibi laa, nin ne cadena.

<sup>4</sup> Stale tiru bindiibi cabe cadena ná be ne ñee be, perú cada tiru la? ruxuixe be cani ne iruti randa rucueeza laabe.

<sup>5</sup> Idubi dxi ne idubi gueela ma canazá be lu dani ne lade

ba', canaucaa be ridxi ne ma cayuniná be laca laabe ne guie.

<sup>6</sup> Peru de zitu ru biiya be Jesús, bixooñe be ne bizuxibi be xañee,

<sup>7</sup> ne bicaa binidxaba ni napa be que ridxi:

—Xi napa nia lii, Jesús Xiiñi Dios ni nandxó'. Rinaba lii cadi guniná lu naa.

<sup>8</sup> Uní' be zaqué partí cayabi Jesús laabe iree be de hombre que.

<sup>9</sup> Ne unaba diidxa Jesús laabe tu lá be. Para na be:

—La'ya Legión partí stale du.

<sup>10</sup> Ne ucuá be lá Jesús cadi cuee laacabe de lugar que.

<sup>11</sup> Bia'si canazá jma bihui cue' ti dani canayó.

<sup>12</sup> Para na ca binidxaba que, rabi ca Jesús:

—Biseenda laadu ra nuu ca bihui ca, bidii lugar chu' du luguiá came.

<sup>13</sup> Ne óraque biree ca de hombre que ne bidii Jesús lugar yechuu ca luguiá ca bihui que. Nuu bia' chupa mil bihui raqué. Ne casi biuu ca luguiá ca bihui que biete tí came de ra dxí'ba came. Bia'si pe ndaani nisa biaba came, ne raqué guti came.

<sup>14</sup> Ne bixooñe cani cayapa ca bihui que, uyé ca ndaani guidxi ne irá ca ranchu ni nuu neza que, yegüí ca ni uca que. Beeda stale binni, beda guuya ca xi uca raqué.

<sup>15</sup> Ne ora bidxiña ca ra nuu Jesús, biiya ca zuba dxa hombre ni gudxite binidxaba ique que, ma nacu lari

ne ma bigueta xpiaani', ne bidxibi ca'.

<sup>16</sup> Cani bi'ya ora uca ni la? byuí' né ca binni modo bizaaca dxa hombre que ne modo uca ca bihui que.

<sup>17</sup> Oraque bizulú ca binni que ucuá ca lá Jesús ixele de xquidxi ca'.

<sup>18</sup> Ne ma zichuu Jesús ndaani canuá que bidxiña hombre que ne na gudii be lugar chiné laabe.

<sup>19</sup> Peru qué niná di be, sínueque rabi be laa:

—Guyé rali'dxu', yegüí né ca binni lí'dxu pabiá' naro'ba ni bi'ni Dios lii ne pabiá' biá lii.

<sup>20</sup> Para biree hombre que ze' ne bizulú byuí' né ca binni de ca guidxi sti Decápolis pabiá' naro'ba ni bi'ni Jesús laa. Nabé bidxagaya irá binni que.

*Ra bisibani Jesús xiiñi  
Jairu ne bisianda ti gunaa  
(Mt. 9.18-26; Lc. 8.40-56)*

<sup>21</sup> Ora bigueta Jesús sti ladu nisa que beeda stale binni ra nuu ne biaana uriá nisa que.

<sup>22</sup> Oraque beeda ti hombre lá Jairu naca xaíque sti ti yu'du', ne casi bi'ya laabe bizuxibi xañee be,

<sup>23</sup> ne na rabi laabe:

—Ma cayati xiiñe'. Chuu, quixhe ná lu luguiá be ti guianda be ne cadi gati be.

<sup>24</sup> Para biree be ziné be laa. Peru nabé stale binni zinanda laabe dede cuquiichi ca laabe.

<sup>25</sup> Ne lade irá binni que nuu ti gunaa ma raca doce aña de caxii rini.

<sup>26</sup> Ma birá doctor uyé be ra nuu, ne ma biniti be irá ni napa be. Ne lugar de ñanda be, laga jma rusi zirooba enda huará que.

<sup>27</sup> Ma huayuna diaga be de Jesús, nga runi biuu be atrá lade ca binni que ne guda'na be xhaba Jesús.

<sup>28</sup> Purti na be neca xhaba si Jesús cana be, zianda be.

<sup>29</sup> Ne casi pe uda'na be xhaba Jesús biaana dxí ca enda rixii rini que ne bini sentir be ma bianda be.

<sup>30</sup> Oraque bidii Jesús cuenta bisianda tuuxa ne biiya dxí atrá, biyubi lú lade ca binni que ne na:

—Tu guda'na xhaba'.

<sup>31</sup> Para na ca discípulu stibe rabi laabe:

—Cayuuyu pabiá' cuquichi binni lii peru nou': "Tu guda'na xhaba'."

<sup>32</sup> Peru biyubi lú be irá ladu para gu'ya be tu uda'na xhaba be.

<sup>33</sup> Oraque bidxiña gunaa que, cayaca diti de tantu cadxibi partí nanna xi uca', ne bizuxibi xañee be ne ulee ruua diidxa de irá ni uca'.

<sup>34</sup> Para rabi be laa:

—Bianda lu, xiiñe', partí bini cre lu'. Yanna, sicarú uyé, ma bianda lu ne ma qué zabigueta ru ni.

<sup>35</sup> Caní' ru be biuu tu beda tidxi xaíque sti yu'du que, na rabi laa:

—Ma guti xiiñi lu', xi para cuchiiña rou' maistru.

<sup>36</sup> Peru ora bina diaga Jesús xi na cabe la? na rabi xaíque que:

—Cadi idxibi lu', bini cre si naa.

<sup>37</sup> Ne qué niná Jesús ninanda stale binni laa, sínuque Pedru ne Jacobo ne Juan bi'chi Jacobo si.

<sup>38</sup> Ora yendá be ralidxi xaíque que, biiya be rí binni, cayuuna ca ne cucaa ca ridxi.

<sup>39</sup> Para biuu be ne rabi be laaca':

—Xiñee cayuni tu irá ruidu ri', ne xiñee cayuuna tu, partí cadi guti di badu dxapa huiini ri'; nisiaasi si be nga.

<sup>40</sup> Peru laga bini burla ca laabe, para gulee be irá ca ne ucuaa be bixhoze ba'du que ne jñaa ne cani ziné be que ne biuu cabe ra nuu badu dxapa huiini que.

<sup>41</sup> Ne gunaaze be ná ba'du que rabi be laa:

—Talita, cumi.

Ni riní' ni la? "Biasa, badu dxapa huiini'."

<sup>42</sup> Oraqueca biasa badu dxapa huiini que ne gunda uzá. Ma napa badu dxapa huiini que doce aña. Nabé bidxibi ca binni que.

<sup>43</sup> Peru biinda ca Jesús lú ca' qué chi tidxi ca ni iruti', ne gudxi be laaca udii ca ni go ba'du que.

## 6

*Ra nuu Jesús Nazaret  
(Mt. 13.53-58; Lc. 4.16-30)*

<sup>1</sup> Biree Jesús de raqué bigueta xquidxi, laa ne ca discípulu stí'.

<sup>2</sup> Ne dxi gunda dxi enda riziila'dxi que la? bizulú be bisiidi be ndaani yu'du'. Nabé bidxagayaa cani cucaa diaga laabe que ne na ca':

—Para a biziidi hombre ri irá ndi pue, ne para a ulee irá enda biaani ni napa, ne irá milagru cayuni ri'.

<sup>3</sup> Lácaxa cadi dxa carpinteru xiiñi María que ndi', bi'chi Jacobo ne José ne Judas ne Simón. Ca biza'na be laca rarí nabeza ca'.

Ne pur nga runi qué ñuni cre cabe Jesús.

<sup>4</sup> Peru óraque na Jesús rabi laacabe:

—Stobi stobi lugar risaca profeta, peru ra qué risaca be nga ndaani xquidxi pe be ne ralidxi be ne lade binni lidxi be.

<sup>5</sup> Ne qué ñanda ñuni be nin ti milagru raqué jma que gudixhe ná si be luguiá caadxi binni huará ne bianda ca'.

<sup>6</sup> Ne bidxagayaa be purti qué ñuni cre ca binni que.

*Ra yegüí ca apóstol stiidxa Dios*

(Mt. 10.5-15; Lc. 9.1-6)

De raqué uzá be irá ca guidxi huiini ni nuu gaxha neza que, canausiidi be.

<sup>7</sup> Ne guridxi be doce discípulu stibe que. Bizulú biseenda be laaca chupa chupa, ne gudixhe be ladxi ná ca cuee ca binidxaba de binni.

<sup>8</sup> Ne gudxi be laaca cadi chiné ca gasti ni iquiiñe ca neza sínunque bastón si, ne cadi naquiiñe chiné ca pan, nin ixhiapa, nin vueltu.

<sup>9</sup> Ne ucaa ñee ca guela guidi ne chiné ca ti muda lari si.

<sup>10</sup> Ne rabi be laaca':

—Ora guiete tu ti ra yoo la? laguiaana raqué dede ora iree tu de guidxi que.

<sup>11</sup> Ne pa chu' paxaraa qué na cabe icca cabé laatu nin ucaa diaga cabé laatu la? lairee de raqué ne laquibi ñee tu casi ti seña bichee cabé ra qué niná cabé nucaa diaga cabé laatu. Ne gabe ca' laatu, jma naná ziaba ná cabé para ca binni Sodoma ne Gomorra, dxi cuidxi Dios cuenta binni.

<sup>12</sup> Para biree ca discípulu que ze ca', yeusiidi ca binni naquiiñe usaana xpecadu.

<sup>13</sup> Ne laca ulee cabe stale binidxaba de binni, ne ux-ubi cabe aceite ladi binni ne bisianda cabe laaca'.

*Ra guti Juan Bautista  
(Mt. 14.1-12; Lc. 9.7-9)*

<sup>14</sup> Gunna rey Herodes irá ni, purti ma za'bi stiidxa Jesús idubi naca guidxi que, ne na:

—Ma bibani Juan Bautista ne laabe nga Jesús ni cayanda cayuni irá enda nandxo' ca.

<sup>15</sup> Peru xcaadxi na:

—Elías nga.

Ne xcaadxi na:

—Ti profeta casi cani uyuu chiqué nga.

<sup>16</sup> Peru ora bina diaga Herodes ni na cabe que la? na:

—Juan nga, dxa ni bine mandar ugá cabe yanni que. Laabe nga ma bibani be.

<sup>17</sup> Uní' be zacá partí nanna be xi ma bi'ni be Juan. Gu-naaze be laa ne bindiibi be laa ne biseguyoo be laa, runí Herodías xheela Felipe bi'chi be, partí ucuaa be Herodías casi xheela be.

<sup>18</sup> Bidxiichi be partí gudxi Juan laabe cadi jneza chu' né be xheela bi'chi be.

<sup>19</sup> Ne pur nga nabé uca nanala'dxi Herodías Juan ne ucalá'dxi ñuuti laa Peru qué ñanda.

<sup>20</sup> Qué nudii Herodes lugar ñuniná be Juan partí nanna nayá ladxidó' Juan ne nacha'hui', ne ridxibi Herodes Juan. Necá qué ñene be stale de ni uní' Juan, Peru bicaa diaga be laa ne stale gana.

<sup>21</sup> Peru bidxiña dxi gunda bi'ni Herodías ni ucalá'dxi que. Dxi lani xpidó' Herodes uca saa ne bi'ni Herodes ti endaró para ca xaíque ne ca capitán sti' ne para ca binni ni jma risaca de Galilea.

<sup>22</sup> Ne guyuu xiñi dxaapa Herodías ra cayó xhi cabe que, biyaa. Nabé uyuula'dxi Herodes ne cani cayó xhi ne laa que modo biyaa badu dx-aapa que. Para na rabi laabe:

—Unaba naa intiica acala'dxu ne zudiee ni lii.

<sup>23</sup> Ne bini jurar rey que udii laabe intiica inaba be, necá galaa de ra runí mandar.

<sup>24</sup> Oraque biree be uyé be ra nuu jñaa be ne rabi be laa:

—Xi inaba laabe.

Para na jñaa be:

—Unaba laabe ique Juan Bautista.

<sup>25</sup> Oraqueca biuu be ra nuu rey que ne rabi be laa:

—Racaladxe udiiu naa ique Juan Bautista ndaani ti bladu nagasi du'.

<sup>26</sup> Ucaná ladxidó' Herodes óraque Peru qué ñanda ñabi be badu dxaapa que co' partí bina diaga cani zuba né be que bini jurar be zudii be badu dxaapa que intiisi acala'dxi'.

<sup>27</sup> Oraqueca biseenda be ti soldadu ziccaa ique Juan.

<sup>28</sup> Para uyé soldadu que biuu ndaani lidxi guiba', guxha ique Juan ne gudixhe ni ndaani bladu'. Bidii ni badu dxaapa que, de badu dxaapa que ma bidii ni jñaa.

<sup>29</sup> Ora gunna ca discípulu sti Juan ni uca que la? yecaa ca xcuerpu be para bicaachi ca'.

*Ra biyaana Jesús gaayu mil  
(Mt. 14.13-21; Lc. 9.10-17;  
Jn. 6.1-14)*

<sup>30</sup> Bigueta si ca apóstol sti Jesús ra nuu, ne byui' né si ca laabe xi irá bi'ni ca ne bisiidi ca la?

<sup>31</sup> rabi be laaca':

—Yanna, chuu nu zitu hui-ini ra gastí binni para izi-ila'dxi nu caadxi.

Purtí ze zeeda binni ra nuu cabe, nin para go cabe gueta.

<sup>32</sup> Oraque biree Jesús ne ca discípulu que, biuu ca ndaani ti canuá ziyubi ca ti lugar ra qué guinni binni.

<sup>33</sup> Peru stale binni biiya ora ze cabe ne binibíá' ca Jesús. Para biree binni de irá guidxi neza que ziuxooñe ca

ti uriá nisa que, ne yendá ca primeru para laacabe.

<sup>34</sup> Casi biete Jesús lu canuá que biiya ma rí stale binni raqué ne biá laacabe partí nuu cabe casi dendxu sin pastor. Para bizulú bisiidi laacabe stale cosa.

<sup>35</sup> Ora bi'ya ca discípulu stibe ma huadxí la? bidxiña ca ra nuu be ne rabi ca laabe:

—Ma huadxí ndi' ne iruti binni nabeza cherí.

<sup>36</sup> Gudxi ca binni ca ma bidxiña ora che ca', ti ganda che cabe ca guidxi huiini ne ca ranchu nuu gaxha ca, para sí cabe pan, partí qué gapa cabe ni go cabe.

<sup>37</sup> Peru na Jesús rabi laaca':

—Laudii ni go cabe laatu.

Para na ca':

—Zanda xa chi sí du chupa gayuua denariu pan para go cabe.

<sup>38</sup> Oraque na Jesús rabi laaca':

—Panda ga pan napa tu ya'. Lachiguuya panda.

Para yeguuya cabe ne óraque beeda cabe ne na cabe:

—Gaayu pan ne chupa benda.

<sup>39</sup> Para gudxi Jesús ca binni que cui ca lu ca guixi nagá' ni nuu raqué, caadxi caadxi.

<sup>40</sup> Ne zaqué gurí cabe. Nuu ra zuba ti gayuua ne nuu ra zuba cincuenta, dede birá cabe gurí cabe.

<sup>41</sup> Oraque ucuua Jesús gaayu pan ne chupa benda que. Gundisa lú ibá' ne bidii diuxquixe Dios, para gundaa ca pan que bidii ca discípulu sti' qui'zi ca lú ca binni que.

Ne zaqueca bi'ni be iropa benda que.

<sup>42</sup> Ne gudó irá binni que dede ra bidxá ca'.

<sup>43</sup> Ne bidxá doce dxumi de nandahui ni biaana lu pan ne lu benda que.

<sup>44</sup> Bia'si gaayu mil hombre gudó raqué.

*Ra uzá Jesús lu nisa*

(Mt. 14.22-27; Jn. 6.16-21)

<sup>45</sup> Biluxe si ngue la? uluu Jesús ca discípulu sti ndaaní canuá que, sa niru gá ca lú be tidi ca nisa que che ca Bet-saida, laga gabi be ca binni que ma che be.

<sup>46</sup> Biluxe si uní' né be ca binni que la? biree be ziní' né be Dios lu dani.

<sup>47</sup> Ne ora bixhinni ma nuu canuá sti ca discípulu que zitu de uriá nisa que, ma stubi si Jesús nuu ra nabidxi.

<sup>48</sup> Ne biiya nagana cayaca para laacabe chiné cabe canuá que partí cudxigueta bi laacabe. Nuxcanda que bidxiña Jesús laacabe, zeda za lu nisa ne ucalá'dxi nidi'di lú cabe.

<sup>49</sup> Peru ora bi'ya cabe zizá be lu nisa la? zácxá cabe cayuuya cabe tentación ne bicaa cabe ridxi.

<sup>50</sup> Purtí irá cabe biiya cabe laabe ne bidxibi cabe. Peru óraque uní' né be laaca':

—Naa ndi', cadi idxibi tu.

<sup>51</sup> Para udxi'ba be ndaaní canuá ra nuu cabe que ne oraqueca biaana dxí bi que. Nabé bidxagayaa cabe,

<sup>52</sup> partí ca'ru guiene cabe tu laabe, nin ne ma biiya cabe milagru ra bitale be ca

pan que, purti nada'gu ru xquenda biaani cabe.

*Bisianda Jesús binni Genesaret*  
(Mt. 14.34-36)

<sup>53</sup> Gudi'di cabe nisa que, yendá cabe Genesaret ne bindiibi cabe canuá que uría nisa.

<sup>54</sup> Casi pe biete cabe lu canuá que binibiá' ca binni que Jesús.

<sup>55</sup> Para yetidxi ca irá binni neza que ma beeda be, ne bizulú bedané ca binni que stale binni huará lu luuna' ra nuu be.

<sup>56</sup> Ne ratiica guiiu be ndaani guidxi ro' o guidxi huiini' o ndaani ranchería, riguixhe cabe ca binni huará que lu calle ne rinaba cabe laabe udii be lugar neca ñee xhaba si be cana cani huará que. Ne bianda irá ni guda'na xhaba be que.

## 7

*Ni runi dxaba binni*  
(Mt. 15.1-20)

<sup>1</sup> Raqué nuu be bidxiña caadxi fariseu ne caadxi maistru de ley ni beeda de Jerusalén ra nuu be.

<sup>2</sup> Ne biiya ca cayó caadxi discípulu stibe sin niguiibi ná', ne bizulú uní ca ca discípulu que. (

<sup>3</sup> Ca fariseu la? zinanda ru ca costumbre sti ca bixhoze gola ca', qué ro ca gueta sin qué qui'bi chaahui ca ná ca'.

<sup>4</sup> Ne ora ibigueta cabe de luguaa la? napa pe cabe ti modo riguiibi ná cabe para go cabe. Ne nuu ru stale costumbre ni zinanda cabe,

casi modo qui'bi cabe vasu, ne jarra ne traste de guiiba', ne luuna'.)

<sup>5</sup> Oraque na ca fariseu ne ca maistru de ley que rabi ca Jesús:

—Xiñee cadi zinanda ca discípulu stiu' costumbre sti ca binigola, purti ridu'ya du ro ca sin qui'bi ná ca casi naquiñe ñuni ca'.

<sup>6</sup> Para na Jesús rabi laa-cabe:

—Jneza ni uní' Dios de ruaa profeta Isaías chiqué ra bizeete pabiá' rusiguii tu, na: Ca binni ri nanaxhi ruaa ca ne naa, Peru ladxidó' ca nuu zitu de naa.

<sup>7</sup> Pur gana si rusisaca ca naa, purti de laasi ca riale ni rusidi ca'.

<sup>8</sup> Ne dxandí ni purti zacá pe runi tu. Rusaana tu mandamientu sti Dios para chi nanda tu costumbre sti binni, casi enda ria'ri jarra ne vasu, ne xcaadxi costumbré casi ca nga.

<sup>9</sup> Ne laca rabi be laaca':

—Galán xa ni runi tu, rusaana tu ni gudixhe Dios para chi nanda tu ca costumbre stitu.

<sup>10</sup> Gudxi Moisés laatu ganaxhii tu bixhoze tu ne jñaa tu, ne laca gudxi be laatu, tu cu' dí bixhoze o jñaa naquiñe gati'.

<sup>11</sup> Peru laatu na tu, zaa gabi ti hombre bixhoze o jñaa: "Qué zanda di acaniá lii purti ni nudiee lii ca, ma bine ni Corbán." (Corbán rabi cabe xiixa cuee chu cabe para Dios.)

<sup>12</sup> Ne inque ma uní' be zacá la? neca cadi dxandí ni, peru rabi tu laabe gasti naca pa qué acané be bixhoze be o jñaa be.

<sup>13</sup> Ne zacá pur ca costumbre stitu ni zeda za lade tu la? napa tu stiidxa Dios casi xixa de enda riguite. Ne nuu ru stale runi tu ni cadi jneza.

<sup>14</sup> Bigueta guridxi Jesús irá ca binni que sti tiru ne na rabi laaca':

—Laucaa diaga naa irá tu, ne laguiene.

<sup>15</sup> Cadi ni riuu ndaani ruua binni, nga runi pur uchee ca', sínunque ni iree de ndaani ladxidó' ca', nga runi ni.

<sup>16</sup> Laucaa diaga chaahui ti guiene tu.

<sup>17</sup> Oraque biree Jesús de ra nuu ca binni que, biuu ndaani yoo. Ne raqué nuu be beeda ca discípulu ra nuu be ne unaba diidxa ca laabe xii ngue gudxi be ca binni que.

<sup>18</sup> Para rabi be laaca':

—Ñee nin laatu qué riene tu la? Ñee qué ganna tu pa cadi ni ro binni nga runi pur uchee né ca Dios la?

<sup>19</sup> Purti qué riuu di ni ndaani ladxidó' cabe sínunque riaba ni ndaani cabe ne óraque riree ni de cuerpu stícabe.

Zacá gudxi be laaca zanda go ca intiisi endaró.

<sup>20</sup> Ne rabi be laaca':

—Ni riree ndaani ladxidó' binni, nga ni runi pur uchee né ca Dios.

<sup>21</sup> Purti de ndaani ladxidó' cabe riree irá ni rini' ique cabe guni cabe: chu' né cabe ni cadi xheela cabe, gapa

cabe jnadxxi cabe, guuti cabe binni,

<sup>22</sup> cuana cabe, acala'dxi cabe gapa cabe jma que stobi, guni cabe ni nadxabá', usiguii cabe, gapa cabe irá clase viciu, gache lú cabe sti stobi, cuee cabe falsu luguiá binni, uchá cabe enda naró' stícabe, guni cabe enda huati.

<sup>23</sup> Irá enda nadxaba ca riree de ndaani ladxidó' binni ne pur irá nga ruchee né cabe Dios.

*Ra unaba ti gunaa de Fenicia guianda xiiñi'*

(Mt. 15.21-28)

<sup>24</sup> De raqué biree be uyé be gaxha de Tiro, ne biuu be ndaani ti yoo. Gucala'dxi be qué ñanna binni pa nuu be raqué Peru qué ñanda nucaachi lú be.

<sup>25</sup> Qué nindaa de biuu be raqué gunna ti gunaa de laabe, ne beeda ra nuu be partí napa ti xiñi dxaapa riguite binidxaba ique. Casi biuu bizuxibi xañee be.

<sup>26</sup> Binni Fenicia gunaa que, cadi judíu laa. Gunaba laabe cuee be binidxaba que de xiiñi'.

<sup>27</sup> Peru rabi be laa:

—Bidii lugar go ca ba'du primeru, partí cadi jneza gaxha cabe pan xiiñi cabe para udii cabe bi'cu'.

<sup>28</sup> Oraque na gunaa que:

—Nanna, Señor, Peru laca ro bi'cu bigú ni riaba xa mexa sti xpixuaana'.

<sup>29</sup> Para na Jesús rabi laabe:

—Jneza uní' lu'. Ma zanda che lu', ma biree binidxaba que de xiiñi lu'.

<sup>30</sup> Ne dxandí ora yendá be ralidxi be biiya be nexhe badu dxapa huiini que lu luna', ma bisaana binidxaba que laa.

*Ra bisianda Jesús ti mudu*

<sup>31</sup> Qué nindaa de ngue biree Jesús de Tiro, uzá neza Sidón ne irá ca guidxi ni rabi cabe Decápolis, ne bigueta ra nisa Galilea.

<sup>32</sup> Raqué nuu be bedané cabe ti hombre nacuaata diaga ne napaapa ruaa ra nuu be, ne gunaba cabe laabe cuaquí ná be luguiá hombre que.

<sup>33</sup> Para ucuaa be hombre que yené be laa ti ladu ne guluu be biciuni ná be ndaani diaga ne bichá xhinni be ne guda'na be ludxi.

<sup>34</sup> Oraque biiya dxí be ibá' gucuaala'dxi be ne na be:

—Efata. Ni riní' ni la? "Bixale".

<sup>35</sup> Ne oraqueca bixale diaga hombre que ne bianda ludxi ne ma gunda uní jneza.

<sup>36</sup> Ne gudxi be laaca cadi gabi di ca ni iruti'. Peru laga jma cayabi be laaca cadi güi cani la? jma rusi byui' né ca ni binni.

<sup>37</sup> Ne nabé bidxagayaa stale binni, ne na ca':

—Jneza irá ni runi be dede ruxhele be diaga cani nacuaata diaga ne rusiní' chaahui be cani napaapa ruaa.

## 8

*Ra biyaana Jesús tapa mil  
(Mt. 15.32-39)*

<sup>1</sup> Nabé stale binni bidxiña ra nuu Jesús ca dxi que, ne

qué gapa ca ni go ca'. Para guridxi be ca discípulu stibe, ne na be rabi be laaca':

<sup>2</sup> —Caya'ya ca binni ri' partí ma chonna gubidxa nuu né cabe naa rari' ne qué gapa cabe ni go cabe.

<sup>3</sup> Pa useenda laacabe chibí cabe sin go cabe la? qué zapa cabe stipa para sa cabe partí nuu caadxi de laacabe beeda de zitu.

<sup>4</sup> Oraque na ca discípulu que rabi laabe:

—Peru paraa idxela ni go cabe rari' ya'. Iruti nabeza rari'.

<sup>5</sup> Para rabi be laaca':

—Panda ga pan napa tu ya'.

Oraque na ca':

—Gadxe.

<sup>6</sup> Para gudxi be ca binni que cui ca layú, ne ucuaa be ca pan que, bidii be diuxquixe Dios ne gundaa be cani, bidii be cani ca discípulu stibe que qui'zi ca cani lú ca binni que.

<sup>7</sup> Laca napa cabe chupa chonna benda. Para bidii Jesús diuxquixe Dios ne gudxi laacabe qui'zi cabe cani.

<sup>8</sup> Irá binni que gudó dede ra bidxá, ne bidopa ru xcadxe dxumi de nandahui ni biaana.

<sup>9</sup> Bia' tapa mil gudó dxi que. Ne óraque gudxi Jesús laacabe ma zanda che cabe.

<sup>10</sup> Ne laa biuu né ca discípulu sti ndaani canuá para ze ca neza Dalmanuta.

*Trampa sti ca fariseu*

*(Mt. 16.1-4; Lc. 12.54-56)*

<sup>11</sup> Ne raqué bidxiña ca fariseu ra nuu be ne bizulú

cacaal yu né ca laabe. Gunaba ca laabe gului' be laaca ti seña xaibá' ti gu'ya ca pa dxandí nandxó' be. Uní' ca zaqué partí cuyubi ca usaba ca laabe.

<sup>12</sup> Oraque ucuala'dxi be tobi ne na be:

—Xiñee canaba ca binni ri gu'ya ca seña. Gabe ca' laatu, nin ru sti seña qué zudiee laatu, rabi be laaca' ne biree be ze be,

<sup>13</sup> bisaana be laaca'. Biuu be ndaaní canuá que sti tiru para ze be cherica nisa que.

*Ra udixhená Jesús ca discípulu*

(Mt. 16.5-12)

<sup>14</sup> Biaanda niné ca discípulu endaró, ti pan si ziné ca ndaaní canuá que.

<sup>15</sup> Oraque na Jesús rabi laaca':

—Laguuya gá qué chi cá sti ca fariseu ne sti Herodes laatu. Ricá ni runi cabe casi riaazi levadura cuba pan.

<sup>16</sup> Oraque na ca discípulu:

—Cayabi be ndi laanu tisi qué ñedané nu pan.

<sup>17</sup> Peru nanna Jesús xi caní' cabe, para rabi laacabe:

—Xiñee na tu qué gapa tu pan. De yanna ca'ru guiene tu ne ca'ru ganna tu la? Ñee tan nada'gu xquenda biaani tu la?

<sup>18-19</sup> Ñee qué ruuya tu ne lú tu ne qué runa diaga tu ne diaga tu la? Ñee qué rietenala'dxi tu dxi udiize gaayu pan lu gaayu mil que la? Panda dxumi de nandahui bitopa tu.

Para na ca':

—Doce.

<sup>20</sup> Oraque rabi be laaca':

—Laga dxi udiize gadxe pan lu tapa mil que ya'. Panda dxumi bitopa tu.

Para na ca':

—Gadxe.

<sup>21</sup> Oraque rabi be laaca':

—De yanna ca'ru guiene tu la?

*Ti lú cheepa de Betsaida*

<sup>22</sup> De raqué yendá cabe Betsaida. Ne bedané ca binni de raqué ti hombre nacheepa lú, ra nuu Jesús ne gunaba ca quixhe ná Jesús luguiá be.

<sup>23</sup> Para unaaze Jesús ná be biree né laabe de ndaaní guidxi huiini que. Ne guxubi nisa xhinni lú be ne gudixhe ná luguiá be ne gunaba diidxa laabe pa ruuya be xiixa.

<sup>24</sup> Oraque biiya dxí be ne na be:

—Ruuya binni peru ruuya laaca casi yaga zizá.

<sup>25</sup> Bigueta gudixhe ná Jesús lú be ne óraque ma biiya chaahui be ne bianda be. Ma ruuya be irá cosa naya'ní'.

<sup>26</sup> Para biseenda Jesús laabe chibí' be ne na rabi laabe:

—Cadi guiuu lu ndaaní guidxi ne cadi gabí lu ni iruti de raqué.

*Ra uní' Pedru tuu nga Jesús*

(Mt. 16.13-20; Lc. 9.18-21)

<sup>27</sup> Sti dxi biree Jesús ne ca discípulu sti' ze ca ca guidxi ni nuu neza Cesarea de Filipo. Ne neza ze cabe na Jesús rabi laacabe:

—Tu na binni naa.

<sup>28</sup> Oraque na cabe:

—Caadxi na lii nga Juan Bautista ne xcaadxi na Elías ne xcaadxi na tobi de ca profeta.

<sup>29</sup> Para rabi be laaca':  
—Laatu ya' tu na tu naa.

Para na Pedru:

—Lii nga Cristu.

<sup>30</sup> Peru gudxi be laaca cadi gabi ca ni iruti'.

*Bizeete Jesús chi gati  
(Mt. 16.21-28; Lc. 9.22-27)*

<sup>31</sup> Oraque bizulú be bisiidi be laaca de ni chi aca ru be, na be rabi be laaca':

—Naa nga Hombre Biseenda Dios. Zuniná cabe naa, ne zaree nanda ca xaíque sti guidxi ne ca xaíque sti ca sacerdote ne ca maistru de ley naa, ne zuuti ca naa. Peru zabane ra guionna gubidxa.

<sup>32</sup> Bisiá be diidxa xi irá chi aca be. Peru yené Pedru laabe ti ladu ne gudxi laabe cadi iní be zaqué.

<sup>33</sup> Oraque bidxigueta lú be ne biiya dxí be ca discípulu stibe ne udinde né be Pedru, na be rabi be laa:

—Bixele de naa, binidxaba', purti cadi de Dios zeeda ni cá ique lu ca sínuque de binni guidxilayú.

<sup>34</sup> Oraque guridxi be ca discípulu stibe ne ca binni que ne rabi be laaca':

—Tu gacala'dxi gaca xpinne la? usiaanda laca laa, cadi lica guiá xpida, ne sa nanda naa.

<sup>35</sup> Purti tu gacala'dxi ulá xpida, zuniti ni. Peru tu uniti xpida pur naa ne pur stiidxa Dios la? zalá.

<sup>36</sup> Paraa iquiiñe ni binni pa guni ganar idubi naca guidxilayú peru guniti xhialma.

<sup>37</sup> O pagala zanda quixe binni saca ulá xhialma.

<sup>38</sup> Naa nga Hombre Biseenda Dios. Tu ituí lú iní pa xpinne laa o ituí lú pur stiidxa' nezalú cani qué runi cre ne cani qué runi jneza la? naa laaca zatui lua inié xpinne laa, dxi guendaniá enda nandxo' sti Bixhoze', ne ca ángel cha'hui'.

## 9

<sup>1</sup> Ne laca na Jesús rabi laa-cabe:

—Gabe ca' laatu, nuu caadxi de cani nuu rarí qué zati dede qué guzulú guni mandar Dios ne enda nandxo' sti'.

*Ra biiya cabe bidxaa Jesús  
(Mt. 17.1-13; Lc. 9.28-36)*

<sup>2</sup> Gudi'di xhoopa gubidxa de ngue yené Jesús Pedru ne Jacobo ne Juan, ne idapa si cabe uyé cabe lu ti dani soo, ne raqué mala biiya cabe ma adxé modo bihuinni Jesús.

<sup>3</sup> Bizaani xhaba be ne uca ni naquichi bé, dede iruti binni guidxilayú nusiquichi lari bia' qué.

<sup>4</sup> Ne biiya ca cayuí né Elías ne Moisés laabe diidxa'.

<sup>5</sup> Oraque na Pedru rabi laabe:

—Maistru, aque galán nuu nu rarí nja'. Ñee zaa ucuí du chonna ranchu huiini la? tobi para lii, tobi para Moisés ne stobi para Elías.

<sup>6</sup> Tantu cadxibi cabe dede nin qué ganna Pedru xi caní'.

7 Ne óraque biseegu ti za laacabe ne ucuá ti ridxi lade za que:

—Ndi nga xiiñe' ni nadxiee'. Laucaa diaga laabe.

8 Oraqueca biiya dxí cabe peru ma qué ñuuya ru cabe iruti' sínunque Jesús si stubi.

9 Ora ziyete cabe lu dani que, gudxi Jesús laacabe cadi güi né di cabe iruti de ni bi'ya cabe, sínunque cueza cabe guiasa si Hombre Biseenda Dios de lade gue'tu'.

10 Ne nga runi gupa cabe ni lade si cabe, peru gunaba diidxa saa cabe ximodo nga na be guiasa be de lade gue'tu'.

11 Oraque rabi cabe Jesús:

—Xiñee na ca maistru de ley zeeda Elías ante gueeda ni nexhe guseenda Dios que ya'.

12 Para na Jesús rabi laa-cabe:

—Dxandí nexhe gueeda Elías primeru para quixhe chaahui irá cosa. Laga xi na lu Xqui'chi Dios de dxa Hombre ni nexhe guseenda Dios que ya'. Ñee cadi na ni zadi'di be ra naná ne zudxii deche binni laabe la?

13 Peru naa rabe laatu ma beeda Elías ne bi'ni cabe laabe ni ucaladxi cabe, casi cá lu Xqui'chi Dios guni cabe laabe.

*Ra bisianda Jesús ti hom-bre huiini riguite binidxaba'*

(Mt. 17.14-21; Lc. 9.37-43)

14 Oraque bigueta cabe ra nuu ca xcaadxi discípulu que ne biiya cabe rí binni laaca'. Ne laca nuu caadxi maistru de ley raqué cacaa yu né ca ca discípulu.

15 Oraque pe ulee lú Jesús zeeda, ne nabé bidxagaya ca binni que ora bi'ya ca laabe, ne yeuxooñe ca' yeugapa diuxi ca laabe.

16 Para rabi be laaca':

—Xi cayaca tu.

17 Oraque na tobi de ca binni nuu raqué:

—Maistru, zedaniá xiiñe ra nuu lu' purti riguite binidxaba laabe ne ma bisaana laabe mudu.

18 Ratiica nuu be rugaze binidxaba ca laabe layú ne riree bupu ruua be ne rixidxi laya be. Ne zacá jma rusi cará stipa stibe. Ma gunaba ca discípulu stiu' nibee ca binidxaba ca de laabe peru qué ñanda.

19 Para na Jesús rabi laa-cabe:

—¡Aque qué runi cre tu xa, binni ca'! Dede padxí naquiiñe guiaana nia laatu ne gune huantar laatu ya'. Latané hombre huiini ca rari'.

20 Para bedané cabe hom-bre huiini que. Casi bi'ya binidxaba que Jesús, bi'ni pur bidii ataque laabe ne bi-abla be layú, canatubi be ne caree bupu ruua be.

21 Oraque na Jesús rabi bixhoze be:

—Padxí ti raca be sicarí ya'.

Para na bixhoze be:

—Dede dxi nahuiini be.

22 Stale tiru riguu binidxaba ca laabe lu gui ne ndaaní nisa para guuti laabe. Nga runi pa zanda gu'nu xiixa la? biá laadu ne ucané laadu.

23 Para na Jesús rabi laabe:

—Naa la? zanda. Lii si nga pa zanda guni cre lu', purti gasti ni nagana para cani runi cre.

<sup>24</sup> Oraque bicaa be ridxi:

—Rune cre, Señor. Ucané naa gune cre jma.

<sup>25</sup> Ne ora bi'ya Jesús nabé ma cabí zisi binni la? udinde né binidxaba que, na:

—Biree, binidxaba mudu ne diaga cuaata'. Naa cayabe lii iree lu'. Bisaana hombre huiini ri' ne ma cadi ibigueta rou' luguiá be.

<sup>26</sup> Oraque bicaa binidxaba que ridxi ne bi'ni pur bidii sti ataque laabe ne biree ze', bisaana laabe casi gue'tu'. Ne stale de ca binni nuu raqué na ma guti be.

<sup>27</sup> Peru guluu ná Jesús ná be, undisa laabe ne bizuhuaa be.

<sup>28</sup> Oraque biuu Jesús ndaani ti yoo, laa si ne ca discípulu sti', ne raqué na ca rabi ca laabe:

—Xiñee laadu qué ñanda nibee du binidxaba ca pue.

<sup>29</sup> Para rabi be laaca':

—Purti para ganda cuee cabe binidxaba casi nga la? naquiiñe guiaana cabe sin go cabe ne ini' né cabe Dios.

### *Bigueta bizeete Jesús zati*

(Mt 17.22-23; Lc. 9.43-45)

<sup>30</sup> Biree si cabe de raqué udi'di cabe Galilea ne qué na Jesús ganna iruti pa nuu raqué.

<sup>31</sup> Purti cusiidi be ca discípulu stibe, ne cayabi be laaca':

—Naa nga Hombre Biseenda Dios. Zutoo cabe naa lu binni guidxilayú, ne

zuuti ca naa, peru lu chonna gubidxa de biiti ca naa la? zabane'.

<sup>32</sup> Peru qué ñene ca laabe ne bidxibi ca ninaba diidxa ca'.

### *Tu laa jma risaca*

(Mt. 18.1-5; Lc. 9.46-48)

<sup>33</sup> Yendá cabe ndaani guidxi Capernaum ne biuu si cabe ndaani yoo, unaba diidxa Jesús laacabe xi diidxa zeda yui' cabe neza.

<sup>34</sup> Peru nin tobi cabe qué niní' cabe, purti ora zeeda cabe neza la? caca yu cabe tuu nga jma risaca lade cabe.

<sup>35</sup> Oraque gurí Jesús ne guridxi ca discípulu sti', ne na rabi laaca':

—Pa nuu tu racala'dxi isaca jma la? cadi guyubi usisaca cabe laa, sínunque usisaca laacabe, ne gaca casi jmozo cabe.

<sup>36</sup> Oraque ucuaa Jesús ti ba'du', bizuhuaa galahui de laacabe ne ucuaa ba'du que guluu ndaani ná' ne na rabi laacabe:

<sup>37</sup> —Tutiica gacané ti ba'du casi ba'du ri' pur naa la? casi ñaca cayuni ni naa, ne tu guni ni naa la? cayuni ni, ni biseenda naa.

### *Ni cadi cucaa lú cayacané*

(Lc. 9.49-50; Mt. 10.42)

<sup>38</sup> Oraque na Juan rabi laabe:

—Maistru, bidu'ya du ti hombre cuzeete lá lu ra cabee binidxaba de binni, peru bicueeza du laabe purti cadi canazá né be laanu.

<sup>39</sup> Para na Jesús rabi laa-cabe:

—Xiñee canaucueeza tu laabe, partí ni cayuni milagru ra uezete la'ya la? qué zanda ucaa lú naa.

<sup>40</sup> Ne tu cadi cucaa lú laanu la? nuu pur laanu.

<sup>41</sup> Tutiica udii laatu neca ti vasu nisa si partí xpinni Cristu laatu la? gabe ca' laatu, qué ziaana ngue sin guaxa.

*Pabiá' naxoo nuu ni guni pur uchee stobi*

(Mt. 18.6-9; Lc. 17.1-2)

<sup>42</sup> Tutiica guni pur uchee tobi de cani nahuiini ni runi cre naa la? jma galán ñaca para laa nugaanda cabe ti guie dani ro' yanni ne nun-daa cabe laa ndaani nisadó'.

<sup>43</sup> Pa nuu xiixa ni cuchiña ná lu lii icoou', ne pur laani chi uchee lu la? bixele ca de laani, partí cadi tan naná zaca para lii uniti lu ni peru gapu enda nabani ni qué zaluxé, bia' nga naná zaca para lii gapu ni racala'dxu que ne cheu' gabiá ra cayaca bele ni qué zanda gyui'.

<sup>44</sup> Raqué qué zará enda nayuudxu' ne qué zyui' gui.

<sup>45</sup> Ne zaqueca pa nuu ra cuchiña ñeeu lii cheu', Peru zucheee pa cheu' raqué la? cadi cheu' diou' partí cadi tan naná zaca para lii guiaanu sin cheu' raqué Peru gapu enda nabani ni qué zaluxé, bia' nga naná zaca para lii cheu' ra racala'dxu cheu' que, ne cheu' gabiá ra cayaca bele ni qué zanda gyui'.

<sup>46</sup> Raqué qué zará enda nayuudxu' ne qué zyui' gui.

<sup>47</sup> Zaqueca pa nuu xiixa ni ruuya lu' ne ruquiinde ni lii gu'nú ni cadi jneza la? bixele de laani partí cadi tan naná zaca para lii ixele lu de laani Peru chu' lu ra runi mandar Dios, bia' nga naná zaca para lii pa uchee lu pur laani ne cheu' gabiá ra cayaca bele ni qué zanda gyui'.

<sup>48</sup> Raqué qué zará enda nayuudxu' ne qué ziuu dxi gyui' gui.

<sup>49</sup> Partí ziaba enda naná luguiá binni casi riaba zidi endaró.

<sup>50</sup> Zidi la? riquiñe ora naxí, Peru pa niniti enda naxí stini la? ximodo nixí ni sti tiru. Zacaca laatu, lagaca casi zidi ni naxí, ti ganda iquiiñe tu ndaani guidxilayú. Ne laibani sin enda ridinde.

## 10

*Xi na Jesús de enda rilaa né xheela'*

(Mt. 19.1-12; Lc. 16.18)

<sup>1</sup> Biree Jesús Capernaum uyé neza Judea ne laca uyé cherica guigu Jordán. Raqué nuu be gurí zisi binni laabe sti tiru, ne bizulú bisiidi be laaca casi runi be.

<sup>2</sup> Ne óraque bidxiña caadxi fariseu ra nuu be, cuyubi ca modo usaba ca laabe pur ni iní' be. Gunaba diidxa ca laabe pa jneza ilaa né ti hombre xheela'.

<sup>3</sup> Para rabi be laaca':  
—Xi bisaana Moisés guni tu.

<sup>4</sup> Oraque na ca':

—Na Moisés zaa usaana cabe xheela cabe Peru gaca divorciar né cabe laa.

<sup>5</sup> Oraque na Jesús rabi laacabe:

—Gudxi Moisés laatu guni tu zacá partí naguidxi ladxi-dó' to.

<sup>6</sup> Perú dxi bizulú bizá' Dios irá xixé cosa la? "bizá' be hombre ne gunaa".

<sup>7</sup> "Pur nga runi zusaana hombre bixhoze ne jñaa ne zadxaaga xheela'."

<sup>8</sup> Ne zacá zeda gaca cabe tobi si, ma cadi chupa cabe sínuque tobi si laacabe.

<sup>9</sup> Nga runi cadi indaa binni ni ma bichaaga Dios.

<sup>10</sup> Biuu si cabe yoo, gunaba ca discípulu laabe gusiene be laaca xii ngue gudxi be ca binni que.

<sup>11</sup> Para rabi be laaca':

—Ora ilaa né ti hombre xheela' ne ichaganá adxé gunaa la? cuchee né xheela'.

<sup>12</sup> Ne pa usaana ti gunaa xheela' ne ichaganá stobi la? laca cuchee ne xheela'.

*Uluu Jesús ndaaya caadxi ba'du'*

(Mt. 19.13-15; Lc. 18.15-17)

<sup>13</sup> Ti dxi bedané cabe caadxi ba'du ra nuu Jesús para quixhe ná luguiá ca'. Peru udinde né ca discípulu que cani bedané laacabe que.

<sup>14</sup> Ne ora bi'ya Jesús xi cayaca la? bidxiichi, ne na:

—Cadi ucueeza tu ca ba'du ca. Zaa gueeda cabe ra nuua' partí stícabé irá ni napa Dios ladxi ná', laacabe ne irá casi laacabe ca.

<sup>15</sup> Ne iruti qué ziuu ra runi mandar Dios pa qué guni cre Dios casi runi cre ti ba'du'.

<sup>16</sup> Oraque ucuua be ca ba'du que, uluu be laaca ndaani ná be ne udixhe ná be luguiá ca', uluu be ndaaya laaca'.

*Ra uni' né ti ricu Jesús*  
(Mt. 19.16-30; Lc. 18.18-30)

<sup>17</sup> Ma chi iree Jesús che sti guidxi ora zeda uxooñe ti hombre ne bizuxibi xañee be na rabi laabe:

—Maistru cha'hui', xi naquiiñe gune para gapa enda nabani ni qué zaluxe.

<sup>18</sup> Para rabi be laa:

—Xiñee ra'bu naa maistru cha'hui'. Iruti ru nacha'hui jma que tobi lucha Dios.

<sup>19</sup> Ma nannu xi na ca mandamiento: "Cadi chu' neu ni cadi xheelu', cadi guuti lu binni, cadi cuana lu', cadi cueeu falsu luguiá stobi, cadi usiguii lu', gunaxhii bixho'zo ne jñoou'."

<sup>20</sup> Para na hombre que:

—Irá nga huayune dede dxi nahuiine, Maistru.

<sup>21</sup> Biiya dxí Jesús laabe ne gunaxhii laabe ne rabi laabe:

—Tobi si riaadxa lii. Guyé bitoo irá ni napu', bidii ca pobre, ne zapu stale ni risaca ibá'. Ne ma cadi lica guíá lu xpida lu', ne dananda naa.

<sup>22</sup> Peru ora bina diaga be xi na Jesús la? ucaná ladxitidó' be partí nabé napa be bidxi-chi, ne triste biree be ze be.

<sup>23</sup> Oraque biiya dxí Jesús irá ladu ne na rabi ca discípulu:

—Aque nagana raca para ca ricu udii ca lugar guni mandar Dios laaca'.

<sup>24</sup> Bidxagayaa ca discípulu ni uní' be que. Peru bigueta rabi be laaca':

—Xiiñe ca', aque nagana na tobi ni nadxii bidxichi guni mandar Dios laa xa.

<sup>25</sup> Jma qué igana tidi ti camellu xa'na ti aguxa' para gudii ti ricu lugar guni mandar Dios laa.

<sup>26</sup> Jma rusi bidxagayaa ca discípulu óraque, ne unaba diidxa saa ca':

—Tu zanda ilá pue.

<sup>27</sup> Para biiya dxí be laaca' ne rabi be laaca':

—Binni la? qué zanda guni ni peru Dios zanda, purtiasti ni nagana para Dios.

<sup>28</sup> Oraque bizulú Pedru na rabi laabe:

—Laadu ya', bisaana du irá ni napa du ne canananda du lii.

<sup>29</sup> Para na be:

—Ma nanna'. Ne tutiica usaana lidxi o bi'chi o biza'na o bixhoze o jñaa o xheela o xiiñi o layú sti pur naa ne pur stiidxa Dios la?

<sup>30</sup> zacaa ti gayuaa tantu de ni bisaana que: yoo, bi'chi', biza'na', jñaa, xiiñi' ne layú, neca zadi'di stale ni nagana. Ne dxi usulú guidxilayú cubila? zapa ti enda nabani ni qué zaluxe.

<sup>31</sup> Peru stale de cani za niru ziaana atrá, ne stale de cani za atrá zazá niru.

*Ra bigueta bizeete Jesús zati*

(Mt. 20.17-19; Lc. 18.31-34)

<sup>32</sup> Ti dxi ze Jesús Jerusalén, laa ne cani rizá né laa. Peru za niru be lú ca'. Bidxagayaa ca discípulu ze be Jerusalén,

ne zaqueca nanda xcaadxibinni atrá, zeda dxibi ca'. Oraque guridxi be idubi doce discípulu stibe que ti ladu, ne bizulú byui' né be laaca xi chi aca be.

<sup>33</sup> Rabi be laaca':

—Laguuya mayaca guiu' nu Jerusalén, ne ma chi naaze cabe naa. Naa nga Hombre Biseenda Dios. Zutoo cabe naa lu xaique sti ca sacerdote ne ca maistru de ley, ne zaguixhe ca gate' ne zutiidi ca naa lu ná cani cadi judiú,

<sup>34</sup> ne zuni burla ca ngue naa. Zuniná ca naa ne zuchá xhinni ca lade' ne zuuti ca naa. Peru lu chonna gubidxa de biiti cabe naa zabane'.

*Ra bidxiña ca xiiñi Zebedeu ra nuu Jesús*  
(Mt. 20.20-28)

<sup>35</sup> Oraque bidxiña Jacobo ne Juan xiiñi Zebedeu ra nuu Jesús ne na ca rabi ca laabe:

—Maistru, rinaba du gu'nu ni chi naba du lii ri'.

<sup>36</sup> Para rabi be laaca':

—Xi racala'dxi tu guna para laatu ya'.

<sup>37</sup> Oraque rabi ca laabe:

—Ora ma zuba lu de rey ne ma cayuni mandar lu irá la? udiuu lugar cui du cue' lu', tobi ladu derechu, stobi ladu biga'.

<sup>38</sup> Para rabi be laaca':

—Nin qué ganna tu xi canaba tu. Nee zanda gacaná tu casi chi gacana'ya', ne tidi tu ni chi tide ri la?

<sup>39</sup> Para na ca':

—Zanda.

Oraque rabi be laaca':

—Dxandí zacaná tu ne zadi'di tu casi ni chi tide ri'.

<sup>40</sup> Peru para cui tu cuee',  
ladu derechu ne ladu biga la?  
cadi nexhe di nga ladxi naya  
para gudiee tuuxa, sínunque  
maca nexhe tuu nga icaa ni.

<sup>41</sup> Ora bina diaga xhii  
discípulu que xi na cabe la?  
bidxiichi né ca laacabe.

<sup>42</sup> Peru guridxi Jesús irá  
cabe ne rabi laacabe:

—Laatu nanna tu ximodo  
runi cani runi mandar  
ndaani guidxilayú, runi stica  
irá binni ni runi mandar  
ca'. Ne cani risaca lade cabe  
la? laca racala'dxi ca guni  
mandar ca'.

<sup>43</sup> Peru laatu, cadi guni  
tu zacá lade tu, sínunque  
tu gacala'dxi isaca jma la?  
napa xidé gaca casi jmozo ca  
xcaadxi.

<sup>44</sup> Ne zaqueca guni tutiica  
gacala'dxi sa niru,

<sup>45</sup> casi huayune lade tu.  
Naa nga Hombre Biseenda  
Dios ne benda cadi para  
gacané cabe naa sínunque  
para gacanía laacabe ne para  
gudiee xpida ti ganda ilá  
stale binni.

*Ra bisianda Jesús Bartimeu*  
(Mt. 20.29-34; Lc. 18.35-  
43)

<sup>46</sup> Oraque yendá cabe  
ndaani guidxi Jericó ne ra  
biree Jesús de ndaani guidxi  
que biree né ca discípulu  
sti', ne nanda stale binni  
laaca'. Ne uria neza ra zidi'di  
cabe que zuba ti hombre  
nacheepa lú, lá Bartimeu,  
xiiñi Timeu, canaba guna.

<sup>47</sup> Ne ora bina diaga be  
Jesús de Nazaret ngue zidi'di

raqué la? bizulú be bicaa be  
ridxi:

—¡Jesús, Xiiñi David, biá  
la' naa!

<sup>48</sup> Stale binni udinde né  
laabe para nigani be, peru  
laga jma rusi bicaa be ridxi:

—¡Biá naa, Xiiñi David!

<sup>49</sup> Oraque bizuhuaa dxí  
Jesús ne na:

—Lacuidxi laabe.

Para uyé tobi na rabi laabe:

—Cadi idxibi lu', bizuhuaa,  
cabidxi be lii.

<sup>50</sup> Oraque bilaa be xhaba  
be layú ne biasa guxooñe be  
bidxiña be ra nuu Jesús.

<sup>51</sup> Para na Jesús rabi laabe:

—Xi racala'dxu gune para  
lii.

Para na be:

—Maistru, racaladxe in-  
aya'.

<sup>52</sup> Oraque na Jesús rabi  
laabe:

—Ma zanda che lu'. Ma  
bianda lu' partí bini cre lu'.

Ne oraqueca ma gunda  
uná be, ne yenanda be Jesús  
neza ze'.

## 11

*Biuu Jesús Jerusalén*  
(Mt. 21.1-11; Lc. 19.28-40;  
Jn. 12.12-19)

<sup>1</sup> Ora bidxiña cabe gaxha  
de Jerusalén zidi'di cabe  
Betfagé ne Betania. Nuu  
cabe nezalú dani Olivo,  
biseenda Jesús chupa de ca  
discípulu sti',

<sup>2</sup> na rabi laaca':

—Laché guidxi huiini ni  
nuu gaxha ca, ne ora chindá  
tu raqué la? zadxela tu  
ti burru huiini cá yaga ne

iruti huagui'ba laame. Laux-hegue laame ne latané laame rari'.

<sup>3</sup> Ne pa chu' tu inaba diidxa laatu xiñee cuxhegue tu laame la? lagabi laaca caquiiñe Señor laame. Ne casi iluxe me maca chi saana tu laame.

<sup>4</sup> Biree ca discípulu que ze ca', ne bidxela ca burru huiini que cá yaga ra puerta uria neza, ne bixhegue ca laame.

<sup>5</sup> Peru óraque na caadxi de cani nuu raqué rabi laacabe:

—Xi cayuni tu. Xiñee cuxhegue tu burru huiini ca.

<sup>6</sup> Para gudxi cabe laaca ni gudxi Jesús laacabe que. Ne ma qué niní' ru ca gastí'.

<sup>7</sup> Oraque yené cabe burru huiini que ra nuu Jesús ne gudixhe cabe xhaba cabe deche me para gudxi'ba Jesús laame.

<sup>8</sup> Ne stale binni bichiaa xhaba lu neza ra zidi'di Jesús, ne nuu tu bichuugu rama ne udixhe ni lu neza ra zidi'di be.

<sup>9</sup> Ne cásica cucaa ca binni ni za niru ridxi la? zaqueca cucaa cani nanda atrá que ridxi, na ca':

—¡Viva! Lausisaca ni biseenda Dios.

<sup>10</sup> Lausisaca ni zeda guni mandar casi bini mandar rey David, bixhoze gola canu. Lausisaca Dios ni dxi'ba ibá'.

<sup>11</sup> Ora yendá Jesús ndaani guidxi Jerusalén, biuu ndaani yu'du ro'. Biiya dxí irá ladu raqué, ne óraque biree ze Betania, laa ne ca discípulu sti', partí ma huadxí ngue.

*Ra udinde né Jesús yaga du'ga'*

(Mt. 21.18-19)

<sup>12</sup> Sti dxi que ora biree cabe de Betania ma candaana Jesús.

<sup>13</sup> Ne óraque biiya be zuhuua ti yaga du'ga' zitu huiini de raqué, naze bandaga lú, para yeguuya be pa cá du'ga lú ni. Peru cadi cá di du'ga', puru si bandaga napa ni partí cadi xhi ni ngue.

<sup>14</sup> Para uní' né be du'ga que rabi be laa:

—Qué ziuu dxi ru go tuuxa cuananaxhi stiu'.

Ne bina diaga ca discípulu ni uní' be que.

*Bisiá Jesús yu'du ro'*

(Mt. 21.12-17; Lc. 19.45-48; Jn. 2.13-22)

<sup>15</sup> Oraque yendá cabe Jerusalén. Ne casi biuu Jesús ndaani yu'du ro' bizulú uladxi cani cutoo raqué ne cani cazi', ne bitiixhi jmexa cani cuchaa bidxichi, ne xpangu cani cutoo paloma.

<sup>16</sup> Ne qué nudii be lugar nidi'di né ca xiixa ndaani yu'du que.

<sup>17</sup> Ne bisiidi be laaca na be rabi be laaca':

—Lu Xqui'chi Dios cá: "Lidxe nuu para iní' né irá binni naa ndaani"; peru laatu ma bi'ní tu ni lidxi gubaana'.

<sup>18</sup> Ora bina diaga ca xaíque sti ca sacerdote ne ca maistru de ley ni uní' be que la? bizulú ca biyubi ca modo gati be. Cadxibi ca laabe partí cadxagayaar irá binni ni cusiidi be.

<sup>19</sup> Peru casi bixhinni biree  
be ndaani guidxi que.

*Ra bibidxi yaga du'ga'  
(Mt. 21.20-22)*

<sup>20</sup> Sti dxi que siadó' ro'  
udi'di cabe ra nuu dxa yaga  
du'ga que ne ma bibidxi dede  
xcu ni.

<sup>21</sup> Ne óraque bietenala'dxi  
Pedru, para na rabi laabe:

—Maistru, biaa gu'yu ma  
bibidxi dxa yaga du'ga ni  
nou' ma cadi icá ru du'ga lú  
que.

<sup>22</sup> Para na be rabi be laaca':  
—Lagapa fe ne Dios.

<sup>23</sup> Purti gabe ca' laatu, tu  
tiica gabi dani ri iree de  
ra nuu, chi guiaba ndaani  
nisadó', ne qué gapa duda  
ndaani ladxidó', sinuque guni  
cre zaca ni ma uni' que la?  
zaca ni.

<sup>24</sup> Nga runi cayabe laatu,  
irá ni inaba tu ora iní' né tu  
Dios zacaa tu, peru pa guni  
cre tu zaca ni.

<sup>25</sup> Ne ora caní' né tu Dios,  
pa guietenala'dxi tu nuu tu  
bichee né laatu la? laguni  
perdonar laa, ti guni per-  
donar Bixhoze tu ni nuu ibá'  
laatu ni huachee né tu laa.

<sup>26</sup> Purti pa qué guni per-  
donar tu stobi la? nin Bix-  
hoze tu ni nuu ibá' qué zuni  
perdonar laatu.

*Xiñee cayuni Jesús ni  
cayuni*

*(Mt. 21.23-27; Lc. 20.1-8)*

<sup>27</sup> Oraque yendá cabe  
Jerusalén, biuu Jesús ndaani  
yu'du ro', ne raqué canazá  
be beeda ca xaíque sti ca  
sacerdote ne ca maistru de  
ley ne ca xaíque sti guidxi ra  
nuu be

<sup>28</sup> ne rabi ca laabe:  
—Tu naca lu para cayu'nu  
irá ni cayu'nu ri' o tu gudxi lii  
gu'nu cani.

<sup>29</sup> Para rabi be laaca':  
—Naa laca napa tobi ni in-  
aba diidxa laatu ne pa gabi  
tu ni naa la? óraque zabe  
laatu tu naca' para cayune  
cani cayune ri'.

<sup>30</sup> Lagabi naa, tu biseenda  
Juan beda nduu nisa, Dios la?  
o binni guidxilayú.

<sup>31</sup> Oraque bizulú ucuaa yu  
né cabe ni lade cabe, na cabe:  
—Xi gabi nu laabe. Pa iní  
nu Dios biseenda Juan la?  
zabi be laanu xiñee qué ñuni  
cre nu.

<sup>32</sup> O zabi nu laabe binni  
guidxilayú biseenda Juan la?

Peru nin ngue qué na cabe  
iní' cabe purti nanna cabe  
napa ca binni que Juan de  
profeta sti Dios.

<sup>33</sup> Ni bi'ni ti cabe la? rabi  
cabe Jesús:

—Qué ganna du.  
Para na Jesús rabi laacabe:

—Nin naa qué zabe laatu  
tu gudxi naa gune ni cayune  
ri'.

## 12

*Sti ca hombre qué iquiñé'  
(Mt. 21.33-46; Lc. 20.9-19)*

<sup>1</sup> Oraque bizulú Jesús byui'  
né laacabe diidxa peru puru  
ne ejemplu, na rabi laacabe:

—Guyuu ti hombre  
bizuhuaa stale yaga uvas lu  
layú sti' ne guluu le' ni ne  
bi'ni ti pila para ixii uvas que  
ndaani'. Ne laca bicuí be ti  
torre ra guiaana ni gapa layú  
que.

Biluxé bi'ni si be ni, bisaana né be ni caadxi hombre gapa ni, ne biree be ze be zitu.

<sup>2</sup> Ne dxi ma gunda dxi irugu uvas que la? biseenda be ti jmozo be ra nuu ca hombre ni cayapa jlayú be que para chi caa ni raca caber laabe.

<sup>3</sup> Peru casi bi'ya ca hombre que jmozo be la? ucuaa ca laa udiñe ca' ne biseenda ca laa nisi ná.

<sup>4</sup> Bigueta biseenda be sti mozo stibe, ne ngue ma ucuaa ca hombre que laa bichá ca guie laa ne undaa ca ique ne uluu dí ca laa.

<sup>5</sup> Bigueta biseenda ru be stobi ne ngue ma biiti cabe laa. Bigueta biseenda be xcaadxi, peru udiñe ca hombre que caadxi ne biiti ca xcaadxi.

<sup>6</sup> De raqué ma xiiñi si be biaana, ne nabé nadxii be laa. Peru últimu na be: "Chi useenda xiiñe ri', zanda ca gapa xpia' cabe ne laa."

<sup>7</sup> Peru ora bi'ya cani cayapa layú stibe que xiiñi be la? na ca': "Ndi nga ni guiaana né irá ni. Laguuti laa ti guiaana né nu ni laanu."

<sup>8</sup> Oraque ucuaa ca hombre que xiiñi be que biiti ca' ne ulee ca laa de ndaani ñaa que, yesa'bi ca laa.

<sup>9</sup> Yanna ya', xi na tu guni xpixuaana layú que. Zeeda ne zunitilú ca hombre que ne zudii layú que adxé binni.

<sup>10</sup> Nee cadi ma biinda tu lu Xqui'chi Dios ra cá ca diidxa ri la?

Guie ni bisa'bi cani cucuí yoo que,

guie que pe naaze yoo que yanna.

<sup>11</sup> Dios bi'ni ni, ne para laanu ma enda ridx-agayaa ni.

<sup>12</sup> Oraque ucalá'dxi cabe ninaaze cabe Jesús partí nanna cabe gudixhe ejemplu que para laacabe. Peru qué ñuni cabe ni partí ridxibi cabe ca binni que. Para biree cabe ze cabe.

*Enda riguixe impuestu  
(Mt. 22.15-22; Lc. 20.20-26)*

<sup>13</sup> Ratu si que la? biseenda cabe caadxi fariseu ne caadxi xpinni Herodes para inaaze ca laabe ra iní be xiiixa.

<sup>14</sup> Para beeda ca ngue ra nuu be ne na ca':

—Maistru, nanna du riní lu ni dxandí' ne qué rulabi lu ni iní binni partí qué ruya lu xi naca binni, sínunque jneza rusiidi lu neza sti Dios. Nee jneza quixe cabe impuestu lu ná rey César la? o co'. Zaguixe nu la? o qué zaguixe nu.

<sup>15</sup> Peru maca nanna be cuyubi si ca gusaba ca laabe. Para rabi be laaca':

—Xiñee racala'dxi tu usaba tu naa ndaani trampa stitu. Latané ti moneda ca naa guuya'.

<sup>16</sup> Oraque bedané ca ni ra nuu be ne ora bi'ya be ni la? rabi be laaca':

—Tu cá lú ni.

Para na ca':

—César.

<sup>17</sup> Oraque rabi be laaca':

—Laudii César sti César, ne laudii Dios sti Dios. Bidxagayaa ca modo bicabi be laaca'.

*Pa dxandí zabani gue'tu'  
(Mt. 22.23-33; Lc. 20.27-40)*

<sup>18</sup> Oraque beeda caadxi saduceu ra nuu Jesús. (Ca saduceu qué runi cre ca pa ribani gue'tu'.) Ne na ca rabi ca laabe:

<sup>19</sup> —Maistru, bicaa Moisés lu gui'chi': "Pa chu' ti hombre ichaganá' ne gueda gati qué ñapa xiiñi la? naquiiñe ichaganá bi'chi be xheela be, ne gapa xiiñi casi ñaca xiiñi be."

<sup>20</sup> Guyuu gadxe bi'chi'. Bichaganá lugola que ne guti, qué ñapa xiiñi'.

<sup>21</sup> Oraque bichaganá rairopa que xheela ni guti que, ne laca guti ngue ne qué ñapa xiiñi'. Ne zaqueca bizaaca raguionna que.

<sup>22</sup> Ne idubi gadxe cabe bichaganá cabe gunaa que ne guti cabe, peru nin tobi cabe qué ñapa cabe xiiñi cabe. Ne óraque guti gunaa que.

<sup>23</sup> Yanna, dxi ibani gue'tu ya', uná de laacabe xheela gunaa que, partí idubi gadxe cabe bichaganá cabe laa.

<sup>24</sup> Oraque na Jesús rabi laa-cabe:

—Cuchee tu, ne cayuni tu zacá partí qué runibiá' tu Xqui'chi Dios ne qué runibiá' tu enda nandxo' stibe.

<sup>25</sup> Partí dxi ibani binni sti tiru la? nin hombre nin gunaa qué zachaganá', sínúque zaca cabe casi ca ángel ni nuu ibá'.

<sup>26</sup> Ne de enda ribani gue'tu la? ñee qué huayuunda tu gui'chi ni bicaa Moisés, modo uni' né Dios laa de lu ti yaga caya'qui la? Na Dios rabi laabe: "Naa nga Dios sti Abraham ne sti Isaac ne sti Jacob." Ne dxi uni' Dios nga la? ma guti cabe para binni, peru para Dios nabani ru cabe.

<sup>27</sup> Partí Dios cadi Dios sti cani ma guti laa, sínúque Dios sti cani nabani ne zacá ri-huinni dxichi ca cuchee tu.

*Mandamientu ni jma risaca  
(Mt. 22.34-40)*

<sup>28</sup> Guyuu diaga tobi de ca maistru de ley modo byui' né be ca saduceu diidxa ne nanna jneza bicabi be. Para beeda ra nuu be ne gunaba diidxa laabe:

—Uná nga mandamientu ni jma risaca.

<sup>29</sup> Para rabi be laa:

—Ndi nga mandamientu ni jma risaca lade irá', ne sicarí nga gudxi Moisés ni ca binni Israel chique: "Binni Israel ca', laucaa diaga, Señor Dios si stinu nga tobi lucha Dios.

<sup>30</sup> Nga runi gunaxhii Dios stiu' de idubi ladxidó' lo' ne de idubi xhialma lu' ne de idubi xquenda biaani lu' ne de irá stipa stiu'." Nga nga mandamientu ni jma risaca.

<sup>31</sup> Ne rairopa ri zeda gaca casi laani: "Gunaxhii stobi cásica nadxii lu lii." Gasti ru mandamientu jma risaca que iropa mandamientu ca.

<sup>32</sup> Oraque na maistru de ley que rabi Jesús:

—Maistru, jneza uní' lu'. Ti Dios si nuu ne gasti ru stobi jma que laabe.

<sup>33</sup> Ne de enda ranaxhii Dios de idubi ladxidó' ne idubi xquenda biaani ne de idubi xhialma ne de irá stipa stí', ne ganaxhii stobi cásica nadxii laa la? nga nga ni jma risaca que irá mani ni ruuti cabe ne ruzaaqui cabe para Dios ne irá ofrenda ni rudii cabe laa.

<sup>34</sup> Ne ora bi'ya Jesús jneza bicabi be laa la? na rabi laabe:

—Ma nuu lu gaxha para udiiu lugar guni mandar Dios ndaani ladxidó' lo'.

Ne dede dxi que de irá bidxibi ninaba diidxa ru Jesús xiixa.

*Tu xiñi Cristu*  
(Mt. 22.41-46; Lc. 20.41-44)

<sup>35</sup> Ra cusiidi Jesús ndaani yu'du ro' na:

—Ximodo na ca maistru de ley xiñi David Cristu ya'.

<sup>36</sup> Purti dede David dxi bisiní' Espíritu Santu laa, na:  
Na Dios rabi Señor stinne'  
"Gurí cuee dede ora ma  
gudixhe dxie cani  
nanala'dxi lii xañee  
lu'."

<sup>37</sup> Yanna ximodo zanda aca Cristu xiñi David pa dede David rabi laa Señor sti ya'.

Ne nabé bicaa diaga irá binni que Jesús.

*Bidxiiba Jesús donda ique  
ca maistru de ley*

(Mt. 23.1-36; Lc. 11.37-54;  
20.45-47)

<sup>38</sup> Lu ra cusiidi Jesús que na:

—Laguuya gá laatu ne ca maistru de ley purti riula'dxi ca acu ca lari de yanni ñee ca' ne chu' tu ugapa diuxi laaca lu calle.

<sup>39</sup> Ne ora che ca ndaani yu'du', ruyubi ca banca ni jma galán cui ca', ne zaqueca ra chító ca', riula'dxi ca cui ca lugar ni nuu para ca binni risaca.

<sup>40</sup> Raxha ca lidxi cani ma guti xheela' ne óraque para cadi ului' pa laaca bi'ní ca ni, riní' né ca Dios xadxí. Nabé naná zusaba ná Dios laacabe.

*Tobi ni dxandí bidii de  
idubi ladxidó'*  
(Lc. 21.1-4)

<sup>41</sup> Ti tiru zuba Jesús ndaani yu'du ro', gaxha de ra nuu caja ra rusaba cabe vueltu. Cayuuya modo cusaba irá binni vueltu ndaani caja que ne pabiá' stale bidxichi cusaba ca ricu.

<sup>42</sup> Ne óraque biuu ti gunaa pobre, ma guti xheela', ne bisaba chupa de gaayu huiini ndaani caja que.

<sup>43</sup> Oraque guridxi Jesús ca discípulu stí' ne na rabi laaca':

—Jma stale bidii viuda ri' que irá ni caguu bidxichi ndaani caja ca.

<sup>44</sup> Purti ca xcaadxi ca la? cudii ni riaana lu stica'. Peru laabe, bidii be de irá ni napa be para tidi né be dxi.

## 13

*Na Jesús zaxá yu'du ro'*  
(Mt. 24.1-2; Lc. 21.5-6)

<sup>1</sup> Ora ziree Jesús ndaani yu'du ro' na tobi de ca discípulu sti rabi laa:

—Maistru, biiya pabiá' ca guie ca ne pabiá' ca yoo ca.

<sup>2</sup> Peru na Jesús rabi laabe:

—Ruuyu ca yoo ro' ca la? nin ti guie qué ziaana luguiá sti guie rari'. Irá ni zaxá.

*Xi gaca ante iluxe guidxi-layú*

(Mt. 24.3-28; Lc. 21.7-24; 17.22-24)

<sup>3</sup> Ne uyé cabe lu dani Olivo ni nuu ladu nudxii lú yu'du ro' que. Raqué zuba be bidxiña Pedru, Jacobo, Juan ne Andrés ra nuu be, laasi ca' ne laabe, na ca rabi ca laabe:

<sup>4</sup> —Racala'dxi du ga'bu laadu padxí aca irá nga ni bizeete lu que, o xi seña udiu laadu para ganna du ma chi aca irá cani.

<sup>5</sup> Para rabi be laaca':

—Laguuya gá cadi chu' tu usiguii laatu.

<sup>6</sup> Purti zeeda stale ni usiguii, zaná ca laaca nga Cristu. Ne zabee chu ca stale binni.

<sup>7</sup> Ora guna diaga tu uzeete cabe cayaca guerra o nabé naxoo nuu guerra la? cadi idxibi tu, purti napa ni xidé aca ni zacá peru cadi ma chi iluxe di ni ngue.

<sup>8</sup> Purti zucaa lú ti guidxi sti guidxi ne ti gobiernu sti gobiernu, ne zaca xu stale lugar ne zaca gubiña ne bulla, ne ora aca irá nga la? deru cuzulú yuuba que nga.

<sup>9</sup> Peru lagapa laatu, purti ziné cabe laatu ra nuu ca justicia stícabé ni nuu ndaani yu'du', ne zaguiñe cabe laatu raqué. Ne pur naa napa tu xidé uzuhuaa tu nezalú

gobernador ne rey ne zacá zanda güi né tu laaca stiidxa'.

<sup>10</sup> Purti napa xidé ireeche stiidxa Dios irá guidxi ante initilú guidxilayú.

<sup>11</sup> Ne ora chiné cabe laatu ra nuu justicia la? cadi chu' tu xizaa ne cadi indaa ique né tu xi iní tu, purti cadi laadi tu nga chi iní tu sínunque Espíritu Santu. Lainí' ni gabi Espíritu Santu laatu óraque.

<sup>12</sup> Ziuu tu guluí' laca bi'chi para gati', ne ziuu tu guluí' xiñi para gati', ne ziuu tu ucaa lú bixhoze ne jñaa ne zudii laacabe para gati cabe.

<sup>13</sup> Irá binni zaca nanala'dxi laatu ti xpinne laatu; peru tu qué ixhacala'dxi dede dxi iluxe irá ni la? zalá.

<sup>14</sup> Chiqué bicaa profeta Daniel de dxa ni runi yuudxu ne ni runitilú que. Ora gu'ya tu chu' ngue ra cadi nexhe chu' la? óraque naquiiñe iree cani nuu Judea, uxooñe ca', quiba ca lu dani. (Tu guunda ndi la? guiene.)

<sup>15</sup> Pa nuu tuuxa dxi'ba ique yoo dxi aca ni que la? cadi guiete chu' ndaani yoo chi caa xiixa,

<sup>16</sup> ne pa nuu tuuxa rañaa la? cadi ibigueta yoo para chi topa xhaba.

<sup>17</sup> Pobre de ca gunaa ni naca xiñi ne ni napa ba'du cayadxi ca dxi que.

<sup>18</sup> Lainaba lu Dios, cadi gaca ni ca dxi nananda ti qué gapa tu xidé uxooñe tu lu nanda.

<sup>19</sup> Purti nabé naná zaca ni ca dxi que. Qué huayuu dxi aca ni naná bia' qué, dede

dxi bizá' Dios guidxilayú, ne ma qué ziuu ru dxi aca ni sti tiru.

<sup>20</sup> Pa qué nucueeza Dios lu ni la? iruti nilá, peru zucueeza be lú ni pur ca xpinni be, cani gulí be.

<sup>21</sup> Pa chu' tu gabi laatu ca dxi que: "Laguuya', rari nuu Cristu" o "Rarica nuu be" la? cadi guni cre tu laaca'.

<sup>22</sup> Purti zeeda stale tu na Cristu laa Peru cadi dxandí', ne stale tu na profeta laa, Peru cadi dxandí'. Ne zuni ca seña ne milagru para quite ca binni ne pa ñanda si dede ne cani ma ulí Dios.

<sup>23</sup> Peru laatu, lagataná partu maca gudxe ni laatu.

*Modo ibigueta Hombre Biseenda Dios  
(Mt. 24.29-35, 42-44; Lc. 21.25-36)*

<sup>24</sup> Peru tidi si ca dxi de enda naná que la? zacahui lú gubidxa ne qué zuzaani bee.

<sup>25</sup> Ne ziaba ca luceru de ibá', ne zaniibi dxacha irá ni nuu ibá'.

<sup>26</sup> Oraque zuuya cabe Hombre Biseenda Dios zeeda lade za ne stale poder ne enda nandxó'.

<sup>27</sup> Ne zuseenda ca ángel sti para utopa ca xpinni ni nuu idubi naca guidxilayú, cásica cani nuu gaxha zaqueca cani nuu zitu.

<sup>28</sup> Laucaa diaga ejemplu sti du'ga ri': ora ihuinni rama ri'ni', ne ma cabe ni bandaga la? ma nanna cabe ma zeeda tiempu nandá'.

<sup>29</sup> Zacaca nga ora gu'ya tu aca irá ni gudxe laatu ca la?

ganna tu ma zeda dxiña dxi que, ma nuu ni gaxha.

<sup>30</sup> Gabe ca' laatu, zaca irá nga ante gati ca binni nuu yanna ri'.

<sup>31</sup> Ziuu dxi initilú ibá' ne guidxilayú Peru stiidxa qué ziaana sin gaca'.

<sup>32</sup> Peru padxí ne pora la? iruti ganna, nin ca ángel ni nuu ibá', dede nin naa qué ganna', sínunque Bixhoze sia' nga nanna.

<sup>33</sup> Nga runi lachuu listu ne lagataná. Lainí' né Dios partu qué ganna tu padxí ganda ora guenda'.

<sup>34</sup> Zeda aca ni casi ti hombre ni che viaje zitu. Ante iree be de ralidxi be la? rusaana be xhiiña be lú ná ca jmozo be, rabi be cada tobi xi guni, ne rabi be ni rapa raqué gataná, cadi quedandá be laa nisiaasi'.

<sup>35</sup> Nga ca laatu, lagataná partu qué ganna tu pora guenda', pa casi guiaazi gubidxa o galaa gueela o telayú o siadó'.

<sup>36</sup> Cadi mala quedandaya laatu nisiaasi tu.

<sup>37</sup> Ni cayabe laatu ri la? cayabe irá binni: chu' listu.

## 14

*Udixhe cabe inaaze cabe Jesús*

*(Mt. 26.1-5; Lc. 22.1-2; Jn. 11.45-53)*

<sup>1</sup> Ma xhupa si gubidxa cayaadxa para ganda laní pascua, ne saa ra ro cabe pan sin levadura. Ne ma cuyubi si ca xaíque sti ca sacerdote ne ca maistru de ley quixhe

ca trampa Jesús para inaaze  
ca laabe ne guuti ca laabe.

<sup>2</sup> Peru na ca pa ganda cadi  
gaca ni ndaani pe saa que, ti  
cadi cui zisi binni.

*Bichá ti gunaa nisa rindá'  
naxhi ique Jesús*

(Mt. 26.6-13; Jn. 12.1-8)

<sup>3</sup> Nuu Jesús Betania ralidxi  
Simón ni gupa lepra que. Ne  
laga zuba be ruua mexa',  
beeda ti gunaa bedané ti  
frascu dxa de aceite rindá'  
naxhi ni nabé risaca. Ne  
gundaa frascu que bichá  
aceite que ique be.

<sup>4</sup> Ne bidxiichi caadxi de  
cani nuu raqué ne uní' saa  
ca', na ca':

—Xiñee biniti si aceite  
rindá' naxhi ri'.

<sup>5</sup> Purti ñanda nidoo ni  
chonaa gayuua denariu para  
ñaazi lú ca pobre.

Para gudinde né cabe gu-  
naa que.

<sup>6</sup> Peru na Jesús rabi laa-  
cabe:

—Zaa nuu be. Xiñee  
cuchiñia tu laabe. Jneza ni  
bi'ni be ri para naa.

<sup>7</sup> Ca pobre la? qué ziuu  
dxi guiaadxa ca lade tu, ne  
ora tiica gapa tu gana zanda  
acané tu laaca', peru naa la?  
zadxiña dxi ma qué ziuaa nia  
laatu.

<sup>8</sup> Ne laabe ma bi'ni be biá'  
gunda. Necá ca'ru ganda ora  
igaache', ma bichá be aceite  
rindá' naxhi ri lade'.

<sup>9</sup> Gabe ca' laatu, ratiica  
güi cabe stiidxa Dios ndaani  
idubi naca guidxilayú ri',  
zuzeete cabe ni bi'ni be, ti  
cadi guiaanda be.

*Ra yeutoo Judas Jesús*  
(Mt. 26.14-16; Lc. 22.3-6)

<sup>10</sup> Oraque uyé Judas Is-  
cariote, tobi de lade doce  
discípulu stibe que, ra nuu  
ca xaíque sti ca sacerdote,  
yeutoo Jesús.

<sup>11</sup> Ne ora bina diaga cabe  
xi na Judas la? bieche cabe  
ne bidii stiidxa cabe laa icaa  
bidxichi. Ne dede dxi que,  
ma cuyubi si Judas ximodo  
ganda uluí' laacabe Jesús.

*Ra gudó xhi né Jesús ca  
discípulu sti'*

(Mt. 26.17-29; Lc. 22.7-23;  
Jn. 13.21-30; 1 Co. 11.23-26)

<sup>12</sup> Ne primé ca dxi bizulú  
saa ra ro cabe pan sin  
levadura, dxi ruuti cabe  
dendxu para pascua que, na  
ca discípulu rabi laabe:

—Paraa racala'dxu chi  
guni chaahui du para go xhi  
lu pascua ri'.

<sup>13</sup> Para na be rabi be chupa  
de ca discípulu que:

—Laché ndaani guidxi.  
Raqué zadxaaga tu tobi  
hombre ziné ti rii nisa, ne  
lachinanda laa.

<sup>14</sup> Laguiuu ra guiuu be,  
lagabi xpixuaana yoo que:  
“Na Maistru uná nga cuartu  
ra go xhi né ca discípulu pas-  
cua ri’.”

<sup>15</sup> Ne zuluí' be laatu ti  
cuartu xilaga ni nuu luguiá'  
ne maca nuu ni listu. Raqué  
laguni chaahui para laanu.

<sup>16</sup> Para biree ca discípulu  
que ze', ne yendá ca ndaani  
guidxi, ne casi gudxi Jesús  
laaca que, zaqué biree ni.  
Bidxela ca ni, ne gudixhe  
chaahui ca endaró xhi para  
pascua que.

<sup>17</sup> Ne huaxhinni que la? bedané be ca discípulu stibe.

<sup>18</sup> Gurí cabe ruaa mexa' ne bizulú cayó cabe. Para rabi be laaca':

—Gabe ca' laatu, tobi de laatu ni cayó né naa rari', zutoo naa.

<sup>19</sup> Oraque ucaná ladxidó' cabe ne cada tobi na rabi laabe:

—Ñee naa la?

Ne stobi na:

—O naa.

<sup>20</sup> Para rabi be laaca':

—Laabe nga tobi de lade cani cugadxe né naa pan ndaani bladu ri'.

<sup>21</sup> Naa nga Hombre Biseenda Dios, ne napa xidé gate' casi cá lu Xqui'chi Dios de naa. Peru gapa gá si ni utoo naa que laa. Jma galán ñaca para laa pa qué ñale.

<sup>22</sup> Ne ra cayó cabe que, gucuua Jesús ti pan, guluu ndaaya ni, para gundaa ni ne bidii ni laacabe. Ne na rabi laacabe:

—Laicaa. Ndi nga cuerpu stinne'.

<sup>23</sup> Oraque ucuaa be ti copa, ne bidii be diuxquixe Dios, para bitiidi be ni lu ná cabe ne irá cabe güe' cabe ruaa copa que.

<sup>24</sup> Ne laca gudxi be laaca':

—Ndi nga rini stinne ni chi ixii pur stale binni, ne ra ixii ni zaguixhe Bixhoze ti modo cubi chu' né binni laa tobi si.

<sup>25</sup> Ne gabe ca' laatu, ma qué zee rua' nisa uvas dede ora ganda dxi guee ni sti tiru ra runi mandar Dios.

<sup>26</sup> Biluxe biinda si cabe ti cantu, para biree cabe ze cabe lu dani Olivo.

*Na Jesús zaní' Pedru qué runibiá' laa*

(Mt. 26.30-35; Lc. 22.31-34; Jn. 13.36-38)

<sup>27</sup> Oraque na Jesús rabi laabe:

—Pur irá ni chi gaca yanna gueela la? zusaana tu naa. Purti sicarí cá lu Xqui'chi Dios: "Zunena'ya pastor sti ca dendxu' ne zareche ndase ca'."

<sup>28</sup> Peru dxi guiasa de ladegue'tu la? ziaa Galilea ne raqué cueza laatu.

<sup>29</sup> Oraque na Pedru:

—Neca irá cabe usaanaa cabe lii peru naa qué zusaana dia' lii.

<sup>30</sup> Para na Jesús rabi laabe:

—Gabe ca' lii, yanna gueela ca, ante gu'nda galluchupa tiru la? chonaa tiru zaníu' qué runibióu' naa.

<sup>31</sup> Peru qué ñaanaa dxi be na be:

—Neca napa xidé gate nia lii peru qué ziuu dxi inié qué runebia'ya lii.

Ngue ca na irá cabe.

*Getsemaní*

(Mt. 26.36-46; Lc. 22.39-46)

<sup>32</sup> Yendá Jesús ne ca discípulu sti' ti lugar lá Getsemaní. Para rabi be ca discípulu que:

—Lacuí rari', laga chi inié nia Dios.

<sup>33</sup> Para ucuaa be Pedru ne Jacobo ne Juan, bixelete né be laaca ti ladu, ne bizulú uyuu be triste ne ucaná ladxidó' be.

<sup>34</sup> Para rabi be laaca':

—Nabé cayacaná ladxiduá' ne enda naná para guuti. Laguaana rari' ne lagataná.

<sup>35</sup> Ne bixelete be zitu huiini de laaca ne bizuxibi be layú, gunaba be lu Dios pa ganda cadi tidi be enda naná ni chi tidi be que.

<sup>36</sup> Ne ra caní' né be Dios que na be:

—Bixhoze', para lii gasti ni nagana, bilá naa de enda naná ri', peru cadi aca ni rabe', sínunque ni na lu' nga gaca'.

<sup>37</sup> Oraque uyé be ra nuu ca discípulu. Yendá be laaca nisiaasi ca', para rabi be Pe-dru:

—Simón, nisiaasi lu la? Nee qué ñanda ñataná lu neca ti hora la?

<sup>38</sup> Lagataná ne lainí' né Dios ti cadi uquinde binidx-aba laatu. Necá ndaani ladxidó' to racala'dxi tu guni tu jneza, peru cuerpu stitu, nagueenda riguudxi.

<sup>39</sup> Bigueta yení' né be Dios sti tiru, ne laca ngue ca uni' be.

<sup>40</sup> Ne bigueta be ra nuu ca discípulu ne laca bedandá be laaca nisiaasi ca', partí nabé nuu bacaanda lú ca'. Ne qué idxela ca xi gabi ca laabe.

<sup>41</sup> Bigueta be raguionna tiru de yení' né be Dios ne rabi be laaca':

—Yanna huaxa lagasi ne laiziila'dxi, ma bia'cati, partí naa nga Hombre Biseenda Dios ne ma bidxiña hora utoo cabe naa lu ca binni malu.

<sup>42</sup> Laguiasa, chuu nu. Ma zeda dxiña ni chi uluí' naa.

*Ra bigaa Jesús*

(Mt. 26.47-56; Lc. 22.47-53; Jn. 18.2-11)

<sup>43</sup> Caní' ru be ora bedandá Judas, tobi de lade doce discípulu stibe que, bedané stale binni ni biseenda ca xaíque sti ca sacerdote ne ca maistru de ley ne ca xaíque sti guidxi, naaze ca espada ne palu.

<sup>44</sup> Ne maca bidii Judas ti seña laacabe, na rabi laa-cabe:

—Ni gahua ti bixidu lucuá la? ngue nga laabe. Lainaaze laabe ne lachiné laabe.

<sup>45</sup> Ne casi yendá Judas ra nuu be bidxiña laabe ne rabi laabe:

—Maistru.

Ne gudó ti bixidu lucuá be.

<sup>46</sup> Oraque uluu ná cabe laabe para chiné cabe laabe.

<sup>47</sup> Peru óraque guxha tobi de cani nuu né laabe raqué espada, ne bigá ti chu diaga ti jmozo sacerdote gola.

<sup>48</sup> Oraque rabi be ca xcaadxi que:

—Nee gubaana zeda naaze tu la? Né pe tu espada ne palu.

<sup>49</sup> Irá ca dxi uyuaa lade tu ndaani yu'du ro', qué ñuni tu pur ninaaze tu naa. Peru cayaca ni sicarí ti iree ni modo cá lu Xqui'chi Dios.

<sup>50</sup> Ne óraque bixooñe irá discípulu que, bisaana ca laabe stubi be.

*Sti hombre huiini bixooñe'*

<sup>51</sup> Peru yenanda ti hom-bre huiini laabe, renda ti lari gueela si, ne gunaaze ca binni que laa.

<sup>52</sup> Peru óraque bixooñe xie ladi, bisaana lari que.

*Ra zuhuuaa Jesús nezalú justicia*

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Yené cabe Jesús ra nuu sacerdote gola ne bidxiña irá ca xaíque sti ca sacerdote ne ca xaíque sti guidxi ne ca maistru de ley raqué.

<sup>54</sup> Ne yenanda Pedru laabe zitu zitu dede lu patiu sti sacerdote gola ne gurí ra nuu ca gendarme cadxaa cue' gui.

<sup>55</sup> Ne cuyubi ca xaíque sti ca sacerdote ne irá ni naca justicia sti ca judíu tuuxa iní paraa pe bichee Jesús ti gapa ca xi pur gati be. Peru qué nidxela ca'.

<sup>56</sup> Nuu stale ni cabee falsu luguiá be, peru adxé adxé ni na ca'.

<sup>57</sup> Oraque biasa xcaadxi na:

<sup>58</sup> —Laadu bina diaga du uní' be zuxhá be yu'du ro' ni bicuí binni, ne lu chonna gubidxa zucuí be stobi peru ma cadi binni ucuí ni.

<sup>59</sup> Peru nin ne zaqué qué ñanda ñuu cabe tobi si de ni caní' cabe que.

<sup>60</sup> Oraque bizuhuaa sacerdote gola lade cabe ne na rabi Jesús:

—Qué gapu xiixa iníu' la? Xi ra'bu de ni cugaani cabe luguiá lu ri ya'.

<sup>61</sup> Peru qué niní' Jesús gastí'. Bigueta na sacerdote gola que rabi laabe:

—Ñee lii nga Cristu Xiiñi Dios la?

<sup>62</sup> Para rabi be laa:

—Naa pue. Ne zuuya tu Hombre Biseenda Dios zuba

cue' Dios ni nandxó', ne zuuya tu laa zeda yete de xaibá' lade za.

<sup>63</sup> Oraque gucheza sacerdote gola que xhaba ne na:

—Xi jma ru caquiiñe ganna nu,

<sup>64</sup> purti ma bina diaga nu ni de ruua pe be. Yanna ya', xi na tu.

Para na irá cabe napa be xidé gati be.

<sup>65</sup> Ne bizulú caadxí de laaca bichá xhinni ca ladi be. Biseegu ca lú be ne gudiñe ca laabe ne na ca iní' be tu bi'ni ni, ne laca udapa ca gendarme que laabe.

*Ra uní' Pedru qué runibiá' Jesús*

(Mt. 26.69-75; Lc. 22.56-62; Jn. 18.15-18, 25-29)

<sup>66</sup> Nuu Pedru ndaani patiu que ora beeda ti criada sti sacerdote gola,

<sup>67</sup> ne ora bi'ya zuba be cue' gui que cadxaa be la? biiya dxí laabe ne rabi laabe:

—Lii laca uzá neu Jesús de Nazaret.

<sup>68</sup> Peru qué niná niní' pa xpinni be laa, sínuque na rabi badu dxaapa que:

—Nin qué runebia'ya laabe ne qué ganna xii nga nou'.

Ne biree yeuzuhuaa ra puerta'. Oraque biinda gallu.

<sup>69</sup> Bigueta biiya dxí criada que laabe sti tiru ne na rabi cani nuu raqué:

—Hombre ri', laca tobi de laacabe laa.

<sup>70</sup> Peru laca bini negar Pedru sti tiru. Ne qué nindaa de ngue na cani zuba raqué rabi laabe:

—Dxandí laca de laacabe lii purti binni Galilea lii ne riníu' modo riní' cabe.

<sup>71</sup> Oraque bizulú Pedru bini jurar ne na:

—Gunidé Dios naa pa cusiguie'. Qué runebia'ya dia' hombre ni na tu ca.

<sup>72</sup> Ne óraque biinda gallu rairopa tiru ne bietenala'dxi be ca diidxa ni gudxi Jesús laabe que: ante gu'nda gallu chupa tiru, zaní' be chonna tiru qué runibiá' be laa. Ne ora bedasilú nga laabe la? biina be.

## 15

*Udi'di Jesús lu ná Pilatu*  
(Mt. 27.1-2, 11-14; Lc. 23.1-5; Jn. 18.28-38)

<sup>1</sup> Ora birá gueela bidxiña ca xaíque sti ca sacerdote ne ca xaíque sti guidxi ne ca maistru de ley ne irá ni naca justicia sti ca judíu, ne gupa ca ti junta. Ne biluxe si junta que, ucuua ca Jesús bindiibi ca ne yesaana ca laabe ra nuu Pilatu.

<sup>2</sup> Para na Pilatu rabi laabe:

—Ñee lii nga rey sti ca judíu la?

Para rabi be laa:

—Lii caníu' ni.

<sup>3</sup> Ne óraque guluu ca xaíque sti ca sacerdote xqueja be de irá modo.

<sup>4</sup> Bigueta unaba diidxa Pilatu laabe sti tiru, na rabi laabe:

—Ñee qué zaníu' gasti de irá ni cugaani cabe luguiá lu ri la?

<sup>5</sup> Peru nin ti diidxa qué niní' be ne nabé bidxagayaa Pilatu.

*Gu'ta gati Jesús*  
(Mt. 27.15-31; Lc. 23.13-25; Jn. 18.38-19.16)

<sup>6</sup> Cada iza saa que roundaa Pilatu ti presu para ca binni que, tutiica inaba ca'.

<sup>7</sup> Ne yeguyoo ti hombre ca dxi que lá Barrabás, laa ne ca xpinni, purti bicaa lú ca gobiernu ne biiti ca stale binni.

<sup>8</sup> Oraque beeda ca binni que ra nuu Pilatu ne gudxi ca laabe guni be casi runi be irá iza.

<sup>9</sup> Para na Pilatu rabi laabe:

—Ñee racala'dxi tu undaa Rey sti ca judíu ri para laatu la?

<sup>10</sup> Uní' Pilatu zaqué purti nanna bedané ca xaíque sti ca sacerdote Jesús ra nuu purti si cadxiichi ca xiñee rinanda binni laabe.

<sup>11</sup> Peru maca bisiene ca ca binni que inaba ilaa Barrabás.

<sup>12</sup> Oraque na Pilatu rabi laacabe:

—Xi racala'dxi tu gune nia ni na tu Rey sti ca judíu ri ya'.

<sup>13</sup> Para bicaa cabe ridxi:

—¡lcá be lu cruz!

<sup>14</sup> Oraque na Pilatu:

—Xiñee, xi huayuni be.

Peru bigueta bicaa cabe ridxi sti tiru:

—¡lcá be lu cruz!

<sup>15</sup> Peru Pilatu racala'dxi guiaana bien ne ca binni que; ngue runi bindaa Barrabás, para bini mandar idiiñe Jesús ne bidii laabe icá be lu cruz.

<sup>16</sup> Oraque gucuua ca soldadu que Jesús, yené ca laabe lu patiu sti palaciu ne

bidxiña idubi naca batallón laabe.

<sup>17</sup> Bigacu ca laabe ti lari moradu ne bizá' ca ti la'pa de guichi guluu ca ique be.

<sup>18</sup> Ne bizulú bicaa ca ridxi:  
—¡Viva Rey sti ca judíu!

<sup>19</sup> Ne bigaze ca ti gueere ique be ne bichá xhinni ca ladi be ne bizuxibi ca xañee be.

<sup>20</sup> Biluxe bini burla si ca laabe zaqué la? gulee ca lari moradu que ladi be ne bigacu ca laabe xhaba be. Para biree ca ziné ca laabe icá be lu cruz.

### *Ucuá Jesús lu cruz*

(Mt. 27.32-44; Lc. 23.26-43; Jn. 19.17-27)

<sup>21</sup> Neza ze cabe que bidxaaga cabe ti hombre de Cirene lá Simón, bixhoze Alejandru ne Rufo, zeeda de gui'xhi', ne biguá' cabe laa cruz sti Jesús.

<sup>22</sup> Ne yené cabe Jesús ti lugar lá Gólgota. Ne diidxa Gólgota la? rini' "Lugar sti Calavera".

<sup>23</sup> Ne bidii cabe laabe vinu nucha ti nisa lá mirra peru qué ñe' be ni.

<sup>24</sup> Oraque bicaa cabe laabe lu cruz ne gucuua ca soldadu que xhaba be ne uluu cabe xhaba be lu rifa ne cada tobi ucuaa ni gulee.

<sup>25</sup> Siadó' bia' las nueve bicaa cabe laabe lu cruz.

<sup>26</sup> Ne bicaa cabe caadxi diidxa xa ique be ni rini' xiñee cayuu xqueja be ne ndi nga ni na ni: "Rey sti ca judíu."

<sup>27</sup> Laca bicaa cabe chupa gubaana cue' be, tobi ladu derechu ne stobi ladu biga'.

<sup>28</sup> Ne zaqué biree ni casi cá lu Xqui'chi Dios ra na: "Bitiidi cabe laabe de malu."

<sup>29</sup> Ne irá binni cadi'di ra nuu be cayuni burla ca laabe ne cuniibi ique ca lú be ne na ca':

—Cadi lii nga nou' zuxhá lu yu'du ro' ne lu chonna gubidxa zandisa lu laa sti tiru la?

<sup>30</sup> Yanna bilá laca lii ne biete de lu cruz ca.

<sup>31</sup> Ne zaqueca bini burla ca xaíque sti ca sacerdote ne maistru de ley laabe, na ca':

—Stobi bilá be Peru qué ganda ulá be laca laabe.

<sup>32</sup> Pa idu'ya nu guiete Cristu Rey sti Israel de lu cruz ca la? óraque huaxa zuni cre nu laa.

Ne dede cani cá né laabe lu cruz que bini burla ca laabe.

### *Ra guti Jesús*

(Mt. 27.45-56; Lc. 23.44-49; Jn. 19.28-30)

<sup>33</sup> Ne bia' galaa dxi, mala bicahui ibá' ne zaqué biaana ni dede gunda huadxí bia' las tres.

<sup>34</sup> Ne bia' las tres que bicaa Jesús ridxi:

—¡Eloi, Eloi, lama sabactani! Didxazá la? niní be: Dios stinne', Dios stinne', xiñee ma bisaanu naa.

<sup>35</sup> Bina diaga caadxi de cani nuu raqué cucaa be ridxi para na ca':

—Laucaa diaga, cucaa ridxi be Elías.

<sup>36</sup> Ne beda uxooñe tobi gucuua ti esponja bigadxe de vinagre ne gudixhe ni ique ti gueere', ne bidii ni gue be, ne na:

—Lacueza, idu'ya nu pa queda ndete Elías laabe.

<sup>37</sup> Oraque bicaa Jesús ti ridxi ne guti.

<sup>38</sup> Ne gureza cortina ni nuu ra yu'du ro' chupa ndaa de punta punta.

<sup>39</sup> Ne ora bi'ya capitán ni zuhuua lú be que modo bicaa be ridxi ne modo guti be la? na:

—Dxandí Xiiñi Dios hombre ri'.

<sup>40</sup> Laca nuu caadxi gunaa raqué cayuuya ca de zitu. Ne lade ca gunaa que nuu María Magdalena ne Salomé ne María jñaa Jacobo huiini ne José.

<sup>41</sup> Uzá nanda cabe Jesús ne ucané cabe laa dxi uzá Galilea. Cadi laasi cabe sínunque nuu ru stale ni yenanda Jesús Jerusalén.

*Ra bigaachi Jesús*

(Mt. 27.57-61; Lc. 23.50-56; Jn. 19.38-42)

<sup>42-43</sup> Ma huadxí uyé José de Arimatea ra nuu Pilatu. Naca José tobi ni risaca lade ca justicia sti ca judíu, ne laca cabeza idxiña dxi guni mandar Dios. Viernes huadxí cayaca irá ndi', ma para uzulú dxi enda riziila'dxi'. Nga runi oraqueca uyé José, yenaba cuerpu sti Jesús, ne qué nutuí lú yenaba ni.

<sup>44</sup> Bidxagayaa Pilatu pabiá' nagueenda guti Jesús, ne bisenda caa be capitán que ne unaba diidxa be laa pa dxandí ni.

<sup>45</sup> Oraque na capitán que dxandí ni, para bidii Pilatu lugar ucuaa José cuerpu sti Jesús.

<sup>46</sup> Oraque uzí' José ti lari gueela cha'hui', gundete be cuerpu que ne bichenda be lari gueela que. Ne óraque uluu be ni ndaaní ti ba' ni gudaañe cabe cue' guie ne biseegu be ti guie ruaa ba' que.

<sup>47</sup> Ne biiya María Magdalena ne María jñaa José ra bicaachi cabe Jesús.

## 16

*Ra bibani Jesús*

(Mt. 28.1-10; Lc. 24.1-12; Jn. 20.1-10)

<sup>1</sup> Udi'di si dxi enda riziila'dxi', para uzí' María Magdalena ne Salomé ne María jñaa Jacobo nisa rindá' naxhi para chi uchá ca ladi Jesús.

<sup>2</sup> Domingo siadó' ro' biree cabe ze cabe ra ba' que ne yendá cabe raqué ma gundai gubidxa.

<sup>3</sup> Ne nuu cabe xizaa tu cuee guie ni ye'gu ruaa ba' que.

<sup>4</sup> Peru ora yendá cabe biiya cabe ma adxé ladu nexhe ni.

<sup>5</sup> Ne ora biuu cabe ndaaní ba' que biiya cabe zuba ti hombre huiini ladu derechu naba'qui ti lari quichi de yanni ñee, ne bidxibi cabe.

<sup>6</sup> Peru óraque na hombre que rabi laacabe:

—Cadi idxibi tu, nanna cuyubi tu Jesús de Nazaret ni ucuá lu cruz que, peru ma bibani be. Ma qué guinni be rarí'. Laidxiña gu'ya tu ra guta be,

<sup>7</sup> ti che tu chi tidxi tu ca discípulu stibe ne Pedru ma che be Galilea ne raqué gu'ya ca laabe, casi gudxi be laaca'.

<sup>8</sup> Ne biree uxooñe cabe de ra ba' que partí cayaca diti cabe tantu cadxibi cabe ne qué ñabi di cabe ni iruti partí cadxibi cabe.

*Ra biiya María Magdalena Jesús*  
(Jn. 20.11-18)

<sup>9</sup> Bibani Jesús de lade gue'tu domingo siadó' ro', dxi ruzulú semana, ne nirudó' María Magdalena biiya laabe. María nga dxá gunaa ni ulee be gadxe binidxaba luguiá que.

<sup>10</sup> Ne yetidxi María ni cani uzá né Jesús tobi si. Nuu ca triste ne cayuuna ca'.

<sup>11</sup> Ne gudxi be laaca nabani Jesús ne ma biiya be laa, peru qué ñuni cre ca laabe.

*Biiya chupa discípulu Jesús*

(Lc. 24.13-35)

<sup>12</sup> Udi'di si ngue bidxiña Jesús ra nuu xhupa de laaca neza ze ca gui'xhi', peru qué nului' pa laabe ngue.

<sup>13</sup> Para bigueta ca ngue yetidxi ca ca xcaadxi que, peru laca qué ñuni cre ca'.

*Ra biseenda Jesús ca apóstol stí'*

(Mt. 28.16-20; Lc. 24.36-49; Jn. 20.19-23)

<sup>14</sup> Ultimu bidxiña Jesús ra nuu once discípulu stí', ra zuba irá ca ruua mexa' ne udinde né be laaca xiñee qué ñuni cre ca cani biiya laabe ma nabani be, ne xiñee tan naguidxi ladxidó' ca'.

<sup>15</sup> Ne óraque rabi be laaca':

—Yanna, laché idubi guidxilayú. Lachigüí né irá binni stiidxa Dios.

<sup>16</sup> Tu guni cre ne chu' nisa la? zalá. Peru tu qué guni cre la? ziaana donda sti luguiá'.

<sup>17</sup> Ne zudiee ca seña ri cani guni cre: zabee cabe binidxaba ni riguite ique binni ne zaní' cabe idioma ni qué niziidi cabe.

<sup>18</sup> Zanaaze cabe beenda lu ná cabe, ne pa gue cabe xiixa ni napa venenu la? gasti qué zaca cabe, ne zaguixhe ná cabe luguiá binni huará ne zianda ca'. Naa nga quixhe irá nga lu ná cabe para guni cabe.

*Biasa Jesús ze ibá'*

(Lc. 24.50-53)

<sup>19</sup> Biluxé si gudxi Señor Jesús laacabe irá nga, biasa ze ibá' ne gurí cue' Dios.

<sup>20</sup> Ne laacabe la? biree cabe yegüí cabe stiidxa Dios irá ladu. Ne laça Señor ucané laacabe bisihuinni dxandí ni cayuí' cabe que pur ca milagru ni bi'ni cabe. Amén.

# STIIDXA JESUCRISTU NI BICAA SAN LUCAS

*Xiñee ucuá gui'chi ri'*

<sup>1</sup> Stale tu huacaa irá ni uca lade du, irá ni bi'ni Jesús.

<sup>2</sup> Laadu qué nidu'ya du ni, perú cani byui' né ni laadu la? biiya ca dede dxi bizulú Jesús xhiiña', ne ucané ca bireeche stiidxa be.

<sup>3</sup> Naa laca huanaba diidxa chaahue dede ra bizulú ni, ne zuluá' galán ucaa ni lú lu, Teófilo xhamigua',

<sup>4</sup> ti guiene chaahui lu ni ma bisiidi cabe lii.

*Ra uni' né ti ángel  
Zacarías*

<sup>5</sup> Dxi naca Herodes rey de Judea nuu ti sacerdote lá Zacarías, nuu be lade grupu sti Abías. Elisabet lá xheela be, ne laa laca za de xfamilia sacerdote Aarón.

<sup>6</sup> Iropa cabe nacha'hui cabe nezalú Dios, ne ruzuuba pe cabe stiidxa'.

<sup>7</sup> Ma nagola cabe ne qué gapa cabe nin ti xiiñi cabe, purti qué ñanda ñapa Elisabet ba'du'.

<sup>8</sup> Ti dxi guca caber grupu sti Zacarías guni dxiiña nezalú Dios.

<sup>9</sup> Costumbre sti ca sacerdote la? tu guiaba suerte luguiá ngue nga cu' gu'xhu ndaani yu'du ro'. Bia'si pe luguiá Zacarías biaba ni dxi que.

<sup>10</sup> Ne laga caguu be gu'xhu ndaani yu'du que, rí jma binni fuera, caní' né Dios.

<sup>11</sup> Ndaani yu'du que nuu be, mala bizuhuaa ti ángel sti Dios ladu derechu sti altar ra riuu gu'xhu que.

<sup>12</sup> Nabé bidxibi be ora bi'ya be ángel que dede qué idxela be xi guni be.

<sup>13</sup> Peru na ángel que, rabi laabe:

—Zacarías, cadi idxibi lu', purti ma bigaanda stiidxa lu lu Dios. Yanna chi gapa Elisabet xheela lu ti xiiñi', ne cuee lá lu badu huiini que Juan.

<sup>14</sup> Zadxá tipa ladxidó' lo de enda nayeche', ne stale tu zieche ora gale be.

<sup>15</sup> Nabé nandxó' zaca be nezalú Dios, ne qué zagaar ruua be vinu ne nin ti clase nisa dxu'ni'. Dede ante gale be maca dxá ladxidó' be de Espíritu Santo.

<sup>16</sup> Zudxigueta be stale judíu ra nuu Señor Dios sti ca'.

<sup>17</sup> Zazá niru be lú Señor, ne laabe zeda aca be casi Elías purti zapa be Espíritu sti Dios casi gupa Elías ne laca zaca be nandxó' casi uca Elías. Zaguu né be binni xiiñi tobi si, ne zucuudxi be ladxidó' cani naguidxi ladxidó' para uzuuba ca diidxa'. Zacá nga quixhe chaahui be binni para dxi gueeda Señor.

<sup>18</sup> Oraque na Zacarías rabi ángel que:

—Ximodo ganna dxandí zaca ni caya'bu naa ri ya', purti ma nayooxhua' ne xheela laca ma nayooxho'.

<sup>19</sup> Para na ángel que:

—Naa nga Gabriel, rune xhiiña Dios. Laa biseenda naa gueda tidxe lii ca diidxa sicarú ri'.

<sup>20</sup>Yanna zieegu ruua lu', ne qué zanda iní lu dede ora ma gule badu huiini que, partí qué ñuni cre lu ni gudxe lii ca. Peru zaca ni, ganda si xhi ni.

<sup>21</sup>Cadxagayaa ca binni rí fuera que xiñee nabé candaa Zacarias ndaani yu'du'.

<sup>22</sup>Ora biree be bidxiña be ra nuu ca binni que, qué ñanda niní' né be laaca', sínunque puru seña bi'ni be lú ca' partí ma biaana be mudu. Oraque bidii ca cuenta biluí' Dios laabe xiixa ndaani yu'du que.

<sup>23</sup>Bizaa si dxi nexhe guni be dxiiña ndaani yu'du', biree be zibí' be.

<sup>24</sup>Qué nindaa de ngue uca xiiñi Elisabet ne biaana ndaani yoo gaayu bee, ne na:

<sup>25</sup>—Bi'ni Dios ndi naa ti ma cadi iní' binni naa.

*Bidxiña ti ángel ra nuu María*

<sup>26</sup>Lu xhoopa bee, de naca xiiñi Elisabet biseenda Dios ángel Gabriel ndaani ti guidxi lá Nazaret de Galilea,

<sup>27</sup>ra nuu ti badu dxaapa lá María ni ma yenaba ti hombre lá José laa para ichaganá'. Za José de lade xfamilia David.

<sup>28</sup>Ora biuu ángel que ra nuu be bigapa diuxi laabe ne na:

—Ma ulí Dios lii, María. Dichoza lii lade irá xixé gunaa.

<sup>29</sup>Nabé bidxagayaa be ni gudxi ángel que laabe, ne

candaa ique né be xiñee bigapa diuxi laabe zaqué.

<sup>30</sup>Para na ángel que:

—Cadi idxibi lu, María. Ma uluu Dios ndaaya lii.

<sup>31</sup>Chi aca xiiñi lu' ne zaputi badu huiini'. Cuee lá lu laabe Jesús.

<sup>32</sup>Zaca be nandxó' ne zabí cabe laabe Xiiñi Dios ni nuu ibá'. Ne zucuí Dios laabe de rey ra guri bixhoze gola be David.

<sup>33</sup>Zaca be rey sti irá caniza de Israel, ne qué ziuu dxi guiasa be. Qué ziuu dxi guiaana dxí be de guni mandar be.

<sup>34</sup>Para na María rabi ángel que:

—Ximodo zanda gaca ndi ya', partí binni dxaapa naa.

<sup>35</sup>Oraque na ángel que rabi laabe:

—Zeeda Espíritu Santu luguiá lu' ne zutaagu enda nandxó' sti Dios lii. Nga runi zaree chu badu huiini ca para Dios, ne zabi cabe laa Xiiñi Dios.

<sup>36</sup>Laca ma naca xiiñi Elisabet lisaa lu', neca ma nagola. Na nda cabe qué zanda gapa be ba'du', peru ma ze be xhoopa bee, de naca xiiñi be.

<sup>37</sup>Purtí para Dios gasti ni nagana.

<sup>38</sup>Oraque na María:

—Rarí nuaa para gune ni na Dios. Zaa gaca casi nou' ca.

Nga si bina diaga ángel que, biree ze'.

*Ra yeganna María Elisabet*

<sup>39</sup> Ca dxi queca nagueenda biree María uyé ti guidxi huiini de Judea, nuu lade dani.

<sup>40</sup> Ora yendá be ralidxi Zacarías biuu be, bigapa diuxi be Elisabet.

<sup>41</sup> Casi bina diaga Elisabet stiuxi be biniibi dxacha badu huiini que ndaani', ne bidxá ladxidó' Elisabet de Espíritu Santo.

<sup>42</sup> Ne bicaa ridxi:

—Dichosa lii lade irá xixé gunaa ne dichoso badu huiini naca xiiñi lu ca.

<sup>43</sup> Paraa biree razón gueda ganna jñaa Señor stinne naa.

<sup>44</sup> Purti casi bina dia'ga stiuxi lu' biniibi badu huiini ri ndaane de enda nayeche'.

<sup>45</sup> Dichosa lii ti bini cre lu', purti zaca ni gudxi Dios lii.

<sup>46</sup> Oraque na María:

De idubi xhialma rusisaca Dios.

<sup>47</sup> Ne rieche né ladxiduá' Dios ni beda ulá naa.

<sup>48</sup> Nuaa para gune xhiiña be, ne qué risaca dia', peru bilabi be naa.

Dede yanadxí irá xixé binni ibani ndaani guidxi-layú zabi naa dichosa.

<sup>49</sup> Purti cadi ni guiete chupa chonna gubidxa si ndi ni bi'ni be luguia'ya'. Nandxo' Dios, ne iruti ru casi laa.

<sup>50</sup> Qué ziuu dxi guiaana dxí be de ilasela'dxi be cani ridxiiba laabe.

<sup>51</sup> Biiya pabiá' nandxo' ni bi'ni be: Bicheche ndase be cani rudxiiba laca laa.

<sup>52</sup> Undisa be cani ma naca tuuxa de ra zuba, ne bidxiiba be cani qué rudxiiba laca laa.

<sup>53</sup> Bichá tipa be ná cani canadaana.

Bidxigueta be cani napa bidxichi nisi ná'.

<sup>54</sup> Ucané be cani za de Israel, ca xpinni be, ne bilaseladx be laaca',

<sup>55</sup> casi bidii stiidxa be ca bixhoze gola canu, Abraham ne ca xiiñi', ne irá xixé ni za de laa.

<sup>56</sup> Zacá nga bisisaca María Dios, ne biaana né Elisabet bia' chonna bee. Oraque ru bigueta ralidxi.

*Ra gule Juan Bautista*

<sup>57</sup> Bizaa si xpeeu Elisabet beda gapa ti ba'du'.

<sup>58</sup> Ora gunna ca xpecinu be ne ca lisaa be modo bilaseladx Dios laabe la? yeizaca ca laabe, ne bieche né ca laabe.

<sup>59</sup> Lu xhono gubidxa guluu cabe seña sti Dios badu huiini que, ne ucaladxi cabe nibee lá cabe laa Zacarías, lá bixhoze.

<sup>60</sup> Peru na jñaa be co', iree lá be Juan.

<sup>61</sup> Para rabi cabe laa:

—Xiñee, purti iruti lá Juan lade ca lisaa lu'.

<sup>62</sup> Oraque bi'ni cabe seña bixhoze be tu racala'dxi cuee lá laabe.

<sup>63</sup> Para unaba bixhoze be ti tabla ne bicaa: "Iree lá be Juan." Bidxagayaa ca binni que.

<sup>64</sup> Ne casi pe biluxe bicaa Zacarías nga, ma gunda uní sti tiru ne bizulú bidii diuxquixe Dios.

<sup>65</sup> Nabé bidxiiba ca xpecinu cabe ora bi'ya ca ni uca que. Ne yendá diidxa que irá ca guidxi nuu lade dani de Judea.

<sup>66</sup> Ne irá ni gunna ni, undaa ique né ni, na:

—Tu nda gueda aca badu huini ri ya'.

Purti rihuinni dxichi nuu né Dios laabe.

### *Ni udxhe Zacarías*

<sup>67</sup> Oraque bidxá ladxidó' Zacarías bixhoze be de Espíritu Santu ne uní' ni gudxi Dios laa,

<sup>68</sup> na:

Diuxquixe Señor, Dios sti ca binni Israel saca beda ulá ca xpinni.

<sup>69</sup> De lade cani za de David ni bi'ní xhiiña be, ulee be tobi ni nandxó' para ulá laanu.

<sup>70</sup> Ma xadxí bidii stiidxa be guseenda be laa.

Uní' be ni de ruua ca profeta stibe ni uyuu chiqué.

<sup>71</sup> Na be zulá be laanu de lu ná cani nanala'dxi laanu ne cani cuxhii laanu.

<sup>72</sup> Ne ziá be ca bixhoze gola nu, ne zietenala'dxi be ni gudxi be laaca zuni be.

<sup>73</sup> Nga nga ni gudxi be bixhoze gola nu Abraham zuni be.

<sup>74</sup> Ne laca gudxi be laa zulá be laanu lu ná cani nanala'dxi laanu

ti ganda guni nu ni na be sin idxibi nu laaca',

<sup>75</sup> ne ti ganda ibani nu nayá, ne guiaana nu para laasi be bia' tiica dxi ibani nu.

<sup>76</sup> Ne lii la? xiiñe huiine', zaree lá lu profeta sti Dios ni nandxó',

purti zazá niru lu lu Señor, ne zuni chaahui lu neza tidi'.

<sup>77</sup> Zusiidi lu binni Israel xi modo ilá ca'

ne modo aca perdonar irá ni huachee ca'.

<sup>78</sup> Purti nabé nadxii Dios laanu, riá laanu.

Nga runi zuseenda Xiiñi casi ñaca nindani gubidxa para laanu,

<sup>79</sup> para uzaani irá ni canazá lu guelacahui ne ni nuu lu ná enda guti, ne para udxii lú nu neza ra gata dxí ladxidó' no.

Nga nga ni bisiní' Espíritu Santu Zacarías.

<sup>80</sup> Ze dxi jma ziniisi ba'du que ne jma zihuiini napa Espíritu sti Dios. Ndaani gui'xhi uleza be dede bidxiña dxi guni be xhiiña be lade ca binni Israel.

## 2

### *Ra gule Jesús (Mt. 1.18-25)*

<sup>1</sup> Ca dxi que uní' rey Augusto César idopa lá irá xixé binni de irá guidxi ra runi mandar.

<sup>2</sup> Nga nga primé tiru bitopa cabe lá binni dxi cayuni mandar Cirenio ndaani guidxi Siria.

<sup>3</sup> Irá binni napa xidé che xquidxi para icá lá.

<sup>4</sup> Ngue runi biree José de ndaani guidxi Nazaret de Galilea uyé Belén ti guidxi de Judea ra gule David. Ne uyé be raqué purti za be de xfamilia David.

<sup>5</sup> Yené be María Belén para icá lá cabe raqué. Ca'ru iluxe xquenda xheela cabe peru ma uyuu stiidxa cabe, ne ma naca xiiñi María.

<sup>6</sup> Raqué nuu cabe beda ganda dxi gapa María ba'du'.

<sup>7</sup> Gupa be primé xiiñi be ne bichenda be laa lari, gudixhe be laa ndaani ti cajón ra ro mani guixi, purti qué nidxela cabe ra ñaana cabe ndaani yoo.

*Bidxiña caadxi ángel ra nuu ca pastor*

<sup>8</sup> Gaxha de guidxi Belén nuu caadxi pastor cayapa ca dendxu huaxhinni.

<sup>9</sup> Mala biiya cabe ti ángel sti Dios, ne bizaani biaani sti Dios laacabe. Bidxbi cabe dede uca dití cabe.

<sup>10</sup> Peru na ángel que rabi laacabe:

—Cadi idxibi tu. Nia caadxi diidxa cubi gabe laatu, ni gusieche de irá xixé binni guidxilayú.

<sup>11</sup> Yanadxí gule tobi ni ulá laatu ndaani xquidxi David, ne laabe nga Cristu Señor.

<sup>12</sup> Ne ora idxela tu ti badu huiini renda lari nexhe ndaani ti cajón ra ro mani guixi la? ngue nga laabe.

<sup>13</sup> Ne mala bihuinni jma ángel ra nuu ángel que, cayunda ca', cusisaca ca Dios, na ca':

<sup>14</sup> Diuxquixe Dios ni nuu ibá', ne ndaani guidxilayú gata dxí ladxidó' cani guni ni na be.

<sup>15</sup> Biree si ca ángel que ra nuu ca pastor que, bigueta ca ibá'. Oraque na ca pastor que:

—Chuu Belén, chu du'ya ni guca raqué, ni bisenda tidxi Dios laanu ri'.

<sup>16</sup> Biree guxooñe cabe, ziguuya cabe ni guca que. Ne bidxela cabe José ne María ne badu huiini que nexhe

ndaani ti cajón ra ro mani guixi.

<sup>17</sup> Ne ora bi'ya cabe badu huiini que, byui' né cabe laaca irá ni gudxi ángel que laacabe de badu huiini que.

<sup>18</sup> Bidxagayaa irá ni bina diaga ni uní cabe que.

<sup>19</sup> Peru María cayapa irá ni ndaani ladxidó' ne candaa ique né ni.

<sup>20</sup> Bigueta ca pastor que, cusisaca ca Dios ne cudii ca diuxquixe laa, pur irá ni bina diaga ca ne ni bi'ya ca', purti uca ni casi pe gudxi ángel que ni laaca'.

*Ra napa Jesús xhono gubidxa*

<sup>21</sup> Dxi bisaa badu huiini que xhono gubidxa guluu cabe seña sti Dios laa, ne ulee lá cabe laa Jesús, lá ni gudxi ángel que María ante gaca xiiñi'.

<sup>22</sup> Gupa si María dxi casi cá lu ley ni bidii Dios Moisés guni ca gunaa ni gapa ba'du la? yené ca badu huiini que Jerusalén, yeuchiña ca laabe nezalú Dios.

<sup>23</sup> Bi'ni cabe zaqué purti cá lu ley sti Dios: "Irá hombre lugola iree chu para Dios."

<sup>24</sup> Ne yené cabe ofrenda casi cá lu ley que, chupa gugu huiini o chupa paloma.

<sup>25</sup> Chiqué uyuu ti hombre ndaani guidxi Jerusalén, lá Simeón. Nacha'hui be ne nabé rusisaca be Dios. Dxá ladxidó' be de Espíritu Santu, ne cabeza be gu'ya be gueeda ni gueda ulá ca binni Israel.

<sup>26</sup> Purti ma gudxi Espíritu Santu laabe qué zati be dede

qué gu'ya be gueeda Cristu ni chi useenda Dios.

<sup>27</sup> Ne dxi que bilui' Espíritu Santu laabe che be ndaani yu'du ro'. Bia'si pe raqué nuu be ora bedané cabe Jesús. Zeda guni cabe casi cá lu ley guni né cabe ba'du'.

<sup>28</sup> Ucuaa be badu huiini que undisa be lu ná be ne bidii be diuxquixe Dios,

<sup>29</sup> na be:  
Señor, huayune xhiiña lu',  
ne yanna ma nexhe dxí ladx-  
iduá',  
purti ma uca ni bidii stiidxa  
lu naa.

Ma zanda chi neu naa yanna.  
<sup>30-31</sup> Ma biiya dxi'che pia'  
ni gudixhe lu gueda ulá irá  
binni.

<sup>32</sup> Laabe chi udxiba be ca  
binni Israel,  
ca xpinni lu',  
ne chi aca be biaani para  
cani cadi za de Israel.

<sup>33</sup> Bidxagayaa José ne  
María irá ni uní' Simeón de  
badu huiini que.

<sup>34</sup> Oraque uluu Simeón  
ndaaya laacabe ne na rabi  
María jñaa Jesús:

—Pur ni zeda guni badu  
huiini ri' ziaba stale binni Is-  
rael, ne zaqueca pur laabe zi-  
asa stale de laaca'. Zeda ului'  
be binni xii nga racala'dxi  
Dios peru stale tu qué zaná  
ulabi laabe.

<sup>35</sup> Ne zacá zahuinni xi nuu  
ndaani ladxitó' cada tobi.  
Peru para lii la? María, zeda  
gaca irá nga casi ñaca nudx-  
iga cabe ti gudxiú xhialma  
lu'

<sup>36-37</sup> Laca nuu ti gunaa  
raqué lá Ana, xiiñi Fanuel  
de xfamilia Aser. Rui' né  
be binni ni gabí Dios laabe.

Nahuiini ru be bichaganá  
be, peru lu gadxe iza de  
bichaganá be guti xheela be.  
Yanna ma nagola be, ma  
napa be ochenta y cuatro  
año. Qué riree be ndaani  
yu'du ro'. Rusisaca be Dios  
ridxí ne huaxhinni, ne stale  
tiru riaana be sin go be para  
iní' né be Dios.

<sup>38</sup> Oraque pe bidxiña be  
ra nuu badu huiini que, ne  
bidii be diuxquixe Dios, ne  
dede óraque bizulú cayabi  
be binni badu huiini que  
nga ni cabeza ca gueda ulá  
Jerusalén.

### *Bigueta cabe Nazaret*

<sup>39</sup> Bi'ni si cabe irá ni cá  
lu ley sti Dios guni cabe,  
bigueta cabe Nazaret de  
Galilea, xquidxi cabe.

<sup>40</sup> Ze dxi jma ziniisi badu  
huiini que, jma ziyapa stipa,  
jma ziyuu xpiaani ne nabé  
uluu Dios ndaaya laa.

### *Nuu Jesús ndaani yu'du ro'*

<sup>41</sup> Irá iza rie José ne María  
Jerusalén rigapa pascua, saa  
ro' sti ca judíu.

<sup>42</sup> Dxi ma bisaa Jesús doce  
año yené cabe laa, yegapa  
cabe saa Jerusalén, casi runi  
cabe irá iza.

<sup>43</sup> Biluxé si saa que bigueta  
José ne María, peru qué  
ñanna ca pa biaana Jesús  
Jerusalén.

<sup>44</sup> Zácxaxa ca zeeda be lade  
irá binni que. Uzá ca idubi  
ti dxi, ne óraque ru biyubi  
ca laabe lade ca lisaa ca', ne  
lade cani runibiá' ca',

<sup>45</sup> Peru qué nidxela ca laabe. Para bigueta ca Jerusalén, ye yubi ca laabe.

<sup>46</sup> Lu chona gubidxa beda idxela ca laabe ndaani yu'duro'. Zuba be galahui de cani rusiidi ley sti Dios, cucaa diaga be laaca' ne canaba idxa be laaca'.

<sup>47</sup> Nabé bidxagayaa cani cayuna diaga pabíá' riene be ne modo ricabi be.

<sup>48</sup> Ora bidxela cabe laabe, bidxagayaa cabe, ne na jñaa be rabi laabe:

—Xiiñe', xiñee ndi canayu'nú laadu sicarí'. Naa ne bixho'zo lugu canazá du canayubi du lii.

<sup>49</sup> Oraque rabi be laaca':

—Xiñee ndi canayubi tu naa. Ñee qué ganna tu pa naquiiñe gune xhiiña Bixhoze la?

<sup>50</sup> Peru qué ñene ca xi cayabi be laaca'.

<sup>51</sup> Bigueta né be laaca Nazaret ne bizuuba be stiidxa ca'. Peru María cayapa irá ni ndaani ladxidó'.

<sup>52</sup> Ze dxi jma ziyuu xpiaani be ne ziniisi be ne cayeche né Dios laabe ne za queca cayeche né binni laabe.

### 3

*Ra canayui' Juan Bautista  
stiidxa Dios  
(Mt. 3:1-12; Mr. 1:1-8; Jn.  
1:19-28)*

<sup>1</sup> Lu quince añu de cayuni mandar Tiberiu irá guidxi sti ca romanu, naca Poncio Pilatu gobernador de Judea, naca Herodes gobernador de Galilea, ne Felipe, bi'chi', naca gobernador de Iturea

ne de Traconite, ne Lisanias naca gobernador de Abilinia,

<sup>2</sup> Anás ne Caifás naca sacerdote gola. Ca dxi que pe' nuu Juan, xiiñi Zacarías ndaani gui'xhi'. Ne raqué uní' né Dios laabe.

<sup>3</sup> Oraque uzá be irá ca guidxi ni nuu uriá guigu Jordán. Canayabi be binni naquiiñe inaba ca perdón Dios ti aca perdonar ni huachee ca' ne chu' nisa ca'.

<sup>4</sup> Guca ni casi bicaa profeta Isaías chiqué, ra na:

Zuna diaga cabe cucaa tuuxa ridxi ndaani gui'xhi', cayabi binni:

“Lausía neza tidi Señor,  
lauxhele ladxidó' to casi ñaca  
cuxhele tu ti neza para  
laabe.

<sup>5</sup> Zadxii irá barranca, ziete  
irá dani,

zaca chaahui neza pandu,  
ne zaca chaahui neza rangu.

<sup>6</sup> Ne irá binni zuuya modo  
ulá Dios laaca'.”  
Irá nga bicaa Isaías.

<sup>7</sup> Ora bi'ya Juan cadxiña ca binni que para chu' nisa ca', na:

—Binni nexhená ca', zeeda tu ra nuua para chu' nisa tu, purti ruzulú tu zacá zalá tu de xiana sti Dios.

<sup>8</sup> Yanna lasá jneza ti ihuinni ma unaba tu perdón Dios de idubi ladxidó' to ne cadí ma iree né tu, na tu: “Xiiñi Abraham laadu.” Gabe ca' laatu pa qué guni tu jneza casi bi'ni be la? dede lade guie ri zanda indisa Dios xiiñi be.

<sup>9</sup> Ora qué ricá cuananaxhi lu ti yaga, rugá cabe laa ne ruzaaqui cabe laa. Zacaca

nga ma zeda dxiña dxi sti irá binni ni qué runi jneza. Laca maca zilá ca lu bele.

<sup>10</sup> Oraque na ca binni que rabi laabe:

—Pa zacá ni la? xi zanda guni du ya'.

<sup>11</sup> Para rabi be laaca':

—Tu napa chupa gamixa la? gudii tobi ni qué gapa ni gacu', ne ni napa ni go la? ucheeche ná ni lade cani cayaadxa ni laa.

<sup>12</sup> Laca beeda caadxi ni ruquixe impuestu ra nuu be para chu' nisa ca' ne na ca rabi ca laabe:

—Maistru, laadu ya', xi guni du.

<sup>13</sup> Para rabi be laaca':

—Cadi uquixe tu jma que bia' cá lu ley.

<sup>14</sup> —Laga laadu ya', xi guni du, na caadxi gendarme.

Para rabi be laaca':

—Cadi cu' tu doo iruti para gaxha tu laa xiixa, nin udxi-iba tu donda ique ca neca qué ñuni ca gastí'. Laguaana conforme ne ni riaxa si tu.

<sup>15</sup> Nuu ca binni que guiuuba ganna ca pa laabe nga Cristu.

<sup>16</sup> Peru rabi be irá ca':

—Naa caguua ni'sa sia' laatu, peru nanda stobi naa jma nandxo' que naa. Laa zudii Espíritu Santu cani guni cre, ne zulaa cani qué runi cre lu bele. Nin para cuee xquela guidi be ñee be qué risaca'.

<sup>17</sup> Zeda guni be casi runi tobi ni riguibi semiá, zutopa be ca semiá para uchá be ndaani sacu, ne zundaa be ca guixi que lu gui, peru gui ni qué ziuu dxi gyui'.

<sup>18</sup> Zacá ne stale ru modo bilidxe be ca binni que, ne byuí' né be laaca ca diidxa cubi ni sicarú para laaca'.

<sup>19</sup> Ne udinde né be Herodes purti nabeza né Herodías xheela Felipe bi'chi', ne cadi pur nga si sínuque ne pur irá enda qué iquiiñe ni huayuni.

<sup>20</sup> Lugar de nucaa diaga Herodes laabe, laga jma rusi bichee, biseguyoo laabe.

*Ra uyuu nisa Jesús  
(Mt. 3.13-17; Mr. 1.9-11)*

<sup>21</sup> Laga caguu nisa ru Juan binni, ye chuu nisa Jesús ra nuu. Ne ra caní' né Jesús Dios, bixele ibá'.

<sup>22</sup> Biete Espíritu Santu luguiá', bihuinni casi ti paloma, ne ucuá ti ridxi de ibá':

—Lii nga Xiiñe ni nadxiee' ne ni rusieche naa.

*Tu dé za Jesucristu  
(Mt. 1.1-17)*

<sup>23</sup> Bia' treinta añu napa Jesús dxi bizulú bi'ni xhiiña'. Na binni xiiñi José laabe. José xiiñi Elí,

<sup>24</sup> Elí xiiñi Matat, Matat xiiñi Leví, Leví xiiñi Melqui, Melqui xiiñi Jana, Jana xiiñi José,

<sup>25</sup> José xiiñi Matatías, Matatías xiiñi Amós, Amós xiiñi Nahum, Nahum xiiñi Esli, Esli xiiñi Nagai,

<sup>26</sup> Nagai xiiñi Maat, Maat xiiñi Matatías, Matatías xiiñi Semei, Semei xiiñi José, José xiiñi Judá,

<sup>27</sup> Judá xiiñi Joana, Joana xiiñi Resa, Resa xiiñi Zorobabel, Zorobabel xiiñi Salatiel, Salatiel xiiñi Neri,

<sup>28</sup> Neri xiiñi Melqui, Melqui xiiñi Adi, Adi xiiñi Cosam, Cosam xiiñi Elmodam, Elmodam xiiñi Er,

<sup>29</sup> Er xiiñi Josué, Josué xiiñi Eliezer, Eliezer xiiñi Jorim, Jorim xiiñi Matat,

<sup>30</sup> Matat xiiñi Leví, Leví xiiñi Simeón, Simeón xiiñi Judá, Judá xiiñi José, José xiiñi Jonán, Jonán xiiñi Eliaquim,

<sup>31</sup> Eliaquim xiiñi Melea, Melea xiiñi Mainán, Mainán xiiñi Matata, Matata xiiñi Natán,

<sup>32</sup> Natán xiiñi David, David xiiñi Isaí, Isaí xiiñi Obed, Obed xiiñi Booz, Booz xiiñi Salmón, Salmón xiiñi Naasón,

<sup>33</sup> Naasón xiiñi Aminadab, Aminadab xiiñi Aram, Aram xiiñi Esrom, Esrom xiiñi Fares, Fares xiiñi Judá,

<sup>34</sup> Judá xiiñi Jacob, Jacob xiiñi Isaac, Isaac xiiñi Abraham, Abraham xiiñi Taré, Taré xiiñi Nacor,

<sup>35</sup> Nacor xiiñi Serug, Serug xiiñi Ragau, Ragau xiiñi Peleg, Peleg xiiñi Heber, Heber xiiñi Sala,

<sup>36</sup> Sala xiiñi Cainán, Cainán xiiñi Arfaxad, Arfaxad xiiñi Sem, Sem xiiñi Noé, Noé xiiñi Lamec,

<sup>37</sup> Lamec xiiñi Matusalén, Matusalén xiiñi Enoc, Enoc xiiñi Jared, Jared xiiñi Mahalaleel, Mahalaleel xiiñi Cainán,

<sup>38</sup> Cainán xiiñi Enós, Enós xiiñi Set, Set xiiñi Adán, Adán xiiñi Dios.

## 4

*Ucalá'dxi binidxaba nusaba Jesús*

(Mt. 4.1-11; Mr. 1.12-13)

<sup>1</sup> Ora bigueta Jesús de ra guigu Jordán dxá ladxidó' de Espíritu Santu, ne yené Espíritu que laabe ndaani gwi'xhi'.

<sup>2</sup> Biaana be raqué cuarenta dia ne ira ca dxi que ucalá'dxi binidxaba nuqui-inde laabe. Qué ño be idubi naca cuarenta dia que, ne ora bi'ya binidxaba ma candaana dxita be,

<sup>3</sup> na rabi laabe:

—Pa dxandí Xiiñi Dios lii la? gudxi guie ri gaca pan.

<sup>4</sup> Oraque rabi be laa:

—Cá lu Xqui'chi Dios: “Cadi pan si nga ibani né binni, sínuque ne stiidxa Dios.”

<sup>5</sup> Oraque yené binidxaba laabe lu ti dani soo, ne tobi bilu' si laabe idubi naca guidxilayú,

<sup>6</sup> ne na rabi laabe:

—Zudiee lii irá ca guidxi sicarú ca, purti stinne cani, ne zanda udiee cani tutiica acaladxe'.

<sup>7</sup> Yanna stiu' cani pa uzuxibi lu xañee' usisaca lu naa.

<sup>8</sup> Peru óraque rabi be laa:

—Bixele de naa, binidxaba', purti cá lu Xqui'chi Dios: “Dios si nga naquiiñe usisaca cabe, ne guni cabe ni na.”

<sup>9</sup> Bigueta ucuaa binidxaba laabe, yené laabe Jerusalén, bidxiiba laabe ique yu'du ro' ne na rabi laabe:

—Pa dxandí Xiiñi Dios lii la? uyuu bí de racá.

<sup>10</sup> Purti cá lu Xqui'chi Dios, zuseenda ca ángel sti' gapa lii,

<sup>11</sup> cu' ná xi'que lu' ti cadi gacaná lu lu guie.

<sup>12</sup> Para rabi be laa:

—Laca cá lu Xqui'chi Dios: "Cadi inaba cabe xiixa Dios para quite si cabe laa."

<sup>13</sup> Biiya si binidxaba ma qué idxela ximodo usaba laabe, bisaana laabe caadxi.

### *Ra bizulú xhiña Jesús*

(Mt. 4.12-17; Mr. 1.14-15)

<sup>14</sup> Uca si irá nga bigueta be neza Galilea ne stale enda nandxó' partí dxá ladxidó' be de Espíritu Santu. Irá xixé guidxi neza que ma cayuí cabe stiidxa be.

<sup>15</sup> Ne bisiidi be ndaani ca yu'du sti ca judíu ne irá ca bisisaca ca laabe.

### *Ra nuu Jesús Nazaret*

(Mt. 13.53-58; Mr. 6.1-6)

<sup>16</sup> Ne zaqué canazá be dede yendá be Nazaret guidxi ra biniisi be. Raqué nuu be beda ganda dxi enda riziila'dxi', para biuu be ndaani yu'du casi runi be irá dxi enda riziila'dxi', ne bizuhuua be para gu'nda be Xqui'chi Dios.

<sup>17</sup> Bidii cabe laabe gui'chi ni bicaa profeta Isaías ne bixhele be ni biyubi be ra cá ca diidxa ri':

<sup>18</sup> Nuu né Espíritu sti Dios naa,

purti ma ulí naa güe nia ca pobre diidxa ni usieche laaca'.

Biseenda be naa gueda ndee yuuba ladxidó' binni,

ne gabe cani nundiibi pecadu laa ximodo zanda iree ca de laani, ne usinaya cani nacheepa lú, ne ula'ya cani cuxhii cabe laa,

<sup>19</sup> ne gabe binni ma bidxiña dxi gudixhe Dios para ilá ca'.

Irá nga cá ra biinda be que.

<sup>20</sup> Biluxe si biinda be ni, bizeechu be ni, bidii be ni ni runi dxiiña ndaani yu'du que ne gurí be. Peru biiya si be cayuuya dxí irá ni nuu ndaani yu'du que laabe la?

<sup>21</sup> bizulú be byui' né be laaca diidxa', rabi be laaca':

—Yanadxí pe cayaca ni cá lu Xqui'chi Dios ni bina diaga tu nagasi ca.

<sup>22</sup> Nabé biaba be ca binni que ne bidxagayaa ca pabiá' galán riní' be ne na ca':

—Ñee cadi ndi nga dxa xiiñi José que la?

<sup>23</sup> Para rabi be laaca':

—Nuu ti dichu na: "Doctor, bisianda laca lii." Yanna seguru nga ca cayabi tu naa, gune irá ni bine Capernaum ndaani xquidxe'.

<sup>24</sup> Peru gabe ca' laatu, qué rulabi cabe ti profeta ndaani xquidxi.

<sup>25</sup> Casi uca chiqué dxi nabani profeta Elías, chonnaniza aronda qué ñaba nisa guie ne uca ti gubiña ca guidxi que. Stale viuda uyuu lade ca judíu,

<sup>26</sup> ne qué nuseenda Dios Elías ra nuu nin tobi de laa-cabe, sínuque ra nuu ti viuda ndaani guidxi Sarepta de Sidón.

<sup>27</sup> Ne zaqueca dxi nabani profeta Eliseo, stale judíu gupa lepra, Peru nin tobi qué ñanda sínúque Naamán, binni Siria.

<sup>28</sup> Ora bina diaga cani nuu ndaani yu'du que xi na be, gudó dí laaca',

<sup>29</sup> ne biasa ca', ulee ca laabe de ndaani guidxi que, yené ca laabe punta dani ra dxi'ba guidxi que para nibee yaande ca laabe.

<sup>30</sup> Peru udi'di be galahui de laaca', ze be.

*Sti ti hombre riguite binidxaba ique*  
(Mr. 1.21-28)

<sup>31</sup> Uyé be sti guidxi de Galilea, lá Capernaum. Ne bisiidi be ca binni que dxi enda riziila'dxi'.

<sup>32</sup> Nabé bidxagayaa ca binni que modo rusiidi be, purti rini' be casi tobi ni zanda guni mandar.

<sup>33</sup> Ndaani yu'du que nuu ti hombre riguite binidxaba ique, ne bicaa ridxi:

<sup>34</sup> —Biree de laadu, Xi napa neu laadu, Jesús de Nazaret. Ñee zeda unitilú lu laadu la? Runebia'ya lii. Lii nga hombre cha'hui sti Dios.

<sup>35</sup> Oraque udinde né be binidxaba que, na be rabi be laa:

—Bigani, ne biree de hombre ca.

Oraque bigaze binidxaba que hombre que layú, ne biree ze', sin ñuniná hombre que.

<sup>36</sup> Nabé bidxagayaa irá binni que, ne na ca':

—Ximodo ndi caní' hombre ri'. Ne stale enda nandxo' runi mandar be ca binidxaba' ne riree ca'.

<sup>37</sup> Ne nisi stiidxa be cayuí irá binni de ca guidxi neza que.

*Ra bianda suegra Pedru*  
(Mt. 8.14-15; Mr. 1.29-31)

<sup>38</sup> Biree be de ra yu'du que, uyé be ralidxi Simón. Nexhe né suegra Simón xhindxá' ne unaba cabe Jesús usianda laabe.

<sup>39</sup> Para bidxiña Jesús ra nuu be, ne udinde né xhindxá' que, biree. Oraqueca biasa be ne bidii be ni gudó ca'.

*Bisianda Jesús stale binni huará*

(Mt. 8.16-17; Mr. 1.32-34)

<sup>40</sup> Bia' ziyaazi gubidxa yené cabe stale binni huará de irá clase enda huará ra nuu Jesús, para gudixhe ná Jesús luguiá ca' ne bianda ca'.

<sup>41</sup> Ne laca stale binni ulee be binidxaba de laa, ne laga caree ca binidxaba que cucaa ca ridxi:

—Lii nga Xiiñi Dios.

Peru udinde né be laaca', qué nudii be lugar niní' ca', purti nanna ca laabe nga Cristu ni ulí Dios.

*Ra uzá Jesús Galilea*  
(Mr. 1.35-39)

<sup>42</sup> Ma zeda yaba biaani biree be de ndaani guidxi que, uyé be ti lugar ra iruti guinni. Peru stale binni canayubi laabe ne yendá ca ra nuu be. Ucalá'dxi ca nucueeza ca laabe para cadi ñe be.

<sup>43</sup> Peru rabi be laaca':

—Napa xidé chaa xcaadxi guidxi. Chi güe nia binni modo runi mandar Dios, partí para nga bendá'.

<sup>44</sup> Ne zacá uzá be Galilea, yeusiidi be irá ra yu'du'.

## 5

### *Bigaa stale benda*

(Mt. 4.18-22; Mr. 1.16-20)

<sup>1</sup> Ti tiru nuu Jesús uríá ti nisa ro' rabi cabe Genesaret, bidxiña stale binni ra nuu be dede calaa saa ca'. Irá ca racaladxi ca guna diaga ca stiidxa Dios.

<sup>2</sup> Biiya be zuhuua chupa canuá uríá nisa que, iruti nuu ndaani partí biree ca guuze que caguiibi ca starraya ca'.

<sup>3</sup> Para biuu be ndaani tobi de laani bia'si pe ndaani canuá sti Simón. Ne gudxi be laa utuuba huiini ni de ruua nisa, ne guri be ndaani canuá que. Dede raqué bisiidi be ca binni que.

<sup>4</sup> Biluxé bisiidi si be ca binni que, rabi be Simón:

—Yené canuá stiu' ra zia', ne lausaba starraya tu para inaaze tu benda.

<sup>5</sup> Oraque na Simón:

—Maistru, idubi gueela bini du dxiiña ne gastí qué nina'ze du, peru yáquexa lii caya'bu laadu guni du ni la? chi usaba du starraya du.

<sup>6</sup> Ora bisaba cabe starraya cabe bidxá tipa ni de benda dede careza ni.

<sup>7</sup> Para guridxi cabe xcaadxi xcompañeru cabe ni nuu ndaani sti canuá, gueda acané ca laacabe. Oraque

beeda ca ngue ne bichá tipa cabe iropa canuá que de bilá ñaazi cani.

<sup>8</sup> Ora bi'ya Simón Pedru ni, bizuxibi xañee Jesús ne na:

—Bixele de naa, Señor, partí naca tobi hombre nabé ruchee.

<sup>9</sup> Uní' be zacá partí cadx-agayaa be de cayaca dití be pur irá benda que, ne cadí laasi be, sinuque ne ca xcaadxi ni nuu né laabe raqué.

<sup>10</sup> Lade cabe zeeda Jacobo ne Juan, ca xiiñi Zebedeu, tobi si runi né ca Simón dxiiña'. Peru na Jesús rabi Simón:

—Cadi idxibi lu'. Dede yanadxí cásica rinaaze lu benda, zacaca zeda neu stale binni ra nuua'.

<sup>11</sup> Ulee si cabe ca canuá que lu yuxi, bisaana cabe irá ni raqué, zinanda cabe Jesús.

*Ra bianda tobi napa lepra*

(Mt. 8.1-4; Mr. 1.40-45)

<sup>12</sup> Ra canazá Jesús ndaani tobi de ca guidxi que, bidxiña ti hombre huará napa lepra laabe, bizuxibi xañee be dede gudixhe ique layú ne na rabi laabe:

—Señor, pa na lu la? zanda usianda lu naa.

<sup>13</sup> Oraque udixhe ná be luguiá' ne rabi be laa:

—Zusianda lii, ne mápeca bianda lu'.

Nisi pe binitilú lepra que óraque.

<sup>14</sup> Ne rabi be laa:

—Qué chi tidxi lu ni iruti'. Xi si ni rabe lii la? uyé ra yu'du ti gu'ya sacerdote lii ne bidii ofrenda ni na Moisés

udii cani guianda para ganna  
binni ma bianda lu'.

<sup>15</sup> Peru ze dxi jma rusi  
zireeche stiidxa Jesús, ne  
reeda stale binni, reeda  
ucaa diaga ca laabe, ne para  
usianda be laaca'.

<sup>16</sup> Peru gatigá rixele be de  
laaca' rie be ndaani gui'xhi'  
rini' né be Dios.

*Bianda ti hombre nayati  
galaa*

(Mt. 9.1-8; Mr. 2.1-12)

<sup>17</sup> Ti dxi ra cusiidi Jesús  
zuba caadxi fariseu ne  
caadxi maistru de ley ni  
beeda de idubi Galilea ne de  
Judea ne de Jerusalén. Ne  
cahuinni enda nandxó' sti  
Dios luguiá be ra cusianda  
be binni.

<sup>18</sup> Raqué nuu be bedané  
cabe ti hombre nexhe lu  
luuna', ma guti galaa, ne  
ucala'dxi cabe niguu cabe laa  
ndaani yoo ra nuu be que,

<sup>19</sup> peru qué nidxela cabe  
paraña ñuu cabe partí dxá  
binni raqué. Para udxí'ba  
cabe ique yoo, ulee cabe  
caadxi teja, ne undete cabe  
laabe, idubi ne luuna que.  
Gudixhe cabe laabe galahui  
ca binni que, ra lú Jesús.

<sup>20</sup> Ora bi'ya Jesús pabiá'  
napa cabe fe laa, na rabi ni  
huará que:

—Ma bine perdonar ca  
xpecadu lu, xiiñe'.

<sup>21</sup> Dede óraque bizulú ca  
fariseu ne maistru de ley  
candaa ique né ca':

—Tu hombre ri cayuni laa  
Dios pue. Dios si nga zanda  
guni perdonar binni, ne iruti  
ru'.

<sup>22</sup> Peru nanna dxichi Jesús  
xi cani' ique cabe, para na  
rabi laacabe:

—Xiñee cani' ique tu zacá.

<sup>23</sup> Xii nga jma qué igana,  
gabe hombre ri ma uca per-  
donar la? o gabe laabe: "Bi-  
asa, uzá."

<sup>24</sup> Naa nga Hombre  
Biseenda Dios ne para ganna  
tu zanda gune perdonar  
xpecadu binni ndaani guidx-  
ilayú ri la? laguuya ni chi  
gune ri'.

Ne óraque rabi be ni huará  
que:

—Biasa, bitopa jluuna lu',  
ma zanda chibí' lu'.

<sup>25</sup> Oraqueca biasa hombre  
que nezalú irá cabe bitopa  
jluuna', zibi'. Ne idubi neza  
ziudii diuxquixe Dios.

<sup>26</sup> De irá cabe bidxagayaa  
cabe ne bisisaca cabe Dios.  
Dede cayaca dití cabe, na  
cabe:

—Enda ridxagayaa nga ni  
bidu'ya nu yanadxí ri'.

*Ra uní' né Jesús Leví*

(Mt. 9.9-13; Mr. 2.13-17)

<sup>27</sup> Uca si irá nga biree  
Jesús, ze'. Ra zidi'di be biiya  
be zuba Leví ra ruquixe im-  
puestu. Para rabi be laa:

—Dananda naa.

<sup>28</sup> Oraqueca biasa, bisaana  
irá ngue, zinanda laabe.

<sup>29</sup> Ne bidii Leví ti endaró  
laabe. Uyé stale ni ruquixe  
impuestu ne stale binni guri  
né laacabe ruua mexa que.

<sup>30</sup> Oraque bizulú ca fariseu  
ne ca jmaistru ca' caní' ca  
Jesús ne ca discípulu sti', na  
ca rabi ca ca discípulu que:

—Xiñee ro né tu ca malu ni ruquixe impuestu ne cani qué rulabi ley.

<sup>31</sup> Para na Jesús rabi laaca':

—Cadi caquiiñe cani nazaaca doctor, sínunque cani huará.

<sup>32</sup> Cadi zeda yube cani nacha'hui sínunque cani cuchee, para inaba ca perdón Dios ne uchaa ca xpia' ca'.

### Ejemplu sti novio

(Mt. 9.14-17; Mr. 2.18-22)

<sup>33</sup> Oraque na ca rabi ca laabe:

—Xiñee ca discípulu sti Juan ne sti ca fariseu stale tiru riaana ca sin go ca' ne nabé rini' né ca Dios, peru ca stiu' la? qué lica ruchuugu ca lu endaró.

<sup>34</sup> Para rabi be laaca':

—Lácaxa ñaana cani nuu ra enda xheela sin ño laga nuu novio lade ca'.

<sup>35</sup> Peru zadxiña dxi guiaaxha cabe novio. Oraque huaxa ziaana cabe sin go cabe.

<sup>36</sup> Ne laca gudixhe be ti ejemplu para laaca, na:

—Lácaxa ñuu tu nicheza tindaa vestidu cubi, nucaa lu ti vestidu yooxho'. Purti pa ñuni cabe ni, nunitilú cabe vestidu cubi ne laca qué nidxaaga ni ucheza cabe que vestidu yooxho'.

<sup>37</sup> Ne zaqueca iruti rigaa vinu cubi ndaani guidi yooxho', purti pa ñuni cabe ni la? nicheza ni guidi que. Cásica ninitilú vinu que, zaqueca ninitilú guidi que.

<sup>38</sup> Nga runi naquiiñe idaa vinu cubi ndaani guidi cubi ti iropa ni guiaana ni bia'si.

<sup>39</sup> Ne zaqueca cani ma biaa gue vinu yooxho', qué zaná gue vinu cubi, purti zaná jma galán vinu yooxho'.

## 6

*Undadi ca discípulu zee dxi enda riziila'dxi'*  
(Mt. 12.1-8; Mr. 2.23-28)

<sup>1</sup> Ti dxi enda riziila'dxi zidi'di Jesús ne ca discípulu sti ndaani ti ñaa, ne bizulú ca discípulu undadi ca zee gudó ca'.

<sup>2</sup> Oraque na caadxi fariseu:

—Xiñee cayuni tu ni cadi jneza guni binni dxi enda riziila'dxi'.

<sup>3</sup> Para na Jesús rabi laaca':

—Ñee qué huayuunda tu xi bi'ní David, laa ne cani canazá né, dxi candaana ca la?

<sup>4</sup> Biuu be ndaani yu'du sti Dios, ucuaa be ca pan ni ma uyuu ndaaya'. Gudó be, ne bidii be cani canazá né be que, gudó ca', neca na ley ca sacerdote si zanda go cani, peru laacabe gudó cabe ni.

<sup>5</sup> Naa nga Hombre Biseenda Dios, ne naa zanda gabe binni xii nga jneza guni dxi enda riziila'dxi'.

*Tobi hombre nabidxi ti chu ná'*

(Mt. 12.9-14; Mr. 3.1-6)

<sup>6</sup> Bigueta sti dxi enda riziila'dxi biuu Jesús ndaani yu'du' ne bizulú cusiidi'. Nuu ti hombre raqué nabidxi ti chu ná ladu derechu.

<sup>7</sup> Nuu ca maistru de ley ne ca fariseu raqué para si undaachi ca pa zusianda be

binni huará dxi enda riziila'dxi' ti gapa ca xi pur cu'ca xqueja be.

<sup>8</sup> Peru laabe nanna be xi cá ique ca', para rabi be dxa hombre nabidxi ti chu ná que:

—Biasa, bizuhuua galahui ca.

Oraqueca biasa hombre que, bizuhuua.

<sup>9</sup> Oraque rabi be xcaadxi que:

—Chi naba diidxa laatu xixa. Xii nga nexhe aca dxi enda riziila'dxi', acané nu binni la? o guniná nu laa; ulá nu xpida binni la? o guuti nu laa.

<sup>10</sup> Oraque biiya dxi be irá cani ri laabe ne rabi be dxa hombre que:

—Bisigaa nou'.

Ne bisigaa ná hombre que ne bianda.

<sup>11</sup> Peru nabé bidxiichi ca binni que ne cani' stiidxa ca xi zanda guni ca laabe.

*Ra zeeda lá irá apóstol  
(Mt. 10.1-4; Mr. 3.13-19)*

<sup>12</sup> Ca dxi que biree Jesús uyé lu ti dani, yení' né Dios. Ne idubi gueela que gutaná be uni' né be Dios.

<sup>13</sup> Birá si gueela guridxi be cani canananda laabe ne guli be doce de laaca' ne ulee lá be laaca apóstol.

<sup>14</sup> Lade cabe zeeda Simón ni na be iree lá Pedru, ne Andrés bi'chi', ne Jacobo ne Juan, ne Felipe, ne Bartolomé,

<sup>15</sup> ne Mateu ne Tomás, ne Jacobo xiñi Alfeu, ne Simón ni guyuu lade ca cananista chiqué,

<sup>16</sup> ne Judas bi'chi Jacobo, ne Judas Iscariote, dxa ni bitoo laabe que.

*Ra bisiidi Jesús stale binni  
(Mt. 4.23-25)*

<sup>17</sup> Ne óraque biete irá cabe de lu dani que dede ra bedandá cabe ra napampa. Ora bedandá cabe biiya cabe ri binni raqué ni beeda de idubi Judea ne de Jerusalén ne de ca guidxi nuu uriá nisadó'. Tiro ne Sidón. Beda ucaa diaga ca laabe, ne para usianda be laaca'.

<sup>18</sup> Ne laca bisianda be cani riguite binidxaba ique.

<sup>19</sup> Irá binni racala'dxi cana laabe partí nuu enda nandxó' sti Dios luguiá be ne nanna ca neca cana si ca laabe zianda ca'.

*Ni rusieche ne ni runiná  
(Mt. 5.1-12)*

<sup>20</sup> Oraque biiya dxi be ca discípulu stibe ne na be:

—Dichoso de laatu, cani qué gapa gastí', partí stitu ni napa Dios ladxi ná'.

<sup>21</sup> Dichoso de laatu, cani candaana partí ziuu dxi idxá tu.

Dichoso de laatu, cani cayuuna yanna, partí ziuu dxi uxidxi tu.

<sup>22</sup> Dichoso de laatu ora aca nanala'dxi cabe laatu, ne qué na cabe idxaaga cabe laatu, ne ulaa cabe diidxa laatu, ne qué lica racala'dxi cabe guna diaga cabe lá tu partí xpinni Hombre Biseenda Dios laatu.

<sup>23</sup> Laguieche dxi que, dede idxá ladhidó' to de enda nayeche', partí nabé sicarú ni cabeza laatu ibá', partí zacaca bi'ni ca bixhoze gola

cabe ca profeta ni uyuu chiqué.

<sup>24</sup> Peru lagapa gá si laatu, cani napa bidxichi, purti enda nayeche stitu nga.

<sup>25</sup> Lagapa gá si laatu, cani dxá dxá ca ndaani yanna, purti ziuu dxi indaana tu.

Lagapa gá si laatu, cani cuxidxi yanna, purti ziuu dxi gacaná ladxidó' to dede gu'na tu.

<sup>26</sup> Lagapa gá si laatu ora udxiba binni laatu, purti zacaca bi'ni ca bixhoze gola cabe. Bidxiiba ca ni cadi dxandí profeta.

*Enda ruquixe ni guni stobi laa*

(Mt. 5.38-48; 7.12)

<sup>27</sup> Peru ndi nga ni racal-adxe gabe laatu, cani cucaa diaga naa. Laganaxhii cani qué na chu' né laatu tobi si, ne lagacané cani nanala'dxi laatu.

<sup>28</sup> Lacuu ndaaya cani riguu dí laatu, lainí' né Dios pur cani riní' laatu.

<sup>29</sup> Pa chu' tu capa xa diaga tu la? laudii ca né sti ladu. Pa chu' tu gaxha laatu chamarra stitu, laudii ca laa ne xcamixa tu.

<sup>30</sup> Tutiica inaba laatu laudii, ne tu gaxha laatu stitu la? cadi inaba tu ni laa.

<sup>31</sup> Laguni laacabe ni racala'dxi tu guni cabe laatu.

<sup>32</sup> Pa ganaxhii tu cani nadxii si laatu la? ñee na tu ma xiixa nga cayuni tu la? Purti dede ca binni qué rulabi ley sti Dios runi zacá.

<sup>33</sup> Ne zaqueca pa gacané tu cani racané si laatu la? cadi caguu tu gasti lú ni, purti

zacaca runi cani qué rulabi ley sti Dios.

<sup>34</sup> Ne pa utiiñe tu cani rutiiñe si laatu la? cadi caguu tu gasti lú ni purti zacaca runi cani qué rulabi ley sti Dios. Rutiiñe ca' cani nanna ca zutiiñe laaca'.

<sup>35</sup> Peru laatu la? laganaxhii cani cadi nadxii laatu ne lagacané laaca', ne lautiiñe sin cueza tu utiiñe cabe laatu. Pa guni tu zacá la? nabé naro'ba ziaxa tu, ne zahuinni dxandí xiiñi Dios laatu. Purti laabe nacha'hui be ne cani qué rudii diuxquixe laabe ne cani cuchee né laabe.

<sup>36</sup> Laguiá binni casi riá Dios stitu binni.

*Enda rudxiiba donda ique stobi*

(Mt. 7.1-5)

<sup>37</sup> Cadi udxiba tu donda ique binni ti cadi quiba donda ique tu, ne laguni perdonar stobi ti guni perdonar Dios laatu.

<sup>38</sup> Lagacané stobi de ni caquiiñe', ne laca zacané Dios laatu de ni caquiiñe tu. Zuchá tipa be ná tu dede zaxii. Purti bia' ca udii tu stobi bia' queca icaa tu.

<sup>39</sup> Oraque gudixhe be ti ejemplu para laaca rabi be laaca':

—Qué zanda inaaze ti lú cheepa ná sti lú cheepa', purti pa ñuni cabe ni la? iropa cabe ñaba cabe ndaani barranca.

<sup>40</sup> Tobi ni caziidi la? qué ziuu dxi tidi lú jmaistru, sin-uque ora ma binduuxe, ma nanna bia' nanna jmaistru.

<sup>41</sup> Ximodo zanda gu'ya lu guixi nuu lú stobi ne qué gu'ya lu bandadi nuu lú lu ya'.

<sup>42</sup> O ximodo zanda gabi lu stobi: "Dané cuee guixi nuu lú lu ca, xhamigua'." Ne lii zaa nuu bandadi ca lú lu la? Cadi quitu binni. Gulee ca bandadi nuu lú lu ca, ti ganda guuya chaahui lu cuee lu guixi nuu lú stobi.

*Pur ni guni binni zahuinni tu laa*

(Mt. 7.17-20; 12.34-35)

<sup>43</sup> Pa nazaaca ti yaga cuananaxhi la? qué zacá cuananaxhi ni cadi galán lú. Ne zaqueca pa qué iquiiñe ti yaga la? qué zacá cuananaxhi galán lú.

<sup>44</sup> Irá yaga rihuinni xi yaga laa pur ca cuananaxhi sti'. Qué zanda uchuugu lu du'ga lu yaga guichi yaa, ne qué zanda uchuugu lu uvas lu yaga guichi gueda.

<sup>45</sup> Pa nacha'hui ti binni la? zuni enda nacha'hui partí nga nga ni nuu ndaani ladxidó', ne binni ni nadxaba la? runi enda nadxaba', partí nga nga ni nuu ndaani ladxidó'. Partí de ndaani ladxidó' cabe riaaxha ni rini' cabe.

*Ti hombre nuu xpiaani' ne tobi nahuati*

(Mt. 7.24-27)

<sup>46</sup> Xiñee rabi tu naa, "Señor, Señor", peru qué runi tu ni rabe'.

<sup>47</sup> Chi tidxe laatu ximodo zeda gaca cani gueda ucaa diaga stiidxa' ne guni ni na ni.

<sup>48</sup> Zeda gaca ca casi ti hombre bicuí lidxi. Gudaañe

guete dede yendá guie ne lu guie que undaa cimientu. Biree guiigu bidiñe ntaa nisa cue' yoo que. Qué lica ninibí ni partí zuba ni lu guie.

<sup>49</sup> Peru cani ucaa diaga naa ne qué guni ni gabe la? zeda gune laaca casi stobi hombre bicuí lidxi lu yuxi sin nindaa cimientu. Casi pe bidxá guiigu bidxela saa nisa cue' ni, bixá ca ni. Nin stindaa huiini ni qué ñaana.

## 7

*Fe sti ti capitán*

(Mt. 8.5-13)

<sup>1</sup> Biluxé byui' né si Jesús ca binni que diidxa', biree uyé Capernaum.

<sup>2</sup> Ne raqué nabeza ti capitán romanu, napa ti mozo nabé nadxii. Peru huará mozo que dede mayaca gati'.

<sup>3</sup> Ora bina diaga capitán que cayuí' cabe stiidxa Jesús, biseenda chupa chonna xaíque sti ca judíu chi naba Jesús gueeda usianda mozo que.

<sup>4</sup> Ora yendá cabe ra nuu Jesús bizulú cabe cayabi cabe laa:

—Biá la' capitán ca, Señor. Ucané laabe partí nacha'hui be:

<sup>5</sup> Nadxii be binni laanu. Laape be bisenda ucuí be xhyu'du du ndaani guidxi ri'.

<sup>6</sup> Para biree Jesús ziné laa-cabe. Nécati mayaca chindá cabe ra yoo que, biseenda capitán que chupa xhamigu chi tidxi Jesús:

—Señor, cadi gapu dxiiña gueda ndou de ralidxe', partí iruti naca'.

<sup>7</sup> Nga runi nin qué ñune pur niree naa pia' niyube lii. Uní si, ne zacá zianda mozo stinne'.

<sup>8</sup> Partí naa ca' nanna ximodo ni. Napa tu runi mandar naa ne napa tu rune mandar. Pa gabe tobi: "Uyé rarica", zie. Gabe stobi: "Gudá' rari", zeeda. Ne pa useenda mozo stinne chi guni xiixa la? zuni.

<sup>9</sup> Nabé bidxagayaa Jesús de ni uni' capitán que, ne biiya dxi irá binni nanda laa, ne na:

—Laguuya si pabiá' fe napa hombre ri', nin lade cani za de Israel qué huadxela tu napa fe bia' napa be.

<sup>10</sup> Ne ora yendá cani yeyubi Jesús yoo, ma bianda binni huará que.

*Bisibani Jesús xiini ti vi-  
uda*

<sup>11</sup> Qué nindaa de ngue biree Jesús, ze ti guidxi huiini lá Naín, nanda ca discípulu ne xcaadxi binni.

<sup>12</sup> Ora yendá uriá guidxi que, biiya ziuchaachi cabe ti gue'tu', tobi lucha xiiñi ti vi-  
uda. Ne stale binni guidxi que ziuchaachi gue'tu que.

<sup>13</sup> Ora bi'ya be gunaa que biá be laa ne rabi be laa:

—Cadi gu'na lu'.

<sup>14</sup> Ne bidxiña be uda'na be cajón que, para biaana dxi cani nua ni que. Oraque rabi be gue'tu que:

—Biasa, xiiñe'. Canié nia lii.

<sup>15</sup> Oraque biasa hombre huiini que ne bizulú cani'. Para bidii be laa jñaa.

<sup>16</sup> Ora bi'ya irá binni que ni guca', nabé bidxibi ca' ne bizulú ca cudii ca diuxquixe Dios, ne na ca':

—Ma biree ti profeta nandxó' lade nu. Ma zeda gacané Dios ca xpinni.

<sup>17</sup> Idubi naca Judea ne ca guidxi huiini nuu gaxha bireeche stiidxa Jesús.

*Ra uyé ca xpinni Juan  
Bautista ra nuu Jesús  
(Mt. 11.2-19)*

<sup>18</sup> Gudxi ca discípulu sti Juan laa irá ni guca que. Para guridxi chupa de laacabe,

<sup>19</sup> biseenda chi naba diidxa Jesús pa laa nga Cristu ni nexhe gueeda o pa zabeza cabe stobi.

<sup>20</sup> Casi yendá cabe ra nuu Jesús bidxiña cabe laa ne rabi cabe laa:

—Biseenda Juan Bautista laadu, zeda naba diidxa du lii pa lii nga Cristu ni nexhe gueeda o pa zabeza du stobi.

<sup>21</sup> Ora pe yendá cabe raqué cusianda Jesús stale binni huará ne binni ni napa yuuba', ne cabee binidxaba de binni, ne cusiná cani nacheepa lú.

<sup>22</sup> Para na rabi laacabe:

—Lachitidxi Juan irá ni bi-  
iya tu ne ni bina diaga tu.  
Lagüi' né laabe ma riná cani nacheepa lú, ma rizá cani nachiita ñee, ma bianda cani gupa lepra, ma runa diaga ca diaga cuata', ne bibani ni ma guti, ne ma cayuna diaga ca pobre stiidxa Dios.

<sup>23</sup> Dichoso cani guni cre  
Dios biseenda naa.

<sup>24</sup> Biree si cani biseenda  
Juan que ze', byui' né Jesús  
ca binni que de Juan, na rabi  
laaca':

—Tu yeguuya tu ndaani  
gui'xhi'. Nee yeguuya tu tobi  
ni rului' ti gueere lase ni uni-  
ibi bi laa ladu na la?

<sup>25</sup> Pa cadi nga la? tu  
yeguuya tu ya'. Nee yeguuya  
tu ti hombre zuchaahui la?  
Peru laatu nanna tu cani  
zuchaahui ne cadi cayaadxa  
laa gasti la? cadi nabeza  
ndaani gui'xhi sinuque  
ndaani lidxi rey.

<sup>26</sup> Lagabi naa tuu nga yegu-  
uya tu. Ti profeta la? Nga  
nga laani, ne jma pe que ti  
profeta.

<sup>27</sup> De Juan nga ruzeete  
Xqui'chi Dios ra na:  
Zuseenda ti xpinne sa niru lú  
lu',

guni chaahui neza tidi lu'.

<sup>28</sup> Laucaa diaga ni chi tidxe  
laatu ri'. De lade irá binni,  
qué huaree ti profeta jma  
nandxó' que Juan, peru dede  
ni jma huaxié' risaca lade ca  
xpinni Dios, jma nandxó' que  
laabe.

<sup>29</sup> Ora bina diaga ca binni  
que ni na Jesús, na ca jneza  
runi Dios. Cani uni' ni la?  
nga cani unaba cu' nisa Juan  
laaca', ne lade cabe zeeda  
caadxi ni ruquixe impuestu.

<sup>30</sup> Peru ca fariseu ne ca  
maistru de ley qué niza-  
ala'dxi ca ni ma gudixhe Dios  
para laaca', ne qué ninaba ca  
niguu nisa Juan laaca'.

<sup>31</sup> —Tu zanda usaca nu ca  
binni nuu yanna ri', na Jesús.

—Tu rului' cabe.

<sup>32</sup> Zeda gune laacabe casi  
ca xcuidi riguite luguiaa. Ma  
cucaa ridxi ca ni caguite né  
ca': "Bixhidxi du saa peru  
qué niná tu nuyaa tu, ne  
bixhidxi du son gue'tu' peru  
qué niná tu ñuuna tu."

<sup>33</sup> Zacá nga laatu. Beeda  
Juan Bautista, qué ro, qué  
re' vinu ne na tu nuu né  
binidxaba'.

<sup>34</sup> Yanna ma benda lade tu,  
naa nga Hombre Biseenda  
Dios. Rahua' ne ree', ne na  
tu nalaya' ne binigüé' naa ne  
ridxaaga ca malu ni ruquixe  
impuestu ne cani qué rulabi  
ley.

<sup>35</sup> Nga na tu laatu peru cani  
riene la? rusihuinni jneza  
runi Dios.

*Ra yetó Jesús ralidxi ti  
fariseu*

<sup>36</sup> Bini invitar tobi de ca  
fariseu que Jesús chi to né  
gueta ralidxi. Para guyé  
Jesús ne gurí ruaa mexa'.

<sup>37</sup> Ndaani guidxi que  
nabeza ti gunaa canazá si.  
Ora gunna be cayó Jesús  
gueta ralidxi fariseu que,  
yené be ti frascu dxá aceite  
rindá' naxhi.

<sup>38</sup> Casi biuu be guri be xa  
ñee Jesús ne bizulú be cayu-  
una be. Gudiibi be ñee Jesús  
irá nisa biete lú be ne bicui-  
idxi né be ni guicha ique be.  
Gudó be bixidu ni, ne bichá  
be aceite rindá' naxhi que ni.

<sup>39</sup> Ora bi'ya fariseu que xi  
cayuni be, na:

—Pa ñaca dxandí profeta  
ndi la? ñanna gunaa canazá  
si caga'na laa.

<sup>40</sup> Oraque na Jesús, rabi fariseu que:

—Simón, napa xiixa gabe lii.

—Xi laa, Maistru, na.

<sup>41</sup> Para rabi be laa:

—Uyuu chupa hombre bizaabi ni ruquixe vueltu. Tobi que bizaabi gaayu gayuua denariu, stobi que cincuenta si.

<sup>42</sup> Peru qué gapa cabe ni quixe cabe ni, para bixhá hombre que lá cabe ti ihuinni ma cadi naquiiñe quixe cabe ni. Yanna gudxi naa uná de laacabe jma nadxii laabe.

<sup>43</sup> Para na Simón:

—Para naa la? ruluí' ni jma bizaabi stale que.

—Jneza, rabi be laa.

<sup>44</sup> Ne biiya dxi be gunaa que, ne bigueta rabi be Simón:

—Biuaa rali'dxu ne qué nudiiu nisa ña'ri ñee', peru biiya gunaa ri gu'yu', gudiibi ñee ne nisa biete lú ne bicuidxi né ni guicha ique.

<sup>45</sup> Qué ño lo bixidu deche naya', peru laabe dede biuaa qué huayaana dxi be de go be bixidu ñee'.

<sup>46</sup> Ne qué niguu lu aceite ique', peru laabe bichá be aceite rindá' naxhi ñee'.

<sup>47</sup> Nabé huachee be peru ma bixhaya stonda be, nga runi nadxii be naa de idubi ladxidó' be. Peru cani huaxié' stonda rixá la? huaxié' ranaxhii ca'.

<sup>48</sup> Ne óraque na Jesús, rabi gunaa que:

—Ma bine perdonar lii.

<sup>49</sup> Bizulú nda cani zuba né Jesús ruaa mexa que uní' saa ca na ca':

—Tu hombre ri' zanda guni perdonar binni.

<sup>50</sup> Peru na Jesús rabi gunaa que:

—Bilá lu partí bini cre lu'. Sicarú uyé.

## 8

### *Ca gunaa ucané Jesús*

<sup>1</sup> Qué nindaa de ngue biree Jesús, canazá ca guidxi ro'ne guidxi huiini', canayuí' né binni modo runi mandar Dios. Ne doce apóstol stibe que canazá né laabe,

<sup>2</sup> ne cadi laasi ca' sínuque ne caadxi gunaa ni bisianda be ne ni ulee be binidxaba de laa que. Lade cabe zeeda María ni rabi cabe Magdalena, ni ulee be gadxe binidxaba de laa,

<sup>3</sup> ne Juana xheela Chuza, ni rapa cani runi xhiiña Herodes, ne Susana ne xcaadxi. Irá cabe ruchaaga cabe, racané cabe laabe.

### *Cuentu sti hombre yenduu bini*

(Mt. 13.1-9; Mr. 4.1-9)

<sup>4</sup> Stale binni biree de ca guidxi que yeguuya laabe. Biiya si be ma rí binni laabe, gudixhe be ti ejemplu para laaca',

<sup>5</sup> na be:

—Sicari bizaaca lú ti hombre, biree zinduu biní. Ra cusaba be xuba que biaba caadxi ni uriá neza. Biitu ñee cabe laa ne biete mani huiini gudó laa.

<sup>6</sup> Xcaadxi biaba lade guie. Undani ni peru nagueenda

bibidxi ni, purti qué gapa ni gudxa.

<sup>7</sup> Xcaadxi biaba lade guichi ne undani, peru jma bisoo guichi que para laacani ne biiti ca guichi que cani.

<sup>8</sup> Peru biaba xcaadxi ni ra nayá ne ca ngue huaxa ucuá lú dede nuu ra bidii ti gayuaa carreta niza.

Biluxé uni' si be nga bicaa be ridxi, rabi be laaca':

—Irá ni racala'dxi guiene la? ucaa diaga.

*Ra uni' Jesús xiñee riguixhe ejemplu*

(Mt. 13.10-17; Mr. 4.10-12)

<sup>9</sup> Oraque unaba diidxa ca discípulu stibe laabe xi riní' ejemplu que.

<sup>10</sup> Para rabi be laaca':  
—Laatu la? cudii Dios lugar guiene tu modo runi mandar, dede ni naga'chi'. Peru ca xcaadxi la? puru si ne ejemplu rue nia laaca', ti cadi gu'ya ca neca cayuuya dxi ca', ne cadi guiene ca neca cayuna diaga ca'.

*Xi riní' cuentu sti hombre yenduu bini*

(Mt. 13.18-23; Mr. 4.13-20)

<sup>11</sup> Ndi nga ni riní' ejemplu ca. Ca xuba ca la? zeda gaca casi stiidxa Dios.

<sup>12</sup> Ni biaba uríá neza que, ngue nga ca binni rucaa diaga stiidxa Dios, peru raxha binidxaba ni ndaaní ladxidó' ca ti qué guni cre ca ne qué ilá ca'.

<sup>13</sup> Ne cani biaba lade guie que, ngue nga ca binni rucaa diaga stiidxa Dios ne ricaa ca ni ne enda nayeche'. Riaana

né ca ni caadxí, peru casi pe queeda xiixa naná maca zixele ca', purti qué nicaa xcú chaahui ni ndaaní ladxidó' ca'.

<sup>14</sup> Ne cani biaba lade guichi que, ngue nga ca binni rucaa diaga stiidxa Dios, peru jma cá ique ca dxiiña ne gapa ca bidxichi ne guiaca ca', ne irá nga ruuti stiidxa Dios ne ma qué riree ndu.

<sup>15</sup> Ne cani biaba layú ra nayá que, ngue nga ca binni naguudxi ladxidó'. Ora guna diaga ca stiidxa Dios ricaa ca ni de idubi ladxidó' ca'. Qué riuu dxi ixele ca' ne zacá riree ndu ni.

*Ejemplu sti linterna*  
(Mr. 4.21-25)

<sup>16</sup> Bigueta gudixhe be sti ejemplu, na be:

—Iruti rucaa gui linterna ne ruseegu xiixa lú ni o cu' ni xa'na luuna', sínunque rugaanda ni luguiá' ti tutiica guiuu gu'ya biaani'.

<sup>17</sup> Zaquea irá ni ye'gu lú yanna napa xidé ixele ti gu'ya binni xi laa, ne irá ni naga'chi yanna napa xidé ihuinni ti ganna binni ni.

<sup>18</sup> Nga runi laucaa diaga chaahui', purti cani napa la? zacaa jma, peru cani qué gapa, dede ni na napa zi-aaxha.

*Jñaa Jesús ne ca bi'chi'*  
(Mt. 12.46-50; Mr. 3.31-35)

<sup>19</sup> Raqué nuu be beeda jñaa be ne ca bi'chi be, peru qué ñanda nidxiña ca laabe purti ri binni laabe.

<sup>20</sup> Para biree tobi, na rabi laabe:

—Racá fuera ca zuhuua jñoou ne ca bi'chi lu'. Racala'dxi ca iní né ca lii.

<sup>21</sup> Peru laga na be rabi be laaca':

—Cani ucaa diaga stiidxa Dios ne guni ni na ni, ngue nga jñaa ne biche'.

*Gudixhe dxi Jesús bi yooxho'*

(Mt. 8.23-27; Mr. 4.35-41)

<sup>22</sup> Ti dxi biuu né Jesús ca discípulu sti ndaani ti canuá ne na rabi laaca':

—Latidi nisa ri'.

Para biaaxha cabe ze cabe.

<sup>23</sup> Ne ra zidi'di cabe nisa que gu'ta Jesús, gusi. Lu nisa que ze cabe gunaaze ti bi yooxho laacabe. Ne biguu ni nisa ndaani canuá que, dede ruluí ma chi guiaazi cabe.

<sup>24</sup> Para yeucuaani cabe Jesús, rabi cabe laa:

—¡Maistru, Maistru! ¡Ma chi gati nu!

Oraque biasa be, ne gudxi be bi yooxho que guiaana dxi, ne zaqueca gudxi be ola que, ne oraqueca guta dxí cani.

<sup>25</sup> Oraque rabi be laaca':

—Cadi ladxa runi cre tu naa la? Xi uca xa tu yanna.

Peru laaca nabé bidxibi ca' ne unaba diidxa saa ca':

—Tu laabe pue. Riní né be bi ne nisa, ne ruzuuba cani stiidxa be.

*Ti hombre riguite binidxaba ique*

(Mt. 8.28-34; Mr. 5.1-20)

<sup>26</sup> Zaqué ze cabe lu nisa que dede yendá cabe Gadara cherica de Galilea.

<sup>27</sup> Casi bizuhuaa ñee Jesús yu, bidxiña ti hombre de guidxi que ra nuu. Ma xadxí riguite binidxaba ique be. Qué racu be lari ne qué riaana be yoo. Nisi lade ba' canazá be.

<sup>28-29</sup> Stale tiru riguite binidxaba ique be ne rundiibi ca binni que cadena ná be ne ñee be. Peru ruchuugu be ni, ne riné binidxaba que laabe ndaani gui'xhi'. Casi bi'ya be Jesús bizuxibi be xañee ne bicaa be ridxi:

—Xi napa neu naa, Jesús Xiiñi Dios ni nandxó'. Rinaba lii cadi guniná lu naa.

Uní be zaqué parti cayabi Jesús binidxaba que usaana laabe.

<sup>30</sup> Ne na Jesús, rabi laabe:

—Tu lá lu'.

—Legión, na be.

Ngue na be lá be parti stale binidxaba nuu luguiá be.

<sup>31</sup> Ne unaba ca binidxaba que Jesús cadi useenda laaca gabiaá.

<sup>32</sup> Bia'si canayó jma bihui cue' ti dani neza ra nuu cabe que. Para unaba ca binidxaba que Jesús udii lugar chu' ca luguiá ca bihui que. Ne bidii Jesús lugar.

<sup>33</sup> Para biree ca de hombre que, yechuu ca luguiá ca bihui que, ne biete tí ca bihui que de ra dxi'ba ca'. Bia'si pe ndaani nisa biaba ca', ne raqué guti ca'.

<sup>34</sup> Ora bi'ya cani cayapa ca bihui que ni uca que la? biaaxha ca yeuxooñe ca'. Ne bizulú ca byui' ca ni ndaani guidxi que ne irá ca ranchu ni nuu neza que.

<sup>35</sup> Para biree ca binni que ziguuya xi uca raqué. Ne ora yendá ca ra nuu Jesús biyya ca dxa hombre ni riguite binidxaba laa que, ma nacu lari, ma bigueta xpi-aani', zuba xañee Jesús. Ne bidxibi ca'.

<sup>36</sup> Byui' né cani bi'ya ra uca ni laaca ximodo bianda hombre que.

<sup>37</sup> Oraque gudxi ca binni que Jesús iree de ndaani guidxi que, purti cadxibi ca'. Para biuu Jesús ndaani canuá que ne ze'.

<sup>38</sup> Peru ante iree be ucalal'dxi dxa hombre ni bianda que niné laabe, para rabi be laa:

<sup>39</sup> —Bigueta rali'dxu ne byui' né laacabe pabiá' nandxó' ni bi'ni Dios luguiá lu'.

Para biree hombre que ze', ne bizulú uzá idubi naca guidxi que. Byui' xi bi'ni Jesús laa.

*Ra bisibani Jesús xiiñi Jairu ne bisianda ti gunaa*

(Mt. 9.18-26; Mr. 5.21-43)

<sup>40</sup> Ora yendá Jesús cherica nisa que, bichagalú ca binni que laa ne stale enda nayeche', purti irá ca cabeza ca laabe.

<sup>41</sup> Oraque bidxiña ti hombre lá Jairu naca xaíque sti yu'du'. Bizuxibi xañee be ne na chiné be laa ralidxi,

<sup>42</sup> purti cayati tobi lucha xiiñi', ti badu dxaapa de doce añu. Para biree be ze be, peru stale binni zinanda laabe, dede calá saa ca'.

<sup>43</sup> Lade ca binni que zeeda ti gunaa ma raca doce añu de

caxii rini. Ma birá ni napa, biniti luguiá doctor, ne iruti ñanda nusianda laa.

<sup>44</sup> Bidxiña neza deche be, guda'na ñee xhaba be ne oraqueca bianda.

<sup>45</sup> Para na be:

—Tu guda'na naa.

Ne irá binni na cadi laa. Para na Pedru ne ca xcaadxi que, rabi laabe:

—Maistru, cayuuyu modo cuquiichi binni lii ne nou' tu guda'na lii.

<sup>46</sup> Peru na be:

—Uyuu tu guda'na naa, purti nanna bisianda tuuxa ne enda nandxó' sti Dios ni nuu luguiá'ya'.

<sup>47</sup> Biiya si gunaa que ma bigaa la? cayaca dití bizuxibi xañee be ne ulee ruua diidxa xiñee guda'na laabe, ne casi guda'na laabe bianda ca.

<sup>48</sup> Para rabi be laa:

—Bianda lu, xiiñe', purti bini cre lu'. Yanna sicarú uyé.

<sup>49</sup> Caní' ru be biuu ti xpinni Jairu, na rabi laa:

—Ma guti xiiñi lu'. Ma cadi uchiiña rou' Maistru.

<sup>50</sup> Peru ora bina diaga be ni, rabi be Jairu:

—Cadi idxibi lu'. Bini cre, ne zianda xiiñi lu'.

<sup>51</sup> Ne ora yendá cabe ralidxi Jairu biuu né be laa ne xheela' ne Juan ne Jacobo ne Pedru, ne ma qué niná ru be ñuu iruti'.

<sup>52</sup> Rí stale binni raqué, cayuuna cucaa ridxi peru rabi be laaca':

—Cadi gu'na tu purti cadi guti badu dxapa huiini ca, sinuque nisiaasi si.

<sup>53</sup> Laga bixidxi ca laabe, purti nanna dxichi ca' ma guti ba'du que.

<sup>54</sup> Oraque unaaze be ná ba'du que ne rabi be laa:

—Biasa xiiñe'.

<sup>55</sup> Oraqueca bibani ba'du que ne biasa. Para gudxi be laaca udii ca ni go ba'du que.

<sup>56</sup> Nabé bidxagayaa bixhoze ba'du que ne jñaa. Peru biinda be lú ca qué chi tidxi ca iruti'.

## 9

*Ra yegüí ca discípulu stiidxa Dios*

(Mt. 10.5-15; Mr. 6.7-13)

<sup>1</sup> Guridxi Jesús doce discípulu sti que, ne gudixhe ladxi ná cabe cuee cabe binidxaba de binni, ne usianda cabe binni huará.

<sup>2</sup> Biseenda laacabe chi güi cabe modo runi mandar Dios ne usianda cabe binni.

<sup>3</sup> Na rabi laacabe:

—Cadi chiné tu gasti ni iquiiñe tu neza, nin bastón, nin ixhiapa, nin pan, nin vueltu. Lachiné lari ni nacu si tu.

<sup>4</sup> Ne ra guiete tu la? laguaana ndaani yoo que dede dxi ma iree tu de guidxi que.

<sup>5</sup> Ne ra qué na cabe icaa cabe laatu, lairee de guidxi que, ne laquibi yu cá ñee tu casi ti seña bichee cabe ra qué niná cabe nucaa diaga cabe laatu.

<sup>6</sup> Para biree ca ze ca', uzá ca guidxi pur guidxi. Yegüí né ca binni stiidxa Dios, ne bisianda ca cani huará.

*Ra guti Juan Bautista*

(Mt. 14.1-12; Mr. 6.14-29)

<sup>7</sup> Ora bina diaga gobernador Herodes xi irá cayuni Jesús, bichenda ni laa, purti nuu tu na Juan Bautista bibani,

<sup>8</sup> ne nuu tu na Elías bigueta'. Xcaadxi na tobi de ca profeta ni uyuu chiqueña ma nabani sti tiru.

<sup>9</sup> Para na Herodes:

—Juan la? naa biseenda gaxha yanni. Peru tuu ndi na cabe cayuni irá ndi ya'.

Ne biyubi gu'ya laabe.

*Ra biyaana Jesús gaayu mil*

(Mt. 14.13-21; Mr. 6.30-44; Jn. 6.1-14)

<sup>10</sup> Ora bigueta ca apóstol de ra biseenda Jesús laaca', biyubi ca ra nuu Jesús ne byui' né ca laabe xi irá bi'ní ca'. Para ucuua be laaca' yené be laaca uriá guidxi Betsaida.

<sup>11</sup> Peru ora gunna binni paraa nuu be, yenanda ca laabe. Bichagalú be laaca ne byui' né be laaca modo runi mandar Dios. Ne bisianda be cani caquiiñe guianda.

<sup>12</sup> Ne raqué nuu cabe bidxi layú para bidxiña ca apóstol ra nuu be, na ca rabi ca laabe:

—Ñee cadi ma ñanda ña'bu ca binni ca ñe ca la? tila nidxela ca ra ñaana ca ne ni ño ca ndaani ca guidxi huiini ne ca ranchu nuu gaxha ca, purti ndaani gui'xhi ndi nuu nu.

<sup>13</sup> Para rabi be laaca':

—Laudii ni go cabe laatu.

Oraque na ca':

—Peru xi pe ndi napa du, gaayu pan ne chupa benda. O racala'dxu chi sí du ni go irá binni ri la?

<sup>14</sup> Ne nuu bia' gaayu mil hombre raqué. Oraque rabi be ca discípulu stibe:

—Laucuí ca binni ca neza cincuenta cincuenta.

<sup>15</sup> Ne zaqué bicuí cabe irá ca binni que.

<sup>16</sup> Ne ucuua be gaayu pan ne chupa benda que, undisa lú be ibá', bidii be diuxquixe Dios. Para undaa be cani, bidii be cani ca discípulu qui'zi lu ca binni que.

<sup>17</sup> Gudó irá ca binni que dede bidxá ca', ne biaana ru jma nandahui. Bitopa cabe bia' sti doce dxumi.

*Ra uní' Pedru tuu nga Jesús*

(Mt. 16.13-19; Mr. 8.27-29)

<sup>18</sup> Ti dxi yení né Jesús Dios, yené ca discípulu sti' ne ra nuu cabe que rabi be laaca':

—Tu na binni naa.

<sup>19</sup> Para na ca':

—Nuu tu na Juan Bautista lii, nuu tu na Elías, ne nuu tu na tobi de ca profeta ni uyuu chiqué, ma bíbani.

<sup>20</sup> —Laga laatu ya', rabi be laaca'.

—Tu rabi tu naa.

Oraque na Pedru:

—Lii nga Cristu ni ulí Dios.

*Bizeete Jesús chi gati*

(Mt. 16.20-28; Mr. 8.30-9.1)

<sup>21</sup> Peru biinda ca be lú ca' qué chi tidxi ca ni iruti'.

<sup>22</sup> Rabi be laaca':

—Naa nga Hombre Biseenda Dios. Naquiñe

tide stale enda naná. Zudxii deche ca xaíque sti guidxi ne ca xaíque sti ca sacerdote ne ca maistru de ley naa, ne zuuti ca naa, peru zabane raguionna gubidxa.

<sup>23</sup> Ne rabi be irá ca':

—Tu gacala'dxi gaca xpinne la? gusiaanda laca laa, ne cadi lica guiá xpida sínunque usaana ni lu naya irá dxi ne gueda nanda naa.

<sup>24</sup> Purti tu gacala'dxi ulá xpida la? zuniti ni, peru tu uniti xpida pur naa la? zalá.

<sup>25</sup> Paraa iquiiñe ni binni pa guni ganar idubi naca guidxilayú peru uniti xhialma.

<sup>26</sup> Purti tutiica ituí lú chi nanda naa ne stiidxa la? naa laca zatui lua inié xpinne laa dxi useenda Dios naa guenda casi ti rey ne enda nandxo' sti Bixhoze' ne sti ca ángel cha'hui'.

<sup>27</sup> Peru gabe ca' laatu, nuu caadxi rarí qué zati dede qué guuya ora ma cayuni mandar Dios.

*Ra biiya cabe bidxaa Jesús*

(Mt. 17.1-8; Mr. 9.2-8)

<sup>28</sup> Udi'di bia' xhono gubidxa de uní' Jesús ca nga, ucuua Pedru ne Juan ne Jacobo, udxi'ba né lu dani, yení né Dios.

<sup>29</sup> Ne laga nuu be caní' né be Dios mala biiya cabe ma adxé laabe. Naquichi bé bi-huinni xhaba be dede ria'qui biaani'.

<sup>30</sup> Ne cayuí' né be chupa hombre diidxa', Moisés ne Elías.

<sup>31</sup> Guionna cabe nuu cabe galahui xtuxhu ti biaani ro'.

Cuzeete cabe modo chi gati  
be Jerusalén.

<sup>32</sup> Ma nuu bacaanda lú Pedru ne xhupa que, peru qué niná ca ñasi ca'. Ne zacá gunda biiya ca cuzaani ladi Jesús ne xhupa zuhuua né laa que.

<sup>33</sup> Ma chi ixele ca hombre que de Jesús para na Pedru:

—Maistru, aque galán nuu nu rari nja'. Zanda guni du chonna ranchu huiini', tobi para lii, tobi para Moisés, ne stobi para Elías.

Peru nin ganna Pedru xi caní'.

<sup>34</sup> Caní' ru be mala biseegu ti za laacabe. Nabé bidxibi cabe ora bi'ya cabe nuu cabe lade za.

<sup>35</sup> Ne ucuá ti ridxi lade za que:

—Ndi nga Xiiñe' ni nadxiee'. Laucaa diaga laa.

<sup>36</sup> Biaana dxí si ridxi que, biiya cabe ma stubi Jesús nuu. Dxí dó' uyyu cabe ca dxi que. Iruti ñabi cabe ni bi'ya cabe que.

*Ra bisianda Jesús ti hombre huiini napa ataque*

(Mt. 17.14-21; Mr. 9.14-29)

<sup>37</sup> Sti dxi que ra ziyyete cabe lu dani beda chagalú stale binni Jesús.

<sup>38</sup> Mala biree tobi hombre lade ca binni que, bicaa ridxi na rabi Jesús:

—Maistru, biiya la' xiiñe'. Tobi lucha laabe napa'.

<sup>39</sup> Ne riguite binidxaba ique be rucaa be ridxi, rinaaze laabe, ruchuche laabe layú dede riree bupu ruaa be, ruxuixe laabe dede

yaca ti' guuti laabe. Oraque ru rundaa laabe.

<sup>40</sup> Ma unaba ca discípulu stiu' ñaxha ca binidxaba ca de laabe, peru qué ñanda.

<sup>41</sup> Oraque na Jesús:

—Aque qué runi cre tu xa, binni ca', ne naguidxi ladxidó' to. Dede padxí naquiiñe guiaana nia laatu ne gune huantar laatu ya'.

Oraque rabi be hombre que:

—Dané xiiñu ca rari'.

<sup>42</sup> Ma zidxiña hombre huiini que Jesús, unaaze binidxaba que laa, bitubi laa yu. Peru óraque udinde né Jesús binidxaba que ne oraqueca bianda hombre huiini que, para bidii be laa bixhoze.

<sup>43</sup> Nabé bidxagayaa irá ca binni que pabiá' nandxó' Dios.

*Bigueta bizeete Jesús zati*  
(Mt. 17.22-23; Mr. 9.30-32)

Ne laga cadxagayaa ca binni que irá ni cayuni be, rabi be ca discípulu stibe:

<sup>44</sup> —Laucaa diaga chaahui ni chi tidxe laatu ri', qué chi guiaanda ni laatu. Naa nga Hombre Biseenda Dios ne ma chi utoo cabe naa lu binni guidxilayú.

<sup>45</sup> Peru qué ñene ca xi cayabi be laaca', partí ma nexhe cadí guiene ca ni. Ne bidxibi ca ninaba diidxa ca laabe xi riní' ni.

*Tu laa jma risaca*

(Mt. 18.1-5; Mr. 9.33-37)

<sup>46</sup> Oraque bizulú ca discípulu cacaa yu ca uná de laaca jma risaca.

<sup>47</sup> Peru nanna Jesús xi caní' cabe, para ucuaa ti ba'du biziuhuaa cue'.

<sup>48</sup> Ne na rabi laacabe:

—Tutiica acané ba'du ri pur naa la? casi ñaca cayuni ni naa. Ne tu guni ni naa la? cayuni ni ni biseenda naa. Purti ni jma huaxié' risaca lade tu la? nga nga ni jma risaca.

*Ni cadi cucaa lú, cayacané  
(Mr. 9.38-40)*

<sup>49</sup> Biluxé si uní' Jesús, na Juan:

—Maistru, bidu'ya du ti hombre cuzeete lá lu ra cabee binidxaba de binni, peru bicueeza du laa partí cadi canazá né laanu.

<sup>50</sup> Para rabi be laa:

—Xiñee canaucueeza tu laabe, partí cani cadi cucaa lú laanu la? nuu né laanu tobi si.

*Ra udinde né Jesús Juan ne Jacobo*

<sup>51</sup> Dxi ma cazaa dxi ibigueta be ibá' udixhe ique be che be Jerusalén.

<sup>52</sup> Bisá niru be ca xpinni be ndaani ti guidxi sti Samaria para chi yubi ca ra guiaana be.

<sup>53</sup> Peru qué niná ca binni Samaria ñaana be raqué partí ze be Jerusalén.

<sup>54</sup> Ngue bi'ya Jacobo ne Juan para na ca rabi ca laabe:

—Señor, ñee racala'dxu inaba du guiba gua de ibá' para initilú cabe casi bi'ni Eliás chiqué la?

<sup>55</sup> Oraque biiya dxí be laaca ne udinde né be laaca', rabi be laaca':

—Nin qué ganna tu tu cayabi laatu iní tu zacá.

<sup>56</sup> Purti biseenda Dios naa ndaani guidxilayú ri cadi para uniteluá' binni sínunque para ula'ya laaca'.

Ne biree cabe ze cabe sti guidxi.

*Cani racala'dxi sa nanda Jesús*

*(Mt. 8.19-22)*

<sup>57</sup> Neza ze cabe na ti hombre rabi Jesús:

—Señor, racaladxe chi nanda lii ratiica cheu'.

<sup>58</sup> Para rabi be laa:

—Ca mistu gui'xhi la? napa ca cueva ra riaana ca', ne zaqueca ca mani huiini napa ca lidxi ca'. Peru naa nga Hombre Biseenda Dios, ne qué gapa nin ra quixhe ique'.

<sup>59</sup> Ne rabi be stobi:

—Dananda naa.

Para na ngue:

—Señor, bidii lugar ucaache sia' bixhoze'.

<sup>60</sup> Oraque rabi be laa:

—Bisaana nga guni ni qué na gueda nanda naa. Lii la? yegüí né binni modo runi mandar Dios.

<sup>61</sup> Oraque biree stobi na rabi laabe:

—Zinanda lii, Señor, peru chi tidxe sia' ca binni lidxe ma chaa'.

<sup>62</sup> Para na be:

—Ni quixhe ná lu aradu ne udxigueta lú atrá la? qué zaquiiñe para guni dxiiña'. Zaqueca ni gueda nanda naa ne ibigueta atrá la? qué zaquiiñe lade ca xpinni Dios.

**10**

*Biseenda Jesúus setenta chi güü stiidxa'*

<sup>1</sup> Uca si irá nga, ulí Señor sti setenta, ne biseenda laaca chupa chupa. Bisá niru be laaca lú be irá guidxi ne irá lugar ra che be.

<sup>2</sup> Ne rabi be laaca':

—Ma stale binni cabeza si ucaa diaga stiidxa Dios. Tu güü ni nga huaxié'. Yanna lainaba lu Dios guseenda stale tu guni dxiiña ca, ti laa nga xpixuaana ni.

<sup>3</sup> Yanna laché ne laguya', cuseenda laatu casi nuseenda dendxu huiini lade gueu'.

<sup>4</sup> Laché xie ñee tu. Cadi chiné tu ixhiapa, nin vueltu. Ne cadi ma ziyaana tu neza güü né tu binni diidxa'.

<sup>5</sup> Irá ra yoo ra chu' tu, nirudó' lainaba lu Dios cu' ndaaya ca binni nuu raqué.

<sup>6</sup> Ne pa gaca cabe nacha'hui ne laatu la? zaguu Dios ndaaya laacabe. Peru pa co' la? ma laatu nga cu' Dios ndaaya ne cadi laacabe.

<sup>7</sup> Laguiaana ndaani yoo ra na cabe icaa cabe laatu, cadi ma canazá tu yoo pur yoo. Ne lagó intiica udii cabe laatu, partí ni cayuni dxiiña la? naquiiñe guiaxa.

<sup>8</sup> Intiica guidxi chu' tu ne uchagalú cabe laatu, lagó intiisi quixhe cabe lú tu.

<sup>9</sup> Lausianda binni huará de guidxi que ne lagabi laacabe ma zeda dxiiña dxi guni mandar Dios.

<sup>10</sup> Peru pa chindá tu ti guidxi qué na cabe uchagalú

cabe laatu, lairee de raqué. Ne ora ma chi iree tu lagabi laacabe:

<sup>11</sup> "Laguuya gá laatu. Dede yu ni ucuá ñee du ndaani xquidxi tu chi ndadi du. Ne laganna dxichi biseenda Dios ni ñeeda tí de rey ndaani ladxidó' to."

<sup>12</sup> Ne gabe ca' laatu, jma naná zaca para guidxi que, dxi cuidxi Dios cuenta binni, que para guidxi Sodoma.

*Ca guidxi chi guiaba ná'  
(Mt. 11.20-24)*

<sup>13</sup> Lagapa gá si laatu, binni guidxi Corazín. Lagapa gá si laatu, binni Betsaida. Partí pa ñaca irá milagru ni uca nezalú tu ca ndaani guidxi Tiro ne Sidón la? biaa padxí ma ninaba ca perdón ne ñuu ca triste pur irá ni huachee ca'.

<sup>14</sup> Nga runi jma naná ziaba ná tu dxi cuidxi Dios cuenta binni, que para binni Tiro ne Sidón.

<sup>15</sup> Ne laatu, binni Caper-naum ca', ruluí' ma dxi'ba tu dede ibá' peru ziete tí tu ndaani gabía.

<sup>16</sup> Oraque rabi be cani cuseenda be que:

—Tu ucaa diaga laatu la? cucaa diaga naa. Ne tu udxii deche laatu la? laca cudxii deche naa. Ne tu udxii deche naa la? cudxii deche ni biseenda naa.

*Ra bigueta setenta que*

<sup>17</sup> Nabé nayeche bigueta setenta biseenda be que, na ca rabi ca laabe:

—Señor, dede ca binidxaba ruzuuba ca stiidxa du ora uze'te du lá lu'.

18 —Nanna', na Jesús rabi laacabe. —Biiya zeda yaba binidxaba de ibá' casi ti rayu.

19 Ma bine laatu nandxó' para ganda gutu ñee tu beenda ne meuxubi, ne para quixhe dxí tu binidxaba sin gacaná tu.

20 Peru cadí guieche tu purti ruzuuba binidxaba stiidxa tu, sínunque laguieche purti cá lá tu lu gui'chi ni napa Dios ibá'.

### *Ra bieche Jesús*

(Mt. 11.25-27; 13.16-17)

21 Ne óraque pe bichá Espíritu Santu ladxidó' Jesús de enda nayeche', ne na:

—Diuxquixe lii, Bixhoze'. Lii nga xpixuaana ibá' ne guidxilayú. Rudiee diuxquixe lii purti qué nudiiu lugar ñene cani riene ne cani nuu xpiaani irá ndi', sínunque bicaachi lu ni para bilu' lu ni cani zeda gaca casi ba'du'. Ne zacá bi'nu ni purti zacá racala'dxu gaca ni.

22 Oraque rabi be ca binni que:

—Ma gudixhe Bixhoze irá xixé cosa ladxi naya'. Naa nga Xiiñi be ne iruti runibiá' naa jma que laabe, ne zaqueca iruti runibiá' laabe, jma que naa ne cani racal-adxe gunibiá' laabe.

23 Biluxe uní' si be nga la? biiya dxí be ca discípulu stibe ne uní' né be laasi ca', rabi be laaca':

—Dichoso laatu pur irá ni cayuuya tu ri'.

24 Purti stale profeta ne stale rey ucaladxi ñuuya ni

cayuuya tu ri', ne qué ñuuya'. Ne ucaladxi ca ñuna diaga ca ni cayuna diaga tu ri', peru qué ñuu dxi ñuna diaga ca'.

### *Stiidxa samaritanu cha'hui'*

25 Oraque bidxiña ti maistru de ley ra nuu be ne na rabi laabe:

—Maistru, xi gune para gapa enda nabani ni qué zaluze.

Uní' zacá para gu'ya si pa zusaba laabe.

26 Para rabi be laa:

—Xi cá lu ley sti Moisés o ximodo riene lu ni.

27 Oraque na:

—“Gunaxhii Señor Dios stiu' de idubi naca ladxidó' lo', idubi xhialma lu', idubi xquenda biaani lu', ne irá stipa stiu'. Ne gunaxhii stobi casi nadxii lu lii.”

28 —Jneza uní', rabi be laa. —Yanna bi'ni zacá ti gapu enda nabani ni qué zaluze.

29 Peru ucaladxi hombre que nusihuinni jneza caní', para na rabi laabe:

—Tuu nga stobi ni riete lu ley ca naquiiñe ganaxhiee ya'.

30 Oraque rabi be laa:

—Sicarí bizaaca lú ti hombre. Zeda yete be de Jerusalén, ze be Jericó. Neza ze be que biree caadxi gubaana lú be, guxha irá ni ziné be, bisaana laabe xie ladi be, biti natí laabe. Oraque ru biree ca ze ca'.

31 Raqué nexhe be zeda di'di ti sacerdote. Ora bi'ya nexhe be raqué, udi'di zitu de laabe.

<sup>32</sup> Zaqueca bi'ni ti levita. Ora bidxiña ra nexhe be, biiya laabe ne bixele de laabe, ze'.

<sup>33</sup> Peru ratu huiini si que, za ti samaritanu. Ora bi'ya laabe biá laabe,

<sup>34</sup> bidxiña ra nuu be, ucuua aceite ne alcohol bichá ra ucaná be ne bindiibi ni. Oraque bidxiiba laabe deche mani sti'. Yené laabe ti ra yoo ra riete binni, ne raqué gupa laabe.

<sup>35</sup> Sti dxi que, ma para iree, ulee chupa moneda bidii xpixuaana yoo que, ne na: "Gupa laabe. Ne pa uniti rou' xiixa luguiá be la? ora ibigueta quixe ni."

<sup>36</sup> Yanna xi ra'bu', na Jesús rabi maistru de ley que, —uná de guionna hombre ni udi'di ra nuu ni biree gubaana lú que, gunaxhii stobi casi nadxii laa.

<sup>37</sup> Para na:

—Ni biá laabe que.

—Nga nga laani, rabi be laa. —Yanna uyé ne bi'ni zacaca.

*Ra yeganna Jesús María ne Marta*

<sup>38</sup> De raqué biree Jesús ze', yendá ti guidxi huiini', xquidxi ti gunaalá Marta. Ne bini invitar Marta laabe che be ralidxi.

<sup>39</sup> Napa Marta ti benda lá María, ne gurí María xañee be cucaa diaga.

<sup>40</sup> Peru Marta la? nisi canaree xieque raqué, tantu cá ique xhiiña'. Para bidxiña ra nuu be ne na rabi laabe:

—Señor, ñee nou' jneza cayuni benda', cudii lugar cayune irá ndi stube la?

Gudxi laabe gueda acané be naa.

<sup>41</sup> —Ah Marta, Marta, rabi be laa. —Aque stale ni naguu xaíque lu', ne nuu lu xizaa pur laa.

<sup>42</sup> Peru tobi si nga ni naquiñe uyubi binni ne María ma ulí ni jma risaca. Ne iruti zaxha ni laa.

## 11

*Xi modo iní né binni Dios (Mt. 6.9-15; 7.7-11)*

<sup>1</sup> Ti dxi nuu Jesús ti lugar, caní' né Dios. Biluxé si be, na tobi de ca discípulu stibe rabi laabe:

—Señor, bisiidi laadu iní né du Dios, casi bisiidi Juan ca discípulu sti'.

<sup>2</sup> Para rabi be laaca':

—Ora iní' né tu Dios la? sicari nga iní' tu: Bixhoze du ni nuu ibá', rinaba du gusisaca irá binni lii.

Ne idxiña dxi guni mandar lu'

ne gaca ni na lu'.

Cásica raca ni ibá', zaqueca gaca ni ndaani guidxilayú.

<sup>3</sup> Dané laadu endaró tidi né du dxi.

<sup>4</sup> Bisiaanda ni ruché' né du lii,

casi rusia'nda du ni ruchee né cabe laadu.

Ne cadi udiuu lugar cuba yú binidxaba laadu, sínuque bilá laadu de lu ná be.

<sup>5</sup> Ne laca rabi be laaca':

—Pa ñapa tobi de laatu ti xhamigu, ne ñe ralidxi xhamigu que bia' galaa gueela ne ñabi laabe:

"Xhamigua', bitiiñe la' naa chonna xqueta lu',

<sup>6</sup> purti beeda biuuza ralidxe', peru qué gapa ni quixhe lú."

<sup>7</sup> Ne nicabi ngue de ndaani yoo, niná: "Cadi uchiiña lu naa. Ma biseegua ra puerta' ne irá du ma nexhe du. Qué zanda guiasa udiee ni lii."

<sup>8</sup> Zaa naca ñasa be nudii be ni lii pur xhamigu be lii, peru rabe ñasa be nudii be lii irá ni caquiiñu para ma cadi niziñe rou' laabe.

<sup>9</sup> Nga runi cayabe laatu: Lainaba lu Dios, zudii laatu. Lauyubi, zadxela tu. Lauxhidxi ná', zaxele chu' tu.

<sup>10</sup> Purti tutiica inaba zacaa, ne ni uyubi zadxela, ne ni uxhidxi ná' zaxele chu'.

<sup>11</sup> Tu tobi de laatu ninaba xiiñi laa ti gueta, nudii ti guie, o ninaba laa ti benda, nudii ti beenda',

<sup>12</sup> o ninaba laa ti dxita, nudii ti meuhibi.

<sup>13</sup> Pa laatu cadi nacha'hui tu ne nanna tu gudii tu ni galán xiiñi tu la? lágaxa Bixhoze tu ni nuu ibá' qué udii Espíritu Santu ni inaba laa.

*Na cabe nuu né Jesús binidxaba'*

(Mt. 12.22-30; Mr. 3.19-27)

<sup>14</sup> Ti dxi nuu tobi hombre ra nuu Jesús riguite binidxaba ique ne bisaana binidxaba que laa mudu. Peru ullee si Jesús binidxaba que de laabe gunda uni' be. Nabé bidxagayaa ca binni que.

<sup>15</sup> Peru caadxi de laaca na:

—Randa ribee be binidxaba purti nuu né be

Beelzebú, xaíque sti ca binidxaba'.

<sup>16</sup> Ne xcaadxi, para inaaze si laabe, na usuhiunni be ti seña xaibá' para ganna ca pa dxandí nuu né Dios laabe.

<sup>17</sup> Peru nanna be xi caní ique ca', para rabi be laaca':

—Pa ñasa caadxi binni de ti guidxi nucaa lú laca xquidxi la? qué nindaa guidxi que. Ne zaqueca pa nindaa saa ti familia nucaa lú saa ca la? laca qué nindaa familia que.

<sup>18</sup> Ne pa ma cucaa lú saa ca xpinni binidxaba' qué zandaa initilú. Cayabe nga laatu purti laatu na tu randa ribee binidxaba purti nua nia xaíque stica'.

<sup>19</sup> Yanna pa naa randa ribee binidxaba purti nua nia Beelzebú la? laga ca xiiñi tu ya'. Tu nuu né ca para ribee ca binidxaba'. Laca laaca rusihuunni ca cuchee tu.

<sup>20</sup> Peru ribee binidxaba purti nua nia Dios naa, ne laganna dxichi ma nuu ni biseenda Dios gueda tí de rey lade tu.

<sup>21</sup> Ora tobi hombre napa stipa ne naaze ni ucaa lú né la? iruti zaxha laa ni nuu ralidxi.

<sup>22</sup> Peru ora gueeda stobi ni jma nadipa que laabe zaguixhe dxí laabe ne zaxha laabe xquiiba be ni cá lú be ulá laabe, ne óraque ziaana ne irá stibe.

<sup>23</sup> Cani cadi nuu né naa tobi si la? ze luguiayá', ne cani cadi cutopa né naa la? cucheeche.

*Ra bigueta né binidxaba xcadxe*  
(Mt. 12.43-45)

<sup>24</sup> Ora iree binidxaba ndaani ladxidó' binni, riree ma canazá ndaani gui'xhi', canayubi ra iziila'dxi'. Gu'ya si qué idxela, óraque na': "Zabigueta ralidxe ra biree".

<sup>25</sup> Peru ora guedandá gu'ya ma nayá ladxidó' ngue casi ñaca ti yoo ma biluuba', ma zuchaahui',

<sup>26</sup> zabigueta chi caa xcadxe jma rusi nadxaba que laa. Riuu ca ndaani ladxidó' binni que ne riaana ca raqué. Ne pa huaxié' malu binni que ora nuu stubi si ti binidxaba la? jma rusi yanna.

*Tuu nga jma dichoso*

<sup>27</sup> Caní' ru Jesús nga bicaa ti gunaa ridxi:

—Dichosa de ni uxana lii ne bigadxi lii.

<sup>28</sup> Peru rabi be laa:

—Jma dichoso cani ucaa diaga stiidxa Dios ne guni ni na ni.

*Ra bichaaga Jesús laa ne Jonás*

(Mt. 12.38-42; Mr. 8.12)

<sup>29</sup> Cadi cayaana dxí binni de cabí zisi laabe ne bizulú be rabi be laaca':

—Aque malu laatu xa binni ca'. Racala'dxi tu gu'ya tu xiixa seña, peru ti seña si zudiee laatu. Zusietenala'dxe laatu Jonás.

<sup>30</sup> Purti casi uca Jonás seña para ca binni Nínive la? zacaca zaca Hombre Biseenda Dios casi ti seña para laatu.

<sup>31</sup> Ne dxi cuidxi Dios cuenta ca binni nuu yanna

ri la? zuzuhuaa dxa reina de guete que guseegu ruaa tu, purti neca nabé zitu xquidxi Salomón para xquidxi be peru yeucaa diaga be laa purti nabé riene. Peru laatu nuu tobi lade tu ni jma risaca que Salomón.

<sup>32</sup> Ne laca zuzuhuaa ca binni Nínive guseegu ruaa tu, purti laaca dxi yegüí né Jonás laaca stiidxa Dios, unaba ca perdón ne bichaa xpia' ca'. Ne laatu la? ma nuu tobi lade tu jma risaca que Jonás.

*Ejemplu sti linterna*  
(Mt. 5.15; 6.22-23)

<sup>33</sup> Qué rucaa gui cabe linterna ne ucaachi cabe, nin cu' cabe xa'na ti cajón, sínuque rugaanda cabe ni luguiá', ti tutiica guiuu gu'ya biaani'.

<sup>34</sup> Ne guielú binni nga biaani sti'. Pa ruyubi guielú cabe gu'ya ni jneza la? zia xquenda biaani cabe. Peru pa ruyubi guielú cabe gu'ya ni nadxaba la? zacahui xquenda biaani cabe.

<sup>35</sup> Biiya gá qué chi gyui' biaani ni napu ca para gaca ni guelacahui.

<sup>36</sup> Purti pa nuu tu ra naya'ni', nin tindaa ra nacahui la? naya'ni dxindxi zuuya tu irá cosa, casi ora ruzaani ti biaani laatu.

*Bidxiiba Jesús donda ique ca fariseu*

(Mt. 23.1-36; Mr. 12.38-40; Lc. 20.45-47)

<sup>37</sup> Casi biluxé uní' be, bini invitar ti fariseu laabe chi to

né be laa gueta ralidxi. Uyé be ne guri be ruua mexa'.

<sup>38</sup> Nabé bidxagayaa fariseu que ora bi'ya qué niguibi ná be para ño be casi runi ca'.

<sup>39</sup> Peru rabi be laa:

—Laatu, ca fariseu, zeda gaca tu casi vasu ne bladu ni ria'ri ladi si peru ndaani cani nabiidi'. Zacaca laatu, de luguiá si ruluí' nacha'hui tu, peru ndaani ladxidó' to nabiidi', purti riba'na tu sti binni ne ruchee né tu Dios.

<sup>40</sup> Binni huati ca', ñee cadi tobi si ni bizá' cuerpu stitu ne ladxidó' to la?

<sup>41</sup> Lagacané cani qué gapa, ti ihuinni ma bia idubi naca tu.

<sup>42</sup> Lagapa gá si laatu, fariseu ca'. Purti na tu zinanda tu ley, peru cadi dxandí ni. Ni runi tu la? rudii tu Dios bia' nexhe icaa dede lu ca guixi huiini rudii layú' stitu casi menta ne ruda ne xcaadxi, peru qué rulabi tu pa naquiiñe sa binni jneza ne ganaxhii Dios. Nga nga ni jma naquiiñe guni tu, peru laca cadi guiaana ca xcaadxi ca.

<sup>43</sup> Lagapa gá si laatu, fariseu ca'. Purti riula'dxi tu cui tu lu ca bangu ndaani yu'du ra ribí cani jma risaca, ne riula'dxi tu ugapa diuxi binni laatu ladu tiica che tu.

<sup>44</sup> Lagapa gá si laatu. Purti zeda gaca tu casi ba' ni qué rihuinni. Ridi'di cabe luguiá sin ganna cabe. Zacaca riguite tu binni sin ganna ca tu pe laatu.

<sup>45</sup> Oraque na ti maistru de ley rabi laabe:

—Maistru, ora riníu' zacá la? dede ne laadu rucoou ni.

<sup>46</sup> Para rabi be laa:

—Laca lagapa gá si laatu, maistru de ley ca'. Purti ruguá' tu binni ni iruti randa rúa', peru laatu nin bicuini ná tu qué na tu indisa né tu ni.

<sup>47</sup> Lagapa gá si laatu. Purti cayuni chaahui tu xpa' ca profeta ni biiti ca bixhoze gola tu,

<sup>48</sup> ne zacá rihuinni cayula'dxi tu ni bi'ni cabe. Laa-cabe bizulú cabe ni, ne laatu cunduuxe chaahui tu ni.

<sup>49</sup> Peru nanna Dios xi-modo laatu, nga runi na: "Zuseenda profeta ne apóstol ra nuu cabe. Zuuti cabe caadxi ne zazabi nanda cabe xcaadxi."

<sup>50</sup> Ne zuquixe Dios ca binni de yanna ri' rini sti ca profeta ni huayuuti cabe dede dxi bizulú guidxilayú,

<sup>51</sup> dede rini sti Abel hasta rini sti Zacarías ni biiti cabe lade yu'du ro' ne altar ni nuu lu patiu. Irá nga zaguixe ca binni nuu yanna ri'.

<sup>52</sup> Lagapa gá si laatu, maistru de ley ca'. Purti casi ñaca naaze tu llave para guiene tu stiidxa Dios, peru qué na tu guiene tu, ne nin qué na tu udii tu lugar guiene xcaadxi.

<sup>53</sup> Bidxiichi ca maistru de ley ne ca fariseu ora gudxi be nga laaca', ne bizulú ca canaba diidxa ca laabe jma.

<sup>54</sup> Pa ñanda si nuchenda ca laabe para ñapa ca xi pur niguu ca xqueja be.

**12**

*Cadi ului' binni ni cadi naca*

<sup>1</sup> Bizulú cabí zisi binni Jesús dede calá saa ca'. Para na rabi ca discípulu sti':

—Laguuya gá qué chi icá sti ca fariseu laatu. Nabé ricá enda rusigui stícabe binni casi riaazi levadura cuba pan.

<sup>2</sup> Peru napa xidé ihuinni irá ni ye'gu lú, ne zaqueca zanna binni irá ni naga'chi'.

<sup>3</sup> Zacá nga laani. Irá ni huani' tu ra nacahui, ziuu tu iní' ni ra naya'ni'. Zaqueca irá ni huani' tu xa diaga binni ndaani yoo, ziuu tu quiba ique yoo ucheeche ni guidxi.

*Tu naquiiñe idxibi nu  
(Mt. 10.28-31)*

<sup>4</sup> Xamigua ca', racaladxe ganna tu tuu nga idxibi tu. Cadi idxibi tu ni zanda guuti cuerpu si stitu ne ma qué zanda ru guni gasti'.

<sup>5</sup> Sínuque laidxibi Dios purti laa zándala guuti cuerpu stitu la? ne zanda cu' laatu gabíá. Nga runi cayabe laatu, laidxibi laabe.

<sup>6</sup> Laaca tu nanna tu ridoo chupa mani huiini pur chupa domi', peru neca qué risaca came, qué ziaba si tobi de laacame layú pa qué na Dios.

<sup>7</sup> Ne laatu la? jma risaca tu que stale mani huiini'. Nga runi cadi idxibi tu, purti dede guicha ique tu ma bigaba Dios.

*Ni qué rituí lú gaca xpinni Cristu  
(Mt. 10.32-33; 12.32;  
10.19-20)*

<sup>8</sup> Cayabe laatu, tutiica iní' xpinne laa nezalú binni la? laca zanié xpinne laa nezalú ca ángel sti Dios.

<sup>9</sup> Peru tu iní' nezalú binni cadi xpinne laa la? laca zanié nezalú ca ángel sti Dios cadi xpinne laa.

<sup>10</sup> Naa nga Hombre Biseenda Dios. Pa chu' tu cu' dí naa la? zuni perdonar Dios laa. Peru pa chu' tu usaca Espíritu Santu binidxaba la? qué zuni perdonar Dios laa.

<sup>11</sup> Ora chi nduu cabe xqueja tu ndaani yu'du sti ca judíu o chiné cabe laatu ra nuu justicia la? cadi chu' tu xizaa xi iní' tu.

<sup>12</sup> Purti ora ma nuu tu raqué zusiidi Espíritu Santu laatu xi iní' tu.

*Pabiá' naxoo enda ruyubi gapa bidxichi*

<sup>13</sup> De lade ca binni que biree tobi na rabi laabe:

—Maistru, gudxi biche icaa nia laa bia'ca ni bisaana né bixhoze laadu.

<sup>14</sup> Peru rabi be laa:

—Tu gudxi lii juez naa para quiize sti binni ya'.

<sup>15</sup> Ne óraque rabi be irá ca binni que:

—Laguuya gá laatu ne enda ruyubi gapa bidxichi, purti cadi nga si nga enda nabani sti binni.

<sup>16</sup> Oraque byuí' né be laaca ti cuentu rabi be laaca':

—Sicarí bizaaca tobi hombre ricu. Nabé guca xquela.

<sup>17</sup> Ne bizulú caní' ique: "Xi gune', ma qué gapa paraa uchaya irá niza ri'."

<sup>18</sup> Peru óraque na: "Ma nanna xi gune'. Zuxhaya ca troja stinne'. Zucué cani jma naro'ba para idxá irá niza ri' ne irá stinne'.

<sup>19</sup> Ne óraque zanda inié': Yanna huaxa ma chi izi-iladxe' ne ma chi guieche', purti ma napa stale ni gahua ne ni guee', ne ma naguaa chaahue ni iquiiñe stale iza."

<sup>20</sup> Peru na Dios rabi laabe: "Binni huati. Yanna gueela ca zati lu'. Ne tu guiaana né irá ni naguu chaahui lu ca ya'."

<sup>21</sup> Zacá nga cani rutopa lú para laca laa, peru qué gapa gasti ni risaca nezalú Dios.

*Rapa Dios ca xiiñi'*  
(Mt. 6.25-34)

<sup>22</sup> Oraque rabi be ca discípulu stibe:

—Nga runi cayabe laatu, cadi chu' tu xizaa paraa iree ni go to para ibani tu, o paraa iree lari cuaqui tu.

<sup>23</sup> Purti jma risaca xpida tu que endaró, ne jma risaca cuerpu stitu que lari.

<sup>24</sup> Laguuya ca bia'qui gu'ya tu. Qué riguu ca bini, que ribee ca guela, qué gapa ca troja, qué gapa ca lidxi ca ra nuchá ca ni ño ca', peru rudii Dios ni go ca'. Ñee cadi jma risaca tu que ca mani huiini la?

<sup>25</sup> Uná de laatu, pa niguu xaíque nisoo xcaadxi, ñee nisoo la?

<sup>26</sup> Pa nin nga qué zanda guni tu la? xiñee riuu tu xizaa pur ni iquiiñe tu ya'.

<sup>27</sup> Laguuya modo rigaa ca guie' gui'xhi'. Qué runi ca dxiiña', qué riguiba ca', peru nin Salomón, neca nabé bizuchaahui', qué ñacu lari sicarú bia' sicarú cani.

<sup>28</sup> Ne pa zacá ruzuchaahui Dios ca guie' gui'xhi', neca yanadxí nagá' ca', ixí ma chaqui ca la? lágaxa laatu, qué udii be ni gacu tu, binni qué runi cre ca'.

<sup>29</sup> Nga runi cayabe laatu, cadi ma canazá tu ma nuu tu xizaa xi go to, xi gue tu.

<sup>30</sup> Purti zacá runi ca binni ni qué runi cre Dios, peru laatu la? ma nanna Bixhoze tu ni nuu ibá' xi irá caquiiñe tu.

<sup>31</sup> Lauyubi guni mandar Dios ndaaní ladxidó' to, ne xcaadxi ca zacá si lú ni.

*Ni dxandí risaca*  
(Mt. 6.19-21)

<sup>32</sup> Cadi idxibi tu, dendxu huiini stinne ca', purti neca huaxié' tu peru rieche Bixhoze tu gudii laatu irá ni napa ladxi ná'.

<sup>33</sup> Lautoo ni napa tu. Lagacané cani caquiiñe'. Ne zacá casi ñaca caguu chaahui tu xpueltu tu ra qué zaniti. Caguu chaahui tu ni ibá' ra qué ziuu gubaana' ne qué zacá bandaa ni.

<sup>34</sup> Zacá nga laguni, purti ra nuu ni risaca para laatu la? raqué nuu ladxidó' to.

*Gataná binni*

<sup>35</sup> Ne laca rabi be laaca':

—Lagataná, zaa nacu tu xhaba tu ne zaa cá guí xpiaani tu.

<sup>36</sup> Lagaca casi ni cabeza ibigueta xpixuaana de enda xheela' ti casi guiuu xpixuaana uxhidxi ná', maca ziuxhele'.

<sup>37</sup> Dichoso de ni nexhená guedandá xpixuaana'. Ziuu xpixuaana be, ne cuee si lari, zucuí laabe ruaa mexa', udii ni go xhi be.

<sup>38</sup> Dichoso laabe pa nexhená be guedandá xpixuaana be, neca guedandá galaa gueela o télaway.

<sup>39</sup> Sicarí nga laani, pa ñanna xpixuaana ti yoo pora ñe gubaana ralidxi la? ñataná para cadi ñuu cabe ralidxi.

<sup>40</sup> Laatu laca lagataná, purti nin ganna tu mala ibigueta Hombre Biseenda Dios.

*Mozo cha'hui ne mozo qué iquiiñe'*

(Mt. 24.45-51)

<sup>41</sup> Oraque na Pedru rabi laabe:

—Señor, ñee byuí' lu nga para laasi du la? o para irá binni.

<sup>42</sup> Para na be:

—Byue ni para tutiisi gacala'dxi chu' xpiaani', guni xhiiña xpixuaana jneza. Zuni xpixuaana be laabe xaíque sti ca xcaadxi xpinni, gu'ya be go ca bia' nexhe go ca', ne go ca xhiora ni.

<sup>43</sup> Dichoso de laabe pa jneza cayuni be ora guedandá xpixuaana be.

<sup>44</sup> Purti óraque ma dede irá ni napa zusaana ladxi ná be.

<sup>45</sup> Peru pa niná be: "Zanda ru gueeda xpixuaana'." Ne óraque nuzulú niguiñe be ca xcaadxi mozo ne ca criada, ño be ne ñe' be de ra nixudxi be,

<sup>46</sup> nin ganna be mala ñedandá xpixuaana be. Ninaaze laabe, ñunidé laabe, niree nanda laabe casi tobi ni qué iquiiñe'.

<sup>47</sup> Ni nanna xi racala'dxi xpixuaana ne qué gataná guni ni la? jma naná ziaba ná'.

<sup>48</sup> Peru ni qué ganna xi na xpixuaana ne gueda uchee la? huaxié' ziaba ná'. Ni napa stale gracia jma stale naquiiñe guni, ne ni usaana cabe stale ladxi ná la? jma stale zanaba cabe laa.

*Beda ndaa saa Jesús binni (Mt. 10.34-36)*

<sup>49</sup> Naná ni zeda gune ndaani guidxilayú. Casi ñaca zeda usaba gui ndaani ni, ne para naa pa ñanda si ma ñaca ni.

<sup>50</sup> Napa xidé tide ti enda naná naro'ba', ne qué zanda chu' dxí ladxiduá' dede ora ma udide ni.

<sup>51</sup> Ñee zácxaxa tu beda gune binni tobi si la? Co', cadi nga beda gune', sínunque beda utinde binni.

<sup>52</sup> Purti de ca yanna ra nuu gaayu binni ndaani ti yoo, ziasa chonna zucaa lú xhupa que, ne zucaa lú xhupa que laaca'.

<sup>53</sup> Ziuu hombre zucaa lú bixhoze, ne zucaa lú bixhoze laa. Ziuu gunaa zucaa lú jñaa, ne zucaa lú jñaa laa.

Zucaa lú gunaa xualidxi, ne zucaa lú xualidxi laa.

<sup>54</sup> Ne laca rabi be ca binni que:

—Ora gu'ya tu guiasa ti guelacahui na tu chi guia nisa guie, ne dxandí riaba nisa guie.

<sup>55</sup> Ne ora gu'ya tu cundubi bi nisa na tu enda nandá', ne dxandí raca nandá'.

<sup>56</sup> Xiñee riene tu ni ri-huinni ibá' ne guidxilayú peru qué riene tu ni cayaca yanna ri'. Racala'dxi si tu quite tu binni, nga laani.

*Lauyubi gaca tu tobi si  
(Mt. 5.25-26)*

<sup>57</sup> Xiñee qué uyubi tu lade si tu uná nga ni jneza guni tu.

<sup>58</sup> Pa chiné tuuxa lii ra nuu justicia biyubi ca chu' neu laabe tobi si laga ze tu neza, para cadi chiné be lii ra nuu juez. Pacaa zutidi juez lii lu ná gendarme para useguyoo lii.

<sup>59</sup> Ne gabe ca' lii qué zareeu de raqué dede qué qui'xu irá ni nuza'bu'.

## 13

*Naquiiñe inaba binni perdón Dios*

<sup>1</sup> Ca dxi queca uyé caadxi binni ra nuu Jesús ne byui' né ca laabe xi bi'ní Pilatu, modo biiti caadxi binni Galilea ra cayuuti ca binni que mani para usiga'de ca Dios.

<sup>2</sup> Para na be rabi be laaca':

—Nee na tu bidii Dios lugar bizaaca ca binni Galilea zaqué purti jma malu laaca que ca xcaadxi binni xquidxi ca la?

<sup>3</sup> Cadi pur nga di'. Laatu laca zanitilú tu casi binitilú cabe pa qué inaba tu perdon Dios.

<sup>4</sup> O na tu jma malu dieciocho ni guti ra biaba torre Siloé que, que ca xcaadxi binni nabeza Jerusalén la?

<sup>5</sup> Cadi pur nga di nga laani. Laatu laca zanitilú tu pa qué inaba tu perdón Dios.

*Sti ti yaga du'ga'*

<sup>6</sup> Ne laca byui' né be laaca ti cuentu, rabi be laaca':

—Uyuu tobi hombre gupa ti yaga du'ga ndaani ñaa sti'. Ti dxi yeguuya be pa cá du'ga lú ni, peru qué nidxela be.

<sup>7</sup> Para rabi be ni cayapa raqué: "Biaa gu'yú". Ma raca chonna iza huayeda yube du'ga lu yaga ri', peru qué huadxela'. Yanna bisaba ni. Xi para zuhuua si ni racá cuchiiña ni layú."

<sup>8</sup> Para na ngue rabi laabe: "Señor, bisaana ni iza ri si, idu'ya nu. Chi taañe ñee ni ne uchaya abono ni.

<sup>9</sup> Ne pa icá lú ni la? riaana ni, peru pa co' la? ma riaba ni."

*Ra bisianda Jesús ti gunaa natigu deche*

<sup>10</sup> Ti dxi enda riziila'dxi cusiidi Jesús ndaani ti yu'du'.

<sup>11</sup> Raqué nuu ti gunaa natigu deche. Ma raca dieciocho año naguni huará binidxaba laa. Qué lica randa ruzuhuaa be jneza.

<sup>12</sup> Ora bi'ya Jesús laabe, na:

—Señora, ma bianda lu'.

<sup>13</sup> Ne udixhe ná luguiá be. Oraqueca bizuhuaa be jneza, ne bidii be diuxquixe Dios.

<sup>14</sup> Peru bidxiichi xaique sti yu'du que, xiñee bisianda Jesús laabe dxi que para na rabi ca binni que:

—Xhoopa gubidxa nuu para guni nu dxiiña'. Latá' tobi de ca dxi ca para guienda tu ne cadi dxi enda riziila'dxi pe'.

<sup>15</sup> Para na Señor rabi laa:

—Adxé ni riní' tu, adxé ni runi tu. Lácaxa qué riné tu xpuey tu ne xpurru tu gue nisa dxi enda riziila'dxi'.

<sup>16</sup> Yanna gunaa ri' za de Abraham, ne ma raca dieciocho añu naaze binidxaba laabe. Nee cadi jneza ilaa be de lu ná binidxaba dxi enda riziila'dxi la?

<sup>17</sup> Ora uni' be nga bituí lú irá ni cayaani ná laabe, peru irá ca binni que cayeche né ca irá enda nandxó' ni cayuni be.

### *Biidxi mostaza*

(Mt. 13.31-32; Mr. 4.30-32)

<sup>18</sup> Ne laca rabi be laaca':

—Chi güe nia laatu ximodo ridale ca xpinni Dios.

<sup>19</sup> Zeda gaca ni casi ti biidxi mostaza ni ucuaa ti hombre bidxiiba lu layú sti'. Birooba ni, uca ni ti yaga ro', dede biete mani huiini bi'ní lidxi lú ni.

### *Ejemplu sti levadura*

(Mt. 13.33)

<sup>20</sup> Bigueta rabi be laaca':

—Nuu stobi zanda usaca nu enda runi mandar sti Dios.

<sup>21</sup> Zeda gaca ni casi levadura biguucha ti gunaa

chonna kilu harina, ne biasa idubi naca cuba que.

### *Puerta nabé'* (Mt. 7.13-14, 21-23)

<sup>22</sup> Idubi neza ze Jesús Jerusalén, riaana irá guidxi ro' ne guidxi huiini', rusiidi'.

<sup>23</sup> Ra canazá be que biree tobi na, rabi laabe:

—Señor, ñee huaxié' binni zalá la?

Para rabi be laaca':

<sup>24</sup> —Lauyubi guiuu tu neza ra puerta ni nabé', purti gabe ca' laatu, stale tu zacala'dxi guiuu peru qué zanda chu'.

<sup>25</sup> Purti ora ma biasa xpixuaana yoo biseegu ra puerta' ne laatu biaana tu sin ñuu tu, zuxhidxi ná tu ne zaná tu: "Señor, Señor, bixhele guiu' du." Oraque zacabi be laatu: "Qué ganna dia' padé laatu."

<sup>26</sup> Zuzulú tu gabi tu laabe: "Lácaxa cadi bidó' né du lii ne bidé' né du lii, ne bisiidi lu ndaani xquidxi du."

<sup>27</sup> Peru zabi be laatu: "Cadi ma gudxe laatu qué runebia'ya laatu la? Laixele de naa, binni qué iquiiñe'."

<sup>28</sup> Raqué nga uzulú tu gu'na tu dede xhidxi laya tu ora gu'ya tu nuu Abraham ne Isaac ne Jacob ne ca profeta ra runi mandar Dios, ne laatu ma biaana tu sin ñuu tu.

<sup>29</sup> Purti zeeda binni de neza guete', de neza guia', de neza rindani gubidxa ne de neza riaazi gubidxa para cui ca ruua mexa ra runi mandar Dios.

<sup>30</sup> Purti nuu caadxi ni qué risaca nezalú binni, zasaca raqué. Ne nuu ni risaca

nezalú binni, qué zasaca raqué.

*Ra ucaná ladxidó' Jesús pur Jerusalén*

(Mt. 23:37-39)

<sup>31</sup> Dxi queca uyé caadxi fariseu ra nuu be, rabi laabe:

—Uyé, biree de ndaani guidxi ri' partí racala'dxi Herodes guuti lii.

<sup>32</sup> Para rabi be laaca':

—Laché, lachitidxi mañoso ca de huidxe iluxe xhiña'. Yanadxi ne ixí' zabee rua' binidxaba de binni ne zusianda laaca'.

<sup>33</sup> Naquiiñe saya yanadxi ne ixí' ne huidxe ti chindaya Jerusalén, partí qué rati di profeta sti guidxi jma que Jerusalén.

<sup>34</sup> ¡Ah Jerusalén, Jerusalén, ruuti lu ca profeta ne ruchá lu guie cani ruseenda Dios ra nuu lu'! ¡Panda que tiru huayacaladxe nutopa ca xiiñi lu' casi rutopa bere ca bere huiini sti xa xhiaa, peru qué niná lu'!

<sup>35</sup> Yanna laguuya ma chi guiaana stubi lidxi tu, ne ma qué zuuya ru tu naa dede dxi ganda dxi usisaca tu ni useenda Dios.

## 14

*Ra bisianda Jesús ti hombre dxá gui*

<sup>1</sup> Sicarí uca ti dxi enda riziila'dxi'. Yetó Jesús gueta ralidxi ti hombre ni risaca lade ca fariseu. Ne laca nuu xcaadxi fariseu raqué, nisi cundaachi laabe.

<sup>2</sup> Nuu tobi hombre raqué huará, dxá tipa gui.

<sup>3</sup> Para rabi be ca maistru de ley ne ca fariseu:

—Ñee jneza usianda cabe binni dxi enda riziila'dxi la?

<sup>4</sup> Peru qué niná ca niní' ca'.

Para ucuaa be hombre que, bisianda be laa, ne rabi be laa ma zanda chibí'.

<sup>5</sup> Ne óraque rabi be laaca':

—Pa ñaba ti buey o ti burru sti tobi de laatu ndaani bizé, lácxaxa qué ñe nindée laame, neca dxi enda riziila'dxi'.

<sup>6</sup> Nin qué nidxela ca xi niní' ca óraque.

*Xi guni binni ra enda xheela'*

<sup>7</sup> Ora bi'ya be cuyubi ca ra jma galán cui ca la? biliidxe be laaca', rabi be laaca':

<sup>8</sup> —Ora che tu ti ra enda xheela la? cadí nirudó' laatu chi tí tu ruua mexa', quen-quita nuu stobi jma risaca chi tí raqué.

<sup>9</sup> Ne óraque ñeeda ni bini invitar lii que, nindisa lii nu-cuí stobi que. Nabé nituí lú lu óraque, ñasa lu', nibeza lu ño si ca xcaadxi que.

<sup>10</sup> Nga runi ora guni invitar cabe lii la? uleza de ora gueeda ni bini invitar lii, gabi lii: "Gudá', xhamigua', cherí nuu ti lugar jma galán para lii." Zacá zasaca lu nezalú ca xcaadxi nuu raqué.

<sup>11</sup> Purtí tutiica uyubi isaca la? qué zusicaca iruti laa, ne tu na qué risaca la? zusicaca binni laa.

<sup>12</sup> Oraque rabi be ni bini invitar laabe que:

—Ora gu'nu ti endaró o ti endaró xhi la? cadi cuidxi

lu ca xhamigu lu', ca bi'chi lu', ca lisaa lu', ca xpecinu lu ni napa, gueda to né lii, parti zaqueca zuni cabe lii. Zaguixe cabe ni.

<sup>13</sup> Sínuque ora gu'nu endaró la? guridxi cani qué gapa gasti', cani nachangu ná', cani nachangu ñee, cani nacheepa lú.

<sup>14</sup> Ne nabé zieche lu', ti laa-cabe qué gapa cabe ni quixe cabe lii, peru zaguixe Dios lii dxi ibani cani nayá ladxidó'.

### *Ejemplu sti endaró xhi*

<sup>15</sup> Ora bina diaga tobi de cani zuba né be ruua mexa que ni uni' be, na rabi laabe:

—Dichoso cani cui ruua mexa ra runi mandar Dios.

<sup>16</sup> Oraque na be rabi be laa:

—Bini invitar tobi hombre stale binni chi to gueta ralidxi.

<sup>17</sup> Ora ma nuu endaró que biseenda be mozo stibe chi tidxi laaca gueda to ca'.

<sup>18</sup> Peru irá ca adxé adxé ni biree né ca'. Tobi que na: "Uzié ti layú ne naquiiñe chi guuya ni. Gudxi laabe guni perdonar be naa."

<sup>19</sup> Stobi na: "Nagasi uzié gaayu yunta buey. Chi guuya xi tal xa nuu came. Gudxi laabe guni perdonar be naa."

<sup>20</sup> Stobi na: "Nacubi bichaganaya'. Nga runi qué zanda chaa'."

<sup>21</sup> Ora bigueta jmozo be que gudxi laabe xi irá na ca binni que. Nabé bidxiichi be ne rabi be laa: "Yeuxooñe luguiaa ne irá ca calle ndaani guidxi ri'. Yetopa cani qué gapa gasti', cani nachangu

ná', cani nachangu ñee, cani nacheepa lú, dané rarí'."

<sup>22</sup> Ora bigueta mozo que na rabi laabe: "Señor, ma bine irá ni gu'dxu naa, peru nuu ru lugar."

<sup>23</sup> Para rabi be laa: "Yanna, biree de guidxi, uyé lu ca neza ro' ne ca neza hui-ini', ne pa idxaagu tuuxa la? udubayú laaca' dané laaca para idxá lidxe de binni.

<sup>24</sup> Ne gannu cou', nin tobi de cani bine invitar que, qué zo di ca ralidxe'."

### *Xi guni binni para sa nanda Cristu*

<sup>25</sup> Nabé stale binni nanda Jesús ra ze Jerusalén, ne biti-ixhi lú be rabi be laaca':

<sup>26</sup> —Pa chu' tu gueda nanda naa peru jma nadxii bixhoze ne jñaa ne xheela' ne ca xiiñi' ne bi'chi' ne biza'na', ne jma nadxii laca laa la? qué zanda gaca xpinne'.

<sup>27</sup> Ne tu qué na gacaná ra gueda nanda naa la? qué zaquiiñe para xpinne'.

<sup>28</sup> Lácaxa nuzulú tobi hombre ti yoo sin que nirudó' nibí ñuuya chaahui pa zugaanda xpidxichi para iluxe ni. Oraque ru nuzulú ni.

<sup>29</sup> Pacaa nindaa si be cimient ma qué ñanda nunduuxe be ni la? irá binni ñuni burla laabe,

<sup>30</sup> niná ca': "Hombre ca bizulú si ti yoo. Yanna ma qué ganda unduuxe'."

<sup>31</sup> Ne zaqueca ti rey ra chi tinde né sti rey. Lácaxa cadí nirudó' nibí ñuuya chaahui pa zanda ucaa lú né chii mil si soldadu sti', stobi ni napa gande mil.

<sup>32</sup> Ne pa ñuuya qué zanda la? nusenda tidxi sti rey que laga nuu ru zitu, ñabi laabe racala'dxi gaca cabe tobi si ti cadi nucaa lú be laa.

<sup>33</sup> Zacá nga laani. Tuttiica de laatu qué usaana irá ni napa la? qué zanda di gaca xpinne'.

### *Zidi ni qué ixí*

(Mt. 5.13; Mr. 9.50)

<sup>34</sup> Nabé riquiñe zidi, perupa nidi'di enda naxí sti ni la? ximodo niquiñe ni.

<sup>35</sup> Ma qué niquiñe ni nin para ñu'cha ni yu ñaca ni abono, sínunque nusa'bi si cabe ni. Ni racala'dxi guiene la? ucaa diaga.

## 15

### *Ejemplu sti dendxu biniti* (Mt. 18.10-14)

<sup>1</sup> Bidxiña irá cani ruquixe impuestu ne cani qué rulabi ley ra nuu Jesús para ucaa diaga ca laabe.

<sup>2</sup> Ne bizulú ca fariseu ne ca maistru de ley caní' ca laabe, na ca':

—Nga puru si cani cuchee ridxaaga, ne ro né laacabe.

<sup>3</sup> Para gudixhe be ti ejemplu para laaca', rabi be laaca':

<sup>4</sup> —Pa ñapa tobi de laatu ti gayuua dendxu', ne niniti tobi me, xi ñuni be. Nee cadi nusaana be noventa y nueve que, niyubi be laame dede ra nidxela be laame la?

<sup>5</sup> Ne ora nidxela be laame nayeche nudxiiba be laame xi'que be.

<sup>6</sup> Nindá né be laame ralidxi be, nibidxi be ca xhamigu

be ne ca xpecinu be, ñabi be laaca': "Latá', guieche né tu naa, purti bidxela dendxu stinne ni biniti."

<sup>7</sup> Zacaca jma zieche né cani nuu ibá' tobi ni huachee ora inaba perdón Dios, que noventa y nueve nacha'hui ni cadi caquiiñe inaba perdón.

### *Sti moneda biniti*

<sup>8</sup> Chi tixhe stobi. Laga pa ñapa ti gunaa chii moneda ne niniti tobi ya'. Nee cadi nucaa gui biaani', nunduuba ndaani yoo, nuyubi chaahui dede ra nidxela ni la?

<sup>9</sup> Ne ora ma bidxela ni, ñabi ca xhamiga ne ca xpecina: "Latá' guieche né tu naa. Ma bidxela moneda stinne ni biniti".

<sup>10</sup> Zacaca nga rabe laatu. Nabé rieche ca ángel sti Dios ora gueda naba tobi ni cuchee perdón Dios.

### *Sti hombre buiini ucuaa jneza*

<sup>11</sup> Bigueta byuí' né be laaca sti cuentu, na be:

—Uyuu tobi hombre gupa chupa xiiñi'.

<sup>12</sup> Ti dxi na ni jma nahuiini que rabi bixhoze: "Apá, dané naa bidxichi ni raca caber udiu naa." Para ucuaa bixhoze be ni, undaa ni lú iropa bi'chi cabe.

<sup>13</sup> Qué nindaa de ngue bitopa be irá stibe, biree be uyé be zitu. Raqué udxite be irá ni. Bibani be modo na ique be.

<sup>14</sup> Ne bia'si pe dxi ma birá irá stibe, guca ti guibiña ndaani guidxi ra nuu

be que, ne bizulú biaadxa endaró laabe.

<sup>15</sup> Para uyé be yeysi be dxiiña ra nuu ti hombre de guidxi que. Ne biseenda laabe chi gapa be bihui ra ranchu stí.

<sup>16</sup> Dede uyuu tiru ucaládxí be ño be ca vaina ni cayó ca bihui que, peru iruti nudii ni laabe.

<sup>17</sup> Raqué nuu be uyuu xpi-aani be, na be: "Biaa panda mozo napa bixhoze' dede ri-aana si ni ro ca', ne naa nuua rari', cayate zie'.

<sup>18</sup> Zabigueta ra nuu bixhoze', ne zabe laa: Apá, bichee nia Dios ne bichee nia lii.

<sup>19</sup> Ma qué iquiiñe dia' para gapu naa casi xiiñi lu', sin-uque gupa naa casi ti mozo stiu'."

<sup>20</sup> Para biasa be, biree be zibi' be.

De zitu ru zeeda be biiya bixhoze be laabe, biá laabe. Bixooñe yechagalú laabe, gu-didxi dxiiichi laabe, gudó ti bixidu lucuá be.

<sup>21</sup> Oraque na be: "Apá, bichee nia Dios ne bichee nia lii. Ma qué iquiiñe dia' para gapu naa casi xiiñi lu'."

<sup>22</sup> Peru na bixhoze be rabi ca jmozo: "Guiuba latané lari ni jma galán gacu be, ne lacuu anú ná be ne laucaa zapatu ñee be.

<sup>23</sup> Ne latané yuze huiini ni jma naró' guuti nu, guni nu saa, ne guieche nu.

<sup>24</sup> Purti para naa casi ñaca guti xiiñe ri' peru ma bibani, ne binité laabe Peru ma bidxela be." Ne irá cabe bieche cabe.

<sup>25</sup> Laga cayaca irá nga nuu bi'chi be lugola rañaa. Ne ora bigueta bidxiña gaxha bina diaga caxidxi saa, cuyaab cabe.

<sup>26</sup> Para guridxi tobi de ca mozo que, unaba diidxa xi cayaca raqué.

<sup>27</sup> Para na mozo que rabi laa: "Ma bigueta bi'chi lu' ne biiti bixho'zo ti yuze huiini naró' partí nazaaca bigueta be."

<sup>28</sup> Peru nabé bidxiichi ni jma huaniisi que ne qué niná ñuu. Para biree bixhoze na rabi laa: "Biuu, xiiñe'."

<sup>29</sup> Oraque na rabi bixhoze: "Biaa panda iza cayune xhiiña lu' ne cuzuuba stiidxa lu', ne qué huadiiu naa nin ti chiva huiini para ñahua nia ca xhamigua'.

<sup>30</sup> Peru yanna casi beeda xiiñi lu ca, ma biitu yuze huiini ni jma naró' para laa, laa nda yechite xpidxichi lu luguiá gunaa."

<sup>31</sup> Para na bixhoze rabi laa: "Hiju, lii la? qué hualadi lu de naa, ne irá ni napa stiu'.

<sup>32</sup> Peru naquiiñe guni nu saa ne guieche nu, partí casi ñaca guti bi'chi lu ri' ne bibani. O casi ñaca biniti nu laabe ne bidxela be."

## 16

*Sti mozo gudxite sti xpixu-aana'*

<sup>1</sup> Ne laca na Jesús rabi ca discípulu stí:

—Uyuu tobi hombre ricu bisaana xpidxichi lu ná ti xpinni para guni né dxiiña'.

Peru uyuu tu gudxi laabe ca-guite xpinni be que xpueltu be.

<sup>2</sup> Para guridxi be laa ne rabi be laa: "Xii nga na cabe cayu'nu'. Yanna ulee cuenta xi bi'ni neu bidxichi bidiee lii, partí ma chi ndee lii de dxiiña".

<sup>3</sup> Oraque bizulú caní' ique xpinni be que: "Xi gune yanna. Ma chi gaxha xpixuaana naa dxiiña". Qué gapa stipa gune dxiiña naná, ne rituí lua chi naba guna.

<sup>4</sup> Ah, ma nanna xi gune', ti ora gaxha be naa dxiiña ca la? ma nuu tu icaa naa ralidxi."

<sup>5</sup> Oraque guridxi be tobi tobi cani nuzaabi xpixuaana be, rabi be tobi que: "Pabiá' nuzaabi lu xpixuaana".

<sup>6</sup> "Ti gayuaa barril aceite", na ngue. Para rabi be laa: "Ucuua nota stiu', guiuba guri, bi'ni stobi de cincuenta si."

<sup>7</sup> Oraque rabi be stobi: "Laga lii ya'. Pabiá' nuzaabi lu xpixuaana". "Ti gayuaa sacu trigu", na ngue. Para rabi be laa: "Ucuua nota stiu'. Bi'ni stobi de ochenta si."

<sup>8</sup> Ora gunna xpixuaana be modo udxite be laa la? bidii cuenta pabiá' nexhená be ne bichá enda naró' stibe. Zacaca nga jma nexhená ca binni zinanda guidxilayú que ca xpinni Dios, modo riguite ca binni.

<sup>9</sup> Zacaca nga cayabe laatu guni tu. Laiquiiñe irá ni napa tu ndaani guidxilayú ri' para gapa tu stale xhamigu tu, ti ora ma qué gapa tu

gasti', nuu ni cabeza laatu ibá'.

<sup>10</sup> Ni guni jneza ne caadxi huiini la? laca zuni jneza ne stale. Ne ni qué guni jneza ne caadxi la? laca qué zuni jneza ne stale.

<sup>11</sup> Nga runi pa qué zanda guni tu jneza ne bidxichi sti binni la? laca qué zuni tu jneza ne ni risaca para Dios.

<sup>12</sup> Ne pa qué guni tu jneza ne ni sti binni la? iruti zudii laatu ni sti pe tu.

<sup>13</sup> Iruti zanda gapa chupa xpixuaana', partí zaca nanala'dxi be tobi que ne zanaxhii be stobi. Pacaa jma zuni be ni na tobi que ni na stobi. Qué zanda ganaxhii tu Dios ne ganaxhii ca tu bidxichi.

<sup>14</sup> Laca bina diaga ca fariseu ni uní be que ne bi'ni ca burla laabe, partí nadxii ca bidxichi.

<sup>15</sup> Peru rabi be laaca':

—Laatu ruyubi tu tidi tu pur nacha'hui nezalú binni, peru runibiá' Dios ladxidó'to. Purtí ni risaca para binni la? nanala'dxi Dios.

*Ley ne enda runi mandar sti Dios*

<sup>16</sup> Dxi ca'ru gueeda Juan Bautista la? ley sti Moisés ne ni uní ca profeta nga nexhe chi nanda tu, peru dede dxi beeda Juan ma bizulú careeche diidxa ximodo runi mandar Dios, ne irá binni cuyubi chu' lú ni.

<sup>17</sup> Peru jma qué igana nini-tilú ibá' ne guidxilayú que ñaana ti puntu huiini sti ley sin ñaca.

*Xi na Jesús de enda rilaa  
né xheela'*  
(Mt. 19.1-12; Mr. 10.1-12)

<sup>18</sup> Tutiica gaca divorciar né xheela ne ichaganá stobi? cuchee ne Dios purti casi ñaca jnadxxi rairopa que. Ne tu ichaganá ti gunaa ni guca divorciar, laca cuchee né Dios purti casi ñaca nuu né xheela stobi.

*Ti hombre ricu ne Lázaro*

<sup>19</sup> Uyuu tobi hombre nabé napa bidxichi, racu puru si lari risaca ne irá dxi cayuni saa.

<sup>20</sup> Ne uyuu stobi hombre lá Lázaro ribí ra puerta lidxi be, rinaba guna, dxá guidxu yuudxu ladi,

<sup>21</sup> dede reeda bi'cu rixupi ladi. Ne neca bigú si riaba xa mexa stibe ñacala'dxi nutopa ño.

<sup>22</sup> Bidxiña dxi guti Lázaro ne yené ca ángel laa ibá'ra nuu Abraham. Ne laca guti ricu que. Bicaachi cabe laabe;

<sup>23</sup> ne laabe gabia uyé be, ne de raqué undisa lú be, de zitu biiya be Lázaro nayeche nuu ra nuu Abraham, ne laabe cayacaná be.

<sup>24</sup> Para bicaa be ridxi: "Tata Abraham, biá naa. Biseenda Lázaro ugadxe biciuni ná ne gueda usigaanda ludxe purti nabé cayuniná gui ri naa."

<sup>25</sup> Peru na Abraham, rabi laabe: "Hiju, bietenala'dxi gupu irá ni bieche neu dxi nabani lu', ne Lázaro nabé ucaná. Peru yanna ma cayeche be rari', ne lii cayaná lu'.

<sup>26</sup> Ne cadí nga si nga laani, sínueque didi xiixa galahui de laanu. Qué zanda che cani nuu rari' ra nuu tu, ne qué zanda gueeda cani nuu ra nuu tu rari'."

<sup>27</sup> Para na be: "Pa zacá ni la? Tata, rinaba lii useendu Lázaro ralidxi bixhoze',

<sup>28</sup> purti napa rua' xcaayu biche', güi né be laaca ximodo ni, ti cadí né ru sica laaca gueda gacaná ca rari'."

<sup>29</sup> Oraque na Abraham: "Para nga runi napa cabe ni bicaa Moisés ne ni bicaa ca profeta. Ucaa diaga cabe xi na ca."

<sup>30</sup> "Co', Tata Abraham", na be, "sínueque pa ibani tuuxa ni ma guti la? jma nagueenda zanaba cabe perdón Dios ne uchaa cabe xpia' cabe."

<sup>31</sup> Peru na Abraham: "Pa qué ucaa diaga cabe ni na Moisés ne ni na ca profeta la? laca qué zucaa diaga cabe neca ibani tuuxa ni ma guti."

## 17

*Pabiá' naxoo nuu ni guni  
pur uchee stobi*

(Mt. 18.6-7, 21-22; Mr. 9.42)

<sup>1</sup> Na Jesús rabi ca discípulu sti':

—Qué ziaadxa ni uquiinde binni para uchee, peru gapa gá si ni guni ni que laa.

<sup>2</sup> Jma galán ñaca para laa pa jugaanda cabe ti guie ngola yanni, nundaa cabe laa ndaani nisadó', que ñuni pur nucheetobide ca nahuiini'.

<sup>3</sup> Laguuya gá qué chi guni tu zacá.

Pa uchee né hermanu stiu' lii la? bilidxe laa, ne pa inaba be perdón lii la? bini perdonar laabe.

<sup>4</sup> Ne pa gadxe tiru uchee né be lii ti dxi ne gadxe tiru que gueda naba be perdón lii la? bini perdonar laabe.

*Xi irá ñuni ni ñapa caadxi huini fe*

<sup>5</sup> Oraque na ca apóstol que rabi Señor:

—Bitale fe stidu.

<sup>6</sup> Para rabi be laaca':

—Pa ñapa tu fe neca bia' ti biidxi mostaza la? ñanda ñabi tu yaga ca ñaaxha de xcu, niuzuhuua ndaani nisadó', ne ñe ni.

*Ni nexhe guni ti mozo*

<sup>7</sup> Pa ñapa tu ti mozo nicheza layú o nigapa yuze, ñee casi ñeeda ñabi tu laa: "Gurí ruua mexa" la?

<sup>8</sup> Co' njá', sínunque ñabi tu laa: "Ulee xha'bu', bi'ni endaró xhi ne udiuu ni gahua xhie'. Iluxe sia', óraque ma cui lu lii, go xhiu'."

<sup>9</sup> Lácaxa rudii tu diuxquixe mozo que partí bi'ni ni gudxi tu laa.

<sup>10</sup> Zacaca laatu ora ma bi'ni tu ni bisaana Dios lu ná tu la? sicari nga lainí: "Gasti qué ñuni du partí bini du ni nexhe si guni du."

*Ra bisianda Jesúus chii napa lepra*

<sup>11</sup> Ra ze Jesúus Jerusalén udi'di galahui Samaria ne Galilea.

<sup>12</sup> Ra yendá be ti guidxi huini biree chii hombre napa lepra, bizuhuua ca zitu

<sup>13</sup> ne bicaa ca ridxi laabe:

—Jesús, Maistru, biá laadu.

<sup>14</sup> Ora bi'ya be laaca rabi be laaca':

—Laché ra nuu sacerdote. Lachiulu' laa ma bianda tu.

Ne laga ze ca neza nisi pe byui' lepra que ladi ca'.

<sup>15</sup> Ora bi'ya tobi de laaca ma bianda, bigueta uxooñe', cucaa ridxi, cisisaca Dios.

<sup>16</sup> Bizuxibi xa ñee be dede gudixhe ique layú, cudii diuxquixe. Ngue nda samaritanu laa.

<sup>17</sup> Oraque na be:

—Ñee cadi chii cabe bianda la? Laga xca' que ya', uná laaca'.

<sup>18</sup> Ñee iruti ru qué nibigueta nusisaca Dios sínunque laga ni cadi binni laanu ri la?

<sup>19</sup> Ne óraque rabi be hombre que:

—Biasa, uyé. Bianda lu partí bini cre lu'.

*Modo ibigueta Hombre Biseenda Dios*

(Mt. 24.23-28, 36-41)

<sup>20</sup> Oraque unaba diidxa ca fariseu laabe padxí uzulú guni mandar Dios. Para rabi be laaca':

—Dxi uzulú guni mandar Dios nga cadi ni ihuinni,

<sup>21</sup> ne iruti qué zanda gabi laatu, "Rarí cayaca ni", o "Rarica"; partí ma cayuni mandar Dios lade tu.

<sup>22</sup> Oraque rabi be ca discípulu stibe:

—Zadxiña dxi zacala'dxi tu gu'ya tu Hombre Biseenda Dios, neca ti dxi si, peru qué zuuya tu.

<sup>23</sup> Ziuu tu gabi laatu: "Rarí nuu be", o "Rarica nuu be", perú qué chi nanda tu.

<sup>24</sup> Purti casi riuu xpiaani rayu de ti ladu para sti ladu, zacaca zaca ni dxi gueeda be sti tiru.

<sup>25</sup> Peru nirudó' naquiiñe acaná be ne udxii deche ca binni nuu yanna ri laabe.

<sup>26</sup> Cásica uca dxi bibani Noé, zacaca zaca dxi ibigueta Hombre Biseenda Dios.

<sup>27</sup> Cayó cabe, cayé' cabe, cachaganá cabe ne cucheela cabe dede dxi biuu Noé ndaani arca ne biaba nisa guie, binitilú irá cabe.

<sup>28</sup> Ne zaqueca guca dxi bibani Lot. Cayó cabe, cayé' cabe, cazí' cabe, cutoo cabe, caguu cabe biní, ne cucuí cabe yoo.

<sup>29</sup> Peru casi guxha ñee Lot de ndaani guidxi Sodoma biaba gui ne azufre de ibá'. Binitilú irá cabe.

<sup>30</sup> Zacaca nga zaca ni dxi guenda sti tiru.

<sup>31</sup> Ni dxi'ba ique yoo dxi que la? cadi guiete chi caa sti ndaani yoo. Ne zaqueca ni nuu rañaa cadi ibigueta gueda caa sti'.

<sup>32</sup> Laguietenala'dxi xi uca xheela Lot.

<sup>33</sup> Tu gacala'dxi ulá xpida zuniti ni, perú tu uniti ni la? zalá.

<sup>34</sup> Ne gabe ca' laatu, ra nexhe chupa lu tobi si luna', zie tobi que, stobi que ziaana.

<sup>35</sup> Ne zaqueca ra nuu chupa gunaa cayuutu', zie tobi, ziaana stobi.

<sup>36</sup> Zaqueca ra nuu chupa hombre rañaa, zie tobi, zi-aana stobi.

<sup>37</sup> Oraque na ca rabi ca laabe:

—Para gaca ni ya', Señor.

Para rabi be laaca':

—Ra nuu ti cuerpu ni ma guti, raqué nga cui zisi irá so'pe'.

## 18

*Sti ti juez ne ti viuda*

<sup>1</sup> Laca gudixhe Jesús ti ejemplu para usiidi laacabe iní' né cabe Dios sin iree cabe gana,

<sup>2</sup> na rabi laacabe:

—Uyuu ti juez ndaani ti guidxi, qué ridxibi Dios ne qué rizaala'dxi binni.

<sup>3</sup> Ne ndaani guidxi queca yuu ti viuda, ne gatigá ma ze ra nuu be, zinaba acané be laa partu nuu tu cadinde né laa.

<sup>4</sup> Xadxi qué niná be nulabi be laa, perú bidxiña dxi na be: "Neca qué ridxibe Dios ne qué rizaaladxe binni,

<sup>5</sup> perú modo canaziñe gunaa ri naa la? chi acaná laa, ti ma cadi gueeda uchiichi ru naa."

<sup>6</sup> Para na Señor rabi laa-cabe:

—Laguuya si laatu xi na juez malu que.

<sup>7</sup> Ñee na tu qué zacané Dios ca xpinni ni cucaa ridxi laa ridxi ne huaxhiini la? Zandaa para icabi be laaca la?

<sup>8</sup> Naa cayabe laatu, qué zandaa di', nagueenda zacané be laaca'. Peru nanna pa zadxela ru Hombre

Biseenda Dios tu napa fe dxi ibigueta sti tiru ya'.

*Sti ti fariseu ne tobi ni ruquixe impuestu*

<sup>9</sup> Bigueta udixhe Jesús sti ejemplu para cani runi laca laa jma nacha'hui que ca xcaadxi,

<sup>10</sup> na:

—Uyé chupa hombre ndaani yu'du ro', yení né Dios. Tobi que fariseu, stobi que ruquixe impuestu.

<sup>11</sup> Bizuhuua fariseu que, caní' stubi na: "Rudiee di-uxquixe lii, Dios, partí cadi naca casi ca xcaadxi binni. Qué ribana', cadi malu naa, qué riuaa nia ni cadi xHEELA', ne nin cadi naca casi ni ruquixe impuestu ri'.

<sup>12</sup> Riaana sin gahua chupa tiru ndaani semana né rune ni na ley: rune irá ni napa chii ndaa ne rudiee lii ti ndaa, cásica ni rune ganar zaqueca ni rudii layú stinne'." Nga na fariseu que.

<sup>13</sup> Peru stobi que zuhuua zitu, nin para nindisa lú ibá' qué na', sínúque caguibi ná ladxidó', na: "Biá naa, Dios, partí nabé huachee'."

<sup>14</sup> Ne zanda gabe laatu ora bigueta hombre malu que ralidxi, ma bia ladxidó', peru fariseu que la? co'. Partí tu udxiba laca laa la? qué zasaca nezalú Dios, peru tu na qué risaca, zusisaca Dios laa.

*Ra uluu Jesús ndaaya caadxi ba'du'*  
(Mt. 19.13-15; Mr. 10.13-16)

<sup>15</sup> Oraque bedané cabe caadxi xcuidi ra nuu Jesús para quixhe ná luguiá ca'. Peru ora bi'ya ca discípulu né cabe ca ba'du que, udinde né ca laacabe.

<sup>16</sup> Peru guridxi Jesús ca ba'du que ne na:

—Laudii lugar gueeda ca ba'du ca ra nuua'. Cadi ucueeza tu laaca partí stíca irá ni napa Dios ladxi ná', laaca ne irá casi laaca ca.

<sup>17</sup> Gabe ca' laatu ni qué gaca ladxidó' casi ladxidó' cabe ca la? qué zanda udii lugar guni mandar Dios laa.

*Ra uni' né ti ricu Jesús*  
(Mt. 19.16-30; Mr. 10.17-31)

<sup>18</sup> Bidxiña tobi de ca xáique sti ca judíu ra nuu Jesús, na:

—Maistru ni nacha'hui', xi gune para gapa enda nabani ni qué zaluxe.

<sup>19</sup> Para na Jesús rabi laabe:

—Xiñee nou' nacha'hue'. Iruti ru nacha'hui jma que tobi lucha Dios.

<sup>20</sup> Ma nannu xi na ca mandamiento: "Cadi chu' neu ni cadi xHEELA lu', cadi guuti lu binni, cadi cuana lu', cadi cueeu falsu luguiá stobi, gunaxhii bixho'zo ne jñoou'."

<sup>21</sup> Para na be:

—Irá nga huayune dede dxi nahuiine'.

<sup>22</sup> Ora bina diaga Jesús xi na be, na rabi laabe: —Tobi si riaadxi lii. Bitoo irá ni napu', bidii ni ca pobre. Zacá zapu stale ni risaca ibá', ne dananda naa.

<sup>23</sup> Nabé ucaná ladxidó' be ora bina diaga be nga, partí nabé stale bidxichi napa be.

<sup>24</sup> Ora bi'ya Jesús pabiá' ucaná ladxidó' be, na:

—Aque nagana para ti ricu udii lugar guni mandar Dios ndaani ladxidó'.

<sup>25</sup> Jma pe qué igana tidi ti camellu xa'na ti aguxa' que udii ti ricu lugar guni mandar Dios ndaani ladxidó'.

<sup>26</sup> Oraque na cani bina diaga ni:

—Pa zacá ni la? tuu ndi zanda ilá.

<sup>27</sup> —Ni qué zanda guni binni la? Dios zanda guni, na Jesús.

<sup>28</sup> Oraque na Pedru:

—Laadu ya'. Bisaana du irá xixé ni napa du, para canananda du lii.

<sup>29</sup> Para rabi be laaca':

—Gabe ca' laatu, irá ni us-aana lidxi o bixhoze o bi'chi o xheela' o xiiñi' para chu' lade ca xpinni Dios la?

<sup>30</sup> zudii Dios laaca jma ru stale que bia' bisaana ca yanna ri', ne ora ma iree ca ndaani guidxilayú ri, zacaa ca enda nabani ni qué zal-luxe.

*Ra bigueta bizeete Jesús zati*

(Mt. 20.17-19; Mr. 10.32-34)

<sup>31</sup> Oraque ucuaa be doce discípulu stibe que, biree chu né be laaca' ne rabi be laaca':

—Laguuya', ma chuu nu Jerusalén, ne raqué chi aca irá ni bicaa ca profeta izaaca Hombre Biseenda Dios.

<sup>32</sup> Zusaana cabe naa lu ná cani cadi judíu para quite ca naa ne guniná ca naa ne uchá xhinni ca lua'.

<sup>33</sup> Zaguiñe ca naa ne zuuti ca naa peru raguionna gu-bidxa de biiti ca naa zabane'.

<sup>34</sup> Qué lica ñene ca discípulu xi caní' be purti cadi nexhe guiene ca ne qué ganna ca xi cuzeete be.

*Ra bisianda Jesús tobi nacheepa lú*

(Mt. 20.29-34; Mr. 10.46-52)

<sup>35</sup> Ra ziyuu be ndaani guidxi Jericó zuba tobi hombre nacheepa lú uriá neza, canaba guna.

<sup>36</sup> Ne ora bina diaga zidi'di stale binni raqué, unaba di-dixa xi cayaca.

<sup>37</sup> Para rabi cabe laa:

—Jesús de Nazaret nga zidi'di racá.

<sup>38</sup> Oraque bicaa ridxi:

—Jesús, Xiiñi David, biá la' naa.

<sup>39</sup> Udinde né ca binni za niru que laabe para nigani be, peru jma rusi bicaa be ridxi:

—Biá naa, Xiiñi David.

<sup>40</sup> Oraque biaana dxí Jesús, bisenda caa laabe gueeda be ra nuu. Casi bidxiña be na rabi laabe:

<sup>41</sup> —Xi racala'dxu guna para lii.

Para na be:

—Señor, racaladxe inaya'.

<sup>42</sup> Oraque na Jesús:

—Ma zanda iná lu, ne bianda lu purti bini cre lu'.

<sup>43</sup> Oraqueca uná be ne yenanda be Jesús cusisaca be Dios. Ne zaqueca bi'ni irá binni biiya ra guca ni, bisisaca ca Dios.

**19**

*Jesús ne Zaqueu*

<sup>1</sup> Biuu Jesús Jericó, ne ra zidi'di ndaani guidxi que

<sup>2</sup> nuu tobi hombre riculá Zaqueu, xaíque sti cani ruquixe impuestu.

<sup>3</sup> Ucala'dxi ñunibíá' laabe, peru qué ñanda purti nabé nachucu ne stale binni nuu raqué.

<sup>4</sup> Biiya si qué ñanda ñuuya laabe, bixooñe uzá niru yechiba lu ti yaga, purti napa be xidé tidi be raqué.

<sup>5</sup> Ne ora zidi'di be ra dxí'ba que biiya be laa, na be:

—Zaqueu, guiuba biete de racá, purti napa xidé guiaana rali'dxu yanadixí.

<sup>6</sup> Biete uxooñe Zaqueu, ne yené laabe ralidxi nayeche'.

<sup>7</sup> Ora bi'ya irá binni que yeguaana be ralidxi Zaqueu, bizulú ca cani' ca laabe, na ca yeguaana be ralidxi tobi ni qué runi ni na ley sti Moisés.

<sup>8</sup> Oraque bizuhuua Zaqueu ne na rabi laabe:

—Señor, zaguiize galaa de ni napa lú ca pobre, ne pa ulana sti tuuxa, zudxigueta ni tapa tiru lu ná'.

<sup>9</sup> Para rabi be laa ne cani nuu raqué:

—Yanadixí ma beda ilá ni nabeza ndaani yoo ri'. Purti laca za hombre ri de Abraham,

<sup>10</sup> ne biseenda Dios naa beda yube cani cananiti, ne beda ula'ya laaca'.

*Sti chii moneda*

<sup>11</sup> Laga cucaa diaga ca binni que laabe, gudixhe be ti ejemplu para laaca',

purti ma nuu be gaxha de Jerusalén ne zácaха ca casi chindá be raqué zabí be de rey.

<sup>12</sup> Na be:

—Biree tobi hombre zala de ti familia risaca, ze ti guidxi zitu zicaa gui'chi sti para ibigueta cui de rey ndaani xquidxi.

<sup>13</sup> Dxi ma chi iree be guridxi be chii jmozo be bidii be laaca chii moneda, ti moneda cada tobi ca', para guni né ca dxiiña laga ibigueta be.

<sup>14</sup> Peru nanala'dxi ca binni xquidxi be laabe, ne bisenda tidxi ca ra zicaa be gui'chi que, qué racala'dxi ca guni mandar be laaca'.

<sup>15</sup> Biluxe ucuua si be gui'chi para gaca be rey, bigueta be xquidxi be. Ne casi bigueta be guridxi be ca jmozo be que para gu'ya be xi bi'ni né ca xpidxichi be.

<sup>16</sup> Beeda tobi que, na rabi laabe: "Señor, rarí nuu moneda stiu'. Ma bini ganar ni xhii."

<sup>17</sup> Para rabi be laa: "Galán, jneza bi'ni lu'. Purti bi'ni lu jneza ne caadxi la? zudiee lii guni mandar lu chii guidxi."

<sup>18</sup> De raqué beeda stobi na: "Señor, rarí nuu moneda stiu'. Ma bini ganar ni xcaayu'."

<sup>19</sup> Zaquea rabi be laa: "Zudiee lii guni mandar lu gaayu guidxi."

<sup>20</sup> Oraque beeda stobi na: "Señor, rarí nuu moneda stiu'. Gupa dxioche ni ndaani ti bayu'."

<sup>21</sup> Bidxibe lii purti naduxhu lu'. Riula'dxu idale

sti' sin gu'nu dxiiña', ne ribeeu guela ra cadi lii uluu lu biní."

<sup>22</sup> Para rabi be laa: "Lii qué iquiiñe lu para gu'nu xhiña'. Pur ruua lu rihuinni qué ru'nu jneza. Pa nannu naduxhua' ne riuladxe idale stinne sin gune dxiiña', ne ribee guela ra cadi naa uluua biní la?"

<sup>23</sup> xiñee qué niguu lu xpueltua lu bancu, ti ora ñenda ma ñuni ganar ni caadxi ya".

<sup>24</sup> Ne rabi be cani zuhuua raqué: "Lagaxha moneda ca laabe. Laudii ni ni napa chii moneda que."

<sup>25</sup> Para na ca': "Peru Señor, ma napa be chii."

<sup>26</sup> "Zacá nga laani," na be. "Cani napa zacaa ca jma, ne ni qué gapa la? dede caadxi huiñi ni napa, ziaaxha.

<sup>27</sup> Yanna lachicaa cani nanala'dxi naa, cani qué na cue de rey. Laguuti laaca nezaluá".

*Ra biuu Jesús Jerusalén  
(Mt. 21.1-11; Mr. 11.1-11;  
Jn. 12.12-19)*

<sup>28</sup> Biluxe si gudixhe Jesús ejemplu que, biree ze Jerusalén.

<sup>29</sup> Ne ra yendá cabe gaxha de guidxi Betfagé ne Betañia, gaxha dani lá Olivo, biseenda be chupa discípulu stibe,

<sup>30</sup> ne rabi be laaca:

—Laché ndaani guidxi ni nuu delante ca, ne ora chindá tu raqué zadxela tu ti burru huiñi', cá yaga, ni iruti huagui'ba'. Lauxhegue laame ne latané laame rari'.

<sup>31</sup> Ne pa chu' tu inaba diidxa laatu xiñee cuxhegue tu laame la? lagabi laa: "Caquiiñe Señor laame."

<sup>32</sup> Para biree cani biseenda be que ze ca'. Ne bidxela ca laame casi gudxi be laaca que.

<sup>33</sup> Ne ora cuxhegue cabe burru huiini que na ca xpixuaana me rabi laacabe:  
—Xiñee cuxhegue tu burru huiini ca.

<sup>34</sup> Oraque rabi cabe laaca':  
—Purti caquiiñe Señor laame.

<sup>35</sup> Para yené cabe laame ra nuu Jesús ne gudixhe cabe caadxi xhaba cabe deche me, para bidxiiba cabe Jesús laame.

<sup>36</sup> Ne bichiaa cabe xhaba cabe lu neza zidi'di be.

<sup>37</sup> Ma para guiete cabe lu dani que bizulú irá xixé ca xpinni be cucaa ca ridxi de tantu cayeche ca'. Cusisaca ca Dios pur irá enda nandxó' ni ma biiya ca'.

<sup>38</sup> Na ca':

—Cu' Dios ndaaya ni biseenda gueda tí de rey. Ma nuu enda nayeche ibá' ne ma chi ihuinni enda nandxó' sti Dios.

<sup>39</sup> Lade ca binni que biree caadxi fariseu na:

—Maistru, udinde né ca xpinni lu'.

<sup>40</sup> Para rabi be laaca':

—Gabe ca' laatu, pa igani cabe la? dede ca guie ca zucaa ridxi.

*Ra biina Jesús runi Jerusalén*

<sup>41</sup> Ora bidxiña be gaxha de Jerusalén, bizulú biina be ra bi'ya be guidxi que,

<sup>42</sup> ne na be:

—Binni Jerusalén ca', neca ma yanadxi ñene tu ximodo nilá xquidxi tu, peru qué ziene tu partí ma ga'chi ni para laatu.

<sup>43</sup> Zadxiña dxi gueeda cani nanala'dxi laatu gueda nduu le' laatu, ne zaguu cabe lindaan xquidxi tu, ne ladu tica cuee lú tu zucaa lú cabe laatu.

<sup>44</sup> Zuuti cabe laatu ne zusaana cabe xquidxi tu ne qué zusaana cabe nin ti guie luguiá sti guie partí qué nulabi tu dxi beda ganna Dios laatu.

*Bisiá Jesús yu'du ro'*

(Mt. 21.12-17; Mr. 11.15-19; Jn. 2.13-22)

<sup>45</sup> Oraque biuu be ndaani yu'du ro', ne bizulú uladxi be irá cani cutoo ne cani cazi' ndaani yu'du que.

<sup>46</sup> Rabi be laaca':

—Cá lu Xqui'chi Dios, lidxi be nuu para iní' né cabe laabe, Peru laatu ma bi'ni tu ni lidxi gubaana'.

<sup>47</sup> Irá dxi bisiidi be ndaani yu'du que, ne nisi cuyubi ca xaíque sti ca sacerdote ne ca maistru de ley ne ca xaíque sti guidxi que guuti ca laabe.

<sup>48</sup> Peru qué idxela ca modo guni ca ni, partí cadi cachaacha binni de ucaa diaga laabe.

## 20

*Ra unaba diidxa cabe tu naca Jesús*

(Mt. 21.23-27; Mr. 11.27-33)

<sup>1</sup> Ti dxi cusiidi Jesús ca binni que ndaani yu'du ro'.

Cayuí' né be laaca stiidxa Dios. Raqué nuu be beeda ca xaíque sti ca sacerdote ne ca maistru de ley ne ca xaíque sti guidxi,

<sup>2</sup> rabi ca laabe:

—Gudxi laadu tu nacu para cayu'nu irá ndi', o tu gudxi lii gu'nu cani.

<sup>3</sup> Para rabi be laaca':

—Naa laca zanaba diidxa laatu tobi. Lagabi naa,

<sup>4</sup> tu biseenda Juan beda nduu nisa binni. De Dios zeeda ni la? o de binni guidxi-iliayú.

<sup>5</sup> Oraque na ca':

—Xi gabi nu laabe pue. Partí pa gabi nu Dios la? zabi be laanu xiñee qué ñuni cre nu laa.

<sup>6</sup> Peru pa gabi nu binni la? zuchá ca binni ri guie laanu, partí runi cre ca Dios gudxi Juan xi iní'.

<sup>7</sup> Oraque na ca qué ganna ca tu biseenda Juan.

<sup>8</sup> Para rabi be laaca':

—Nin naa qué zabe laatu tu biseenda naa gune irá ndi'.

*Sti ca hombre qué iquiñe'*

(Mt. 21.33-44; Mr. 12.1-11)

<sup>9</sup> Ne bizulú be gudixhe be ti ejemplu para ca binni que, na be:

—Uyuu ti hombre bizuhuaa yaga uvas lu layú sti', ne óraque biree ze sti guidxi. Bisaana ni lu ná caadxi binni gapa ni. Bindaa be guidxi ra ze be que.

<sup>10</sup> Dxi ma gunda dxi iruugu uvas que biseenda be ti mozo stibe para chi caa bia' raca caber laabe. Peru gudiñe

cani cayuni dxiiña lu layú que mozo que ne biseenda ca laa nisi ná'.

<sup>11</sup> Bigueta biseenda be sti jmozo be. Ne zaqueca ucuaa cabe laa gudiñe cabe laa, bi'ni cabe burla laa ne biseenda cabe laa nisi ná'.

<sup>12</sup> Bigueta biseenda be raguionna jmozo be. Za- queca udiñe cabe laa ne uladxi cabe laa.

<sup>13</sup> Oraque na be: "Xi guna yanna. Chi useenda xiiñe ni nadxiee'. Zandaca ora gu'ya cabe laa zapa xpia' cabe."

<sup>14</sup> Peru ora bi'ya cabe laa na cabe: "Ndi nga ni chi guiaana né irá sti bixhoze. Latá' guuti nu laa ti guiaana né nu ni laanu."

<sup>15</sup> Ne ulee cabe laa de ndaani le' que, ne biiti cabe laa.

Yanna xi na tu guni xpixu-aana layú que laacabe ya'.

<sup>16</sup> Zeeda, zuuti laacabe ne zudii layú que stobi.

Ora bina diaga ca binni que xi na be, na ca':

—Nin qué ñacala'dxi Dios.

<sup>17</sup> Peru óraque biiya dxi be laaca' ne na be:

—Pa cadi zacá ni la? xi riní' Xqui'chi Dios ra na:  
Guie ni bisa'bi cani cucuí yoo

que, guie que pe naaze yoo que yánná.

<sup>18</sup> Tu guiaba lu guie que, zacaná, peru tu gueda guiaba guie que luguiá la? zacadé.

*Enda riguixe impuestu*  
(Mt. 21.45-46; 22.15-22;  
Mr. 12.12-17)

<sup>19</sup> Ucalá'dxi ca xaíque sti ca sacerdote ne ca maistru de ley que, ninaaze ca laabe

purti nanna ca gudixhe be ejemplu que para laaca'. Peru bidxibi ca ca binni que.

<sup>20</sup> Para biseenda ca caadxi tu chi undaachi laabe, inaba diidxa laabe xiixa, casi ñaca racala'dxi ca ganna ca xi na be, peru para idxela si ca modo inaaze ca laabe para utidi ca laabe lu ná gober-nador.

<sup>21</sup> Na ca rabi ca laabe:

—Maistru, nanna du jneza riní' lu' ne jneza rusiidi lu'. Qué rulabi lu tutiica naca binni, sínuque rusiidi lu modo pe racala'dxi Dios sa binni.

<sup>22</sup> Gudxi laadu pa jneza quixe nu lu ná César o pa co'.

<sup>23</sup> Peru maca nanna be xi cá ique ca' para rabi be laaca':

—Xiñee racala'dxi tu us-aba tu naa.

<sup>24</sup> Latané moneda ca gu-uya'. Tu cá lú ni.

Para na ca':

—César.

<sup>25</sup> Oraque rabi be laaca':

—Laudii César sti César, ne laudii Dios sti Dios.

<sup>26</sup> Bidxagayaa ca modo bicabi be laaca', ne dxi do'uyuu ca' purti qué nidxela ca modo nusaba ca laabe nezalú ca binni que.

*Unaba diidxa cabe pa dxandí zabani gue'tu'*

(Mt. 22.23-33; Mr. 12.18-27)

<sup>27</sup> Ne laca beeda caadxi sa-duceu ra nuu be, cani qué runi cre pa dxandí zabani gue'tu'. Ne na ca rabi ca laabe:

<sup>28</sup> —Maistru, bicaa Moisés lu gui'chi pa chu' ti hombre

ichaganá ne gueda gati, qué ñapa xiiñi la? naquiiñe ichaganá bi'chi be xheela be ne gapa xiiñi casi ñaca xiiñi be.

<sup>29</sup> Uyuu gadxe bi'chi'. Bichaganá lugola que ne beda gati, qué ñapa xiiñi'.

<sup>30</sup> Para bichaganá rairopa que gunaa que ne laca guti, qué ñapa xiiñi'.

<sup>31</sup> De raqué bichaganá raguionna que gunaa que, ne zaqué bichaganá idubi gadxe que gunaa que, ne guti ca'. Nin tobi ca qué ñapa ca xiiñi ca'.

<sup>32</sup> Ne laca guti gunaa que.

<sup>33</sup> Yanna ora ibani gue'tu ya', uná de laacabe xheela gunaa que, purti idubi gadxe cabe bichaganá cabe laa.

<sup>34</sup> Para rabi be laaca':

—Laga nuu binni ndaani guidxilayú ri la? richaganá ca' ne rucheela ca'.

<sup>35</sup> Peru cani ma cá lá guiasa de lade gue'tu para ibani ndaani guidxilayú cubi la? qué zachaganá ca ne qué zuchela ca';

<sup>36</sup> purti ma qué zati ca', sínunque ma naca ca casi ca ángel, ne zahuinni dxandí xiiñi Dios laaca ra usibani laaca'.

<sup>37</sup> Dede Moisés bisiidi zabani gue'tu'. Cá ni lu gui'chi ra biiya be dxa yaga caya'qui que. Rabi be Dios Dios sti Abraham, ne sti Isaac, ne sti Jacob.

<sup>38</sup> Dios la? cadí Dios sti gue'tu laa, sínunque Dios sti cani nabani, ne para laabe nabani irá binni, neca ma guti.

<sup>39</sup> Oraque na caadxi de ca maistru de ley:

—Jneza uniu', Maistru.

<sup>40</sup> Ne ma qué ñuni ru ca pur ninaba diidxa ca laabe gasti'.

*Tu xiiñi Cristu*  
(Mt. 22.41-46; Mr. 12.35-37)

<sup>41</sup> Ne rabi be laaca':

—Ximodo nga na tu xiiñi David Cristu ya'.

<sup>42</sup> Purti dede David bicaa lu Salmo:  
Na Dios rabi Señor stinne':  
“Gurí cuee'

<sup>43</sup> dede ora ma udixhe cani nanala'dxi lii xañee lu'.

<sup>44</sup> Pa rabi David laabe Señor sti la? ximodo xiiñi David laabe ya'.

*Bidxiiba Jesús donda ique ca maistru de ley*

(Mt. 23.1-36; Mr. 12.38-40; Lc. 11.37-54)

<sup>45</sup> Irá binni que bina diaga ora rabi be ca discípulu stibe:

<sup>46</sup> —Laguuya gá laatu né ca maistru de ley, purti riula'dxi ca gacu ca lari de yanni ñee ca para uluí' naca ca tuuxa, ne ugapa diuxi binni laaca luguiia. Ne riula'dxi ca cui ca ndaani yu'du ra ribí binni ni jma risaca, ne zaqueca ra endaró.

<sup>47</sup> Raxha ca lidxi ca viuda, ne óraque rini' né ca Dios xadxí para si uluí' nacha'hui ca'. Laaca nga jma naná ziaba ná ca'.

## 21

*Tobi ni dxandí bidii de idubi ladxidó'*  
(Mr. 12.41-44)

<sup>1</sup> Undisa lú be biiya be ra cusaba ca ricu vueltu ndaani

caja ra riaba ni usiga'de cabe Dios.

<sup>2</sup> Ne biiya be bisaba ti viuda pobre chupa de gaayu huiini'.

<sup>3</sup> Para na be:

—Gabe ca' laatu, jma stale bisaba viuda ri' que ca xcaadxi ca.

<sup>4</sup> Purti ca xcaadxi ca bidii ca Dios ni ma biaana si stica', ne laabe huaxié' napa be peru bisaba be irá ni napa be para ibani né be.

*Na Jesúz zaxá yu'du ro'*

(Mt. 24.1-2; Mr. 13.1-2)

<sup>5</sup> Bizulú tuuxa cuzeete pabiá' sicarú yu'du ro' que modo zuchaahui ni ne ca guie ne irá ni huasiga'de cabe Dios.

<sup>6</sup> Para rabi be laaca':

—Irá ni cayuuya tu nagaşı ri la? ziuu dxi initilú cani, dede qué ziaana ti guie luguiá sti guie.

*Xi gaca ante iluxe guidxi-layú*

(Mt. 24.3-28; Mr. 13.3-23)

<sup>7</sup> Para na ca':

—Maistru, padxí gaca irá ndi ya' ne ximodo ganna du ora ma chi aca ni.

<sup>8</sup> Oraque rabi be laaca':

—Laguuya gá qué chi chite cabe laatu, purti zeeda stale ni usiguii, zaná ca laaca nga Cristu, ne ma bidxiña hora. Peru cadi chi nanda di tu laaca'.

<sup>9</sup> Ne ora ganna tu cayaca guerra ne cadinde cabe rarí rarica', cadi idxibi tu, purti naquiiñe sa niru irá nga, peru ca'rú idxiña dxi iluxe ni.

<sup>10</sup> Ne laca rabi be laaca':

—Ziasa ti guidxi ucaa lú sti guidxi. Zaqueca ziasa ti gobiernu ucaa lú sti gobiernu.

<sup>11</sup> Zaca stale xu ro', ne stale guidxi zaca gubiña ne enda huará. Zaree xiixa ibá' ne zadxbi binni ora gu'ya ni, ne laca zahuinni seña ro' ibá'.

<sup>12</sup> Peru para gaca irá nga la? nirudo' zanaaze cabe laatu ne zazabi nanda cabe laatu ne zinduu cabe xqueja tu ra yu'du ne ra nuu rey ne gobernador, ne zuseguyoo cabe laatu. Irá nga zuni cabe laatu purti xpinne laatu.

<sup>13</sup> Peru nga zacané para güí tu stiidxa nezalú cabe.

<sup>14</sup> Cadi cu' xaíque tu naquiiñe quixhe chaahui tu xi infi' tu para usihuinni tu cadi cuchee tu.

<sup>15</sup> Purti naa zudiee diidxa laatu ne enda biaani para useegu tu ruua tutiica ucaa lú laatu.

<sup>16</sup> Ne dede bixhoze tu ne jñaa tu zuluí' laatu. Ne zaqueca zuni ca bi'chi tu ne ca lisaa tu ne ca xhamigu tu, ne zuuti ca caadxi de laatu.

<sup>17</sup> Ne irá binni zaca nanala'dxi laatu purti xpinne laatu.

<sup>18</sup> Peru nin ti guicha ique tu qué zanitilú.

<sup>19</sup> Pa qué ixhacala'dxi tu la? zalá tu.

<sup>20</sup> Ne ora gu'ya tu ma naguu soldadu le' Jerusalén la? lagana ma bidxiña dxi initilú ni ngue.

<sup>21</sup> Oraque cani nuu Judea uxooñe lu ca dani, ne cani nuu ndaani guidxi cadi iree. Cani nuu rañaa la? cadi ibigueta ndaani guidxi.

<sup>22</sup> Purti ca dxi que nga quixe cabe irá ni bi'ni cabe para gaca ni casi cá lu Xqui'chi Dios.

<sup>23</sup> Naná zaca para ca gunaa ni naca xiiñi ne cani cugadxi ca dxi que purti nabé nagana zaca ni para irá binni guidxi que ne naná ziaba ná ca'.

<sup>24</sup> Zati caadxi lu guerra ne xcaadxi ziné cabe laa adxé adxé guidxi. Zutu ñee cani cadí judíu guidxi Jerusalén bia' dxi udii Dios lugar laaca'.

*Modo ibigueta Hombre Biseenda Dios  
(Mt. 24.29-35, 42-44; Mr. 13.24-37)*

<sup>25</sup> Oraque zahuinni seña ibá', adxé zahuinni gubidxa ne beeú ne ca luceru. Ne irá binni guidxilayú zadxibi dede qué zadxela xi guni ora guna diaga pabiá' reciu caxidxi cadiñe ntaa nisadó'.

<sup>26</sup> Zadxibi binni dede ziegu', purti ma nuu xizaa xi chi aca ndaani guidxilayú. Zaniibi dxacha irá ni cá ibá'.

<sup>27</sup> Oraque zuuya cabe Hombre Biseenda Dios, zeeda lade za de ria'qui biaani ne stale enda nandxo'.

<sup>28</sup> Ora gu'ya tu uzulú gaca irá nga la? lauzuhuaa chaahui', laindisa ique purti ma cadxiña dxi ilá tu.

<sup>29</sup> Ne laca udixhe be ti ejemplu para laaca', rabi be laaca':

—Laguuya ca yaga du'ga ne ca xcaadxi yaga.

<sup>30</sup> Ora ma cabee ni biitu la? ma nanna tu ma zeeda tiempu enda nandá'.

<sup>31</sup> Zacaca nga ora gu'ya tu gaca irá nga, ma nanna tu

ma bidxiña dxi guni mandar Dios.

<sup>32</sup> Dxandí cayabe laatu, irá ndi zaca ante gati ca binni nuu yanna ri'.

<sup>33</sup> Ziuu dxi initilú ibá' ne guidxilayú, peru stiidxa qué ziaana sin gaca'.

<sup>34</sup> Laguuya gá laatu cadí ma canazá tu canaxudxi tu ne nisi icá ique tu ni ricá ique binni ni qué runibiá' Dios. Pacaa zguidxi ladxidó' to, ne nin ganna tu mala zanaaze dxi que laatu.

<sup>35</sup> Purti ziaba ni luguiá irá binni guidxilayú casi ti trampa.

<sup>36</sup> Nga runi lagataná. Cadi guiaana dxí tu de iní' né tu Dios para ganda ilá tu de irá ni chi gaca ca, ne zacá zanda uzuhuaa tu nezalú Hombre Biseenda Dios.

<sup>37</sup> Irá dxi idubi dxi rusiidi be ndaani yu'du ro'. Huaxhinni riguiaana be lu dani Olivo.

<sup>38</sup> Ne siadó' ro' ma ze binni ndaani yu'du que, ziucaa diga laabe.

## 22

*Udixhe cabe inaaze cabe Jesús*

*(Mt. 26.1-5, 14-16; Mr. 14.1-2, 10-11; Jn. 11.45-53)*

<sup>1</sup> Ma zeda yuba pascua, saa ro' sti ca judíu ra ro ca pan sin levadura.

<sup>2</sup> Ne qué idxela ca xáique sti ca sacerdote ne ca maistru de ley modo guuti ca Jesús, purti cadxibi ca ca binni que.

<sup>3</sup> Oraque uyuu binidxaba ndaani ladxidó' Judas, Judas

Iscariote, tobi de lade doce discípulu que,

<sup>4</sup> uyé ra nuu ca xaíque sti ca sacerdote ne ca xaíque sti cani rapa ra yu'du ro', yegüí né laaca ximodo gului' Jesús laaca'.

<sup>5</sup> Nabé bieche ca' ne biaana né ca laabe udii ca laabe vueltu.

<sup>6</sup> Bisiguenda be ne dede dxi que ma nisi cuyubi be ximodo ului' be Jesús laaca sin ganna binni.

*Ra gudó xhi né Jesús ca discípulu sti'*

(Mt. 26.17-29; Mr. 14.12-25; Jn. 13.21-30; 1 Co. 11.23-26)

<sup>7</sup> Dxi pe ro cabe pan sin levadura, dxi ruuti cabe dendxu huiini rusiga'de cabe Dios que,

<sup>8</sup> na Jesús rabi Pedru ne Juan:

—Laché lachiguni chaahui ra idó' xhi nu pascua ri'.

<sup>9</sup> Oraque na ca':

—Paraa racala'dxu guni chaahui du.

<sup>10</sup> Para rabi be laaca':

—Biaa gu'ya tu, ora chindá tu ndaaní guidxi zadxaaga tu tobi hombre nua ti rii nisa, lachinanda laa dede ra guiuu.

<sup>11</sup> Ne lagabi xpixuaana yoo que, na Maistru paraa nga go xhi né ca discípulu sti pascua ri'.

<sup>12</sup> Ne óraque zuluí' laatu ti cuartu ro' rairopa pisu ma nexhe chaahui'. Raqué laguni chaahui para idó' xhi nu.

<sup>13</sup> Para biree ca uyé ca ne bidxela ca casi gudxi

be laaca'. Ne raqué bini chaahui ca endaró xhi para pascua que.

<sup>14</sup> Ora gunda hora go xhi cabe guri né be ca apóstol stibe ruua mexa'.

<sup>15</sup> Ne rabi be laaca':

—Qué ganna tu pabiá' napa gana gahua xhie nia laatu pascua ri ante gate'.

<sup>16</sup> Purti gabe ca' laatu, qué zahua rua' ni dede ora ma bidxiña dxi guni mandar Dios, dxi ma bihuinni xi irá riní' pascua.

<sup>17</sup> Ne óraque ucuaa be ti copa. Bidii be diuxquixe Dios ne na be:

—Laicaa ndi', lagué' irá tu.

<sup>18</sup> Purti gabe ca' laatu, ma qué zee rua' nisa uvas dede ora ma bizulú guni mandar Dios.

<sup>19</sup> Ne óraque ucuaa be pan, bidii be diuxquixe Dios ne gudiizi be ni lú ca', rabi be laaca':

—Ndi nga cuerpu stinne ni chi udiee pur laatu. Laguni casi cayuni nu ri' para guietenaladxi tu naa.

<sup>20</sup> Ne zaqueca bi'ni né be copa que. Biluxe si gudó xhi cabe, ucuaa be ni, ne na be:

—Copa ri nga rini stinne ni chi ixii pur laatu. Ne ra ixii ni zaguixhe Bixhoze ti modo cubi chu' né binni laa tobi si.

<sup>21</sup> Peru lu mexa ri tobi si nexhe naya ne ná ni chi utoo naa.

<sup>22</sup> Dxandí naquiiñe tidi Hombre Biseenda Dios irá ni nexhe tidi', peru gapa gá si ni chi utoo laabe que laa.

<sup>23</sup> Oraque bizulú ca discípulu canaba diidxa saa ca tu de laaca chi guni ni.

*Tu jma zasaca*

<sup>24</sup> Ne laca ucuaa yu ca' uná de laaca jma zasaca.

<sup>25</sup> Peru rabi be laaca':

—Nanna tu modo runi mandar ca rey ndaani guidxilayú, runi stica irá ni runi mandar ca', ne rudxiiba cabe laaca partí na cabe cayaca né ca laacabe.

<sup>26</sup> Peru laatu cadi guni tu zacá, sínunque ni jma risaca lade tu la? gaca casi tobi ni jma huaxié', ne ni sa niru la? gaca casi jmozo ca xcaadxi.

<sup>27</sup> Uná nga ni jma risaca, ni zuba ruua mexa la? o ni caguixhe endaró. Ni zuba ruua mexa xa. Peru naa nuaa lade tu casi tobi ni riguixhe endaró.

<sup>28</sup> Laatu huayuu né tu naa lu irá ni nagana huadide'.

<sup>29</sup> Nga runi zudiee guni mandar tu casi bidii Bixhoze ni naa,

<sup>30</sup> ti gue né tu naa ne go né tu naa ruua mexa ra gune mandar. Ne zaca tu juez sti irá ni za de idubi doce xiiñi Israel.

*Na Jesús zaní' Pedru qué runibiá' laa*

(Mt. 26.31-35; Mr. 14.27-31; Jn. 13.36-38)

<sup>31</sup> Oraque na be:

—Simón, Simón, biiya gá lii, ma gunaba binidxaba laatu para uniibi dxacha laatu casi ora riguibi cabe semiá.

<sup>32</sup> Peru ma unaba lu Dios pur lii cadi guiaadxa fe lii. Ne ora ma biasa lu sti tiru la? ucané ca hermanu stiu' uzuhuaa chaahui ca'.

<sup>33</sup> Para na Pedru:

—Señor, ma nuaa listu cadi para guieguayuaa nia sia' lii, sínunque dede para gate nia pia' lii.

<sup>34</sup> Oraque rabi be laa:

—Pedru, gabe ca' lii, yanna gueela ca, zaníu' qué runibióu' naa chonna tiru ante guunda gallu.

*Ma zeda dxiña ni nagana*

<sup>35</sup> Ne rabi be laaca':

—Dxi biseenda laatu xie ñee tu ne qué niné tu ixhiapa nin vueltu, ñee biaadxa laatu xiixa la?

—Gasti qué ñaadxa laadu, na ca'.

<sup>36</sup> Para rabi be laaca':

—Yanna, tu napa ixhiapa la? icaa ni, ne tu napa vueltu la? icaa xpueltu. Ne tu qué gapa espada la? utoo xhaba sí tobi.

<sup>37</sup> Purti napa xidé gaca ni cá lu Xqui'chi Dios ra ruzeete ni de naa, na ni: "Bitiidi cabe laabe de malu." Irá ni cá lu Xqui'chi Dios de naa napa xidé gaca yanna.

<sup>38</sup> Oraque na ca':

—Señor, rarí nuu chupa espada.

—Ne nga si zugaanda, rabi be laaca'.

*Ra ze cabe lu dani Olivo*

(Mt. 26.36-46; Mr. 14.32-42)

<sup>39</sup> Ne óraque biree be ze be lu dani Olivo casi runi be irá tiru, ne yenanda ca discípulu stibe laabe.

<sup>40</sup> Ora yendá cabe raqué rabi be laaca':

—Lainí' né Dios ti cadi uquiinde binidxaba laatu.

<sup>41</sup> Para bixelete be de laaca bia' rilá ti guie, ne bizuxibi be uní' né be Dios,

<sup>42</sup> na be:

—Bixhoze', pa racala'dxu la? bilá naa de enda naná ni cabeza naa ri'. Peru cadi gaca ni rabe', sínunque ni na lu'.

<sup>43</sup> Oraque bidxiña ti ángel de ibá' ra nuu be, bidii stipa laabe.

<sup>44</sup> Ne jma rusi bizulú be uní' né be Dios bia' gunda ti', purti nabé nuu yuuba ladxidó' be. Dede biasa ti nisa luna mboolo luguiá be, rului' rini ne biaba cani layú.

<sup>45</sup> Biluxe uní' né si be Bixhoze be, biasa be uyé be ra nuu ca discípulu. Ne yendá be laaca nisiaasi ca', purti nuu ca triste.

<sup>46</sup> Para rabi be laaca':

—Xiñee nisiaasi tu. Laguiasa ne lainí' né Dios ti cadi uquiinde binidxaba laatu.

*Ra bigaa Jesús*

(Mt. 26.47-56; Mr. 14.43-50; Jn. 18.2-11)

<sup>47</sup> Caní' ru be biuu jma binni ra nuu cabe. Ti-hua Judas, tobi de lade doce discípulu stibe que, za niru lú ca', ne casi biuu bidxiña gudó ti bixidu lucuá be.

<sup>48</sup> Oraque rabi be laa:

—Judas, ñee ne bixidu gu-luí' lu Hombre Biseenda Dios la?

<sup>49</sup> Ne ora bi'ya cani nuu né Jesús raqué xi chi aca la? na ca':

—Señor, ñee zucá' lú nu laacabe ne espada la?

<sup>50</sup> Ne óraque bininá tobi de laacabe ti mozo sti sacerdote gola ne guxha ti diaga mozo que ladu derechu.

<sup>51</sup> Para rabi be laaca':

—Lausaana nga, bia' catí'.

Ne óraque guda'na be diaga hombre que para bianda.

<sup>52</sup> Oraque rabi be cani beeda ra nuu be que, ca xaíque sti ca sacerdote, ne cani rapa ra yu'du ro' ne ca xaíque sti guidxi:

—Ñee gubaana zeda naaze tu la? Né pe tu espada ne palu.

<sup>53</sup> Inque ti dxi uyuaa nia laatu ndaani yu'du ro' ne qué ñuni tu pur ninaaze tu naa. Peru ma bidxiña ora gaca ni na tu ne ni na binidxaba'.

*Ra uní' Pedru qué runibiá' Jesús*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup> Oraque unaaze ca laabe, yené ca laabe ralidxi sacerdote gola, ne yenanda Pedru laabe zitu zitu.

<sup>55</sup> Ne bi'ni ca binni que ti gui lu patiu que ne gurí ca idubi vuelta gui que. Laca gurí Pedru lade cabe.

<sup>56</sup> Ora bi'ya ti criada zuba be raqué biiya dxí laabe ne na:

—Nguiuu ri laca uzá né laabe.

<sup>57</sup> Peru qué niná be niní' be pa xpinni Jesús laabe, para na be rabi be gunaa que:

—Qué runebia'ya dia' hombre ca.

<sup>58</sup> Qué nindaa de ngue bi-iyia stobi laabe, ne na rabi laabe:

—Lii laca de laacabe lii.

Peru na be:

—Co' hombre, cadi de laa di cabe naa.

<sup>59</sup> Udi'di bia' ti hora de ngue biree stobi cá tema:

—Dxandí ne laabe uzá né be hombre ca, partí binni Galilea laabe.

<sup>60</sup> Para bigueta na be:

—Cadi lica cayene xi caní tu, hombre.

Nin ca'ru lica iluxe iní' be ngue ora bi'nda ti gallu.

<sup>61</sup> Ne bidxigueta lú Señor biiya dxí laabe. Oraque bietenala'dxi be ca diidxa ni gudxi Señor laabe que, ante guunda gallu, zaní' be chonna tiru qué runibiá' be laa.

<sup>62</sup> Para biree be de raqué, yeguuna be dede uyuu yuuba ladxidó' be.

<sup>63</sup> Ucuaa ca hombre ni cayapa Jesús que laa. Gudiñe ca laa ne bini burla ca laa.

<sup>64</sup> Bindiibi ca lú be ne gdapá ca laabe, ne na ca iní' be tu gdapá laabe.

<sup>65</sup> Ne birá ru ni gudxi ca laabe para guni burla si ca laabe.

*Ra zuhuua Jesús nezalú justicia*

(Mt. 26.59-66; Mr. 14.55-64; Jn. 18.19-24)

<sup>66</sup> Ora birá gueela sti dxi que, bidxiña ca xaíque sti guidxi que, ne ca xaíque sti ca sacerdote ne ca maistru de ley. Ucuaa ca laabe ne bichiña ca laabe ra nuu irá justicia stica'. Ne raqué na ca':

<sup>67</sup> —Gudxi laadu pa lii nga Cristu, ni nexhe useenda Dios que.

Para rabi be laaca':

—Neca pe gabe laatu qué zuni cre tu.

<sup>68</sup> Ne pa inaba diidxa laatu xixa qué zacabi tu, ne qué zundaa tu naa.

<sup>69</sup> Peru dede yanna ma chi tí Hombre Biseenda Dios cue' Dios ni nandxó'.

<sup>70</sup> —Lii nga Xiiñi Dios pue la? na irá ca'.

Para rabi be laaca':

—Laatu caní' tu ni.

<sup>71</sup> Oraque na ca':

—Xi jma ru caquiiñe ganna nu, partí ma bina diaga nu de ruaa pe be.

## 23

*Udi'di Jesús lu ná Pilatu*  
(Mt. 27.1-2, 11-14; Mr. 15.1-5; Jn. 18.28-38)

<sup>1</sup> Para biasa irá ca ucuaa ca laabe, yené ca laabe ra nuu Pilatu.

<sup>2</sup> Ne bizulú ca uluu ca xqueja be, na ca':

—Una'ze du hombre ri caguite ca binni xquidxi du. Cayabi be laaca cadi naquiiñe quixe ca lu ná gobiernu, ne laca na be laabe nga Cristu ni zeda tí de rey.

<sup>3</sup> Oraque na Pilatu rabi laabe:

—Ñee lii nga rey sti ca judíu la?

—Laca lii caníu' ni, na be.

<sup>4</sup> Para na Pilatu rabi ca xaíque sti ca sacerdote ne ca binni que:

—Gasti donda qué idxela luguiá hombre ri'.

<sup>5</sup> Peru jma rusi ucuá ca tema, na ca':

—Cusiidi be binni ucaa lú gobiernu. Bizulú be Galilea ne zacá uzá be idubi Judea, ne yanna ma bedandá be rarí'.

*Ra zuhuua Jesús nezalú  
Herodes*

<sup>6</sup> Ora bina diaga Pilatu xi na cabe, unaba diidxa pa binni Galilea laabe.

<sup>7</sup> Ne ora gudxi cabe laa binni Galilea laabe la? biseenda laabe ra nuu Herodes, partí laa naca gobernador de Galilea, ne bia'si pe nuu Jerusalén ca dxi que.

<sup>8</sup> Ma xadxí napa Herodes gana gu'ya laabe partí nabé huayuna diaga de laabe ne cabeza gu'ya guni be ti milagru. Ngue runi nabé bieche ora bi'ya laabe.

<sup>9</sup> Ne birá ni unaba diidxa laabe, peru nin ti diidxa qué nicabi be laa.

<sup>10</sup> Nuu ca xaíque sti ca sacerdote ne ca maistru de ley raqué. Cadi cayaana dxí ca de caguu ca xqueja be.

<sup>11</sup> Ne óraque bizulú Herodes ne ca soldadu sti' udxite ca laabe, ne para guni burla ca laabe bigacu ca laabe ti lari sicarú ni racu rey, ne bidxigueta laabe ra nuu Pilatu.

<sup>12</sup> Dxi que ru uyuu Herodes ne Pilatu tobi si, partí nanala'dxi saa ca'.

*Gu'ta gati Jesús*

(Mt. 27.15-26; Mr. 15.6-15; Jn. 18.39-19.16)

<sup>13</sup> Oraque guridxi Pilatu ca xaíque sti ca sacerdote ne ca xaíque sti guidxi que ne ca binni guidxi que,

<sup>14</sup> ne na rabi laaca':

—Bedané tu hombre ri ra nuua partí na tu canaguítate be binni, Peru ma gunaba diidxa laabe nezalú tu ne qué

nidxela gasti donda luguiá be de ni na tu cayuni be ca.

<sup>15</sup> Nin Herodes qué nidxela gasti luguiá be, nga runi ma bidxigueta laabe ra nuu nu. Qué huayuni be gasti para gati be.

<sup>16</sup> Chi usaba naya laabe ne undaa laabe.

<sup>17</sup> Irá iza saa pascua napa Pilatu xidé undaa ti presu.

<sup>18</sup> Peru irá binni que bizulú ca bicaa ca ridxi:

—Bjiti laabe ne bindaa Barrabás.

<sup>19</sup> Ne Barrabás nda yeguyoo partí udxite ique binni ucaa lú gobiernu ne laca partí bjiti binni.

<sup>20</sup> Bigueta uní' Pilatu racala'dxi undaa Jesús.

<sup>21</sup> Peru jma rusi reciu bicaa ca binni que ridxi:

—¡Bicaa laabe lu cruz! ¡Bicaa laabe lu cruz!

<sup>22</sup> Bigueta na Pilatu raguionna tiru:

—Xi huayuni be ni cadi jneza, partí qué idxela dia' xi bi'ni be para gati be. Zusaba naya sia' laabe ne zundaa laabe.

<sup>23</sup> Qué ñaana dxí ca binni que, sínunque jma rusi reciu bicaa ca ridxi icá be lu cruz. Raqué nuu ca cucaa ca ridxi, laaca ne ca xaíque sti ca sacerdote, dede bicuudxi ca Pilatu.

<sup>24</sup> Para na Pilatu zaa gaca ni na cabe.

<sup>25</sup> Ne óraque bindaa ni unaba cabe que, ne bisaana Jesús lu ná cabe. Barrabás nda yeguyoo partí bicaa lú gobiernu ne bjiti binni.

*Ucuá Jesús lu cruz  
(Mt. 27.32-44; Mr. 15.21-32; Jn. 19.17-27)*

<sup>26</sup> Biree né cabe Jesús, ziné cabe laa. Ne ra ze cabe que, bidxaaga cabe ti hombre de Cirene lá Simón, casi zeeda de gui'xhi'. Para biguá' cabe laa cruz que ne zinanda né ni laabe.

<sup>27</sup> Laca zinanda stale binni laabe, ne ze stale gunaa ziucuaa ca ridxi ziyuuna né ca laabe.

<sup>28</sup> Peru bitiixhi lú be biiya dxí be laaca ne rabi be laaca':

—Guna de Jerusalén ca', cadi gu'na tu pur naa, sínunque laguuna pur laca laatu ne pur xiiñi tu.

<sup>29</sup> Purti zadxiña dxi na cabe: "Dichosa cani qué ñanda ñapa ba'du', cani qué nixana, ne cani qué nungadxi."

<sup>30</sup> Ne ca dxi que zaní' binni, pa ñanda si ñaba dani ro' ne dani huiini luguiá ca' para nuchii laaca'.

<sup>31</sup> Purti pa dede naa cayuni cabe sicarí la? xi aca xa de laatu ya'.

<sup>32</sup> Ra ziné cabe laabe que laca ziné cabe chupa gubaana gati né laabe.

<sup>33</sup> Ne casi yendá cabe ti lugar ni rabi cabe Calavera la? raqué bicaa cabe laabe lu cruz, ne bicaa cabe ca gubaana que, tobi ladu derechu ne stobi ladu biga'.

<sup>34</sup> Oraque na be:

—Bixhoze', bini perdonar laacabe, partí qué ganna cabe xi cayuni cabe.

Ne uluu ca soldadu que xhaba be lu rifa, ne cada tobi ucuaa ni gulee.

<sup>35</sup> Zuhuaa stale binni, cayuuya'. Ne ca xaique stica cayuni burla laabe, na ca':

—Hualá be stobi, yanna ulá be laca laabe pa huandí laabe nga Cristu ni ulí Dios.

<sup>36</sup> Laca bini asariar ca soldadu que laabe, bidxiña né ca vinagre, bidii ca laabe,

<sup>37</sup> ne na ca':

—Pa huandí rey sti ca judíu lii la? bilá laca lii.

<sup>38</sup> Cá caadxi diidxa xaique be, cá ni diidxa griegu, latín, ne hebreu, na ni: "Ndi nga rey sti ca judíu."

<sup>39</sup> Ne bizulú tobi de ca gubaana cá lu cruz que bini burla laabe:

—Pa huandí Cristu lii la? bilá lii ne bilá laadu.

<sup>40</sup> Para gudinde né stobi que laa, na rabi laa:

—Ñee qué ridxi'bu Dios la? nin ne nuu né nu laabe lu enda guti ri'.

<sup>41</sup> Para laanu la? jneza gudixhe cabe ni, partí rarí nga caguixe nu saca irá ni bini nu, peru laabe la? qué huayuni be gasti ni cadi jneza.

<sup>42</sup> Ne na rabi laabe:

—Jesús, bietenala'dxi naa ora gueda guni mandar lu'.

<sup>43</sup> Para na be:

—Yanadxí ca ziuu neu naa ra nuu enda nayeche sti Dios.

*Ra guti Jesús*

*(Mt. 27.45-56; Mr. 15.33-41; Jn. 19.28-30)*

<sup>44</sup> Ne bia' galaa dxi bicahui idubi guidxilayú ne zaqué bi-aana ni dede bia' las tres.

<sup>45</sup> Bicahui lú gubidxa ne ureza cortina nanda ndaani yu'du ro', galaa, galaa.

<sup>46</sup> Oraque bicaa be ridxi:

—Bixhoze' ucuaa espíritu stinne'.

Ngue si uni' be, guti be.

<sup>47</sup> Ora bi'ya capitán sti ca soldadu que irá ni cayaca, bisisaca Dios, na:

—Dxandí nayá ladxidó' hombre ri'.

<sup>48</sup> Ne irá binni ni yeguuya ni uca que bigueta ca ralidxi ca', ziguibi ná ca ladxidó' ca'.

<sup>49</sup> Peru irá cani runibiá' laabe ne ca gunaa ni yenanda laabe dede Galilea zuhuua ca zitu, cayuuya ca ni cayaca que.

### *Ra bigaachi Jesús*

(Mt. 27.57-61; Mr. 15.42-47; Jn. 19.38-42)

<sup>50</sup> Lade ca justicia sti ca judíu zeeda tobi hombre lá José, binni Arimatea de Judea. Nabé nacha'hui be ne runi be jneza.

<sup>51</sup> Ne laca cabeza be idxiña dxi guni mandar Dios, ne qué ñuu né be ca xcaadxi justicia ra gudixhe ca xi aca Jesús ne ra bi'ni ca ni.

<sup>52</sup> Uyé be ra nuu Pilatu, yenaba be laa cuerpu sti Jesús.

<sup>53</sup> Yendete be ni lu cruz ne bichenda be ni ti lari gueela ne bicaachi be ni ndaani ti ba' ni uddaañe cabe cue' ti guie, ra iruti huagaachi'.

<sup>54</sup> Uca ni viernes bia' ziyaazi gubidxa, ma para uzulú dxi enda riziila'dxi'.

<sup>55</sup> Laca uyé ca gunaa ni beda nanda Jesús dede

Galilea que, ne biiya ca modo guta cuerpu sti Jesús.

<sup>56</sup> Ne ora bigueta ca udixhe chaahui ca guixi rindá' naxhi ne nisa rindá' naxhi. Ne biziila'dxi cabe casi cá lu ley guni binni dxi que.

## 24

### *Ra bibani Jesús*

(Mt. 28.1-10; Mr. 16.1-8; Jn. 20.1-10)

<sup>1</sup> Domingo siadó' ro' ucuaa cabe irá ni gudixhe chaahui cabe que, uyé cabe ra ba', ne yené xcaadxi gunaa laacabe.

<sup>2</sup> Ne ora yendá cabe ma biduuba guie ye'gu ruua ba' que.

<sup>3</sup> Para biuu cabe ndaani ba' que, peru ma cadi nexhe cuerpu sti Señor Jesús raqué.

<sup>4</sup> Raqué nuu cabe, qué idxela cabe xi guni cabe, mala biiya cabe zuhuua chupa hombre cue' cabe, ruzaani xhaba ca'.

<sup>5</sup> Nabé bidxibi cabe ne bisaba ique cabe layú. Para na ca':

—Xiñee cuyubi tu ni nabani lade gue'tu'.

<sup>6</sup> Ma qué guinni di be rarí'. Ma bibani be. Laguietanala'dxi xi uní' be dxi nuu ru be Galilea,

<sup>7</sup> gudxi be laatu nexhe inaaze ca hombre malu Hombre Biseenda Dios para ucaa ca laa lu cruz, peru raguionna gubidxa zabani.

<sup>8</sup> Oraque ru bietenala'dxi cabe dxandí uní' be ni.

<sup>9</sup> De ra ba' que biree cabe yetidxi cabe ni ca apóstol ne ca xcaadxi ni uzá né Jesús.

<sup>10</sup> Cani yetidxi ca apóstol que nga María Magdalena ne Juana ne María jñaa Jacobo ne ca xcaadxi gunaa que.

<sup>11</sup> Peru para laaca rului' enda huati si ni caní' cabe que, ne qué ñuni cre ca'.

<sup>12</sup> Peru biasa uxooñe Pedro uyé ra ba' que, ne ora uluu lú ndaani ba' que, biiya ma lari gueela si nexhe raqué. Qué irá idxagayaa de ni uca que, biree zibí'.

*Biiya chupa discípulu  
Jesús*

(Mr. 16.12-13)

<sup>13</sup> Dxi queca biree chupa de ca binni ni uzá né Jesús dxi canazá ru', ze ca Emaús, bia' once kilómetru de Jerusalén.

<sup>14</sup> Ziyuí' ca irá ni uca ca dxi que.

<sup>15</sup> Ne laga ziyuí' ca diidxa bidxiña Jesús ra nuu ca' ne ziné laaca'.

<sup>16</sup> Peru neca biiya ca laabe, casi ñaca qué ñuuya ca', purti qué ñunibíá' ca laabe.

<sup>17</sup> Ne na be rabi be laaca':

—Ruuya nabé triste nuu tu. Xii nga zeda yuí' tu neza.

<sup>18</sup> Para na tobi de laaca', lá Cleofas, rabi laabe:

—Irá binni nanna xi uca ndaani guidxi Jerusalén ca dxi ri'. Ñee lii siou' lade irá ni biete raqué qué gannu ni la?

<sup>19</sup> —Xi laa, rabi be laaca'.

Para na ca':

—Cuze'te du ni uca Jesús de Nazaret, ti profeta nandxó' nezalú Dios ne nezalú irá binni. Rihuinni nandxó' be pur ni bi'ni be ne ni uní' be.

<sup>20</sup> Cayú du modo gudixhe ca xaíque sti ca sacerdote ne ca justicia stidu gati be, ne bicaa ca laabe lu cruz.

<sup>21</sup> Laa nda du zácxaxa du laabe nga chi ulá be ca binni Israel. Ne ma raca chonaa gubidxa de guca irá nga,

<sup>22</sup> peru cadi nga si nga laani purti yanna nabé cadxagayaa du pur ni gudxi caadxi gunaa laadu, laca de laadu. Nacanda ru uyé cabe ra ba'

<sup>23</sup> ne qué nidxela cabe cuerpu stibe. Ora bigueta cabe gudxi cabe laadu biiya cabe casi ti ángel ne gudxi laacabe ma bibani be.

<sup>24</sup> Laca uyé xcaadxi de laadu, yeguuya ra ba' que. Ne dxandi', casi na ca gunaa que zaqué nuu ni. Peru qué ñuuya ca laabe.

<sup>25</sup> Oraque na Jesús rabi laaca':

—Aque huaxié' riene tu xa. Rindaa para guni cre tu irá ni uní' ca profeta.

<sup>26</sup> Ñee cadi maca nexhe tidi Cristu irá nga para chu' lu enda risaca sti la?

<sup>27</sup> Ne bisiene be laaca irá ni cá lu Xqui'chi Dios ra ruzeete ni laabe. Bizulú né be ni bicaa Moisés ne biluxe be ra birá ni bicaa ca profeta.

<sup>28</sup> Ora yendá cabe guidxi ra ze cabe que, bi'ni be sica ni ze be jma zitu,

<sup>29</sup> peru ucuá ca lú be guiaana be, na ca':

—Biaana né laadu rarí'. Ma huadxí ndi', ma chi guiaazi gubidxa.

Para biuu be ralidxi ca', biaana né be laaca'.

<sup>30</sup> Ne ra zuba cabe ruaa mexa', chi to xhi cabe, ucuua be pan ni nexhe raqué, bidii be diuxquixe Dios para undaa be ni, bidii be ni laaca'.

<sup>31</sup> Oraque ru', sica ni bixele lú ca' binibiá' ca laabe. Peru ma qué ñaana ru be lú ca'.

<sup>32</sup> Ne na ca':

—Ñee cadi de biniibi dxacha ladxidó' no ra zedané be laanu neza ziupa nu, ne ra bisiene be laanu xi na Xqui'chi Dios la?

<sup>33</sup> Oraqueca biasa cabe bigueta cabe Jerusalén, biyubi cabe ra nuu once discípulu que ne cani nuu né laaca raqué.

<sup>34</sup> Oraque na ca discípulu rabi laacabe:

—Dxandí bibani Señor. Ma biiya Simón laabe.

<sup>35</sup> Para byuí' né cabe laaca xi uca cabe neza, ne modo binibiá' cabe laabe ora undaa be pan.

*Bidxiña Jesús ra nuu ca discípulu sti'*

(Mt. 28.16-20; Mr. 16.14-18; Jn. 20.19-23)

<sup>36</sup> Cayuí' ru ca de nga, mala bizuhuaa be galahui de laaca', bigapa diuxi be laaca', na be:

—Gata dxí ladxidó' to.

<sup>37</sup> Laaca la? bidxibi ca dede cayaca dití ca'. Zácaxa ca tentación cayuya ca'.

—Para rabi be laaca':

—Xiñee cadxibi tu. Xiñee cadi cayuni cre tu.

<sup>38</sup> Laguuya bata naya ne bata ñee', guuya tu naa pia' ndi'. Laca'na guuya tu napa dxita lade' ne beela. Ti tentación la? qué gapa nga.

<sup>40</sup> Ne laga cayabi be nga laaca la? biluí' be laaca ná be ne ñee be.

<sup>41</sup> Peru tantu cayeche ca ne cadxagaya ca la? dede qué ganda guni cre ca'. Para rabi be laaca':

—Ñee napa tu xiixa go binni la?

<sup>42</sup> Oraque bidii ca laabe tindaa benda biguii lu buu ne ti campana bizu napa miel.

<sup>43</sup> Ucuua be ni, gudó be ni nezalú ca'.

<sup>44</sup> Ne rabi be laaca':

—Irá ni bizaaca ri la? nga nga ni byué nia laatu que. Gudxe laatu napa xidé gaca irá ni cá lu xqui'chi Moisés, ne ni bicaa ca profeta ne ni cá lu Salmo, irá ra ruzeete ni naa.

<sup>45</sup> Ne óraque bixhele be xquenda biaani ca para guiene ca ni cá lu Xqui'chi Dios.

<sup>46</sup> Ne rabi be laaca':

—Zacá nga cá ni, napa Cristu xidé gati' ne ibani ra guionna gubidxa.

<sup>47</sup> Ne óraque useenda be tu chi güí né binni naquiiñe inaba ca perdón Dios para aca perdonar ca'. Zuzulú ni Jerusalén, de racá ma ze ni irá guidxi.

<sup>48</sup> Laatu zanda güí tu ni purti biiya pe tu irá ni.

<sup>49</sup> Laguuya'. Zuseenda ni bidii stiidxa Bixhoze gueeda guiaana né laatu. Peru cadi ixele tu de Jerusalén de ora ma ucuaa tu enda nandxó' ni gueeda de ibá'.

*Biasa Jesús ze ibá'*  
(Mr. 16.19-20)

50 Oraque ucuaa be laaca  
biree né be laaca de ndaani  
guidxi que, yené be laaca  
Betania. Ne raqué undisa ná  
be, uluu be ndaaya laaca'.

51 Caguu ru be ndaaya  
laaca', biasa be ze be ibá'.

52 Ne biluxé si bisisaca ca  
laabe, nabé nayeche bigueta  
ca Jerusalén.

53 Ne qué niree ca ndaani  
yu'du ro', bisisaca ca Dios ne  
bidii ca diuxquixe laa. Amén.

# STIIDXA JESUCRISTU NI BICAA SAN JUAN

*Beda gaca Xiiñi Dios binni guidxilayú*

<sup>1</sup> Dxi bizulú Dios bizá' guidxilayú ne ibá' maca nuu tobi ni rabi cabe Diidxa', ne uyuu Diidxa que ra nuu Dios, ne Diidxa que Dios laa.

<sup>2</sup> Dxi bizulú guidxilayú ne ibá' maca nuu né Diidxa que Dios.

<sup>3</sup> Pur laabe uca irá xixé cosa ne pa sin laabe qué ñaca gasti de ni ma uca ca.

<sup>4</sup> Lu ná be nuu enda nabani, ne naca enda nabani que biaani para irá binni.

<sup>5</sup> Ruzaani biaani que lu guelacahui, ne qué huayanda utaagu guelacahui ni.

<sup>6</sup> Uyuu tobi ni biseenda Dios, lá Juan.

<sup>7</sup> Beda güi né binni stiidxa stobi ni nexhe gueeda, ni gueda gaca biaani para irá binni guidxilayú. Beda güi be stiidxa ngue para guni cre binni laa dxi gueeda.

<sup>8</sup> Cadi laadi be nga biaani que, sínunque beda güi né si be binni stiidxa biaani que,

<sup>9</sup> dxa biaani nexhe gueeda ndaani guidxilayú que para uzaani irá binni. Ne biaani que nga Cristu.

<sup>10</sup> Beeda be ndaani guidxilayú ni bizá' be, peru qué ñunibiá' binni guidxilayú laabe.

<sup>11</sup> Beeda be xquidxi pe be, Peru qué nulabi ca binni xquidxi be laabe.

<sup>12</sup> Peru irá cani bilabi laabe ne bini cre laabe la? bi'ní be laaca xiiñi Dios.

<sup>13</sup> Ne para guca cabe xiiñi Dios la? qué ñale cabe de gunaa ne hombre casi rale binni guidxilayú, o nin purti uyuu laa dxi hombre gaca ni, sínunque zeeda ni de Dios.

<sup>14</sup> Beda gaca dxa Diidxa que binni, ne uleza be lade du. Ne bidu'ya du enda nandxo' stibe. Nandxo' be purti laabe nga tobi lucha Xiiñi Dios Padre. Uca be nacha'hui ne binni, ne bi'ní be puru si ni jneza.

<sup>15</sup> Byui' né Juan binni stiidxa be. Ne bicaa ridxi na rabi laacabe:

—Ndi nga ni huayabe laatu nanda atrá de naa que, ni gudxe laatu jma risaca que naa, purti maca nuu be ante chuaa'.

<sup>16</sup> Nacha'hui be ne binni ne qué riaana dxí be de cu' be ndaaya laanu.

<sup>17</sup> Purti bidii Dios ley Moisés para udii ni binni, Peru ra beeda Jesucristu uca Dios nacha'hui ne binni, ne bihuinni xii nga ni dxandi'.

<sup>18</sup> Iruti binni guidxilayú qué huayuya Dios sínunque tobi lucha si Xiiñi be ni nuu né laabe tobi si, laa beda usiene binni ximodo laabe.

*Ra unaba diidxa cabe Juan tu laa*

(Mt. 3.11-12; Mr. 1.7-8;  
Lc. 3.15-17)

<sup>19</sup> Ti dxi biseenda ca judíu de Jerusalén chupa chonaa sacerdote ne levita ra nuu

Juan, para yenaba diidxa ca Juan tu laa.

<sup>20</sup> Ne óraque bisiá stiidxa' ne qué nucaachi gastí' sínunque gudxi laacabe cadi Cristu laa.

<sup>21</sup> Para na ca rabi ca laabe:  
—Entonce tu lii pue. Nee lii nga Elías la?

Oraque na be:

—Co', cadi Elías di naa.

Bigueta na ca':

—O lii nga dxa profeta ni gueeda que la?

—Lácaca co', na be.

<sup>22</sup> Oraque na ca':

—Gudxi laadu tu lii pue ti gapa du xi gabi du cani biseenda laadu. Xi zanda ga'bu laadu de lii.

<sup>23</sup> Para na be:

—Naa nga ni cucaa ridxi ndaani gui'xhi: "Lauxhele ladxidó' to para Señor, casi ñaca cuxhele tu ti neza tidi be", casi bizeete profeta Isaías ni chiqué.

<sup>24</sup> Laca nuu caadxí fariseu lade cani yenaba diidxa que.

<sup>25</sup> Para rabi ca laabe:

—Pa cadi Cristu lii nin Elías nin dxa profeta que la? xiñee caguu nisa lu ya'.

<sup>26</sup> Para rabi be laaca':

—Naa la? caguua ni'sa', peru nuu tobi lade tu ni ca'ru gunibiá' tu.

<sup>27</sup> Laabe nga ni gudxe laatu zeeda atrá de naa que, peru naa qué risaca dia' nin para cuee guela guidi ñee be.

<sup>28</sup> Dxi uca nga la? nuu Juan ndaani guidxi Betábara, cherica guiigu Jordán ra caguu nisa.

*Dendxu huiini sti Dios*

<sup>29</sup> Sti dxi que biiya Juan zeeda Jesús ra nuu, para na:

—Laguuya', ndi nga Dendxu huiini sti Dios ni ribee xpecadu binni guidxilayú.

<sup>30</sup> Ndi nga dxa hombre ni huayabe laatu zeeda atrá de naa ni jma risaca que naa partí ante chuaa maca nuu.

<sup>31</sup> Chiqué nin naa qué ñunebia'ya laabe, peru para ulué binni Israel tu laabe la? nga runi beda nduaa ni'sa'.

<sup>32</sup> Ne gudxi Juan laacabe xi bi'ya', na:

—Biiya zeda yete Espíritu Santu de ibá' casi ti paloma ne biaana dxí luguiá be.

<sup>33</sup> Ca'ru gunebia'ya laabe, peru ni biseenda naa gueda nduaa ni'sa', ngue gudxi naa ora guuya guiete Espíritu Santu ne guiaana dxí luguiá ti hombre la? ngue nga ni chi udii Espíritu Santu binni.

<sup>34</sup> Naa biiya laabe ne ma gudxe binni deque laabe nga Xiiñi Dios.

*Cani bizulú yenanda Jesús*

<sup>35</sup> Bigueta sti dxi que, zuhuua né Juan chupa de cani canazá né laa

<sup>36</sup> ora zidi'di Jesús neza que, para biiya dxí Juan laabe ne na:

—Laguuya', ndi nga Dendxu huiini sti Dios.

<sup>37</sup> Ne bina diaga iropa cabe ni uní' Juan, para yenanda cabe laabe.

<sup>38</sup> Ora bidxigueta lú be bi-iya be zeda nanda ca laabe, gunaba diidxa be laaca', na be:

—Xi ruyubi tu.

Para na ca':  
—Maistru, tu ralidxi biete  
lu'.

<sup>39</sup> Para rabi be laaca':  
—Latá' gu'ya tu.

Oraque yeguuya ca paraa  
biete be. Ne biaana né  
ca laabe dxi que partí ma  
huadxí ngue, bia' las cuatro.

<sup>40</sup> Tobi de ca discípulu ni  
bina diaga ni uní Juan ne  
yenanda Jesús que la? lá  
Andrés bi'chi Simón Pedru.

<sup>41</sup> Nirudó' yeyubi be Simón  
bi'chi be ne rabi be laa:

—Ma bidxela du Mesías ni  
rabi cabe Cristu ni ulí Dios  
que.

<sup>42</sup> Ne yené be laa ra nuu  
Jesús. Oraque biiya dxí Jesús  
laa ne na:

—Lii nga Simón, xiiñi  
Jonás nja', peru ma chi iree  
lá lu Cefas (didxzazá la? ñabi  
be laa Pedru).

*Ra guridxi Jesús Felipe ne  
Natanael*

<sup>43</sup> Sti dxi que na Jesús che  
Galilea, ne ra ze be que bidx-  
aaga be Felipe para rabi be  
laa:

—Dananda naa.

<sup>44</sup> Felipe laca binni Bet-  
saida laa, xquidxi Andrés ne  
Pedru.

<sup>45</sup> Yeyubi Felipe Natanael,  
ne ora bidxela be laa rabi be  
laa:

—Ma bidxela du dxa hom-  
bre de ni bicaa Moisés lu  
gui'chi ra cá ca ley ne ni  
bizeete ca profeta que, ne  
laabe nga Jesús xiiñi José de  
Nazaret.

<sup>46</sup> Para na Natanael rabi  
laabe:

—Zanda xa iree ni iquiiñe  
de Nazaret.

—Gudá' gu'yu', rabi be laa.

<sup>47</sup> Ora bi'ya Jesús zidxiña  
Natanael laa na:

—Laguuya ndi nga tobi ni  
dxandí pe naca binni Israel,  
laabe qué rusigui be.

<sup>48</sup> Oraque na Natanael rabi  
Jesús:

—Para binibiá' lu naa ya'.

Para na Jesús rabi laa:

—Ante cuidxi Felipe lii, ora  
nuu lu xa'na yaga du'ga que,  
maca biiya lii.

<sup>49</sup> Oraque na Natanael rabi  
laabe:

—Maistru, lii nga Xiiñi  
Dios. Lii nga Rey sti binni  
Israel.

<sup>50</sup> Para rabi be laa:

—Purti si gudxe lii biiya lii  
xa'na yaga du'ga ma bini cre  
lu la? Chi guuya rou' cosa ni  
jma nandxó' que nga.

<sup>51</sup> Ne na be:

—Gabe ca' laatu de ca  
yanadxi zuuya tu zuxele ibá',  
ne ca ángel sti Dios cagui'ba  
ca ne cayete ca xa ique Hom-  
bre Biseenda Dios.

## 2

*Enda xheela ni uca Caná  
de Galilea*

<sup>1</sup> Rabionna gubidxa que  
uca ti enda xheela ndaani  
guidxi Caná de Galilea, ne  
nuu jñaa Jesús raqué.

<sup>2</sup> Laca bini invitar cabe  
Jesús ne ca discípulu sti' ra  
enda xheela que.

<sup>3</sup> Ne ora bibidxi vinu raqué  
la? na jñaa Jesús rabi laa:

—Ma qué gapa cabe vinu.

<sup>4</sup> Para na Jesús rabi laabe:

—Cadi ga'bu naa xi gune,  
Amá, partí ca'ru idxiña hora  
stinne'.

<sup>5</sup> Oraque na jñaa be rabi cani canaguiizi que:

—Laguni intiisi gabi be laatu.

<sup>6</sup> Zuhuaa xhoopa tinaja de guie ni riquiñe lu costumbre de enda ria'ri sti ca judíu raqué. Cada tinaja que riné chupa o chonna rii nisa.

<sup>7</sup> Ne na Jesús rabi laacabe:

—Lauchá ca tinaja ca de nisa.

Ne bichá tipa cabe cani.

<sup>8</sup> Oraque rabi be laaca':

—Lacuee caadxi yanna ne lachiné ni ra nuu mayordomo.

Para yené cabe ni.

<sup>9</sup> Bini prueba mayordomo vinu ni deru uca que, ne qué ganna xidé ni, peru cani udala nisa ndaani tinaja que nanna xii ni. Oraque guridxi mayordomo que novio,

<sup>10</sup> ne na rabi laa:

—Irá binni casi uzulú qui'zi rudii vinu cha'hui', ne ora ma güe' cabe stale la? óraque ru rudii vinu ni huaxié' galán. Peru lii deru cudiuii vinu ni jma nacha'hui'.

<sup>11</sup> Nga nga primé milagru ni bi'ní Jesús. Ne guca ni ndaani guidxi Caná de Galilea. Raqué biluí' be pabiá' nandxó'be, ne bini cre ca discípulu stibe laabe.

<sup>12</sup> Uca si ngue uyé be Caperнаum, laabe ne jñaa be ne ca bi'chi be ne ca discípulu stibe. Biaana cabe raqué chupa chonna gubidxa.

*Bisiá Jesús yu'du ro'*

(Mt. 21.12-13; Mr. 11.15-18; Lc. 19.45-46)

<sup>13</sup> Ma zeda yuba pascua, saa ro' sti ca judíu, uyé Jesús Jerusalén.

<sup>14</sup> Ne ora biuu be ndaani yu'du ro' biiya be nuu cani cutoo buey ne dendxu' ne paloma, ne cani cuchaa bidxichi, zuba ca rúa jmexa ca'.

<sup>15</sup> Para bi'ni be ti chicote de doo, guladxi né be ni irá xixé ca' ne ca dendxu stica ne ca xpuey ca', ne bitiixhi be jmexa cani ruchaa xpueltu binni ne bicheeche bē xpidxichi ca'.

<sup>16</sup> Ne rabi be cani cutoo paloma:

—Lacuee irá ndi rari'. Cadi guni tu lidxi Bixhoze yoo guiaa.

<sup>17</sup> Oraque bietenala'dxi ca discípulu stibe cá ni lu Xqui'chi Dios sicarí: "Tantu racaladxe gapa li'dxu dede runduuxe ni naa."

<sup>18</sup> Para na ca judíu rabi laabe:

—Yáquexa cayu'nu irá ndi la? xi seña udiuu laadu para ganna du napu derechu gu'nu cani.

<sup>19</sup> Para rabi be laaca':

—Lauxhá yu'du ri', ne lu chonna gubidxa zandisa ni.

<sup>20</sup> Oraque na ca judíu:

—Cuarenta y seis añu bicuí cabe yu'du ri' ne lii nou' lu chonna si gubidxa zandisa lu ni la?

<sup>21</sup> Peru laabe cuchaaga be cuerpu stibe yu'du que ne nga nga ni cuzeete be.

<sup>22</sup> Ngue runi dxi laabe ma biasa be de lade gue'tu que bietenala'dxi ca discípulu stibe ni uní' be ca, ne óraque

bini cre ca ni, ne bini cre ca  
Xqui'chi Dios ni ucuá chiqué.

### *Runibiá' Jesús irá'*

<sup>23</sup> Ca dxi uyuu be Jerusalén  
dxi saa pascua que, uyuu  
stale tu bini cre laabe partí  
biiya ca ca milagru ni bi'ni be  
raqué.

<sup>24</sup> Peru huaxié' gupa  
be confianza laaca', partí  
runibiá' be ladxidó' irá binni,

<sup>25</sup> ne qué riquiñe be tu  
gabi laabe xi naca binni,  
partí maca nanna be xi nuu  
ndaani ladxidó' cada tobi.

## 3

### *Jesús ne Nicodemo*

<sup>1</sup> Chiqué uyuu tobi hombre  
de ca fariseu lá Nicodemo.  
Naca be tobi de ca xaíque sti  
ca judíu.

<sup>2</sup> Ti gueela uyé be ra nuu  
Jesús ne rabi be laa:

—Maistru, nanna du lii  
nga maistru ni beeda de Dios  
partí iruti ñanda ñuni ca mi-  
lagru ni ru'nu ri pa ñaca cadi  
nuu né Dios laa.

<sup>3</sup> Para na Jesús rabi laabe:  
—Gabe ca' lii, tu qué gale  
sti tiru la? qué zanda di chu'  
ra runi mandar Dios.

<sup>4</sup> Oraque na be:  
—Ximodo zanda gale ti  
hombre ora ma huaniisi ya'.  
Zanda xa guiuu ndaani jñaa  
ne gale sti tiru.

<sup>5</sup> Bigueta na Jesús rabi  
laabe:

—Gabe ca' lii, tu qué gale  
de nisa ne de Espíritu, qué  
zanda di chu' ra runi mandar  
Dios.

<sup>6</sup> Ni gale de cuerpu la?  
cuerpu laa, ne ni gale de  
Espíritu la? espíritu laa.

<sup>7</sup> Cadi idxagayaa lu ti rabe  
lii naquiiñe gale tu sti tiru.

<sup>8</sup> Bi rundubi ladu tiisi ne  
runa diaga lu rixidxi, peru  
qué gannu padé zeeda nin  
paraa che'. Zacaca nga irá tu  
gale de Espíritu.

<sup>9</sup> Oraque na be:

—Ximodo zanda gaca ndi  
ya'.

<sup>10</sup> Para na Jesús rabi laabe:

—Lii naca lu ti maistru sti  
ca binni Israel ne qué riene  
lu ni la?

<sup>11</sup> Gabe ca' lii riní du de ni  
nanna du, ne rui né du laatu  
ni bidu'ya du, peru qué runi  
cre tu ni rabi du laatu.

<sup>12</sup> Pa huayabe laatu cosa de  
guidxilayú ne qué runi cre tu  
la? ximodo ñanda ñuni cre tu  
pa ñabe laatu cosa de ibá' ya'.

<sup>13</sup> Iruti huagui'ba ibá' pa  
cadi ni biete de ibá' ne nga  
nga Hombre Biseenda Dios,  
ne ibá' nga jlugar be. Ne naa  
nga Hombre Biseenda Dios  
que.

<sup>14</sup> Cásica gundisa Moisés  
beenda ndaani gui'xhi  
chiqué, zaqueca nga  
naquiiñe indisa cabe Hom-  
bre Biseenda Dios,

<sup>15</sup> ti irá ni guni cre laabe,  
cadi initilú sínunque gapa  
enda nabani ni qué zaluxe.

*Nadxii Dios binni guidxi-  
layú*

<sup>16</sup> Purti nadxii xhaata Dios  
binni guidxilayú ngue runi  
bidii tobi lucha Xiiñi', ti irá tu  
guni cre Xiiñi be qué la? cadi  
initilú sínunque gapa enda na-  
bani ni qué zaluxe.

<sup>17</sup> Biseenda be Xiiñi be guidxilayú cadi para udxiba donda ique binni, sínuque para ilá binni pur laa.

<sup>18</sup> Tu runi cre Xiiñi be que la? qué zagui'ba donda ique, peru tu qué runi cre Xiiñi be que la? maca dxi'ba donda ique partí qué runi cre tobi lucha Xiiñi be.

<sup>19</sup> Ma dxi'ba donda ique cani qué runi cre partí beeda biaani guidxilayú peru jma gunaxhii ca guelacahui que biaani, partí malu ni runi ca'.

<sup>20</sup> Irá ni runi ni cadi jneza la? nanala'dxi biaani' ne qué zie ra naya'ni ti cadi ihuinni ni runi.

<sup>21</sup> Peru ni runi jneza la? zie ra nuu biaani ti gu'ya irá xixé binni zeeda dxiiña sti de Dios.

### *Jesús ne Juan*

<sup>22</sup> Udi'di si ngue la? yené Jesús ca discípulu sti Judea, ne biaana né be laaca raqué, ne uluu nisa be binni raqué.

<sup>23</sup> Juan laca caguu nisa ti lugar lá Enón gaxha de Salim partí raqué da' zia' nisa, ne cadxiña cabe laabe ne caguu nisa be laaca'.

<sup>24</sup> Ca'rú guieguyoo be dxi que.

<sup>25</sup> Ucuaa yú né ca discípulu sti Juan caadxi judíu tu jma riquiñe enda riguu nisa sti', sti Juan la? o sti Jesús.

<sup>26</sup> Ne uyé ca ra nuu Juan, na ca rabí ca laabe:

—Maistru, ma caguu nisa dxa hombre ni uyuu né lii cherica Jordán, dxa ni byuí lu stiidxa que, ne irá binni cayé ra nuu.

<sup>27</sup> Para na be rabí be laaca': —Qué zanda icca binni gasti pa qué gueeda ni de ibá'.

<sup>28</sup> Laaca tu nanna tu unié cadi naa dia' nga Cristu, sínuque bisá niru si Dios naa lú be.

<sup>29</sup> Ra ti enda xheela nabé rieche xhamigu novio ni zuhuua raqué cucaa diaga ni caní' novio. Zacaca nga ma cayeche yanna.

<sup>30</sup> Cada dxi naquiiñe quiba be jma ne naa guiete'.

### *Ni beeda de ibá'*

<sup>31</sup> Jma risaca ni beeda de ibá' que irá xixé binni. Ni za de guidxilayú la? binni guidxilayú laa, ne rui' stiidxa guidxilayú, peru ni beeda de ibá' la? laa huaxa jma risaca que irá xixé binni.

<sup>32</sup> Ne rui' né be binni ni bi'ya be ne ni bina diaga be, ne iruti runi cre laabe.

<sup>33</sup> Peru ni ricaa stiidxa be la? riní' de idubi ladxitdó' ni runi Dios nga jneza.

<sup>34</sup> Ni biseenda Dios la? rui' stiidxa Dios, partí ruchá Dios ladxitdó' de Espíritu Santu.

<sup>35</sup> Nadxii Dios Xiiñi, ne ma gudixhe irá xixé lu ná Xiiñi'.

<sup>36</sup> Tu runi cre Xiiñi be la? napa enda nabani ni qué zaluxé, peru tu qué uzuuba stiidxa Xiiñi be, qué zapa di enda nabani, sínuque xiana stibe nuu luguiá'.

## 4

### *Sti gunaa samaritana*

<sup>1</sup> Gunna Señor ma gunda diaga ca fariseu jma stale discípulu cayapa ne jma stale binni caguu nisa que Juan,

<sup>2</sup> neca cadi laabe caguu nisa be sínue ca discípulu stibe.

<sup>3</sup> Para biree be Judea bigueta be Galilea.

<sup>4</sup> Ne napa be xidé tidi be Samaria.

<sup>5</sup> Yendá be ti guidxi sti Samaria lá Sicar ni nuu gaxha de layú ni bisaana Jacob para José xiiñi'.

<sup>6</sup> Ne raqué nuu bizé sti Jacob. Nabé ma bidxaga be tantu ma guzá be ne mayaca ganda galaa dxi ngue, para gurí be ruuaa bizé que.

<sup>7</sup> Raqué zuba be beda caa ti gunaa de Samaria nisa. Para rabi be laa:

—Bisiga'de naa caadxi nisa guee'.

<sup>8</sup> Qué guinni ca discípulu stibe, ze ca ndaani guidxi, zisí ca endaró.

<sup>9</sup> Oraque na gunaa que:

—Ximodo ndi ya'. Lii nacu judíu ne naa naca samaritana ne canaba lu naa nisa gueu' la?

Uní' gunaa que zaqué purti qué raca llevar ca judíu ca samaritanu.

<sup>10</sup> Para rabi be laa:

—Pa lii ñannu xi cudii Dios binni, ne ñannu tuu nga canaba lii nisa gue la? ninaba lu laa, ne laa nudii lii nisa ni rudii enda nabani.

<sup>11</sup> Oraque na gunaa que rabi laabe:

—Señor, peru cadi neu ni cuee neu ni, ne nabé guete bizé ri'. Paraa nga nou' ricoo nisa ni rudii enda nabani ca ya'.

<sup>12</sup> Lácaxa jma nandxó' lo que bixhoze du Jacob ni bidii bizé ri laadu. Laa güe' nisa

stini, ne laca güe' ca xiiñi ne ca xhiuze.

<sup>13</sup> Para rabi be laa:

—Tutiica gue nisa ri la? zati ru nisa.

<sup>14</sup> Peru tu gue nisa ni gudiee laa la? ma qué ziuu dxi gati nisa, purti de nisa que ziale nisa ni rudii enda nabani ni qué zaluxe.

<sup>15</sup> Oraque na gunaa que rabi laabe:

—Señor, dané naa nisa ni nou' ca para cadi gate rua' nisa ne ma cadi gueda caa nisa bizé ri'.

<sup>16</sup> Para rabi be laa:

—Yetidxi xheelu ti queedu'.

<sup>17</sup> Oraque na:

—Qué gapa dia' xheela'.

—Jneza uníu', rabi be laa, —qué gapu xheelu'.

<sup>18</sup> Purti ma gaayu xheelu gupu' ne ni nabeza neu yanna ri la? cadi xheelu'. Jneza uníu'.

<sup>19</sup> —Señor, zuluá' sia' profeta lii, na gunaa que rabi laabe.

<sup>20</sup> —Ca bixhoze gola du la? lu dani ri bisisaca ca Dios, peru laatu na tu Jerusalén nga usisaca binni Dios.

<sup>21</sup> Para rabi be laa:

—Señora, bini cre ni chitidxe lii ri'. Zadxiña dxi nin ca lu dani ri', nin ca Jerusalén qué zusisaca cabe Dios Padre.

<sup>22</sup> Laatu rusisaca tu ni qué runibiá' tu, peru laadu rusisaca du ni runibiá' du, purti de lade ca judíu iree ni ulá.

<sup>23</sup> Zadxiña dxi, ne yanna nga laani, cani dxandí racala'dxi usisaca Dios la? naquiñe guni ni modo

racala'dxi be, ne guni ni de idubi ladxidó', partí ca nga nga cuyubi Dios, cani usisaca laa zacá.

<sup>24</sup> Dios Espíritu laa, ne tu usisaca laabe la? naquiiñe chi nanda ni jneza ne guni ni de idubi ladxidó'.

<sup>25</sup> Para na gunaa que rabi laabe:

—Nanna ziuu dxi gueeda Mesías ni rabi cabe Cristu que, ne ora gueeda be zusiene be laadu irá ni.

<sup>26</sup> Oraque rabi be laa:

—Laape be nga caní' né be lii.

<sup>27</sup> Ra cayuí' cabe diidxa que beeda ca discípulu stibe ne bidxagayaa ca cayuí' né be gunaa que diidxa', peru nin tobi de laaca qué ninaba diidxa ca laabe xi canaba diidxa be gunaa que o xi cayabi be laa.

<sup>28</sup> Oraque bisaana gunaa que rii sti' ne uyé ndaani guidxi. Ne biiya nuu caadxii hombre raqué para na:

<sup>29</sup> —Latá' gu'ya tu ti hombre ni gudxi naa de irá xixé ni huayune'. Nanna pa cadi ndi nga Cristu ya'.

<sup>30</sup> Para biree ca ndaani guidxi que uyé ca ra nuu Jesús.

<sup>31</sup> Laga ze gunaa que na ca discípulu stibe rabi laabe:

—Gudá' gou', Maistru.

<sup>32</sup> Para rabi be laaca':

—Napa ti endaró. Qué ganna tu xi laa.

<sup>33</sup> Para na caadxii discípulu rabi xcaadxii que:

—Lácaxa nuu tu gueda saana endaró para laabe.

<sup>34</sup> Peru óraque rabi be laaca':

—Endaró stinne nga guna ni na ni biseenda naa, ne gunduuxe dxiiña sti'.

<sup>35</sup> Laatu na tu riaadxa ru stapa beeū para iree guela. Peru naa rabe laatu: Laindisa lú, laguuya ca ñaa ca gu'ya tu ma nuu cani para iree cani guela.

<sup>36</sup> Ni chi ndee guela ca la? nga nga cani uchiña binni ra nuua para icaa ca binni ca enda nabani ni qué zaluxe. Ne laabe zapa be enda nayeche' partí nga nga chi caa be saca bi'ni be dxiiña que, laabe ne ni bizulú byu'í né ca binni que stiidxa Dios.

<sup>37</sup> Rari pe nga riaba dichu que: "Adxé tu riguu biní, ne adxé tu ribee guela."

<sup>38</sup> Yanna naa cuseenda laatu chi ndee tu guela ra cadi laatu uluu tu biní. Adxé tu uluu biní, peru ma beda guiuu tu lú ni.

<sup>39</sup> Ne stale binni de guidxi que bini cre laabe pur ni gudxi gunaa que laaca', ra na gunaa que gudxi be laa irá ni huayuni.

<sup>40</sup> Ne ora yendá ca ra nuu be unaba ca laabe guiaana né be laaca'. Para biaana be raqué chupa gubidxa.

<sup>41</sup> Ne jma rusi stale binni bini cre laabe pur ni uní' be.

<sup>42</sup> Ne óraque rabi cabe gunaa que:

—Ma cadi pur ni gu'dxu siou' laadu runi cre du sínunque ma de rúa pe be bina diaga du ni, ne nanna dxichi du laabe nga ni zeda ulá binni guidxilayú.

*Ra bisianda Jesús xiiñi ti xpinni rey*

<sup>43</sup> Gudi'di si chupa gubidxa que, biree be uyé be Galilea,

<sup>44</sup> purti laca laabe na be, que rusicaca cabe ti profeta ndaani xquidxi.

<sup>45</sup> Ne ora yendá be Galilea bichagalú ca binni Galilea laabe, purti biiya ca irá ni bi'ni be Jerusalén ra yegapa ca saa que.

<sup>46</sup> Bigueta uyé be Caná de Galilea ra bi'ni be nisa que vinu. Ne ndaani guidxi Capernaum nexhe xiiñi ti xpinni rey huará.

<sup>47</sup> Ora gunna hombre que ma bigueta be de Judea ma nuu be Galilea la? uyé ra nuu be ne gudxi laabe chiné be laa usianda be xiiñi ma cayati.

<sup>48</sup> Para rabi be laa:

—Pa qué gu'ya tu seña ne milagru la? qué zuni cre tu.

<sup>49</sup> Oraque na xpinni rey que rabi laabe:

—Chuu guiuba, Señor, ante gati xiiñe'.

<sup>50</sup> Para rabi be laa:

—Guyé, zianda xiiñi lu'.

Ne bini cre ni gudxi be laa que, ne biree ze'.

<sup>51</sup> Neza ru ze hombre que, yechagalú ca xpinni laa ne na ca':

—Ma bianda xiiñi lu'.

<sup>52</sup> Para unaba diidxa be laaca pora ti bizulú cayanda xiiñi be que. Ne óraque na ca':

—Neegue bia' la una ma qué ñuu be xindxá'.

<sup>53</sup> Oraque bietenala'dxi be bia' óraque pe nga gudxi Jesús laabe zianda xiiñi be.

Ne bini cre be Jesús, laabe ne irá xixé binni lidxi be.

<sup>54</sup> Ma ne ndi rairopa milagru guni Jesús Galilea dede dxi bigueta de Judea.

## 5

*Ra bisianda Jesús ti binni Betesda*

<sup>1</sup> Biluxé si ca nga la? uyé Jesús Jerusalén ra cayaca saa sti ca judíu.

<sup>2</sup> Nuu ti tanque gaxha de ra puerta ra riuu ca dendxu ndaani guidxi que. Diidxa hebreu la? lá ni Betesda. Ne napa ni gaayu corredor.

<sup>3</sup> Nexhe stale binni huará ndaani ca corredor que. Nuu ni nacheepa lú, ni nachiita ñee ne xuta'. Cabeza ca iniibi nisa ni da' raqué.

<sup>4</sup> Purti gatigá riete ti ángel ndaani tanque que ne runiibi nisa ni da' ndaani ni, ne tu chu' ndaani ni casi iluxe iniibi ni la? zianda de intiica cayaca.

<sup>5</sup> Ne nuu tobi hombre raqué ma raca treinta y ocho añú de huará.

<sup>6</sup> Ora bi'ya Jesús laabe ne nanna ma xadxi nexhe be raqué la? na rabi laabe:

—Ñee racala'dxu guianda lu la?

<sup>7</sup> Para na be:

—Señor, qué gapa dia' tu cu' naa ndaani tanque ca ora caniibi nisa. Laga ziaa la? mápeca biete stobi.

<sup>8</sup> Oraque na Jesús rabi laabe:

—Biasa, gundisa jluuna lu ne uzá.

<sup>9</sup> Ne oraqueca bianda hombre que ne ucuaa jluuna zie

né. Ne uca ni dxi enda riziila'dxi'.

<sup>10</sup> Ora bi'ya ca judíu dxa hombre bianda que la? na ca':

—Cadi jneza cayuni lu nua lu jluuna lu dxi enda riziila'dxi'.

<sup>11</sup> Para rabi be laaca':

—Ti hombre bisianda naa, ne laa gudxi naa indisa jluuna ne saya'.

<sup>12</sup> Oraque na ca':

—Tu gudxi lii indisa lu jluuna lu ne sa lu'.

<sup>13</sup> Peru qué ganna be tu bi'ni ni, partí ma qué guinna Jesús raqué. Ma biaazi lade binni.

<sup>14</sup> Bigueta biiya Jesús laabe ndaani yu'du ro' para na rabi laabe:

—Biaa, ma bianda lu'. Yanna ma cadi guchee rou', para cadi gueeda sti enda huará luguiá lu jma naná que ni gupu ca.

<sup>15</sup> Oraque biree hombre que, yetidxi ca judíu Jesús bisianda laa.

<sup>16</sup> Ne pur ngue uzabi nanda ca judíu Jesús ne gucala'dxi ca ñuuti ca laabe, partí bi'ni be ni dxi enda riziila'dxi'.

<sup>17</sup> Peru na be rabi be laaca':

—Dede yanna cayuni Bixhoze dxiiña' ne naa laca cayune'.

<sup>18</sup> Oraque jma rusi gucala'dxi ca judíu ñuuti ca laabe, cadi partí si qué rapa be dxi enda riziila'dxi sínunque laca partí na be Dios nga Bixhoze be ne zacá runi be laabe Dios.

*Irá ni zeeda de Dios*

<sup>19</sup> Oraque na Jesús rabi laa-cabe:

—Gabe ca' laatu, qué zanda di guni Xiiñi Dios gastí de laa si, pa qué gu'ya guni Bixhoze ni, partí ni runi Dios Padre la? ngue ca runi Xiiñi'.

<sup>20</sup> Nadxii be Xiiñi be ne rului' be laa irá ni runi be, ne zului' ru be laa ni jma nandxo' que cani bi'ya tu ca para idxagaya tu.

<sup>21</sup> Cásica rindisa be gue'tu para usibani be la? zacaca rudii Xiiñi be enda nabani cani racala'dxi'.

<sup>22</sup> Qué rudxiiba be donda ique iruti', sínunque bisaana be ni lu ná Xiiñi be ti ma laa gudxiiba donda ique binni,

<sup>23</sup> ti usisaca irá binni Xiiñi be casi rusisaca ca laabe. Ne tu qué usisaca Xiiñi be ni biseenda be la? laca qué rusisaca laabe.

<sup>24</sup> Ne laca na Jesús:

—Chi tidxe ca' laatu, tu ucaa diaga stiidxa' ne guni cre ni biseenda naa la? ma napa enda nabani ni qué zalux. Ne ma qué zagui'ba donda ique, sínunque ma biree de lu ná enda guti, ma biuu lu ná enda nabani.

<sup>25</sup> Ne gabe ca' laatu, zadxiña dxi, ne yanna nga laani, zuna diaga gue'tu stidxi Xiiñi Dios, ne tu ucaa diaga ni la? zabani.

<sup>26</sup> Partí cásica napa Dios poder udii enda nabani la? zacaca bidii poder Xiiñi para udii enda nabani.

<sup>27</sup> Ne laca gudixhe be ladxi ná Xiiñi be udxiiba donda, partí laa nga Hombre Biseenda be guidxilayú.

<sup>28</sup> Cadi idxagayaa tu nga, purti zadxiña dxi guna diaga irá cani nuu ndaani ba' stidxi Xiiñi be,

<sup>29</sup> ne zaree ca'. Ni bi'ni jneza la? ziasa ibani, peru ni qué ñuni jneza la? ziasa quiba donda ique.

*Irá ni rusihuinni tu naca Jesús*

<sup>30</sup> Qué zanda gune gasti de naa sia', sínunque modo rabi Bixhoze naa udxiiiba donda, zacá rune'. Ne jneza rudxiiba donda purti qué rune ni racaladxe sínunque rune ni na Bixhoze ni biseenda naa.

<sup>31</sup> Qué nisaca ni ninié de laca naa pa naa sia' canié ni.

<sup>32</sup> Nuu stobi ni rusihuinni tu naa, ne nanna dxandí ni riní' be.

<sup>33</sup> Laatu biseenda tu tu yení' né Juan, ne laabe gudxi be laatu tu naa.

<sup>34</sup> Necá qué ñuu binni guidxilayú ñaca testigu stinne', nihuinni tu naca', peru cayabe ndi laatu ti ganda ilá tu.

<sup>35</sup> Beda usiidi Juan binni ximodo naa casi ñaca beda uzaani lade tu ti ganna tu tu naa. Ne bisiguenda tu bieche né tu ni bisiidi be, peru chupa chonna si gubidxa.

<sup>36</sup> Peru napa rua' sti testigu ni jma rusi nandxo' que laabe ne nga nga ca milagru ni cayune ri'. Bisaana Bixhoze cani ladxi naya gune cani, ne rusihuinni cani Bixhoze biseenda naa.

<sup>37</sup> Bixhoze biseenda naa ne laca laa rusihuinni tu naca'. Qué huayuu dxi guna diaga tu stidxi be nin gu'ya tu lú be,

<sup>38</sup> ne qué gapa tu stiidxa be ndaani ladxidó' to, purti qué runi cre tu ni biseenda be.

<sup>39</sup> Ruunda chaahui tu Xqui'chi Dios, purti na tu lú ni zadxela tu enda nabani ni qué zaluxe, ne laape ni ruzeete ni tu naca'.

<sup>40</sup> Peru qué na tu gueeda tu ra nuua para gapa tu enda nabani.

<sup>41</sup> Qué rina'ya uchá binni guidxilayú enda naró' stinne',

<sup>42</sup> peru nanna dxi'che cadí dxandí nadxii tu Dios.

<sup>43</sup> Benda purti biseenda Bixhoze naa, peru cadí culabi tu naa. Pa ñeeda stobi ni iruti nuseenda laa la? ngue huaxa nulabi tu laa.

<sup>44</sup> Qué zanda guni cre tu, purti laca laatu rusicaca saa tu, ne qué lica ruyubi tu usisaca Dios laatu.

<sup>45</sup> Cadi zácaxa tu naa nga cuua xqueja tu lu Bixhoze', sínunque Moisés nga cu' xqueja tu, necá cá lú tu laa iní' né Dios pur laatu.

<sup>46</sup> Pa ñuni cre tu Moisés la? laca ñuni cre tu naa, purti de naa bicaa be lu Xqui'chi be.

<sup>47</sup> Peru pa nin ni bicaa be qué runi cre tu la? laca qué zuni cre tu stiidxa'.

## 6

*Ra biyaana Jesús gaayu mil*

(Mt. 14.13-21; Mr. 6.30-44; Lc. 9.10-17)

<sup>1</sup> Gudi'di si nga la? uyé Jesús cherica ti nisa ro' lá Galilea. Laca nuu tu rabi ni Tiberia.

<sup>2</sup> Yenanda stale binni laabe, purti ma biiya ca

ca milagru ni bi'ni be ra bisianda be binni huará.

<sup>3</sup> Oraque udxiba be lu ti dani, ne gurí né be ca discípulu stibe raqué.

<sup>4</sup> Ma zeda yuba saa pascua.

<sup>5</sup> Ora undisa lú Jesús biiya nanda stale binni laa, na rabi Felipe:

—Paraa chi sí nu ni go irá binni ri'.

<sup>6</sup> Uní' be zaqué para gu'ya si be xi na Felipe, purti laabe maca nanna be xi chi guni be.

<sup>7</sup> Para na Felipe rabi laabe:

—Nin chupa gayuua denariu pan qué nugaanda nicaa cabe tindaa tindaa cada tobi cabe.

<sup>8</sup> Oraque na Andrés, bi'chi Simón Pedru, tobi de ca discípulu stibe que, rabi laabe:

<sup>9</sup> —Rarí nuu ti hombre huiini napa gaayu pan de cebada ne chupa benda huiini', peru xi pe ndi para irá binni ri'.

<sup>10</sup> Para rabi be laaca':

—Lauquí laacabe.

Ne gurí cabe lu ca guixi huiini ni nuu raqué, bia'si gaayu mil hombre.

<sup>11</sup> Oraque gucuua be ca pan que ne biluxé bidii si be diuxquixe Dios, bidii be cani ca discípulu stibe qui'zi ca lu ca binni que. Zaqueca bi'ni né be ca benda huiini que, ne ucuaa ca binni que bia' gucala'dxi ca'.

<sup>12</sup> Biluxé gudó si ca binni que gudxi be ca discípulu stibe utopa ca ni biaana que ti cadi initi gastí'.

<sup>13</sup> Ne dede bidxá tipa doce dxumi de pan ndahui ni biaana ra biluxé gudó ca binni que.

<sup>14</sup> Ne ora bi'ya ca binni que milagru ni bi'ni be que la? na ca':

—Ndi nga dxandí dxa profeta ni gueeda guidxilayú que.

<sup>15</sup> Peru ora gunna Jesús ma caní' stiidxa cabe gueda naaze cabe laa para guni cabe laa rey stícabe la? biree chu de laacabe gudxi'ba stubi lu dani que.

*Ra uzá Jesús lu nisa*

(Mt. 14.22-27; Mr. 6.45-52)

<sup>16</sup> Ma ziyaazi gubidxa biete ca discípulu stibe uriá nisa que,

<sup>17</sup> ne biuu ca ndaani ti canuá huiini ne biaba ca nisa que para che ca Caper-naum. Ma cacahui, ne ca'ru quedandá Jesús ra nuu cabe.

<sup>18</sup> Bizulú biete ti bi yooxho ne biasa ola sti nisa que.

<sup>19</sup> Ma uzá cabe bia' gaayu o xhoopa kilómetru lu nisa que ora bi'ya cabe zeeda za Jesús lu nisa, zeda dxiña ra nuu canuá stícabe que ne bidxibi cabe.

<sup>20</sup> Peru na Jesús rabi laa-cabe:

—Naa ndi', cadi idxibi tu.

<sup>21</sup> Oraque ru uluu cabe laabe ndaani canuá que, ne oraqueca yendá cabe ra ze cabe.

*Ra ziayubi cabe Jesús*

<sup>22</sup> Sti dxi que nuu ru caadxi de ca binni que cherica nisa que. Ne nanna ca ti canuá

si bizuhuaa raqué, ne laca nanna ca qué niné Jesús ca discípulu sti' sínunque stubi ca ze ca'.

<sup>23</sup> Oraque biiya cabe zuhuaa caadxi canuá de Tiberia gaxha de ra gudó cabe pan biluxe si bidii Señor diuxquixe Dios que.

<sup>24</sup> Ne ora bi'ya cabe qué guinni Jesús raqué nin ca discípulu sti la? biuu cabe ndaani ca canuá que, ze cabe Capernaum ziyubi cabe Jesús.

### *Pan ni rusibani*

<sup>25</sup> Ne ora yendá cabe ra nuu be cherica nisa que la? rabi cabe laabe:

—Maistru pora beedu rari'.

<sup>26</sup> Para na be:

—Nanna dxi'che cadi canayubi tu naa purti biiya tu milagru ni bine sínunque purti gudó to pan dede ra bidxá tu.

<sup>27</sup> Cadi ucaa ique tu guni tu dxiiña para gapa tu endaró ni iquiiñe si tu ndaani guidxilayú ri', purti qué zandaa ni, sínunque laucaa ique guni tu dxiiña sti Dios para gapa tu enda nabani ni qué zaluxe. Naa nga Hombre Biseenda Dios ne naa udiee ni laatu, purti ma ulí Dios naa gune ni.

<sup>28</sup> Oraque na ca':

—Ximodo guni du xhiiña Dios ya'.

<sup>29</sup> Para rabi be laaca':

—Ndi nga dxiiña na Dios guni tu: guni cre tu ni biseenda be.

<sup>30</sup> Bigueta na ca':

—Xiñee qué uluí lu laadu ti seña xaibá' para guni cre du lii. Xi milagru ru'nu'.

<sup>31</sup> Dxi nuu ca bixhoze gola nu ndaani gui'xhi gudó ca pan ni rabi cabe maná que casi cá lu Xqui'chi Dios ra na: "De ibá' bidii be pan gudó ca'."

<sup>32</sup> Oraque rabi be laaca':

—Gabe ca' laatu, cadi pan de ibá' ngue bidii Moisés laatu, sínunque Bixhoze nga cudii laatu ni dxandí pan de ibá'.

<sup>33</sup> Purti pan ni cudii Dios binni la? nga ni biete de ibá', ne rudii ni enda nabani binni guidxilayú.

<sup>34</sup> Para na ca':

—Cadi guiaana dxiu de udii pan ca laadu, Señor.

<sup>35</sup> Oraque rabi be laaca':

—Naa nga pan ni rudii enda nabani. Tu gueeda ra nuaa', qué ziuu dxi indaana, ne tu guni cre naa, qué ziuu dxi gati nisa.

<sup>36</sup> Peru ma gudxe laatu neca ma biiya tu naa, qué runi cre tu.

<sup>37</sup> Irá cani udii Bixhoze naa zeeda ra nuaa', ne tutiisi gueeda ra nuaa' qué ziuu dxi iladxe laa.

<sup>38</sup> Purti biete de ibá' cadi para gune ni racaladxe', sínunque para gune ni na ni biseenda naa.

<sup>39</sup> Ne ni racala'dxi be gune la? cadi unite nin tobi de cani rudii be naa, sínunque indisa laaca dxi iluxe guidxilayú.

<sup>40</sup> Purti racala'dxi be gapa irá ni gu'ya naa ne guni cre

naa, enda nabani ni qué zaluxe, ne zandisa laaca dxi iluxe guidxilayú.

<sup>41</sup> Oraque bizulú ca judíu caní' ca laabe dxidxigá partí na be laabe nga pan ni biete de ibá'.

<sup>42</sup> Ne na ca':

—Cadi xa ndi nga Jesús xiiñi José que. Lácaxa qué runibiá' nu bixhoze be ne jñaa be. Ximodo na be de ibá' biete be ya'.

<sup>43</sup> Para rabi be laaca':

—Cadi ma cuchaaga ruua tu racá.

<sup>44</sup> Biseenda Bixhoze naa, ne iruti zanda gueeda ra nuaa', pa qué cuidxi be laa. Ne zandisa laa dxi iluxe guidxilayú.

<sup>45</sup> Chiqué bicaa ca profeta: "Zadxiña dxi guiene irá binni ni rusiidi Dios."

Ngue runi yanna cada tobi ni guna diaga ne iziidi ni na Bixhoze la? reeda ra nuaa'.

<sup>46</sup> Cadi partí nuu ru tu ma biiya laabe, sínunque naa sia' ma biiya laabe, partí de ra nuu be benda'.

<sup>47</sup> Ne gabe ca' laatu, tu runi cre naa la? ma napa enda nabani ni qué zaluxe,

<sup>48</sup> partí naa nga pan ni rudii enda nabani.

<sup>49</sup> Gudó ca bixhoze gola tu maná ndaani gui'xhi', peru guti ca'.

<sup>50</sup> Peru naa cuzeete pan ni riete de ibá' ti irá tu go ni qué zati.

<sup>51</sup> Naa nga pan ni biete de ibá'. Tu go ni la? qué ziuu dxi gati'. Ne pan ri nga cuerpu stinne ni chi

udiee para ganda ibani binni guidxilayú.

<sup>52</sup> Ucuuaa yu né ca judíu ni uní' be que, na ca':

—Ximodo udii hombre ri cuerpu sti idó' no.

<sup>53</sup> Para rabi be laaca':

—Gabe ca' laatu, pa qué go to cuerpu sti Hombre Biseenda Dios ne qué gue tu rini sti la? qué zapa di tu enda nabani.

<sup>54</sup> Tu go cuerpu stinne' ne gue rini stinne la? ma napa enda nabani ni qué zaluxe, ne zandisa laa dxi iluxe guidxilayú.

<sup>55</sup> Purtí cuerpu stinne nga ni dxandí naquiiñe go binni, ne rini stinne nga ni dxandí naquiiñe gue cabe.

<sup>56</sup> Tu go cuerpu stinne ne gue rini stinne la? nuu ne naa tobi si, ne laca zaqueca nuaa nia laa tobi si.

<sup>57</sup> Nabani Bixhoze ni biseenda naa. Naa laca nabane pur laabe, ne zaqueca tu go cuerpu stinne laca zabani pur naa.

<sup>58</sup> Nga nga pan ni biete de ibá'. Adxé nga pan ni gudó ca bixhoze gola tu ne guti ca'. Peru tu go pan ni cuzeete ri la? zapa enda nabani ni qué zaluxe.

<sup>59</sup> Irá nga uní' Jesús ra cusiidi ndaani yu'du Capernaum.

### *Diidxa ni rusibani*

<sup>60</sup> Ora bina diaga cani canazá né laabe ni uní' be que la? na caadxi de laaca':

—Nabé naná ca diidxa cusiidi be ca. Tuu ndi zanda iccaa cani.

<sup>61</sup> Peru nanna be xi caní' ca discípulu stibe ra cuchaaga

ruaa ca zaqué, para rabi be laaca':

—Ñee, bininá ca diidxa ca laatu la?

<sup>62</sup> Xi niná tu pa ñuuya tu zigui'ba Hombre Biseenda Dios ra uyuu chiqué ya'.

<sup>63</sup> Pa qué gapa cuerpu stitu espíritu la? qué riquiñé', purti espíritu nga rudii enda nabani laatu. Ca diidxa ni huayué nia laatu ca la? espíritu cani, ne zudii cani laatu enda nabani ni qué zaluxe.

<sup>64</sup> Peru nuu caadxi de laatu qué runi cre.

Uní' be zaqué, purti dede dxi bizulú uzá né ca laabe maca nanna be uná nga ni qué zuni cre laabe, ne tu chi utoo laabe.

<sup>65</sup> Ne laca na be rabi be laaca':

—Nga runi ma gudxe laatu, iruti zanda gueeda ra nuua pa qué uchiña Bixhoze laa.

<sup>66</sup> Ne dede dxi que bigueta stale de cani canazá né laabe que, ma qué ninanda ru ca laabe.

<sup>67</sup> Para rabi be doce discípulu stibe que:

—Laga laatu ya', laca zabigueta tu la?

<sup>68</sup> Oraque na Simón Pedru rabi laabe:

—Tu ru ra nuu ñuu du ya', Señor. Lii siou' nga rui' neu laadu ni rudii enda nabani ni qué zaluxe.

<sup>69</sup> Ma runi cre du ne ma nanna dxichi du lii nga Cristu Xiiñi Dios ni nabani.

<sup>70</sup> Para rabi be laaca':

—Ñee cadí naa ulié idubi doce tu, ne tobi de laatu sti binidxaba la?

<sup>71</sup> Rarí cuzeete be Judas Iscariote, xiiñi Simón, purti laa nga chi utoo laabe, ne laa zeeda lade doce que.

## 7

*Ra qué ñuni cre ca bi'chi Jesús laa*

<sup>1</sup> Gudi'di si ca nga la? uzá Jesús Galilea, ne qué niná ñe Judea, purti canananda ca judíu guuti laa.

<sup>2</sup> Ne ma zeda yuba saa sti ca judíu, saa ra rucuí cabe ranchu huiini para guiaana cabe ndaaní'.

<sup>3</sup> Para na ca bi'chi be rabi laabe:

—Xiñee qué ireeu de rarí', cheu' Judea ti gu'ya cani rizá neu irá ni ru'nu'.

<sup>4</sup> Purti qué runi cabe xiixa naga'chi pa racala'dxi cabe ganna binni tu laacabe. Pa dxandí runi lu cani la? bilu' irá binni xi ru'nu'.

<sup>5</sup> Uní' ca zaqué purti nin laaca qué runi cre ca laabe.

<sup>6</sup> Para rabi be laaca':

—Ca'ru idxiña hora usihuinne tu naa. Peru laatu la? ora tiisi ñanda nusihuinni tu tu laatu.

<sup>7</sup> Purti qué raca nanala'dxi binni guidxilayú laatu, peru naa la? raca nanala'dxi cabe naa, purti rabe laacabe cadi jneza ni runi cabe.

<sup>8</sup> Laché saa ca laatu. Qué ziaa dia' saa ca purti ca'ru ganda hora usihuinne tu naa.

<sup>9</sup> Ngue si gudxi be laaca', ne biaana ru be raqué.

*Ra yegapa Jesús saa*

<sup>10</sup> Peru biree si ca bi'chi be ze la? laca uyé be saa

que, cadi para gu'ya binni laabe, sínunque biuu be raqué naga'chi'.

<sup>11</sup> Biyubi ca judíu laabe ndaani saa que na ca':

—Paraa nuu dxa hombre que.

<sup>12</sup> Stale de ca binni nuu ra saa que nisi stiidxa be cayui' ca', peru dxidxigá cayui' ca ni. Nuu tu na: "Nacha'hui be." Ne nuu tu na: "Co', canaguite si be binni."

<sup>13</sup> Uni' cabe ni dxidxigá purti cadxibi cabe ca judíu.

<sup>14</sup> Ma udi'di chupa chonna gubidxa de cayaca saa que biuu Jesús ndaani yu'du ro' ne bizulú bisiidi'.

<sup>15</sup> Ne nabé bidxagayaa ca judíu, ne na ca':

—Ximodo biziidi be irá ni nanna be ri sin ñuu tu nusiidi laabe.

<sup>16</sup> Para rabi be laaca':

—Cadi naa dia' gudixhe ni rusiide', sínunque rusiide ni gudixhe ni biseenda naa.

<sup>17</sup> Cani racala'dxi guni ni na Dios la? zanna pa dxandí stiidxa Dios cusiide o pa stinne'.

<sup>18</sup> Ni riní' de laa si la? ruyubi usisaca binni laa, peru ni ruyubi usisaca ni biseenda laa la? ngue huaxa qué rusiguii ne qué runi ni cadi jneza.

<sup>19</sup> Nee cadi bidii Moisés laatu ley para ñuni tu ni na la? peru qué runi tu ni na ni. Yanna xiñee racala'dxi tu guuti tu naa.

<sup>20</sup> Oraque na ca binni que rabi laabe:

—Caguite binidxaba ique lu'. Tuu nga nou' racala'dxi guuti lii.

<sup>21</sup> Para rabi be laaca':

—Tisi bine ti milagru la? irá xixé tu cadxagayaa tu.

<sup>22</sup> Gudxi Moisés laatu cu' tu seña sti Dios ca xiiñi tu, casi bi'ni ca bixhoze gola tu. Ne runi tu ni, neca guiba ni dxi enda riziila'dxi'.

<sup>23</sup> Yanna pa para cadi uchee né tu ley sti Moisés runi tu ni neca dxi enda riziila'dxi la? xiñee ga bidxiichi né tu naa tisi bisianda ti hombre dxi enda riziila'dxi ya'.

<sup>24</sup> Cadi casi ze tu udxiba tu donda ique binni, sínunque laguuya chaahui ti ganna tu uná nga ni jneza.

*Ra uni' Jesús tu biseenda laa*

<sup>25</sup> Oraque biree caadxi binni Jerusalén na:

—Ñee cadi laabe nga ni cuyubi cabe guuti cabe que la?

<sup>26</sup> Laguuya', rarí nuu be caní' be nezalú irá binni ne cadi cayabi cabe laabe gasti'. Ñee na tu ma runi cre ca xaíque dxandí Cristu laabe la?

<sup>27</sup> Nagana huiini', purti nanna nu padé laabe, ne dxi queeda Cristu la? iruti zanna padé queeda.

<sup>28</sup> Oraque jma rusi reciu uni' Jesús ra cusiidi que, na:

—Runibiá' tu naa ne nanna tu padé naa. Peru cadi stube sia' benda', sínunque nuu tu biseenda naa, ne laabe nga dxandí Dios, ne qué runibiá' tu laabe.

<sup>29</sup> Peru naa runebia'ya laabe purti de laabe zenda', ne laabe biseenda be naa.

<sup>30</sup> Oraque gucala'dxi cabe ninaaze cabe laabe, peru iruti niguu ná laabe, purti ca'ru idxiña xhiora be.

<sup>31</sup> Ne stale de ca binni que bini cre ca laabe ne na ca':

—Ora gueeda Cristu, lácaxa zanda guni jma milagru que ni cayuni be ri'.

*Ucaladxi cabe ninaaze cabe Jesús*

<sup>32</sup> Bina diaga ca fariseu caní' ca binni que de Jesús zaqué para uyuu né ca ca xaíque sti ca sacerdote tobi si. Ne biseenda ca caadxi gendarme ninaaze laabe.

<sup>33</sup> Oraque na be:

—Ma nagaba si dxi nuua nia laatu, purti ma chaa ra nuu ni biseenda naa.

<sup>34</sup> Zuyubi tu naa Peru qué zadxela tu naa, ne qué zanda di che tu ra chaa ca.

<sup>35</sup> Oraque na ca judíu:

—Paraa nda nga na be che be ma qué zadxela nu laabe ya nja'. Ñee che be ra nuu ca judíu ni reeche lade cani cadi judíu para usiidi be laaca la?

<sup>36</sup> Xiñee na be zuyubi nu laabe ne qué zadxela nu laabe ne qué zanda chuu nu ra che be ya'.

*Nisa ni rusibani*

<sup>37</sup> Dxi ma para iluxe saa, o gabi nu laní que, bizuhuua Jesús ne bicaa ridxi na:

—Pa nuu tuuxa cayati nisa la? gueda gue ra nuua'.

<sup>38</sup> Ni guni cre naa la? zaca casi cá lu Xqui'chi Dios, de ndaani ladxidó' zandani nisa ni rudii enda nabani.

<sup>39</sup> Rarí cuzeete Jesús Espíritu Santu ni icca irá ni

guni cre laa, Peru dxi bizeete be ni la? ca'ru gueeda Espíritu Santu, purti ca'ru ibigueta be ibá'.

*Ra udinde diidxa cabe pur Jesús*

<sup>40</sup> Ne ora bina diaga caadxi binni de cani nuu raqué xi na be la? na ca':

—Ndi nga dxandí pe profeta que.

<sup>41</sup> Ne xcaadxi na:

—Laabe nga Cristu.

Peru nuu xcaadxi na:

—Lácaxa de Galilea gueeda Cristu.

<sup>42</sup> Ñee cadi cá lu Xqui'chi Dios za be de David, ne zeeda be de Belén xquidxi David la?

<sup>43</sup> Ne zacá gudinde diidxa cabe pur laabe, adxé ni na tobi ne adxé ni na stobi.

<sup>44</sup> Ne ucaladxi caadxi de laacabe ninaaze ca laabe, Peru iruti niguu ná laabe.

*Qué ñuni cre ca xaíque Jesús*

<sup>45</sup> Ne ora bigueta ca gendarme que, na ca xaíque sti ca sacerdote ne ca fariseu rabi laaca'.

—Xiñee qué ñedané tu laabe.

<sup>46</sup> Para na ca':

—Qué huayuu dxi chu' tuuxa iní' casi riní' hombre que.

<sup>47</sup> Oraque na ca fariseu:

—Ñee dede laatu ma udxite be la?

<sup>48</sup> Lácaxa nuu neca tobi de ca xaíque o ca fariseu ni ma bini cre laabe.

<sup>49</sup> Ca binni ni rí raqué, ni qué ganna ley la? dí nuu ca'.

<sup>50</sup> Lade ca xaíque que zeeda Nicodemo ni uyé ra

nuu Jesús huaxhinni que. Ne óraque na:

<sup>51</sup> —Ñee na ley stinu jneza udxi'ba nu donda ique tuuxa sin ucá' diaga nu laa, ganna nu xi bi'ní la?

<sup>52</sup> Para rabi cabe Nicodemo:

—Ñee laca binni Galilea lii la? Biyubi gu'yu qué ziuu dxi iree ti profeta Galilea.

<sup>53</sup> Biluxe si uní' cabe ngue la? cada tobi biree zibí'.

## 8

### *Gunaa bigaa né jnadxxii*

<sup>1</sup> Ne biree Jesús de ndaani guidxi que, uyé lu dani Olivo.

<sup>2</sup> Sti dxi que siadó' ro' bigueta be ndaani yu'du ro' ne bidxiña irá xixé binni guidxi que laabe para gurí be cusiidi be laaca'.

<sup>3</sup> Raqué nuu cabe bedané ca maistru de ley ne ca fariseu ti gunaa bigaa né jnadxxii, ne bizuhuaa ca gunaa que galahui',

<sup>4</sup> ne na ca rabi ca laabe:

—Maistru, biaa gu'yu gunaa ri' yendá cabe laa ne jnadxxii.

<sup>5</sup> Lu ley bidii Moisés laadu la? na uchá du guie irá casi laabe ca. Yanna, lii ya', xi nou'.

<sup>6</sup> Uní' cabe zaqué para gu'ya si cabe xi na be ti ganda cu' cabe xqueja be. Peru laabe laga guta udaa be ne cucaa né be bicuini ná be layú.

<sup>7</sup> Peru tantu si canaba diidxa ca laabe la? biasa be ne rabi be laaca':

—Pa nuu tuuxa qué huayuu dxi uchee la? laa uzulú cu' ná guie uchá laabe.

<sup>8</sup> Ne bigueta guta udaa be cucaa be layú.

<sup>9</sup> Casi bina diaga cabe ni uní' be que bizulú biree ca binni gola ne zaqué tobi tobi dede birá cabe, purti nanna cabe cadi nayá ladxidó' cabe. Ne ma laasi be ne gunaa que biaana cabe.

<sup>10</sup> Oraque biasa be ne biiya be ma stubi si gunaa que nuu, para rabi be laa:

—Uná cani caguu xqueja lu que. Iruti nudxiiba donda ique lu la?

<sup>11</sup> Para na gunaa que:

—Iruti, Señor.

Oraque na be:

—Nin naa, qué zudxiiba donda ique lu'. Uyé ne ma cadi uchee rou'.

### *Jesús zeda gaca casi biaani'*

<sup>12</sup> Bigueta uní' né be ca binni nuu ndaani yu'du que, na be:

—Naa zeda gaca casi biaani ni ruzaani binni guidxilayú. Tu gueda nanda naa la? zapa biaani ni rudii enda nabani, ne qué ziuu dxi sa lu guelacahui.

<sup>13</sup> Oraque na ca fariseu rabi laabe:

—Qué risaca di ni riníu' ca, purti laca lii caníu' tu naca lu'.

<sup>14</sup> Para rabi be laaca':

—Neca laca naa rinié tu naca' peru dxandí ni rinié', purti nanna padé benda ne paraa chaa'. Peru laatu la?

qué ganna tu padé benda nin paraa chaa'.

<sup>15</sup> Rudxiiba tu donda ique binni casi runi binni guidxilayú. Peru naa qué rudxiiba donda ique iruti'.

<sup>16</sup> Ne neca pe nudxiiba donda, ñune ni jneza partí cadi naa sia' ñune ni, sínunque naa ne Bixhoze ni biseenda naa.

<sup>17</sup> Cá lu ley stitu, ni iní' chupa binni la? ngue nga ni dxandí'.

<sup>18</sup> Rusihuinne tu naca', ne laca rusihuinni Bixhoze ni biseenda naa tu naca'.

<sup>19</sup> Oraque na ca rabi ca laabe:

—Para nuu Bixho'zo ya'.

Para rabi be laaca':

—Qué runibiá' tu naa ne qué runibiá' tu Bixhoze'. Pa ñunibiá' tu naa la? laca ñunibiá' tu Bixhoze'.

<sup>20</sup> Irá nga uní' Jesús ra cusiidi ndaaní yu'du que, gaxha de ra nuu caja ra riaba ofrenda. Iruti ninaaze laabe partí ca'ru idxiña xhiora be.

*Ra cuzeete Jesús zuyibi cabe laa*

<sup>21</sup> Bigueta rabi be laaca':

—Ma chaa'. Zuyubi tu naa peru qué zanda che tu ra chaa', sínunque zati né tu stonda tu.

<sup>22</sup> Oraque na ca judíu:

—Ñee chi guuti be laca laabe la? partí na be qué zanda chuu nu ra che be.

<sup>23</sup> Para rabi be laaca':

—Laatu za tu de guidxilayú; naa de ibá' naa. Laatu binni guidxilayú laatu; naa cadi binni guidxilayú naa.

<sup>24</sup> Nga runi gudxe laatu zati né tu stonda tu. Ne zacá zaca ni. Pa qué guni cre tu naca ni gudxe laatu que la? zati né tu stonda tu.

<sup>25</sup> Oraque na ca rabi ca laabe:

—Tu ga lii ya'.

Para rabi be laaca':

—Dede dxi bizuluá' maca gudxe laatu tu naca'.

<sup>26</sup> Napa stale ni ñabe laatu ne nudxiiba donda ique tu, peru rue nia binni ni gudxi si ni biseenda naa inié', ne ni na be nga jneza.

<sup>27</sup> Peru qué ñene ca pa cuzeete be Dios.

<sup>28</sup> Para rabi be laaca':

—Dede ora ma undisa tu Hombre Biseenda Dios luguiá', óraque ru nga ganna tu tu laa. Ne qué rune gastí de naa sia' sínunque rinié ni bisiidi Bixhoze naa.

<sup>29</sup> Biseenda Bixhoze naa, ne nuu né naa. Qué huasaana be naa stube partí qué riaana dxie de gune ni riula'dxi be.

<sup>30</sup> Ne laga caní' be irá nga la? uyuu stale tu bini cre laabe.

*Xiiñi Dios ne xiiñi binidxaba'*

<sup>31</sup> Oraque na be rabi be ca judíu ni ma bini cre laabe que:

—Pa qué iree chu tu de lu stiidxa la? zaca xpinne pia' laatu.

<sup>32</sup> Ne zanna tu ni dxandí', ne zaladi tu ra cá tu yaga partí ma nanna tu ni.

<sup>33</sup> Para na ca rabi ca laabe:

—Za du de Abraham, ne qué huayuu dxi icá du yaga lu ná iruti'. Ximodo ndi nou'

zaladi du de ra cá du yaga ya'.

<sup>34</sup> Oraque rabi be laaca':

—Laucaa diaga ni chi tidxe laatu ri'. Irá cani ruchee né Dios la? cá ca yaga lu ná enda ruchee.

<sup>35</sup> Xiiñi binni ziaana ralidxi bixhoze, peru ni runi si xhiña cabe la? zándaca chu' dxi cuee cabe laa.

<sup>36</sup> Nga runi pa indadi Xiiñi Dios laatu, zalaa pe tu.

<sup>37</sup> Nanna za tu de Abraham Peru cuyubi tu guuti tu naa purti cadi caca tu ni cayabe laatu.

<sup>38</sup> Rue nia laatu ni culuí Bixhoze naa, ne laatu runi tu ni cayabi bixhoze tu laatu.

<sup>39</sup> Oraque na ca judíu que rabi laabe:

—Abraham nga bixhoze du.

Para rabi be laaca':

—Pa ñaca tu xiiñi Abraham la? ñuni tu ni bi'ni Abraham.

<sup>40</sup> Gudxe sia' laatu ni gudxi Dios naa ne yanna ma racala'dxi tu guuti tu naa. Cadi zacá bi'ni Abraham.

<sup>41</sup> Laatu la? runi tu xhiña bixhoze tu.

Oraque na ca':

—Cadi xiiñi guidxi laadu sínunque nanna du tu bixhoze du, ne Dios nga Bixhoze du.

<sup>42</sup> Para rabi be laaca':

—Pa ñaca dxandí xiiñi Dios laatu la? ñanaxhii tu naa, purti zaya de Dios ne ma benda rari'. Cadi stube benda', sínunque laabe biseenda be naa.

<sup>43</sup> Xiñee qué riene tu ni rinié'. Qué riene tu purti qué rucaa diaga chaahui tu stiidxa'.

<sup>44</sup> Binidxaba nga bixhoze tu ne racala'dxi tu guni tu ni na be. Dede dxi bizulú guidxilayú huayuuti be binni, ne qué huayuu dxi iní' be ni dxandi', purti qué lica ganna be xii nga ni dxandí'. Ora rusiguii be la? de laabe riale ni, purti nabé rusiguii be ne laabe nga bixhoze gola enda rusiguii.

<sup>45</sup> Naa purti rinié ni dxandí la? qué runi cre tu naa.

<sup>46</sup> Tu de laatu zanda udxiba donda ique'. Pa rabe laatu ni dxandí la? xiñee qué runi cre tu naa.

<sup>47</sup> Ni ma xiiñi Dios laa la? zucaa diaga stiidxa Dios. Laatu qué rucaa diaga tu stiidxa be purti cadi xiiñi be laatu.

### *Jesús ne Abraham*

<sup>48</sup> Oraque na ca judíu rabi laabe:

—Cayabi ca du samaritanu lii ne nuu neu binidxaba ya'.

<sup>49</sup> Para rabi be laaca':

—Cadi nuua nia dia' binidxaba', sínunque cusisaca Bixhoze', peru laatu raani ná tu naa.

<sup>50</sup> Ne cadi cuyube dia' usisaca binni naa Peru nuu tu cuyubi ni, ne laa nanna xii nga jneza.

<sup>51</sup> Gabe ca' laatu, tu icaa stiidxa' qué ziuu dxi gati'.

<sup>52</sup> Oraque na ca judíu:

—Yanna huaxa ma nanna du dxandí nuu neu binidxaba', purti nou' tu icaa stiidxa lu qué ziuu dxi gati'. Xiñee ga guti Abraham ne ca profeta ya'.

<sup>53</sup> Ñee jma nandxó' lo que bixhoze du Abraham

la? Guti be ne laca guti ca profeta. Tuu nga ru'nu lii pue.

<sup>54</sup> Para rabi be laaca':

—Pa laca naa rusisaca naa la? qué risaca dia', peru cadi nga di nga laani sínunque Bixhoze nga rusisaca naa. Laabe nga ni na tu Dios stitu ca.

<sup>55</sup> Peru qué runibiá' tu laabe. Naa la? runebia'ya laabe. Pa ñaca qué ñunebia'ya laabe la? nusiguiee casi rusigui tu. Peru runebia'ya laabe ne ricaa stiidxa be.

<sup>56</sup> Bieche bixhoze tu Abraham zuuya naa dxi guenda'. Biiya be naa ne nayeche biaana ladxidó' be.

<sup>57</sup> Oraque na ca judíu:

—Nin ca'ru gapu cincuenta añu ne nou' biiyu Abraham la?

<sup>58</sup> Para rabi be laaca':

—Laucaa diaga chaahui ni chi tidxe laatu ri': Dede ante gale Abraham, naa maca nuua'.

<sup>59</sup> Oraque gundisa ca guie nuchá ca laabe, peru bicachi lú be ne udi'di be lade ca binni que biree be de ndaani yu'du que.

## 9

*Bisianda Jesús ti hombre nacheepa lú*

<sup>1</sup> Ra zidi'di Jesús biiya tobi hombre nacheepa lú de gule.

<sup>2</sup> Ne na ca discípulu sti' rabi laa:

—Maistru, tu bichee para gule be zacá pue, laabe la? o bixhoze be o jñaa be.

<sup>3</sup> Para rabi be laaca':

—Cadi partí bichee cabe, sínunque gule be zacá para ihuinni xhiiña Dios luguiá be.

<sup>4</sup> Naquiiñe gune xhiiña ni biseenda naa laga ca'ru ix-hinni. Purtí ma caxhinni, ne óraque ma iruti zanda guni dxiiña'.

<sup>5</sup> Laga nuua ndaani guidxilayú la? naca casi biaani para binni guidxilayú.

<sup>6</sup> Biluxé uni' si be nga la? bichá xhinni be layú ne bi'ni be beñe ne nisa xhinni que, ne uxubi be ni lú ni nacheepa lú que.

<sup>7</sup> Ne rabi be laa:

—Yetibi lú lu' ndaani tanque lá Siloé.

Ni riní' lá que la? "Ni Biseenda cabe". Para biree hombre que, yetibi lú, ne ora bigueta ma riná.

<sup>8</sup> Oraque na ca xpecinu be ne cani bi'ya laabe dxi nacheepa lú be que:

—Ñee cadi ndi nga ni ribí rinaba guna que la?

<sup>9</sup> Caadxi binni na:

—Laabe.

Ne xcaadxi na:

—Ruluí' laabe.

Oraque na be:

—Naa ndi'.

<sup>10</sup> Para rabi cabe laabe:

—Ximodo bixelete lú lu'.

<sup>11</sup> Oraque na be:

—Dxa hombre lá Jesús que bi'ni beñe ne uxubi ni lua' ne gudxi naa chi tibe lua ndaani tanque Siloé. Uyaa ne udibe lua' ne ma rinaya'.

<sup>12</sup> —Paraanuu be ya', na ca binni que.

—Qué gamma dia', rabi be laaca'.

*Gunaba diidxa ca fariseu  
xi modo bianda hombre que*

13 Para yené ca laabe ra  
nuu ca fariseu.

14 Dxi bi'ni Jesús beñe ne  
bixhele lú be que la? uca ni  
ti dxi enda riziila'dxi.

15 Bigueta unaba diidxa ca  
fariseu laabe ximodo bixele  
lú be. Para na be:

—Uxubi be beñe lua ne  
gudibe lua ne ma rinaya'.

16 Oraque na caadxi de ca  
fariseu que:

—Cadi dxandí Dios  
biseenda hombre ca purti  
qué rapa be dxi enda  
riziila'dxi'.

Ne xcaadxi na:

—Ximodo zanda guni tobi  
ni cuchee né Dios milagru ni  
rungi be ca ya'.

Ne zaqué ma qué ñuu cabe  
tobi si.

17 Bigueta unaba diidxa  
cabe ni bianda lú que:

—Lii ya', xi ra'bu de ni  
bixhele lú lu ca.

Para na hombre que:

—Rabe profeta laabe.

18 Peru qué ñuni cre ca  
judíu pa dxandí gule be  
nacheepa lú be ne yanna ma  
riná be. Para bisenda caa  
cabe bixhoze be ne jñaa be.

19 Ne rabi cabe laaca':

—Ñee ndi nga xiiñi tu ni  
na tu nacheepa lú gule la?  
Ximodo riná be yanna.

20 Para na ca':

—Nanna du ndi nga xiiñi  
du, ne nanna du nacheepa lú  
be gule be,

21 Peru ximodo bianda be  
ne tu bixhele lú be la? nga  
qué ganna du. Ma huaniisi  
be, ma zanda iní be. Lainaba  
diidxa laabe.

22 Uni' bixhoze be ne jñaa  
be zaqué ti cadxibi ca ca  
judíu, purti maca uni' stiidxa  
ca judíu ni iní' Jesús nga  
Cristu la? maca zibee ca laa  
de lade ca'.

23 Ngue runi na bixhoze be  
ne jñaa be: "Ma huaniisi be,  
lainaba diidxa laabe."

24 Bigueta guridxi cabe  
hombre ni bianda lú que ne  
rabi cabe laa:

—Pa ridxibi lu Dios la?  
gudxi laadu ni dxandí'. Purti  
laadu nanna du binni ruchee  
hombre ca.

25 Para na rabi laacabe:

—Pa binni ruchee laabe  
la? nga qué ganna dia'.  
Ni nanna sia' la? chiqué  
nacheepa lua', yanna ma ri-  
naya'.

26 Bigueta rabi cabe laa:

—Xi bi'ni be para bixhele  
be lú lu'.

27 Para na rabi laacabe:

—Ma gudxe ni laatu, peru  
qué niná tu nucaa diaga tu.  
Xiñee racala'dxi ru tu guna  
diaga tu ni. O laca racala'dxi  
tu aca tu discípulu stibe la?

28 Oraque gudinde né cabe  
laa ne rabi cabe laa:

—Lii nga discípulu stibe.  
Laadu la? discípulu sti  
Moisés laadu.

29 Nanna du uní né Dios  
Moisés, peru nga la? nin qué  
ganna du padé za.

30 Para na hombre que rabi  
laacabe:

—Nga nga enda ridxa-  
gayaa ca. Laatu nin qué  
ganna tu padé za be peru  
bixhele be lua'.

31 Nanna nu qué rucaa di-  
aga Dios binni ruchee peru  
cani ridxibi laabe ne runi ni

na be la? rucaa diaga be laaca'.

<sup>32</sup> Dede dxi bizulú guidxi-layú, qué huayuu tu uxhele lú tobi ni gale nacheepa lú.

<sup>33</sup> Ne pa ñaca cadi de Dios zeeda hombre que la? qué ñanda ñuni gastí'.

<sup>34</sup> Oraque rabi cabe laa:

—Lii lade binni qué runi ni na ley gule lu' ne yanna racala'dxu usiidi lu laadu la?

Para ucuaa cabe laa ulee cabe laa lade cabe.

*Ra ye yubi Jesús ni bisianda que*

<sup>35</sup> Gunna Jesús guladxi ca judíu laabe de lade ca', para ye yubi laabe, ne ora bidxela laabe, na rabi laabe:

—Ñee runi cre lu Xiiñi Dios la?

<sup>36</sup> Oraque na be:

—Tu laabe ya', Señor, para gune cre laabe.

<sup>37</sup> Para na Jesús:

—Ma biiya lu laabe, ne laabe nga caní' né be lii.

<sup>38</sup> —Rune cre, Señor, na be.

Ne bizuxibi be xañee Jesús.

<sup>39</sup> Ne óraque na Jesús:

—Benda ndaani guidxi-layú ri para usihuinne dxí'ba donda ique binni ne para ixele xquenda biaani cani qué riene, ne icahui xquenda biaani cani na riene, casi ñaca nicheepa lú ca'.

<sup>40</sup> Ora bina diaga caadxi fariseu ni nuu raqué ni uní' Jesús que la? na ca':

—Ñee nou' laca nacheepa lú du la?

<sup>41</sup> Oraque na Jesús rabi laaca':

—Pa ñaca nacheepa lú tu la? qué nigui'ba donda ique tu, peru ziaana stonda tu luguiá tu, partí na tu ruuya tu.

## 10

### *Xpixuaana dendxu'*

<sup>1</sup> Ne laca na Jesús rabi laa-cabe:

—Laucaa diaga chaahui ni chi tidxe laatu ri': Ni qué chu' neza ra puerta ndaani currá ra nuu ca dendxu' sínuque quiba ique ni la? gubaana laa.

<sup>2</sup> Peru ni chu' neza ra puerta que la? ngue nga pastor sti ca dendxu que.

<sup>3</sup> Ne ora chindá be, rux-hele ni cayapa ra puerta que guiuu be, ne riní' be lá ca dendxu stibe. Runibiá' ca dendxu que stidxi be ne ribee be laaca'.

<sup>4</sup> Ne ora ma ulee be irá ca dendxu stibe la? rizá niru be lú came. Rinanda came laabe partí runibiá' came stidxi be.

<sup>5</sup> Peru ni cadi pastor stícame la? qué rinanda came laa, sínuque ruxooñe came de laa partí qué runibiá' came stidxi.

<sup>6</sup> Gudixhe be ejemplu ca para laaca', peru qué ñene ca xi na ni.

### *Jesús pastor cha'hui'*

<sup>7</sup> Ne laca rabi be laaca':

—Gabe ca' laatu, naa zeda gaca casi puerta sti currá ra riuu ca dendxu'.

<sup>8</sup> Qué nulabi ca stendxua cani beeda ante guenda', partí gubaana laaca' ne zeda ndana si ca'.

9 Naa nga puerta'. Tu chu' neza ra nuaa' zalá, ziuu ne zaree ne zadxela ni go.

10 Gubaana la? reda ndana', reda guuti, reda unitilú. Peru naa benda para gapa cabe enda nabani ne idxá tipa xpida cabe de enda nayeche'.

11 Naa nga pastor cha'hui'. Pastor ni nacha'hui la? zudii xpida pur ca dendxu sti'.

12 Ni cayaxa para gapa dendxu la? qué rapa chaahui laacame purti cadi sti pe laacame, ne ruxooñe rusaana laacame ora gu'ya zeeda gueu'. Ne rinaaze gueu laacame, rucheeche ndase laacame.

13 Ruxooñe be purti cayaxa si be para gapa be laacame. Qué rizaala'dxi be laacame.

14 Naa nga pastor cha'hui ne runebia'ya ca dendxu stinne', ne laaca laca runibiá' ca naa,

15 casi runibiá' Bixhoze naa ne runebia'ya laa. Ne rudiee xpida pur ca dendxu stinne'.

16 Laca napa rua' xcaadxi dendxu ni cadi nuu ndaani currá ri'. Naquiiñe chi caa laacame. Zucaa diaga came stidxe' ne zaca came tobi si ne zapa came tobi si pastor.

17 Nadxii Bixhoze naa purti rudiee xpida' ti ibigueta icaa ni sti tiru.

18 Iruti cayaxha ni naa sínunque naa pia' caguixhe ni. Zanda quixhe ni ne zanda icaa ni sti tiru. Nga nga ni gudxi Bixhoze naa gune'.

19 Bigueta uyuu dinde ca judíu pur cani uní' be que.

20 Stale de laaca na:

—Nuu né be binidxaba ne cayaca ique be. Xiñee cucaa diaga tu laabe.

21 Ne xcaadxi na:

—Lácaxa zacá riní' ni nuu né binidxaba'. Zanda xa uxhele binidxaba lú ni nacheepa lú.

*Ra ucala'dxi ca judíu nuchá guie Jesús*

22 Lu beeū nanda cayuni cabe saa ndaani guidxi Jerusalén, saa ni rabi cabe "Dedicación".

23 Tobi de ca dxi que canazá Jesús corredor sti yu'du ro', ni rabi cabe Corredor sti Salomón.

24 Raqué uluu caadxi judíu le' laabe, ne na ca rabi ca laabe:

—Dede padxí udiiu lugar gata dxí xquenda biaani du. Pa lii nga Cristu la? gudxi ca ni laadu.

25 —Ma gudxe ni laatu, rabi be laaca'. —Peru qué na tu guni cre tu. Ca dxiiña rune la? rune ni purti nuu né Bixhoze naa, ne laacani rusihuinni cani tu naca'.

26 Peru qué runi cre tu purti cadi za tu lade ca dendxu stinne', casi gudxe laatu.

27 Runebia'ya ca dendxu stinne' ne rucaa diaga ca naa, ne rizá nanda ca naa.

28 Rudiee laaca enda nabani ni qué zaluxe ne qué ziuu dxi initilú ca', ne iruti zanda gaxha laaca ndaani naya'.

29 Bixhoze bidii laaca naa. Iruti zanda gaxha laaca ndaani ná Bixhoze', purti

jma nandxó' Bixhoze que irá xixé.

<sup>30</sup> Naa ne Bixhoze', tobi si laadu.

<sup>31</sup> Oraque gundisa ca judíu guie sti tiru, nuchá ca laabe.

<sup>32</sup> Para rabi be laaca':

—Ucané Bixhoze naa bine stale cosa ni galán lade tu. Uná de laacani qué ñuula'dxi tu para uchá tu guie naa.

<sup>33</sup> Oraque na ca':

—Cadi cuchá du guie lii purti bi'nu xiixa ni galán, sínunque cuchá du guie lii purti cadi jneza cayuni lu'. Binni guidxilayú lii peru cayu'nu lii Dios.

<sup>34</sup> Para rabi be laaca':

—Lu ley stitu cá ra na Dios: "Unié nia laatu casi ñaca tu dios, purti naa biseenda laatu."

<sup>35</sup> Ca binni ucuaa stiidxa be chiqué gudxi be laaca dios, ne qué zanda uchiá nu Xqui'chi be.

<sup>36</sup> Yanna naa, ulí Dios naa ne biseenda naa ndaani guidxilayú ri', ne na tu cadi jneza cayune tisi rabe Xiiñi Dios naa.

<sup>37</sup> Pa cadi cayune xhiña Bixhoze la? cadi guni cre tu naa.

<sup>38</sup> Ne pa cayune ni la? neca qué runi cre tu ni rinié', peru laguni cre dxiiña ca ti ganna tu ne guiene tu tobi si naa ne Bixhoze'.

<sup>39</sup> Bigueta ucalá'dxi ca judíu ninaaze ca laabe, peru biree yaande be de ndaani ná ca'.

<sup>40</sup> Uyé be cherica guiigu Jordán sti tiru, ra bizulú guluu nisa Juan binni. Ne biaana be raqué.

<sup>41</sup> Uyé stale binni ra nuu be, ne na ca':

—Nin ti milagru qué ñuni Juan, peru irá ni bizeete be de hombre ri la? irá ni dxandi'.

<sup>42</sup> Ne stale binni bini cre Jesús raqué.

## 11

### Ra guti Lázaro

<sup>1</sup> Chiqué huará tobi hombre lá Lázaro, biza'na María ne Marta. Nabeza ca ndaani guidxi Betania.

<sup>2</sup> María, biza'na Lázaro ni huará que la? nga nga dxa gunaa ni bichá nisa rindá' naxhí ñee Señor ne bicuiidxi né ni guicha ique que.

<sup>3</sup> Bisenda tidxi iropa benda cabe Jesús huará Lázaro, xhamigu.

<sup>4</sup> Ora gunna Jesús ni la? na:

—Enda huará ni napa be ca la? cadi para guuti, sínunque para ihuinni enda nandxó' sti Dios ne sti Xiiñi'.

<sup>5</sup> Nadxii Jesús guionna cabe, Marta ne María ne Lázaro.

<sup>6</sup> Ne ora gunna be huará Lázaro, biaana be xhupa gubidxa ra nuu be que.

<sup>7</sup> De raqué rabi be ca discípulu stibe:

—Chuu Judea sti tiru.

<sup>8</sup> Para na ca rabi ca laabe:

—Maistru, ñee cadi cayuya lu nase si ngue ucalá'dxi ca judíu nuchá ca guie lii ne yanna nou' ibigueta lu raqué sti tiru la?

<sup>9</sup> Oraque rabi be laaca':

—Ñee cadi doce hora napa ti dxi la? Ni rizá ridxí la?

qué rirenda gasti ñee purti  
naya'ni ra zizá.

<sup>10</sup> Peru ni rizá huaxhinni  
la? rirenda xiixa ñee, purti  
gasti biaani ra nuu.

<sup>11</sup> Gudxi si be ngue laaca'  
para na be:

—Nisiaasi Lázaro xhamigu  
nu peru ma chaa', chi  
ucuaane laa.

<sup>12</sup> Oraque na ca discípulu  
stibe:

—Pa nisiaasi be la? Señor,  
zianda be.

<sup>13</sup> Peru qué ñene ca xi na  
be. Zácxaxa ca cuzeete be nisia-  
asi si Lázaro, tihua cuzeete  
be ma guti.

<sup>14</sup> Oraque bisiá be stiidxa  
be, rabi be laaca':

—Ma guti Lázaro.

<sup>15</sup> Para laatu la? jma galán  
qué guinne raqué ti guni cre  
tu. Yanna chuu canu ra nuu  
be.

<sup>16</sup> Oraque na Tomás, ni  
rabi cabe Cuachi que, rabi ca  
xcaadxi discípulu que:

—Chuu, chu né laabe ti  
gati né nu laabe.

### *Jesús rusibani gue'tu'*

<sup>17</sup> Ora yendá be Betania  
ma raca tapa gubidxa de  
ga'chi Lázaro.

<sup>18</sup> Cadi zitu de Jerusalén  
riaana Betania, bia' chonna  
kilómetru si.

<sup>19</sup> Stale judíu yeizaca  
Marta ne María ra guti  
biza'na ca'.

<sup>20</sup> Casi gunna Marta ma  
zidxiña be, biree yechagalú  
laabe, peru María biaana  
yoo.

<sup>21</sup> Ne na Marta rabi laabe:  
—Pa ñuu lu rarí la? Señor,  
qué ñati di bizana'.

<sup>22</sup> Peru laca nanna irá ni  
inaba lu lu Dios la? zudii lii.

<sup>23</sup> Para rabi be laa:

—Zabani biza'na lu'.

<sup>24</sup> Oraque na Marta:

—Nanna zabani be dxi  
iluxe guidxilayú, ra ibani irá  
binni.

<sup>25</sup> Para na be:

—Naa nga rusibane  
gue'tu', ne naa nga rudiee  
enda nabani. Tu guni cre  
naa la? neca ma guti zabani,

<sup>26</sup> ne cani nabani ru ne  
runi cre naa la? qué ziuu dxi  
gati'. Ru'nu cre nga la?

<sup>27</sup> —Rune cre, Señor, na  
Marta. —Ma bine cre lii nga  
Cristu, Xiiñi Dios ni beeda  
ndaani guidxilayú ri'.

### *Ra biina Jesús*

<sup>28</sup> Ngue si uní' ne biree  
yení' xa diaga María benda,  
na:

—Nuu Maistro rarica',  
racala'dxi iní' né lii.

<sup>29</sup> Oraqueca biasa uxooñe  
María, uyé ra nuu Jesús.

<sup>30</sup> Ca'ru guiuu Jesús ndaani  
guidxi, nuu ru ra yechagalú<sup>1</sup>  
Marta laa que.

<sup>31</sup> Ora bi'ya ca judíu ni  
yeganna laacabe ralidxi cabe  
que biree uxooñe María ze  
la? yenanda ca laabe, na ca  
ziguuna be ra ba'.

<sup>32</sup> Peru casi yendá be ra  
nuu Jesús biiya be laa, bizux-  
ibi be xa ñee, ne na be:

—Señor, pa ñuu lu rarí la?  
qué ñati di bizana'.

<sup>33</sup> Ora bi'ya Jesús cayuuna  
be, laabe ne ca judíu zinanda  
laabe que, uyuu yuuba ladxi-  
idó' dede uca dití,

<sup>34</sup> ne na:

—Paraagudixhe tu Lázaro.

—Chuu, gu'yu', Señor, na cabe.

<sup>35</sup> Biina Jesús óraque.

<sup>36</sup> Para na ca judíu:

—Laguuya pabiá' gunaxhii be Lázaro.

<sup>37</sup> Peru xcaadxi de laaca na:

—Bixhele be lú ni nacheepa lú. Ñee qué ñanda ñuni be xiixa para qué ñati Lázaro la?

### *Ra bibani Lázaro*

<sup>38</sup> Bigueta uyyu yuuba ladxidó' be, ne uyé be ra ba' que. Casi ti cueva ni, ye'gu ti guie ruua ni.

<sup>39</sup>—Lacuee guie ca ruua ni, na be.

Para na Marta, biza'na ni guti que:

—Ma rindá' yuudxu be, Señor, partí ma napa be tapa gubidxa.

<sup>40</sup> Oraque na Jesús rabi laa:

—Ñee cadi ma gudxe lii pa guni cre lu zuuyu pabiá' nandxó' Dios la?

<sup>41</sup> Ne óraque ulee cabe guie ye'gu ruua ba' que. Undisa lú Jesús ibá', ne na:

—Rudiee diuxquixe lii, Bixhoze', partí bicaa dia'gu naa.

<sup>42</sup> Nanna ca' qué riaana dxiu de ucaa dia'gu naa, peru unié sicarí pur ca binni ni rí rarí' ti guni cre ca lii biseenda lu naa.

<sup>43</sup> Biluxe uní' né si be Bixhoze be, bicaa be ridxi:

—;Lázaro, gudá' rarí!

<sup>44</sup> Oraque biree gue'tu que, renda lari ná ne ñee, ne ye'gu ti lari lú. Para na Jesús:

—Lauxhedxe laabe, ne laudii lugar che be.

*Udixhe cabe inaaze cabe Jesús*

(Mt. 26.1-5; Mr. 14.1-2; Lc. 22.1-2)

<sup>45</sup> Stale de ca judíu ni yené María que, bini cre ca Jesús ra bi'ya ca ni guca que.

<sup>46</sup> Peru xcaadxi de laacabe yetidxi ca fariseu xi bi'ni be.

<sup>47</sup> Oraque gupa ca xaíque sti ca sacerdote ne ca fariseu ti junta, partí laaca nga justicia sti ca judíu, ne na ca':

—Xi guni nu pue. Biaa irá ni cayuni hombre ca.

<sup>48</sup> Pa usaaña nu laabe zaci la? irá binni zuni cre laabe. Ne zeeda ca romanu zeda unitilú ca yu'du ro stinu ne xquidxi nu.

<sup>49</sup> Lade cabe zeeda Caifás, naca sacerdote gola iza que. Ne óraque na rabi laacabe:

—Laatu qué ganna tu gasti'.

<sup>50</sup> Qué riene tu pa jma galán para laanu gati tobi jlugar irá nu, ti cadi initilú irá binni xquidxi nu la?

<sup>51</sup> Peru cadi de laasi be uní be ni. Partí naca be sacerdote gola iza que, nga runi bisiní' Dios laabe ni nexhe gaca'. Ne ni nexhe gaca nga gati Jesús pur ca binni xquidxi.

<sup>52</sup> Ne cadi pur ca binni xquidxi si sínuque para guni irá xixé xiñi Dios ni reeche ndase tobi si.

<sup>53</sup> Ne dede dxi que uní' sti idxa cabe guuti cabe laabe.

<sup>54</sup> Ngue runi ma qué ñanda nizá be lade ca judíu. Biree be de raqué uyé be ti guidxi huiini lá Efraín, dxaaga ni ti gui'xhi', ne raqué biaana né be ca discípulu stibe.

<sup>55</sup> Ma zeda yuba pascua. Stale binni de ca guidxi huiini que uyé Jerusalén, yeguni ca casi cá lu ley stica guni ca para guia ladxidó' ca', laga ca'ru uzulú saa que.

<sup>56</sup> Biyubi cabe Jesús raqué, ne ora nuu cabe ndaani yu'du ro', na cabe:

—Xi na tu. Nagana pa gueeda be saa ri nja'.

<sup>57</sup> Maca bizaabi ca xaíque sti ca sacerdote ne ca fariseu diidxa', tutiica gu'ya laabe la? chi tidxi laaca para inaaze ca laabe.

## 12

*Bichá ti gunaa nisa rindá' naxhi ñee Jesús*

(Mt. 26.6-13; Mr. 14.3-9)

<sup>1</sup> Cayaadxa ru xhoopa gubidxa para ganda saa que, uyé Jesús Betania, ra nuu Lázaro ni bisibani que.

<sup>2</sup> Raqué bidii cabe laabe ti endaró xhi. Marta cutiidi ni ne Lázaro zuba né laabe ra mexa que.

<sup>3</sup> Ne ucuua María ti libra aceite rindá' naxhi ni nabé risaca, uxubi ñee be ne bichaa ni ne guicha ique, dede bidxá yoo que de xho'naxhi que.

<sup>4</sup> Oraque na Judas Iscariote xiiñi Simón, tobi de ca discípulu stibe (dxa ni chi utoo laabe que):

<sup>5</sup> —Xiñee qué nidoo aceite rindá' naxhi, ri chonnanayuua denariu para ñaazi lú ca pobre.

<sup>6</sup> Uní' be zaqué, cadi partí cayá be ca pobre sínunque partí gubaana laabe ne partí

rapa be caja bidxichi que, ne ribee be lú ni para laabe.

<sup>7</sup> Para na Jesús rabi laabe: —Zaa nuu be. Cayapa be ni para naa dxi igaache'.

<sup>8</sup> Ca pobre la? qué ziuu dxi guiaadxa lade tu, peru naa, zadxiña dxi ma qué ziuaa nia laatu.

*Ucaladxi cabe ñuuti cabe Lázaro*

<sup>9</sup> Stale de ca judíu ora gunna ca nuu Jesús raqué, beda guuya ca laabe, peru cadi laasi be, sínunque laca beda guuya ca Lázaro ni bisibani be que.

<sup>10</sup> Ngue runi uní' stiidxa ca xaíque sti ca sacerdote guuti ca nécaca Lázaro,

<sup>11</sup> partí pur Lázaro stale de ca judíu caxele de laaca', cayuni cre Jesús.

*Biuu Jesús Jerusalén*

(Mt. 21.1-11; Mr. 11.1-11; Lc. 19.28-40)

<sup>12</sup> Sti dxi que stale binni ni zigapa saa ro' que, bina diaga ma zeda yuu Jesús Jerusalén.

<sup>13</sup> Para biree ca zichagalú ca laabe. Bichuugu ca ziña daa ne bicheeche ca cani ra zidi'di be. Ne bicaa ca ridxi: —¡Lausisaca ni biseenda Dios! ¡Ndi nga Rey sti Israel!

<sup>14</sup> Bidxela be ti burru huiini', udxi'ba be laa, casi cá ni ra na:

<sup>15</sup> Cadi idxibi tu, binni Sion ca'.

Laguuya', zeeda Rey stitu deche ti burru huiini'.

<sup>16</sup> Qué ñene gá ca discípulu cani cayaca que. Dede dxi ru ma nuu be ibá', dxi que ru bietenala'dxi cabe maca cá

irá ni lu gui'chi', ne casi cá ni que zaqué bi'ni binni laabe.

<sup>17</sup> Nuu ca binni bi'ya ra bisibani be Lázaro raqué, cayui' ca ni.

<sup>18</sup> Ne ngue runi stale binni yechagalú laabe, purti bina diaga ca de milagru bi'ni be que.

<sup>19</sup> Oraque na ca fariseu:

—Biaa guuyu', ma qué zanda guni nu gastí'. Ma irá xixé binni guidxilayú zinanda laabe.

*Yeyubi caadxi griegu Jesús*

<sup>20</sup> Laca uyé caadxi ni cadi judíu lade cani yeusisaca Dios ndaani saa que.

<sup>21</sup> Ne uyé ca ra nuu Felipe de Betsaida, ti guidxi sti Galilea, ne rabi ca laa:

—Señor, racala'dxi du idu'ya du Jesús.

<sup>22</sup> Para uyé Felipe, yetidxi ni Andrés. Oraque iropa ca yetidxi ca ni Jesús.

<sup>23</sup> Para na Jesús rabi laaca':

—Naa nga Hombre Biseenda Dios ne ma bidxiña hora usisaca be naa.

<sup>24</sup> Peru gabe ca' laatu, pa qué gati ti guie xuba ora guiaba ndaani yu la? qué zache ndu, peru pa gati ni la? zandani ni ne zacá lú ni.

<sup>25</sup> Tu ganaxhii xpida zuniti ni, peru tu qué izaala'dxi xpida ndaani guidxilayú ri la? cayapa ni para enda nabani ni qué zaluxe.

<sup>26</sup> Ni racala'dxi gaca xpinne la? sa nanda naa, ne ra chaa la? laca zie ca xpinne' ne zusisaca Bixhoze laaca'.

*Ra bizeete Jesús chi gati*

<sup>27</sup> Ma nuu yuuba ladxiduá'. Yanna xi inié'. Ñee zabe Bixhoze ulá naa de ni chi tide ri la? Co', purti para tide ni nga runi bidxiña dede rari'.

<sup>28</sup> Oraque na be:

—Bixhoze', bisisaca lá lu jma.

Oraque ucuá ti ridxi de ibá', na:

—Ma bisisaca ni, ne zussisaca rua' ni sti tiru.

<sup>29</sup> Bina diaga ca binni ni nuu raqué ridxi que, ne caadxi de laaca na rayu ni. Peru xcaadxi na ti ángel uní' né laabe.

<sup>30</sup> Para rabi be laaca':

—Cadi ucuá di ridxi ri para naa sínunque para laatu.

<sup>31</sup> Yanna nga ma chi guiaba ná binni guidxilayú ne ma chi ilá ni runi mandar ndaani ni ti ladu.

<sup>32</sup> Ne ora ma undisa cabe naa la? zabidxe binni queeda ra nuua'.

<sup>33</sup> Ra uní' be zacá bisiá be diidxa xi enda guti chi caa be.

<sup>34</sup> Oraque na ca binni que rabi laabe:

—Laadu huayuna diaga du xi na Xqui'chi Dios. Na ni qué ziuu dxi gati Cristu. Xi modo nga nou' lii, naquiiñe indisa cabe Hombre Biseenda Dios lu cruz. Tuu nga Hombre Biseenda Dios ca ya'.

<sup>35</sup> Para rabi be laaca':

—Ma nagaba si dxi nuu biaani lade tu. Yanna lasá laga napa tu biaani ti cadi inaaze guelacahui laatu. Purti cani rizá ra nacahui la? qué ganna ca paraa che ca'.

<sup>36</sup> Naa nga biaani ni ruzaani laatu ne laga nuua nia

laatu laguni cre naa ti chu' tu  
ra naya'ni'.

Biluxé si uni' be ngue,  
biree be de ra nuu ca', yeu-  
cachi lú be.

*Ra riete xiñee qué ñuni cre  
ca judíu*

<sup>37</sup> Necá bi'ni be stale mila-  
gru nezalú ca' peru qué ñuni  
cre ca laabe.

<sup>38</sup> Ne uca ni zacá para iree  
ni casi pe uní' profeta Isaías  
chiqué ra na:

Señor iruti cayuni cre ni  
cayuí du ne iruti cayu-  
uya pabiá' nandxó'  
Dios.

<sup>39</sup> Qué ñanda ñuni cre cabe,  
ne laca uní' Isaías xiñee qué  
ñanda ñuni cre cabe, ra na:

<sup>40</sup> Bisicheepa Dios lú cabe,  
ne biquidxi ladxidó' cabe,  
ti cadi gu'ya cabe ne qué  
guiene cabe,

uyubi cabe laa para ulá laa-  
cabe.

<sup>41</sup> Uni' Isaías ca nga purti bi-  
iya pabiá' nandxó' Jesús, ne  
byui' stiidxa'.

<sup>42</sup> Necá ne irá nga guyuu  
stale de ca xaique bini cre  
laabe, Peru naga'chi' purti  
ridxibi ca cuee ca fariseu  
laaca de ndaani yu'du'.

<sup>43</sup> Purti jma riula'dxi ca  
usisaca binni laaca que  
usisaca Dios laaca'.

*Zudxiiba stiidxa Jesús  
donda ique binni*

<sup>44</sup> Oraque uní' Jesús ne  
gana na:

—Ni runi cre naa la? runi  
cre ni biseenda naa.

<sup>45</sup> Ne ni ruuya naa la? ru-  
uya ni biseenda naa.

<sup>46</sup> Naa nga biaani ni ruza-  
ani laatu. Yanna benda  
ndaani guidxilayú ti irá tu  
guni cre naa cadi guiaana ra  
nacahui.

<sup>47</sup> Ni ucaa diaga naa ne qué  
guni ni rabe la? qué zudxiiba  
donda ique, purti cadi beda  
udxiiba donda ique binni  
guidxilayú sínunque beda  
ula'ya laaca'.

<sup>48</sup> Peru tu udxii naa, qué  
iccaa stiidxa la? ma napa ni  
udxiiba donda ique. Ca di-  
idxa ni unié', ca nga udxiiiba  
donda ique cabe dxi cuidxi  
Dios cuenta binni guidxi-  
layú.

<sup>49</sup> Purti cadi de naa sia'  
unié' sínunque maca udixhe  
Bixhoze ni biseenda naa xi  
inié'.

<sup>50</sup> Nanna dxi'che ni udixhe  
Bixhoze inié ca la? rudii ni  
enda nabani ni qué zaluxe.  
Nga runi rinié ni casi gudxi  
Bixhoze ni naa.

## 13

*Gudiibi Jesús ñee ca  
discípulu stí'*

<sup>1</sup> Ca'ru uzulú saa pascua,  
peru maca nanna Jesús ma  
bidxiña hora iree ndaani  
guidxilayú ri', ibigueta ra  
nuu Bixhoze. Ne cásica  
bizulú gunaxhii be ca xpinni  
be ni nuu ndaani guidxilayú  
zaqueca nadxii be laaca dede  
yanna ra ma chi iluxe xhiiña  
be.

<sup>2</sup> Dede ora cayó xhi cabe,  
maca biuu binidxaba ndaani  
ladxidó' Judas Iscariote, xiiñi  
Simón, para utoo laabe.

<sup>3</sup> Nanna be ma gudixhe  
Bixhoze be irá xixé cosa lu  
ná be ne nanna be ra nuu

Bixhoze be biree be ne ra  
nuu Bixhoze be che be.

<sup>4</sup> Biasa be lu endaró xhi  
que, ulee be xhaba be ne  
ucuaa be ti toalla bixhii be  
ndaaani be.

<sup>5</sup> Ne ucuaa be ti bandeja  
udaa be nisa ndaaani', ne  
bizulú gudiibi be ñee ca  
discípulu stibe ne bicuidxi né  
be ni toalla xi' ndaaani be que.

<sup>6</sup> Ora bidxiña be ra nuu  
Simón Pedru na rabi laabe:

—Señor, lii sica qui'bi lu  
ñee la?

<sup>7</sup> Para rabi be laa:

—Nagasi cadi cayene lu ni  
cayune ri', peru ziene lu ni.

<sup>8</sup> —Co', na Pedru. —Qué  
ziuu dxi qui'bi lu ñee'.

Bigueta rabi be laa:

—Pa qué quibe ñee lu la?  
cadi xpinne lii.

<sup>9</sup> Oraque na Simón Pedru:

—Señor, cadi ñee sia' qui'bi  
lu' sínunque ne naya ne ique'.

<sup>10</sup> Para rabi be laa:

—Ni ma bia'ri la? ma  
nayá. Ma cadi naquiiñe  
guia'ri ru paxaraa sínunque  
ñee si. Laatu la? ma nayá tu,  
neca cadi irá tu.

<sup>11</sup> Nanna be tu chi utoo  
laabe. Nga runi uni' be: "Cadi  
irá tu nayá tu."

<sup>12</sup> Biluxe udiibi si be ñee  
ca', ucuaa be xhaba be,  
bigueta be ruua mexa que  
ne rabi be laaca':

—Ñee biene tu ni bine  
laatu ca la?

<sup>13</sup> Laatu rabi tu naa  
Maistru ne Señor, ne jneza  
rungi tu purti nga naca'.

<sup>14</sup> Inque naa, naca Señor ne  
Maistru stitu ne gudiibe ñee  
tu la? lágaxa laatu qué qui'bi  
saa tu ñee tu.

<sup>15</sup> Purti ma bilué laatu xi  
guni tu, ti casi bine laatu ca,  
zacaca guni tu.

<sup>16</sup> Ne gabe ca' laatu, qué  
risaca ti mozo jma que xpix-  
uaana'. Zaqueca ni rie man-  
dadu, qué risaca jma que ni  
biseenda laa.

<sup>17</sup> Pa nanna tu ca nga ne  
guni tu cani la? dichoso de  
laatu.

<sup>18</sup> Cadi cuzeete irá tu, purti  
runebia'ya cani ulié', peru  
cayaca ni sicarí ti iree ni  
casi cá lu Xqui'chi Dios: "Ni  
gudó ne naa pan beda aca  
nanala'dxi naa."

<sup>19</sup> Cayabe ca' ni laatu  
yanna laga ca'ru aca ni, ti  
ora ma uca ni la? guni cre tu  
dxandí naca ni gudxe laatu  
naca ca.

<sup>20</sup> Gabe ca' laatu, ni icaa  
stiidxa cani useeña la? ca-  
caa stiidxa', ne ni icaa stiidxa  
la? cacao stiidxa ni biseenda  
naa.

*Ra bizeete Jesús zutoo Ju-  
das laa*

(Mt. 26.20-25; Mr. 14.17-  
21; Lc. 22.21-23)

<sup>21</sup> Casi biluxe uni' Jesús  
uyuu yuuba ladxidó' ne na:

—Gabe ca' laatu, tobi de  
laatu chi utoo naa.

<sup>22</sup> Biiya dxí saa ca discípulu  
lú ca'. Qué ganna ca tu  
cuzeete be.

<sup>23</sup> Bia'si pe ladxidó' be  
naguixhe ique dxa discípulu  
nadxxi be que.

<sup>24</sup> Oraque bi'ni Simón Pe-  
dru seña discípulu que inaba  
diidxa tu cuzeete be.

<sup>25</sup> Para na discípulu ni  
naguixhe ique ladxidó' be  
que rabi laabe:

—Tu laabe ya', Señor.

<sup>26</sup> Oraque na be:

—Ni udiee laa pan ni ugadxe ca la? nga nga laabe.

Para bigadxe be pan que ne bidii be ni Judas Iscariote, xiñi Simón.

<sup>27</sup> Casi ucuaa Judas ni bidii be laa que, uyuu binidxaba ndaani ladxidó', ne óraque rabi be laa:

—Ni chi gunu ca la? bi'ni ca ni nagueenda.

<sup>28</sup> Peru nin tobi de cani nuu ruua mexa que qué ñene xiñee gudxi be Judas zaqué.

<sup>29</sup> Nuu de laaca zácxaxa gudxi be Judas chi sí xiixa ni cayaadxa para saa que o udii xiixa ca pobre, partí laa naaze bolsa vueltu.

<sup>30</sup> Ucuaa si Judas pan que, biree ze'. Ne bia'si ma huax-hinni ngue.

### Laganaxhii saa

<sup>31</sup> Biree si be, na Jesús:

—Yanna ma bidxiña hora ihuinni pabiá' risaca Hombre Biseenda Dios ne pur laa zahuinni pabiá' risaca Dios.

<sup>32</sup> Ne pa isaca Dios pur laabe la? laca zuni Dios pur isaca be de laasi be, ne mápeca chi aca ni.

<sup>33</sup> Xiiñe huiine ca', ma sti ratu si nuaa nia laatu. Zuyubi tu naa, peru chi tidxe laatu casi gudxe ca judíu chiqué, ra chaa qué zanda che tu.

<sup>34</sup> Chi tixhe ca' xiixa nacubi guni tu, ganaxhii saa tu cásica huayanaxhiee laatu. Záca laganaxhii saa.

<sup>35</sup> Pa ganaxhii saa tu zacá la? zanna binni xpinne laatu.

*Na Jesús zaní' Pedru qué runibiá' laa  
(Mt. 26.31-35; Mr. 14.27-31; Lc. 22.31-34)*

<sup>36</sup> Oraque na Simón Pedru rabi laabe:

—Paraa cheu' ya, Señor.

Para rabi be laa:

—Ra chaa la? qué zanda chi nandu naa nagasi peru ziuu dxi cheu'.

<sup>37</sup> —Xiñee qué zanda chi nanda lii nagasi, Señor, na Pedru. —Dede xpida zudiee pur lii.

<sup>38</sup> —Dede xpida lu zudiuu pur naa nou' la? na Jesús.

—Gabe ca' lii, chonna tiru zaníu' qué runibióu' naa, ante guunda gallu.

## 14

*Jesús nga neza sti enda nabani*

<sup>1</sup> Cadi chu' yuuba ladxidó' to. Laguni cre Dios, ne laca laguni cre naa.

<sup>2</sup> Nuu stale lugar ra chu' tu ralidxi Bixhoze'. Pa ñaca cadi zacá ni la? ñabe ca' ni laatu. Yanna ma chaa', chi gune chaahue ti lugar para laatu.

<sup>3</sup> Ne ora ma uyaa ne ma bine chaahue ni la? zabigueta gueda caa laatu, ti ra chuaa la? laca chu' tu.

<sup>4</sup> Ma nanna tu paraa chaa' ne nanna tu neza.

<sup>5</sup> Oraque na Tomás:

—Señor, qué ganna du paraa cheu'. Ximodo nga nou' nanna du neza ca ya'.

<sup>6</sup> Para na Jesús:

—Naa nga neza ca, ne ruside ni dxandi' ne rudiee enda nabani ni qué zaluxe. Iruti

zie ra nuu Bixhoze pa cadi pur naa.

<sup>7</sup> Pa ñunibiá' tu naa la? laca ñunibiá' tu Bixhoze'. Yanna ma biiya tu laabe ne ma runibiá' tu laabe.

<sup>8</sup> Oraque na Felipe:

—Señor, biluí' laadu Bixho'zo ne ma nga si.

<sup>9</sup> Para na be:

—Biaa padxí nuua nia laatu, ne ca'ru gunibiá' lu naa la? Felipe. Ni ma biiya naa la? ma biiya Bixhoze'. Ximodo nou' ulué laatu Bixhoze ya'.

<sup>10</sup> Ñee qué runi cre lu pa tobi si naa ne Bixhoze la? Cadi naa riguixhe ni rue nia laatu, sínunque de Bixhoze zeeda ni. Ne irá ni rune la? casi ñaca laabe cayuni be ni, partí tobi si laadu.

<sup>11</sup> Laguni cre ni cayabe laatu, tobi si naa ne Bixhoze'. Pacaa laguni cre naa pur cani rune ca.

<sup>12</sup> Gabe ca' laatu, irá cani runi cre naa zuni cani rune ca. Ne jma que nga zuni ca' partí chaa ra nuu Bixhoze'.

<sup>13</sup> Irá ni inaba tu lu Bixhoze gune partí xpinne laatu la? zune ni, ti usisaca binni Bixhoze pur naa.

<sup>14</sup> Pa inaba tu xiixa la? zune ni partí xpinne laatu.

*Ra bidii stiidxa Jesús zuseenda Espíritu Santu*

<sup>15</sup> Pa nadxii tu naa la? zuzuuba tu stiidxa'.

<sup>16</sup> Ne naa zanaba lu Bixhoze udii laatu stobi ni guiaana né ca laatu para acané laatu ne usieche laatu.

<sup>17</sup> Cuzeete Espíritu ni riní' puru si ni dxandí', ne nga nga Espíritu Santu. Cani

cadi xpinne' qué zanda icaa laabe, partí qué ruuya laabe ne qué runibiá' laabe. Peru laatu runibiá' tu laabe partí nabeza be lade tu ne ziuu be ndaani ladxidó' to.

<sup>18</sup> Qué zusaana laatu casi bizabi sínunque zenda rua' ra nuu tu.

<sup>19</sup> Xcaadxi si ma qué zuuya binni naa, peru laatu zuuya tu naa. Ne zabani tu partí nabane'.

<sup>20</sup> Dxi que nga ganna tu tobi si naa ne Bixhoze', clásica naa naca nia laatu tobi si ne laatu naca né tu ni naa.

<sup>21</sup> Ni ma napa stiidxa' ne guni ni na ni ña? ngue nga ni nadxii naa. Ne ni nadxii naa la? zanaxhii Bixhoze laa, ne naa laca zanaxhiee laa ne zulué laa tu pe nga naa.

<sup>22</sup> Oraque na Judas rabi laabe (peru cadi Judas Iscariote):

—Señor, ximodo nga nou' laasi du ganna du tu nacu' ne cadi irá binni.

<sup>23</sup> Para na be:

—Ni nadxii naa la? zuzuuba stiidxa' ne zanaxhii Bixhoze laa ne zeda guiaana né du laa.

<sup>24</sup> Ni cadi nadxii naa la? qué ruzuuba stiidxa'. Cadi stiidxa dia' nga ni cayuna diaga tu ri', sínunque stiidxa Bixhoze ni biseenda naa.

<sup>25</sup> Cayabe ca' ndi laatu laga nuua nia laatu.

<sup>26</sup> Ne zuseenda Bixhoze Espíritu Santu gueda acané laatu ne usieche laatu, casi ñaca naa nuseenda laa. Ne laa zusiene laatu irá xixé cosa, ne zusietenala'dxi laatu irá ni huayué nia laatu.

<sup>27</sup> Zaguijhe dxie ladxidó' to casi nexhe dxí ladxiduá'.

Ne zune ni cadi casi runi binni guidxilayú. Cadi chu' tu xizaa ne cadi idxibi tu.

<sup>28</sup> Ma bina diaga tu gudxe laatu chaa', peru zabigueta ra nuu tu sti tiru. Pa ñanaxhii tu naa la? ñeche tu ti rabe chaa ra nuu Bixhoze', purti jma nandxo' Bixhoze que naa.

<sup>29</sup> Cayabe ca' ni laatu nagaşı laga ca'ru aca ni, ti ora aca ni la? guni cre tu.

<sup>30</sup> Ma huaxié' zanda güe nia laatu diidxa', purti ma zeeda xaíque sti guidxilayú ri'. Qué zanda guni mandar be naa,

<sup>31</sup> peru naquiiñe gaca ni zacá para ganna binni nadxiee Bixhoze', ne rune ni gudxi naa gune'. Yanna, laguiasa, chuu canu de rari'.

## 15

### *Bisaca Jesú斯 laa lubá' uvas*

<sup>1</sup> Naa zeda gaca casi ti lubá' uvas, ne iruti ru stobi casi naa. Ne Bixhoze zeda gaca casi ni rapa lubá' que.

<sup>2</sup> Irá rama stinne ni qué icá lú maca ziugá be, peru cani icá lú la? zusiá be laaca para jma rusi gudii ca'.

<sup>3</sup> Laatu ma nayá tu, purti ma bini cre tu ca diidxa byue nia laatu.

<sup>4</sup> Laguiasaana né naa tobi si, ne naa ziajana nia laatu tobi si. Casi ti rama qué zanda icá lú pa cadi gui'di cue'yaga, zaqueca laatu qué zaree ndu ni cayuni tu pa cadi nuu né tu naa tobi si.

<sup>5</sup> Naa nga lubá' ne laatu nga rama. Ni guiaana né naa tobi si la? nabé zaree ndu ni

guni. Purti pa ixele tu de naaasti qué zanda guni tu.

<sup>6</sup> Ni qué guiaana né naa, maca zilá ti ladu, ibidxi para idopa icá gui.

<sup>7</sup> Pa guiaana né tu naa ne guiaana stiidxa ndaani ladxi-idó' to la? lainaba intiica gacala'dxi tu, zacaa tu.

<sup>8</sup> Zusisaca tu Bixhoze pa iree ndu ni cayuni tu lu xhiiña', ne zacá zahuinni xpinne laatu.

<sup>9</sup> Cásica nadxii Bixhoze naa zacaca nadxiee laatu. Cadi uyubi tu usaana de ganaxhiee laatu.

<sup>10</sup> Pauzuuba tu stiidxa', qué zusaana de ganaxhiee laatu, casi qué huasaana Bixhoze de ganaxhii naa purti ruzuuba stiidxa'.

<sup>11</sup> Huayué nia laatu irá ndi ti guieche tu casi nayeche nuaa' ne zacá zazaa enda nayeche stitu.

<sup>12</sup> Ndi nga ni rabe laatu guni tu: Ganaxhii saa tu cásica huayanaxhiee laatu.

<sup>13</sup> Iruti zanda ganaxhii jma que bia' nadxii tobi ni udii xpida pur ca xhamigu.

<sup>14</sup> Laatu nga xhamigua pa guni tu ni rabe'.

<sup>15</sup> Ma cadi mozo stinne laatu, purti mozo qué ganna xi runi xpixuaana', sínunque ma xhamigua laatu purti ma gudxe laatu irá ni gudxi Bixhoze naa.

<sup>16</sup> Cadi laadi tu gulí tu naa, sínunque naa gulié laatu. Ne gudixhe laatu para iree ndu ni guni tu ne cadi initilú ni, ti intiica inaba tu lu Bixhoze', zudii laatu purti xpinne laatu.

<sup>17</sup> Ndi nga ni rabe laatu guni tu: Ganaxhii saa tu.

*Nanala'dxi binni guidxi-layú Jesús ne ca xpinni*

<sup>18</sup> Pa gaca nanala'dxi binni laatu la? laguietenala'dxi nirudó' uca nanala'dxi cabe naa.

<sup>19</sup> Pa ñaca de laacabe laatu la? ñanaxhii cabe laatu, perú ma ulee laatu de lade cabe, nga runi nanala'dxi cabe laatu, purti cadi de laa-cabe laatu.

<sup>20</sup> Laguietenala'dxi ni gudxe laatu: "Qué risaca ti mozo jma que xpixuaana'." Pa huazabi nanda cabe naa, laca zazabi nanda cabe laatu. Ne laca pa ucuaa cabe stiidxa la? laca zacaa cabe stiidxa tu.

<sup>21</sup> Irá nga zuni cabe laatu ti xpinne laatu, purti qué runibiá' cabe ni biseenda naa.

<sup>22</sup> Pa qué ñeda güe nia laa-cabe diidxa la? qué ñapa cabe donda purti qué ñanna cabe pa cuchee cabe, perú ma qué gapa cabe xi cu' ruua cabe yanna.

<sup>23</sup> Ni aca nanala'dxi naa la? laca cayaca nanala'dxi Bixhoze'.

<sup>24</sup> Pa qué ñune milagru ni iruti huayuni lade cabe la? qué ñapa cabe donda, perú neca ma biiya cabe irá ni perú uca nanala'dxi cabe naa ne Bixhoze'.

<sup>25</sup> Peru caree ni zacá para gaca ni casi cá lu Xqui'chi Dios ra na: "Guca nanala'dxi cabe naa sin nuzaabe gasti'."

<sup>26</sup> De ra nuu Bixhoze zuseenda Espíritu Santu gueda acané laatu ne usieche

laatu. Rini' be ni dxandí', ne ora gueeda be, zusiene be laatu tu pe nga naa.

<sup>27</sup> Laatu laca zusiene tu binni tu naa purti uyuu né tu naa dede dxi bizuluá'.

## 16

<sup>1</sup> Huayué nia ca ndi laatu ti cadi chu' xiixa uchenda laatu.

<sup>2</sup> Zabee cabe laatu ndaani yu'du', ne dede zadxiña dxi tutiica guuti laatu zaná cayuni xhiiña Dios.

<sup>3</sup> Ne zuni cabe zacá purti qué runibiá' cabe Bixhoze nin naa.

<sup>4</sup> Cayabe ca' ni laatu, ti ora aca ni, guietenala'dxi tu maca gudxe ni laatu.

### *Xhiiña Espíritu Santu*

Qué ñabe dia' ni laatu dede dxi bizuluá' purti nuua nia laatu.

<sup>5</sup> Peru yanna ma chaa ra nuu ni biseenda naa, ne nin tobi de laatu cadi canaba diidxa tu naa paraa chaa'.

<sup>6</sup> Sínuque laga yuuba uyuu ladxidó' to, tisi gudxe ca nga laatu.

<sup>7</sup> Laguni cre ni cayabe laatu ri'. Jma galán zaca para laatu pa chaa', purti pa qué chaa', qué zeeda ni nexhe gueda acané laatu ne usieche laatu qué. Peru pa chaa la? zuseenda laabe.

<sup>8</sup> Ne ora gueeda be zuluí be binni cuchee ca', ne zuluí be laaca xii nga jneza, ne laca zuluí be laaca napa Dios xidé cuidxi cuenta binni.

<sup>9</sup> Cuchee ca purti cadi cayuni cre ca naa.

10 Zuluí' be laaca xii nga jneza purti chaa ra nuu Bixhoze ne qué zuuya ru tu naa.

11 Laca zuluí' be laaca zabidxi Dios cuenta binni, purti ma guridxi cuenta xaíque sti guidxilayú ri'.

12 Napa rua' stale ni ñabe laatu, peru nagasi qué zanda guni huantar tu ni.

13 Peru ora gueeda Espíritu Santu, zusiene laatu irá ni dxandí' ne ni chi gaca ru'. Riní' be puru ni dxandí', ne cadí laabe chi tixhe be ni ini' be sínunque zabi be laatu irá ni gabi Bixhoze laabe.

14 Zusisaca be naa purti zui' né be laatu stiidxa'.

15 Stinne irá ni napa Bixhoze'. Nga runi rabe laatu zui' né be laatu stiidxa'.

*Zadxaa enda naná, zaca enda nayeche'*

16 Xcadaxi si ma qué zuuya tu naa, purti chaa ra nuu Bixhoze', peru qué zandaa ibigueta guuya tu naa sti tiru.

17 Oraque unaba diidxa saa ca discípulu, na ca':

—Xii ndi cayabi be laanu pue, na be xcadaxi huiini si ma qué zadu'ya nu laabe purti che be ra nuu Bixhoze be, ne qué zandaa ibigueta idu'ya nu laabe.

18 Ne xii nga na be, xcadaxi huiini si pue. Qué riene nu xi caní' be.

19 Biene Jesús racala'dxi cabe inaba diidxa cabe laa, para na rabi laacabe:

—Ñee racala'dxi tu ganna tu xii nga rabe laatu ora unié'

xcaadxi huiini si ma qué zuuya tu naa, ne qué zandaa guuya tu naa sti tiru la?

20 Gabe ca' laatu, laga cayeche binni, laatu zacaná ladxidó' to ne zuuna tu, Peru zeda iree ca enda naná stitu que enda nayeche'.

21 Nabé stale yuuba rudii ti gunaa ora ma chi gapa ba'du', peru ora ma gule ba'du que la? ma nin ranna be pa nuu yuuba que, purti cayeche be ma biuu sti binni ndaani guidxilayú.

22 Zacaca laatu, nagasi nuu yuuba ladxidó' to, peru zabigueta guuya laatu ne óraque zieche ladxidó' to, ne iruti zaxha enda nayeche que laatu.

23 Dxi que qué zanaba didxa tu naa gastí'. Gabe ca' laatu, irá ni inaba tu Bixhoze', zacaa tu purti xpinne laatu.

24 Dede nagasi qué huana naba tu gastí neca xpinne laatu. Lainaba, zacaa tu, ti izaaz chaahui enda nayeche stitu.

25 Irá ni huayué nia laatu huayué nia ni laatu ne ejemplu, peru zadxiña dxi ma qué zue nia laatu diidxa zacá, sínunque zusiene pia' laatu tu naca Bixhoze'.

26 Zanaba tu Bixhoze xiixa dxi que, purti xpinne laatu, ne cadí naquiiñe icaya pia' lu Bixhoze udii ni laatu,

27 purti laa pe be nadxii be laatu ti nadxii tu naa ne bini cre tu ra nuu be biree'.

28 De ra nuu be biree' benda ndaani guidxilayú ri'. Yanna ma chi usaana guidx-

ilayú ibigueta ra nuu be sti  
tiru.

*Gudixhe dxí Jesús guidxi-  
layú*

<sup>29</sup> Oraque na ca discípulu  
stibe rabi laabe:

—Yanna ru ma cusiá lu  
stiidxa lu', ma cayui' neu ni  
laadu para guiene chaahui  
du, ne cadi ne ejemplu casi  
ru'nu chiqué.

<sup>30</sup> Ma nanna du nannu irá  
xixé cosa ne cadi naquiiñe  
chu' tu caañe lii. Nga runi  
runi cre du beedu de Dios.

<sup>31</sup> Para rabi be laaca':

—Ma runi cre tu yanna la?

<sup>32</sup> Zadxiña hora ireeche  
ndase tu, ne mápeca bidxiña  
ni. Cada tobi tu zie tu adxé  
adxé ladu, zusaana tu naa  
stube'. Peru cadi stube nuua',  
purti nuu né Bixhoze naa.

<sup>33</sup> Cayabe irá ndi laatu ti  
gata dxí ladxidó' to partí nuu  
né tu naa tobi si. Laga  
nuu tu ndaani guidxilayú ri  
la? zadi'di tu ni nagana,  
peru cadi idxibi tu partí ma  
udixhe dxie guidxilayú.

## 17

*Ra uni' né Jesús Dios pur  
ca discípulu stí'*

<sup>1</sup> Biluxé si uni' Jesús ca di-  
idxa ca undisa lú ibá', na:

—Bixhoze', ma bidxiña  
hora. Bisisaca Xiiñi lu yanna,  
ti laca usisaca Xiiñi lu lii,

<sup>2</sup> partí gudixhe lu irá binni  
ladxi ná Xiiñi lu' ti gudii enda  
nabani ni qué zaluxe irá ni  
uchiña lu ra nuu.

<sup>3</sup> Ne zacaa cabe enda na-  
bani ca ra gunibiá' cabe lii  
ne ra gunibiá' cabe Jesucristu

ni biseenda lu'. Lii nga tobi  
lucha Dios ni dxandí'.

<sup>4</sup> Ma bisisaca lii ndaani  
guidxilayú ri', ne ma bindu-  
uxe ni biseendu naa beda  
gune'.

<sup>5</sup> Yanna la? Bixhoze', bi-  
sisaca naa ra nuu lu' casi  
bisaca raqué dxí ca'rú uzá' lu  
guidxilayú.

<sup>6</sup> Cani ulee chu lu lade  
binni guidxilayú bidii lu naa  
la? ma bisiide laaca ximodo  
lii. Stilu laacabe, peru bidii  
lu laacabe naa ne ma cuzu-  
uba cabe stiidxa lu'.

<sup>7</sup> Yanna ma nanna cabe irá  
ni bidii naa zeeda ni de lii.

<sup>8</sup> Purti ma byue nia laa-  
cabe stiidxa lu' ne ma ucuaa  
cabe ni. Ma nanna dxichi  
cabe huandí de ra nuu lu  
benda', ne lii biseenda lu  
naa.

<sup>9</sup> Rinaba lii pur laacabe.  
Cadi canaba pur cani zi-  
nanda guidxilayú sínuque  
pur cani bidii naa, partí  
stiu' laacabe.

<sup>10</sup> Irá ni stinne la? stiu', ne  
ni stiu' la? stinne', ne rusi-  
huinni cabe pabiá' risaca'.

<sup>11</sup> Naa ma chaa ra nuu  
lu', ma qué ziaana ndaani  
guidxilayú ri', peru laacabe  
ziaana cabe rari'. Bixhoze  
ni nacha'hui', cani bidii naa  
ca rinaba lii gapa lu laacabe  
ne enda nandxó' stiu' ti gaca  
cabe tobi si casi laanu.

<sup>12</sup> Dxi nuua niä laacabe  
ndaani guidxilayú ri la?  
gupa laacabe ne enda  
nandxó' stiu'. Biyya chaahue  
cani bidii naa, ne nin tobi  
qué ninitilú sínuque ni maca  
nexhe initilú, ti iree ni casi  
na lu Xqui'chi lu'.

<sup>13</sup> Yanna ma chaa ra  
nuu lu', peru laga nuua

rua' ndaani guidxilayú ri la? canié ca diidxa ri ti idxá ladxidó' cabe de enda nayeche' casi dxá ladxiduá'.

<sup>14</sup> Ma bidiee laacabe stiidxa lu', ne ma nanala'dxi cani zinanda guidxilayú laacabe partí cadi zinanda cabe guidxilayú, casi naa laca cadi zinanda guidxilayú.

<sup>15</sup> Cadi canaba lii gaxhu laacabe de ndaani guidxilayú, sínunque ulá lu laacabe de binidxaba'.

<sup>16</sup> Cásica naa cadi zinanda guidxilayú zaqueca laacabe, cadi zinanda cabe guidxilayú.

<sup>17</sup> Dxandi' stiidxa lu'. Bisiene ni laacabe ti ibani cabe para lii siou'.

<sup>18</sup> Cásica biseenda lu naa ndaani guidxilayú ri la? zaqueca ma biseenda laacabe.

<sup>19</sup> Pur laacabe rusaana idubi vida stinne lu nou' ti ora icaa cabe ni dxandi' la? laca usaana cabe idubi xpida cabe lu nou'.

<sup>20</sup> Peru cadi pur laasi cabe canaba lii, sínunque ne pur cani guni cre naa ra guna diaga ni iní cabe.

<sup>21</sup> Ne rinaba lii aca cabe tobi si casi naca nu tobi si, ne zaqueca aca né cabe laanu tobi si ti ganna binni lii biseendu naa.

<sup>22</sup> Casi bisisaca lu naa la? zaqueca ma bisisaca laacabe ti aca cabe tobi si casi tobi si laanu.

<sup>23</sup> Lii naca neu naa tobi si, ne naa naca nia laacabe tobi si, ti ganda gaca pe cabe tobi si, ne zacá ganna binni lii biseenda lu naa ne nadxiu laacabe casi nadxiu naa.

<sup>24</sup> Bixhoze', racaladxe chu' cani bidiiu naa que

ra chuaa', ti gu'ya cabe enda risaca stinne'. Bisisaca lu naa partí gunaxhii lu naa dede dxi ca'ru chá guidxilayú.

<sup>25</sup> Bixhoze', lii ru'nu jneza. Neca qué runibía' binni lii, peru naa runebia'ya lii, ne ma nanna ca xpinne lii biseenda lu naa.

<sup>26</sup> Ma bisiene laacabe tu naca lu' ne zusiene rua' laacabe ti gapa cabe naa ndaani ladxidó' cabe para ganaxhii saa cabe casi nadxiu lu naa.

## 18

*Ra bigaa Jesús*

(Mt. 26.47-56; Mr. 14.43-50; Lc. 22.47-53)

<sup>1</sup> Biluxi si uní' Jesús ca diidxa ca, biree né ca discípulu sti' uyé ca ndaani ti le' olivo ni nuu cherica arroyo Cedrón.

<sup>2</sup> Ne laca nanna Judas, ni bitoo laabe que, lugar ra nuu be, partí stale tiru yené be ca discípulu stibe raqué.

<sup>3</sup> Para biree uyé ra nuu be. Yené caadxí soldadu ne caadxí gendarme ni rapa ra yu'du', ni biseenda ca xaíque sti ca sacerdote ne ca fariseu. Ne yené ca linterna ne antorcha ne ni ucaa lú né ca'.

<sup>4</sup> Peru ma nanna be xi irá zeeda luguiá be, ngue runi laabe biree be lú ca', rabi be laaca':

—Tu ruyubi tu.

<sup>5</sup> —Jesús de Nazaret, na ca'.

—Rarí nuua', rabi be laaca'.

Ne laca nuu Judas ni bitoo laabe que raqué.

<sup>6</sup> Ora bina diaga ca ni na be que la? gurí sa ca atrá dede biaba ca layú.

<sup>7</sup> Bigueta rabi be laaca':

—Tu ruyubi tu.

—Jesús de Nazaret, na ca'.

<sup>8</sup> Para rabi be laaca':

—Cadi ma gudxe laatu naa ndi la? Yanna pa naa cuyubi tu la? laudii lugar che ca xcaadxi ri'.

<sup>9</sup> Uca ni zacá ti iree ni casi gudxi be Bixhoze be: "De irá ni bidiiu naa, nin tobi qué nunite".

<sup>10</sup> Oraque guxha Simón Pedru espada sti' bigá ti chu diaga Malco ladu derechu, Malco, jmozo sacerdote gola.

<sup>11</sup> Oraque na Jesús rabi Pedru:

—Uluu espada stiu'. Ñee nou' cadi naquiiñe tide irá ni gudixhe Bixhoze tide la?

*Ra yené cabe Jesús ra nuu Anás*

(Mt. 26.57-58; Mr. 14.53-54; Lc. 22.54)

<sup>12</sup> Ne óraque bidxiña ca soldadu ne ca xáique sti ca' ne ca gendarme sti ca judíu, bichá ná ca Jesús ne bindiibi ca laabe.

<sup>13</sup> Nirudó' ra nuu Anás yené ca laabe, partí Anás nga suegru Caifás ni naca sacerdote gola iza que.

<sup>14</sup> Ne laca Caifás ri ca nga gudxi ca judíu jma galán gati tobi ti qué gati idubi guidxi.

*Na Pedru qué runibiá' Jesús*

(Mt. 26.69-70; Mr. 14.66-68; Lc. 22.55-57)

<sup>15</sup> Yenanda Simón Pedru ne sti discípulu Jesús. Ridxaaga

sti discípulu que sacerdote gola, ngue runi gunda biuu né laa ra biuu Jesús ndaani patiu sti sacerdote.

<sup>16</sup> Peru Pedru biaana fuera. Para biree sti discípulu que, uní' né badu dxaapa ni rapa ra puerta que, para biguu Pedru.

<sup>17</sup> Ne na badu dxaapa que rabi Pedru:

—Lii laca discípulu stibe lii nja'.

—Co', na Pedru, —cadi zaya de laacabe.

<sup>18</sup> Bi'ni ca mozo ne ca gendarme que ti gui para idxaa ca', partí nananda raqué. Ne yeuzuhuaa Pedru lade cabe para idxaa.

*Ra unaba diidxa sacerdote gola Jesús tu laa*

(Mt. 26.59-66; Mr. 14.55-64; Lc. 22.66-71)

<sup>19</sup> Laga cayaca irá nga la? canaba diidxa sacerdote gola Jesús tuu nga ca discípulu sti ne xi rusiidi'.

<sup>20</sup> Para rabi be laa:

—Huanié nezalú irá binni. Bisiide ndaani ca yu'du huiini ne ndaani yu'du ro' ra rie stale judíu, ne gasti qué ninié naga'chi'.

<sup>21</sup> Xiñee canaba diidxa lu naa. Unaba diidxa cani huayuna diaga. Laaca nanna ca xi huayué nia laaca'.

<sup>22</sup> Casi pe biluxe uní' be udapa tobi de ca gendarme que lú be ne rabi laabe:

—Ñee zacá ricabi cabe sacerdote gola la?

<sup>23</sup> Para na be:

—Pa cadi jneza unié la? uní' nezalú irá binni ri paraa

bichee', ne pa qué nuchee la? xiñee cagapa lu naa.

<sup>24</sup> Oraque biseenda Anás laabe ra nuu Caifás sacerdote gola, idubi liibi be.

*Ra bigueta uní Pedru qué runibiá' Jesús*

(Mt. 26.71-75; Mr. 14.69-72; Lc. 22.58-62)

<sup>25</sup> Ra zuhuaa Pedru cadxaa que, unaba diidxa cabe laa:

—Ñee cadi laca tobi de ca discípulu que lii la?

—Co', cadi zaya dia' de laa-cabe, na Pedru.

<sup>26</sup> Oraque na tobi de ca mozo sti sacerdote gola, familia dxa hombre bigá be diaga que, rabi laabe:

—Ñee cadi ne lii biiya nuu neu laabe ra le' olivo que la?

<sup>27</sup> Bigueta na Pedru:

—Co'.

Ne óraque pe biinda gallu.

*Udi'di Jesús lu ná Pilatu*  
(Mt. 27.1-2, 11-14; Mr. 15.1-5; Lc. 23.1-5)

<sup>28</sup> Bia' zeda yaba biaani biree né cabe Jesús de ralidxi Caifás, yené cabe laa ra palaciu. Laacabe qué ñuu cabe, purti pa ñuu cabe la? nuchee né cabe ley stícabe, ne ma qué ñanda ño cabe ni ro ca binni que saa pascua.

<sup>29</sup> Ngue runi biree Pilatu yenaba diidxa laacabe, na rabi laacabe:

—Xi queja napa tu luguiá hombre ri'.

<sup>30</sup> Para na cabe:

—Pa ñaca cadi cuchee be, qué ñeda saana du laabe ra nuu lu'.

<sup>31</sup> Oraque na Pilatu:

—Lachiné laabe. Laudxi-iba donda ique be casi na ley stitu.

Para na cabe:

—Laadu qué gapa du derechu guuti du iruti'.

<sup>32</sup> Cayaca ni zacá ti iree ni casi uní Jesús ra bizeete modo gati'.

<sup>33</sup> Bigueta biuu Pilatu ndaani palaciu ne guridxi Jesús, na rabi laa:

—Ñee lii nga rey sti ca judíu la?

<sup>34</sup> Para na Jesús:

—De lii siou' canaba diidxa lu nga la? o uyuu tu gudxi lii xiixa de naa.

<sup>35</sup> —Láçaxa judíu naa, na be. —Ca binni xquidxi lu ne ca xaíque sti ca sacerdote nga beda saana lii ra nuua'. Xi bi'ni lu'.

<sup>36</sup> Oraque na Jesús rabi laabe:

—Cadi beda aca dia' rey ndaani guidxilayú ri', purti pa ñaca beda aca rey rarí la? ñasa ca xpinne', nucaa lú para cadi ninaaze ca judíu naa. Peru cadi rarí di nga zeda aca rey.

<sup>37</sup> Para na Pilatu rabi laabe:

—Entonce rey lii pue la?

Oraque na be:

—Dxandí rey naa, casi na lu ca. Beda gale ndaani guidxilayú para güe nia binni xii nga ni dxandí'. Ne irá ni zinanda ni dxandí la? rucaa diaga naa.

<sup>38</sup> Oraque na Pilatu:

—Xii nga ni dxandí ya'.

*Gu'ta gati Jesús*

(Mt. 27.15-31; Mr. 15.6-20; Lc. 23.13-25)

Ne casi biluxé uní' nga biree, uyé ra nuu ca judíu sti tiru, na rabi laaca':

—Qué idxela gasti donda luguiá be.

<sup>39</sup> Peru laatu napa tu ti costumbre ilaa ti presu para laatu irá iza ca dxi cayaca saa pascua stitu. Yanna racala'dxi tu undaa rey sti ca judíu ri la?

<sup>40</sup> Oraque irá cabe bicaa cabe ridxi:

—Cadi undoou diou' laabe. Bindaa Barrabás.

Barrabás nda naca ti gubaana'.

## 19

<sup>1</sup> Oraque ucuaa Pilatu Jesús ne bicaa ca xpinni gudiñe laabe.

<sup>2</sup> Ne ucuaa ca soldadu que guichi, bizá' ca ti la'pa uluu ca ique be, ne bigacu ca laabe ti lari moradu.

<sup>3</sup> Bidxiña ca ra nuu be, na ca':

—¡Viva rey sti ca judíu!

Ne cagapa ca lú be.

<sup>4</sup> Bigueta biree Pilatu uyé ra nuu ca judíu ne na rabi laaca':

—Laguuya', zeda nia laabe ra nuu tu, ti ganna dxichi tu qué idxela gasti donda luguiá be.

<sup>5</sup> Oraque biree be, nuu la'pa de guichi ique be ne nacu be lari moradu que. Para na Pilatu:

—Laguuya', rarí nuu hombre que.

<sup>6</sup> Ora bi'ya ca xaíque sti ca sacerdote ne ca gendarme laabe bicaa ca ridxi:

—¡Bicaa laabe lu cruz! ¡Bi-  
caa laabe lu cruz!

Para na Pilatu rabi laaca':

—Laicaa laabe laatu, laucaa laabe lu cruz, partí  
naa qué idxela gasti donda luguiá be.

<sup>7</sup> Oraque ucabi cabe:

—Napa du ti ley, ne según  
ley stidu la? naquiiñe gati  
be, partí bi'ni be laabe Xiiñi  
Dios.

<sup>8</sup> Ora bina diaga Pilatu xi  
na cabe, jma rusi bidxibi.

<sup>9</sup> Ne biuu ndaani palaciu  
que, na rabi Jesús:

—Padé lii.

Peru qué nicabi Jesús.

<sup>10</sup> Para na Pilatu rabi  
laabe:

—Qué za'bu naa ni canaba  
diidxa lii ca la? Ñee qué  
gannu pa napa derechu ucaa  
lii lu cruz o undaa lii la?

<sup>11</sup> Oraque rabi be laa:

—Qué ñuua dia' ladxi ná  
lu pa qué niguixhe Dios ñaca  
ni zacá. Nga runi jma stale  
donda napa ni beda saana  
naa ra nuu lu' que lii.

<sup>12</sup> Dede óraque nisi biyubi  
Pilatu nundaa laabe, peru bi-  
caa ca judíu ridxi:

—Pa undaa lu laabe la?  
cadi xhamigu diou' César,  
partí irá ni guni laa rey cadi  
nuu né César tobi si.

<sup>13</sup> Ne ora bina diaga Pilatu  
nga la? biree né laabe, yetí ra  
ribí para udxiba donda ique  
binni, ti lugar ni lá Gabata.

<sup>14</sup> Bia'si pe viernes ndaani  
saa pascua cayaca irá ndi'.  
Bia' galaa dxi na Pilatu, rabi  
ca judíu:

—Rarí nuu rey stitu.

<sup>15</sup> Oraque bicaa cabe ridxi:

—¡Yené laabe! ¡Yeucaa laabe lu cruz!

—Rey stitu ucaa lu cruz la? na Pilatu.

Para bicabi ca xaíque sti ca sacerdote:

—César si nga rey stidu, ne irutí ru'.

<sup>16</sup> Oraque ru bidii Pilatu Jesús laacabe, ucaa cabe lu cruz.

### *Ucuá Jesús lu cruz*

(Mt. 27.32-44; Mr. 15.21-32; Lc. 23.26-43)

17 Para ucuaa cabe Jesús yené cabe laa nua cruz sti', zé ti lugar lá La Calavera. Diidxa hebreu rabi cabe ni Gólgota.

18 Ne raqué bicaa cabe laabe lu cruz, laabe ne xhupa, tobi cada ladu. Laabe nuu be galahui'.

19 Ne bicaa Pilatu caadxí letra ro' ique cruz que. Sicarí na cani: "Jesús de Nazaret, Rey sti ca judíu."

20 Stale de ca judíu biinda ni cá ique cruz que purti uriá guidxi ucuá be lu cruz, ne ucuá ca diidxa que hebreu, latín ne griegu.

21 Ne na ca xaíque que rabi Pilatu:

—Cadi ucaa lu "Rey sti ca judíu" sínunque bicaa "Na be Rey sti ca judíu laabe."

22 —Ni ma bicaa la? ma bicaa', na Pilatu.

23 Biluxé si bicaa ca soldadu que laabe lu cruz ucuuaa ca xhaba be bi'ni ca ni tapa ndaa, tindaa cada tobi ca'. Peru túnica stibe que la? qué gapa ra di'ba', de ti ndaga si ni.

<sup>24</sup> Para uní' stiidxa ca cadi icheza ca ni, sínunque cu' ca

ni rifa, gu'ya ca tu cuee ni. Bi'ni cabe zaqué ti aca ni casi cá lu Xqui'chi Dios: "Gudiizi cabe xhaba', ne guluu cabe lari stinne lu rifa." Ne nga pe nga bi'ni ca soldadu que.

25 Cue' cruz sti Jesús que, zuhuua jñaa ne benda jñaa, ne María xheela Cleofas, ne María de Magdala.

26 Ora bi'ya Jesús zuhuua jñaa raqué, ne biiya zuhuua dxa discípulu ni nadxii que gaxha la? na rabi jñaa:

—Amá, racá zuhuua xiiñi lu'.

<sup>27</sup> Ne óraque rabi be discípulu que:

—Biiya, racá zuhuua jñaa lu'.

Ne dede óraque ucuaa discípulu que jñaa be zie né ralidxi.

### *Ra guti Jesús*

(Mt. 27.45-56; Mr. 15.33-41; Lc. 23.44-49)

28 Biluxé si irá nga, nanna be ma biluxé xhiiña be para na be:

—Cayate nisa.

Uní' be zacá ti iree ni casi cá lu Xqui'chi Dios.

29 Bia'si pe zuhuua ti jarra huiini da' vinagre ndaani raqué para bigadxe cabe ti esponja ne bidxiiba cabe ni ique ti bara huiini sti ti yaga lá hisopo, guluu cabe ni ruua be.

30 Güe' si be vinagre que, na be:

—Ma biluxé ni.

Ne bisaba ique be, guti be.

*Bindizi ti soldado lanza xcustiá Jesús*

31 Viernes cayaca irá ndi ne qué na ca judíu guiaana ca

cuerpu que lu cruz partí ma chi uzulú dxi enda riziila'dxi ne laca dxi ro' ni. Para yenaba cabe Pilatu iluuza ñee cani ucuá lu cruz que, ti ganda iree ca de raqué.

<sup>32</sup> Oraque beeda ca soldadu, guluzza ca ñee ni cá primé que, ne zaqueca ñee stobi que, de iropa hombre ni ucuá né Jesús lu cruz que.

<sup>33</sup> Peru ora bidxiña ca ra nuu be, biiya ca ma guti be, ma qué niguza ca ñee be.

<sup>34</sup> Peru bindizi tobi de ca soldadu que ti lanza xcustiá be, ne óraque biree rini ne nisa.

<sup>35</sup> Ni bi'ya ra uca ni, ngue nga cayuí' ni, ne dxandí ni caní' be. Laabe nanna be caní' be ni dxandí ti laatu laca guni cre tu.

<sup>36</sup> Ne zacá uca ni ti iree ni casi cá lu Xqui'chi Dios ra na: "Qué zaluuza dxita stibe."

<sup>37</sup> Laca nuu sti lugar ra na: "Zuuya dxí cabe ni bindizi cabe lanza."

### *Ra bigaachi Jesús*

(Mt. 27.57-61; Mr. 15.42-47; Lc. 23.50-56)

<sup>38</sup> Guca si nga la? uyé José de Arimatea, yenaba permisu ra nuu Pilatu pa ziné cuerpu sti Jesús. Naca José discípulu sti Jesús peru naga'chi partí ridxibi ca judíu. Ne uná Pilatu bidii ni laabe, para yendete be ni.

<sup>39</sup> Laca uyé Nicodemo yené bia' ti gayuua libra mirra nucha áloes, dxa Nicodemo uyé ra nuu be lu gueela que.

<sup>40</sup> Ucuaa cabe xcuerpu Jesús bichenda cabe ti lari ne guluu cabe caadxi guixi

ni rindá' naxhi ndaani lari que. Para bicaachi cabe laa casi rigaachi ca judíu.

<sup>41</sup> Nuu ti le' de yaga guie' ra ucuá Jesús lu cruz que, ne ndaani le' que nuu ti ba' cubi iruti huaya'ta ndaani'.

<sup>42</sup> Raqué gula'qui cabe Jesús partí ma chi uzulú dxi enda riziila'dxi', ne nuu ba' que gaxha.

## 20

### *Ra bibani Jesús*

(Mt. 28.1-10; Mr. 16.1-8; Lc. 24.1-12)

<sup>1</sup> Domingu ca'ru guiaba chaahui biaani', biree María Magdalena uyé ra ba' que. Ne ora yendá be biiya be ma biree guie ye'gu ruaa ba' que.

<sup>2</sup> Para biree uxooñe be uyé be ra nuu Simón ne sti discípulu ni nadxii Jesús que, ne na be rabi be laaca':

—Ma ulee cabe Señor de ndaani ba', ne qué ganna du paraa gula'qui cabe laa.

<sup>3</sup> Oraque biree Pedru ne sti discípulu que, ze ca ra ba'.

<sup>4</sup> Iropa ca bixooñe ca', peru sti discípulu que yendá primeru.

<sup>5</sup> Para guta gudaa, biiya ca lari nexhe raqué peru qué ñuu ndaani ba' que.

<sup>6</sup> Bidxiña guxooñe Simón Pedru, beda nanda laabe, ne biuu ndaani ba' que, biiya nexhe ca lari que raqué.

<sup>7</sup> Peru adxé ladu nexhe bayu ni birenda ique be que, cá bieque.

<sup>8</sup> Oraque ru' biuu sti discípulu ni yendá primeru que, biiya ne bini cre.

<sup>9</sup> Ca'ru guiene cabe ni cá lu Xqui'chi Dios ra na napa xidé guiasa be de lade gue'tu'.

<sup>10</sup> Oraque ru bigueta ca discípulu que ralidxi ca'.

*Ra biiya María Magdalena Jesús*

(*Mr. 16.9-11*)

<sup>11</sup> Peru María biaana fuera ra ba' que, cayuuna'. Idubi cayuuna guta gudaa, biyubi lú ndaani ba' que.

<sup>12</sup> Biiya chupa ángel naculari quichi' zuba ra uyuu xcuerpu Jesús, tobi neza ra guta ique be ne stobi neza ra guta ñee be.

<sup>13</sup> Oraque na ca ángel que rabi laa:

—Guna, xiñee cayuuna lu'.

Para rabi be laaca':

—Purti ziné cabe Señor stinne', ne qué ganna dia' paraa gula'qui cabe laa.

<sup>14</sup> Casi uní' be ngue, bidxigueta lú be atrá, biiya be zuhuua Jesús, peru qué ganna be pa Jesús ngue.

<sup>15</sup> Para na Jesús rabi laabe:

—Guna, xiñee cayuuna lu'. Tu ruyubu'.

Laabe zácxaxa be ni rapa raqué caní' né laabe, ne rabi be laa:

—Señor, pa lii yenéu laabe la? gudxi naa paraa gula'qui lu laabe, ti chi caa laabe.

<sup>16</sup> Para na Jesús:

—¡María!

Ne óraque ru' bidxii lú be Jesús, ne na be:

—¡Maistru!

<sup>17</sup> Oraque na Jesús rabi laabe:

—Cadi ucueeza lu naa purti ca'ru quiba ra nuu

Bixhoze'. Peru uyé ra nuu ca biche', ne gudxi laaca ma chi chiba ra nuu Bixhoze ne Bixhoze tu, ra nuu Dios stinne ne Dios stitu.

<sup>18</sup> Para biree María de Magdala, yetidxi ca discípulu ma biiya Señor, ne byuí' né laacabe cani gudxi Señor laa que.

*Bizuhuaa Jesús lade ca discípulu*

(*Mt. 28.16-20; Mr. 16.14-18; Lc. 24.36-49*)

<sup>19</sup> Domingu huadxí que da'gu ca puerta ra nuu ca discípulu purti cadxibi ca ca judíu. Ne beeda Jesús, bizuhuaa lade ca' ne na:

—Gata dxí ladxidó' to.

<sup>20</sup> Uni' si be ngue, biluí' be laaca bataná be ne xcustiá be. Oraque bieche ca ma biiya ca Señor.

<sup>21</sup> Bigueta na be rabi be laaca':

—Gata dxí ladxidó' to. Cásica biseenda Bixhoze naa la? zacaca cuseenda laatu.

<sup>22</sup> Biluxé si uní' be zaqué, bindubi be luguiá ca', ne na be:

—Laic平 Espíritu Santu.

<sup>23</sup> Ni guni perdonar tu la? zaca perdonar, peru ni qué guni perdonar tu la? ziaana stonda luguiá'.

*Jesús ne Tomás*

<sup>24</sup> Peru qué guinni di Tomás ni rabi cabe Cuachi, tobi de lade doce discípulu que, ra nuu cabe ora uyé Jesús.

<sup>25</sup> Para na ca xcaadxi discípulu que rabi laa:

—Ma bidu'ya du Señor.

Peru na:

—Pa qué guuya ndaani bataná be ra ucuá ca clavy que, ne qué cuaa bicuini naya ra ucuá ni, ne qué cuaa bata naya ti'xhi be la? qué zune cre dia'.

<sup>26</sup> Gudi'di si xhono gubidxa de ngue, nuu ca discípulu sti Jesús sti tiru ndaani yoo que. Ma ne Tomás nuu né laacabe. Da'gu ra puerta que, peru beeda Jesús ne bizuhuaa lade cabe, ne na:

—Gata dxí ladxidó' to.

<sup>27</sup> Ne óraque rabi be Tomás:

—Bichiña bicuini nou'rari', ne biiya bata naya'. Bisigaa nou' ne guluu ni cue'tixhe ri', ne cadi guiaana neu duda sínique guni cre lu'.

<sup>28</sup> Para na Tomás rabi laabe:

—¡Señor stinne' ne Dios stinne'!

<sup>29</sup> Para rabi be laa:

—Purti si biiya lu naa, nga runi bini cre lu'. Dichoso cani guni cre naa, neca sin gu'ya'.

*Ra biete xiñee ucuá gui'chi ri'*

<sup>30</sup> Stale ru milagru bi'ni Jesús nezalú ca discípulu para ihuinni tu laa. Cadi cá irá ni lu gui'chi ri',

<sup>31</sup> peru ca ndi ucuá ti guni cre tu dxandí Jesús nga ni ulí Dios, ne Xiiñi laabe, ne para gapa tu enda nabani ra guni cre tu laabe.

## 21

*Bidxiña Jesús ra nuu gadxe discípulu sti'*

<sup>1</sup> Bigueta biiya ru ca discípulu sti Jesús laa. Nuu

ca uriá ti nisa ro' rabi cabe Tiberia, ne sicarí uca ni.

<sup>2</sup> Nuu Simón Pedru, ne Tomás ni rabi cabe Cuachi, ne Natanael de Caná de Galilea, ne ca xiiñi Zebedeu, ne xhupa de ca discípulu stibe.

<sup>3</sup> Biree Simón Pedru na rabi laaca':

—Chaa chi naaze benda.

—Laadu laca ziné du lii, na ca'.

Ne uyuu cabe ndaani canuá, uyé cabe idubi gueela', peru gasti qué ninaaze cabe.

<sup>4</sup> Ma zeda yaba biaani bidxiña Jesús ruaa nisa que, peru qué ganna cabe pa laabe ni.

<sup>5</sup> Na be rabi be laaca':

—Ma unaaze tu xiixa la? amigu ca'.

—Nin tobi, na ca'.

<sup>6</sup> Para rabi be laaca':

—Lausaba starraya tu ladu derechu, zanaaze tu.

Oraque bisaba ca', ne ma qué ñanda nibee ca ni, purti dxá tipa ni de benda.

<sup>7</sup> Para na dxá discípulu ni nadxii be que, rabi Pedru:

—Señor nga.

Cadi nacu Simón Pedru lari peru ora gunna Señor ngue la? ucuua uxooñe xhaba, biaba nisa que.

<sup>8</sup> Ca xcaadxí discípulu que bichiña canuá que ruaa nisa, zeda xubi yu ca tarraya ra dxá benda que, purti cadi zitu nuu ca', bia' ti gayuua metru si de ruaa nisa.

<sup>9</sup> Ora biree cabe ndaani canuá que, biiya cabe nuu ti ludé raqué nexhe ti benda lú, ne laca nuu pan.

<sup>10</sup> Para na Jesús rabi laacabe:

—Latané caadxi benda ni unaaze tu nagasi ca.

<sup>11</sup> Oraque udxiba Simón Pedru, ulee tarraya que lu yuxi, dxá tipa ni de benda ngola, bia'si ti gayuaa cincuenta y tres benda. Ne neca stale came, peru qué nireza tarraya que.

<sup>12</sup> —Latá' gue tu, na Jesús rabi laacabe.

Ne nin tobi de laacabe qué ñuni cabe pur ninaba diidxa cabe tu laabe, partí nanna cabe Señor laabe.

<sup>13</sup> Oraque bidxiña Jesús ucuaa pan que bidii laacabe, ne zaqueca bi'ni ne benda que.

<sup>14</sup> Ndi nga raguionna tiru bidxiña Jesús ra nuu ca discípulu sti' después de bibani.

### *Jesús ne Pedru*

<sup>15</sup> Biluxe güe' si cabe, na Jesús rabi Pedru:

—Simón, xiiñi Jonás, nadxiu naa jma que irá xixé la?

—Nadxiee lii, Señor, lii nannu nadxiee lii, na Pedru.

—Gupa ca dendxu huiini stinne', na be.

<sup>16</sup> Bigueta rabi be Pedru:

—Simón, xiiñi Jonás, nadxiu naa la?

—Nadxiee lii, Señor. Lii nannu nadxiee lii, na Pedru.

—Gupa ca dendxu stinne', na be.

<sup>17</sup> Bigueta na be:

—Simón, xiiñi Jonás, nadxiu naa la?

Ucaná ladxidó' Pedru, partí ma ne nga guionna tiru

inaba diidxa be laa pa nadxii laabe, para na:

—Señor, lii nannu irá'. Lii nannu nadxiee lii.

Oraque na be:

—Gupa ca dendxu stinne'.

<sup>18</sup> Ne gabe ca' lii, dxi nahuiini lu la? stubu gucu lu xhaba lu', ne uyé lu ratiica gucalal'dxu', peru ora ma bio'xho lu la? zusigaa nou', ne stobi tu ugacu lii lari ne ziné lii ra qué racala'dxu cheu'.

<sup>19</sup> Ra uní' be zacá, bisihuinni be xi enda guti chi usisaca né Pedru Dios. Biluxe si uni' be nga rabi be Pedru:

—Dananda naa.

### *Jesús ne discípulu ni nadxii*

<sup>20</sup> Ora bidxigueta lú Pedru biiya nanda dxa discípulu ni nadxii Jesús laa que, dxa ni guidixhe ique lu xi'que Jesús ra cayó xhi cabe ne unaba diidxa tu chi utoo laabe que.

<sup>21</sup> Oraque biiya dxí Pedru laa ne na rabi Jesús:

—Señor, laga ndi ya'. Xi gaca xa de laa.

<sup>22</sup> Para na Jesús:

—Pa acaladxe guiaana be de dxi guenda la? cadi xcuenta lu'. Dananda naa lii.

<sup>23</sup> Ne bireeche diidxa lade ca hermanu na Jesús qué zati discípulu que, peru cadi na di Jesús qué zati be, sínueque na pa acala'dxi guiaana be de ora gueeda la? cadi xcuenta Pedru.

<sup>24</sup> Ne discípulu que nga cayuí' irá ndi', ne cucaa irá ni, ne nanna du dxandí irá ni na be.

25 Nuu ru stale ni bi'ni  
Jesús, pa nicá cada tobi ni  
la? rabe nin qué nugaanda  
guidxilayú nidxá irá gui'chi  
ra nicá ni.

## NI BI'NI CA APÓSTOL

*Bidii stiidxa Jesús  
zuseenda Espíritu Santu*

<sup>1</sup> Teófilu xhamigua', lu primé gui'chi bicaa lú lu que bizeete irá ni bi'ni Jesús ne ni bisiidi', dede dxi bizulú xhiña',

<sup>2</sup> para dxi ze ibá'. Peru laga nuu ru be ndaani guidxilayú ulí be ca apóstol ne gudxi Espíritu Santu laabe xi gabi be laaca guni ca'. Oraque ru ze be ibá'.

<sup>3</sup> Guti be peru dxi ma bibani be bidxiña be ra nuu ca apóstol. Biaana né be laaca cuarenta dia, ne bilui' be laaca dxandí nabani be, ne bisiidi be laaca de enda runi mandar sti Dios.

<sup>4</sup> Ne laga nuu be lade ca', gudxi be laaca cadi iree ca de ndaani guidxi Jerusalén, na be:

—Lacueza gueeda ni bidii stiidxa Dios useenda', ni maca gudxe laatu que.

<sup>5</sup> Purti uluu nisa Juan binni, peru ne nisa si, peru laatu zacaa tu Espíritu Santu casi ñaca ñuu nisa tu pur Espíritu que, ne ma zeda dxiña dxi aca ni.

*Ra ze Jesús ibá'*

<sup>6</sup> Tobi de ca dxi que ra nuu né ca Jesús tobi si, na ca rabi ca laabe:

—Señor, ñee yanna nga quixhu guni mandar ca binni Israel sti tiru la?

<sup>7</sup> Para rabi be laaca':

—Bixhoze sia' nanna padxí ne pora gaca ni gudixhe gaca'. Laatu la? cadi nexhe di ganna tu ni.

<sup>8</sup> Peru ora ma ucuaa tu Espíritu Santu la? zapa pe tu enda nandxó' sti Dios, ne óraque ma zanda iree tu, chi güi tu stiidxa ndaani guidxi Jerusalén ne idubi Judea ne Samaria ne idubi naca guidxilayú.

<sup>9</sup> Biluxe si uní be nga bisasa be idubi cayuuya dxí ca laabe ne biseegu ti za laabe ne ma qué ñuuya ru ca laabe.

<sup>10</sup> Peru laaca biaana ca cayuuya dxí ca ibá' ra ze be que, mala zuhuaa chupa hombre nacu lari quichi cue' ca',

<sup>11</sup> na rabi laaca':

—Binni Galilea ca', xiñee ndi cayuuya dxí tu ibá'. Jesús ni bi'ya tu ze ibá' ca la? zacaca zabigueta be clásica bi'ya tu ze be ca.

*Guyuu Matías jlugar Judas*

<sup>12</sup> Oraque ru biree cabe de lu dani Olivo, bigueta cabe Jerusalén. Cadi zitu ni, bia' ti kilómetru si.

<sup>13</sup> Ne ora biuu cabe ndaani guidxi que uyuu cabe ndaani ti yoo rairopa pisu. Raqué riaana cabe: Pedru, Jacobo, Juan, Andrés, Felipe, Tomás, Bartolomé, Mateu, Jacobo xiiñi Alfeu, Simón ni uyuu lade ca cananista, ne Judas bi'chi Jacobo.

<sup>14</sup> Irá cabe nuu cabe tobi si ne cadi cayaana dxí cabe de iní né cabe Dios, laacabe ne

caadxi gunaa ne María jñaa  
Jesús ne ca bi'chi Jesús.

<sup>15</sup> Lade ca dxi que nuu  
cabe irá cabe tobi si, bia' ti  
gayuua grande cabe. Oraque  
biasa Pedru bizuhuaa lade  
cabe ne na:

<sup>16</sup> —Hermanu ca', chiqué  
uní' David ni gudxi Espíritu  
Santu laa de Judas, Judas  
ni uzá niru lú cani yenaaze  
Jesús que. Ne yanna ma uca  
irá ni uní' David que.

<sup>17</sup> Guca Judas tobi de laanu  
ne bini né laanu dxiiña'.

<sup>18</sup> Peru ra bitoo be Jesús  
ucuua be vueltu, ne bixuí' né  
vueltu que ti layú. Ne raqué  
biaba rilú be, dede ureza  
ndaani be bireeche doo xqui'  
be ne guti be.

<sup>19</sup> Ora gunna ca binni  
Jerusalén ni la? ulee lá ca  
layú que Acéldama. Stiidxa  
ca la? riní' ni Layú de Rini.

<sup>20</sup> Maca cá ni lu Salmo:  
Guiaana stubi lidxi be  
ne iruti cueza ndaani ni.  
Ne laca cá:  
Icaa stobi xhiiña be.

<sup>21-22</sup> Nga runi cayabe laatu,  
hermanu ca', naquiiñe cui  
nu stobi chu' jlugar be para  
sa né laanu güi né binni  
dxandí biiya ma bibani Señor  
Jesús de lade gue'tu'. Gaca  
ni tobi ni uzá né laanu dxi  
nuu Jesús lade nu, de dxi  
guluu nisa Juan laabe para  
dxi biasa be lade nu ze be  
ibá'.

<sup>23</sup> Para ulí cabe chupa: tobi  
lá José ni rabi cabe Barsabás  
ne Justu, ne stobi lá Matías.

<sup>24</sup> Ne óraque uní' né cabe  
Dios, na cabe:

—Señor, lii runibiá' lu ladx-  
idó' irá binni. Bilui' laadu

uná de iropa hombre ri ma  
ulí lu

<sup>25</sup> para gaca apóstol ne  
guni dxiiña bisaana Judas.  
Purti Judas ma ze jlugar.

<sup>26</sup> Oraque biyubi cabe tu  
luguiá guiaba suerte que ne  
biaba ni luguiá Matías. Para  
biuu lade once apóstol que.

## 2

### *Ra beeda Espíritu Santu*

<sup>1</sup> Runi ca judíu ti saa, rabi  
cabe ni Pentecostés. Ne dxi  
biaba laní que nuu ca xpinni  
Cristu que tobi si lugar.

<sup>2</sup> Mala uxidxi biete xiixa de  
xaibá' casi ora rundubi ti bi  
yooxho'. Bidxá ni ndaani yoo  
ra nuu cabe que.

<sup>3</sup> Ne biiya cabe casi ludxi  
bele. Bireeche ni luguiá cada  
tobi de laacabe.

<sup>4</sup> Ne bidxá ladxidó' cabe de  
Espíritu Santu. Bizulú uní'  
cabe adxé adxé idioma casi  
bisiní' Espíritu Santu laacabe.

<sup>5</sup> Dxi uca ni la? nabeza  
caadxi binni Jerusalén,  
caadxi judíu ni beeda de  
adxé adxé guidxi, ne nabé  
rie ca yu'du'.

<sup>6</sup> Ora bina diaga ca ruidu  
que urí zisi ca ra rí ca xpinni  
Cristu que. Qué ganna ca  
xi cayaca partí cada tobi de  
laaca cayuna diaga diidxa  
gule né.

<sup>7</sup> Bidxagayaa ca ne unaba  
diidxa saa ca na ca':

—Nee cadí binni Galilea  
irá binni ri la?

<sup>8</sup> Peru cayuna diaga nu di-  
idxa gule né pe nu. Xii ndi  
cayaca pue.

<sup>9</sup> Ne cadí tobi si xquidxi  
cani nuu rari'. Nuu binni

Partia, binni Media ne binni Elam ne binni Mesopotamia ne binni Judea ne binni Capadocia ne binni Ponto ne binni Asia

<sup>10</sup> ne binni Frigia ne binni Panfilia ne binni Egipto ne binni Africa ni nabeza cherica de Cirene, ne laca nuu binni Roma. Caadxi de laaca judíu pe laaca casi laanu, ne xcaadxi la? cadí judíu peru ma rie yu'du stinu.

<sup>11</sup> Laca nuu binni Creta ne binni Arabia. Peru irá nu cayene nu ni caní' cabe ri' de irá enda nandxó' ni bi'ni Dios, purti cayuna diaga nu ni diidxa gule né pe nu.

<sup>12</sup> Cadxagayaa ca binni que, ne qué ganna ca xi cayaca. Canaba diidxa saa cabe, na cabe:

—Xii ndi cayaca pue.

<sup>13</sup> Peru nuu tu bi'ni burla, ma na naxudxi ca xpinni Cristu que.

*Ni gudxi Pedru ca binni que*

<sup>14</sup> Oraque biasa Pedru bizuhuaa, laa ne sti once apóstol que, ne uní' ne gana, na:

—Hombre de Judea ca', ne cani nabeza Jerusalén, laucaa diaga ni chi tidxe laatu ri'

<sup>15</sup> Cadi naxudxi di ca binni ri' casi na tu ca, purti deru las nueve ndi',

<sup>16</sup> sínunque cayaca ni bicaa profeta Joel chiqué ra na:

<sup>17</sup> Na Dios:

"Zadxiña dxi ucheeche Espíritu stinne luguiá stale binni.

Zusinié ca xiñi gaana tu ne ca xiñi dxaapa tu,

ne zuuya cani nahuiini xiixa casi ñaca lu bacaanda', ne zanié nia ca binni gola lu bacaanda'.

<sup>18</sup> Ca dxi que zucheeche Espíritu stinne luguiá cani runi xhiiña', hombre ne gunaa, ne zaní' ca ni gabe laaca'.

<sup>19</sup> Zune stale enda nandxó' ibá', ne zahuinni seña guidxilayú de rini ne bele, ne zasa gu'xhu'.

<sup>20</sup> Zaca hui lu gubidxa ne zaca beeū naxiñá rini dxi mayaca idxiña dxi udixhe Dios.

Zaca stale cosa de enda ridxagayaa dxi que, ne zusihuinni Dios enda nandxó' stí'.

<sup>21</sup> Ne irá ni inaba gacané Dios laa la? zalá."

<sup>22</sup> Yanna laucaa diaga ni chi tidxe laatu ri', binni Israel ca'. Chi güe nia laatu stiidxa Jesús de Nazaret. Rihuinni Dios biseenda laabe purti laaca tu nanna tu ucané Dios laabe bi'ni be stale milagru ne cosa de enda ridxagayaa ne bisihuinni be seña nezalú tu.

<sup>23</sup> Maca nanna Dios xi chi aca be, ne laatu bi'ni tu ni guidixhe Dios gaca que. Unaaze tu laabe, bidii tu laabe ucaa ca binni malu laabe lu cruz. Ne zacá laatu biiti tu laabe.

<sup>24</sup> Peru bisibani Dios laabe, ulee laabe lu ná enda guti, purti qué ñanda ñaana né enda guti laabe.

<sup>25</sup> Ndi nga ni uní' David chiqué, ne casi ñaca Jesús caní' ni:

Nanna dxi'che qué rusaana  
Dios naa.

Nuu be para gacané be naa ti  
cadi chuaa xizaa.

<sup>26</sup> Nga runi bidxá ladxiduá'  
de enda nayeche'  
ne biree diidxa sicarú de  
ruaa'.

Neca gate peru nanna  
dxi'che zandisa be  
naa.

<sup>27</sup> Purti qué zusaana be  
naa lade gue'tu', ne  
qué zudii be lugar  
guiu'dxu cuerpu sti  
Xiiñi be ni runi ni na  
be.

<sup>28</sup> Bilui' be naa neza enda  
nabani,  
ne nabé rieche partí nuu né  
be naa.

<sup>29</sup> Biche ca', irá nu nanna  
nu guti bixhoze gola nu  
David, ne bigaachi', ne nuu  
ru xpa' be rarí de yanna.

<sup>30</sup> Peru guca be profeta, ne  
bilui' Dios laabe ni chi gaca  
ru' ne bidii stiidxa laabe de  
lade xfamilia be zaree tobi ni  
cui de rey casi urí be.

<sup>31</sup> Ne casi ñaca biiya be ra  
bibani Cristu ne uní' be qué  
ziaana di lade gue'tu' ne qué  
ziu'dxu cuerpu sti'.

<sup>32</sup> Racá cuzeete be Jesús ni  
undisa Dios de lade gue'tu',  
ne laadu bidu'ya du guca ni.

<sup>33</sup> Undisa Dios laabe ne  
bicuí laabe cue' ne bidii  
laabe Espíritu Santu casi  
gudxi laabe zuni. Ne yanna  
ma biseenda be Espíritu  
Santu que rarí'. Nga nga ni  
cayuuya tu ne cayuna diaga  
tu ca.

<sup>34</sup> Purti qué nigui'ba David  
ibá', peru laa pe uní':  
Na Dios rabi Señor stinne':  
"Gurí cuee'

<sup>35</sup> dede ora ma gudixhe dxie  
cani nanala'dxi lii xa ñee lu'."

<sup>36</sup> Yanna laganna dxichi,  
binni Israel ca', Jesús ni bi  
caa tu lu cruz que nga ma  
bi'ni Dios xaíque sti irá', ne  
ma bilui' laanu laabe nga  
Cristu ni ulí que.

<sup>37</sup> Ora bina diaga cabe  
xi na Pedru, ucaná ladxidó'  
cabe ne rabi cabe Pedru ne  
xcaadxi apóstol que:

—Yanna xi guni du ya',  
bichi ca'.

<sup>38</sup> Para na Pedru rabi laa  
cabe:

—Lainaba perdón Dios ne  
lachuu nisa para ihuinni ma  
xpinni Cristu laatu. Zacá  
zaca perdonar ni huachee tu  
ne zudii Dios laatu Espíritu  
Santu.

<sup>39</sup> Purti laatu nexhe icaa  
tu Espíritu Santu, laatu ne ca  
xiiñi tu ne irá ni nuu zitu,  
cani cuidxi Señor Dios stinu  
che ra nuu.

<sup>40</sup> Byuí' né ru Pedru laa  
cabe stale diidxa ne bilidxe  
laacabe, ne na rabi laacabe:

—Lauyubi ulá Dios laatu  
de lade ca binni nuu yanna  
ri', ti cadi initilú tu ra chi  
initilú cabe.

<sup>41</sup> Ne cani ucuaa stiidxa be  
la? uyuu nisa, ne bia' chonaa  
mil binni bini cre Cristu dxi  
que.

<sup>42</sup> Ne irá cabe yenanda  
cabe ni bisiidi ca apóstol, ne  
uyuu cabe tobi si, tobi si uní'  
né cabe Dios, ne tobi si gudó  
cabe pan casi bisaana Señor  
guni cabe.

*Modo bibani ca xpinni  
Cristu*

<sup>43</sup> Irá binni guidxi que bidxagayaa ra biiya irá milagru ne seña ni bi'ni ca apóstol pur enda nandxó' sti Dios.

<sup>44</sup> Tobi si uyuu irá cani bini cre Cristu ne tobi si gupa ca stica'.

<sup>45</sup> Bitoo cabe layú stícabe ne irá ni napa cabe ne biaazi ni lú irá cabe. Cada tobi gucuua bia' caquiene'.

<sup>46</sup> Irá dxi rie cabe ra yu'du ro' ne de raqué riree cabe ritó cabe gueta, caadxi caadxi ralidxi cada tobi. Tobi si nuu cabe ne nabé rieche cabe. Iruti nudxiiba laca laa,

<sup>47</sup> sínunque irá cabe bisisaca cabe Dios. Ne irá binni guidxi que uyuula'dxi modo cayuni cabe. Ze dxi jma rusi zidale cabe partí culá Señor stale binni ne irá ca cayuu ca lade cabe.

### 3

#### *Ra bianda ti ñee chiita*

<sup>1</sup> Ti dxi bia' las tres biree Pedru ne Juan, ze ca ra yu'du ro' partí ngue nga ora nexhe chi iní' né ca judíu Dios.

<sup>2</sup> Ra puerta yu'du que ribí tobi hombre rinaba guna. Irá dxi risaana binni laabe raqué partí nachiita ñee be dede dxi gule be, ne rucuí ca laabe ra puerta lá Sicarú que.

<sup>3</sup> Ora bi'ya be ziyuu Pedru ne Juan ndaani yu'du', bisi-gaa ná be lú ca', canaba be laaca guna.

<sup>4</sup> Biiya dxí ca laabe para na Pedru rabi laabe:

—Biiya dxí laadu.

<sup>5</sup> Oraque biiya dxí be laaca'. Cabeza be udii ca laabe xiixa.

<sup>6</sup> Para na Pedru rabi laabe: —Qué gapa vueltu udiee lii, nin plata nin oro, peru ni zanda gune la? zune para lii. Pur enda nandxó' sti Jesucristu de Nazaret, cayabe lii guiasa lu', sa lu'.

<sup>7</sup> Ne unaaze Pedru ná be ladu derechu undisa laabe. Oraqueca uyuu stipa ñee be.

<sup>8</sup> Biasa uxooñe be ne uzá be. Biuu né be laaca ndaani yu'du', canazá be, canachesa be, cisisaca be Dios.

<sup>9</sup> Irá binni nuu raqué biiya canazá be cisisaca be Dios.

<sup>10</sup> Ne nabé bidxagayaa ca' ne bidxbibi ca pur ni guca be que. Partí binibí' ca laabe ne nanna ca laabe nga ni ribí ra yu'du ro', rinaba guna ra puerta lá Sicarú que.

*Ni uní' Pedru ndaani Corredor sti Salomón*

<sup>11</sup> Qué niladi be de Pedru ne Juan, ne bidxagayaa irá binni que, ne gurí zisi ca laacabe ra nuu cabe ndaani corredor ni rabi cabe Corredor sti Salomón que.

<sup>12</sup> Ora bi'ya Pedru rí irá binni que laaca', na:

—Binni Israel ca', xiñee cadxagayaa tu ne cayuuya dxí tu laadu, casi ñaca laadu bisianda du hombre ri' pur enda nandxó' stidu o partí jma gaxha canazá du de Dios. Cadi zacá di nga laani,

<sup>13</sup> sínunque uca ni pur enda nandxó' sti Jesús, dxa ni bitidi tu lu ná Pilatu chiqué. Peru yanna ma bisisaca Dios laabe, Dios sti ca bixhoze gola nu Abraham ne Isaac ne Jacob. Dxi unaaze tu laabe

que, qué niná tu nundaa Pi-latu laabe, neca ucalá'dxi'.

<sup>14</sup> Qué niná tu nilaa tobi ni nacha'hui', ni qué huayuni gasti', laga unaba tu ilaa tobi ni huayuuti binni.

<sup>15</sup> Ne zacá biiti tu ni rudií enda nabani, peru undisa Dios laabe de lade gue'tu'. Nanna du dxandí ni partí bidu'ya du laabe nabani be.

<sup>16</sup> Ne pur enda nandxó' stibe uyuu stipa ñee hombre ri', ne bianda chaahui partí runi cre du laabe. Runibiá'tu laa ne nezalú irá tu bianda.

<sup>17</sup> Biche ca', nanna bi'ní tu irá nga partí qué ganna tu xi cayuni tu, laatu ne ca xaíque stitu.

<sup>18</sup> Peru maca uní Dios chiaca ni zacá, ne gudxi ni binni de ruaa irá ca profeta ni bizeete napa Cristu xidé acaná. Ne yanna ma bi'ní be ni.

<sup>19</sup> Nga runi cayabe laatu, lainaba perdón Dios, laudxi lú jneza ti ixá stonda tu ne zacá zusieche be ladxitdó' to,

<sup>20</sup> ra useenda be Jesús ra nuu tu sti tiru, ne nga nga Cristu ni ulí be gueda ulá laatu.

<sup>21</sup> Peru napa Cristu xidé guiaana ibá' dede ora ma gudixhe chaahui Dios irá ni naquiiñe gaca' casi uní de ruaa ca profeta sti dede ma xadxí.

<sup>22</sup> Purti na Moisés rabi ca bixhoze gola nu chiqué: "De lade binni laanu zandisa Dios ti profeta, ne laucaa diaga laabe irá ni gabí be laatu.

<sup>23</sup> Purti irá ni qué ucaa diaga laabe la? zaxá lá de lade

binni Israel ne zanitilú."

<sup>24</sup> Irá ca profeta uyuu chiqué, de Samuel ne cani beda nanda ru', irá ca bizeete ca de ca dxi ri'.

<sup>25</sup> Ne de ruaa ca profeta que, bidii stiidxa Dios ca bixhoze gola nu, ne cadi laasi ca' sínuque ne laatu partí laatu nga xiiñi ca'. Ne laca uní né be laatu ra na be rabi be Abraham: "Pur Xiiñi lu ziuu irá binni guidxilayú ndaaya".

<sup>26</sup> Ne dxi ma undisa be Xiiñi be que, nirudó' ra nuu tu biseenda be laa para uxhele laatu de enda ruchee ne nga nga ndaaya que.

## 4

*Ra zuhuua Pedru ne Juan nezalú justicia*

<sup>1</sup> Cayuí' né ru Pedru ne Juan ca binni que diidxa ora biuu ca sacerdote ne xaíque sti cani rapa ra yu'du ro', ne ca saduceu.

<sup>2</sup> Cadxiichi ca xiñee cusidi cabe binni zabani gue'tu partí bibani Jesús.

<sup>3</sup> Ne unaaze ca laacabe biseguyoo ca laacabe. Ne biaana cabe raqué gueela que, partí ma huadxí ngue.

<sup>4</sup> Peru stale de cani bicaa diaga laacabe bini cre, bia' gaayu mil hombre sin igaba gunaa.

<sup>5</sup> Sti dxi que guca ti junta Jerusalén. Bidxiña ca xaíque sti guidxi que ne ca xaíque sti ca sacerdote ne ca maistru de ley,

<sup>6</sup> ne Anás sacerdote gola ne Caifás ne Juan ne Alejandru

ne irá ca familia sti sacerdote gola.

<sup>7</sup> Para bisenda caa cabe Pedru ne Juan, bishuhuaa cabe laaca galahui' ne rabi cabe laaca':

—Tu gudxi laatu guni tu ni cayuni tu ri' o tu biseenda laatu guni tu ni.

<sup>8</sup> Dxá ladxidó' Pedru de Espíritu Santu para na rabi laacabe:

—Laucaa diaga, xaíque sti guidxi ne xaíque sti ca sacerdote.

<sup>9</sup> Yáquexa yanadxí canaba diidxa tu laadu ximodo ucané du hombre nachita ñee ri', o ximodo bianda be la?

<sup>10</sup> zabi du ni laatu para ganna tu, laatu ne idubi naca guidxi Israel. Jesucristu ni bicaa tu lu cruz que, undisa Dios laa de lade gue'tu', ne laabe nga bisianda be hombre zuhuuaa lú tu ri'.

<sup>11</sup> Ni bi'ni tu Jesús ca zeda gaca casi ñaca nusa'bi tu ti guie ra cucuí tu yoo, ne nidxiña dxi ma guie que pe ninaaze yoo que. Purti yanna ma bidxiiba Dios laabe.

<sup>12</sup> Ne laasi be zanda ulá be laanu, purti iruti ru stobi ndaani guidxilayú ni huaguixhe Dios ulá binni, sínueque laasi be.

<sup>13</sup> Ora bi'ya cabe cadi cadxibi Pedru ne Juan para iní', ne nanna nda cabe huaxié' napa ca scuela ne iruti naca ca la? nabé bidxagayaa cabe. Ne bietenala'dxi cabe uzá né ca Jesús.

<sup>14</sup> Peru qué ñanda niní cabe gasti' purti zuhuuaa dxa hombre ni bianda que raqué.

<sup>15</sup> Oraque gudxi cabe laaca iree ca de raqué, para uní stiidxa cabe laasi cabe,

<sup>16</sup> na cabe:

—Xi guni né nu ca hombre ri pue, purti dxandí milagru ni bi'ni cabe ca, ne irá binni Jerusalén nanna ni. Qué zanda gabi nu cadi dxandí ni.

<sup>17</sup> Peru para ma cadi ireeche ru ni lade binni la? uchibi nu laacabe tí ma cadi lica uezete ru cabe lá Jesús.

<sup>18</sup> Para uridxi cabe laaca sti tiru ne biinda cabe lú ca ma cadi usiidi ca stiidxa Jesús nin uezete ca lá.

<sup>19</sup> Para na Pedru ne Juan rabi laacabe:

—Laguuya si laatu pa jneza nezalú Dios uzu'ba du stiidxa tu ne cadi uzu'ba du stiidxa Dios.

<sup>20</sup> Purti qué zanda usaana du de güi du ni bidu'ya du ne ni bina diaga du.

<sup>21</sup> Bichibi si cabe laaca', bindaa cabe laaca purti qué ñanda ñuniná cabe laaca pur irá binni que. Irá cabe cusisaca cabe Dios pur ni guca que,

<sup>22</sup> purti ma napa hombre ni bianda que jma de cuarenta añu.

*Ra caní' né ca xpinni Dios laa*

<sup>23</sup> Biree si Pedru ne Juan biyubi ca ra nuu ca xcadxi de laaca que ne byui' né cabe laaca xi na ca xaíque sti ca sacerdote ne ca xaíque sti guidxi.

<sup>24</sup> Ora bina diaga ca xi na cabe la? irá cabe tobi si uní' né cabe Dios na cabe:

—Dios, lii runi mandar lu irá'. Lii bizá' lu ibá' ne guidxilayú ne nisadó' ne irá ni nuu ndaani cani.

<sup>25</sup> Ne laca lii uní' lu ra bisiní' Espíritu Santu David ni bi'ni xhiiña lu', ra na:  
Xiñee cayasa cani cadi judíu, caguixhe ca guni ca ni qué zanda guni ca'.

<sup>26</sup> Uyuu ca rey de guidxilayú tobi si,  
laaca ne ca xaíque sti ca guidxi,  
para bicaa lú ca Dios ne Cristu ni ulí be.

<sup>27</sup> Ne dxandí zacá pe nga uca ni ndaani guidxi ri'. Herodes ne Poncio Pilatu ne cani cadi judíu ne ca judíu, irá ca uca ca tobi si uyé ca luguiá Jesús Xiiñi lu ni nayá ladxidó', ni ulí lu que.

<sup>28</sup> Ne zacá bi'ni cabe irá ni maca gudixhe lu gaca'.

<sup>29</sup> Yanna, Señor, biiya modo racala'dxi cabe uchibi cabe laadu para guiaana dxí du, ne ucané laadu, cani cayuni xhiiña lu', para güi du stiidxa lu sin idxibi du.

<sup>30</sup> Ne laga cayuni du ni, lii gudixhe ná luguiá cani huará para guianda ca', ne ucané laadu guni du milagru ne seña pur enda nandxó' sti Jesús Xiiñi lu ni nayá ladxidó'.

<sup>31</sup> Ora biluxe uní' né cabe Dios, biniibi dxacha ra nuu cabe que ne bidxá ladxidó' cabe de Espíritu Santu ne jma rusi ma qué nidxibi cabe byui' cabe stiidxa Dios.

*Tobi si naca ca xpinni Cristu*

<sup>32</sup> Stale binni ma runi cre Dios, ne irá ca nuu ca tobi si. Tobi si ni caní' ique cabe, tobi si ni racala'dxi cabe. Ne iruti cadi caní' sti si ni napa, sínueque sti irá cabe ni.

<sup>33</sup> Cadi cayaana dxí ca apóstol de güi né ca binni dxandí biiya ca ma bibani Señor Jesúz, ne nabé cahuinni enda nandxó' sti Dios luguiá ca', ne caguu Dios ndaaya irá ca'.

<sup>34</sup> Nga runi nin tobi de laa-cabe qué ñaadxa gasti partí irá cani napa layú ne yoo bitoo cani ne bedané ca saca ni,

<sup>35</sup> gudixhe ca xa ñee ca apóstol para biaazi ni lu cada tobi bia' caquiiñe'.

<sup>36</sup> Lade cabe uyuu tobi lá José. Ulee lá ca apóstol laabe Bernabé. Stiidxa cabe rini' ni Tobi ni Rusieche'. Binni Chipre laabe, ne za be de Leví.

<sup>37</sup> Gupa be tindaa layú. Bitoo be ni ne bedané be saca ni, gudixhe be xa ñee ca apóstol.

## 5

*Ananías ne Safira*

<sup>1</sup> Peru uyuu stobi hombre lá Ananías. Laa ne Safira xheela bitoo ca ti layú.

<sup>2</sup> Ulee be tindaa lú ni ne yené be ni ra nuu ca apóstol, gudixhe be ni xa ñee ca'. Ne nanna xheela be xi bi'ni be.

<sup>3</sup> Para na Pedru rabi laabe:  
—Ananías, xiñee bidiiu lugar chu' binidxaba ndaani ladxidó' lo para usiguiiu

Espíritu Santu ne guiaana neu tindaa lu ni bitoo lo ca.

<sup>4</sup> Dxi napu ni, ñee cadi stiu' ni la? Ne dxi ma bitoo lo ni que, laca stiu' saca ni para ñuni neu ni racala'dxu'. Xiñee canatidi lu xquenda biaani lu gu'nuzacá. Cadi binni di nga ucalá'dxu nusiguiu', sínue que Dios.

<sup>5</sup> Ora bina diaga Ananías ni na Pedru que, biaba guti. Nabé bidxibi irá cani gunna ni.

<sup>6</sup> Ne bidxiña caadxi hombre huiini', ucuua ca laabe, bichenda ca laabe lari, para yeucaachi ca laabe.

<sup>7</sup> Bia' chonna hora de ngue za xheela be, biuu. Peru qué ganna xi ma guca.

<sup>8</sup> Para na Pedru rabi laa:

—Ñee bia' ri bitoo to layú stitu la?

—Bia' cá, na.

<sup>9</sup> Oraque na Pedru:

—Xiñee uca tu tobi si para gu'ya tu pa zanda usigui tu Espíritu sti Dios. Biaa gu'yuma zeda yuu cani yeucaachi xheelu'. Ne laca ziné ca lii.

<sup>10</sup> Oraqueca biaba be xa ñee Pedru, guti be. Ora biuu ca hombre huiini que, biiya ca ma guti be, para ucuua ca laabe yeucaachi ca laabe cue' xheela be.

<sup>11</sup> Nabé bidxibi ca xpinni Cristu ne irá cani bina diaga ni uca que.

### Ra uca stale milagru

<sup>12</sup> Biquiñe Dios ca apóstol para bi'ni stale milagru, ne bisihuinni enda nandxó' sti lade ca binni que. Irá cabe

ridxiña cabe ra corredor ni rabi cabe sti Salomón que.

<sup>13</sup> Ca xcaadxi binni la? bidxibi ca ñuu ca lade cabe, peru irá binni guidxi que cudxiiba laacabe.

<sup>14</sup> Ne jma rusi cadale cani runi cre Cristu, cásica hombre queeca gunaa.

<sup>15</sup> Biiya binni irá ni cayuni ca apóstol, para bizulú ca ulee ca binni huará. Nuu ni nexhe lu luuna', lu camilla. Ne udixhe ca laacabe lu calle ti ora tidi Pedru raqué, neca bandá si sti tidi luguiá cabe.

<sup>16</sup> Dede ca binni guidxi nuu gaxha Jerusalén bedané ca binni huará ne ni caguite binidxaba ique, ne irá cabe bianda cabe.

### Ra yeguyoo ca apóstol

<sup>17</sup> Peru biasa sacerdote gola, laa ne ca saduceu ni nuu né laa, bidxichi ca partíma zinanda binni ca apóstol.

<sup>18</sup> Para unaaze ca ca apóstol biseguyoo ca laacabe ndaani lidxi guiiba sti guidxi que.

<sup>19</sup> Peru lu gueela beeda ti ángel sti Dios bixhele puerta sti lidxi guiiba que, ulee laacabe ne na rabi laacabe:

<sup>20</sup> —Laché lachiuzuhsuaa ndaani yu'du ro'. Lagüi' né binni stiidxa enda nabani ni cudii Dios yanna ri'.

<sup>21</sup> Nga si bina diaga cabe biree cabe. Ne siadó' ro' biuu cabe ndaani yu'du ro', bisiidi cabe.

Laga cayaca irá nga la? gupa sacerdote gola ne cani nuu né laa ti junta, ne guridxi ca ca justicia ne irá ca binni gola sti ca judíu. Oraque biseenda cabe tu chi

ndee ca apóstol ndaani lidxi  
guiiba', guedané laaca ra  
nuu cabe.

<sup>22</sup> Peru ora yendá ca gen-  
darme que ra lidxi guiiba',  
qué nidxela ca ca apóstol,  
para bigueta ca yetidxi ca  
laacabe,

<sup>23</sup> na ca':

—Yegu chaahui lidxi gui-  
iba que yendá du, ne zuhuua  
cani cayapa ni, peru ora bix-  
hele du ni la? iruti nuu  
ndaani ni.

<sup>24</sup> Ora bina diaga sacerdote  
gola ne xaíque sti cani rapa  
ra yu'du ro' ne ca xaíque sti  
ca sacerdote xi na ca gen-  
darme que la? na ca':

—Nanna xi gueda iluxe irá  
ndi ya'.

<sup>25</sup> Peru óraque beeda tobi,  
beda tidxi laaca xi cayaca,  
na:

—Ndaani yu'du ro' nuu ca  
hombre biseguyoo to que,  
cusiidi ca binni.

<sup>26</sup> Para biree comandante  
ne ca gendarme, yecaa ca  
ca apóstol peru sin ñuniná  
ca laacabe, partí cadxibi ca  
uchá ca binni que guie laaca'.

<sup>27</sup> Bedané ca laacabe ne  
bizuhuaa ca laacabe nezalú  
ca justicia. Oraque na sacer-  
dote gola rabi laacabe:

<sup>28</sup> —Ñee cadí bidu'nda ca  
du lú tu cadí usiidi ru tu sti-  
idxa Jesús la? Yanna biaa xi  
ma bi'ni tu. Ma bichá tu sti-  
idxa be idubi naca Jerusalén  
ne cudxiiba ru sica tu donda  
luguiá du, ma na tu laadu  
biiti du laabe.

<sup>29</sup> Oraque na Pedru ne ca  
xcaadxi apóstol que:

—Jma naquiñe uzu'ba  
du stiidxa Dios que stiidxa  
binni.

<sup>30</sup> Dios sti ca bixhoze gola  
nu undisa Jesús ni biiti tu ra  
bicaa tu laa lu cruz que.

<sup>31</sup> Ma undisa Dios laabe ne  
bicuí laabe cue' para aca be  
xaíque sti irá' ne ulá be binni,  
ti pur laabe ma zanda gaca  
perdonar ca binni Israel ra  
inaba ca perdón Dios.

<sup>32</sup> Ne cayabi du laatu  
dxandí irá ndi', ne cadi laasi  
du sínuque ne Espíritu Santu  
ni rudii Dios cani ruzuuba  
stiidxa'.

<sup>33</sup> Nabé bidxiichi ca binni  
que ora bina diaga ca xi na ca  
apóstol, ne ucalá'dxi ca ñuuti  
ca laacabe.

<sup>34</sup> Peru óraque biasa tobi  
de ca justicia lá Gamaliel.  
Naca fariseu ne rusiidi ley,  
ne irá binni rucaa diaga laa.  
Bizuhuaa ne unaba iree ca  
apóstol ti ratu.

<sup>35</sup> Ne óraque na:

—Binni Israel ca', laguuya  
xii nga chi guni tu ca hombre  
ca.

<sup>36</sup> Partí chiqué biasa ti  
hombre lá Teudas, na laa  
nga tuuxa. Ne yenanda stale  
binni laa, bia' tapa gayuaa  
hombre. Peru qué nindaa de  
ngue biiti cabe laa ne birá  
xpinni bireeche, ne raqué  
biluxe ni.

<sup>37</sup> Bigueta dxi cayaca censu  
biasa stobi lá Judas, binni  
Galilea. Bitopa stale binni  
para sa nanda laa. Peru laca  
guti, ne birá xpinni bireeche.

<sup>38</sup> Nga runi cayabe laatu  
cadi guni tu ca hombre ca  
gasti'. Laudii lugar che cabe.

Purti pa binni gudixhe ni zinanda cabe ca la? qué zanda ibiá ni.

<sup>39</sup> Peru pa de Dios zeeda ni la? qué zanda di uchiá tu ni. Ne pa uyubi tu guni tu ni la? zacá zucaa lú tu Dios.

<sup>40</sup> Ne irá cabe ucuaa cabe stiidxa Gamaliel, para guridxi cabe ca apóstol, gudiñe cabe laaca' ne gudxi cabe laaca ma cadi güi ru ca stiidxa Jesús. Oraque ru bindaa cabe laaca'.

<sup>41</sup> Ne biree ca apóstol de ra nuu ca justicia que, ziyeche ca partí bidii Dios lugar usituí binni lú ca partí xpinni Jesús laaca'.

<sup>42</sup> Ne qué ñaana dxí cabe de ñui' cabe stiidxa Cristu. Irá dxi bisiidi cabe ni ndaani yu'du ro' ne ralidxi binni.

## 6

*Ra bibí gadxe acané lu xhiña Dios*

<sup>1</sup> Nabé cadale ca xpinni Cristu ca dxi que. Ne uluu cani riní' griegu xqueja cani riní' hebreu, na ca jma huaxié' ricaa ca viuda ni nuu lade ca' ora riaazi ni tidi né ca dxi.

<sup>2</sup> Para guridxi ca apóstol irá ca xpinni Cristu ne na ca rabi ca laacabe:

—Cadi jneza usaana du de güi du stiidxa Dios para idu'ya du guiaazi ni caquiiñe irá ca binni ri'.

<sup>3</sup> Nga runi hermanu ca' lacuí gadxe hombre de lade tu ni nanna binni runi jneza, ni dxá ladxitó' de Espíritu Santu, ne ni riene, usaana nu dxiiña ri lu ná ca'.

<sup>4</sup> Ne laadu qué ziaana dxí du de iní né du Dios ne de güi du stiidxa'.

<sup>5</sup> Uyuula'dxi ca binni que modo na ca apóstol gaca ni. Para ulí ca Esteban, tobi hombre ni nabé runi cre ne dxá ladxitó' de Espíritu Santu, ne laca ulí cabe Felipe ne Prócoro ne Nicanor ne Timón ne Parmenas ne Nicolás, ti binni Antioquía ni maca zinanda religión sti ca judíu ante gaca xpinni Cristu.

<sup>6</sup> Bedané cabe laaca ra nuu ca apóstol, para uní' né ca apóstol Dios ne gudixhe ná ca luguiá cabe.

<sup>7</sup> Ne ca dxi que jma rusi careeche stiidxa Cristu, ne cadale cani runi cre ndaani guidxi Jerusalén, dede stale sacerdote sti ca judíu bini cre.

*Ra bigaa Esteban*

<sup>8</sup> Nabé uluu Dios ndaaya Esteban ne ucané laabe para bi'ni be stale milagru, ne biquiñe Dios laabe para bishuinni enda nandxó' sti lade ca binni que.

<sup>9</sup> Oraque biasa caadxi binni ni rie xhiu'du cani uca esclavu chiqué. Lade cabe zeeda caadxi binni de Cirene ne de Alejandría ne de Cilicia ne Asia. Ucuaa yu né cabe Esteban de ni cusiidi'.

<sup>10</sup> Peru biseegu Esteban ruua cabe purti ucané Espíritu Santu laa uní' ne stale enda biaani'.

<sup>11</sup> Para gudixe cabe caadxi binni iní' bina diaga caguu dí Esteban Moisés ne Dios.

<sup>12</sup> Ne zacá biquiinde cabe ca binni guidxi que ne ca

xaíque stica' ne ca maistru de ley, para biasa irá ca uyé ca luguiá Esteban, unaaze ca laabe ne yené ca laabe ra nuu ca justicia.

<sup>13</sup> Ne bedané cabe caadxi cuee falsu luguiá Esteban, na ca qué riaana dxí be de cu' dí be yu'du sti Dios ne ley stica'.

<sup>14</sup> Ne laca na ca':

—Bina diaga du caní hombre ri' zuxhá Jesúz de Nazaret yu'du ro' ri', ne zuchaa ca costumbre ni guidixhe Moisés guni nu.

<sup>15</sup> Ne biiya dxí irá binni zuba raqué lú Esteban ne biiya ca casi lú ángel lú be.

## 7

*Ni uni' Esteban*

<sup>1</sup> Oraque na sacerdote gola que rabi laabe:

—Ñee dxandí irá ni na cabe ca la?

<sup>2</sup> Para na be:

—Biche ne bixhoze ca', laucaa diaga naa. Dios ni nandxó' uní' né bixhoze gola nu Abraham dxi nuu ru Mesopotamia ante chi ndeza Harán.

<sup>3</sup> Na Dios rabi laabe: "Biree de xquidxi lu', bisaana ca lisaa lú'. Uyé, naa ma ulué lii uná guidxi guiaanu'."

<sup>4</sup> Para biree be xquidxi ca caldeu, yendeza be Harán. Raqué guti bixhoze be, para bedané Dios laabe guidxi ra nabeza tu yanna ri'.

<sup>5</sup> Chiqué qué nudii Dios laabe nin tindaa layú rarí', nin bia' ra nuzuhuaa ñee be. Peru bidii stiidxa laabe zudii ni laabe ne ca xiiñi be, neca ca'ru gapa be xiiñi be chiqué.

<sup>6</sup> Ne laca gudxi Dios laabe zazá renda ca xiiñi be xquidxi binni tapa gayuua iza ne zapa ca binni que laaca de esclavu ne zuniná laaca'.

<sup>7</sup> Peru na Dios rabi laabe: "Zusaba naya cani gapa laa-cabe de esclavu ne óraque zaree cabe para gueda usisaca cabe naa rarí'."

<sup>8</sup> Bidii stiidxa Dios laabe zaca be xpinne, laabe ne ca xiiñi be, ne na rabi laabe: "Guluu seña stinne irá hombre gale lade familia stiu' para ihuinni ma xpinne laatu." nga runi dxi gule Isaac uluu be seña sti Dios laa lu xhono gubidxa. Zaqueca bini né Isaac Jacob xiiñi', ne zaqueca bini né Jacob idubi doce xiiñi', cani beda gaca bixhoze gola irá nu.

<sup>9</sup> Gupa ca xcadxi xiiñi Jacob que envidia José bi'chi ca', ne bitoo ca laabe lu binni ze Egipto, peru nuu né Dios laabe.

<sup>10</sup> Bilá laabe de irá ni beeda luguiá be. Ucané laabe para biaba be Faraón, rey de Egipto, ne para biiya Faraón pabiá' riene be. Ne bi'ni laabe gobernador de Egipto ne bisaana irá ni napa ralidxi lu ná be.

<sup>11</sup> Ca dxi que guca ti gubiña idubi guidxi Egipto ne Canaán. Nabé nagana guca ni para ca binni que, ne qué nidxela ca bixhoze gola nu ni ño ca'.

<sup>12</sup> Peru ora gunna Jacob nuu xuba Egipto la? biseenda laacabe yesí cabe xuba'.

<sup>13</sup> Ne ra iropa tiru uyé cabe gudxi José laacabe tu laa, ne gunna Faraón tu familia José.

<sup>14</sup> Para bisenda caa José bixhoze ne idubi familia sti', bia' setenta y cinco ca'.

<sup>15</sup> Zacá nga yebí' Jacob Egipto ne raqué guti'. Ne raqueca guti ca bixhoze gola nu.

<sup>16</sup> Udi'di ru stale iza para ulee cabe laaca yeucaachi cabe laaca Siquem ndaani ba' ni uzí' Abraham lu ca xiiñi Hamor.

<sup>17</sup> Peru dxi ma cadxiña dxi gaca ni bidii stiidxa Dios Abraham gaca que la? bidale ca binni Israel ndaani guidxi Egipto,

<sup>18</sup> dede ra beda tí sti rey ni qué runibiá' José.

<sup>19</sup> Udxite rey que ca binni laanu ne bininá laacabe ne bicaa laacabe usa'bi cabe ca xiiñi huiini cabe para gati ca'.

<sup>20</sup> Ca dxi que beda gale Moisés ne uyuula'dxi Dios laa. Gupa bixhoze be ne jñaa be laabe ralidxi ca chonna beeu.

<sup>21</sup> Peru dxi ma qué ñanda nucaachi ca laabe la? ulee ca laabe, ne ucuaa xiiñi Faraón laabe, bisiniisi laabe casi xiiñi'.

<sup>22</sup> Ne biziidi be irá ni nanna ca binni Egipto. Nabé bihuinni pabiá' nuu xpiaani be pur ni uní' be ne pur ni bi'ni be.

<sup>23</sup> Dxi ma napa be cuarenta añu bilui'la'dxi be chi ganna be ca binni xquidxi be, ca israelita.

<sup>24</sup> Ne ra ziganna be laaca biiya be caguiñe ti egipciu tobi de laaca'. Biuu be ucané

be binni xquidxi be gudiñe be egipciu que dede ra biiti be laa.

<sup>25</sup> Zácaxa be ñene ca binni xquidxi be ma chi iquiñe Dios laabe para ulá laaca', peru qué ñene di ca'.

<sup>26</sup> Sti dxi que yendá be ra cadinde chupa de ca binni xquidxi be. Ucaladxi be nuchiá be laaca', rabi be laaca': "Hombre ca', xiñee ndi cayuniná saa tu laatu. Laca bi'chi tu."

<sup>27</sup> Oraque bilaa ná ni caguiñe stobi que laabe ne na: "Tu gudixhe lii gacu xaíque stidu para ga'bu laadu cadi jneza cayuni du.

<sup>28</sup> O racala'dxu guuti lu naa casi biiti lu dxa egipciu que neegue la?"

<sup>29</sup> Ora bina diaga be xi na hombre que, biree be de Egipto, yendeza be xquidxi binni. Uleza be Madián ne raqué gupa be chupa xiiñi be.

<sup>30</sup> Udi'di cuarenta añu de ngue, ti dxi nuu be ndaani ti gui'xhi cue' dani Sinaí, mala biiya be cayaca bele lu ti yaga. Tihua ti ángel biete raqué.

<sup>31</sup> Bidxagayaa be ora bi'ya be ni, ne bidxiña be para gu'ya be xii ni. Oraque uní' né Dios laabe,

<sup>32</sup> na rabi laabe: "Naa nga Dios sti ca bixhoze gola lu', Dios sti Abraham ne sti Isaac ne sti Jacob." Bidxibi be dede guca dití be ne qué niná be nindisa lú be.

<sup>33</sup> Ne na Dios rabi laabe: "Ulee xquela guidi lu' purti zuhuua lu nezaluá'.

<sup>34</sup> Ma biiya pabiá' caya-caná ca xpinne ni nuu Egípto ne bina diaga cayuuna cabe. Nga runi ma biete para ula'ya laacabe. Yanna gudá' useenda lii cheu' Egípto."

<sup>35</sup> Chiqué bidxii deche cabe Moisés rabi cabe laa: "Tu gudixhe lii gacu xaíque stidu para ga'bu laadu cadi jneza cayuni du." Peru laape be gudixhe Dios de xaíque stica' para bilá be laaca', ne gucané ángel que bi'ni be ni, dxa ángel ni uní' né laabe lu yaga que.

<sup>36</sup> Bi'ni be milagru ne seña ndaani guidxi Egípto ne lu Nisadó' Xiñá' para ulee be laaca de ndaani guidxi que. Ne laca laabe bi'ni be milagru ra uzá né be laaca cuarenta añu ndaani gui'xhi'.

<sup>37</sup> Ne laca laabe nga gudxi be ca binni Israel chiqué zan-disa Dios ti profeta de lade ca casi undisa laabe, ne gudxi be laaca ucaa diaga ca profeta que.

<sup>38</sup> Ne dxi bidxiña irá ca binni que ndaani gui'xhi', ne laabe nuu be raqué. Ne laabe nga uní' né dxa ángel que lu dani Sinaí para uní' né be ca bixhoze gola nu. Ne laabe ucuaa be ca diidxa sti enda nabani ne bisaana be cani para laanu.

<sup>39</sup> Peru nin ne irá nga, qué niná ca bixhoze gola nu nu-caa diaga laabe, laga bidxii deche ca laabe, ne nisi cá ique ca ibigueta ca Egípto.

<sup>40</sup> Ne ti tiru bisaana Moisés laacabe caadxi, para rabi cabe Aarón: "Bizá' caadxi bidó' sa niru lú nu, partí

ulee si Moisés laanu Egípto. Yanna qué ganna nu xi guca be."

<sup>41</sup> Oraque bi'ni cabe ti yuze huiini ne biiti cabe mani bisiga'de cabe laa. Bieche né cabe ni bizá' cabe que.

<sup>42</sup> Peru bixeles Dios de laa-cabe. Bisaana laacabe guni adorar cabe ca luceru ni nuu ibá', casi bicaa ca profeta lu gui'chi ra na Dios:

Binni Israel ca', lácaxa biiti tu mani para nusiga'de tu naa idubi cuarenta añu uzá tu ndaani gui'xhi que.

<sup>43</sup> Laga yené tu ca bidó' ni bizá' tu para uzuxibi tu xa ñee.

Yené tu lidxi Moloc ne luceru sti Refán de dios stitu. Nga runi zabee laatu de xquidxi tu, chi ulaa laatu cherica Babilonia.

<sup>44</sup> Uzá né ca bixhoze gola nu carpa ra gupa ca ca guie ra cá ca mandamiento. Bizá' cabe carpa que casi gudxi Dios Moisés cha ni. Biluí' Dios laabe ximodo.

<sup>45</sup> Laca yené cabe ni dxi uzá niru Josué lú cabe para biuu cabe guidxi bidii Dios laacabe que. Peru para biuu cabe raqué uladxi Dios ca binni nabeza raqué. Ne zacá bi'ni cabe dede dxi beda tí rey David.

<sup>46</sup> Gunaxhii Dios laabe ne ucalá'dxi be nucuí be xhiu'du Dios sti Jacob,

<sup>47</sup> Peru qué ñanda. Sa-lomón ru' beda ucuí ni.

<sup>48</sup> Peru qué ribeza Dios ni nandxo' ndaani yu'du ni ucuí binni, casi uní' ti profeta ni na Dios:

49 Rune mandar ibá' ne guidxilayú,  
casi ñaca zuba ibá' ne naguixhe ñee guidxi-  
layú.

Xi clase ndi yoo na tu ucuí tu para naa pue.

O paraa nga na tu quixhe chaahui tu para izi-  
iladxe'.

50 Ñee cadi naa bine irá xixé ni la?

51 Peru laatu la? na Esteban rabi laacabe,—naguidxi ladxidó' to, casi binni ni qué runibiá' Dios, ne qué riná tu ucaa diaga tu stiidxa Dios. Rindee tu ca bixhoze gola tu purti nisi rucaa lú tu Espíritu Santu casi bi'ni ca'.

52 Uná de ca profeta ni qué nizabi nanda ca bixhoze gola tu ya'. Biiti cabe cani gudxi laacabe zuseenda Dios tobi ni nacha'hui'. Nga guca dxi ca'ru gueeda be. Yanna ma beeda be ne laatu bitoo to laabe ne biiti tu laabe.

53 Bidii ca ángel ley sti Dios laatu peru qué runi tu ni na ni.

### *Ra guti Esteban*

54 Ora bina diaga cabe ni na Esteban que, gudó dí laa-  
cabe dede gudó yaa cabe  
guidi ruua cabe, tantu bidxi-  
ichi né cabe Esteban.

55 Peru dxá ladxidó' Esteban de Espíritu Santu biiya dxi ibá'. Biiya enda nandxó'  
sti Dios ne biiya zuhuua Jesúscue' Dios.

56 Para na:

—Cayuuya zuxele ibá' ne zuhuua Hombre Biseenda  
Dios cue' Dios.

57 Oraque irá cabe biseegu  
cabe diaga cabe ne bicaa

cabe ridxi ne uyé cabe luguiá  
Esteban irá cabe.

58 Ulee cabe laa de ndaani  
guidxi que, ne bisigapa cabe  
xhaba cabe ti hombre lá  
Saulo, para bichá cabe guie  
Esteban.

59 Laga cuchá cabe guie  
laabe, na be:

—Señor Jesús ucuaa  
espíritu stinne'.

60 Ne bizuxibi be, bicaa be  
ridxi:

—Señor cadi udxiba lu  
donda ri luguiá cabe.

Nga si uní' be, guti be.

## 8

### *Canaladxi Saulo ca xpinni Cristu*

1-2 Uyuula'dxi Saulo ni  
bi'ni cani biiti laabe que.  
Peru undisa caadxí hombre  
cha'hui laabe, bicaachi ca  
laabe, ne biina né ca laabe.  
Ne dede dxi que bizulú uzabi  
nanda cabe ca xpinni Cristu  
ndaani guidxi Jerusalén ne  
bireeche ndase ca', ni uyé  
Judea ni uyé Samaria. Ca  
apóstol si, qué niree.

3 Ucalá'dxi Saulo nundu-  
uxe irá ca xpinni Cristu.  
Uzá yoo pur yoo ulee laa-  
cabe, hombre ne gunaa, ne  
biseguyoo laacabe.

### *Ra yendá stiidxa Cristu Samaria*

4 Peru cani bireeche que,  
irá ladu ze ca', ziyuí' ca sti-  
idxa Cristu,

5 casi Felipe uyé ti guidxi  
de Samaria ne byuí' né ca  
binni que stiidxa Cristu.

6 Bidxiña irá binni que bi-  
caa diaga laabe ne biiya ca ca  
milagru ni bi'ni be.

<sup>7</sup> Purti nuu stale binni raqué riguite binidxaba ique ne bicaa ca binidxaba que ridxi ra biree ca'. Ne bianda stale cani ma guti galaa, ne ñee chiita.

<sup>8</sup> Ne nabé bieche ca binni guidxi que.

<sup>9</sup> Uyuu tobi hombre lá Simón ndaani guidxi que. Chiqué uca be magu, ne bidxagayaa ca binni neza que irá ni bi'ni be, ne gudxi be laaca nandxó' be.

<sup>10</sup> Ne irá ca bicaa diaga ca laabe, dede cani huaxié' risaca para cani jma risaca, na ca':

—Ndi nga enda nandxó' sti Dios.

<sup>11</sup> Bicaa diaga ca laabe purti ma xadxí caguite be laaca ne irá brujería ni runi be.

<sup>12</sup> Peru dxi ma bini cre ca ni byui' né Felipe laaca de enda runi mandar sti Dios ne de Jesucristu la? uyuu nisa ca', hombre ne gunaa.

<sup>13</sup> Laca bini cre Simón ne uyuu nisa. Ne ma qué niladi ru cue' Felipe. Ne nabé bidxagayaa ra bi'ya irá seña ne milagru cayaca que.

<sup>14</sup> Ora gunna ca apóstol ni nuu Jerusalén ma bini cre binni Samaria stiidxa Dios la? biseenda ca Pedru ne Juan ra nuu cabe.

<sup>15</sup> Casi yendá Pedru ne Juan raqué unaba ca lu Dios udii Espíritu Santu laacabe.

<sup>16</sup> Purti nin tobi de laacabe ca'ru icaa cabe Espíritu Santu, nin ca'ru ganna cabe pa nuu be, sínúque uyuu nisa si cabe ra bini cre cabe Cristu.

<sup>17</sup> Ne udixhe ná Pedru ne Juan luguiá cabe para ucuaa cabe Espíritu Santu.

<sup>18</sup> Ora bi'ya Simón quixhe ná si ca apóstol luguiá ca binni que maca zic和平 ca Espíritu Santu la? ucalá'dxi nudii vueltu laacabe,

<sup>19</sup> na:

—Latané naa enda nandxó' ca, ti tutiica quixhe naya luguiá' maca zic和平 ca Espíritu Santu.

<sup>20</sup> Para na Pedru rabi laabe:

—Initilú neu vueltu stiu'. Nee nou' zanda sí cabe enda nandxó' sti Dios la?

<sup>21</sup> Qué zanda chu' lu lade du ne qué zanda gu'nu dxiiña ni cayuni du ri' purti cadi jneza ni cá ique lu nezalú Dios.

<sup>22</sup> Bisaana ni cá ique lu ca ne unaba perdón Dios tila na guni perdonar lii de ni uní i'cu ca.

<sup>23</sup> Purti ruuya dxá envidia ndaani ladxitdó' lo' ne cá lu yaga lu ná enda ruchee.

<sup>24</sup> Oraque na be:

—Lainaba lu Dios pur naa ti cadi gueeda irá ni na tu ca lugui'a'ya'.

<sup>25</sup> Biluxé byui' né si cabe binni irá ni bi'ya cabe bi'ni Señor la? bigueta cabe Jerusalén. Ne irá guidxi sti Samaria ra zidi'di cabe, ziyuí' cabe stiidxa Cristu.

*Felipe ne ti hombre de Etiopía*

<sup>26</sup> Ti dxi na ti ángel sti Dios rabi Felipe:

—Biaa uyé guete', neza zeeda cabe de Jerusalén ze

cabe Gaza, lu neza cá ndaani  
gui'xhi que.

<sup>27</sup> Para biree be ze be.  
Neza ze be que yeugaanda  
be ti hombre de Etiopía, ti  
eunuco, tobi ni risaca lade ca  
xpinni reina Candace. Rapa  
be xpidxichi reina que. Uyé  
be Jerusalén, yeusisaca be  
Dios.

<sup>28</sup> Yanna ma zibí' be, ze be  
ndaani ti carretón ziyuunda  
be ni bicaa profeta Isaías.

<sup>29</sup> Ne na Espíritu Santu rabi  
Felipe:

—Bidxiña carretón ca.

<sup>30</sup> Para bidxiña Felipe ne  
bina diaga cayuunda be ni  
bicaa profeta Isaías, para na  
rabi laabe:

—Rie'nu gou' ni cayuunda  
lu ca.

<sup>31</sup> Oraque na be:

—Ximodo ndi guiene' pa  
iruti tu usiene naa.

Ne gudxi be Felipe quiba  
cui né laabe raqué.

<sup>32</sup> Ndi nga ni na Xqui'chi  
Dios ra cayuunda be que:

Yené cabe laabe casi riné  
cabe dendxu ra chi  
gati,

ne casi qué ribidxiaa dendxu  
huiini ora ugá cabe  
guicha ladi,

zaqueca nin ti diidxa qué  
niní be.

<sup>33</sup> Gupa cabe laabe casi ni  
qué risaca  
ne bidxiiba cabe donda ique  
be sin ñuni be gastí'.  
Iruti qué zuzeete cani za de  
laabe

purti biluxe xpida be ndaani  
guidxilayú.

<sup>34</sup> Para na eunuco que, rabi  
Felipe:

—Gudxi naa tu cuzeete  
profeta Isaías rarí', de laca  
laa la? o de stobi.

<sup>35</sup> Para bizulú né Felipe ni  
cayuunda be que ne bisiene  
laabe stiidxa Cristu.

<sup>36</sup> Neza ze cabe que, zidi'di  
cabe ti ra da' nisa. Para na  
be:

—Rarí' da' nisa. Ñee qué  
zanda chuaa ni'sa la?

<sup>37</sup> Para na Felipe:

—Zanda, pa runi cre lu de  
idubi ladxidó' lo'.

Oraque na be:

—Rune cre Jesucristu nga  
Xiñi Dios.

<sup>38</sup> Oraque bicueza dxí be  
carretón que ne biete iropa  
cabe ndaani nisa, para uluu  
nisa Felipe laabe.

<sup>39</sup> Ra biree cabe ndaani  
nisu ucuaa Espíritu sti Dios  
Felipe ziné. Ma qué ñuuya ru  
be laa. Oraque biree be ze be  
nayeche'.

<sup>40</sup> Mala biiya Felipe ma  
nuu ndaani guidxi Azoto  
ne uzá byuí' stiidxa Cristu  
ndaani irá guidxi dede yendá  
Cesarea.

## 9

*Ra biree Cristu lu Saulo  
(Hch. 22.6-16; 26.12-18)*

<sup>1</sup> Cadi cayaana dxí Saulo  
de cuyubi guuti ca xpinni  
Cristu. Ngue runi uyé ra nuu  
sacerdote gola,

<sup>2</sup> yenaba gui'chi para chiné  
irá yu'du ni nuu Damasco,  
ti pa idxela hombre o gu-  
naa zinanda Cristu raqué, in-  
aaze laaca', ne guedané laaca  
Jerusalén.

<sup>3</sup> Peru ra zidxiña be Damasco, mala bizaani ti biaani de ibá' laabe.

<sup>4</sup> Biaba be layú ne bina diaga be caní' tuuxa:

—Saulo, Saulo, xiñee canazabi nanda lu naa.

<sup>5</sup> Oraque na be:

—Tu lii ya', Señor.

Para na ni caní' que:

—Naa nga Jesús ni canazabi nanda lu ca. Cayuniná lu laca lii casi runi buey ora riguu ñee punta puya.

<sup>6</sup> Bidxibi be dede uca diti be, na be:

—Xi racala'dxu gune, Señor.

Para na Señor rabi laabe:

—Biasa, uyé ndaani guidxi, ne raqué zabi cabe lii xi gu'nú'.

<sup>7</sup> Nisi biaana cá si ca hombre ziné laabe que. Cayuna diaga ca ridxi que peru cadi cayuuya ca iruti'.

<sup>8</sup> Para biasa be, bixhele lú be, peru qué ñanda ñuuya be. Oraque unaaze cabe ná be yesaana cabe laabe Damasco.

<sup>9</sup> Ne zaqué biaana be chonna gubidxa, qué ñuuya be, qué ño be, qué ñe' be.

<sup>10</sup> Nuu ti hombre runi cre Cristu ndaani guidxi que lá Ananías. Ne uní' né Señor laa casi ñaca caní' xcaanda', na rabi laa:

—Ananías.

—Rarí nuua, Señor, na be.

<sup>11</sup> Para na Señor rabi laabe:

—Biasa, uyé lu calle lá Derecha, ralidxi Judas. Yeyubi tobi hombre lá Saulo de Tarso, partí caní' né be naa,

<sup>12</sup> ne casi ñaca lu bacaanda ma biiya be tobi hombre lá

Ananías. Biuu, gudixhe ná luguiá be para bigueta uná be.

<sup>13</sup> Oraque na Ananías:

—Peru Señor, stale binni huayabi naa xi irá huayuni be cani runi cre lii ndaani guidxi Jerusalén.

<sup>14</sup> Ne dede rarí ma napa be xqui'chi ca xaíque sti ca sacerdote para inaaze be tutiica runi cre lii.

<sup>15</sup> Peru na Señor:

—Uyé partí ma ulié laabe chi güi né be ca judíu stiidxa', ne cani cadi judíu, ne ca rey.

<sup>16</sup> Ne zulué laabe pabiá' naquuiñe gacaná be ti naca be xpinne'.

<sup>17</sup> Para uyé Ananías, biuu ndaani yoo ra nuu be que ne udixhe ná luguiá be, na:

—Hermanu Saulo, Señor Jesús ni uní' né lii neza zeedu que biseenda naa ra nuu lu', ti ganda iná lu ne idxá ladx-idó' lo de Espíritu Santu.

<sup>18</sup> Ne oraqueca biaba casi jlaza lú be, ne gunda uná be ne biasa be uyuu nisa be.

<sup>19</sup> Oraque gudó be gueta para bigueta stipa stibe. Ne biaana né be ca xpinni Cristu raqué chupa chonna gubidxa.

*Cayuí' Saulo stiidxa Jesús Damasco*

<sup>20</sup> Qué nindaa de ngue bizulú be byui' be stiidxa Jesús ndaani ca yu'du', cayabi be binni Jesús nga Xiiñi Dios.

<sup>21</sup> Nabé bidxagayaa irá cani bina diaga laabe. Na ca':

—Ñee cadi laabe nga uzabi nanda be cani runi cre Jesús ndaani guidxi Jerusalén la? Ne para nga ca beeda be rari', para inaaže be laaca' chiné be laaca ra nuu ca xáique sti ca sacerdote.

<sup>22</sup> Peru laabe jma rusi ne gana cusiene be laaca Jesús nga Cristu, dede bichenda be ca judíu ni nuu Damasco.

*Ra uní' stiidxa ca judíu ñuuti Saulo*

<sup>23</sup> Ma xadixí de nuu be raqué uní' stiidxa ca judíu guuti ca laabe.

<sup>24</sup> Ridixí ne huaxhinni ruzuhuaa ca irá ra puerta lindaa sti guidxi que ti pa iree be guuti ca laabe. Peru gunna be ni,

<sup>25</sup> ne ucuaa ca xpinni Cristu laabe uluu ca laabe ndaani ti dxumi su, undete ca laabe ra ventana sti lindaa ni nuu guidxi que, ne zaqué gunda bixooñe be.

*Ra yendá Saulo Jerusalén*

<sup>26</sup> Ne ora yendá be Jerusalén gucala'dxi be nidxaaga be ca xpinni Cristu ni nuu raqué, peru bidxibi ca purti cadi cayuni cre ca pa dxandí ma runi cre be.

<sup>27</sup> Para ucuaa Bernabé laabe yené laabe ra nuu ca apóstol. Byui' né laaca modo bi'ya be Señor neza ze be, ne uní' né laabe, ne modo qué nidxibi be para byui' be stiidxa Jesús Damasco.

<sup>28</sup> Oraque ru uná ca biaana be lade ca' ne uzá né be laaca Jerusalén.

<sup>29</sup> Byui' be stiidxa Jesús sin nidxibi be ne ucuaa yu né

be ni ca judíu ni riní' griegu. Peru ucalal'dxi ca ñuuti ca laabe.

<sup>30</sup> Ne ora gunna ca hermanu ni, gucuaa ca laabe yené ca laabe Cesarea. De raqué biseenda ca laabe Tarsó.

<sup>31</sup> Ca dxi ru que ma iruti nuchiiña ca xpinni Cristu, cani nuu Judea ne Galilea ne Samaria. Ne jma rusi bizuhuaa chaahui ca lu stiidxa Dios ne bidale ca'. Qué niree chu ca de laani ne ucané Espíritu Santu laaca'.

*Ra bianda Eneas*

<sup>32</sup> Ra canaganna Pedru ca xpinni Cristu ni nuu irá ladu, laca yeganna cani nuu ndaani guidxi Lida.

<sup>33</sup> Raqué bedandá be tobi hombre lá Eneas nexhe lu luuna', ma raca xhono iza de guti galaa.

<sup>34</sup> Para rabi be laa:

—Eneas, ma bisianda Jesucristu lii. Biasa, bitopa jluuna lu'.

Oraqueca biasa.

<sup>35</sup> Ora bi'ya irá ca binni Lida ne Sarón ni uca que la? bisaana ca ni runi cre ca para yenanda ca Señor.

*Ra bisibani Pedru Dorcas*

<sup>36</sup> Ndaani guidxi Jope uyuu ti gunaa runi cre Cristu lá Tabita. Griegu rabi cabe laa Dorcas. Nabé ucané be binni ne ora caquiiñe ca pobre xiixa la? rudii be laaca'.

<sup>37</sup> Ca dxi que beda aca huará be ne guti be. Ucuaa ca binni que gudiibi ca cuerpu stibe ne gudixhe ca laabe ndaani ti cuartu rairopa pisu.

<sup>38</sup> Gaxha riaana Lida de Jope, ne ora gunna ca hermanu nuu Pedru raqué la? biseenda ca chupa hombre chi tidxi laa guiuba gueeda.

<sup>39</sup> Oraqueca biasa Pedru yené ca hombre que, ne ora yendá cabe Jope yené cabe laabe ndaani yoo ra nexhe Tabita. Raqué nuu ca viuda cayuuna ca' ne bilui' ca laabe irá lari gudiba Dorcas dxi nabani.

<sup>40</sup> Oraque ulee be ca binni que, bizuxibi be uní' né be Dios. Ne bitixhi lú be biiya dxi be gue'tu que, ne rabi be laa:

—Tabita, biasa.

Para bixhele lú, ne ora bi'ya laabe biasa gurí.

<sup>41</sup> Oraque unaaze be ná' undisa be laa. Ne guridxi be ca hermanu ne ca viuda bilui' be laaca ma nabani Tabita.

<sup>42</sup> Irá binni Jope gunna ni, ne stale tu bini cre Señor.

<sup>43</sup> Biaana ru Pedru ndaani guidxi Jope ralidxi ti curtidor lá Simón.

## 10

### Pedru ne Corneliu

<sup>1</sup> Guyuu ti hombre ndaani guidxi Cesarea lá Corneliu, naca capitán sti Batallón Italiano.

<sup>2</sup> Cadi judíu laabe Peru ridxibi be Dios ne rusisaca be laa, laabe ne irá binni lidxi be. Nabé racané be ca pobre lade ca judíu ne qué riaana dxi be de iní' né be Dios.

<sup>3</sup> Ti dxi bia' las tres casi naca lu bacaanda biiya dxi-chi be biuu ti ángel sti Dios ra nuu be ne rabi laabe:

—¡Corneliu!

<sup>4</sup> Cadxibi be dede cayaca dití be, biiya dxi be ángel que, ne na be:

—Xi laa, Señor.

Para na rabi laabe:

—Ma bigaanda stiidxa lu lu Dios ne ruuya pabiá' racanéu ca pobre.

<sup>5</sup> Yanna biseenda tuuxa che Jope, chi caa tobi hombre lá Simón ne laca rabi cabe laa Pedru.

<sup>6</sup> Nuu be ralidxi ti curtidor lá Simón, naca lidxi uríá nisadó'. Laabe zabi be lii xi gu'nú'.

<sup>7</sup> Biree si ángel que ze', guridxi be chupa jmozo be ne ti soldadu ni runi xhiiña be, ne laa laca ridxibi Dios.

<sup>8</sup> Byuí' né be laaca xi guca be. Oraque ru biseenda be laaca Jope.

<sup>9</sup> Sti dxi que ma zidxiña cani biseenda Corneliu que Jope. Ma bia' galaa dxi ngue, ne óraque pe udxiba Pedru ique yoo zini' né Dios.

<sup>10</sup> Ma candaana be ne ucalá'dxi be ño be Peru ca'ru chu' endaró. Laga cabeza be cayaca ni, casi ñaca lu bacaanda

<sup>11</sup> biiya be zuxele ibá' ne zeda yete casi ti lari gueela liibi idapa punta.

<sup>12</sup> Ne nuu irá clase mani ndaani ni, mani rizá, mani rixubi ndaani' ne mani huiini ripapa.

<sup>13</sup> Ne bina diaga be na tuuxa:

—Pedru, biasa, biiti ne gudó.

<sup>14</sup> Oraque na be:

—Qué ziuu dxi, Señor. Qué huayuu dxi gahua ni na ley stidu cadi idó' do.

<sup>15</sup> Bigueta na ni caní' que rabi laabe:

—Ni cayabi Dios lii go lo la? cadi nou' qué zanda go lo'.

<sup>16</sup> Chonna tiru guca ni. Oraque ru bigueta lari que ibá'.

<sup>17</sup> Laga candaa ique né Pedru xi rini' ni bi'ya que la? zeda naba diidxa ca hombre biseenda Corneliu que paraa lidxi Simón, dede bedandá ca ra puerta yoo que,

<sup>18</sup> ne unaba diidxa ca pa raqué nuu tobi hombre lá Simón, ni rabi cabe Pedru.

<sup>19</sup> Candaa ique né ru Pedru ni bi'ya que, na Espíritu Santu rabi laa:

—Zeda yubi chonna hombre lii.

<sup>20</sup> Yanna biasa biete. Ne yené laacabe, sin iní' i'cu pa cuchee lu', purti naa biseenda laacabe.

<sup>21</sup> Oraque biete be bidxiña be ra nuu ca hombre biseenda Corneliu que, ne rabi be laaca':

—Nanna canayubi tu naa. Rarí nuua', xi guni tu naa.

<sup>22</sup> Para na ca rabi ca laabe:

—Biseenda Capitán Corneliu laadu purti gudxi ti ángel laabe usenda caa be lii para ga'bu laabe xi guni be. Ridxibi be Dios ne runi be jneza, ne irá judíu nadxii laabe.

<sup>23</sup> Oraque gudxi be laaca guiuu ca ndaani yoo, ne biaana ca raqué huaxhinni que. Sti dxi que biree né be laaca', ze cabe, ne yené

caadxí hermanu de Jope laa-cabe.

<sup>24</sup> De lu sti dxi que yendá cabe Cesarea. Ma cabeza Corneliu laacabe. Guridxi ca lisaa ne ca xhamigu cabeza né laacabe.

<sup>25</sup> Ora bidxiña Pedru biree Corneliu bichagalú laabe ne bizuxibi xa ñee be. Ucaladxi nusicaca laabe.

<sup>26</sup> Peru óraque undisa be laa, rabi be laa:

—Biasa, purti naa laca hombre casi lii naa.

<sup>27</sup> Ziyuí' cabe diidxa biuu cabe ndaani yoo, ne biiya be nuu stale binni raqué.

<sup>28</sup> Para na be:

—Laatu nanna tu judíu naa ne cá lu ley stidu cadi idxaaga du cani cadi judíu ne cadi chu' du ralidxi ca'. Peru ma bilui' Dios naa zanda idx-aaga tutiisi, neca cadi judíu laa.

<sup>29</sup> Nga runi casi bisenda caa tu naa, benda ca'. Yanna racaladxe gabí tu naa xi para bisenda caa tu naa.

<sup>30</sup> Para na Cornelieu:

—Raca tapa gubidxa bia' hora rica canié nia Dios rarí casi runi du irá huadxí. Mala biiya zuhuua ti hombre nezaluá' ruzaani xhaba,

<sup>31</sup> na rabi naa: "Cornelieu, ma bigaanda stiidxa lu lu Dios ne ma bietenala'dxi rudii lu guna.

<sup>32</sup> Yanna biseenda tuuxa che Jope, chi caa Simón, ni rabi cabe Pedru. Nuu be ralidxi ti curtidor lá Simón naca lidxi uriá nisadó'. Ora gueeda be zabi be lii xi gu'nu'."

<sup>33</sup> Ngue runi oraqueca bisenda caa lii, ne diuxquixe pe lii saca beedu'. Yanna

rarí nuu du irá du nezalú  
Dios para ucá' diaga du irá  
ni gudxi lii ga'bu laadu.

*Ni uni' Pedru ralidxi Corneliu*

<sup>34</sup> Oraque bizulú Pedru na  
rabi laacabe:

—Yanna ma nanna bia'ca  
risaca irá binni nezalú Dios.

<sup>35</sup> Tutiica idxibi laabe ne  
guni jneza, runi xiiñi be laa,  
gasti naca xi raza laa.

<sup>36</sup> Bisenda tidxi Dios cani  
za de Israel ma zanda chu' né  
ca laa tobi si pur Jesucristu,  
xaíque sti irá xixé.

<sup>37</sup> Laatu nanna tu despué  
de byuí' né Juan binni  
naquiiñe chu' nisa, bizulú  
bireeche stiidxa Jesucristu  
Galilea, ne uzá ni idubi naca  
Judea.

<sup>38</sup> Ne laca nanna tu uluu  
Dios enda nandxo' sti Espíritu  
Santu ndaani ladxidó' be,  
para uzá be ucané be binni  
ne bisianda be cani caguít  
binidxaba ique, partí nuu né  
Dios laabe.

<sup>39</sup> Laadu bidu'ya dxichi du  
irá ni bi'ni be Judea ne  
ndaani guidxi Jerusalén. Ne  
laabe nga biiti cabe bicaa  
cabe lu cruz.

<sup>40</sup> Peru lu chonna gubidxa  
undisa Dios laabe de lade  
gue'tu', ne bilui' laabe laadu.

<sup>41</sup> Cadi irá di binni biiya  
laabe sínunque cani maca ulí  
Dios, ne nga laadu, partí  
laadu bidó' né du laabe ne  
bidé' né du laabe ora ma  
bibani be de lade gue'tu'.

<sup>42</sup> Ne biseenda be laadu chi  
güi né du binni stiidxa be ne  
gabi du laaca laabe nga ni  
gudixhe Dios cuidxi cuenta

irá binni, cani nabani ru dxi  
gaca ni ne cani ma guti.

<sup>43</sup> Laca de laabe bizeete ca  
profeta dede ma xadxí. Na  
ca ni guni cre laabe zaca  
perdonar ni huachee, pur ni  
bi'ni be.

*Ucuua cani cadi judíu  
Espíritu Santu*

<sup>44</sup> Caní' ru Pedru biete  
Espíritu Santu biuu ndaani  
ladxidó' irá ni cucaa diaga  
laa que.

<sup>45</sup> Nabé bidxagayaa ca her-  
manu judíu ni yené Pedru  
que ora bi'ya ca laca caca  
cani cadi judíu Espíritu Santu.

<sup>46</sup> Gunna ca ma ucuua cabe  
Espíritu Santu ora bina diaga  
ca caní' cabe idioma ni qué  
niziidi cabe, ne cusisaca cabe  
Dios.

<sup>47</sup> Oraque na Pedru:

—Xi cucueeza para chu'  
nisa ca binni ri', partí ma  
ucuua ca Espíritu Santu casi  
ucuua nu.

<sup>48</sup> Ne gudxi laacabe chu'  
nisa cabe ti ihuinni ma  
xpinni Cristu laacabe. Ne  
gunaba cabe guiana né Pe-  
drus laacabe xhupa xhonna  
gubidxa.

## 11

*Udinde né ca xpinni Cristu  
Pedru*

<sup>1</sup> Gunna ca apóstol ne ca  
hermanu ni nuu Judea laca  
ma bini cre cani cadi judíu  
stiidxa Dios.

<sup>2</sup> Ne ora bigueta Pedru  
Jerusalén bidxiña ca judíu ni  
ma runi cre Cristu ra nuu be  
ne udinde né ca laabe,

<sup>3</sup> na ca':

—Xiñee yechuu lu ralidxi cani cadi judíu ne gudó neu laaca'.

<sup>4</sup> Oraque bizulú be gudxi be laaca xi irá guca dede ra bizulú ni, na be:

<sup>5</sup> —Nuua ndaani guidxi Jope, canié nia Dios. Mala casi ñaca lu bacaanda biiya zeda yete xiixa de ibá' casi ti lari gueela ro' liibi idapa punta. Biaana dxí ni ra nuua'.

<sup>6</sup> Ora biiya dxie ni, biiya dxá mani ndaani ni, mani rizá layú, mani duxhu', beenda', ne mani ripapa.

<sup>7</sup> Ne bina dia'ga na tuuxa rabi naa: "Biasa Pedru. Biiti, gudó."

<sup>8</sup> Oraque rabe': "Co', Señor, purti qué huayuu dxi gahua ni na ley cadi idó' do."

<sup>9</sup> Bigueta na ni caní' de ibá' que rabi naa: "Ni cayabi Dios lii go lo la? cadi nou' qué zanda go lo'."

<sup>10</sup> Chonna tiru uca ni zacá para bigueta ni ibá'.

<sup>11</sup> Ne óraque pe biuu chonna hombre, zeda yubi naa. Biseenda tuuxa de Cesarea laaca'.

<sup>12</sup> Ne gudxi Espíritu Santu naa chiniá laacabe sin ini' ique pa cuchee'. Ne yené xhi xhoopa hermanu ri naa. Uyuu du ralidxi hombre bisenda caa naa que.

<sup>13</sup> Ne ora biu' du raqué byu' né be laadu xi bizaaca be. Nuu be ndaani yoo, mala biiya be zuhuaa ti ángel lú be, na rabi laabe: "Biseenda tu che Jope chi caa Simón ni rabi cabe Pedru.

<sup>14</sup> Laa zabi lii ximodo ilá lu', lii ne ca binni li'dxu'."

<sup>15</sup> Ne ora bizuluá' byue nia laacabe diidxa biete Espíritu Santu biuu ndaani ladxidó' cabe casi biuu ndaani ladxidó' no chiqué.

<sup>16</sup> Ne óraque bietenaladxe ni uní' Señor ra na: "Uluu nisa Juan binni peru ne nisa si. Peru laatu zacaa tu Espíritu Santu casi ñaca ñuu nisa tu pur Espíritu que."

<sup>17</sup> Ne pa ma bidii Dios laacabe ni bidii laanu ra bini cre nu Señor Jesucristu la? tuu ndi naa para ucueeza ni cayuni Dios.

<sup>18</sup> Ora bina diaga ca xi na Pedru la? nin ru sti diidxa qué nini' ca'. Ne bisisaca ca Dios, na ca':

—Yanna ma nanna du laca ma bilu' Dios cani cadi judíu ximodo inaba ca perdón ti gapa ca enda nabani ni qué zaluxe.

### Ra yendá stiidxa Cristu Antioquía

<sup>19</sup> Dxi bijti cabe Esteban, laca bizulú cabe uzá nanda cabe ca xcaadxi xpinni Cristu, ne ca dxi que bireeche ca'. Nuu ni yendá dede Fenicia, ne Chipre ne Antioquía. Ne byu' ca stiidxa Jesús raqué, byu' né ca ni ca judíu si.

<sup>20</sup> Peru uyuu caadxi binni Chipre ne de Cirene lade cabe. Ne laaca ora yendá ca Antioquía byu' né ca cani cadi judíu stiidxa Señor Jesús.

<sup>21</sup> Ucané Señor laacabe ne stale tu bini cre ne yenanda Señor.

## 12

*Ra uladxi rey Herodes ca xpinni Cristu*

<sup>1</sup> Ca dxi que bizulú rey Herodes bininá caadxi de ca xpinni Cristu.

<sup>2</sup> Gucuua be Jacobo bi'chi Juan, biiti be laa ne espada.

<sup>3</sup> Ne ora bi'ya be uyuula'dxi ca judíu ni bi'ni be que la? laca unaaze be Pedru. Ne uca ni dxí ro cabe pan sin levadura que.

<sup>4</sup> Gunaaze si be laa biseguyoo be laa ne gudixhe be tapa tanda soldadu gapa laa, de tapa tapa. Cá ique be cuee be laa nezalú irá binni guidxi que, tidi si pascua.

<sup>5</sup> Zacá nga cayapa cabe Pedru ndaani lidxi guiiba'. Peru ca xpinni Cristu cadi cayaana dxí ca de iní' né ca Dios pur laabe.

*Ra bilá Dios Pedru ndaani lidxi guiiba'*

<sup>6</sup> Huaxhinni ma para irá gueela cuee Herodes laabe que, nexhe be nisiaasi be lade chupa soldadu, liibi be cadena. Ne laca zuhuua soldadu cayapa ra puerta lidxi guiiba que.

<sup>7</sup> Mala bizuhuua ti ángel sti Señor ndaani lidxi guiiba que, ne bizaani ti biaani raqué. Ne guda'na ángel que cue' ti'xhi be bicuaani laabe, na:

—Biasa guiuba.

Oraque biaba ca cadena libi né be que.

<sup>8</sup> Para na ángel que rabi laabe:

—Bixhii dxiiichi ndaanu ne bicaa xquela guidi lu ñee lu'.

<sup>22</sup> Ne ora gunna ca xpinni Cristu ni nuu Jerusalén ni la? biseenda ca Bernabé Antioquia.

<sup>23</sup> Nabé bieche Bernabé ora yendá ne biiya pabiá' uluu Dios ndaaya laacabe. Ne bilidxe laacabe sa nanda cabe Señor de idubi ladixdó' cabe sin iree chu cabe.

<sup>24</sup> Nacha'hui Bernabé ne dxá ladixdó' de Espíritu Santu. Nabé napa be fe, ne pur laabe bini cre stale binni Señor.

<sup>25</sup> De raqué biree be uyé be Tarso ye yubi be Saulo.

<sup>26</sup> Ne ora bidxela be laa yené be laa Antioquía. Bi-aana né cabe ca xpinni Cristu raqué tubiza ne bisiidi cabe stale binni. Ne raqué nga guta lá ca xpinni Cristu cristianu.

<sup>27</sup> Ca dxi que biree caadxi profeta Jerusalén, guyé Antioquía.

<sup>28</sup> Tobi de laacabe lá Agabo, bizuhuaa lade ca hermanu de raqué ne uní' ni gudxi Espíritu Santu laa, na chi aca ti gubiña idubi naca guidxilayú. Ne uca ni uní' be que dxi naca Claudio gobernador.

<sup>29</sup> Oraque uní' stiidxa ca xpinni Cristu de raqué uchaaga ca bia' ganda udii cada tobi para acané ca ca hermanu ni nuu Judea.

<sup>30</sup> Para bitopa cabe ni biseenda né cabe ni Bernabé ne Saulo ra nuu ca xaíque sti ca xpinni Cristu de Judea para qui'zi ca lu ca xcaadxi hermanu.

Biluxe si be, na rabi laabe:  
—Birenda xhamarra lu',  
dananda naa.

<sup>9</sup> Biree be zinanda be ángel  
que, peru qué ganna be pa  
dxandí ni o pa caní' xcaanda  
si be ngue.

<sup>10</sup> Udi'di cabe chupa lugar  
ra cayapa soldadu ne ora  
yendá cabe ra puerta de gui-  
iba' ma para iree cabe lu  
calle, bixele stubi puerta que  
para biree cabe. Udi'di cabe  
ti calle. Raqué bixele ángel  
que de laabe.

<sup>11</sup> Oraque ru sica ni bibani  
uca be, na be:

—Yanna ma nanna dxandí  
biseenda Señor ángel sti'  
beda ulá naa lu ná Herodes  
ne de irá ni ucala'dxi ca judíu  
ñuni naa.

<sup>12</sup> Ne ora bi'ya be ngue ni  
la? uyé be ralidxi María,  
jñaa Juan ni rabi cabe Marcu.  
Raqué nuu stale binni caní'  
né Dios.

<sup>13</sup> Ora yendá be bixhidxi  
ná be ra zaguán. Bina di-  
aga ti badu dxaapa lá Rode  
para biree ziguuya tu cu-  
xhidxi ná'.

<sup>14</sup> Ne ora binibiá' stidxi be,  
de tantu cayeche qué nux-  
hele', laga bigueta uxooñe'.  
Yetidxi ca binni que zuhuua  
be ra puerta'.

<sup>15</sup> Peru na ca binni que  
rabi laa:

—Cayaca ique lu nga.

—Co', na, —dxandí ni.

Oraque na ca':

—Seguru xpisi be nga.

<sup>16</sup> Peru laabe cadi cayaana  
dxí be de cuhxidxi ná be. Ne  
ora bixhele ca biiya ca laabe  
ni, bidxibi ca'.

<sup>17</sup> Peru bi'ni be seña lu ca  
igani ca'. Ne byuí' né be  
laaca modo ulee Señor laabe  
de ndaani lidxi guiiba', ne  
rabi be laaca':

—Lagüí' né ni Jacobo ne ca  
xcaadxi hermanu.

Ne óraque biree be ze be sti  
ladu.

<sup>18</sup> Ora birá gueela hueru  
hueru uyuu ca soldadu, qué  
ganna ca xi uca Pedru.

<sup>19</sup> Biyubi Herodes laabe irá  
ladu. Biiya si qué nidxela  
laabe unaba diidxa ca sol-  
dadu que, ne ora na ca qué  
ganna ca la? biseenda guuti  
be laaca'. Ne biree be Judea,  
yendezza be Cesarea.

### Ra guti Herodes

<sup>20</sup> Nuu dxichi né Herodes  
ca binni Tiro ne Sidón. Peru  
laaca uyuu ca tobi si para  
idxiña ca ra nuu be. Ne uní'  
né ca Blasto, ti xpinni be,  
cuee xiana laabe ti chu' né be  
laaca tobi si, purti de xquidxi  
be reeda endaró stica'.

<sup>21</sup> Para gudixhe be ti dxi  
gu'ya be laaca'. Ne dxi gunda  
dxi que bizuchaahui be, guri  
be ra ribí be para guni man-  
dar be ne uluu be ti discursu.

<sup>22</sup> Oraque bicaa ca binni  
que ridxi bidxiiba ca laabe,  
na ca':

—Dios nga ni caní' ca, cadi  
binni.

<sup>23</sup> Nin ca'ru iluxi ini' be,  
bini huará ti ángel laabe  
purti qué nusicaca be Dios.  
Biguidxi be bicuti' dede ra  
guti be.

<sup>24</sup> Peru stiidxa Dios jma  
rusi careeche, ne cayuí' cabe  
ni irá ladu.

<sup>25</sup> Biluxe si xhiña Bernabé  
ne Saulo Jerusalén bigueta

ca' ne yené ca Juan ni rabi  
cabe Marcu que.

## 13

*Ra bizulú Saulo ne Bernabé chi güi stiidxa Cristu sti guidxi*

<sup>1</sup> Lade ca xpinni Cristu ni  
nuu Antioquía uyuu caadxí  
profeta ne maistru. Nuu  
Bernabé ne Simón ni rabi  
cabe Ya'se', ne Luciu de  
Cirene ne Manaén ni binii  
né gobernador Herodes tobi  
si, ne Saulo.

<sup>2</sup> Ti dxi cayaana cabe sin go  
cabe, ne cayuni cabe cultu,  
uní' né Espíritu Santu laacabe  
na:

—Lacuee chu Bernabé ne  
Saulo para guni ca dxiiña ni  
gudixhe guni ca'.

<sup>3</sup> Ne qué ño gá cabe, uní' né  
cabe Dios ne gudixhe ná cabe  
luguiá ca' para biseenda  
cabe laaca'.

*Ra nuu cabe Chipre*

<sup>4</sup> Zacá nga biseenda  
Espíritu Santu laacabe chi  
guni cabe dxiiña'. Uyé cabe  
Seleucia. De raqué uyé cabe  
ti nisa dede yendá cabe isla  
Chipre.

<sup>5</sup> Ne biuu cabe ndaani ti  
guidxi lá Salamina. Raqué  
bizulú cabe byuí' cabe sti  
idxa Dios ndaani ca yu'du sti  
ca judíu. Laca yené cabe  
Juan para gacané laacabe.

<sup>6</sup> Uzá cabe idubi naca isla  
que dede yendá cabe Pafos.  
Raqué biiya cabe ti magu lá  
Barjesús. Ma na profeta sti  
Dios laa peru cadi dxandí ni.

<sup>7</sup> Tobi si laa ne gobernador  
Sergiu Paulo. Nabé nuu

xpiaani gobernador que,  
ne bisenda caa Bernabé ne  
Saulo purti racala'dxi guna  
diaga stiidxa Dios.

<sup>8</sup> Peru qué niná gá Elimas.  
(Nga rabi cabe magu que sti  
idxa cabe.) Qué niná purti  
qué racala'dxi guni cre gober  
nador que.

<sup>9</sup> Oraque biiya dxí Saulo  
laabe. Saulo ca ca nga Pablu.  
Ne dxá ladxidó' de Espíritu  
Santu,

<sup>10</sup> na rabi laabe:

—Xpinni binidxaba', nisi  
rusiguii lu ne ruyubu uchee  
lu'. Qué riula'dxi lu gasti ni  
jneza. Padxí guiaana dxiu de  
uchaa lu stiidxa Señor.

<sup>11</sup> Yanna ma chi usaba ná  
Dios lii. Zacheepa lú lu',  
xadxí ziaanu sin gu'ya lu gu  
bidxa.

Ne oraqueca bicheepa lú  
be ne canazá be idubi raqué  
canayubi be tu inaaze ná be.

<sup>12</sup> Ora bi'ya gobernador ni  
guca que la? bini cre ne  
bidxagayaa de stiidxa Señor  
ni cusiidi cabe que.

*Ra nuu cabe Antioquía de  
Pisidia*

<sup>13</sup> Biree Pablu de Pafos, laa  
ne cani canazá ne laa que,  
uyé ca Perge ti guidxi de Pan  
filia. Raqué biree chu Juan  
de laacabe bigueta Jerusalén.

<sup>14</sup> Peru laacabe biree cabe  
de Perge, uyé cabe Antioquía  
de Pisidia, ne ti dxi enda rizi  
ila'dxi biuu cabe ne gurí cabe  
ndaani yu'du sti ca judíu.

<sup>15</sup> Biluxe biuunda si ni  
bicaa Moisés ne ni bicaa  
ca profeta, bisenda tidxi ca  
xaíque sti yu'du que laacabe  
pa napa cabe xiixa diidxa

gabi cabe ca binni que la? zanda iní' cabe.

<sup>16</sup> Para biasa Pablu, bi'ni seña lú cabe igani cabe, ne na:

—Binni xquidxe ca' ne irá tu, cani ridxibi Dios, laucaa diaga.

<sup>17</sup> Dios stinu, binni Israel ca', ulí ca bixhoze gola nu ne bitale laacabe dxi canazá cabe xquidxi binni dxi nuu cabe Egipto. Ulee laacabe de raqué ne enda nandxó' sti'.

<sup>18</sup> Ne uzá né laacabe ndaani gui'xhi bia' cuarenta añu sin nixhacala'dxi laacabe.

<sup>19</sup> Oraque binitilú gadxe guidxi ni nuu Canaán para bidii ni laacabe.

<sup>20</sup> Ne gudixhe juez lade cabe. Bindaa ni bia' tapa gayuua cincuenta añu dede xhi profeta Samuel.

<sup>21</sup> De raqué unaba cabe gapa cabe rey. Para ulí Dios Saúl xiiñi Cis ni za de Benjamín. Laa guca rey sti cabe cuarenta añu.

<sup>22</sup> Ra undisa Dios Saúl biciú David. De laabe nga bizeete Dios ra na: "Ma biiya runi David, xiiñi Isaí, ni riuladxe' ne zuni irá ni gabe laa."

<sup>23</sup> Ne de lade ca xiiñi David beeda Jesús. Biseenda Dios laabe beda ulá be ca binni Israel casi bidii stiidxa guni.

<sup>24</sup> Dxi ca'ru gueeda Jesús, byui' né Juan ca binni Israel naquiiñe inaba ca perdón Dios ne chu' nisa ca'.

<sup>25</sup> Ne dxi mayaca gati Juan na: "Cadi zácxaxa tu naa nga ni cabeza tu que. Nanda stobi naa, ne qué risaca dia'

nin para cuee xquela guidi ñee."

<sup>26</sup> Biche', xiiñi Abraham ca', ne irá ni ridxibi Dios lade tu, para laatu nga ca diidxa ni rabi laanu ximodo ilá nu ca.

<sup>27</sup> Ca binni Jerusalén ne ca xaíque stica qué ñunibiá' ca Jesús ne qué ñene ca ni bicaa ca profeta ni ruunda ca irá dxi enda riziila'dxi'. Peru bi'ni ca ni na ni ra gudixhe ca gati be.

<sup>28</sup> Necá qué nidxela ca gasti donda luguiá be peru unaba ca Pilatu useenda guuti laabe.

<sup>29</sup> Ne biluxé si bi'ni ca irá ni maca cá gaca be la? undete ca laabe lu cruz, bicaachi ca laabe.

<sup>30</sup> Peru undisa Dios laabe de lade gue'tu'.

<sup>31</sup> Ne óraque bidxiña be ra nuu cani yené laabe dxi biree be Galilea uyé be Jerusalén, bindaa be ra nuu ca'. Yanna laaca nga canayuí' ca ni biiya ca'.

<sup>32-33</sup> Ne laadu ma zeda tidxi du laatu ma bi'ni Dios ni gudxi ca bixhoze gola nu chiqué chi guni, ne bi'ni ni para laanu. Uca ni ra undisa be Jesús casi cá ni lu rairopa Salmo ra na Dios: "Lii nga Xiiñe". Dede yanadxí naa nga Bixho'zo'."

<sup>34</sup> Ne chiqué na Dios zadxiña dxi usibani Jesús ti qué guiu'dxu xcuerpu. Ndi nga ni uní' be que: "Zaguua ndaaya lii casi bidiee stiidxa David gune'."

<sup>35</sup> Ne laca cá lu sti Salmo ra na David: "Qué zudiiu lugar

guiu'dxu cuerpu sti ni nadxii lu que."

<sup>36</sup> Ne lu Salmo ca cadi cuzeete David de laca laa, sínunque cuzeete de Jesús. Purti bi'ni David xhiiña Dios dxi bibani, peru bidxiña dxi guti, ne bigaachi ra bigaachi irá ca bixhoze gola, ne biaana xcuerpu biu'dxu'.

<sup>37</sup> Peru ni undisa Dios de lade gue'tu que la? qué ñu'dxu di cuerpu sti'.

<sup>38</sup> Biche ca', laganna pur Jesús ni cuzeete ri ma zanda aca perdonar binni ne para nga runi cayuí né du ni laatu.

<sup>39</sup> Qué ñanda nulá ley sti Moisés laatu, peru yanna irá tu guni cre Jesús zalá.

<sup>40</sup> Laguuya gá cadi izaaca tu ni bicaa ca profeta ni uní' Dios ra na:

<sup>41</sup> Laucaa diaga, laatu, cani runi burla, ne laidxagaya.

Zanitilú tu partí zune ti milagru naro'ba lade tu ni qué zuni cre tu neca güi né cabe ni laatu.

<sup>42</sup> Ora biree Pablo ne Bernabé de ndaani yu'du que, na ca binni que rabi laaca':

—Latá' sti sábadu ca para güi né tu laadu ni byui' né tu laadu yanadxí ri'.

<sup>43</sup> Ora biluxe cultu sti ca judíu que, yenanda stale binni Pablo ne Bernabé, cásica judíu zaqueca cani cadi judíu ni ma zinanda religión sti ca judíu. Ne gudxi cabe laaca cadi usaana ca ni ma bidii Dios laaca'.

<sup>44</sup> Sti sábadu que casi idubi guidxi que bidxiña para ucaa diaga stiidxa Dios.

<sup>45</sup> Peru ora bi'ya ca judíu irá binni que, bidii envidia laaca', ne bizulú ca na ca cadi dxandí ni caní' Pablo que, ne udindené ca laabe.

<sup>46</sup> Peru qué nidxibi Pablo ne Bernabé, na ca rabi ca laacabe:

—Nirudó' laatu nexhe güi né du stiidxa Dios, peru ma bidxii tu ni. Laca laatu cusi-huinni tu qué iquiñe tu para icaa tu enda nabani ni qué zaluxe. Yanna ma chiné du ni ra nuu cani cadi judíu.

<sup>47</sup> Purti nga nga ni gudxi Señor laadu, na:

Ma gudixhe lii para chinéu stiidxa ra nuu cani cadi judíu.

Casi ñaca lii nga ti biaani ni chi guzaani irá binni guidxilayú

para ganna ca modo ilá ca'.

<sup>48</sup> Ora bina diaga cani cadi judíu ni na cabe que la? bieche ca ne na ca nabé sicarú stiidxa Dios, ne bini cre cani ma nexhe icaa enda nabani ni qué zaluxe.

<sup>49</sup> Ne bireeche stiidxa Señor idubi naca neza que.

<sup>50</sup> Peru gudxite ca judíu ique caadxi gunaa nabé rie yu'du', gunaa ni risaca, ne caadxi hombre ni runi mandar ndaani guidxi que, para undisa ca ca binni de raqué uzabi nanda ca Pablo ne Bernabé dede uladxi ca laacabe. Nin idubi raqué qué nusaana ca laacabe.

<sup>51</sup> Ne ora biree cabe raqué udxibi ñee cabe casi ti seña bichee ca binni que ra qué nuchagalú ca laacabe. De raqué uyé cabe Iconio.

<sup>52</sup> Peru ca xpinni Cristu ni biaana ra biree cabe que la? dxá ladxidó' ca de Espíritu Santu ne nayeche nuu ca'.

## 14

### *Ra nuu cabe Iconio*

<sup>1</sup> Ra yendá cabe Iconio biuu cabe ndaani yu'du sti ca judíu. Ne pur modo byuí' cabe stiidxa Dios raqué bini cre stale binni, cásica judíu zaqueca ni cadi judíu.

<sup>2</sup> Peru gudxite ca judíu ni qué ñuni cre ique cani cadi judíu, ti ma ne laaca gaca nanala'dxi ca ca hermanu.

<sup>3</sup> Peru qué niree Pablu ne Bernabé raqué. Biaana ru cabe byuí' cabe stiidxa Señor sin nidxibi cabe, purti nanna cabe nuu né Señor laacabe. Cayabi cabe binni racala'dxi Dios ulá laaca'. Ne bisi-huinni Señor dxandí ni caní' cabe que, purti ucané laa-cabe bi'ni cabe stale milagru.

<sup>4</sup> Ne undaa saa ca binni guidxi que. Caadxi nuu pur ca judíu ne xcaadxi nuu pur ca apóstol.

<sup>5</sup> Oraque uca irá cani qué ñuni cre tobi si, ca judíu ne cani cadi judíu ne ca xaíque stica'. Uní' stiidxa ca ucaa lú ca Pablu ne Bernabé, uchá ca guie laacabe.

<sup>6</sup> Peru gunna cabe ni, para biree cabe raqué uyé cabe caadxi guidxi sti Licaonia, Listra ne Derbe ne idubi neza que.

<sup>7</sup> Ne byuí' cabe stiidxa Cristu raqué.

### *Ra bidxá cabe guie Listra*

<sup>8</sup> Ndaani guidxi Listra zuba tobi hombre nachiita ñee dede dxi gule, nin qué huayuu dxi sa'.

<sup>9</sup> Cucaa diaga be ra cayuí' Pablu diidxa'. Ne óraque biyya dxí Pablu laabe ne biiya runi cre be zanda guianda be.

<sup>10</sup> Para bicaa ti ridxi, na rabi laabe:

—Biasa, bizuhuaa jneza.

Oraqueca biasa uxooñe be ne uzá be.

<sup>11</sup> Ora bi'ya ca binni que xi bi'ni Pablu, bicaa ca ridxi peru stiidxa ca' ni lá Licaonia, na ca':

—Zeda ganna chupa dios stinu laanu. Ruluí' si cabe binni.

<sup>12</sup> Ulee lá cabe Bernabé Júpiter, ne Pablu ulee lá cabe laa Mercuriu, purti laa nga caní'.

<sup>13</sup> Uriá guidxi que nuu xhiu'du Júpiter. Para beeda sacerdote sti yu'du que bedané yuze ne doo guie'. Laa ne ca binni que, ucalá'dxi ca ñuuti ca yuze que nezalú Pablu ne Bernabé casi runi ca nezalú ca bidó' stica'.

<sup>14</sup> Ora bi'ya Pablu ne Bernabé xi cayuni cabe la? ucheza ca xhaba ca para ihuinni cadi cayuula'dxi ca ni. Ne biaazi ca lade binni que cucaa ca ridxi, na ca':

<sup>15</sup> —Xii nga chi guni tu, hombre ca'. Laca binni guidxilayú laadu casi laatu. Nga pe nga zeda tidxi du laatu, usaana tu irá ni runi tu ri', purti qué iquiñe cani, para sa nanda tu Dios ni nabani ni bizá' ibá' ne guidxi-

layú ne nisadó' ne irá ni nuu ndaani cani.

<sup>16</sup> Chiqué bidii be lugar bi'ní binni ni na ique.

<sup>17</sup> Peru biluí' be laaca tu laabe pur ni bi'ní be, parti ucané be laaca casi racané be laanu yanna, rusaba be nisa guie para gaca xquela nu. Qué rusiaadxa be ni idó' no, ne ruchá be ladxidó' no de enda nayeche'.

<sup>18</sup> Necá uni' cabe irá nga peru dxiiña bidii laacabe para bicueeza cabe ca binni que de guuti ca ca yuze que nezalú cabe casi runi ca lu xpidó' ca'.

<sup>19</sup> Oraque beeda caadxi judíu de Antioquía ne de Iconio. Udxite ca ique ca binni que uchá ca guie Pablu. Biluxé si bichá ca guie laabe, zácaxa ca ma guti be, uxubi yu ca laabe, ulee ca laabe ndaani guidxi que.

<sup>20</sup> Peru ora bidxiña cani ma bini cre Cristu ndaani guidxi que ra nuu be la? bissa be ne biuu be ndaani guidxi que. Sti dxi que biree né be Bernabé raqué, uyé cabe Derbe.

<sup>21</sup> Byu'í cabe stiidxa Cristu ndaani guidxi que ne stale binni bini cre. Ne óraque bigueta cabe Listra ne Iconio ne Antioquía.

<sup>22</sup> Yeuzuhuaa chaahui cabe ca xpinni Cristu ne gudxi cabe laaca cadi iree chu ca de ni ma runi cre ca'. Ne laca rabi cabe laaca':

—Naquiiñe tidi nu stale ra nagana ante chu' nu ra runi mandar Dios.

<sup>23</sup> Ne cada ra uyé cabe ulí cabe caadxi hermanu para

sa niru lú ca xcaadxí, ne ulee lá cabe laaca hermanu gola. Biaana cabe sin ño cabe ne uni' né cabe Dios, ne óraque udixhe cabe irá ca lu ná Señor ni runi cre ca'.

*Ra bigueta cabe Antioquía de Siria*

<sup>24</sup> De raqué udi'di cabe idubi Pisidia para yendá cabe Panfilia.

<sup>25</sup> Ne biuu cabe ndaani ti guidxi stini lá Perge. Biluxé si byu'í cabe stiidxa Dios raqué biree cabe uyé cabe Atalia.

<sup>26</sup> De raqué ucuaa cabe ti barcu bigueta cabe Antioquía, ra gudixhe ca hermanu laacabe lu ná Dios ni nadxii laacabe, para gupa laacabe lu dxiiña yeguni cabe que. Ne yanna ma binduuxe cabe ni.

<sup>27</sup> Ora yendá cabe guridxi cabe irá ca xpinni Cristu para byu'í né cabe laaca irá ni bi'ní Dios ra yeguni cabe xhiiña', ne modo ma cuxhele Dios neza para guni cre cani cadi judíu.

<sup>28</sup> Biaana né cabe ca binni que xadxi.

## 15

*Junta uca Jerusalén*

<sup>1</sup> Ca dxi que bedandá caadxi hombre Antioquía. Beeda cabe de Judea, beda usiidi cabe ca hermanu pa qué gapa ca seña sti Dios casi na Moisés gapa binni la? qué zalá ca'.

<sup>2</sup> Xadxi ucuaa yu né Pablu laacabe de laani, laa ne Bernabé. Para biaana ca xpinni Cristu che Pablu

ne Bernabé ne xcaadxi hermanu Jerusalén. Chi guuya ca xi na ca apóstol ne ca hermanu gola de enda raca circuncidar.

<sup>3</sup> Para ucuaa ca xpinni Cristu laacabe yeuzuhuaa ca laacabe neza. Udi'di cabe Fenicia ne Samaria. Ne irá ra udi'di cabe byuí' né cabe ca hermanu ma cayuni cre cani cadi judíu, ne nabé bieche ca ora gunna ca ni.

<sup>4</sup> Ora yendá cabe Jerusalén bichagalú ca xpinni Cristu laacabe, ne ca apóstol ne ca hermanu gola, ne byuí' né cabe laaca irá ni bi'ní Dios ra yeguni cabe xhiiña'.

<sup>5</sup> Peru óraque biasa caadxi fariseu ni ma runi cre, na ca':

—Naquiiñe ucá' nu cani cadi judíu gapa seña sti Dios ne guni ca irá ni na ley sti Moisés.

<sup>6</sup> Oraque gupa ca apóstol ne ca hermanu gola ti junta para gu'ya ca pa dxandí naquiiñe gaca circuncidar cani cadi judíu.

<sup>7</sup> Ma xadxí de cacaoa yu cabe ni, bizuhuaa Pedru ne na:

—Hermanu ca', laatu nanna tu dede dxi bizulú bireeche stiidxa Cristu ulí Dios naa chi güe nia ni cani cadi judíu para guni cre ca'.

<sup>8</sup> Runibiá' Dios ladxidó' binni, ne bisihuinni ma xpinni laacabe ra bidii laacabe Espíritu Santu casi bidii laanu.

<sup>9</sup> Ne qué rihuinni pa adxé laacabe para laanu nezalú Dios, purti bisiá ladxidó' cabe ra bini cre cabe.

<sup>10</sup> Yanna xiñee cadi cayula'dxi tu ni ma bi'ní Dios. Racala'dxi tu ucaa tu cani runi cre Cristu guni xiixa nin laanu nin ca bixhoze gola nu qué ñanda ñuni.

<sup>11</sup> Laanu la? runi cre nu zalá nu purti nadxii Señor Jesús laanu, ne zacaca laacabe.

<sup>12</sup> Oraque ru dxí do' uyyu irá ca ne bicaa diaga ca Bernabé ne Pablu ra byuí' né laaca irá seña ne milagru ni bi'ní Dios ra uzá ca lade cani cadi judíu.

<sup>13</sup> Biluxé si uní' ca' para na Jacobo:

—Hermanu ca', laucaa diaga ni chi tidxe laatu ri'.

<sup>14</sup> Ma byuí' né Simón laanu modo bizulú bilabi Dios cani cadi judíu. Laca ma cabí xpinni lade cabe.

<sup>15</sup> Ne nga ca bicaa ca profeta ra na Dios:

<sup>16</sup> Zandisa xcaadxi ni gaca xpinne jlugar ca xiiñi David ni ma biree chu de naa.

Zutopa cani qué niree chu, udxigueta laaca ra uyyu ca chiqué,

<sup>17</sup> ti uyubi irá binni naa dede cani cadi judíu ni ma ulié gaca xpinne'.

<sup>18</sup> Nga nga ni na Dios, ne ma xadxí gudxi be ni laanu.

<sup>19</sup> Nga runi rabe cadi uchi'ña nu cani cadi judíu, cani cusaana ni runi cre para chi nanda Dios.

<sup>20</sup> Sínuque ni guni nu la? ucá' nu ti gui'chi lú cabe gabí nu laacabe cadi go cabe ni ma gu'ta lu bidó' ne cadi chu'

né cabe ni cadi xheela cabe ne cadi go cabe xpeela tutiica mani ni bixii yanni, nin go cabe rini.

<sup>21</sup> Purti dede ma xadxí nuu tu rusiidi ley sti Moisés ndaani irá guidxi. Ruunda cabe ni ra yu'du irá dxi enda rizila'dxi'.

<sup>22</sup> Ne biaana ca apóstol ne ca hermanu gola ne ca xcaadxi xpinni Cristu cui ca chupa de laaca para useenda né ca Pablu ne Bernabé Antioquía. Ne ulí cabe Judas ni rabi cabe Barsabás, ne Silas, chupa de cani za niru lú ca xcaadxi.

<sup>23</sup> Bi'ni cabe ti carta para chiné ca'. Ndi nga ni cá lu carta que:

"Hermanu ca', laadu, ca apóstol ne ca hermanu gola, cugapa diuxi du laatu, ca hermanu ni cadi judíu ni nuu Antioquía ne Siria ne Cilicia.

<sup>24</sup> Ma gunna du uyé caadxi de rarí ra nuu tu, yeuchiiña ca laatu ne ni cusiidi ca', na ca naquiiñe gapa tu seña sti Dios ne guni tu ni na ley. Cadi laadi du bise'nda du laacabe.

<sup>25</sup> Nga runi gupa du ti junta ne biaana du cui du chupa hermanu use'nda né du iropa hermanu ni nadxii du ri', Pablu ne Bernabé.

<sup>26</sup> Cadi cayá ca xpida ca para cayuni ca xhiiña Señor Jesucristu stinu.

<sup>27</sup> Cuse'nda du Judas ne Silas. Laaca güi né ca laatu ni cuze'te du ri'.

<sup>28</sup> Purti para laadu rulu' cadi galán uguá du laatu jma que bia' nexhe guni tu, ne

nga ca gudxi Espíritu Santo laadu.

<sup>29</sup> Casi cadi go to ni ma udixhe cabe lu bidó', nin rini, nin tutiica mani ni bixii yanni, ne cadi chu' né tu ni cadi xheela tu. Pa ixele tu de ca nga la? ze tu jneza. Sicarú guiaana tu."

<sup>30</sup> Biluxe si carta que biseenda né cabe ni laaca'. Ne ora yendá ca Antioquía guridxi ca ca xpinni Cristu de raqué ne bidii ca ni laacabe.

<sup>31</sup> Ne ora bi'nda cabe ni bieche né cabe ca conseju cá lú ni.

<sup>32</sup> Nabé byuí' né Judas ne Silas ca hermanu que stiidxa Dios purti profeta laaca'. Ne zacá bisieche ca laacabe ne ucané ca laacabe bizuhuaa chaahui cabe.

<sup>33</sup> Biaana ca raqué xadxí ne óraque na ca ma chi ibigueta ca ra nuu cani biseenda laaca'. Para na ca hermanu que:

—Laché, chiné Dios laatu.

<sup>34</sup> Peru óraque na Silas zi-aana ru'.

<sup>35</sup> Pablu ne Bernabé laca biaana ru ca raqué. Bisiidi ca ca hermanu ne byuí' né ca binni stiidxa Señor, laaca ne xcaadxi.

*Ra undaa saa Pablu ne Bernabé*

<sup>36</sup> Ma xadxí huiini de nuu cabe raqué na Pablu rabi Bernabé:

—Xiñee qué ibigueta nu ca guidxi, irá ra ma byuí nu stiidxa Señor. Chi ganna nu ca hermanu, idu'ya nu xi ze xa ca'.

<sup>37</sup> Ne gucala'dxi Bernabé niné cabe Marcu.

<sup>38</sup> Peru na Pablu ruluí' cadi galán chi né cabe laabe, purti bixele be de laaca Panfilia, ne de raqué qué nizá né ru be laaca lu xhiiña Dios.

<sup>39</sup> Nabé ucuua yu cabe ni peru qué ñanda ñuu cabe tobi si, para undaa saa cabe. Ucuua Bernabé Juan Marcu, udxi'ba né ndaani ti barcu ze ca Chipre.

<sup>40</sup> Pablu ucuua Silas, ne gudixhe ca hermanu laaca lu ná Dios gapa laaca'. Para biree ca ze ca'.

<sup>41</sup> Uzá ca Siria ne Cilia, yeuzuhuaa chaahui ca ca xpinni Cristu.

## 16

*Ziné Pablu Timoteu ne Silas*

<sup>1</sup> Ra canazá cabe que yendá cabe Derbe. Biree cabe raqué uyé cabe Listra. Raqué biiya cabe ti xpinni Cristu lá Timoteu. Jñaa be la? judíu laa ne ma runi cre Cristu, peru bixhoze be cadi judíu.

<sup>2</sup> Irá ca hermanu de Listra ne de Iconio ruzeete pabiá' nacha'hui be.

<sup>3</sup> Na Pablu chiné laabe, para ucuua laabe guluu seña sti Dios laabe ti qué gapa ca judíu ni nuu neza que xi iní, purti nanna ca cadi judíu bixhoze be.

<sup>4</sup> Oraque biree cabe ze cabe. Ne irá guidxi ra udi'di cabe byuí' né cabe ca binni que ni gudixhe ca apóstol ne ca hermanu gola ni nuu Jerusalén guni ca xpinni Cristu.

<sup>5</sup> Zacá jma bizuhuaa chaahui ca xpinni Cristu, ne ze dxi jma zidale ca'.

*Ra gudxi Dios Pablu che Macedonia*

<sup>6</sup> Uzá cabe Frigia ne Galacia, ne udi'di cabe Asia peru qué niná Espíritu Santu ñui' cabe stiidxa Dios raqué.

<sup>7</sup> Ora yendá cabe ra ruzulú Misia, ucaladxi cabe ñe cabe Bitinia, peru laca qué niná Espíritu sti Jesú.

<sup>8</sup> Para udi'di cabe uriá Misia, uyé cabe Troas.

<sup>9</sup> Ne huaxhinni que casi ñaca lu bacaanda biiya Pablu zuhuaa tobi hombre de Macedonia canaba laa che raqué chi acané laaca'.

<sup>10</sup> (Ne naa nuaa raqué.) Ne casi bi'ya be ni biluí' Dios laabe que, gudixhe chaahui du stidu para chuu du Macedonia purti rabi du cabidxi Dios laadu chuu du raqué, chi güi né du ca binni que stiidxa Cristu.

*Ra nuu cabe Filipos*

<sup>11</sup> Para biré' du de Troas. Ucuua du ti barcu uyuu du derechu isla Samotracia. Sti dxi que yendá du Neápolis.

<sup>12</sup> Ne biete du raqué para uyuu du Filipos, ti guidxi ni jma dxi'ba ca xcaadxi guidxi sti Macedonia ni nuu neza que. Ca romanu naaze guidxi que. Biaana du raqué xadxí huiini'.

<sup>13</sup> Ti dxi enda riziila'dxi biré' du de ndaani guidxi que, uyuu du ra guiigu ra rie ca judíu riní' né Dios. Ma nuu caadxi gunaa raqué yendá

du, para byuí né du laaca stiidxa Jesús.

<sup>14</sup> Lade cabe nuu ti gu-naa de Tiatira lá Lidia rutoo lari cha'hui color moradu. Cadi judíu laabe peru maca rusisaca be Dios, ne dxi que biciudxi Dios ladxidó' be para gucuaa be stiidxa Pablu.

<sup>15</sup> Ne uyuu nisa be, laabe ne irá ca binni lidxi be. Oraque rabi be laadu:

—Pa na tu dxandí ma bine cre Señor la? latá' guiaana tu ralidxe'.

Ne tantu cá be lu du la? biaana du.

### *Ra yeguyoo cabe*

<sup>16</sup> Ti dxi biré' du ziní né du Dios, beda nanda ti badu dx-aapa laadu, nuu né binidx-aba'. Nabé runi ganar para xpixuaana', purti runi sertá ni inaba diidxa binni laa.

<sup>17</sup> Uzá nanda be laadu, ziuni be ridxi, na be:

—Xhiña Dios ni nandxó' cayuni ca hombre ri', ne zeda güi né ca laatu modo ilá tu, rabi be ca binni que.

<sup>18</sup> Zaqué uzá nanda be laadu stale dxi, Peru bixhacala'dxi si Pablu de canananda be laa la? bidxigueta lú ne na rabi binidxaba que:

—Cayabe lii usaana lu badu dxaapa ca, casi ñabi Jesucristu ni lii.

Oraqueca bisaana binidx-aba que laabe.

<sup>19</sup> Peru ora bi'ya ca xpixuaana be ma qué zanda guni ganar né ru ca laabe la? unaaže ca Pablu ne Silas yené ca ra nuu justicia.

<sup>20</sup> Ne ora yendá ca raqué, na ca':

—Canayuni yaya ca judíu ri ndaani xquidxi nu.

<sup>21</sup> Cusiidi cabe costumbre ni cadi jneza icaa nu chi nanda nu purti romanu laanu.

<sup>22</sup> Ne óraque biasa irá binni que luguiá Pablu ne Silas. Ne ucuaa ca justicia que laacabe ulee ca lari ladi cabe ne bini mandar ca chu' cabe palu.

<sup>23</sup> Biluxi si guluu ca palu laacabe biseguyoo ca laa-cabe ne gudxi ca ni rapa ra lidxi guiiba que gapa chaahui laacabe.

<sup>24</sup> Para ucuaa ngue laacabe uluu laacabe dede último cuartu sti lidxi guiiba que. Ne uluu ñee cabe lade chupa yaga rabi cabe cepu.

<sup>25</sup> Bia' galaa gueela caní' né cabe Dios ne cayuunda né cabe laa. Cucaa diaga ca xcaadxi presu que laacabe.

<sup>26</sup> Mala uça ti xu ro' dede biniibi dxacha raqué ne bixe-le irá ca puerta sti lidxi guiiba que. Ne bindaa cadena liibi irá cabe.

<sup>27</sup> Ora bibani ni rapa ra lidxi guiiba que, biiya ma zuxele irá puerta stini, ulee espada ucalá'dxi ñuuti laca laa. Zácaja ma bixooñe irá presu.

<sup>28</sup> Peru óraque bicaa Pablu ti ridxi, na rabi laabe:

—Cadi guniná lu laca lii, irá du nuu du rari'.

<sup>29</sup> Para unaba be ti biaani ne biuu uxooñe be ndaani lidxi guiiba que. Dede caya-ca dití be gudiche xibi be xa ñee Pablu ne Silas.

<sup>30</sup> Ne ulee be laaca de raqué rabi be laaca':

—Biche ca', xi gune para ila'ya'.

<sup>31</sup> Para na ca rabi ca laabe:

—Bini cre Señor Jesucristu ne zalá lu', lii ne ca binni li'dxu'.

<sup>32</sup> Ne byui' né ca laabe stiidxa Señor, laabe ne irá ni nabeza ralidxi be.

<sup>33</sup> Lu gueela queca ucuaa be laaca', udiibi be ra ucaná laaca', ne óraque uyuu nisa be, laabe ne ca binni lidxi be.

<sup>34</sup> Oraque yené be laaca ralidxi be bidii be ni gudó xhi ca'. Nabé bieche cabe, laabe ne idubi xfamilia be, purti ma bini cre cabe Dios.

<sup>35</sup> Ora birá gueela biseenda justicia gendarme, chi tidxi ni rapa lidxi guiiba que cuee Pablu ne Silas.

<sup>36</sup> Oraque na hombre que rabi Pablu:

—Bisenda tidxi ca justicia cuee laatu. Yanna lairee. Laché, chiné Dios laatu.

<sup>37</sup> Peru na Pablu:

—Ucuaa cabe laadu, udiñe cabe laadu nezalú irá binni sin ñuuya chaahui cabe pa dxandí cuché' du, ne uluu cabe laadu ndaani lidxi guiiba', naca nda du romanu. Ne yanna ma racala'dxi cabe cuee cabe laadu naga'chi la? Qué zaré' di du dede qué gueeda cabe, laa pe cabe, gueda ndee cabe laadu.

<sup>38</sup> Para bigueta ca gendarme que, yetidxi ca ca justicia xi na cabe. Nabé bidxibi ca ora gunna ca romanu laa-cabe.

<sup>39</sup> Para uyé ca ra nuu cabe yenaba ca perdón laacabe.

Oraque ulee ca laacabe ne na ca guni cabe favor iree cabe de guidxi que.

<sup>40</sup> Ora biree cabe de lidxi guiiba que uyé cabe ralidxi Lidia guridxi cabe ca hermanu ne gudxi cabe laaca cadi cui sa ca atrá. Oraque ru biree cabe ze cabe.

## 17

### *Ra nuu cabe Tesalónica*

<sup>1</sup> Biree cabe raqué udi'di cabe Anfípolis ne Apolonia dede yendá cabe Tesalónica. Raqué nuu ti yu'du sti ca judíu.

<sup>2</sup> Biuu Pablu ndaani yu'du que casi runi irá ra che'. Ne chonna sábadu bisiidi be ca binni que ne bisiene be laaca xi na Xqui'chi Dios.

<sup>3</sup> Bilu' be laaca ra cá ni, napa Cristu xidé gati' ne ibani, ne rabi be laaca':

—Jesús ni cayué stiidxa ca la? nga nga Cristu ca.

<sup>4</sup> Bini cre caadxi de ca binni que ne yenanda ca Pablu ne Silas. Ne laca bini cre stale de cani cadi judíu ni ma zinanda religión sti ca judíu, ne stale gunaa ni risaca ndaani guidxi que.

<sup>5</sup> Peru bidxiichi ca judíu ni qué ñuni cre, ne bitopa ca caadxi hombre qué iquiiñe canazá si, ne bi'ní ca binni. Bini yaya ca ndaani guidxi que, ne yechuu ca ralidxi Jasón. Zindee ca Pablu ne Silas para nudii ca ca binni que.

<sup>6</sup> Peru biiya si ca qué nidxela ca laacabe raqué la? ucuaa ca Jasón ne xcaadxi

hermanu, yené ca ra nuu justicia ne bicaa ca ridxi na ca':

—Canazá chupa hombre canautixhi irá binni guidxi-layú ne ma bedandá ca rari'.

<sup>7</sup> Ne uluu Jasón laacabe ralidxi. Cuchee né cabe ca ley ni gudixhe César ni runi mandar ca guidxi romanu, partí na cabe nuu sti rey lá Jesús.

<sup>8</sup> Ora gunna ca binni que ne ca justicia xi na cabe que la? bizulú nda ca bi'ni ca ridxi.

<sup>9</sup> Ne unaba ca usaana Jasón ne ca xcaadxi hermanu que vueltu casi ti seña zaree, Pablu ne Silas de ndaani guidxi que. Bisaana cabe ni, ne óraque ru bindaa ca laacabe.

### *Ra nuu cabe Berea*

<sup>10</sup> Huaxhinni queca ulee ca hermanu que Pablu ne Silas, biseenda ca laacabe Berea. Casi yendá cabe Berea biuu cabe ndaani yu'du sti ca judíu.

<sup>11</sup> Jma nacha'hui ca judíu que, que cani nuu Tesalónica, partí bicaa diaga ca stiidxa Dios ne stale gana ne irá dxi ma cuyubi ca lu Xqui'chi Dios pa jneza ni caziidi ca que.

<sup>12</sup> Nga runi stale de laaca bini cre, ne laca bini cre stale ni cadi judíu cásica gunaa ni risaca ndaani guidxi que zaqueca hombre.

<sup>13</sup> Peru ora gunna ca judíu de Tesalónica laca ma cayuí' Pablu stiidxa Dios Berea la? yechite ca ique ca binni raqué para uyé ca luguiá Pablu.

<sup>14</sup> Peru ora queca biseenda ca hermanu que tu chi saana laabe uriá nisadó'. Silas ne Timoteu biaana ru ca raqué.

<sup>15</sup> Cani ziné laabe que, dede Atenas yesaana ca laabe, ne gudxi be laaca gabi ca Silas ne Timoteu guiuba che ra nuu be. Oraque ru bigueta ca'.

### *Ra nuu Pablu Atenas*

<sup>16</sup> Laga nuu be Atenas cabeza be laaca cadi nuu dxí ladxidó' be partí cayuuya be dxá bidó' ndaani guidxi que.

<sup>17</sup> Ngue runi uyé be ndaani yu'du yegüí né be ca judíu ne ca xcaadxi binni ni rusisaca Dios diidxa'. Ne irá dxi uyé be luguiaa, yegüí né be tuti-ica idxaaga be diidxa'.

<sup>18</sup> Raqué bidxaaga be caadxi xpinni Epicuro ne caadxi ni rinanda ni rusiidi ca estoico. Caadxi de laaca na:

—Xi na ni caní' huaahua ca pue.

Ne xcaadxi na:

—Ruluí' canaucheeche be stiidxa tuuxa dios ni qué runibiá' nu.

Caní' ca zaqué partí canayuí' be stiidxa Jesús ne enda ribani de lade gue'tu'.

<sup>19</sup> Ucuua ca laabe yené ca laabe ti lugar lá Areópago ra rapa ca junta stica'. Ne na ca rabi ca laabe:

—Zanda ga'bu laadu xi nacubi ri cusiidi lu la?

<sup>20</sup> Purtí qué huayuu dxi guna diaga du ni cayuí' lu ri'. Yanna racala'dxi du ganna du xi na ni.

<sup>21</sup> Irá binni ni nuu guidxi que, cásica cani gule raqué

zaqueca ni nabeza si, nisi ruyubi ca güi ca xiixa nacubi o ucaa diaga ca'.

<sup>22</sup> Oraque bizuhuaa Pablu galahui de laacabe, na:

—Binni Atenas ca', ruuya nabé runi cre tu ca bidó' stitu.

<sup>23</sup> Purti ora canazaya canayuuya ra nuu cani la? laca biiya ti altar cá caadxi diidxa lú: "Para dios ni qué runibiá' du." Ne dios ni rusisaca tu sin gunibiá' tu ca, nga pe nga canayué stiidxa'.

<sup>24</sup> Laabe bizá' be guidxilayú ne irá ni nuu ndaani ni, ne qué ribeza be ndaani yoo rucuí binni purti laabe nga xpixuaana ibá' ne guidxilayú.

<sup>25</sup> Cadi naquiiñe udí' nu laabe xiixa, purti gasti cayaadxa laabe. Laga laabe rudii be laanu enda nabani ne irá ni caqui'ñe nu.

<sup>26</sup> De ti binni si ulee be binni de irá raza ni nuu ndaani guidxilayú, ne guidxhe be pabiá' indaa cada raza ne paraa cueza ca'.

<sup>27</sup> Gudixhe be irá binni ndaani guidxilayú para uyubi laabe casi ñaca zixubi ná ca dede idxela ca laabe, purti cadi zitu nuu be, sínunque gaxha do' nuu be de cada tobi de laanu.

<sup>28</sup> Laabe bizá' be laanu ne pur laabe nabani nu ne rizá nu. Casi na tobi de ca poeta stitu: "Za nu de Dios."

<sup>29</sup> Ne pa za nu de laabe la? cadi zácxaxa nu de oro laabe o de plata o de guie o intiica ni ruzá' binni modo na xquenda biaani'.

<sup>30</sup> Chiqué bichee binni purti qué ñene, ne bi'ni Dios sica qué ñuuya'. Peru ma cayabi be irá binni de irá ladu inaba perdon laabe,

<sup>31</sup> purti ma gudixhe be ti dxi cuidxi be cuenta laaca'. Ma ulí be tobi hombre guni ni, ne zuni ni jneza. Bisihuinni be ulí be laa ra undisa be laa de lade gue'tu'.

<sup>32</sup> Ora bina diaga cabe bizeete Pablu enda ribani de lade gue'tu la? caadxi de laacabe bini burla, peru xcaadxi na:

—Sti tiru nda ucá' diaga du lii de ni cayuí lu ri'.

<sup>33</sup> Para biree be ra nuu ca'.

<sup>34</sup> Peru bini cre caadxi, ne yenanda ca laabe. Lade cani bini cre que zeeda Dionisiu, tobi de cani runi junta ra Areópago que, ne ti gunaa lá Dámaris, ne xcaadxi.

## 18

*Ra nuu Pablu Corinto*

<sup>1</sup> Biree Pablu Atenas uyé Corinto.

<sup>2</sup> Ne raqué beda idxaaga be ti judíu de Ponto lá Aquila. Nacubi beda bi' ca raqué, laa ne Priscila xheela'. Biree ca Italia purti uladxi Claudio irá judíu ni nabeza Roma. Para uyé be ralidxi ca'.

<sup>3</sup> Biaana né be laaca', bini né be laaca dxiiña', purti tobi si dxiiña runi cabe, ruzá' cabe carpa.

<sup>4</sup> Ne irá dxi enda riziila'dxi yegüí be diidxa ndaani yu'du', ne bicuudxi be caadxi judíu ne caadxi ni cadi judíu.

<sup>5</sup> Ne ora bedandá Silas ne Timoteu de Macedonia, jma

pe qué ñaana dxí Pablu de ñui' stiidxa Dios. Idubi dxi cayabi be ca judíu Jesús nga Cristu ni cabeza ca que.

<sup>6</sup> Peru qué niná ca nucaa diaga ca laabe ne uluu dí ca laabe. Oraque udxibi be xhaba be nezalú ca', ne rabi be laaca':

—Laatu napa tu donda pa initilú tu. Cadi naa dia' napa donda. Ne dede yanadxí ma chaa ra nuu cani cadi judíu.

<sup>7</sup> Biree be raqué uyé be ralidxi tobi hombre ruisaca Dios, lá Justu. Naca lidxi cue' yu'du que.

<sup>8</sup> Bini cre ti hombre lá Crispus, naca xaíque sti yu'du que, laa ne ca binni lidxi. Uyuu ru stale binni Corinto bini cre ra bina diaga ni cayuí' Pablu que, ne uyuu nisa ca'.

<sup>9</sup> Ti gueela uní' né Señor laabe casi ñaca lu bacaanda', na rabi laabe:

—Cadi idxibi lu', ne cadi guiaana dxi lu de güi lu stidxa'.

<sup>10</sup> Purti napa stale binni ndaani guidxi ri', ne cayapa lii iruti zaga'na lii para guniná lii.

<sup>11</sup> Para biaana be raqué tubiza aronda byuí' be stidxa Dios.

<sup>12</sup> Peru dxi naca Galión gobernador de Acaya uca ca judíu tobi si ne biasa ca luguiá Pablu yené ca laa ra justicia.

<sup>13</sup> Na ca':

—Cusiidi hombre ri binni ruisaca Dios, peru cadi casi na ley stidu.

<sup>14</sup> Ma ziní' Pablu peru óraque na Galión rabi ca judíu:

—Pa ñaca bichee be, bi'ni be xiixa naro'ba la? ñapa xidé nucaa diaga laatu, judíu ca'.

<sup>15</sup> Peru pa bedané tu laabe purti si qué riula'dxi tu ni cusiidi be ne pur ca xaíque stitu ne pur ley stitu la? racá laatu laguuya xi guni né tu ni. Qué ziuaa dia' lú ni.

<sup>16</sup> Ne ulee laacabe de raqué.

<sup>17</sup> Peru óraque ucuaa cani cadi judíu Sóstenes, xaíque sti yu'du que, udiñe ca nezalú justicia. Peru qué nulabi Galión laaca'.

*Ra bigueta Pablu Antioquia*

<sup>18</sup> Biaana ru Pablu raqué xadxi. Oraque ru gudxi be ca hermanu ma che be, para biree né be Priscila ne Aquila uyé cabe Cencrea. Ne raqué bigá ique be pi'ru', ra biluxe udixe be ti promesa. De raqué ucuaa cabe barcu ze cabe Siria.

<sup>19</sup> Ne biuu cabe Efeso. Raqué biaana Aquila ne Priscila, peru Pablu na che Jerusalén. Laga nuu ru be raqué uyé be ra yu'du sti ca judíu, yegüí né be laaca diidxa'.

<sup>20</sup> Ucuá ca lú be ñaana né ru be laaca xcadxi peru qué niná be.

<sup>21</sup> Rabi be laaca':

—Ma chaa Jerusalén purti ma zeda yuba saa raqué ne naquiiñe chi utiide saa que raqué. Peru zabigueta rua' ra nuu tu pa na Dios.

Para ucuua be ti barcu  
biree be ze be.

<sup>22</sup> Yendá be Cesarea.  
Raqué biete be, uyé be  
Jerusalén, yeugapa diuxi be  
ca xpinni Cristu. De raqué  
uyé be Antioquia.

<sup>23</sup> Biaana be raqué xadxí  
huiini'. Oraque ru biree be  
uzá be irá ca guidxi sti Galá-  
cia ne Frigia. Yeuzuhuua  
chaahui be ca xpinni Cristu.

### *Ra nuu Apolo Efeso*

<sup>24</sup> Ca dxi que yendá ti judíu  
de Alejandría ndaani guidxi  
Efeso, lá Apolo. Galán riní'  
be ne nabé riene be ni cá lu  
Xqui'chi Dios.

<sup>25</sup> Ma biziidi be stiidxa  
Señor ne cayuí' be ni ne gana.  
Jneza rusiidi be bia' nanna  
be de Jesús. Peru ni nanna  
si be nga ni bisiidi Juan  
Bautista ra uluu nisa binni.

<sup>26</sup> Bizulú byuí' be ni ndaani  
yu'du sin nidxibi be, peru  
ora bina diaga Priscila ne  
Aquila ximodo cayuí' be ni,  
guridxi ca laabe para bisiene  
chaahui ca laabe stiidxa  
Dios.

<sup>27</sup> Ne ora bizeete be che  
be Acaya la? ucané ca her-  
manu que laabe. Bicaa ca  
ti gui'chi lú ca hermanu de  
raqué uchagalú ca laabe. Ne  
ora yendá be nabé ucané be  
cani ma bini cre raqué, cani  
ma uca Dios nacha'hui ne  
laa.

<sup>28</sup> Ne laca biseegu be  
ruaa ca judíu nezalú irá  
binni. Biluí' be laaca ra cá  
lu Xqui'chi Dios Jesús nga  
Cristu ni cabeza ca'.

### **19**

#### *Ra nuu Pablu Efeso*

<sup>1</sup> Laga canazá Apolo Cor-  
into udi'di Pablu lade dani  
dede yendá Efeso. Raqué  
bidxela be caadxi xpinni  
Cristu.

<sup>2</sup> Ne rabi be laaca':

—Ñee ucuua tu Espíritu  
Santu ra bini cre tu la?

Para na ca':

—Nin qué lica huayuna di-  
aga du pa nuu Espíritu Santu.

<sup>3</sup> Oraque rabi be laaca':

—Xi biziidi tu para uyyu  
nisa tu ya'.

Para na ca':

—Ni bisiidi Juan ra uluu  
nisa binni.

<sup>4</sup> Oraque rabi be laaca':

—Uluu nisa Juan binni  
para ihuinni ma unaba  
ca perdón Dios, ne gudxi  
laacabe guni cre cabe stobi  
ni nanda laa. Ne nga nga  
Jesucristu.

<sup>5</sup> Ora bina diaga ca xi na  
be, uyyu nisa ca para ihuinni  
ma xpinni Cristu laaca'.

<sup>6</sup> Ne ora udixhe ná be  
luguíá ca', bidxá ladxidó' ca  
de Espíritu Santu. Ne uní' ca  
idioma ni qué niziidi ca', ne  
bizulú ca byuí' né ca binni  
stiidxa Dios.

<sup>7</sup> Bia' doce ca nuu ca raqué.

<sup>8</sup> Bia' chonna beeū biaana  
Pablu raqué, bisiidi ndaani  
yu'du sin nidxibi. Byuí' né be  
laaca de enda runi mandar  
sti Dios. Biyubi be nucuudxi  
be laaca para ñuni cre ca'.

<sup>9</sup> Peru uyyu tu qué niná  
ñuni cre. Biguidxi ladxidó' ca', ne uluu dí ca stiidxa  
Cristu nezalú irá binni  
que, para bixelete be de laaca'.

Yené be cani ma runi cre ra  
yoo scuela sti tobi hombre lá  
Tiranno.

<sup>10</sup> Raqué biaana be bisiidi  
be chupa iza. Ne zacá bina  
diaga irá binni Asia stiidxa  
Señor, cásica judíu zaqueca  
cani cadi judíu.

<sup>11</sup> Ne biquiñe Dios laabe  
para bi'ni stale milagru.

<sup>12</sup> Parti neca bayu si stibe  
o tindaa lari ni ma biquiñe  
be chiné ca binni que ra nuu  
cani huará, maca ziyanda.  
Ne zaqueca ca binidxaba ni  
caguite ique binni, laca ne  
ngue si rixele ca'.

<sup>13</sup> Uyuu caadxi judíu raqué  
canabee binidxaba ni ca-  
guite ique binni. Zácxaxa ca  
tisi uezete ca lá Señor Jesús  
zacané laaca iree ca binidx-  
aba que. Na ca rabi ca ca  
binidxaba que:

—Cayabe laatu iree tu, casi  
ñaca ñabi Jesús ni rui' Pablu  
stiidxa que ni laatu.

<sup>14</sup> Canayuni gadxe xiiñi Es-  
ceva ni, Esceva ti sacerdote  
gola sti ca judíu.

<sup>15</sup> Peru ora gudxi cabe ni  
ti binidxaba la? na rabi laa-  
cabe:

—Runebia'ya Jesús ne  
nanna tuu nga Pablu, peru  
laatu ya', tu laatu.

<sup>16</sup> Oraque biaaxha dxa  
hombre caguite binidxaba  
ique que luguiá cabe, gudiñe  
laacabe ne gudixhe dxí irá  
cabe. Biiya si cabe ma gasti  
ganda guni cabe biree cabe  
ndaani yoo, ziuxooñe cabe  
xie ladi cabe, naze cabe rini.

<sup>17</sup> Irá binni guidxi que  
gunna ni, cásica judíu za-  
queca cani cadi judíu. Irá

ca bidxibi ca' ne bisisaca ca  
Señor Jesús.

<sup>18</sup> Ne beeda stale de cani  
ma bini cre, beda ndee ruaa  
ca diidxa irá ni huayuni ca ni  
cadi jneza.

<sup>19</sup> Zaqueca stale de cani  
runi brujería. Bedané ca li-  
bru stica para icá gui nezalú  
irá binni que. Ne ulee cabe  
cuenta pabiá' risaca cani.  
Bia'si biddi ni cincuenta mil  
moneda de plata.

<sup>20</sup> Zaqué jma rusi bireeche  
stiidxa Señor ne bi'ni ni  
dxiiña ndaani ladxidó' stale  
binni.

<sup>21</sup> Udi'di si irá nga gudixhe  
ique Pablu tidi Macedonia  
ne Acaya ne óraque ibigueta  
Jerusalén. Ne na be napa be  
xidé che be Roma ora ma uyé  
be Jerusalén.

<sup>22</sup> Bisá niru gá be chupa de  
cani racané laabe che Mace-  
donia, Timoteu ne Erastu.  
Laabe biaana ru be neza  
Asia.

*Ni uca ra nuu Pablu Efeso*

<sup>23</sup> Ca dxi que uca yaya  
binni guidxi que pur stiidxa  
Señor.

<sup>24</sup> Parti nuu ti plateru lá  
Demetriu ruzá' yu'du huiini  
sti diosa Diana, napa stale tu  
runi né laa dxiiña', ne nabé  
runi ganar cabe lú ni.

<sup>25</sup> Uridxi be cani runi  
né laabe dxiiña que, ne  
ca xcaadxi plateru, rabi be  
laaca':

—Biche ca', laatu nanna tu  
galán rusaana dxiiña ri para  
laanu.

<sup>26</sup> Ne ma huayuna diaga tu  
na Pablu cadi dxandí dios ni  
ruzá' binni. Ne zacá cabee

chu be stale binni, cadi rari si sínunque casi idubi Asia.

<sup>27</sup> Cadi xhiiña si nu nuu naxoo, sínunque ne xhiu'du Diana, purti ma iruti zaza-alá'dxi laa, ne ma iruti zusa-saca Diana. Laa nda nga nadxii irá binni Asia ne dede irá binni guidxilayú.

<sup>28</sup> Ora bina diaga cabe xi na Demetriu, bidxiichi cabe ne uluu cabe Viva sti Diana, bidó' sti ca binni Efeso.

<sup>29</sup> Ne biasa irá binni guidxi que bi'ni ca bulla, unaaze ca hermanu Gayo ne Aristarco, binni Macedonia ni canazá né Pablu. Uxubi yu cabe laaca yené cabe laaca ra raca junta stícabe.

<sup>30</sup> Ucalá'dxi Pablu nichuu lade cabe, peru qué niná ca hermanu.

<sup>31</sup> Ne laca bisenda tidxi caaadxi de cani runi mandar Asia laabe cadi chi chuu be, Bisenda tidxi ca laabe purti xhamigu ca laabe.

<sup>32</sup> Zaqué nuu ca binni que, adxé ni na caadxi, adxé ni na xcaadxi. Raqué nuu ca dede ma birenda ca', purti casi irá ca qué ganna ca xi pur bidxiña ca raqué.

<sup>33</sup> Oraque ulee ca judíu Alejandru de lade ca binni que ziulaa ná ca laabe dede yeuzuhuaa ca laabe nezalú ca binni que para iní' be pur laaca', para cadi na ca binni que tobi si laaca ne Pablu. Bi'ni be seña lu ca binni que nigani ca'.

<sup>34</sup> Peru ora bi'ya ca laca judíu laabe la? bicaa ca ridxi na ca':

—¡Viva Diana patrona sti ca binni Efeso!

Zacá uyuu ca bia' chupa hora.

<sup>35</sup> Oraque biree secretariu de guidxi que biceeza laa-cabe, ne na:

—Binni Efeso ca', irá xixé binni nanna dxichi binni rari nga rapa bidó' Diana ni biaba de ibá', ne xhiu'du'.

<sup>36</sup> Iruti qué zanda iní' cadi dxandí ni. Nga runi laguuya chaahui xii nga cayuni tu.

<sup>37</sup> Ca hombre bedané tu ri la? qué huayuni ca gasti xhiu'du diosa Diana ne qué huaguu dí ca Diana.

<sup>38</sup> Pa racala'dxi Demetriu ne cani runi né laa dxiiña', cu' xqueja tuuxa la? para nga runi nuu justicia, nuu juez. Raqué chi nduu saa ca xqueja ca'.

<sup>39</sup> Peru pa nuu ru ni racala'dxi tu la? lausaana ni para ora aca junta sti idubi guidxi.

<sup>40</sup> Purti naxoo huiini nuu ni uca yanadxí ri'. Ma na cabe cayasa nu, cucá' lú nu gobiernu. Ne xi gabi nu óraque ya'.

<sup>41</sup> Ngue si uní' be, bicheeche be ca binni que.

## 20

*Ra uyé Pablu Macedonia ne Grecia*

<sup>1</sup> Uyuu dxí si guidxi que, guridxi Pablu ca hermanu, bilidxe laacabe ne gudxi laa-cabe ma che', para biree ze Macedonia.

<sup>2</sup> Uzá be irá guidxi ni nuu neza que, ne irá ra zidi'di be ziuzuhuaa chaahui be ca hermanu pur irá diidxa ni

byuí' né be laaca' dede yendá be Grecia.

<sup>3</sup> Biaana be raqué chonna bee. Ma nuu be para icaa be barcu che be Siria gunna be cabeza ca judíu inaaaze ca laabe. Ni bi'ni ti be la? bigueta be neza Macedonia sti tiru.

<sup>4</sup> Yené caadxi hermanu laabe, ra zeeda Sópater de Berea, ne Aristarco ne Segundu de Tesalónica, ne Gayo de Derbe, ne Tíquico ne Trófimo de Asia, ne Timoteu.

<sup>5</sup> Uzá niru ca lú du, yendeza ca laadu Troas.

<sup>6</sup> Laadu biaana ru du Filipos. Raqué biti'di du saa ra ro cabe pan sin levadura, ne lu gaayu gubidxa yeugaanda du laacabe Troas. Biaana du raqué gadxe gubidxa.

### *Ra bisiidi Pablu ca xpinni Cristu Troas*

<sup>7</sup> Ra gunda domingu que bidxiña irá ca xpinni Cristu para go ca pan casi bisaana Jesús guni ca', ne bisiidi Pablu laaca'. Gunda galaa gueela caní' ru Pablu, partí sti dxi que ma che'.

<sup>8</sup> Cá gui jma biaani ra nuu cabe que, ndaani ti yoo raguionna pisu.

<sup>9</sup> Nuu ti hombre huiini raqué lá Eutico, zuba ra ventana. Ucuua bacaanda laa partí xadxi caní' Pablu, ne biree yaande de raqué. Ma guti gundisa cabe laa.

<sup>10</sup> Oraque biete Pablu, guta gudaa gudiidxi laabe ne na rabi ca hermanu:

—Cadi idxibi tu. Ma bibani be.

<sup>11</sup> Bigueta udxiba Pablu para undaa cabe pan gudó cabe. Biluxi si cabe bizulú uní' Pablu sti tiru dede birá gueela'. Oraque ru biree ze'.

<sup>12</sup> Para biree cabe ziné cabe hombre huini que, ne nabé nayeche biaana cabe partí bibani.

### *Ra yendá cabe Mileto*

<sup>13</sup> Ucuua du barcu uzá niru du lú Pablu, uyuu du Asón. Raqué uleza du laabe. Zacá biaana né du laabe partí laabe qué zie be lu nisa.

<sup>14</sup> Ora yendá be Asón udxiba be ndaani barcu ra nuu du para uyuu du Mitilene.

<sup>15</sup> Biré' du Mitilene ziuu du. Sti dxi que udidi du Quío. De lu sti dxi que yendá du Samos ne biaana du Trogilio. Biré' du raqué sti dxi que yendá du Mileto.

<sup>16</sup> Qué ñu' du Efeso, partí qué niná Pablu ñaana Asia xadxi. Cá ique be pa ganda chindá be Jerusalén para laní Pentecostés, saa sti ca judíu.

### *Ra bisenda caa Pablu ca xpinni Cristu Efeso*

<sup>17</sup> Laga nuu du Mileto bisenda caa be ca hermanu gola lade ca xpinni Cristu de Efeso.

<sup>18</sup> Ora beeda ca rabi be laaca':

—Laatu nanna tu ximodo huazaya lade tu dede primé dxi bedandaya Asia.

<sup>19</sup> Qué ñuu dxi nudxiiba naa ra cayune xhiiña Señor. Stale tiru biina ra biiya jmodo ca binni ri', ne udide stale ni nagana pur ni ucaladxi ca judíu ñuni naa.

<sup>20</sup> Qué nucaache gasti', sínunque byue nia laatu irá ni zacané laatu para uzuhuaa chaahui tu. Bisiide laatu ra nuu tu irá tu tobi si, ne zaqueca ra yeganna laatu ralidxi tu.

<sup>21</sup> Gudxe ca judíu ne zaqueca cani cadi judíu inaba ca perdón Dios ne guni cre ca Señor Jesucristu stinu.

<sup>22</sup> Yanna cayabi Espíritu Santu naa chaa Jerusalén, ne qué ganna xi cabeza naa raqué.

<sup>23</sup> Ni nanna sia' la? irá ra huayaa rabi Espíritu Santu naa zieguayuaa ne zadide ra nagana.

<sup>24</sup> Peru nin tobi de ca nga qué rizaaladxe', neca pe guuti cabe naa. Xi si ricá ique la? unduuxe dxiiña ni bidii Señor Jesús naa gune'. Ne ndi nga dxiiña bidii be naa: güe nia binni ma zanda ilá ca pur enda nacha'hui sti Dios.

<sup>25</sup> Ma nanna nin tobi de laatu, cani byue nia de enda runi mandar sti Dios, qué zuuya ru tu lua' ndaani guidxilayú ri'.

<sup>26</sup> Nga runi cayabe ni laatu nagasi, ma cadi naa dia' napa donda pa initilú tu.

<sup>27</sup> Purti qué nusaana naya de ñue nia laatu irá ni na Dios.

<sup>28</sup> Yanna lagapa laca laatu ne lagapa ca xpinni Cristu ni bisaana Espíritu Santu laatu gapa tu, casi rapa pastor dendxu sti'. Xpinni be laaca' purti bixhii be rini stibe pur laaca'.

<sup>29</sup> Purti nanna dxi'che casi pe naa gaxha ñee, zeeda xcaadxi zacala'dxi uchiá ca

xpinni Cristu casi ruxuixe gueu dendxu'.

<sup>30</sup> Ne dede lade ca tu ziuu tu guiasa usiguii ca xcaadxi para chi nanda laaca'.

<sup>31</sup> Nga runi cayabe laatu lagataná ne laguietenala'dxi' chonna iza dede biete nisa lua bisiene cada tobi de laatu ridxi ne huaxhinni.

<sup>32</sup> Yanna la? hermanu ca'. Rusaana laatu lu ná Dios. Ne ma nanna tu napa tu stiidxa be ni rabi laatu pabiá' nacha'hui be ne laatu. Zacañé ni laatu para uzuhuaa chaahui tu. Ne zudii be laatu ni ma naguixhe chaahui be para icaa ca xpinni be.

<sup>33</sup> Qué nicá lua' plata nin oro nin xhaba stobi.

<sup>34</sup> Sínunque laatu nanna tu bine dxiiña para bibane nia cani cayacané naa.

<sup>35</sup> Ma bilué laatu de irá modo naquiiñe guni nu dxiiña para acané nu cani caquiiñe ni. Laguietenala'dxi xi na Señor Jesús: "Jma nayeche ni rudii que ni ricaa."

<sup>36</sup> Biluxé si uní' be nga la? bizuxibi né be irá ca', uní' né be Dios.

<sup>37</sup> Ne óraque biina irá ca' ne udiidxi dxichi ca laabe, gudó ca bixidu cue' xhaga be.

<sup>38</sup> Ucaná ladxitó' ca purti gudxi be laaca ma qué zuuya ru ca laabe. Ne óraque ucuua ca laabe yeudxiiba ca laabe lu barcu.

## 21

Ra biree Pablo ze  
Jerusalén

<sup>1</sup> Raqué undaa saa né du ca hermanu. Udxiba du lu

barcu biré' du ziuu du. Dede Cos yeguaana dxí du, ne sti dxi que uyuu du Rodas. Biré' du Rodas uyuu du Pátara.

<sup>2</sup> Raqué nuu ti barcu che Fenicia, para udxiba du lú ni, biré' du ziuu du.

<sup>3</sup> Neza ziuu du Siria bidu'ya du isla Chipre, biaana ni ladu biga'. Yeguaana dxí du Tiro, ti guidxi sti Siria, parti raqué nga rundaate barcu que irá ni né. Ne raqué biete du.

<sup>4</sup> Biyubi du ra nuu ca xpinni Cristu ne biaana né du laaca gadxe gubidxa. Ne pur ni gudxi Espíritu Santu laacabe, gudxi cabe Pablu cadi che Jerusalén.

<sup>5</sup> Bizaa si gadxe gubidxa que biré' du ziuu du. Yeuzuhuaa ca hermanu que laadu neza, laaca ne xheela ca ne ca xiñi ca', dede biré' du de ndaani guidxi que. Ne bizuxibi du lu yuxi uriá nisa, uní né du Dios.

<sup>6</sup> Oraque gudiidxi saa du, para udxiba du lu barcu. Laacabe bigueta cabe zibí cabe.

<sup>7</sup> Biré' du Tiro uyuu du Tolemaida, ne raqué biluxe viaje stidu lu nisa. Yeganna du ca hermanu de raqué ne biaana né du laaca ti dxi.

<sup>8</sup> Sti dxi que biree né Pablu laadu, uyuu du Cesarea. Yeguiete du ralidxi Felipe, tobi de gadxe diácono ni ulí cabe dxi ulí cabe Esteban que. Riree be rigüí be stiidxa Cristu.

<sup>9</sup> Napa be tapa xiñi dxaapa be ca'ru ichaganá'. Rui' né ca binni ni rabi Dios laaca'.

<sup>10</sup> Biaana du raqué chupa chonna gubidxa ne raqué nuu du beeda ti profeta de Judea lá Agabo.

<sup>11</sup> Ora beda ganna be laadu ucuua be cinturón sti Pablu. Bindiibi be ná be ne ñee be, ne na be:

—Ndi nga ni na Espíritu Santo. Sicarí zundiibi cabe xpixuaana cinturón ri Jerusalén ne zutiidi ca judíu laa lu ná cani cadi judíu.

<sup>12</sup> Ora bina diaga du xi na be la? irá du ucuá du lú Pablu cadi che Jerusalén, laadu ne ca binni raqué.

<sup>13</sup> Peru na rabi laadu:

—Xii ndi raca tu ruuna tu, cayuniná tu ladxiduá'. Ma nuaa listu cadi para líibe sia', sínunque ne para gate Jerusalén pur Señor Jesús.

<sup>14</sup> Bidu'ya si du qué ñanda nucuudxi du laabe la? uyú' dxí du ne rabi du laabe:

—Gaca ni na Dios.

<sup>15</sup> Udi'di si nga, gudixhe chaahui du stidu para uyuu du Jerusalén.

<sup>16</sup> Yené caadxi hermanu de Cesarea laadu. Lade cabe zeeda tobi de Chipre lá Mnasón, tobi ni ma xadxí runi cre Cristu. Ralidxi be yeguiete du.

*Ra yeganna Pablu Jacobo*

<sup>17</sup> Ora yendá du Jerusalén bichagalú ca hermanu que laadu ne stale enda nayeche'.

<sup>18</sup> Sti dxi que yené Pablu laadu yeganna du Jacobo. Raqué nuu irá ca hermanu gola sti ca xpinni Cristu.

<sup>19</sup> Biluxe si bigapa diuxi be laaca', byuí' né be laaca

irá modo biquiñe Dios laabe lade cani cadi judíu.

<sup>20</sup> Irá ca bisisaca ca Dios ora gunna ca ni, ne na ca rabi ca laabe:

—Peru ma nannu hermanu, stale judíu nuu rari ni ma runi cre, ne nabé rinanda ca ni na ley sti Moisés.

<sup>21</sup> Huayuí' né cabe laaca de lii, na cabe ra'bu ca judíu ni nuu lade cani cadi judíu cadi chi nanda ca ley que, cadi cu' ca seña sti Dios ca xiiñi ca', ne ma cadi chi nanda ca ca costumbre sti ca judíu.

<sup>22</sup> Yanna xi guni nu. Purti zadxiña irá cabe ora ganna cabe beedu'.

<sup>23</sup> Nannu xi gu'nu la? Nuu tapa hermanu lade du mayaca iluxe quixe ca ti promesa.

<sup>24</sup> Yené laacabe ra yu'du ro' ne irá tu laguni casi cá lu ley, ne gudixe irá ni iquiiñe cabe raqué. Oraque ma zanda igá ique cabe. Zacá zanna ca hermanu judíu lii laca ru'nu ni na ley, ne cadi dxandí ni caní' binni de lii ca.

<sup>25</sup> Ne de cani cadi judíu ni ma bini cre ca la? ma bicá' du gui'chi lú ca', gudxi du laaca cadi izaala'dxi ca irá nga. Sínuque ni naquiiñe si guni ca la? cadi go ca ni ma gu'ta lu bidó', nin rini, nin tutiica mani ixii yanni, ne cadi chu' né ca ni cadi xheela ca'.

<sup>26</sup> Para ucuaa Pablu idapa hombre que, ne sti dxi que yeguni né laacabe casi cá lu ley gaca'. Ne óraque biuu ndaani yu'du ro' yetidxi sacerdote padxí iluxe ni cayuni

cabe que para chiné cada tobi ni usiga'de Dios.

*Ra bigaa Pablu ndaani yu'du'*

<sup>27</sup> Ma para izaa gadxe gubidxa de ni cayuni cabe que biiya caadxi judíu de Asia nuu be ndaani yu'du ro', para bini yaya ca ca binni que ne unaaze ca laabe.

<sup>28</sup> Biccaa ca ridxi, na ca':

—Binni Israel ca', latá' acané tu igaa hombre ri'. Laabe nga canausiidi be binni cadi jneza runi ca judíu ne cadi guni ca ni na ley stinu, ne qué risaca yu'du ro' ri'. Ne cadi nga si, sínuque ma biguu be ni cadi judíu ndaani yu'du ri', ne zacá bini yuudxu be yu'du sti Dios.

<sup>29</sup> Uní' ca zaqué purti biyya ca canazá né be Trófimo, binni Efeso, ne zácaxa ca biuu né be laa ndaani yu'du ro'.

<sup>30</sup> Biasa nda irá binni guidxi que unaaze ca laabe zixubi yu ca laabe dede ulee ca laabe ndaani yu'du que ne biseegu ca' ra puerta'.

<sup>31</sup> Ucala'dxi ca ñuuti ca laabe peru uyuu tu yetidxi xaíque sti ca soldadu cayaca yaya irá binni Jerusalén.

<sup>32</sup> Para ucuaa ca soldadu stiu', ne caadxi capitán, ziuxooñe ca', yendá ca ra rí ca binni que. Peru ora bi'ya ca binni que laacabe biaana dxí ca de nigiñe ca Pablu.

<sup>33</sup> Oraque bidxiña xaíque que unaaze laabe ne bicaa ca soldadu undiibi ca laabe chupa cadena. Ne unaba diidxa tu laabe ne xi bi'ni be.

<sup>34</sup> Peru adxé adxé ni na ca binni que. Tobi na ndi', stobi na ndica'. Ni bi'ni ti xaíque que, biseenda laabe ra cuartel, purti qué ñanda ñene xi na ca binni que purirá ruidu cayuni ca'.

<sup>35</sup> Ora yendá cabe ñee escalera para nigi'ba cabe ñuu cabe ndaani cuartel que la? undani ca soldadu laabe purti ucalal'dxi ca binni que nuruuxha laabe.

<sup>36</sup> Nanda irá binni que laa-  
cabe zeeda ucaa ridxi:

¡Gati be!

*Ra uni' né Pablu irá binni*

<sup>37</sup> Ma chi nduu cabe laabe  
ndaani cuartel que, rabi be  
xaíque que:

—Zanda inié xixa la?

Oraque na xaíque que:

—Riníu' griegu pue la?

<sup>38</sup> Entonce cadi dxa egipciu  
bicaa lú gobiernu que lii pue  
la? dxa ni yené tapa mil  
bandidu ndaani gui'xhi que.

<sup>39</sup> Oraque na Pablu:

—Judíu naa. Gule Tarso.  
Naa nga binni de ti guidxi  
ni risaca lade ca guidxi sti  
Cilicia. Ne rinaba lii udiiu  
lugar naa inié nia ca binni ri'.

<sup>40</sup> Oraque na xaíque que  
zaa iní' be. Para bizuhuaa  
be lu escalera que, bi'ni be  
seña lu ca binni que igani ca'.  
Dxí do' uyuu ca óraque para  
bizulú be uní' be hebreu, na  
be:

## 22

<sup>1</sup> —Biche ne bixhoze ca',  
laucaa diaga, chi güe nia  
laatu xi cayune'.

<sup>2</sup> Ne ora bina diaga ca caní'  
be hebreu, stiidxa ca la? jma

rusi dxí do' uyuu ca'. Para na  
be:

<sup>3</sup> —Naa la? judíu naa. Gule  
Tarso, ti guidxi sti Cilicia,  
peru biniise ndaani guidxi  
ri'. Bisiidi Gamaliel naa  
casi pe na ley sti ca bixhoze  
gola nu. Biyube gune ni na  
Dios de idubi ladxiduá' casi  
cuyubi tu guni tu yanna.

<sup>4</sup> Uzabe nanda cani runi  
cre Jesús para guute laaca'.  
Unaaze hombre ne gunaa,  
biseguayuua.

<sup>5</sup> Sacerdote gola ne ca  
xaíque sti guidxi, laaca ñanda  
ñabi ca laatu dxandí ni, purti  
laaca bidii ca gui'chi naa  
yenía Damasco para inaaze  
cani nuu raqué, guenda nia  
laaca Jerusalén para acaná  
ca'.

*Ra byui' Pablu modo bini  
cre*

(Hch. 9.1-19; 26.12-18)

<sup>6</sup> Ne sicarí nga uca ra ziaa  
Damasco. Mayaca chindaya  
raqué, bia' galaa dxi mala  
bizaani ti biaani de ibá' naa.

<sup>7</sup> Biaba layú ne bina dia'ga  
caní' tuuxa: "Saulo, Saulo,  
xiñee canazabi nanda lu  
naa."

<sup>8</sup> Oraque rabe': "Tu lii,  
Señor." Para na be: "Naa nga  
Jesús de Nazaret ni canazabi  
nanda lu ca."

<sup>9</sup> Biiya cani ziniá que bi-  
aani que ne bidxibi ca', peru  
qué ñuna diaga ca xi gudxi be  
naa.

<sup>10</sup> Oraque rabe': "Xi gune,  
Señor." Para na Señor rabi  
naa: "Biasa uyé Damasco,  
raqué zabi cabe lii xi irá ma  
nexhe gu'nu'."

<sup>11</sup> Nabé bichuundu xtuxhu  
biaani que lua', ma qué

ñanda ñuuya'. Para unaaze cani ziniá que naya', yesaana ca naa Damasco.

<sup>12</sup> Nuu tobi hombre raqué lá Ananías, nabé rinanda ni na ley sti Moisés ne irá judíu de guidxi que ruzeete pabiá' nacha'hui be.

<sup>13</sup> Uyé be ra nuaa ne bidxiña be, na be: "Hermanu Saulo, ma chi iná lu sti tiru." Oraque bixele lua', biiya laabe.

<sup>14</sup> Ne na be rabi be naa: "Ma gulí Dios sti ca bixhoze gola nu lii para usiene lii xi racala'dxi' ne para gu'yu piou' Xiiñi be ni runi ni na be, ne iní né lii.

<sup>15</sup> Purti chi güi neu irá binni stiidxa Xiiñi be que. Zui' neu laaca irá ni bi'ya lu ne ni bina diaga lu'.

<sup>16</sup> Yanna xi cabeza lu'. Bi-asa, uyuu nisa ne bini cre Jesús ne unaba laa cuee xpecadu lu'."

*Ra byui' be Dios biseenda laabe ra nuu cani cadi judíu*

<sup>17</sup> Ora bigueta Jerusalén uyaa ndaaní yu'du ro', yenie nia Dios. Ne casi ñaca canié xcaanda',

<sup>18</sup> biiya Señor, na rabi naa: "Guiuba biree de Jerusalén, purti qué zuni cre cabe ra güi neu laacabe stiidxa'."

<sup>19</sup> Para rabe laabe: "Señor, nanna cabe uzaya irá yu'du', yendee cani runi cre lii. Biseguayuaa laaca ne gudiñe laaca'.

<sup>20</sup> Ne dxi biiti cabe Esteban ni canayui' stiidxa lu que, ne naa zuhuuaa raqué, rabe jneza ni cayuni cabe que.

Dede gupa xhaba cani biiti laabe que."

<sup>21</sup> Peru na be rabi be naa: "Uyé, purti chi useenda lii zitu, ra nuu cani cadi judíu."

*Ra gupa xaíque sti ca soldadu Pablu*

<sup>22</sup> Bia' de racá si bicaa diaga ca binni que Pablu. Bizulú ca bicaa ca ridxi:

—¡Gati be! ¡Qué iquiiñe di be para ibani be!

<sup>23</sup> Qué ñaana dxí ca de cucaa ca ridxi ne undisa ca xhaba ca lu bi, ne bichiacha ca yu dé.

<sup>24</sup> Biiya si xaíque que zaqué nuu ca binni que la? bini mandar chu' be ndaaní cuartel ne idiiñe be para cuee ruaa be diidxa xiñee cucaa ca binni que ridxi zaqué.

<sup>25</sup> Peru biluxe si bindiibi cabe laabe, na be rabi be ti capitán nuu raqué:

—Ñee cadi na gobiernu stitu cadi jneza quiñe tu ti romanu sin ihuinni xi bi'ni la?

<sup>26</sup> Ora gunna capitán que ni la? yetidxi xaíque que, na:

—Biiya gá xii nga chi gunu', purti romanu hombre ca.

<sup>27</sup> Para uyé xaíque que ra nuu be, ne rabi laabe:

—Ñee dxandí romanu lii la?

—Dxandí, rabi be laa.

<sup>28</sup> Oraque na xaíque que:

—Naa gudixe stale bidxi-chi para naca romanu.

Para rabi be laa:

—Peru naa lú ni gule'.

<sup>29</sup> Oraqueca bixele cani chi tiñe laabe que, bisaana ca laabe. Dede xaíque que, ora

gunna romanu laabe bidxibi, bindiibi si laabe.

*Ra zhuua Pablu lú justicia sti ca judú*

<sup>30</sup> Sti dxi que, racala'dxi xaíque que ganna xiñee caguu ca judiu xqueja be. Para bixhedxe laabe ne bisenda caa ca xaíque sti ca sacerdote ne irá ca justicia, ne gulee laabe, bichiña laabe ra nuu ca justicia que.

## 23

<sup>1</sup> Oraque biiya dxí be ca justicia ne rabi be laaca':

—Biche ca', dede nagasi huazaya jneza, ne nayá ladxiduá' nezalú Dios.

<sup>2</sup>—Lacapa ruaa be racá, na Ananías sacerdote gola, rabi cani nuu gaxha de laabe que.

<sup>3</sup> Para rabi be laa:

—Lii ru'nu siou' lii nacha'hui peru cadi dxandí ni. Laca zusaba ná Dios lii. Zubu racá para udxibú donda ique pa bichee nia ley. Peru laga lii cuchee neu ley purti cayuni mandar lu capa cabe ruaa'.

<sup>4</sup> Oraque na cani nuu raqué rabi laabe:

—Zacá nga icabi ruaa lu sacerdote gola sti Dios la?

<sup>5</sup> Para rabi be laaca':

—Biche ca', pa ñanna sacerdote gola laabe la? qué ninié zacá, purti cá lu Xqui'chi Dios: "Cadi cu' dí lu ni naca xaíque ndaani xquidxi lu'."

<sup>6</sup> Ne ora bi'ya be nuu caadxi saduceu raqué ne caadxi fariseu la? uni' be reciu nezalú justicia que, na be:

—Biche ca', naa fariseu naa, xiñi fariseu. Caguu cabe xqueja purti si rune cre zabani gue'tu'.

<sup>7</sup> Ra uní' be zaqué uyuu dinde ca fariseu ne ca saduceu ne undaa saa ca'.

<sup>8</sup> Purti ca saduceu na qué zabani gue'tu' ne cadi dxandí nuu ángel nin espíritu. Peru ca fariseu na dxandí nuu irá ni.

<sup>9</sup> Oraque uca ti ruidu raqué ne biasa caadxi maistru de ley ni za lade ca fariseu, na ca':

—Qué ridxela du gasti ni cadi jneza luguiá hombre ri'. Laga pa huandí espíritu o ángel huaní' né laabe ya'. Cadi galán ucá' lú nu Dios.

<sup>10</sup> Biiya si xaíque que jma rusi zirooba enda ridinde que, bisenda caa soldadu para cuee laabe lu ná cabe, cu' laabe ndaani cuartel, purti cadxibi gueda uxuixe cabe laabe.

<sup>11</sup> Sti gueela que bizuhuaa Señor lú be na rabi laabe:

—Cadi idxbi lu, Pablu. Cásica byuí' lu stiidxa Jerusalén zacaca naquiiñe güi lu ni Roma.

*Ra uni' stiidxa ca judú guuti Pablu*

<sup>12</sup> Sti dxi que uni' stiidxa caadxi judú na ca':

—Guniidé Dios laanu pa idó' no ne idé' nu ante guuti nu Pablu.

<sup>13</sup> Jma de cuarenta cabe uni' stiidxa cabe zacá.

<sup>14</sup> Uyé cabe ra nuu ca xaíque sti ca sacerdote ne ca xaíque sti guidxi, ne rabi cabe laaca':

—Ma uní stiidxa du gunidé Dios laadu pa idó' do ante guuti du Pablu.

<sup>15</sup> Laatu lausenda tidxi xaíque sti ca soldadu useenda laabe ra nuu tu casi ñaca racala'dxi tu ganna tu jma de laabe. Laadu ma cabeza du laabe neza para guuti du laabe.

<sup>16</sup> Peru beda ganda diaga xiñi ti biza'na be ni, para yetidxi ni laabe ra cuartel.

<sup>17</sup> Oraque guridxi be ti capitán rabi be laa:

—Yené hombre huiini ri ra nuu xaíque, purti napa be xiixa gabi be laa.

<sup>18</sup> Para ucuaa Capitán que hombre huiini que yené ra nuu xaíque, na:

—Guridxi dxa presu lá Pablu que naa. Unaba gueda nia hombre huiini ri ra nuu lu', purti napa xiixa gabi lii.

<sup>19</sup> Para unaaze xaíque que ná hombre huiini que, biree né laa ti ladu, ne na:

—Xii nga napu ga'bu naa.

<sup>20</sup> Para rabi laabe:

—Ma uní stiidxa ca judíu inaba ca lii chinéu Pablu ra nuu justicia ixí', casi ñaca racala'dxi ca ganna ca jma de laabe.

<sup>21</sup> Peru cadi guni cre lu laa-cabe, purti jma de cuarenta cabe cabeza cabe laabe neza. Ma uní stiidxa cabe gunidé Dios laacabe pa go cabe o gue cabe ante guuti cabe laabe. Ma cabeza si cabe xi na lu'.

<sup>22</sup> Oraque na xaíque que rabi hombre huiini que:

—Uyé yanna ne qué chi tidxu iruti pa ma beda tidxu ni naa.

*Ra yené cabe Pablu ra nuu Félix*

<sup>23</sup> Para guridxi xaíque que chupa capitán ne bini mandar cu' cabe listu chupa gayuua soldadu ne setenta ni dxí'ba mani' ne chupa gayuua ni naaze lanza, para che ca Cesarea huaxhinni que bia' las nueve.

<sup>24</sup> Ne guni chaahui ca mani quiba Pablu. Chi saana ca laabe ra nuu gobernador Félix, ne gu'ya ca qué izaaca be gasti neza.

<sup>25</sup> Ne bi'ni ti carta. Sicarí na ni:

<sup>26</sup> “Estimado gobernador Félix, lu gui'chi ri cugapa diu'xe lii. Naa nga Claudio Lisias.

<sup>27</sup> Unaaze ca judíu hombre ri', ucalá'dxi ca ñuuti ca laabe. Peru ora gunna romanu laabe la? yeniá soldadu yegaxha laabe lu ná ca'.

<sup>28</sup> Yeniá laabe ra nuu justicia stica', purti racaladxe ganna xiñee caguu ca xqueja be.

<sup>29</sup> Ne biiya cayuu xqueja be pur ni na ley stícabe, peru qué huayuni be gasti para gati be, nin para guieguyoo be.

<sup>30</sup> Ne ora gunna naguixhe ca judíu guuti laabe la? biseenda ca' laabe ra nuu lu'. Ne ma gudxe cani caguu xqueja be ca che ca ra nuu lu' para gabi ca lii xii nga bi'ni be. Sicarú guiaanu'.”

<sup>31</sup> Bixhinni si ucuaa ca soldadu que Pablu casi gudxi xaíque que laaca guni ca'. Yesaana ca laabe Antípatris.

<sup>32</sup> Sti dxi que bigueta ca soldadu que ra cuartel. Peru cani dxi'ba mani que la? yené ca laabe dede Cesarea.

<sup>33</sup> Ne ora yendá cabe Cesarea bidii cabe gui'chi que gobernador ne bisaana cabe laabe lu ná'.

<sup>34</sup> Biluxe biinda si gobernador gui'chi que, unaba diidxa padé laabe. Ne ora gunna de Cilicia laabe la?

<sup>35</sup> na rabi laabe:

—Zucaa dia'ga lii ora gueeda cani gueda nduu xqueja lu'.

Ne óraque bini mandar guiaapa be ndaani xpalaciu Herodes.

## 24

*Ra guta xqueja Pablu*

<sup>1</sup> Xcaayu gubidxa de ngue uyé Ananías sacerdote gola, laa ne xcaadxi xaíque sti ca judíu ne ti abogadu lá Tértulu. Ye tixhe ca xqueja Pablu lu gobernador que.

<sup>2</sup> Para bisenda caa cabe Pablu, ne óraque bizulú Tértulu caguu xqueja be, na:

—Señor gobernador Félix, pur lii nuu dxí xquidxi du, ne stale ni galán cayu'nu ndaani xquidxi du partí nuu xpiaani lu'

<sup>3</sup> Diuxquixe lii, señor Félix, saca cayu'nu irá nga irá ladu.

<sup>4</sup> Peru para cadi cuee du xhiiña lu la? rinaba lii gu'nu favor ucaa diaga lu laadu ti ratu huiini si.

<sup>5</sup> Bidu'ya du nuu hombre ri casi ti enda huará lade ca judíu. Canazá be idubi guidxilayú canautinde

be laaca'. Naca be xaíque sti ca xpinni Jesús de Nazaret que.

<sup>6</sup> Ne laca ucala'dxi be ñuni yuudxu be yu'du ro' stidu peru una'ze du laabe ne ucala'dxi du nudxi'ba du donda ique be casi na ley stidu.

<sup>7</sup> Peru biseenda Lisias caadxi soldadu yegaxha laabe lu ná du.

<sup>8</sup> Ne biseenda cani caguu xqueja be gueeda ra nuu lu'. Yanna lii zanda caañe lu laabe para gannu xiñee cagú' du xqueja be.

<sup>9</sup> Ca judíu ni nuu raqué na ca dxandí irá ni na Tértulu que.

*Ni uní' Pablu ra cayuu xqueja*

<sup>10</sup> Oraque bi'ni gobernador que seña Pablu iní'. Para na Pablu:

—Cayeche zanda inié nezalú lu xi huayune', partí nanna ma xadxí zuba lu de xaíque sti guidxi ri'.

<sup>11</sup> Deru raca doce dia de yendaya Jerusalén ziusisaca Dios. Zanda inaba diidxu pa cadi dxandí ni.

<sup>12</sup> Qué nindá cabe naa cadinde diidxa nia tuuxa, ne cadi cayune yaya binni, nin ndaani yu'du ro' ne nin ndaani yu'du huiini', nin ndaani guidxi que.

<sup>13</sup> Ne qué zanda uluí' cabe lii dxandí ni cugaani cabe lugua'ya ri'.

<sup>14</sup> Peru ndi huaxa dxandí': ruisisaca Dios sti ca bixhoze gola du, peru modo gudixhe be gusisaca nu laabe yanna. Nga nga na cabe neza ni cadi dxandí ca. Peru laca rune

cre irá ni bicaa Moisés ne ni bicaa ca profeta.

<sup>15</sup> Naa rune cre zusbani Dios gue'tu', cásica ni nacha'hui zaqueca ni cadi nacha'hui'. Ne nga ca runi cre cabe.

<sup>16</sup> Nga runi ruyube cadi uchee nia Dios ne cadi uchee nia binni.

<sup>17</sup> Xadxi huiini uzaya xquidxi binni ne óraque bigueta xquidxe para uidiee guna ne para uidiee ofrenda Dios.

<sup>18</sup> Ngue nga cayune', nuua ndaani yu'du ro', ma biluxe bine ni cá lu ley stidu guni du. Raqué nuua ora bi'ya caadxi judíu de Asia naa. Cadi lade stale binni nuua', ne cadi cayune yaya binni.

<sup>19</sup> Pa na cabe bine xiixa la? xiñee ca ngue qué ñeeda nduu xqueja ya'.

<sup>20</sup> Peru laca zanda iní' cani nuu rarí pa bidxela ca xiixa donda luguia'ya ra zuhuua nezalú ca justicia.

<sup>21</sup> Ni bine tia' la? bicaa ridxi lade cabe gudxe laa-cabe cudxiiba cabe donda ique partí rune cre zabani gue'tu'. Ne zándaca nga naa laani.

<sup>22</sup> Maca riene Félix xii nga evangeliu, para na:

—Guiaana gá ni de ora gueeda Lisias. Oraque gabe laatu xi gaca xa de laani.

<sup>23</sup> Ne gudxi be caadxi soldadu gapa Pablo Peru cadi cuee ca laa de guni ni racala'dxi', ne udii ca lugar guiuu ca xhamigu gu'ya laa.

<sup>24</sup> Xhupa xhonna gubidxa de ngue bedané Félix Drusila

xheela'. Judía xheela be que, ne guridxi be Pablo para güi né laacabe ximodo runi cre binni Jesucristu.

<sup>25</sup> Peru ora beda uzeete Pablo naquiiñe sa binni jneza ne cadi guni ni na ique, ne ziuu dxi cuidxi Dios cuenta binni la? bidxibi be ne na be:

—Bia' cá si. Guyé yanna, naa ma cuidxe lii ora gapa sti lugar.

<sup>26</sup> Ne laca cabeza be pa nudii Pablo vueltu para nunda be laa. Nga runi gatigá ma cabidxi be laa iní' né laabe.

<sup>27</sup> Peru lu chupa iza de ngue beda guiasa Félix, gurí Poncio Festo. Ne qué nundaa Félix Pablo partí racala'dxi chu' ca judíu pur laa.

## 25

*Ra zuhuua Pablo nezalú Festo*

<sup>1</sup> Chonna gubidxa de zuba Festo biree de Cesarea, uyé Jerusalén.

<sup>2</sup> Ora yendá raqué bidxiña ca xaíque sti ca sacerdote ne xcaadxi ni napa diidxa lade ca judíu, yenduu ca xqueja Pablo ra nuu be. Unaba ca laabe,

<sup>3</sup> na ca guni be ti favor laaca', indete be Pablo Jerusalén. Peru maca gudixhe chaahui ca cueza ca Pablo neza, guuti ca laa.

<sup>4</sup> Peru rabi be laaca yeguyoo Pablo Cesarea ne mayaca ibigueta be raqué,

<sup>5</sup> ne zanda chiné caadxi de cani runi mandar lade ca

laabe, ne raqué cu' ca xqueja  
Pablu pa bi'ni xiixa.

<sup>6</sup> Biaana be raqué bia'  
xhono o chii gubidxa si para  
bigueta be Cesarea. Sti dxi  
que gurí be jlugar be ne  
guridxi be Pablu.

<sup>7</sup> Ora bidxiña Pablu, gurí  
zisi irá judíu ni beeda de  
Jerusalén que laa. Cugaani  
ca stale donda naro'ba luguiá  
peru qué ñanda nusihuinni  
ca dxandí ni.

<sup>8</sup> Oraque bizulú Pablu  
gudxi laacabe cadi dxandí ni  
cugaani cabe luguiá que, na:

—Qué huachee nia ley sti  
ca judíu nin sti César ne qué  
huayune gasti ndaani yu'du  
ro'.

<sup>9</sup> Peru racala'dxi Festo  
guieche né ca judíu laa para  
na rabi Pablu:

—Ñee racala'dxu cheu'  
Jerusalén para quixhe cabe  
xqueja lu raqué la? Ne raqué  
guuya pa napu donda o pa  
co'.

<sup>10</sup> Peru na Pablu:

—Zuhuaa lu ná Cesár. Rarí  
nga gata xqueja', purti qué  
huachee nia ca judíu. Lii ca  
nannu ni.

<sup>11</sup> Pa huayune xiixa cadi  
jneza ne naquiiñe gate la?  
zaa gate'. Peru pa cadi  
dxandí ni cugaani cabe  
lugui'a ya ri la? iruti gapa  
xidé utiidi naa lu ná cabe.  
Rinaba utiidi lu naa lu ná  
César.

<sup>12</sup> Oraque uní' né Festo  
ca hombre nuu xpiaani ni  
racané laa, para na rabi  
Pablu:

—Ra nuu César unaba lu  
cheu' la? yanna ma cheu' ra  
nuu César.

*Ra zuhuaa Pablu nezalú  
Agripa*

<sup>13</sup> Udi'di xhupa xhonna gu-  
bidxa uyé rey Agripa ne  
Berenice, yeizaca ca Festo.

<sup>14</sup> Bindaa huiini cabe  
raqué, ngue runi gunda  
byuí' né Festo laacabe stiidxa  
Pablu, na:

—Bisaana Félix ti hombre  
rarí yeguyoo.

<sup>15</sup> Ne dxi guyaa Jerusalén  
bidxiña ca xaíque sti ca sac-  
erdote ne xcaadxi xaíque sti  
ca judíu, byuí' né ca naa sti-  
idxa be ne unaba ca useenda  
guute laabe.

<sup>16</sup> Peru rabe laaca cadi  
zacá di runi ca romanu,  
sínuque ribidxi nu ni cayuu  
xqueja que nezalú cani  
caguu xqueja para iní' pa  
dxandí ni na cabe que o pa  
co'.

<sup>17</sup> Nga runi ora beeda  
irá cabe rarí', qué nibeza  
nidi'di stale dxi, sínuque sti  
dxi queca gurié ne guridxe  
Pablu.

<sup>18</sup> Zaca naa nuzeete cabe  
bi'ni be xiixa naro'ba'. Peru  
cadi nga di nga laani,

<sup>19</sup> Sínuque cadinde né cabe  
laabe pur ni runi cre cabe ne  
pur ti gue'tu lá Jesús, ti Pablu  
na nabani ru be.

<sup>20</sup> Ne cumu qué ganna xi  
gune nia ni la? unaba diidxa  
laabe pa racala'dxi be che  
be Jerusalén ne raqué gaca  
chaahui ni.

<sup>21</sup> Peru unaba be zaa  
yeguyoo be laga si che be  
ra nuu César. Ngue runi  
bisaana laabe yeguyoo be  
laga si ganda useenda laabe.

<sup>22</sup> Oraque na Agripa:

—Naa laca racaladxe ucaa diaga laabe.

Para na Festo:

—Ixí ca ucaa dia'gu laabe.

<sup>23</sup> Sti dxi que bizuchaahui rey Agripa ne Berenice, biuu ca ndaani yoo ro' ra ritixhe binni queja lu Festo. Biuu né ca ca xaíque sti ca soldadu ne ca hombre napa diidxa ndaani guidxi que, ne irá binni cusisaca laaca'. Para bisenda caa Festo Pablu.

<sup>24</sup> Oraque na Festo:

—Señor rey Agripa ne irá tu cani nuu rari'. Chi güe nia laatu stiidxa hombre zuhuua rari'. Huaguu ca judíu xqueja be, cásica Jerusalén, zaqueca rari'. Ne cadi cayaana dxí ca de inaba ca gati be.

<sup>25</sup> Peru qué idxela dia' gasti donda luguiá be para gati be. Ne chi useenda laabe ra nuu Augustu César, partí nga unaba be.

<sup>26</sup> Peru qué idxela dia' xi ucaa lu xaíque stinne'. Nga runi bedaniá laabe ra nuu tu ne jma rusi ra nuu lu', rey Agripa, ti ora ma udaañe nu laabe la? ma ganda gapa xi ucaa'.

<sup>27</sup> Partí rului' enda huati si useenda tuuxa ra nuu César sin gucaa xiñee yeguyoo.

## 26

*Ni uni' Pablu nezalú Agripa*

<sup>1</sup> Oraque na Agripa rabi Pablu:

—Pa napu xi iní' lu de irá ni na cabe ca la? ma zanda iní' lu'.

Para undisa ná Pablu ne bizulú na:

<sup>2</sup> —Señor rey Agripa, cayeche zuhuaa lú lu yanadxí para inié xi pe huayune de ni cugaani ca judíu luguia'ya ca,

<sup>3</sup> jma rusi partí lii riene lu modo nabani ca judíu ne irá ni ricaa yu cabe lade cabe. Nga runi rinaba lii cadi ixhacala'dxi lu ucaa diaga lu naa.

<sup>4</sup> Irá ca judíu nanna xi-modo uzaya ndaani xquidxe ne ndaani guidxi Jerusalén, dede dxi nahuiine'.

<sup>5</sup> Laacabe nanna dxichi cabe, ne ñanda niní' cabe pa ñacala'dxi cabe, dede dxi nahuiine' fariseu naa. Ne ca fariseu nga jma rinanda ley sti ca judíu.

<sup>6</sup> Ne yanna nuua rarí cudxiiba cabe donda ique partí rune cre zadxiña dxí usibani Dios gue'tu casi bidii stiidxa ca bixhoze gola du.

<sup>7</sup> Irá ni za de idubi doce xiñi Israel cabeza idxiña dxí que. Nga runi cadi cusaana dxí ca de usisaca ca Dios ridxi ne huaxhinni. Ne pur nga ca caguu ca judíu xqueja', rey Agripa.

<sup>8</sup> Laga laatu ya', xi na tu. Nee na tu qué zanda usibani Dios gue'tu la?

<sup>9</sup> Zacaca bine chiqué, rabe jneza cayune', cuyube guna irá ni ganda para uniteluá' stiidxa Jesús de Nazaret.

<sup>10</sup> Zacá bine Jerusalén. Ne stiidxa ca xaíque sti ca sacerdote biseguayuaa stale xpinni be. Ne ora biiti cabe laaca', ne naa unié zaa gati ca'.

<sup>11</sup> Stale tiru bine na'ya laaca para nusaana ca ni

runi cre ca'. Zacá bine irá ca ra yu'du', ne tantu cadxiiche nia laaca dede uzabe nanda laaca xquidxi binni.

*Ra byui' Pablu modo bini cre*  
(Hch. 9.1-19; 22.6-16)

<sup>12</sup> Nga ca cá ique guné biree ziaa Damasco. Ziniá xqui'chi ca xaíque sti ca sacerdote.

<sup>13</sup> Guca ni bia' galaa dxi, señor rey, ziaa neza, mala biyya ti biaani de ibá' jma ruzaani que gubidxa. Ne bizaani ni laadu, naa ne cani ziniá que.

<sup>14</sup> Irá du biaba du layú, ne óraque bina dia'ga caní' tuuxa diidxa hebreu na: "Saulo, Saulo, xiñee canazabi nanda lu naa. Cayuniná lu laca lii casi runi buey ora riguu ñee punta puya."

<sup>15</sup> Oraque rabe': "Tu lii ya', Señor." Para na Señor: "Naa nga Jesús ni canazabi nanda lu ca.

<sup>16</sup> Biasa bizuhuaa. Unié nia lii para gu'nu xhiñña', para güi lu irá ni cayuuya lu ri', ne ni chi ulué rua' lii.

<sup>17</sup> Zula'ya lii lu ná ca binni xquidxi lu' ne lu ná cani cadi judíu. Chi useenda lii ra nuu ca

<sup>18</sup> para güi neu laaca xii nga ni dxandí', ti ixele xquenda biaani ca ne usaana ca irá enda huati stica', uyubi ca xii nga jneza. Ne cadi chi nanda ca ni na binidxaba' sínuque ni na Dios, ne guni cre ca naa, ti gaca perdonar ni huachee ca' ne icaa ca ni ma gudixhe Dios gudii cani ma biá ladxidó'."

*Ra byui' be modo bizuuba be stiidxa Dios*

<sup>19</sup> Zacá nga laani, Señor rey Agripa, bizuuba stiidxa ni uní né naa de ibá' que.

<sup>20</sup> Ne casi bizuluá' byue nia ni ca binni Damasco. Gudxe laaca inaba ca perdón Dios, udxii lú ca jneza be ne ibani ca jneza ti ihuinni ma adxé laaca'. De raqué biree yegué ni Jerusalén ne idubi Judea ne lade cani cadi judíu.

<sup>21</sup> Pur nga unaaze ca judíu naa ndaani yu'du ro', ucaladxi ca ñuuti ca naa.

<sup>22</sup> Peru huayacané Dios naa, nga runi dede nagasi du' cayué stiidxa'. Ne cayué nia ni ni risaca ne ni qué risaca. Irá ni canié ri' maca bicaa ca profeta ne Moisés chi gaca cani.

<sup>23</sup> Ne ndi nga ni bicaa cabe que: napa Cristu xidé gacaná dede gati'. Peru nirudó' laa ibani de lade gue'tu ne zui' né binni modo ilá, cáscica binni laadu zaqueca binni sti guidxi.

*Ra biyubi be nucuudxi be Agripa*

<sup>24</sup> Zacá caní' Pablu para ihuinni gasti donda luguiá' ora uní Festo reciu na:

—Cayaca i'cu, Pablu. Tantu huayuunda lu de ma ze xpiaani lu'.

<sup>25</sup> Para na Pablu:

—Co', señor Festo. Cadi cayaca di ique', sínuque cayué diidxa jneza, ne dxandí ni cayabe laatu ca.

<sup>26</sup> Qué ridxibe inié ni purti rarí nuu rey Agripa, nanna dxandí ni. Nanna dxi'che

gunna be guca ni, partí cadi naga'chi guca ni.

<sup>27</sup> Runi cre lu ca profeta la? rey Agripa. Nanna runi cre lu'.

<sup>28</sup> Para na Agripa:

—Xcaadxi si ma ñu'nu naa xpinni Cristu.

<sup>29</sup> Oraque na Pablu:

—Pa xcaadxi si o pa ri-aadxa ru', peru tila na Dios cadi lii siou' sínunque ne irá cani cucaa diaga naa ri', gueda gaca ca casi naa, casi rune cre, cadi casi caya cadena ri'.

<sup>30</sup> Casi biluxe uní' Pablu biasa rey Agripa ne Festo ne Berenice ne cani zuba né laaca raqué.

<sup>31</sup> Ne ora biree ca na ca':

—Qué huayuni di hombre ri gasti para gati', nin para guieguyoo.

<sup>32</sup> Ne na Agripa rabi Festo:

—Ñanda niree be pa ñaca qué ninaba be ñe be ra nuu César.

## 27

*Ra biseenda cabe Pablu Roma*

<sup>1</sup> Ne ora ma gudixhe cabe che Pablu Italia la? bisigapa cabe laa ne xcaadxi presu ti capitán lá Juliu, ni naca xáique sti batallón sti Augustu César. Ne naa nuua lade cabe.

<sup>2</sup> Laca nuu Aristarco, binni Tesalónica de Macedonia. Irá du udxiba du ndaaní ti barcu de Adramitio ni chi iree che irá puertu sti Asia. Biré' du ziui du.

<sup>3</sup> Sti dxi que yendá du Sidón. Nacha'hui guca Juliu ne Pablu, bidii lugar yeganna

be ca xhamigu be para udii ca ni caquiene be.

<sup>4</sup> Biré' du Sidón udidi du Isla Chipre. Tantu cudxigueta bi laadu la? biyubi du ladu que partí qué riguiñe bi.

<sup>5</sup> Lu nisa que ziui du udidi du Cilicia ne Panfilia dede yendá du Mira, ti guidxi sti Licia.

<sup>6</sup> Raqué bidxela capitán que ti barcu de Alejandría ni che Italia. Para bidxiiba laadu lú ni.

<sup>7</sup> Bindá' du ne bidii dxiiña laadu para yendá du gaxha Gnído partí cudxigueta bi laadu. Nga runi biyubi du neza huaxié' rinaaze bi ra udidi du isla Creta. Neza que riaana guidxi Salmón.

<sup>8</sup> Ne stale dxiiña uzá du gaxha de isla que dede yendá du ti lugar lá Buenos Puertos, gaxha ti guidxi lá Lasea.

<sup>9</sup> Nabé ma bindá' du neza ne ma bidxiña dxi uzulú tiempu nanda, ma naxoo sa binni lu nisa. Ngue runi na Pablu rabi laacabe:

<sup>10</sup> —Hombre ca', ruuya nabé naxoo viaje ri'. Zaniti barcu ri' ne irá ni dxá ndaani'. Ne cadi nga si, zándaca dede ne laanu.

<sup>11</sup> Peru qué nulabi capitán ni ziné laadu que ni na Pablu, sínunque jma bicaa diaga ni na ni ziusá barcu que ne xpixuaana ni.

<sup>12</sup> Cadi galán raqué para tidi binni tiempu nanda. Ngue runi casi irá cabe na cabe jma galán iré' du raqué idu'ya du pa ganda chindá du Fenice, ti puertu sti isla queca ra qué lica rinaaze bi.

Ne raqué uti'di du ca beeū  
nananda que.

*Ra biete bi yooxho lu  
nisadó'*

<sup>13</sup> Casi bi'ya cabe bindubi  
ti bi nisa na cabe ma chuu  
du. Para biré' du ne udidi du  
gaxha isla Creta que.

<sup>14</sup> Laati du biré' du biete  
ti bi yooxho rabi cabe "Euro-  
clidón" unaaze barcu que.

<sup>15</sup> Biyubi du ñuu du, peru  
bidu'ya si du qué ñanda, bidí'  
du lugar chiné ni laadu ladu  
na ni.

<sup>16</sup> Udidi du ti isla huiini  
lá Claudia ra jma huaxié' ri-  
naaze bi. Zeda xubi yu du ti  
canuá huiini ne dxiiña para  
ulú' du ni ndaani barcu que.

<sup>17</sup> Undisa si du ni la? uluu  
cabe doo barcu que ti cadi  
ibiá. Ne óraque undete  
cabe vela partí cadxibi cabe  
guiaazi barcu que ndaani  
yuxi ni rabi cabe Sirte, ne  
bidii cabe lugar chiné bi ni.

<sup>18</sup> Sti dxi que biiya si cabe  
cadi cayaana dxí bi que la?  
bisa'bi cabe irá bultu ziné  
barcu que.

<sup>19</sup> Raguionna gubidxa que  
ucuaa du irá traste sti barcu  
que bisa'bi du ndaani nisa.

<sup>20</sup> Xadxi qué nihuinni gu-  
bidxa nin luceru ne cadi  
cayaana dxí bi que. Mápeca  
rabi du qué zalá du.

<sup>21</sup> Ma stale gubidxa biaana  
du sin idó' do, bizuhuaa  
Pablu lade cabe, na rabi laa-  
cabe:

—Hombre ca', pa nucaa di-  
aga tu naa la? qué niré' nu de  
Creta para cadi nizaaca nu  
irá ni cazaaca nu ri'. Ne qué

nuniti nu irá ni ma biniti nu  
ri'.<sup>22</sup>

Peru yanna cayabe laatu  
cadi idxibi tu. Nin tobi  
de laanu qué zati nu, neca  
barcu ri zanitilú.

<sup>23</sup> Laatu nanna tu sti Dios  
nna ne rune xhiñña be. Nuchi  
biseenda be ti ángel ra nuaa',

<sup>24</sup> na rabi naa: "Cadi idxibi  
lu, Pablu, partí naquiiñe chi  
uzuhuaa lu lu César. Ne pur  
lii zulá Dios irá cani zinéu  
ca."

<sup>25</sup> Nga runi cayabe laatu  
hombre ca', cadi idxibi tu,  
partí rune cre zuni Dios ni  
bisenda tidxi naa ca.

<sup>26</sup> Peru napa nu xidé iré' cá  
nu lu xiixa isla.

<sup>27</sup> Ma raca chupa semana  
de canacaa bi que laadu  
lu nisa, ti gueela bia' galaa  
gueela ra zididi du nisadó'  
Adria bidii cani runi dxiiña  
lu barcu que cuenta ma  
cadxiña du uriá.

<sup>28</sup> Para uluu bia' cabe  
pabiá' zia' raqué. Napa ni  
treinta y seis metru. Uzá si  
du stindaa bigueta uluu bia'  
cabe sti tiru. Raqué ma napa  
ni veintisiete metru.

<sup>29</sup> De raqué ma bidxibi  
cabe gueda idxela saa ni  
guie, para bisaba cabe tapa  
ancla atrá de laani, ne para  
laacabe pa ñanda si ma nirá  
gueela'.

<sup>30</sup> Oraque gucala'dxi cani  
runi dxiiña lu barcu que  
nuxooñe ca'. Bi'ni ca sica  
ni zindete ca ca ancla nuu  
delante que. Abade canuá  
huiini que candete ca'.

<sup>31</sup> Peru na Pablu rabi  
capitán ne ca soldadu que:

—Pa qué guiaana ca hom-  
bre ca ndaani barcu ri la?

qué zalá di tu.

<sup>32</sup> Oraque bichuugu ca soldadu que stoo canuá huiini que ne bidii ca lugar ze ni.

<sup>33</sup> Ma zedará gueela gudxi Pablu laacabe go cabe xiixa, na:

—Ma chupa semana qué huayasi tu ne qué huayó to gasti'.

<sup>34</sup> Rinaba laatu go to ti gapa tu stipa. Ne cadi chu' tu xizaa, gasti qué zazaaca tu.

<sup>35</sup> Biluxe si uní be nga ucuaa be ti pan, bidii be di uxquixe Dios nezalú irá ca'. Para undaa be ni ne bizulú be cayó be.

<sup>36</sup> Oraque ru ma qué nidxibi ca', ne irá ca gudó ca'.

<sup>37</sup> Bia' chupa gayuaa setenta y seis du nuu du ndaani barcu que.

<sup>38</sup> Biluxe si gudó cabe bia' ucala'dxi cabe, bisaba cabe trigu ziné cabe ndaani nisa para isisi barcu que.

### *Ra biaazi barcu*

<sup>39</sup> Ora birá chaahui gueela biiya cani runi dxiiña lu barcu que nuu ra nabidxi, peru qué runibiá' ca raqué. Peru biiya ca nuu ti manga sti nisadó' raqué, nexhe yuxi idubi uriá. Ne na ca pa ganda uchiña ca barcu que raqué.

<sup>40</sup> Para bichuugu ca ca doo sti ca ancla que, bisaana ca cani ndaani nisadó', ne bisaata ca ca doo liibi timón sti barcu que. Oraque undisa ca vela ni nuu delante que, para inaaze bi ni, ne zaqué ma zidxiña ni lu yuxi.

<sup>41</sup> Peru mala yeudxiga ique ni ndaani ti loma huiini yuxi. Qué lica ñanda ru niniibi ni. Ne ma careza atrá ni ra cadxela saa ola.

<sup>42</sup> Ucalá'dxi ca soldadu ñuuti ca ca presu ti cadi xhu'ba ca uxooñe ca'.

<sup>43</sup> Peru racala'dxi capitán que ulá Pablu. Ngue runi qué nudii lugar ñuni cabe ni, sínunque na, cani nanna xhu'ba la? guiaba gá nisa que, sa niru iree lu yuxi.

<sup>44</sup> Ne ca xcaadxi que, ni biree lu tabla, ni biree lu yaga ndahui sti barcu que. Zacá nga bilá irá cabe.

## 28

### *Ra nuu cabe Malta*

<sup>1</sup> Ora ma irá du nuu du lu yuxi que, gunna du Malta lá isla que.

<sup>2</sup> Nabé nacha'hui uca ca binni raqué ne laadu. Bi'ní ca ti gui partí nananda raqué ne cayaba nisa guie. Ne guridxi ca laadu idxiña du cue' gui que idxaa du.

<sup>3</sup> Bitopa Pablu chupa ndaa yaga bidxi uluu lu gui que. Ne ora unaaze gui ni, biree yaande ti beenda', ucuá lu ná be.

<sup>4</sup> Ora bi'ya ca binni raqué nanda beenda que lu ná be, na ca':

—Señaladu huayuuti hombre ca binni. Necá bilá be ndaani nisadó' peru ma chi gati be para quixe be ni nuzaabi be.

<sup>5</sup> Peru udxibi ná be, biaba beenda que lu gui, ne gasti qué ñaca be.

<sup>6</sup> Irá ca cabeza si ca idxá be gui o mala guiba be gati be. Peru xadxi uleza ca ne biiya ca gasti qué ñaca be. Oraque ma adxé ni na ca', ma na ca ti dios laabe.

<sup>7</sup> Gaxha de ra cadxaa du que nuu layú sti Publio ni runi mandar isla que. Gudxi be laadu chuu du ralidxi be. Nabé bilabi be laadu ne biaana du raqué chonna gubidxa.

<sup>8</sup> Ca dxi que pe huará bixhoze be, nexhe né xindzá' ne yuba ndaani'. Para uyé Pablu ra nuu, ne biluxe si uní né Dios ula'qui ná luguiá be, bisianda laabe.

<sup>9</sup> Ora gunna ca binni que ni la? bedané ca stale binni huará, ne laca bianda ca'.

<sup>10</sup> Ne bisiga'de ca laadu stale cosa. Ne zaqueca ora ma chuu du, bidxiiba ca irá ni iqui'ñe du lu barcu.

### *Ra yendá Pablu Roma*

<sup>11</sup> Ma udi'di chonna beeú de nuu du raqué, ucuaa du ti barcu de Alejandría ni bitiidi ca beeú nanda raqué. Punta barcu que cá chupa bidó', Cástor ne Pólux.

<sup>12</sup> Yendá du puertu Siracusa ne biaana du raqué chonna gubidxa.

<sup>13</sup> De raqué biré' du uzá du lu nisa ti uriá ti uriá dede yendá du Regio. Sti dxi que bizulú bindubi ti bi nisa, ne lu sti dxi que yendá du Puteoli.

<sup>14</sup> Raqué bidxaaga du caadxi hermanu ne unaba ca laadu guiaana né du laaca ti semana. De raqué biré' du ziuu du Roma.

<sup>15</sup> Gunna ca hermanu de Roma ma zidxiña du para yendeza ca laadu. Caadxi beda ndeza laadu Apio ne xcaadxi biaana Tres Tabernas. Ora bi'ya Pablu laacabe, bidii diuxquixe Dios ne bieche ladxido'.

<sup>16</sup> Ora yendá du Roma bisaana capitán ziné laadu que irá presu lu ná xaíque sti ca soldadu de raqué. Peru bisaana cabe Pablu ndaani ti yoo, laa si ne ti soldadu cayapa laa.

### *Ra byui' Pablu stiidxa Cristu Roma*

<sup>17</sup> Lu chonna gubidxa de yendá du, guridxi Pablu ca xaíque sti ca judíu de raqué. Ne ora bidxiña ca rabi be laaca':

—Biche ca', qué huachee nia dia' ca binni xquidxi nu, nin ni bisaana ca bixhoze gola nu guni nu. Peru unaaze cabe naa Jerusalén, bitidi cabe naa lu ná ca romanu.

<sup>18</sup> Ne unaba diidxa ca romanu naa ximodo ni. Ne ora bi'ya ca qué gapa donda para gate la? ucalá'dxi ca nundaa ca naa.

<sup>19</sup> Peru qué niná ca binni laanu. Ngue runi gupa xidé unaba tide lu ná César neca qué gapa xi pur cuaa xqueja ca binni xquidxe'.

<sup>20</sup> Ne guridxe laatu para guuya laatu, ne para güe nia laatu diidxa'. Liibe cadena ri purti rune cre ma beeda dxa ni cabeza irá xixé judíu.

<sup>21</sup> Oraque na ca rabi ca laabe:

—Qué huacaa du gasti gu'i'chi de Judea ra nuzeete ca lii, nin ca binni laanu de

raqué ni beeda rari qué niní ca pa cuchee lu'.

<sup>22</sup> Peru racala'dxi du ucá' diaga du lii, xi na lu'. Purti irá ladu caní' cabe religión cubi ri.

<sup>23</sup> Para gudixhe cabe ti dxi gaca ni. Ne ora gunda dxi que bidxiña stale binni ra nabeza be. Bizulú be siadó' ne dede bidxí layú cayuí né be laaca de enda runi mandar sti Dios. Biquiñe be ni bicaa Moisés ne ni bicaa ca profeta para ucuudxi be laaca guni cre ca Cristu.

<sup>24</sup> Nuu caadxi ucuua ni uní' be que, peru nuu xcaadxi qué ñuni cre.

<sup>25</sup> Ma qué ñuu ca tobi si ne bizulú ca caree ca'. Para na be rabi be laaca':

—Rari pe nga riaba ni bisiní' Espíritu Santu profeta Isaías chiqué ra na:

<sup>26</sup> Uyé ra nuu ca binni que ne gudxi laaca zuna diaga ca Peru qué ziene ca', ne zuyubi lú ca Peru qué zuuya ca'.

<sup>27</sup> Purti ma biguidxi ladxidó' ca',

ne ma biseegu ca diaga ca'.

Ne biseegu ca lú ca

ti cadi gu'ya ca ne guna diaga ca',

ti cadi guiene ca', uyubi ca naa para ula'ya laaca', na Dios.

<sup>28</sup> Oraque na Pablu:

—Laganna dxichi ma cucheeche Dios stiidxa lade cani cadi judíu ti ganna ca ximodo ilá ca'. Ne laaca huaxa zucaa diaga ca'.

<sup>29</sup> Ora bina diaga cabe ni uní' Pablu ca, birá cabe biree

cabe ziccaa yu cabe ni lade cabe.

<sup>30</sup> Chupa iza biaana Pablu raqué ndaani yoo caguixe que, ne bieche né irá ni yeganna laa.

<sup>31</sup> Tutiica byuí' né be de enda runi mandar sti Dios ne stiidxa Señor Jesucristu. Iruti nibee laabe de ñuni be ni.

# GUI'CHI BICAA SAN PABLULU CA XPINNI CRISTU NI NUU ROMA

<sup>1</sup> Naa nga Pablu. Rune xhiiña Jesucristu. Uni' né be naa gaca apóstol ne ulee chu be naa para canayué de evangeliu sti Dios.

<sup>2</sup> Cadi deru yanna cayete evangeliu ri', sínuque maca bizeete Dios ni dede chique lu ca gui'chi ni bicaa ca profeta sti'.

<sup>3</sup> Rusiidi evangeliu ri de Xiiñi be ni gule lade ca xiiñi David ra beda aca binni guidxilayú, o gabi nu Jesucristu Señor stinu.

<sup>4</sup> Pur Espíritu sti Dios ni napa be biasa be de lade gue'tu ne stale enda nandxo', ne zacá bihuinni Xiiñi Dios laabe.

<sup>5</sup> Pur laabe uca Dios nacha'hui ne naa, ne biseenda naa gune xhiiña irá guidxi ti guni cre irá binni laabe ne guni ca ni na be.

<sup>6</sup> Ne lade ca binni que zeeda tu laatu, purti ma uni' né Dios laatu para aca tu xpinni be.

<sup>7</sup> Cuseenda gui'chi ri ra nuu tu, hermanu ca', casi nuu tu ndaani guidxi Roma ca. Nadxii Dios laatu ne ulí laatu para aca tu xpinni. Yanna, Dios Bixhoze nu ne Señor Jesucristu cu' ndaaya laatu ne quixhe dxí ladxidó' to.

Racala'dxi Pablu che Roma

<sup>8</sup> Casi uzuluá' racaladxe inié nia Jesucristu udii di uxquixe Dios pur irá tu, purti irá ladu ma cuzeete cabe pabiá' napa tu fe ne Dios.

<sup>9</sup> Rune xhiiña Dios ne rue de evangeliu sti Xiiñi be de idubi ladxiduá'. Ne laabe ñanda ñabi be laatu, qué riaana dxie de uezete laatu lú be ora rinié nia laabe.

<sup>10</sup> Laca rinaba lú be tilasi chu' dxi ganda chaa ra nuu tu, ne pa nga ni racala'dxi be, yanna ca ziaa'.

<sup>11</sup> Purti napa stale gana guuya laatu para acanía laatu guiene chaahui tu stiidxa Dios ti uzuhuua chaahui tu.

<sup>12</sup> Ne zacá zacané saa nu pur fe stinu, purti zacané tu naa pur fe stitu, ne zacanía laatu pur fe stinne'.

<sup>13</sup> Hermanu ca', racaladxe ganna tu, stale tiru huayabe ñaa ra nuu tu, peru dede naga si qué huayanda di'. Napa gana gune dxiiña lade ca binni xquidxi tu para ganda gune ganar caadx de laaca para Cristu, cásica huayune ndaani xcaadx guidxi ra nuu cani cadi judíu, cani qué ñunibiá' gá Dios.

<sup>14</sup> Naa napa xidé güe sti idxa Cristu lade irá', cásica ra nuu cani nabeza ndaani guidxi ro', zaqueca ra nuu cani nabeza gui'xhi', cásica ra nuu cani nuu xpiaani', za queca ra nuu cani huaxié' riene.

<sup>15</sup> Ngue runi para naa naga si ca ñaa ra nuu tu, purti laca napa stale gana güe de

evangeliu lade irá tu casi nuu tu Roma.

*Nandxó' evangeliu*

<sup>16</sup> Qué rituí di lua güe stiidxa Cristu, purti laape ni nga ni riquiiñe Dios para ulá irá cani guni cre ni. Nirudó' beeda ni ra nuu ca judíu, ne óraque ra nuu cani cadi judíu.

<sup>17</sup> Rusiene ni laanu ruxhá Dios stonda nu ra guni cre nu, ne gasti ru sti modo. Casi cá lu Xqui'chi Dios, ra na: "Ni ma bixá stonda ra bini cre la? zabani."

*Stonda binni guidxilayú*

<sup>18</sup> Peru xiana sti Dios nuu luguiá irá cani qué rulabi laa, ne irá cani ruchee, purti pur irá ni cuchee cabe que, qué ganda ihuinni ni jneza.

<sup>19</sup> Nanna ca cabe tu laabe ne ma biene cabe bia' zanda guiene binni de laabe, purti ma bisiene be laaca'.

<sup>20</sup> Necá qué zanda gu'ya cabe enda nandxó' stibe ni qué ziuu dxi iluxe, ne qué zanda gu'ya cabe ximodo laabe, peru dede dxi bizá' be guidxilayú rihuinni dxichi tu naca be pur irá ni bi'ni be, para cadi iní cabe qué ganna cabe.

<sup>21</sup> Ucabiá' ca cabe laabe, peru qué ñapa cabe laabe casi Dios, ne qué nudii cabe diuxquixe laabe, laga uca huati ique cabe ne bicahui xquenda biaani cabe.

<sup>22</sup> Gucala'dxi cabe ñuu xpi-aani cabe Peru laga uca huati cabe.

<sup>23</sup> Bisaana cabe enda nandxó' sti Dios, ne lugar de ñapa cabe Dios ni qué ziuu

dxi gati', gupa cabe bidó' ni bizá' cabe chura binni guidxilayú ni rati, ne chura mani huiini', ne irá clase mani', ne chura beenda'.

<sup>24</sup> Ngue runi bisaana Dios laacabe guni cabe enda nayuudxu ni cá ique cabe que, ne guni cabe ni cadi jneza, ne zaqué bi'ni dxaba saa cabe xcuerpu cabe.

<sup>25</sup> Purti qué ñuni cre cabe ni dxandí ni bilu'í Dios laacabe que, laga yenanda cabe enda rusiguii. Gunaxhii cabe ni uyá' ne bisisaca cabe laa, ne qué ñanaxhii cabe ni bizá' irá xixé ni. Laa nda nga qué ziaana dxí de isaca. Amén.

<sup>26</sup> Nga runi bisaana Dios laacabe aca yuudxu cabe modo gapa cabe gana. Gu-naa ma qué ñuni casi runi gunaa sínuque uyuu né ca laca gunaa.

<sup>27</sup> Ne hombre bisaana de ñacabiá' gunaa ne uca ique ne hombre casi laa. Hombre ne hombre bi'ni ca irá enda nayuudxu sin nituí lú ca'. Zacá beda iree guiaana cabe pur ni bichee cabe que.

<sup>28</sup> Biiya si Dios ma qué na cabe ulabi cabe laa, bisaana laacabe guni cabe ni na xquenda biaani huati cabe, enda qué iquiiñe'.

<sup>29</sup> Ne jma rusi yenanda cabe irá ni cadi jneza: rapa cabe jnadxii cabe, riula'dxi cabe quite cabe ique stobi, qué ridxá cabe ne sti si cabe, runi cabe ni nadxaba', rache lú cabe sti stobi, ruuti cabe binni, ridinde cabe, rusiguii cabe, ne ni na cabe que, nga laani.

<sup>30</sup> Qué rusaana dxí cabe de iní' cabe binni, riguixhe cabe mal stobi, raca nanala'dxi cabe Dios, ricabi ruaa cabe, raca cabe nayá', ruchá cabe enda naró' stícabé, ne de laacabe riale irá enda nayudxu'. Qué ruzuuba cabe stiidxa bixhoze cabe nin stiidxa jñaa cabe,

<sup>31</sup> qué riene cabe ne qué runi cumplir cabe, qué ranaxhii cabe, qué runi perdonar cabe, ne qué riá cabe.

<sup>32</sup> Necá nanna cabe xi na Dios ne nanna cabe naquiiñe gati cani guni irá nga, peru cadi nga si runi cabe sínunque laca rieche cabe gu'ya cabe uchée stobi bia' cuchee cabe.

## 2

### Dios runi jneza

<sup>1</sup> Yanna lii, hombre, pur irá ni bina diaga lu ca, cadi ulabi lu tutiica naca lu', partí qué gapu xidé udxiba lu donda ique stobi. Pa udxiba lu ni luguiá stobi la? laca luguió' guiaana ni, partí ni cudxiiba lu luguiá stobi que, ngue ca ru'nu'.

<sup>2</sup> Laanu nanna dxichi nu, Dios runi jneza rudxiiba donda luguiá cani runi ca nga.

<sup>3</sup> Ne lii, hombre, pa rudxiibu donda luguiá stobi ni cayuni cani, ne zaqueca cayu'nu la? ñee ruzulú lu luguiá si be udxiba Dios donda, ne cadi luguiá lu la?

<sup>4</sup> Partí si ruuya lu nabé nacha'hui Dios ne rudii lugar uchiichi cabe laa, ne qué rixhacala'dxi', nga runi qué

ridxibi lu laa la? ñee ca'ru udiiu cuenta xi pur cadi caxhacala'dxi be la? Cabeza be tílasí chu' dxi iguudxi ladixdó' lo'.

<sup>5</sup> Peru lii, naguidxi ladixdó' lo ne cadi cayu'nu pur iguudxi ni. Ngue runi cutopa lú lu stonda lu para dxi cuidxi be cuenta binni, partí zabi be laaca xi huayuni ca'.

<sup>6</sup> Zaguixe be cada tobi bia' bi'ni'.

<sup>7</sup> Zudii be enda nabani ni qué zaluxe irá cani qué ixhacala'dxi de guni jneza, cani ucaa ique guni ni chul'a'dxi be, ne uyubi ni dxandí risaca ne ni qué ziuu dxi initilú.

<sup>8</sup> Peru zadxiichi né be cani riula'dxi utinde binni. Zusaba ná be laaca', partí qué ninanda ca ni jneza, laga ni cadi jneza yenanda ca'.

<sup>9</sup> Ziuu enda naná ne yuuba para ca judíu ni qué ñuni jneza, ne zaqueca para cani cadi judíu ni qué ñuni jneza.

<sup>10</sup> Peru ca judíu ni guni jneza la? zusisaca be laaca', ne zieche né be laaca' ne zaguixhe dxí be ladixdó' ca', ne zaqueca cani cadi judíu ni guni jneza.

<sup>11</sup> Partí nezalú be bia'ca risaca irá binni.

<sup>12</sup> Irá cani bichee sin ñanna ley ni bidii Dios Moisés la? zanitilú sin ley. Ne zaqueca irá cani bichee ma nanna xi na ley la? zagui'ba donda ique pur ley.

<sup>13</sup> Partí cadi nayá ladixdó' binni nezalú Dios tisi nanna ley, sínunque nayá ladixdó' ca pa guni ca ni na ni.

<sup>14</sup> Laguuya cani cadi judíu. Qué gapa di cabe libru sti ley,

peru pa guni cabe jneza casi na ley la? ngue ma de laasi cabe napa cabe ley neca iruti nudii ni laacabe.

<sup>15</sup> Zacá rihuinni ma napa cabe ley ndaani ladxidó' cabe. Stubi stubi cabe ranna cabe uná nga jneza ne uná nga ni cadi jneza, ne xquenda biaani cabe rusiene laacabe pa nayá ladxidó' cabe o pa co'.

<sup>16</sup> Ne laca zacá nga chi aca ni dxi usihuinni Dios irá ni ga'chi ndaani ladxidó' binni, ne zuni né be ni Jesucristu. Zacá na stiidxa Cristu ni canayué ri'.

### *Ca judíu ne ley sti Moisés*

<sup>17</sup> Peru lii nou' judíu lii, ne cá lú lu ley ni bidii Dios Moisés, ne raca lu nayá partí na lu nuu né Dios lii.

<sup>18</sup> Ruzulú lu ma nannu xii nga racala'dxi Dios, ne nou' riene lu xii nga jma jneza partí rusiidi ley ni lii.

<sup>19</sup> Lii nou' rinaazu ná cani nacheepa lú ne rinéu biaani para cani canazá lu guelacahui.

<sup>20</sup> Riula'dxu usiidi lu cani qué ganna gastí' ne usiene lu cani qué riene, partí lii nannu xi na ley sti Moisés ni rusiidi irá ni naquiiñe ganna binni ne irá ni dxandí'.

<sup>21</sup> Yanna lii, rusiidi lu stobi, xiñee qué usiidi lu laca lii ya'. Ra'bu laacabe cadi cuana cabe, peru lii riba'na lu'.

<sup>22</sup> Lii nou' cadi chu' né cabe ni cadi xheela cabe, peru lii ru'nu ni. Ridxiichi lu partí napa cabe bidó', peru rindana lu ra yu'du sti ca bidó' que.

<sup>23</sup> Lii raca lu nayá partí nannu ley, peru qué ru'nu ni na ni, ne zacá runi lu menu Dios.

<sup>24</sup> Casi na lu Xqui'chi Dios: "Runi laatu riguu dí cani cadi judíu Dios."

<sup>25</sup> Laatu naca tu judíu ne lu xcuerpu tu riruugu tindaa casi ti seña huandí naca tu xpinni Dios. Seña ca nga ni rabi cabe circuncisión, ne zaquiiñe ni lii peru pa gu'nu ni na ley ni bidii Dios Moisés. Peru pa qué gu'nu ni na ley que la? zeda gaca lu casi tobi ni qué nicaa circuncisión, neca ma napu seña que lu xcuerpu lu'.

<sup>26</sup> Ngue runi pa chu' tobi hombre ni qué nicaa circuncisión, peru laa runi ni na ley, ñee qué zudii ni casi ñaca ma ucuaa be seña ni napa lu ca la?

<sup>27</sup> Ne ni qué nicaa circuncisión lu xcuerpu peru runi ni na ley sti Dios la? zuchá ni lú lu partí lii nannu ley ne ucuaa lu seña sti Dios, peru qué ru'nu ni na ley que.

<sup>28</sup> Ni naca judíu de luguiá si la? cadi dxandí ni laa. Ne zaqueca ni napa circuncisión luguiá si xcuerpu la? qué riquiñe ni laa.

<sup>29</sup> Ndi nga laani: ni dxandí judíu la? dede ladxidó' naca ni. Ne ni dxandí ucuaa circuncisión la? ucuaa ni de idubi ladxidó', partí ucuaa ni de Espíritu sti Dios ne cadi partí si cá ni lu ley, ne cuyubi ca isaca ca nezalú Dios ne cadi nezalú binni.

**3**

<sup>1</sup> Pa zacá ni la? ximodo dxi'ba ca judíu cani cadi judíu ya'. Ne paraa iquiiñe circuncisión.

<sup>2</sup> De irá modo dxi'ba cabe. Tobi la? bisaana né pe Dios laacabe stiidxa'.

<sup>3</sup> Ne neca uyuu de laacabe ni qué ñuni cre, ñee zusaana Dios de guni ni ma uní' pur cani bichee que la?

<sup>4</sup> Qué ziuu dxi. Qué zusaana Dios de guni ni ma uní' neca pe nuchee irá xixé binni guidxilayú. Casi cá lu Xqui'chi Dios:

Pur ni runi Dios rihuinni qué  
rusiguii,  
ne zacá ruseegu ruaa cani  
riguixhe xqueja.

<sup>5</sup> Yanna chinié casi riní'  
ique binni. Pa jma rihuinni  
pabiá' jneza ni runi Dios ra  
ruché' nu la? xiñee rusaba  
ná be laanu ya'. Xi na tu, ñee  
jneza runi be la?

<sup>6</sup> Jneza pue. Pa qué ñuni  
be jneza la? ximodo ñanda  
nibidxi be cuenta binni  
guidxilayú ya'.

<sup>7</sup> Peru ruluí' biquiíñe irá  
enda rusiguii stinu para bi-  
huinni pabiá' dxandí ni na  
Dios, ne pa biquiíñe ni la?  
xiñee ndi udxiba be donda  
ique nu.

<sup>8</sup> Ne pa zacá ñaca ni la?  
xiñee qué uché' nu para  
ihuinni ni nacha'hui ya'.  
Canié zacá partí nuu tu na  
nga nga ni rusiide', peru cadi  
dxandí ni. Cuyubi si cabe  
ga'ni ná cabe naa. Zusaba  
ná Dios irá ni runi casi runi  
cabe.

*Irá nu huaché' nu*

<sup>9</sup> Yanna ya'. Laanu naca  
nu judíu, ñee jma nayá ladxi-  
dó' no que ca xcaadxi binni  
la? Co', partí casi ma  
gudxe laatu, irá xixé binni,  
cásica judíu zaqueca cani  
cadi judíu, dxi'ba donda ique  
ca'.

<sup>10</sup> Ndi nga ni cá lu Xqui'chi  
Dios:  
Iruti binni runi jneza, nin pe  
tobi.

<sup>11</sup> Iruti riene, ne iruti ruyubi  
Dios.

<sup>12</sup> De irá xixé biree chu, ne de  
irá ma qué iquiiñe'.

Iruti qué lica runi jneza, nin  
pe tobi.

<sup>13</sup> Ndaani yanni cabe casi ti  
ba' ni zuxele',  
puru si enda rusiguii riní'  
cabe.

Ndaani ruaa cabe ruluí' nuu  
venenu sti beenda'

<sup>14</sup> partí ruaa cabe napa cabe  
laa para si enda riguu  
dí ne diidxa naná.

<sup>15</sup> Nabé nagueenda ruxooñe  
cabe ra chi uxhii cabe  
rini.

<sup>16</sup> Ratiisi tidi cabe runidé  
cabe,  
ne raqué nga ma ziyaana  
enda naná sti stobi.

<sup>17</sup> Qué idxela cabe ximodo  
gata dxí ladxidó' cabe.

<sup>18</sup> Ne qué ridxibi cabe Dios.

<sup>19</sup> Nanna nu gu'ta ley sti  
Moisés para cani nabani  
xa'na ley, ti cadi gapa ca xi  
iní' ca', ne ti iruti guiaana  
sin uzuhuaa nezalú Dios  
dxi' cuidxi cuenta binni  
guidxilayú.

<sup>20</sup> Iruti zaxá stonda, neca  
pe ñuni ni na ley que, partí  
gu'ta ley para ganna si cabe  
cuchee cabe.

*Modo ruxhá Dios stonda nu*

<sup>21</sup> Peru yanna ma cusi-huinni Dios ximodo ruxhá stonda binni ne cadi pur guni ca ni na ley, neca laca riete ni lu ley ne laca bicaa ca profeta ni.

<sup>22</sup> Irá tu guni cre Jesucristu zuxhá Dios stonda, ne zuni ni tutiica guni cre, purti nezalú bia'ca risaca tobi risaca stobi.

<sup>23</sup> De irá xixé nu biché' nu, ne qué iquiiñe nin tobi de laanu nezalú Dios.

<sup>24</sup> Peru uca nacha'hui ne laanu, bixhá stonda nu sin quixe nu laa, purti Jesucristu gudixe saca ni biché' nu que.

<sup>25</sup> Gula'qui Dios gati be para quixe be irá ni huachée binni, ne tu guni cre bixhii be rini stibe pur laa la? zaca perdonar. Zacá bi'ni Dios ti ihuinni jneza bi'ni dxi ca'ru gueeda Cristu, ra qué nixhacala'dxi be binni, qué nuquixe be laaca' ni bichee ca',

<sup>26</sup> ne laca ti ihuinni jneza cayuni be yanna, purti yáquexa ma gudixe Cristu irá pecadu la? jneza runi be, ruxhá be stonda tutiica guni cre laa.

<sup>27</sup> Ne pa zacá ni la? qué gapa nu xi pur uchá nu enda naró' stinu. Ma biluxe nga para laanu. Ñee zuchá nu enda naró' stinu purti runi nu ni na ley la? Co', purti cadi nga di bixhá stonda nu nezalú Dios, sínunque bixá ni ra bini cre nu Jesucristu.

<sup>28</sup> Ne zacá riene nu, ora guni cre binni Cristu ruxhá

Dios stonda ca', ne cadi purti runi ca ni na ley.

<sup>29</sup> Lácaxa para ca judíu si nuu Dios. Ñee cadi ne para cani cadi judíu la? Né pue. Laca nuu be para ca xcaadxi guidksi.

<sup>30</sup> Tobi lucha si Dios nuu. Nga runi, pa nuu tobi hombre ma ucuaa circuncisión ne guni cre Cristu la? zuxhá Dios stonda. Zaqueca pa nuu tobi hombre ni cadi judíu ni qué nicaa circuncisión peru runi cre Cristu la? laca zuxhá Dios stonda.

<sup>31</sup> Yanna ya'. Ñee zusaana nu de guni nu ni na ley la? Qué zanda di'. Yáquexa ma runi cre nu Cristu la? jma rusi zuni nu ni na ley.

## 4

*Xiñee bixhá Dios stonda Abraham*

<sup>1</sup> Xi zanda iní nu de Abraham, bixhoze gola nu ndaani guidxilayú ri'.

<sup>2</sup> Pa ñaca pur ca enda nacha'hui ni bi'ni be bixhá Dios stonda be la? ñanda ca nuchá be enda naró' stibe, peru cadi nezalú Dios.

<sup>3</sup> Purti sicarí cá lu Xqui'chi Dios: "Bini cre Abraham Dios, ne nga runi bixhá Dios stonda be."

<sup>4</sup> Pa guni tobi dxiiña ne quixe cabe laa, iruti zanda iní' ucuaa si be vueltu que, purti ucuaa be ni saca bi'ni be dxiiña'.

<sup>5</sup> Peru cadi cayabi Dios laanu guni nu xiixa para uxhá stonda nu, sínunque na be guni cre nu ruxhá be stonda cani huachée, ne ra

guni cre nu, zuxhá be stonda nu.

<sup>6</sup> Rey David laca bizeete pabiá' nayeche ziaana cani uxhá Dios stonda zacá, cadi pur xiixa ni guni ca'.

<sup>7</sup> Purti cá ni uní' David que lu Xqui'chi Dios:

Tutiica bichee ne ma guca perdonar la? nayeche ziaana,

purti ma ga'chi irá ni bichee ca'.

<sup>8</sup> Nayache ziaana cani qué uquixe Dios irá ni bichee.

<sup>9</sup> Ñee na be ñuu enda nayeche ca para si cani ma napa seña de circuncisión lu xcuerpu la? o laca nuu ni para cani qué nicaa seña que. Guietenala'dxi nu de Abraham. Ma nanna nu bini cre be Dios ne nga runi bixhá Dios stonda be.

<sup>10</sup> Yanna xi na tu de laabe. Ñee ucuaa si be seña de circuncisión que, óraque ru' bixá stonda be la? Co', purti maca bixá stonda be dxi ca'ru icaa be seña que.

<sup>11</sup> Ne óraque ru' ucuaa be circuncisión casi ti seña dxandí ma bixá stonda be. Peru bixá stonda be purti bini cre be, ne guca ni dxi ca'ru icaa be seña de circuncisión. Nga runi gunda biree lá be bixhoze irá xixé cani guni cre Dios sin icaa circuncisión, purti zuxhá Dios stonda ca ra guni cre ca casi bini cre be.

<sup>12</sup> Ne laca biree lá be bixhoze cani ma ucuaa circuncisión, cadi purti napa ca seña que, sínunque purti laca runi cre ca casi bini cre

be dxi ca'ru icaa be circuncisión.

*Ra uca ni gudxi Dios Abraham*

<sup>13</sup> Bidii stiidxa Dios Abraham ne ca xiiñi zacaa ca guidxilayú, casi ni rudii binni xiiñi ora ma chi gati, peru bidii be ni laaca cadi purti bi'ni ca ni na ley sti Moisés, sínunque purti bini cre ca laabe, ne nga runi bixhá be stonda ca'.

<sup>14</sup> Pa ñaca nudii stiidxa Dios cani nabani si xa'na ley sti Moisés la? ma cadi pur guni cre binni nixá stonda, ne pur gana si nudii stiidxa Dios laacabe.

<sup>15</sup> Purti ziaba ná cani ruchee né ley, peru ra gasti ley la? qué zuchee né cabe ni.

<sup>16</sup> Ngue runi bidii stiidxa Dios uxhá stonda cani guni cre laa, ti gaca ni de puru enda nacha'hui si stibe. Ne zacá nga bidii stiidxa be irá ca xiiñi Abraham, cásica cani nabani xa'na ley sti Moisés, zaqueca cani guni cre casi bini cre Abraham. Laa nga bixhoze irá xixé nu.

<sup>17</sup> Casi cá lu Xqui'chi Dios ra na Dios rabí Abraham: "Ma bine lii bixhoze stale guidxi." Ni na ni la? Abraham nga bixhoze irá nu purti ma runi cre nu Dios ni bini cre be. Dios ri ca nga rudii enda nabani cani ma guti, ne laa ruzeete ni ca'ru gale casi ñaca ma gule.

<sup>18</sup> Necá ruluí' ma qué ñapa Abraham xiiñi', peru bini cre ni gudxi Dios laa, uleza beda aca bixhoze stale binni.

Purti gudxi Dios laabe pabiá' zadale xiiñi be.

<sup>19</sup> Qué ñaana dxí be de ñuni cre be ni, neca ora redasilú laabe ma nagola pe be, ma udi'di xhi be, partí ma napa be bia' ti gayuaa iza, ne nin ora ruuya be Sara ma udi'di de ñapa ba'du'.

<sup>20</sup> Qué ñaana dxí be de ñuni cre be ni gudxi Dios laabe que, laga jma rusi bidale fe stibe, ne bidii be diuxquixe Dios.

<sup>21</sup> Ne ucuá ique be ni, partí nanna be pabiá' nadxó' Dios, ne zuni ni ma uní'.

<sup>22</sup> Nga runi bixhá Dios stonda be partí bini cre be laa.

<sup>23</sup> Peru ra ruzeete Xqui'chi Dios modo bixá stonda be partí bini cre be la? cadi para laasi be ucuá ni.

<sup>24</sup> Laca ucuá ni para laanu, partí laca zaxá stonda nu pa guni cre nu Dios ni undisa Jesús, Señor stinu, de lade gue'tu'.

<sup>25</sup> Jesús nga ucuaa enda guti saca irá ni biché' nu, ne bibani para ma qué quiba donda ique nu.

## 5

### *Xi modo riaana binni ora ma bixá stonda*

<sup>1</sup> Ngue runi yanna ma nuu né nu Dios tobi si, partí bixhá stonda nu ra bini cre nu Jesucristu, Señor stinu.

<sup>2</sup> Cristu nga bichiña laanu ra nuu be ne yanna ma nuu né nu laabe tobi si, partí bini cre nu Jesucristu. Ne ma

rieche nu partí cá lú nu isaca né nu laabe.

<sup>3</sup> Ne cadi nga si nga laani, sínunque laca rieche nu neca rididi nu ra naná, partí nanna nu zacá zazi'di nu cadi ixhacala'dxi nu.

<sup>4</sup> Ne pa qué ixhacala'dxi nu la? zieche né Dios laanu, ne zacá jma rusi zacá lú nu laabe.

<sup>5</sup> Ne cadi pur gana si cá lú nu laabe partí ma bidii be laanu Espíritu Santu ne rusiene Espíritu que laanu pabiá' nadxii be laanu.

<sup>6</sup> Ca dxí pe caqui'ñe nu chu' tu acané laanu, ula'qui Dios gati Cristu para ulá cani ruchee.

<sup>7</sup> Nanna nu nagana chu' tu gati pur tobi hombre runi jneza, peru ñanda ca ñuu tu nidxiña de racá, ñati pur ti hombre cha'hui'.

<sup>8</sup> Peru Dios huaxa rusihuinni pabiá' nadxii laanu partí neca cuché' né nu laa chiqué, biseenda Cristu guti pur laanu.

<sup>9</sup> Ne yáquexa ma bixá stonda nu ra guti be pur laanu la? nanna dxichi nu zulá be laanu dxí usaba ná Dios binni guidxilayú.

<sup>10</sup> Pa gunda bicueeza enda guti sti Xiiñi Dios de nidxiichi né Dios laanu, neca cuché' né ru nu laa la? lágaxa yanna ma nuu né nu laa tobi si, jma rusi zalá nu partí nabani Xiiñi'.

<sup>11</sup> Ne cadi nga si nga laani, sínunque laca napa né nu Dios enda nayeche pur Jesucristu Señor stinu, partí uní' né be Dios pur laanu.

*Ni bi'ni Adán ne ni bi'ni Cristu*

<sup>12</sup> Pur tobi hombre biuu enda ruchee ndaani guidxilayú, ne guti be partí bichee be, ne zacá ucuá enda guti que irá xixé binni, partí laca bichee ca'.

<sup>13</sup> Ridu'ya nu dede dxi ca'ru udii Dios ley Moisés, maca nuu enda ruchee ndaani guidxilayú. Peru xi si la? qué nulabi Dios ra cuchee cabe dxi ca'ru gata ley que.

<sup>14</sup> Peru qué ñaana dxí enda guti ni bizulú né Adán que. Nuu ru ni dxi guta ley sti Moisés. Irá xixé binni guti, dede cani qué nuchee né pe ca stiidxa Dios casi bi'ni Adán. Adán bizulú enda guti, peru gudixhe Dios stobi gueeda udii enda nabani.

<sup>15</sup> Nabé adxé ni bidii Adán laanu pur enda ruchee sti' para ni cudii Dios laanu yanna pur enda nacha'hui sti'. Stale tu guti partí bichee Adán, peru uyuu stobi hombre bi'ni jneza ne pur laa biá Dios stale binni, ne hombre ca nga Jesucristu.

<sup>16</sup> Ma adxé ni bi'ni Dios que para ni beda iluxe né enda ruchee sti Adán. Partí ra bichee tobi si udxi'ba donda ique irá binni guidxilayú, peru yanna pur enda nacha'hui sti Dios ruxhá stonda binni neca nabé bichee ca'.

<sup>17</sup> Ra bichee tobi hombre si, gunda bizulú bini mandar enda guti, peru yanna pur ni bi'ni stobi que, zaxá stonda irá cani icaa ni cudii Dios laa de enda nacha'hui sti'.

Zapa ca enda nabani ne zuni mandar né ca Cristu.

<sup>18</sup> Ndi nga laani: cásica udxi'ba donda ique irá xixé binni runi ti hombre ni bichee la? zaqueca pur tobi hombre ni bi'ni jneza, zaxá stonda ca', ne zapa ca enda nabani.

<sup>19</sup> Pur hombre ni qué nuzuuba diidxa que, uyuu stale tu bichee, ne zaqueca pur stobi ni bizuuba diidxa que, ziuu stale tu zaxá stonda.

<sup>20</sup> Gu'ta ley para ihuinni pabiá' ruchee cabe, peru ra jma bihuinni cuchee cabe que la? jma rusi bihuinni pabiá' nacha'hui Dios.

<sup>21</sup> Enda ruchee nga bidii enda guti, peru yanna pur ni bi'ni Jesucristu Señor stinu, uca Dios nacha'hui ne laanu, ruxhá stonda nu ne rudii laanu enda nabani ni qué zaluxe.

## 6

*Zuché' ru nu la?*

<sup>1</sup> Yanna ya', ñee zinanda nu enda ruchee para jma rusi gaca Dios nacha'hui ne laanu la?

<sup>2</sup> Co'. Pa ma gue'tu laanu para enda ruchee la? xi-modo zanda chi nanda ru nu ni ya'.

<sup>3</sup> Ra beda gaca nu xpinni Cristu ne uyú' nisa nu la? raqué nga guti né nu laa ra guti'. Ñee ca'ru guiene tu nga la?

<sup>4</sup> Partí ra uyú' nisa nu guti nu ne biga'chi né nu laabe, ne nga runi cásica bisasa be de lade gue'tu pur

enda nandxo' sti Dios Bixhoze nu la? zaqueca laanu ma biosa nu para ibani nu adxé modo.

<sup>5</sup> Purti pa guca né nu Cristu tobi si ra guti la? laca zaca né nu laa tobi si ra guiasa nu casi biosa.

<sup>6</sup> Cadi guiaanda laanu, ucuá né Cristu lu cruz ni guca nu ndaani guidxilayú chiqué, ne raqué binitilú ni, ti ma cadi icá nu yaga lu ná enda ruchee.

<sup>7</sup> Purti ni ma guti la? ma bilá de lu ná ni.

<sup>8</sup> Ne pa ma guti né nu Cristu la? runi cre nu laca zabani né nu laa.

<sup>9</sup> Nanna nu ma biosa Cristu de lade gue'tu', ma qué zati ru', ma qué zanda guni mandar enda guti laabe.

<sup>10</sup> Purti ti tiru si gupa be xidé guti be para gudixe be irá ni huaché' nu, ne raqué biluxé ni, ne yanna ra ma nabani be la? nabani be para Dios.

<sup>11</sup> Zaqueca laatu, laguiete-nala'dxi ma gue'tu laatu para enda ruchee peru para Dios nabani tu, purti ma tobi si laatu ne Cristu Jesús Señor stinu.

<sup>12</sup> Ngue runi laatu laga nabani tu, cadi udii tu lugar ucaa ru pecadu laatu yaga, nin ucaa ni laatu guni tu ni na ni.

<sup>13</sup> Ne cadi udii tu laatu pecadu para guni tu ni cadi jneza, sínunque laudii laatu Dios purti nuu tu casi ni ma guti peru ma bibani sti tiru. Laudii laatu Dios ti iquiiñe tu para guni tu ni jneza.

<sup>14</sup> Ma qué zanda di guni mandar pecadu laatu, purti ma cadi nabani tu xa'na ley, sínunque ma guca Dios nacha'hui ne laatu, ne ma nabani tu pur enda nacha'hui sti'.

*Enda guti nga saca enda ruchee*

<sup>15</sup> Yanna ya'. Ñee zuché' ru nu purti ma cadi nuu nu xa'na ley sínunque nabani nu pur enda nacha'hui sti Dios la? Co' xombre.

<sup>16</sup> Pa laape tu udii tu laatu stobi para guni tu ni na la? óraque ma ni na ngue, nga guni tu. Nga runi pa udii tu laatu pecadu la? zeda iluxe né tu enda guti. Peru pa udii tu laatu Dios para guni tu ni na la? zabani tu jneza.

<sup>17</sup> Chiqué ucuá tu yaga lu ná pecadu, peru uyuu tu beda usiidi laatu ximodo ilaa tu de laani, ne diuxquixe Dios ucuaa tu ca diidxa que de idubi ladxidó' to, ne ma cayuni tu ni na cani.

<sup>18</sup> Ne ra bilaa tu de lu ná pecadu la? biuu tu lu ná enda nacha'hui'.

<sup>19</sup> Canié casi rini' binni guidxilayú purti zacá ti zanda guiene chaahui tu ni cuzeete ri'. Chiqué uzá nanda pe tu ca viciu ne irá ni nadxaba'. Zaqueca yanna lachinanda ni nacha'hui para ganda ibani tu modo na Dios.

<sup>20</sup> Ca dxi uyuu tu lu ná pecadu la? iruti nucaa laatu guni tu ni jneza.

<sup>21</sup> Peru xi ulee ndu tu lu irá ni bi'ní tu chiqué ya'. Ñee cadi rusitú si ni lú tu yanna

la? Xi ru beda iluxe ca ngue pa cadi enda guti.

<sup>22</sup> Peru yáquexa ma bilaa tu de lu ná pecadu ne ma biuu tu lu ná Dios la? ma cayuni tu ni na, ne ra zeda iluxe ni, zapa tu enda nabani ni qué zaluxe.

<sup>23</sup> Purti ni riaxa pecadu nga enda guti, peru ni rudii Dios nga enda nabani ni qué zaluxe, pur Cristu Jesús Señor stinu.

## 7

### *Enda nabani cubi*

<sup>1</sup> Hermanu ca', ma nanna tu ley. Ñee qué ganna tu pa naquiiñe guni binni ni na ley ca dxi nabani si la?

<sup>2</sup> Casi ti gunaa napa xheela', qué zanda ichaganá be sti tiru laga nabani ru xheela be, purti nga ni na ley. Peru pa gati xheela be la? para ley ma qué gapa di be xheela be.

<sup>3</sup> Sicarí ni: pa cueza né be sti hombre adxé nabani ru xheela be la? cuchee né be xheela be pur ni na ley. Peru ora ma guti xheela be la? ma qué zucueza ley que laabe, ne cadi cuchee né be xheela be pa ichaganá be stobi.

<sup>4</sup> Zacá ca laatu, hermanu ca'. Ra guti Cristu lu cruz raqué guti tu para ley, ti ganda icá nú tu stobi, ne ngue nga Cristu ni biasa de lade gue'tu para ganda iqui'ñe nu para Dios.

<sup>5</sup> Adxé modo bibani nu chiqué, purti yenanda nu ni na ique nu, ne biquiinde ley que laanu bini nu ni cadi

jneza. Ne zacá beda gati nu para Dios.

<sup>6</sup> Peru yanna ma guti nu para ley ni bini mandar laanu que, ne ma biré' nu lu ná ni. Ma zinanda nu enda nabani cubi ni rudii Espíritu Santu laanu. Ma cadi zi-nanda nu ley ni cá lu gui'chi'.

### *Ley ne enda ruchee*

<sup>7</sup> Xi na tu ya', ñee napa ley que donda la? Co', sínuque ndi nga laani: pa qué ña'ta ley la? qué ñanna xii nga enda ruchee. Purti qué ñanna pa cuchee ra cayache lua sti binni, pa qué ñabi ley naa cadi gache lua'.

<sup>8</sup> Ra gu'ta ley la? jma rusi unaaze dxíichi pecadu naa, purti ni na ley que cadi gune', jma rusi ruchiña naa gune'. Peru ra gasti ley la? nexhe dxí pecadu, rului' ma guti.

<sup>9</sup> Uyuu dxi bibane sin nizaladxe pa cuchee', purti ca'ru ganna xi na ley. Peru ora gunna xi na ley la? bicuaani ni pecadu ni nuu luguia'ya'

<sup>10</sup> ne zacá gute para Dios. Purti ley ni nexhe udii enda nabani la? laga enda guti beda udii ni naa.

<sup>11</sup> Beda iree caya zacá, purti biquiñe pecadu ley que para bisiguii naa ne biiti naa.

<sup>12</sup> Peru cadi pecadu di ley, sínuque de Dios zeeda ni, ne mandamiento que laca de Dios zeeda. Jneza irá ni cá lu ni ne nacha'hui ni.

<sup>13</sup> Zuuti xa ni nacha'hui naa. Qué ziuu dxi. Pecadu

nga biiti naa, ne zacá bihuinni xi pe nga pecadu. Peru biquiñe ni ni nacha'hui que para biiti ni naa, purti ra guta mandamientu que jma rusi birooba ni.

### *Chupa ni caguba yu*

<sup>14</sup> Nanna nu de xquenda biaani Dios zeeda ley que, peru naa rune ni na ique', ne caya yaga lu ná pecadu.

<sup>15</sup> Nin naa qué riene dia' xi rune'. Qué rune ni racaladxe gune', sínunque ni qué racaladxe ngue pe rune'.

<sup>16</sup> Ne pa rune ni qué na'ya gune lá? zacá rihuinni nanna jneza ni na ley sti Dios.

<sup>17</sup> Zacá ma cadi naa pia' cayune ni, sínunque pecadu ni nuu lugua'ya cayuni ni.

<sup>18</sup> Purti naa nanna binni guidxilayú naa, ne gasti enda nacha'hui nuu lugua'ya'. Necá napa gana gune ni jneza, qué zanda gune ni.

<sup>19</sup> Qué rune ni jneza casi ñuuladxe ñune', sínunque ni cadi jneza ngue rune', necá qué racaladxe'.

<sup>20</sup> Ngue runi pa rune ni qué racaladxe gune la? ma cadi naa cayune ni, sínunque pecadu ni nuu lugua'ya cayuni ni.

<sup>21</sup> Ma biene ximodo zeeda ni. Casi naa gacaladxe gune ni jneza, rutaagu pecadu naa.

<sup>22</sup> Purti lu xquenda biaane rieche nia ley sti Dios,

<sup>23</sup> peru ruuya ma adxé ley nuu lugua'ya' ne nuu dindle né ni ley ni maca cá lu xquenda biaane', ne laani

nga rucaa ni naa yaga lu ná pecadu ni runi mandar naa.

<sup>24-25</sup> Ndi nga laani: xquenda biaane riguba yu naa gune ni na Dios, peru pecadu caguba yu naa gune ni na. Pobre de naa. Nanna xi gueda iree xa'ya'. Tuu nga cuee naa de enda guti ni naaze naa ri pue. Rudiee diuxquixe Dios purti Jesucristu zabee naa de laani. Laabe nga Señor stinu.

## 8

### *Enda nabani ni rudii Espíritu Santu*

<sup>1</sup> Ngue runi ma qué zudxiiba Dios donda luguiá cani ma nuu né Cristu tobi si, cani ma cadi nabani modo na ique sínunque modo na Espíritu Santu.

<sup>2</sup> Purti rudii Espíritu Santu enda nabani cani ma nuu né Cristu Jesús tobi si, ne zacá ma bilá ca de lu ná pecadu ni rudii enda guti.

<sup>3</sup> Qué ñanda di niquiñe ley sti Moisés pur ni naca binni guidxilayú, peru ra biseenda Dios Xiiñi la? raqué huaxa guca ni qué ñanda ñuni ley que. Beda gapa Xiiñi be que cuerpu casi cuerpu sti binni guidxilayú, beda gati para quixe ni bichee binni. Ne pur ni bi'ni Xiiñi be que ma qué ziuu ru dxí guni mandar pecadu.

<sup>4</sup> Bi'ni Dios irá nga ti yanna ma guni nu jneza casi rucaa ley binni guni. Laanu ma cadi nabani nu modo na ique nu, sínunque modo na Espíritu Santu.

<sup>5</sup> Purti cani nabani casi na ique la? ruyubi guni ni riula'dxi si, peru cani nabani casi na Espíritu la? ruyubi guni ni na Espíritu.

<sup>6</sup> Cani ruyubi ni chu'la'dxi si la? rati, peru cani ruyubi guni ni chu'la'dxi Espíritu Santu la? ricaa ca enda nabani ne ra'ta dxí ladxidó' ca'.

<sup>7</sup> Raca ni zacá partí ni rucaa ique guni ni chu'la'dxi si la? nanala'dxi Dios. Qué runi ni na ley sti Dios, ne neca pe niná ñuni ni, qué ñanda di'.

<sup>8</sup> Nga runi, ni nabani casi na ique la? qué zanda ibani casi na Dios.

<sup>9</sup> Peru laatu ma cadi nabani tu casi na ique tu, sínunque casi na Espíritu, pa huandí nuu né Espíritu sti Dios laatu. Ne pa nuu tobi ni qué gapa Espíritu sti Cristu la? cadi dxandí xpinni Cristu laa.

<sup>10</sup> Peru pa nuu né Cristu laatu la? neca casi ñaca ma guti xcuerpu tu runi pecadu, peru rudii Espíritu Santu enda nabani laatu partí ma bixá stonda tu.

<sup>11</sup> Dios nga bisibani Cristu de lade gue'tu', ne pa nuu né Espíritu stibe laatu la? laca zusibani be xcuerpu tu ni gati', casi bisibani be Cristu. Ne zuni né be ni Espíritu stibe ni nuu né laatu.

<sup>12</sup> Ngue runi hermanu ca', nuu ni naquiiñe guni nu, peru qué gapa nu xidé guni nu ni na ique nu.

<sup>13</sup> Purti pa ibani tu modo na ique tu zati tu. Peru pa

uyubi tu acané Espíritu Santu laatu para ma cadi ibani tu modo na ique tu la? zabani tu.

<sup>14</sup> Irá cani runi ni na Espíritu sti Dios, ca ngue nga xiiñi Dios.

<sup>15</sup> Cadi zácaxa tu ma bi'ni be laatu esclavu para idxibi ru tu laabe, sínunque ma bi'ni be laatu xiiñi be. Ne rabi Espíritu stibe laanu gabi nu laabe Bixhoze nu.

<sup>16</sup> Ne zaqué rusiene Espíritu stibe espíritu stinu ma xiiñi be laanu.

<sup>17</sup> Ne pa xiiñi be laanu la? laca zacaa nu de lú ni udii be ca xiiñi be. Ne pa chu' né nu Cristu tobi si lu enda naná sti', laca zasaca né nu laa ne zacaa né nu laa de lu ni udii Dios laa.

### *Riguixhe chaahui Dios irá para cani nadxii laa*

<sup>18</sup> Ndaani guidxilayú ri racaná nu, peru naa qué rizaaladxe irá nga, partí nanna zadxiña dxí udii Dios laanu ni nabé galán.

<sup>19</sup> Zaqueca de irá ni bizá' Dios, laca cabeza si idxiña dxí uluí' be uná nga ca xiiñi be.

<sup>20</sup> Purti dxí bizá' be guidxilayú bizá' be ni galán, peru dxí ma biuu enda ruchee ndaani ni, beda gaca yuudxu ni, ne cadi laani biyubi ni gaca ni zacá sínunque laabe guidixhe be gaca ni, runi enda ruchee que. Peru cabeza ni dxí

<sup>21</sup> ilaa né ni ca xiiñi be lu ná enda nayuudxu', ti ibigueta aca ni galán, ne ma iquiiñe pe ni para laabe.

<sup>22</sup> Peru laga cabeza ni idxiña dxi ca la? nuu né ni ti yuuba ro', casi ti gunaa ora chi xhana, ruuna dede ricaala'dxi'.

<sup>23</sup> Ne cadi laasi ni, sínunque laca ne laanu nuu né nu ti yuuba ro', neca ma ucuua nu caadxi de ni chi udii Dios laanu, partí ma napa nu Espíritu stí'. Peru cabeza ru nu dxi icca be laanu casi xiiñi be, ne dxi que nga ilaa ca cuerpu stinu lu ná enda nayuudxu que.

<sup>24</sup> Laanu bilá nu partí ucuá lú nu ni ca'ru ihuinni. Pa cayuuya binni ni cabeza la? cadi dxandí cabeza ru ni. Ribeza xa cabe ni maca cayuya cabe.

<sup>25</sup> Peru pa cá lú nu ni ca'ru idu'ya nu la? qué zaxhacala'dxi nu de cueza nu ni.

<sup>26</sup> Ne laca racané Espíritu Santu laanu iní né nu Dios, partí laanu qué ganna di nu guni nu ni jneza, peru ora qué ganda idxela nu xi iní nu la? ricaala'dxi si nu, ne Espíritu que riní' pur laanu ra nuu Dios.

<sup>27</sup> Partí nanna Dios xi nuu ndaani ladxidó' irá binni, ne riene xi na Espíritu, partí modo pe na be, modo que pe rinaba Espíritu pur ca xpinni be.

<sup>28</sup> Nanna dxichi nu riguixhe chaahui Dios irá cosa jneza para cani nadxii laa, cani uní' né para guni ni na.

<sup>29</sup> Dede chiqué maca gucabiá' be cani guni cre laabe, ne ca ngue nga ulee chu be para chi ndee Cristu Xiiñi be, ne zaqué Cristu nga lugola lade irá bi'chi'.

<sup>30</sup> Ne cani maca ulee chu be dede chiqué laca uní' né be laaca'. Ne cadi nga si, laca ruxhá be stonda ca', ne ora ma bixá stonda ca rusisaca be laaca'.

*Gasti zanda uxhele laanu de Cristu*

<sup>31</sup> Xi zanda gabi nu de irá nga ya'. Pa nuu Dios pur laanu la? iruti zanda ucaa lú laanu.

<sup>32</sup> Laabe nin qué ña be Xiiñi be sínunque bidii be laa guti pur irá nu. Yanna, ñee na tu qué zuni be pur icca né nu Xiiñi be irá ni udii be laa la?

<sup>33</sup> Tu ru zanda cu' xqueja cani ma ulí Dios ya'. Dios pe uní' ma bixá stonda cabe.

<sup>34</sup> O tu zanda udxiba donda ique cabe. Cristu la? co', partí laa pe guti pur laanu, ne cadi nga si sínunque laca bibani de lade gue'tu ne ma nuu cue' Dios, caní' pur laanu.

<sup>35</sup> Iruti zanda cuee laanu de Cristu ni nadxii laanu. Ñee zaxele nu de laabe pur xixa naná ni gueeda luguiá nu la? o partí cadidi nu xixa ni nagana, o partí cayaadxa ni idó' no, o ti gastí ni gacu nu la? Ñee zaré' nu de laabe partí naxoo nuu nu la? o partí canananda cabe guuti cabe laanu la? Co'. Nanna dxí'che gastí zanda uxhele laanu de Cristu ni nadxii laanu.

<sup>36</sup> Casi cá ni lu Xqui'chi Dios ra na:  
Partí ma bini cre du lii,  
canayuuti cabe laadu idubi  
dxi.  
Napa cabe laadu casi dendxu  
ni ma chi gati.

<sup>37</sup> Peru neca gueeda irá nga luguiá nu, qué zanda di usaba ni laanu, purti nadxii Cristu laanu.

<sup>38</sup> Nanna dxi'che gasti zanda uxhele laanu de Dios ni nadxii laanu: nin enda guti, nin enda nabani, nin ángel, nin binidxaba', nin ni ridu'ya nu yanna ri', nin ni gueeda ru',

<sup>39</sup> nin ni nuu ibá', nin ni nuu xaguete', nin gasti ru de irá ni bizá' Dios qué zanda uxhele laanu de Dios ni nadxii laanu, purti bisihuinni be pabiá' nadxii be laanu pur ni bi'ni Jesucristu Señor stinu.

## 9

### Dios ulí ca judíu

<sup>1</sup> Nuu né Cristu naa, ne nga runi nanna canié ni dxandí'. Nanna dxi'che cadi cusiguiee dia', ne nga ca rabi Espíritu Santu naa.

<sup>2</sup> Nuua triste ne qué ganda iree yuuba ndaani ladxiduá'.

<sup>3</sup> Tantu cá ique ca judíu, ca binni xquidxe', ñacaladxe pia' niree de Cristu ne niniteluá', tílasi zacá ma ñuu cabe laacabe, purti biche laacabe.

<sup>4</sup> Za cabe de Israel, ne ulí pe Dios laacabe gaca cabe xiiñi'. Bihuinni pe Dios lade cabe casi ti za ni ruzaani', ne bidii stiidxa laacabe, ne bidii ley Moisés para udii ni laacabe. Laça bisiidi laacabe ximodo guni cabe cultu para laa, ne gudxi laacabe xi chi guni para laacabe.

<sup>5</sup> Laacabe nga xiiñi ca primé bixhoze gola nu, ne de lade cabe nga beeda

Cristu dxi beda gaca binni guidxilayú. Laa nga Dios de lade irá xixé, ne laa nga qué ziaana dxi de isaca. Amén.

<sup>6</sup> Peru ca judíu, neca bidii Dios laacabe irá nga, ma cadi nuu né cabe Dios tobi si. Peru cadi pur nga zácxaxa nu qué ñaca ni uní' Dios gaca'. Purti cadi irá cani gule de Israel dxandí naca binni Israel.

<sup>7</sup> Ne zaqueca cadi purti si beeda cabe de lade ca xiiñi Abraham, xiiñi Abraham irá cabe nezalú Dios. Cadi zacá di nga laani, purti casi na Dios rabi Abraham chiqué: "De Isaac si nga gueeda cani dxandí xiiñi".

<sup>8</sup> Ndi nga ni na ni: cadi dxandí xiiñi Dios irá ni gale lade ca xiiñi Abraham, sínunque cani bidii stiidxa si Dios gale, ca ngue nga riguu Dios cuenta casi xiiñi'.

<sup>9</sup> Purti sicarí gudxi be Abraham chiqué: "Stubiza dxi ri' zabigueta' ne zapa Sara ti xiiñi'."

<sup>10</sup> Ne cadi nga si, laca uní né be Rebeca, dxi ma naca xiiñi xiiñi Isaac, bixhoze gola nu.

<sup>11-13</sup> Ne biree ni modo pe uní' be, purti naquiiñe gaca ni ma gudixhe be gaca'. Laabe nga ribí be tu gacala'dxi be ne cadi pur ni ma bi'ni ca'. Dxi uní' be ni, ca'ru gale ca xiiñi Rebeca, ne ca'ru guni ca ni jneza nin ni cadi jneza, peru rabi be Rebeca: "Xiiñu ni jma huaniisi zuni ni na ni jma nahuiini'." Ne laca cá ni lu Xqui'chi Dios: "Gunaxhiee Jacob ne guca nanaladxe Esaú."

<sup>14</sup> Xi gabi nu ya'. Ñee cadi jneza runi Dios la? Jneza pue.

<sup>15</sup> Purti gudxi be Moisés: "Zalaseladxe tu gacaladxe", ne zia'ya tu gacaladxe guia'ya'."

<sup>16</sup> Ne zacá cadi zeeda ni pur ni racala'dxi binni, nin pur ni runi, sínunque partí riá be laaca'.

<sup>17</sup> Partí cá lu Xqui'chi be ra uní né be Faraón, na be rabi be laa: "Bine lii rey para gu'ya binni enda nandxó' stinne luguiá lu', ne para gu-nibiá' idubi naca guidxilayú tu naa."

<sup>18</sup> Zacá ridu'ya nu rila-sela'dxi be cani racala'dxi be ne ruquidxi be ladxidó' cani racala'dxi be iguidxi ladxidó'.

<sup>19</sup> Zándaca ga'bu naa: "Xiñee rudxiiba ru Dios donda luguiá binni ya'. Zanda xa uchaa cabe ni ma uní Dios."

<sup>20</sup> Peru hombre, tu naca lu para qué guiaanu conforme ne ni runi Dios. Niní xa ti guisu ñabi ni bizá' laa: "Xiñee bizóu' naa sicarí."

<sup>21</sup> Lácaxa qué gapa ni ruzá' guisu derechu guzá' ti guisu sicarú, ne óraque de yu queca guzá' stobi ni iquiiñe si para ludé.

<sup>22</sup> Nga runi, xi gabi nu de Dios ya'. Purti laa gucala'dxi nusaba ná cani cuchiichi laa, cani ma nuu para initilú, ne gucala'dxi ñanna ca xii nga enda nandxó' sti'. Peru ni bi'ní be la? bicueeza be enda ridxiichi que xadxi.

<sup>23</sup> Ne bicueeza be ni para ihuinni pabiá' nga naro'ba

enda nacha'hui stibe para cani ilasela'dxi be, cani maca gudixhe be usisaca be.

<sup>24</sup> Ne zanda gabi nu nga nga laanu, partí ne laanu ulí be, ne cadi de lade ca judíu si, sínunque ne lade cani cadi judíu.

<sup>25</sup> Sicarí cá lu Xqui'chi Dios ni bicaa profeta Oseas: Ca binni ni cadi xpinne zaca ca xpinne',

ne cani qué ñanaxhiee ga'ya', laca zanaxhiee laaca'.

<sup>26</sup> Ne ra gudxi Dios laaca chiqué cadi xpinni laaca',

raqueca nga iree lá ca xiiñi Dios ni nabani.

<sup>27</sup> Peru ra bizeete profeta Isaías ca binni Israel la? sicarí na:

Neca idale ca xiiñi Israel casi yuxi sti nisadó',

peru caadxi si de laaca zalá.

<sup>28</sup> Purti zusaba ná Dios xquidxi cabe casi uní', ne zuni ni nagueenda ne qué ziá laacabe.

<sup>29</sup> Ne laca na Isaías chiqué: Pa Dios ni runi mandar irá xixé qué nulá caadxi de laanu la? ma ninitilú nu casi binitilú ca binni Sodoma ne Gomorra.

*Ra biiba ca judíu biasa cani cadi judíu*

<sup>30</sup> Yanna ya', xi gabi nu. Ndi nga laani: cani cadi judíu, cani qué nuyubi ñaca nacha'hui chiqué, yanna ma guca ca nacha'hui', o zanda gabi nu ma bixá stonda ca nezalú Dios, partí ma bini cre ca'.

<sup>31</sup> Peru ca judíu, ca binni Israel, yenanda ca ley ti cadi quiba donda ique ca nezalú Dios, peru qué ñanda ñuni ca ni na ley que.

<sup>32</sup> Xiñee. Purti qué nuyubi cabe nuxhá Dios stonda cabe ra ñuni cre cabe laa, sínunque biyubi cabe nixá stonda cabe pur ni cayuni cabe. Nga runi beda gaca Cristu casi ti guie ni birenda ñee cabe para biba cabe, purti qué ñuni cre cabe laa.

<sup>33</sup> Sicarí cá lu Xqui'chi Dios: Ndaani guidxi Sion caguixhe tobi ni gaca casi ti guie ni irenda ñee cabe. Peru ni guni cre laabe la? qué ziuu dxi gueeda malaya laa.

## 10

<sup>1</sup> Hermanu ca', ni nusieche ladxiduá' nga nilá ca binni Israel, ne rinaba lu Dios gaca ni.

<sup>2</sup> Ruuya dxandí rucaa ique cabe guni cabe ni na Dios, peru cuchee cabe modo na cabe guni cabe ni.

<sup>3</sup> Purti qué riene cabe xi-modo na Dios uxhá stonda binni, lágala ruyubi cabe ixá stonda cabe modo na cabe, ne zacá ma qué na cabe guni Dios ni modo na.

<sup>4</sup> Dede beeda Cristu ma qué riquiñe ley, purti cadi ra guni cabe ni na ley nga ixá stonda cabe, sínunque ra guni cre cabe laabe.

*Tutiica inaba lu Señor ilá, zalá*

<sup>5</sup> Sicarí bicaa Moisés, na: "Cani cuyubi ilá pur guni ni

na ley la? napa xidé guni irá xixé ni na ni, pacaa qué zalá."

<sup>6</sup> Iruti zanda guni irá ni na ley sin uchee, peru zalá ra guni cre Cristu. Nga runi ma cadi naquiiñe iníu' ndaani ladxidó' lo': "Zanda xa quiba binni ibá' para chi yubi modo ilá." Purti pa nigui'ba lu ibá' la? nga casi ñaca cuyubi lu indete lu Cristu de raqué. Cadi xa ma biete be ti tiru, beda ulá be laanu.

<sup>7</sup> Ne zaqueca cadi ma caní ique lu': "Zanda xa guiete binni xaguete para chi yubi ixá stonda." Pa ñete lu xaguete la? nga casi ñaca cuyubi lu indisa lu Cristu de lade gue'tu'. Cadi xa ma bisa be.

<sup>8</sup> Ne zándaca na lu': "Paraadidxela modo ila'ya pue." Zadxe'lu ni pa guni cre lu ca diidxa ni canayuí du ri', ne gaxha do' rigaa ca diidxa ca laatu. Nuu ca cani ndaani ruua tu ne ndaani ladxidó' to.

<sup>9</sup> Purti pa iní' lu Jesús nga xpixuaana irá xixé, ne guni cre lu de idubi ladxidó' lo dxandí undisa Dios laabe de lade gue'tu la? zalá lu'.

<sup>10</sup> Purti ndaani ladxidó' cabe runi cre cabe para ixá stonda cabe, ne ra iní' cabe ni nezalú binni la? zalá cabe.

<sup>11</sup> Sicarí na lu Xqui'chi Dios: "Zuni be irá ni uní' be para tutiica guni cre laabe."

<sup>12</sup> Ti Dios si nuu para irá xixé, ne nezalú be bia'ca risaca ca judíu, bia' queca risaca cani cadi judíu. Nga runi de lu irá ni napa be zudii be tutiisi inaba laabe.

<sup>13</sup> Purti zacá cá lu Xqui'chi be: "Tutiica inaba lu Señor ilá la? zalá."

<sup>14</sup> Peru qué zanda inaba ca ulá be laaca pa ca'ru guni cre ca laabe. Ne qué zanda guni cre cabe tobi ni qué huayuu dxi guna diaga cabe stiidxa'. Ne qué zanda guna diaga cabe ni pa qué chu' tu güi né ni laacabe.

<sup>15</sup> Ne qué zanda chu' tu güi né ni laacabe pa iruti useenda laa. Casi cá ni lu Xqui'chi Dios: "Dunabé sicarú ni cayuni ni canayuí de evangeliu ni rusieche binni. Purti diidxa galán nga canayuí cabe."

<sup>16</sup> Peru neca guna diaga cabe ni, cadi irá cabe zacaa cabe ni. Casi na profeta Isaías: "Señor Dios, iruti ñuni cre ni byuí du."

<sup>17</sup> Peru riale fe ra guna diaga cabe stiidxa Cristu, ne zuna diaga cabe ni ora chu' tu güi né ni laacabe.

<sup>18</sup> Peru naa rabe': Ñee cadi ma bina diaga cabe ni la? Ma pue. Purti sicarí cá lu Xqui'chi Dios:

Ma yendá stidxi cabe irá guidxi,  
ne ma bireeche stiidxa cabe dede ra bidubi guidxi-layú.

<sup>19</sup> Casi cayabe laatu ca: Ñee cadi ma biene ca binni Israel ni la? Purti laca cá lu Xqui'chi Dios ra bizeete Moisés ni uní' Dios:

Naa zune pur gache lú tu ora gu'ya tu ni chi gune para ca xcaadxi binni ni ca'ru gaca ti guidxi.

Zune pur idxiichi tu pur ti guidxi ni qué lica riene.

<sup>20</sup> Ne laca cá lu Xqui'chi Dios ra bisiá chaahui Isaías stiidxa Dios:  
Cani qué nuyubi naa bidxela ca naa,  
ne cani qué ninaba diidxa naa,  
uyaa ra nuu ca'.

<sup>21</sup> Peru ora ruzeete be binni Israel, na be: "Idubi dxi bix-hale naya para ti guidxi ni qué nuzuuba stiidxa', ne ni bicaa lú naa."

## 11

### *Biá Dios ca judíu*

<sup>1</sup> Lagabi naa, ñee ma bisaana Dios ca judíu, ca xpinni pe la? Qué ziuu dxi. Naa laca judíu naa, binni Israel. Zaya de Abraham, de xfamilia Benjamín.

<sup>2</sup> Ne nanna cadi cusaana Dios xpinni, cani maca ulí dede chiqué. Ñee qué ganna tu xi na lu Xqui'chi Dios ra ruzeete ni Elías la? Cá ra uluu Elías xqueja ca binni Israel lu Dios, na:

<sup>3</sup> "Señor, ma biiti cabe ca profeta stiu' ne ma binidé cabe ca altar stiu'. Yanna ma naa sia' biaana', ne laca racala'dxi cabe guuti cabe naa."

<sup>4</sup> Nga ni uní' profeta Elías, peru xi gudxi Dios laabe óraque. Na Dios:

Neca ma bi'ní cabe irá nga, peru ma ulee chua gadxe mil hombre para naa,

cani ca'ru uzuxibi xañee bidó' Baal.

<sup>5</sup> Nga ni guca chiqué, peru yanna ri laca riaana ru

caadxi judíu ni ulí Dios pur enda nacha'hui sti'.

<sup>6</sup> Ulí be laaca purti guca be nacha'hui ne laaca', ne cadi pur ni bi'ni ca'. Pa ñaca nibí be laaca pur ni bi'ni ca la? ma cadi enda rilasela'dxi di nga.

<sup>7</sup> Xi riaana xa ni ya'. Cadi idubi guidxi Israel gucuaa ni biyubi, peru cani ulí Dios la? ca ngue huaxa ucuaa ca', ne ca xcaadxi que jma rusi biguidxi ladxidó'.

<sup>8</sup> Casi na lu Xqui'chi Dios: Bisicahui Dios xquenda biaani ca', ne bi'ni lú ca para ma qué niná ca', ne diaga ca para ma qué nuna diaga ca', ne zaqué nuu ca de yanna.

<sup>9</sup> Ne laca uní' Dios de ruaa rey David, na:

Gaca ca saa stícabe trampa para usaba laacabe.

Ne gaca cani casi xiixa irenda ñee cabe, ne pur laacani guiaba ná cabe.

<sup>10</sup> Ne icheepa lú cabe para qué gu'ya cabe, ne iguude deche cabe para ma qué ganda indisa ique cabe.

*Ca judíu ne cani cadi judíu*

<sup>11</sup> Nga ni uní' rey David chiqué, peru naa rabe sicarí': Ñee birenda ñee ca judíu para biaba ca ca la? Co', sínunque ndi nga laani: ra qué nuzuuba cabe diidxa la? gunda bilá cani cadi judíu, ti gache lú cabe ora gu'ya cabe laaca'.

<sup>12</sup> Ne pa gucané enda ruchee sti ca judíu irá binni guidxilayú, ne gucané ra biaba cabe para biasa cani cadi judíu la? lágaxa ora ibigueta pe cabe jlugar cabe sti tiru. Jma rusi xa.

<sup>13</sup> Canié nia laatu cani cadi judíu ca', purti naa nga apóstol sti cani cadi judíu, ne rusicasa xhiiña'.

<sup>14</sup> <sup>14</sup> ti racaladxe gache lú ca binni xquidxe', tílasi zacá ilá caadxi de laaca'.

<sup>15</sup> Purti ra bicaa ná Dios ca judíu, uyyu né idubi guidxilayú tobi si, ne pa zacá ni la? xi gaca xa dxí uxhale ná be para ca judíu sti tiru ya'. Zeda gaca ni casi ra ibani ni ma guti.

<sup>16</sup> Pa gucuaa Dios cani uzá niru la? zaqueca zacaa cani nanda atrá. Zanda quixhe nu ti yaga casi ejemplu. Pa nazaaca xcu yaga la? laca nazaaca ca rama.

<sup>17</sup> Peru gabi nu bidxiña dxí bigá caadxi rama sti ti yaga olivo cha'hui', ne ra biree ca rama sti pe ni que, uluu cabe rama sti ti yaga olivo gui'xhi'. Ca rama bigá que zeda gaca casi ca judíu, ne ca rama olivo gui'xhi que nga laatu, cani cadi judíu. Ma nuu tu lu yaga olivo que, ne cacaa tu de irá ni zeeda de xcu yaga que.

<sup>18</sup> Peru cadi gaca tu nayá né ca rama ni bigá que. Purti ante uchá tu enda naró' stitu la? naquiiñe guietenala'dxi tu cadi laatu naaze tu xcu que, sínunque xcu que naaze laatu.

<sup>19</sup> Zándáca na tu: "Peru bigá ca rama que para uyú' du."

<sup>20</sup> Dxandí bigá cabe purti qué ñuni cre cabe, ne laatu ma uluu Dios laatu purti bini cre tu Cristu. Nga runi cadi gaca tu naya', sinuque laguya gá laatu.

<sup>21</sup> Purti pa qué ñá Dios ca rama sti pe yaga que la? nin ca laatu qué ziá'.

<sup>22</sup> Laguuya pabiá' nacha'hui Dios, peru laca naduxhu'. Purti naduxhu né be cani bichee, peru nacha'hui be para laatu pa qué ixele tu de enda nacha'hui stibe. Pacaa la? laca zagá tu.

<sup>23</sup> Ne ca judíu laca ziuu ca pa na ca guni cre ca', purti nandxó' Dios ne zanda cu' laacabe sti tiru.

<sup>24</sup> Pa biruugu tu de lu yaga olivo gui'xhi ra undani pe tu, ne beda chuu tu lu yaga olivo cha'hui ra qué nindani tu la? lágaxa cani undani pe lú ni, jma rusi qué igana ibigueta ca lu yaga sti pe ca'.

### *Rilasela'dxi Dios irá binni*

<sup>25</sup> Hermanu ca', chi güe nia laatu xiixa ni deru cusihuinni Dios, ne racaladxe guiene chaahui tu ni, para cadi udxiba tu laca laatu. Dxandí ma biguidxi ladxidó' caadxi de ca binni Israel laga si ilá ca binni ni cadi judíu, bia' maca nexhe ilá.

<sup>26</sup> Ne sicarí nga ilá idubi guidxi Israel, casi cá lu Xqui'chi Dios, ra na:

De ndaani guidxi Sion zeeda tobi ni ulá,

zedá ndee ni nadxaba lade cani za de Jacob.

<sup>27</sup> Zacá nga bidiee stiidxa laa-cabe zuxhaya ca xpecadu cabe.

<sup>28</sup> Ra qué nicaa ca judíu evangeliu, bixele Dios de laaca para guyuu né laatu tobi si. Peru nadxii ru laa-cabe pur ca bixhoze gola cabe ni ulí dede chiqué.

<sup>29</sup> Purti qué zuchaa Dios ni ma uní'. Pa ma uluu ndaaya ne ma guridxi la? qué ziuu dxi udxigueta'.

<sup>30</sup> Laatu laca qué nuzu-uba tu stiidxa be chiqué, peru yanna ma calasel'a'dxi be laatu purti ma bichee ca judíu.

<sup>31</sup> Ne zaqueca yanna cuchee cabe ti laca ilasel'a'dxi Dios laacabe cásica bi'ní né laatu.

<sup>32</sup> Purti laa pe bisaana irá xixé binni lu ná enda ruchee ti ilasel'a'dxi irá cabe.

<sup>33</sup> Nabé riene Dios, iruti ru nuu xpiaani bia' nuu xpiaani be, ne iruti ru riene bia' riene be. Qué zanda di ganna nu xi na xquenda biaani be nin guiene nu xi cayuni be.

<sup>34</sup> Casi cá lu Xqui'chi be, ra na:

Tu laa zanda ganna xi chi guni Señor,

o tu bisiene laabe.

<sup>35</sup> Zanda xa udí' nu laabe xiixa

ne óraque ru cueza nu quixe be laanu pur ni bidí' nu que.

<sup>36</sup> Purti irá xixé zeeda de laabe, ne pur laabe nuu irá ni, ne para laabe. Ne qué ziuu dxi guiaana dxí de isaca be. Amén.

## 12

*Modo guiaana nu para Dios*

<sup>1</sup> Nga runi hermanu ca', pur ma bilaseladxii' Dios laatu, rinaba udii tu xpida tu laa, casi ti ofrenda ni nabani ne nayá, ne ni chuladxii' icaa. Zacá ti zanda usisaca tu laa de idubi ladxidó' to.

<sup>2</sup> Ne ma cadi chi nanda tu ni na binni guidxilayú, sínunque laudii lugar uchaa Dios laatu ne cuee irá ni ucuá ique tu chiqué. Zacá zanna tu xii nga racala'dxi Dios guni tu, ni nacha'hui ne ni chuladxii' ne ni jneza pe'.

<sup>3</sup> Pur enda nacha'hui sti Dios biseenda naa gune dxiiña sti'. Nga runi chi ulidxe cada tobi de laatu, cadi udxiba tu laatu jma que bia' naca tu, sínunque cada tobi guiaana conforme bia' ma naca si que nga laani, bia' fe bidii Dios cada tobi.

<sup>4</sup> Casi ti cuerpu napa stale ndaa, peru adxé adxé ni runi cada ndaa,

<sup>5</sup> zaqueca laanu, neca stale nu Peru ma naca né nu Cristu tobi si, ne laca ma naca né nu irá hermanu tobi si.

<sup>6</sup> Peru adxé adxé gracia bidii Dios cada tobi, ne bidii si ni laanu. Nga runi ni napa gracia para güi stiidxa Dios la? guni ni bia' fe sti'.

<sup>7</sup> O ni napa gracia para acané binni la? nga nga guni. Zaqueca ni napa gracia para usiidi la? naquiiñe ucaa ique usiidi'.

<sup>8</sup> Ne ni napa gracia usieche binni la? ngue nga guni. Ni

rudii la? naquiiñe udii ni de idubi ladxidó'. Ni napa cargu la? naquiiñe guni ni sin ichaaba', ne ni rudii ná cani caquiiñe la? guni ni ne enda nayeche'.

*Modo ganaxhii saa nu*

<sup>9</sup> Laganaxhii saa de idubi ladxidó' to. Laucaa ná ni nadxaba', ne lachinanda ni nacha'hui'.

<sup>10</sup> Laganaxhii saa casi enda bi'chi', cada tobi usisaca stobi ne cadi laca laa.

<sup>11</sup> Cadi ichaaba tu ne cadi aca tu nayanda, sínunque laguni xhiiña Señor ne stale gana.

<sup>12</sup> Laguieche né ni cabeza tu udii Dios laatu. Cadi ixhacala'dxi tu neca gueeda xiixa enda naná luguiá tu, ne cadi usaana tu de iní' né tu Dios.

<sup>13</sup> Ora caquiiñe ca hermanu xiixa, lagacané laaca'. Lauchagalú cani zeeda de sti ladu.

<sup>14</sup> Lainí' né Dios pur cani riguu dí laatu, lainaba lu Dios cu' ndaaya laaca' ne cadi inaba tu mal para laaca'.

<sup>15</sup> Laguieche né cani cayeche', laguuna né cani cayuuna'.

<sup>16</sup> Lachuu tobi si casi zeeda tu. Cadi gaca tu nayá', sínunque laidxaaga tutiica, neca huaxié' risaca. Cadi guni tu laatu ni nuu xpiaani'.

<sup>17</sup> Necá uchée né cabe laatu, cadi uquixe tu ni laa-cabe. Laguni ni jneza si, ti qué gapa binni xi pur iní' laatu.

<sup>18</sup> Laguni bia' ganda para cadi chu' dinde né tu iruti'.

Zaa guni cabe ni laacabe  
peru cadi né rusi ca laatu.

<sup>19</sup> Hermanu ni nadxiee ca',  
cadi uquixe tu ni guni cabe  
laatu, sínuque lausaana ni  
lu ná Dios, purti cá ni lu  
Xqui'chi be ra na be:

Xcuenta nuu ni, ne naa  
uquixe ni laacabe.

<sup>20</sup> Laatu sicarí laguni:

pa candaana tobi ni  
nanala'dxi lii, bidii ni  
go,

ne pa cayati nisa bidii nisa  
gue',

parti ra gu'nu zacá zusituí lu  
lú be.

<sup>21</sup> Cadi udiiu lugar cuaquí  
dxí ni nadxaba lii, sínuque  
gudixhe dxí ni nadxaba pur  
ni nacha'hui'.

## 13

### *Naquiiñeuzuuba binni sti-idxa cani runi mandar*

<sup>1</sup> Naquiiñeuzuuba irá  
binni stiidxa cani runi  
mandar ndaani xquidxi,  
parti iruti ñuni mandar  
pa ñaca cadi zeeda ni de  
Dios, ne Dios nga gudixhe  
cani nuu para guni mandar  
laanu.

<sup>2</sup> Nga runi, tutiica ucaa lú  
cani runi mandar la? cucaa  
lú ni gudixhe Dios, ne za-  
gui'ba donda ique cani guni  
zaqué ne ziaba ná ca'.

<sup>3</sup> Purti cadi nuu ca justi-  
cia para uchibi ca ni guni  
jneza, sínuque ni uchee. Ne  
pa racala'dxu cadi idxibi lu  
justicia la? bi'ni jneza, ne  
ziaanu bien ne laaca'.

<sup>4</sup> Purti xhiña Dios cayuni  
ca justicia para bien stiu'.  
Peru pa uchee lu la? óraque

huaxa zadxibi lu', purti napa  
cabe derechu usaba ná cabe  
lii, ne cayuni cabe ni na Dios  
gaca', usaba ná cabe cani  
dxandí cuchee.

<sup>5</sup> Nga runi naquiiñe uzu-  
uba tu stiidxa cabe, cadi  
parti si ridxibi tu guiaba ná  
tu, sínuque laca parti nanna  
tu jneza ni.

<sup>6</sup> Ne laca pur nga ca  
naquiiñe quixe tu impuestu,  
parti laca ni na Dios gaca'  
nga cayuni cani runi man-  
dar, ne cayuya ca guiaxa  
ni.

### *Modo ibani xpinni Cristu*

<sup>7</sup> Laquixe de irá ni nuzaabi  
tu. Ra nuzaabi tu manu,  
lachigudii manu, ne ra nuza-  
abi tu impuestu, laquixe. Ni  
naquiiñe guni respetar tu, la-  
guni respetar, ne ni naquiiñe  
usisaca tu, lausisaca.

<sup>8</sup> Ora ma gudixe tu irá ni  
nuzaabi tu binni la? ma  
riaadxa si ganaxhii tu laaca'.  
Ne ora ganaxhii nu stobi la?  
cayuni nu ni na ley sti Dios.

<sup>9</sup> Purti sicarí na ca man-  
damientu: "Cadi chu' neu ni  
cadi xheelu', cadi guuti lu',  
cadi cuanu', cadi cueeu falsu  
luguiá binni, cadi gache lú  
lu sti stobi." Ne pa nuu ru  
sti mandamientu la? zuni  
lu ni na ni pa gu'nu ni na  
ca diidxa ri': "Gunaxhii stobi  
cásica nadxii lu lii."

<sup>10</sup> Pa nadxii lu stobi la?  
qué zuchee neu laa. Ne ra  
ganaxhii tu binni ma cayuni  
tu irá xixé ni na ley.

<sup>11</sup> Naquiiñe guni tu irá  
ca nga, ne laganna ma ora  
ireeche bacaanda', purti ma  
zeda yuba dxi gueda caa Dios

laanu. Jma gaxha nuu ni yanna, cadi casi dxi bini cre nu,

<sup>12</sup> casi ñaca ma chi irá gueela', ne ma zeda yaba xpi-aani dxi. Nga runi naquiiñe usaana nu de guni nu ni cadi jneza ni raca lu guelacahui ne chu' nu listu sa nu lu bi-aani'.

<sup>13</sup> Sa nu jneza casi naquiiñe sa cabe ridxí'. Cadi sa gueela nu, nin chu' nu luguiá gunaa, nin luguiá viciu, nin tinde nu, nin guni nu pur gapa nu jma que stobi,

<sup>14</sup> sínuque sa né nu Señor Jesucristu ne guni nu ni na, ne ma cadi uyubi nu guni nu ni na ique nu.

## 14

*Iruti iní' hermanu stí'*

<sup>1</sup> Pa nuu ti hermanu huaxié' napa fe la? laicaa laa lade tu, peru cadi uchá tu ni lú.

<sup>2</sup> Purti nuu de ca xpinni Cristu ni runi cre zanda go intiisi, peru laca nuu cani qué riná go intiisi partí huaxié' ru fe stí'.

<sup>3</sup> Peru ni ro intiisi la? cadi udxii deche ni qué na go intiisi, ne zaqueca ni qué na go intiisi cadi ga'ni ná ni ro intiisi, partí laca xpinni Dios laa.

<sup>4</sup> Lii tu naca lu para udxiba lu donda ique xpinni stobi. Xpixuaana be nga iní' pa cayuni be jneza o pa cuchee be. Ne ca xpinni Cristu zuzuhuaa chaahui pe ca partí zuzuhuaa chaahui Cristu laacabe.

<sup>5</sup> Nuu tu na jma nandxó' ti dxi, que sti dxi, ne nuu tu na igual irá dxi. Cada tobi chi nanda ni rabi ladxitdó' laa jneza.

<sup>6</sup> Purti ni na jma nandxó' ti dxi la? runi ni para Señor; ne zaqueca ni na igual irá dxi, laca para Señor runi ni. Ne ni ro intiisi la? runi ni para usisaca Señor, partí rudii diuxquixe Dios pur endaró que. Ne ni qué riná go intiisi la? runi ni para usisaca Señor, ne laca rudii diuxquixe Dios.

<sup>7</sup> Nin tobi de laanu cadi nabani nu para laasi nu, ne nin tobi qué zati para laa si.

<sup>8</sup> Pa nabani nu la? nabani nu para Señor, ne pa gati nu la? zati nu para Señor. Nga runi pa ibani nu o pa gati nu, stí Señor laanu.

<sup>9</sup> Pur nga ca runi guti Cristu ne bibani, ne nabani de yanna ti gaca Señor stí irá', clásica ni ma guti zaqueca ni nabani.

<sup>10</sup> Peru lii, xiñee rudxiiba lu donda ique hermanu stiu', ne xiñee rudxiib deche lu laa. Lácaxa cadi irá xixé nu napa nu xidé uzuhuá' nu nezalú Cristu.

<sup>11</sup> Purti sicarí cá ni lu Xqui'chi Dios:

Naa nga Dios ni nabani ne naa cayabe ndi laatu: Zadxiña dxi guzuxibi irá xixé binni xañee', ne de irá ca zanna ca naa nga Dios.

<sup>12</sup> Zacá nga laani, cada tobi nu zabidxi Dios cuenta laanu.

*Iruti uchenda hermanu stí'*

<sup>13</sup> Nga runi cadi jneza udxi'ba saa nu donda ique nu, sínunque uyubi nu cadi gaca nu casi xiixa ni irenda ñee hermanu stinu, ti cadi pur laanu guiana.

<sup>14</sup> Nanna dxi'che qué zuché' né nu Dios pa idó' no intiisi endaró, ne nanna ni partí ma xpinni Cristu naa. Peru pa nuu ti hermanu para laa rului' cadi jneza go intiisi la? cadi jneza ni para laa.

<sup>15</sup> Ne pa pur ni go lo guniná lu hermanu stiu' la? ma cadi cusihuinni lu pa nadxii lu laa. Guti Cristu pur laabe. Yanna cadi gu'nu xiixa ni usaba laabe.

<sup>16</sup> Necá para laatu rului' jneza ni, peru pa zaní' binni la? cadi guni tu ni.

<sup>17</sup> Partí nezalú Dios cadi ni go ca xpinni ne ni gue ca nga risaca, sínunque ni risaca nga guni ca jneza ne chu' ca tobi si, ne udii ca lugar usieche Espíritu Santu laaca'.

<sup>18</sup> Zieche né Dios ni guni xhiiña Cristu zacá, ne laca ziula'dxi binni guidxilayú modo guni ca'.

<sup>19</sup> Pur nga runi, sa nanda nu ni guni laanu tobi si, ne ni acané iniisi cada tobi.

<sup>20</sup> Cadi uchiá lu dxiiña ni bi'ni Dios luguiá stobi pur ni go lo'. Dxandí qué ribee Dios binni de go intiisi, peru cadi jneza go lo xiixa pa zusaba ni sti hermanu.

<sup>21</sup> Cadi jneza go lo beela pa usaba ni hermanu stiu', nin gue lu vinu, nin gu'nu intiica ni usaba laabe, nin ni uchenda laabe, nin ni ucuí sa laabe atrá.

<sup>22</sup> Ni runi cre lu jneza gu'nu la? bi'ni ni, peru ora lii siou' ne Dios. Nayeche nuu ni nanna cayuni jneza.

<sup>23</sup> Peru ni go xiixa ne iní ique zándaca cuchee partí gudó ni la? ma dxi'ba donda ique, partí neca qué ganna pa jneza ni, peru cayuni ni, ne intiisi guni cabe zacá la? cuchee cabe.

## 15

*Cada tobi guni ni chul'a'dxi stobi*

<sup>1</sup> Laanu pa ma zuhuá' dxichi nu la? cadi ixhacala'dxi nu de acané nu ca hermanu ni huaxié' ru riene, ne cadi guni nu ni chul'a'dxi si nu,

<sup>2</sup> sínunque guni nu ni chul'a'dxi stobi, ti acané nu laa' uzuhuaa chaahui'.

<sup>3</sup> Nin Cristu qué ñuni di ni gucala'dxi laa si, casi cá lu Xqui'chi Dios ra na be rabi be Dios: "Lugua'ya biaba stiidxa cani uluu dí lii."

<sup>4</sup> Laganna dxichi: irá ni ucuá lu Xqui'chi Dios ucuá para usiidi laanu, ti pur laani gata dxí ladxidó' no ne cadi ixhacala'dxi nu. Ne zacá cadi guiaana nu de icá lú nu Dios.

<sup>5</sup> Dios nga runi pur qué ixhacala'dxi nu ne rusieche laanu, ne laca laa guni laatu tobi si ra chi nanda tu ejemplu sti Cristu.

<sup>6</sup> Ne óraque irá tu zusicaca tu Dios Bixhoze Jesucristu Señor stinu, ne zuni tu ni junto casi ñaca tobi si caní'.

*Bireeche stiidxa Dios lade cani cadi judíu*

<sup>7</sup> Hermanu ca', cadi udxii deche saa tu ti ganda usisaca

tu Dios, casi qué nudxii deche Cristu laatu.

<sup>8</sup> Cayabe laatu, beeda Cristu Jesús casi ti mozo sti ca judíu ti gaca ni bidii stiidxa Dios ca bixhoze gola ca', ne zacá usihuinni be runi Dios ni ma uní'.

<sup>9</sup> Peru laca beeda be para udii cani cadi judíu diuxquixe Dios purti ma bilasela'dxi laaca'. Casi cá ni lu Xqui'chi Dios ra na:

Zusisaca lii lade cani cadi judíu

Ne zudxiiba lii ra guunda cantu.

<sup>10</sup> Ne cá sti lugar:  
Binni ni cadi judíu ca',  
laguieche né cani maca xpinni Dios.

<sup>11</sup> Ne nuu ru sti lugar ra cá:  
Irá xixé guidxi zusisaca Señor

ne irá xixé binni zaní' pabiá' nandxó' be.

<sup>12</sup> Ne laca cá ni uní' profeta Isaías:

De xcu Isaí zaree ni guni mandar cani cadi judíu,

ne zacá lú ca laabe.

<sup>13</sup> Dios nga racané laanu para ganda icá lú nu laa. Rinalba laabe usieche be laatu ne quixhe dxí be ladxitó' to ra guni cre tu laabe. Zacá zacané Espíritu Santu laatu ti jma rusi icá lú tu laabe.

<sup>14</sup> Hermanu stinne ca', nanna dxi'che nabani tu modo na Dios, ne nanna ma biziidi tu stale, ne ma nanna tu acané saa tu.

<sup>15</sup> Peru hermanu ca', cadi caguba naya de ucaa chupa chonnan cosa lú tu para usi-etenaladxe laatu ni maca

nanna tu. Cayune ni purti uní' né Dios naa gune ni.

<sup>16</sup> Ulí be naa gune xhiña Jesucristu lade cani cadi judíu, ne cusiide laaca de evangeliu sti Dios, ti ora ma bi'ni Espíritu Santu laaca nacha'hui', udiee laaca Dios casi ti ofrenda ni chu'la'dxi icaa.

<sup>17</sup> Ñanda ca nuchaya enda naró' stinne pur irá dxiña sti Dios ni huayuni né Cristu naa.

<sup>18</sup> Peru ridxibe cuaa ruaa xiixa adxé jma que ca dxiña ni ucané Cristu naa bine lade cani cadi judíu para uzuuba ca stiidxa Dios. Biquiñe be ni unié ne ni bine para bi'ni be ni.

<sup>19</sup> Uyuu né enda nandxó' sti Espíritu Santu naa para gunda bine seña ne milagru. Ne zaqué biree de Jerusalén bidiee vuelta dede yendaya Ilírico. Idubi neza que ma bisiide chaahue stiidxa evangeliu sti Cristu.

<sup>20</sup> Purti ndi nga rului'ladxe gune': güe de evangeliu, peru ra ca'ru guna diaga cabe de Cristu, ti cadi indisa yoo ra ma undaa stobi.

<sup>21</sup> Racaladxe gune casi cá lu Xqui'chi Dios ra na:  
Ra qué huayuu dxi guiete stiidxa be, zaziidi ca', ne ra qué huayuna diaga ca de laabe, ziene ca'.

*Ra cá ique Pablo che Roma*

<sup>22</sup> Pur nga runi qué ñanda ñaa ra nuu tu neca gupa gana.

<sup>23</sup> Peru yanna huaxa ziaa purti ma qué gapa ra gune dxiña ladu ri', ne purti ma

xadxí huayacaladxe chaa ra  
nuu tu.

<sup>24</sup> Ngue runi ziaa ora ma  
nuua neza chaa España.  
Purti racaladxe guuya laatu  
ora tide', ti izaca laatu caadxi  
ne guieche ladxiduá', ne de  
raqué chi ndee tu naa neza.

<sup>25</sup> Peru yanna ri chaa  
Jerusalén chi gacaniá ca  
xpinni Cristu ni nuu raqué.

<sup>26</sup> Purti uni' stiidxa ca her-  
manu de Macedonia ne de  
Acaya utopa ca vueltu para  
caní caquiiñe ni nuu lade ca  
xpinni Cristu Jerusalén.

<sup>27</sup> Bilui'la'dxi cabe guni  
cabe ni, ne huandí nuzaabi  
cabe laaca xiixa. Purti pur  
laaca ucuua cabe ni acané  
xhialma cabe. Yanna ma  
zanda acané cabe laaca de  
ni caquiiñe ca'.

<sup>28</sup> Nga runi ora ma yesaana  
vueltu ri ra nuu cabe la?  
ziganna laatu ora tide chaa  
España.

<sup>29</sup> Ne naa nanna ora chaa  
ra nuu tu la? ziniá stale di-  
idxa ni usieche laatu lu evan-  
geliu sti Cristu.

<sup>30</sup> Hermanu ca', rinaba  
laatu iní' né tu Dios pur  
naa. Zacá zanda acané tu  
naa. Canaba ni laatu partí  
xpinni Cristu laatu ne partí  
zului'la'dxi tu guni tu ni pur  
amor ni rudii Espíritu Santu  
laanu.

<sup>31</sup> Lainaba lú be ila'ya lu  
ná cani qué runi cre ni nuu  
Judea, ne laca lainaba pur ni  
chi saana ra nuu ca xpinni  
Cristu ni nuu Jerusalén, ti  
chu'la'dxi cabe icaa cabe ni.

<sup>32</sup> Zaqueca lainaba pa na  
Dios chi ndaya ra nuu tu ne  
stale enda nayeche', ti ganda

iziladxe caadxi lade tu.

<sup>33</sup> Dios ti nga riguixhe dxí  
ladxidó' binni, ne yanna laa  
chu' né irá tu. Amén.

## 16

### *Diuxi*

<sup>1</sup> Cuseenda hermana Febe  
ra nuu tu. Runi be dxiiña  
lade caní runi cre Cristu ni  
nuu ndaani guidxi Cencrea.

<sup>2</sup> Lauchagalú laabe casi  
naquiiñe guni nu irá xpinni  
Cristu, purti nadxii tu Señor,  
ne lagacané laabe intiica  
iquiñe be, purti laabe  
huayacané be stale hermanu  
ne laca huayacané be naa.

<sup>3</sup> Laudii diuxi hermanu  
Aquila ne Priscila, xheela'.  
Bi'ni né cabe naa xhiiña  
Cristu Jesús.

<sup>4</sup> Qué ña cabe xpira cabe  
pur naa. Rudiee diuxquixe  
laacabe, ne cadi naa sia'  
sínuque ne irá ca hermanu ni  
cadi judiú.

<sup>5</sup> Laca laudii diuxi caní rie  
cultu ralidxi cabe. Laudii  
diuxi Epeneto, xhamigua ni  
nadxiee'. Laabe nga primé  
ni biyubi neza sti Cristu lade  
caní nuu Asia.

<sup>6</sup> Laudii diuxi María ni  
nabé huayuni né laatu  
dxiiña'.

<sup>7</sup> Laudii diuxi Andrónico  
ne Junias, ca binni xquidxe',  
caní uyuaa nia ndaani lidxi  
guiiba'. Laacabe risaca cabe  
lade ca apóstol, ne maca bini  
cre cabe Cristu dxi bine cre.

<sup>8</sup> Laudii diuxi Amplias,  
xhamigua ni nadxiee pur  
Señor.

<sup>9</sup> Laudii diuxi Urbano ni  
bi'ni né laadu dxiiña sti

Cristu Jesú斯 ne Estaquis, xhamigua ni nadxiee'.

<sup>10</sup> Laudii diuxi Apeles ni runi jneza nezalú Cristu. Laca laudii diuxi ca lisaa Aristóbulo.

<sup>11</sup> Laudii diuxi Herodión, binni xquidxe', ne cani ma bini cre Cristu de lade ca lisaa Narciso.

<sup>12</sup> Laudii diuxi hermana Trifena ne hermana Trifosa ni runi xhiiña Señor, ne zaqueca hermana Pérsida ni nadxii nu. Nabé huayuni be xhiiña Señor.

<sup>13</sup> Laudii diuxi Rufo ni risaca nezalú Señor, ne laca laudii diuxi jñaa be. Laa gupa naa chiqué casi xiiñi'.

<sup>14</sup> Laudii diuxi Asíncrito, Flegonte, Hermas, Patrobas, Hermes, ne ca hermanu ni nuu né laaca'.

<sup>15</sup> Laudii diuxi Filólogo ne Julia, ne Nereo ne biza'na', ne Olimpas, ne irá ca xpinni Cristu ni nuu ra nuu ca'.

<sup>16</sup> Hermanu ca', laugapa diuxi saa ne laiquidxi saa purti ma bi'ni Cristu laatu hermanu. Irá xpinni Cristu ruseenda ca stiuxi tu.

<sup>17</sup> Hermanu ca', rinaba laatu gu'ya gá tu cani rindaa saa laatu, ne cani runi pur uxhale laatu de ni ma biziidi tu. Laguixele de laacabe,

<sup>18</sup> purti laacabe cadi xhiiña Jesucristu cayuni cabe, sínunque cayuni cabe ni para guni ganar si cabe. Nabé nanaxhi ruaa cabe, ne puru diidxa nadó' rini' cabe ora ma nuu cabe ra nuu cani huaxié' riene.

<sup>19</sup> Ma nanna binni irá ladu pabiá' huazuuba tu diidxa' ne rieche nia laatu, peru

racaladxe chu' xpiaani tu luguiá enda nacha'hui ne gaca tu huaxié' para enda nadxaba'.

<sup>20</sup> Dios riguixhe dxí ladxidó' no ne laca nagueenda zaguixhe dxí binidxaba xa ñee tu. Jesucristu Señor stinu gaca nacha'hui ne laatu.

<sup>21</sup> Ruseenda Timoteu ni rune nia dxiiña stiuxi tu, ne zaqueca ca lisaa Luciu, Jasón ne Sosípater, ca binni xquidxe'.

<sup>22</sup> Naa nga Terciu ni bicaa lu gui'chi ri' ni uní' Pablu, ne laca cuseenda stiuxi tu pur Señor.

<sup>23</sup> Ralidxi hermanu Gayo nuua'. Nabé riguu be cani runi cre ndaani lidxi be. Laca ruseenda be stiuxi tu. Zaqueca laicaa stiuxi Erasto ni naca tesorero sti guidxi ri', ne hermanu Cuarto.

<sup>24</sup> Jesucristu Señor stinu cu' ndaaya laatu. Amén.

### *Usisaca nu Dios*

<sup>25</sup> Naquiñé usisaca nu Dios, ti laa zanda uzuhuaa chaahui laatu. Zacá na evangeliu ni rue ri', ne laca laani nga stiidxa Jesucristu. Biaana evangeliu ri ra naga'chi xadxí, peru ma bisihuinni Dios ni yanna.

<sup>26</sup> Ca gui'chi ni bicaa ca profeta que ucuá cani modo na Dios ni qué ziuu dxi gati', ne rusiidi cani irá binni guni cre ca laabe ne guni ca ni na be.

<sup>27</sup> Tobi lucha Dios nga riene chaahui irá cosa, ne qué ziuu dxi guiaana dxí de usisaca cabe laa pur Jesucristu. Amén.

# PRIME GUI'CHI BICAA SAN PABL LU CA XPINNI CRISTU NI NUU CORINTO

<sup>1</sup> Naa nga Pablu ni ulí Dios ne uní' né para gaca apóstol sti Jesucristu. Naa ne hermanu Sóstenes

<sup>2</sup> cucá' du gui'chi ri lú tu, hermanu ca', irá tu casi nuu tu ndaani guidxi Corinto ca. Ma nayá ladxidó' to nezalú Dios purti ma bini cre tu Cristu, ne pur nga ca ma ulee chu Dios laatu para gaca tu xpinni, laatu ne binni irá ladu ni runi cre Jesucristu, Señor sti né nu laaca'.

<sup>3</sup> Dios Bixhoze nu ne Señor Jesucristu cu' ndaaya laatu ne quixhe dxí ladxidó' to.

*Modo huaguu Dios ndaaya laanu*

<sup>4</sup> Qué riaana dxie de udiee diuxquixe Dios pur irá modo huaguu ndaaya laatu pur ni bi'ní Cristu Jesús.

<sup>5</sup> Purti dede uyyu né tu Cristu tobi si, ma dxi'ba tu de irá modo. Ma riene tu stale ne nanna tu ximodo güi tu de ni ma nanna tu ca.

<sup>6</sup> Ne zacá ni purti de idubi ladxidó' to ucuua tu stiidxa Cristu ni bina diaga tu.

<sup>7</sup> Nga runi cadi cayaadxa laatu gasti de ni naguixhe Dios udii irá xpinni laga cabeza tu dxi gueeda Jesucristu Señor stinu.

<sup>8</sup> Laabe uzuhuaa chaahui be laatu dede dxi iluxe guidxilayú, ti cadi chu' tu

udxiiba donda ique tu dxi gueeda Señor Jesucristu.

<sup>9</sup> Nanna dxichi nu zuni be ni, purti runi be ni iní' be. Ne laabe nga uní' né be laatu para gaca né tu Jesucristu Xiiñi be tobi si. Laa nga Señor stinu.

*Cadi indaa saa ca xpinni Cristu*

<sup>10</sup> Hermanu ca', pur Jesucristu Señor stinu, rinaba laatu chu' tu tobi si ne cadi indaa saa tu, sínunque lagaca tobi si de irá ni iní' ique tu ne ni quixhe tu guni tu.

<sup>11</sup> Purti ma gunna cadinde diidxa tu, hermanu stinne ca'. Gunna ni purti gudxi cani beeda de ralidxi Cloé ni naa.

<sup>12</sup> Rabe cadinde diidxa tu purti nuu de laatu na: "Naa xpinni Pablu naa." Ne nuu stobi na: "Naa xpinni Apolo naa"; o "Naa xpinni Pedru naa"; o "Naa xpinni Cristu naa."

<sup>13</sup> Ra cayuni tu zacá la? cayuni tu Cristu stale ndaa. Lácaxa Pablu ucuá lu cruz pur laatu, o lácaxa uyyu nisa tu para gaca tu xpinni Pablu.

<sup>14</sup> Rudiee diuxquixe Dios nin tobi de laatu qué niguaa ni'sa', sínunque Crispo si, ne Gayo,

<sup>15</sup> ti qué chu' tu iní' uyyu nisa para gaca xpinne'.

<sup>16</sup> Laca uluaa ni'sa xfamilia Estéfanas, ne pa nuu ru ni uluaa ni'sa la? qué rietenal-adxe'.

<sup>17</sup> Purti cadi biseenda Cristu naa gueda nduaa ni'sa', sínunque gueda güe nia binni ximodo ilá, ne cadi

uyube inié diidxa nagana ne sicarú para ucuudxe laacabe. Purti zacá la? zándaca cabeza ilá cabe pur stiidxa', ne cadi partí guti Cristu lu cruz.

*Enda nandxó' sti Dios*

<sup>18</sup> Purti ora riete xi pur guti Cristu lu cruz la? ruluí enda huati si ni para cani cananiti, peru laanu nanna nu laani nga enda nandxó' sti Dios partí pur laani ma bilá nu.

<sup>19</sup> Casi cá lu Xqui'chi Dios: Zuniteluá' enda biaani sti cani nuu xpiaani', ne zucaa naya ni riguixhe ca hombre ni riene.

<sup>20</sup> Paraa iquiiñe ni nuu xpiaani ne ca maistru de ley ne cani riula'dxi icaa yu intiica uezete binni de guidxilayú ri ya'. Ñee cadi ma bisihuinni Dios pabiá' nahuati xpiaani binni guidxilayú la?

<sup>21</sup> Purti nanna Dios xi runi, nga runi qué niná ñunibiá' cabe laa pur enda biaani stícabe. Jma uyuula'dxi be ulá be binni ra guni cre ni rabi cabe enda huati que ora chu' tu güi né ni laaca'.

<sup>22</sup> Purti ca judíu rinaba ca gu'ya ca milagru, ne ca griegu nisi rucaa ique ca ganna ca stale ni nagana.

<sup>23</sup> Peru laadu la? rui né du binni guti Cristu lu cruz para ilá nu. Dxandí ruchenda ni ca judíu, ne napa cani cadi judíu ni de enda huati.

<sup>24</sup> Peru para cani ma bichiña Dios ra nuu la? casi ca judíu zaqueca cani cadi Judiu, Cristu nga enda nandxó' ne enda biaani sti Dios. Rihuinni ni partí

gudixhe Dios ilá binni ra guti be lu cruz.

<sup>25</sup> Ricaa binni ni gudixhe Dios que casi enda huati, peru jma peca nuu xpiaani ni que enda biaani stícabe, ne neca para laacabe ruluí cadi nandxó' Dios, peru iruti binni guidxilayú nandxó' bia' laabe.

<sup>26</sup> Laguuya si laatu, hermanu ca', bichiña be laatu neca cadi stale de laatu nuu xpiaani para binni guidxilayú, ne laca huaxié' de laatu ni naca tuuxa, ne huaxié' de laatu ni risaca para laacabe.

<sup>27</sup> Peru ulí Dios cani huaxié' nuu xpiaani para binni guidxilayú, ti usituí lú cani nuu xpiaani', ne ulí be cani iruti naca, para usituí lú cani naca tuuxa ndaani guidxilayú ri'.

<sup>28</sup> Ne laca ulí be cani qué risaca para binni guidxilayú, ne cani na cabe qué iquiiñe', ne cani qué rulabi binni laa, para unduuxe be cani risaca para laaca',

<sup>29</sup> ti iruti uchá enda naró' sti nezalú be.

<sup>30</sup> Laabe ma uluu né be laatu Cristu tobi si, ne yanna ma Cristu nga enda biaani stinu partí pur Cristu ma bixhá be stonda nu ne bisiá be ladxidó' no, ne ma bilá nu.

<sup>31</sup> Casi cá lu Xqui'chi Dios: "Tu gacala'dxi uchá enda naró' sti la? iní' ni bi'ní Señor pur laa."

## 2

*Guti Cristu lu cruz pur laanu*

<sup>1</sup> Hermanu ca', dxi yegüé nia laatu stiidxa Dios ni qué ñanna binni chique la? qué ninié stale diidxa sicarú, nin diidxa ni nagana.

<sup>2</sup> Purti ni jma ucaladxe ganna tu nga guti Cristu lu cruz pur laanu, ne qué nina'ya niree chuaa de laani.

<sup>3</sup> Ne uyuaa lade tu casi tobi ni qué gapa stipa ne nabé bidxibe dede guca di'te'.

<sup>4</sup> Ora byue nia laatu stiidxa Dios ne bisiide ni laatu la? qué nina'ya ninié casi tobi ni nuu xpiaani para nucuudxe laatu ne stiidxa', sínunque biquiñe Espíritu Santu ni para biciudxi laatu, ne zacá bihuinni enda nandxó' sti Dios,

<sup>5</sup> ti cadi icá lú tu xquenda biaani binni guidxilayú sínunque icá lú tu enda nandxó' sti Dios.

### *Rusihuinni Espíritu Santu naca Dios*

<sup>6</sup> Laca riní du diidxa ni nagana, peru lade cani ma huaniisi lu stiidxa Dios. Peru qué ribee du ni lu xquenda biaani binni guidxilayú nin cani runi mandar ndaani guidxilayú, purti zanitilú ca',

<sup>7</sup> sínunque rui du ni beeda de xquenda biaani Dios. Xadxi huiini qué ñanna binni ni, peru maca gudixhe be ni dede dxi ca'ru cha guidxilayú, ti chu' dxi gaca nu casi Cristu dxi ma bigueta ibá'.

<sup>8</sup> Nin tobi de cani runi mandar ndaani guidxilayú ri qué ñene ni, purti pa ñene ca ni la? qué ñuu dxi nucaa ca Señor ni nandxó' lu cruz.

<sup>9</sup> Sicarí cá lu Xqui'chi Dios: Iruti qué huayuuya ni ma naguixhe chaahui Dios para cani nadxii laa.

Ne iruti huayuna diaga ni, ne qué huayuu dxi gueeda ni lu xquenda biaani binni guidxilayú.

<sup>10</sup> Peru biseenda Dios Espíritu Santu beda uluí' ni laanu, purti ruuya chaahui Espíritu que irá ni riguixhe Dios, dede ni jma nagana.

<sup>11</sup> Iruti zanda ganna xi cá ique stobi sínunque espíritu si sti ngue. Zacaca nga iruti zanda ganna xi cá ique Dios sínunque Espíritu si sti Dios.

<sup>12</sup> Peru cadi espíritu sti binni guidxilayú ucuaa nu, sínunque Espíritu ni zeeda de Dios, para ganda guiene nu irá ni ma bidii Dios laanu.

<sup>13</sup> Rui du ni, peru cadi de xquenda biaani si du bizi'di du ni, sínunque bisiidi Espíritu Santu laadu xi iní du. Ne zacá rusiene du cani ma napa Espíritu que, xi na Dios.

<sup>14</sup> Cani qué gapa Espíritu Santu la? qué ricaa ni rudii Espíritu que, purti para laaca enda huati si ni. Qué riene cabe ni purti iruti zanda guiene ni stubi pa qué usiene Espíritu Santu ni laa.

<sup>15</sup> Ni ma napa Espíritu Santu la? zanda guiene irá xixé, peru ca xcaadxi binni qué ziene laabe.

<sup>16</sup> Purti sicarí cá lu Xqui'chi Dios: "Tu laa zanda guiene xi riní' ique Dios ya', o tu laa zanda usiidi laabe." Iruti

zanda Peru laanu ma napa  
nu Cristu para usiene laanu.

### 3

*Modo raca xhiña Dios*

<sup>1</sup> Hermanu ca', qué huayanda inié nia laatu casi rinié nia cani runi ni na Espíritu Santu, sínunque huanié nia laatu casi rinié nia cani runi ni na ique, purti nahuiini ru tu lu stiidxa Cristu.

<sup>2</sup> Bisiide laatu puru si ni qué igana, purti ca'ru chu' tu para iziidi tu ni nagana chiqué, nin de yanna, casi runi cabe badu huiini', leche si rudii cabe gue ora ca'ru chu' para go.

<sup>3</sup> Ne cadi caniisi tu lu stiidxa Dios, purti nabani ru tu modo na ique tu. Nin tobi de laatu qué riná tidi stobi lú, ne ridinde diidxa tu, ne cadi nuu tu tobi si. Ne laga cayuni tu irá nga, ñee na tu cadi cayuni ru tu ni na ique tu la? Lácaxa cadi zacaca runi cani ca'ru guni cre Cristu.

<sup>4</sup> Purti nuu de laatu na: "Naa xpinni Pablo naa." Ne stobi na: "Naa xpinni Apolo naa." Ne zacá cayuni tu casi runi tutiisi binni.

<sup>5</sup> Tuu nga Pablo pue, ne tuu nga Apolo. Biquiñe si Dios laadu para bini cre tu. Cada tobi bi'ni dxiiña modo bidii Dios ni laa.

<sup>6</sup> Casi ñaca naa bidxiiba', ne Apolo bizee, Peru Dios bisiniisi ni.

<sup>7</sup> Nga runi nin ni rudxiiba', nin ni ruzee, iruti naca, purti Dios nga rusiniisi ni, ne laa si nga risaca.

<sup>8</sup> Ni rudxiiba', ne ni ruzee la? tobi si laaca', ne cada tobi ziaxa bia' dxiiña bi'ni'.

<sup>9</sup> Laadu la? tobi si runi né du Dios dxiiña', ne laatu naca tu casi ti ñaa stibe.

Ne laca naca tu casi ti yoo ni cucuí be.

<sup>10</sup> Ucané be naa gundaa cimientu casi runi albañil. Peru ma adxé tu cucuí yoo luguiá cimientu que. Ne cada tobi naquiiñe gu'ya chaahui ximodo ucuí yoo luguiá ni.

<sup>11</sup> Cimientu que ma nuu, ne iruti zanda indaa stobi jma que ni ma gulaa ca, purti cimientu que nga Jesucristu.

<sup>12</sup> Peru ziuu tu ucuí yoo de oro luguiá cimientu que, ne nuu tu zuni ni de plata o de guie risaca, de yaga, de ziña, o de guixi.

<sup>13</sup> Ne zahuinni ximodo bi'ni cada tobi dxiiña, dxi queeda Señor. Purti dxi ganda dxi que, napa cani xidé tidi cani lu gui, ne purgui que zahuinni pa risaca dxiiña ni bi'ni cada tobi.

<sup>14</sup> Ne tu qué chaqui ni bicuí lu cimientu que la? zacaa premiu.

<sup>15</sup> Peru pa chaqui ni bi'ni be que la? zaree uniti be, peru zalá be, neca casi rilá binni ora ria'qui irá xixé sti'.

<sup>16</sup> Ñee qué ganna tu pa laatu nga yu'du sti Dios, ne nabeza Espíritu stibe ndaani ladxitó' to la?

<sup>17</sup> Ne pa chu' tuuxa unitilú yu'du sti Dios la? zunitilú Dios laa, purti ma ulee chu Dios yu'du ca para laa, ne laatu nga yu'du ca.

<sup>18</sup> Cadi quite tu laca laatu. Pa nuu de laatu na nuu xpi-aani casi na binni guidxilayú la? jma galán gaca nahuati para laacabe, purti zacá ziuu xpiaani nezalú Dios.

<sup>19</sup> Purti ni rabi binni guidxilayú enda biaani la? enda huati ni para Dios. Casi cá ni lu Xqui'chi Dios: "Cani nuu xpiaani la? rinaaze be laaca lu enda nexhená stica".

<sup>20</sup> Ne cá ni sti lugar sicarí: "Nanna Señor irá ni riní' ique cani nuu xpiaani". Ne nanna be qué iquiiñe ni."

<sup>21</sup> Cadi udxiba tu laca laatu tisi zinanda tu tuuxa hombre, purti dede dxi bini cre tu Cristu ma stitu irá xixé.

<sup>22</sup> Naca ni Pablo, Apolo, Pedru, guidxilayú, enda nabani, enda guti, ni nuu yanna, ni chi aca ru', stitu irá xixé ni.

<sup>23</sup> Ne sti Cristu laatu, ne sti Dios Cristu.

## 4

### Xhiiña ca apóstol

<sup>1</sup> Nga runi, lagapa laadu casi mozo sti Cristu purti ma gula'qui be laadu usi'di du ni guidixhe Dios ni qué ñanna binni chiqué.

<sup>2</sup> Ne ora ma biaana ti dxiiña ladxi ná tuuxa la? naquiiñe guni ni jneza ti qué uchee né xpixuaana'.

<sup>3</sup> Naa qué rizaaladxe ximodo ruuya tu ni cayune', nin modo ruuya xcaadxi binni ni. Nin naa qué zanda inié pa jneza cayune o pa co'.

<sup>4</sup> Purti neca rabe cayune jneza Peru cadí pur nga gabe

nayá ladxiduá'. Señor nga iní' pa jneza cayune o pa co'.

<sup>5</sup> Nga runi cadi mala udxiba tu donda ique stobi pur ni cayuni. Lausaana ni para dxi gueeda Señor, purti laa zabee irá ni ga'chi ra nacahui yanna, ti ihuinni cani, ne zusihuinni irá ni napa binni ndaani ladxidó'. Dxi que nga iní' Dios pa uyuula'dxi ni bi'ni cada tobi.

<sup>6</sup> Hermanu ca', cani cusiiide laatu rarí la? caguixhe laadu casi ti ejemplu, naa ne Apolo, ti pur laadu ganda iziidi tu ibani tu modo pe na stiidxa Dios ne ma cadi uchá tu enda naró' sti tobi ne ga'ni ná tu stobi.

<sup>7</sup> Tu na jma risaca lu que stobi. Lácaxa ñapu xiixa pa qué nudii Dios ni lii. Yanna pa laabe bidii be ni lii la? cadi uchá lu enda naró' stiu'. Ruluí' pe gupu ni de lii siou'.

<sup>8</sup> Laatu ruluí' ma napa tu irá ni caquiiñe tu, ma cadi cayaadxa laatu gasti'. Ma runi tu laatu nandxó', ne ma bicaa ná tu laadu ti ladu. Aque galán pa dxandí ñaca tu nandxó' xa, ti ma ne laadu ñu' du lú ni.

<sup>9</sup> Para naa ruluí' gudixhe Dios laadu casi cani jma qué iquiiñe'. Cuzeete laadu, ca apóstol. Ruluí' gudixhe be laadu casi ni ma nexhe chi gati, para guuya dxí tutiisi laadu, ángel ne binni guidxilayú.

<sup>10</sup> Napa cabe laadu de guidxa purti biaana du para si guni du xhiiña Cristu, Peru laatu na tu jma riene tu stiidxa Cristu. Laadu zeda gaca

du casi ni qué gapa stipa, peru laatu na tu napa tu stipa. Rudxii deche binni laadu, peru laatu rudxiiba cabe laatu.

<sup>11</sup> Dede yanna stale tiru rati zí du, nin nisa idé' du, nin lari gacu du. Runiná cabe laadu, ne qué gapa du lidxi du.

<sup>12</sup> Runi du dxiiña de ra idxaga du, ne ora riguu dí cabe laadu la? rabi du laacabe Dios cu' ndaaya laacabe. Ne qué rixhacala'dxi du ora riladxi cabe laadu.

<sup>13</sup> Necá riguixhe cabe mal laadu, peru ruyubi du pur ucuudxi du laacabe. Laadu zeda gaca du casi cani ma qué iquiiñe para ndaani guidxilayú, ne casi guixi ni rusa'bi cabe. Ne zacá ziupa du dede yanna.

<sup>14</sup> Cadi cucaa ndi para usitue lú tu, sínunque para ulidxe laatu, purti laatu nga xiiñe ni nadxiee'.

<sup>15</sup> Necá gapa tu chii mil maistru ni usiidi laatu de Cristu, peru tobi si bixhoze tu napa tu. Nirudó' naa yegüé nia laatu modo ilá tu. Yanna ma napa tu enda nabani purti bini cre tu Cristu Jesús, ne zacá naa zeda aca bixhoze tu.

<sup>16</sup> Nga runi cayabe laatu: Lachindee la' naa.

<sup>17</sup> Rarí nuu Timoteu, xiiñe ni nadxiee ni nabani casi na Señor. Yanna cuseenda laabe ra nuu tu para usietenala'dxi be laatu modo rizaya lu jneza Cristu, ne zacaca nga rusiide ratiiica chaa ra nuu ca xpinni Cristu.

<sup>18</sup> Nuu caadxí lade tu cayaca nandxó' purti na ca ma qué ziaa rua' ra nuu tu.

<sup>19</sup> Peru pa na Señor la? qué zandaan para chaa ra nuu tu, ne óraque zuuya pa dxandí nandxó' cabe o pa caní' si cabe, purti zahuinni ni pur ni runi cabe.

<sup>20</sup> Purti cadi pur ni iní' cabe ihuinni pa cayuni mandar Dios laacabe, sínunque pur ni guni cabe.

<sup>21</sup> Ximodo racala'dxi tu guenda ra nuu tu, gueda tinde nia laatu la? o gueda ganaxhiee laatu ne inié nia laatu ne diidxa nadó'.

## 5

### *Xi aca cani napa jnadxxii*

<sup>1</sup> Ma nanna binni nuu ni napa jnadxxii lade tu. Nin cani qué runi cre Dios, qué huadxiña ra ma bidxiña tu ca, purti nuu tobi de laatu dede ma nuu né jmadrasta.

<sup>2</sup> Ne laatu, lugar de ñuu tu triste lágalá raca tu nandxó'. Ma niladxi tu ni cayuni nga lade tu.

<sup>3</sup> Necá nuua zitu de laatu, peru ladxiduá' nuu né laatu, ne ma gudixhe xi aca hombre ca, casi ñaca ñuaa pia' lade tu, purti bisaana Jesús Señor stinu ladxi naya gune ni.

<sup>4</sup> Lagapa ti junta irá tu, ne laganna ziuu né ladxiduá' laatu ne laca ziuu né Señor Jesucristu laatu ne enda nandxó' sti'.

<sup>5</sup> Ne lausaana hombre ca lu ná binidxaba para usaba ná cuerpu sti', ti ganda ilá

xhialma dxi gueeda Señor Jesús.

<sup>6</sup> Cadi uchá tu enda naró' stitu pur ni cayuni tu ca. Maca nanna tu pa uchee tu caadxi la? zacá ni irá tu. Casi na dichu que: "Caadxi si levadura riu'cha bia' tiica cuba pan."

<sup>7</sup> Nga runi lausaana de uchá tu enda naró' stitu, casi ñaca cabee tu levadura yooxho lade tu, ti guiaana tu nayá. Ne maca nayá ladxidó' to nezalú Dios purti guti Cristu pur xpecadu tu casi biiti ca xpinni Dios dendxu huiini ndaani guidxi Egipto para ilá xpida ca'.

<sup>8</sup> Yáquexa ma bilá Cristu laanu zacá la? usihuinni nu ni lu xpida nu, nayá, sin enda rusiguii, casi ñaca ni pan sin levadura. Zacá zahuinni ma biree levadura yooxho', o zanda gabi nu, enda runi ni na ique, ne irá ni cadi jneza.

<sup>9</sup> Lu sti gui'chi ni bicaa lú tu que, gudxe laatu cadi idxaaga tu cani napa jnadxxii.

<sup>10</sup> Peru cadi zácxaxa tu cayabe laatu usaana tu de idxaaga tu irá binni ni napa jnadxxii o cani puru si rucaa ique gapa bidxichi, o cani riba'na', o cani runi cre bidó', purti pa ñaca zacá ni la? ñapa tu xidé niree tu de ndaani guidxilayú ri'.

<sup>11</sup> Sínuque ndi nga ni gudxe laatu: Cadi idxaaga tu nin tobi de cani na hermanu laa ne napa jnadxxii o ni puru si rucaa ique gapa bidxichi, o ni runi cre bidó' o ni riguu dí o ni rixudxi o ni riba'na'. Ni

runi zacá la? nin cadi lica go né tu laa gueta.

<sup>12-13</sup> Purti cadi xcuenta dia' udxiba donda ique cani qué runi cre Cristu. Nga xcuenta Dios guni. Peru pa cuchee tobi de laanu la? napa nu xidé gabi nu laa paraa cuchee. Nga runi lacuee ni cuchee ca lade tu, casi cá lu Xqui'chi Dios guni nu.

## 6

*Modo quixhe dxí ca xpinni  
Cristu lu enda ridinde*

<sup>1</sup> Xiñee ora napa tobi xqueja stobi, maca ze tu ra nuu justicia. Bia' cá nga ridxiña tu la? Xiñee qué rie tu ra nuu ca xcaadxi xpinni Cristu ne cadi ra nuu cani qué runi cre laabe ya'.

<sup>2</sup> Nee qué ganna tu pa ca xpinni Cristu nga cu' bia' stonda binni guidxilayú la? Yanna pa ziuu dxi cu' bia' tu stonda binni guidxilayú la? xiñee qué zanda guuya tu ti xiixa huiini si ni cayaca lade tu.

<sup>3</sup> Qué xa ganna tu pa laanu nga aca nu juez sti ca ángel. Ne pa zacá ni la? xiñee qué ganda quixhe dxí tu ni cayaca lade tu yanna ca.

<sup>4</sup> Yanna casi pe chu' dinde de laatu maca ze tu ra nuu cani iruti naca lade ca xpinni Dios.

<sup>5</sup> Ndi huaxa cayabe laatu para ituí lú tu. Nee nin tobi de laatu cadi nuu xpiaani para quixhe dxí intiica aca lade ca hermanu la?

<sup>6</sup> Peru laatu casi tinde né ti hermanu sti hermanu, maca

ziné ngue laa ra nuu justicia, ni qué runi cre Dios.

<sup>7</sup> Ra cadinde tu ca la? racá nga riree chu tu lu neza sti Dios. Ñee cadi jma galán ñaca ni, qué nidxiichi tu ra nuchee né cabe laatu ne ñaxha cabe stitu la?

<sup>8</sup> Peru laatu, lugar de ñuni tu zacá la? laga riguite tu stobi ne ruyubi tu iree uniti stobi, ne runi tu ni dede ca hermanu pe stitu.

<sup>9</sup> Ñee qué ganna tu pa qué ziuu cani qué runi jneza ra runi mandar Dios la? Cadi quite ique tu laatu, partí nin cani napa jnadxxii, nin cani runi cre bidó', nin cani riuu né xheela stobi, nin ca muxe', nin cani riuu né muxe',

<sup>10</sup> nin ca gubaana', nin cani rucaa ique puru si gapa bidxichi, nin ca binni güe', nin cani riguu dí, nin cani ruxhii pobre, nin tobi de ca nga qué ziuu ra runi mandar Dios.

<sup>11</sup> Zacaca guca caadxi de laatu chiqué, peru yanna ma bia ladxidó' to ne ma ulee chu Dios laatu, ne ma bixá stonda tu pur Señor Jesús ne pur Espíritu sti Dios stinu.

### *Yu'du sti Espíritu Santu*

<sup>12</sup> Zándaca chu' tu ná': "Libre naa gune ni racaladxe'." Ne dxandí' libre laanu guni nu intiisi, peru nuu de laani qué zabee ndu nu gastí'. Zaa libre naa gune intiisi peru qué zudiee lugar icaya yaga lu ná nin tobi de laani.

<sup>13</sup> Zándaca chu' stobi ná': "Endaró la? nuu para uchá ndaani cabe, ne ndaani cabe para idxá endaró." Peru ziuu

dxi unitilú Dios iropa cani. Ne cuerpu stinu la? napa nu ni cadi para quite nu luguiá gunaa, sínique sti Señor ni, ne laa nga xpixuaana ni.

<sup>14</sup> Bisibani Dios Señor de lade gue'tu', ne laca zusibani laanu pur enda nandxó' sti'.

<sup>15</sup> Ñee qué ganna tu pa naca cuerpu stinu tindaa cuerpu sti Cristu la? Ne pa zacá ni la? ñee zacaa tindaa cuerpu sti Cristu ca para gune ni tobi si ne cuerpu sti ti gunaa dxaba la? Qué ziuu dxi.

<sup>16</sup> Ñee qué ganna tu pa chu' né tuuxa ti gunaa dxaba ma naca ca tobi si cuerpu la? Purti sicarí cá ni lu Xqui'chi Dios: "Neca chupa cabe peru zaca cabe tobi si."

<sup>17</sup> Peru tu ma nuu né Señor tobi si la? tobi si Espíritu napa né laabe.

<sup>18</sup> Lausaana enda rapa jnadxxii. Stobi stobi pecadu ni runi binni la? qué ruchee ne cuerpu sti', peru ni gapa jnadxxii la? ngue laca laa cuchee ne cuerpu sti'.

<sup>19</sup> Ñee ca'ru ganna tu pa cuerpu stitu nga yu'du sti Espíritu Santu ni nuu ndaani ladxidó' to la? Dios bidii laatu Espíritu ca, ne ma cadi stubi tu raca mandar tu.

<sup>20</sup> Purti ma uzí' Dios laatu, ne naro'ba gudixe be saca tu. Nga runi lausisaca laabe pur cuerpu stitu ne pur espíritu stitu, partí stibe cani.

## 7

### *Enda xheela'*

<sup>1</sup> Yanna ma chi tidxe laatu ni unaba diidxa tu naa lu

gui'chi ni biseenda tu lua que. Galán ñuni hombre pa qué nichaganá'.

<sup>2</sup> Peru para cadi gapa binni jnadxii la? jma galán cada hombre gapa xheela', ne zaqueca cada gunaa gapa xheela'.

<sup>3</sup> Cada hombre naquiiñe ibani né xheela modo ma nexhe ibani binni ni ma bichaganá', ne zaqueca guni gunaa ne xheela'.

<sup>4</sup> Ora ma bichaganá ti gunaa la? ma cadi laa runi mandar cuerpu sti', sínunque xheela'. Zaqueca ora ma bichaganá hombre, ma cadi laa runi mandar cuerpu sti', sínunque xheela'.

<sup>5</sup> Cadi na tu qué gasi né tu xheela tu. Peru pa iropa tu racala'dxi tu usaana tu ni caadxi para ganda ucaa ique tu iní' né tu Dios la? zaa laguni ni. Peru ibigueta guni tu casi zeeda tu, partí nagana guni mandar tu cuerpu stitu xadxí, paxa ora gueda uqui-inde binidxaba laatu.

<sup>6</sup> Cayabe irá ndi laatu, cadi partí napa tu xidé guni tu ni, sínunque partí gasti naca ti guni tu ni.

<sup>7</sup> Ñacaladxe irá hombre ñaca casi naa, peru nanna adxé ni gudixhe Dios para cada tobi, ne cada tobi adxé adxé gracia bidii be laa.

<sup>8</sup> Yanna, chi inié nia cani ca'ru ichaganá ne ca viuda. Galán pa guiaana ca sin ichaganá ca casi biaana'.

<sup>9</sup> Peru pa qué ganda guiaana ca stubi ca la? zaa ichaganá ca', partí jma galán ichaganá cabe pa qué ganda

guni huantar cabe stubi cabe.

<sup>10</sup> Peru cani ma bichaganá la? chi tidxe laaca cadi ni na ique', sínunque ni na Señor, cadi usaana gunaa xheela'.

<sup>11</sup> Ne pa chu' ti gunaa usaana xheela la? napa xidé guiaana stubi, o pacaa la? ibigueta né xheela'. Ne zaqueca hombre, cadi ilaa né xheela'.

<sup>12</sup> Yanna ni chi tidxe ca xcaadxi la? naa sia' canié ni, ne cadi ni gudxi Señor naa. Pa nuu tuuxa hermanu napa xheela ni qué runi cre Cristu la? cadi ilaa né xheela pa na xheela cueza né laa.

<sup>13</sup> Ne zaqueca pa nuu hermana napa xheela ni qué runi cre Cristu, ne na xheela cueza né laa la? laca cadi usaana xheela'.

<sup>14</sup> Purtí pa qué runi cre ti hombre peru runi cre xheela la? ziuu ndaaya pur xheela'. Ne zaqueca gunaa ni qué runi cre, laca ziuu ndaaya pur xheela'. Pa qué ñaca ni zacá la? ca xiñi tu ñaca casi xiñi cani qué runi cre, peru pur tobi de laatu ni ma runi cre la? ziuu cabe ndaaya'.

<sup>15</sup> Peru pa ma qué na ni qué runi cre cueza né xheela ni runi cre la? cadi uyubi modo ucueeza laabe, partí cadi guridxi Señor laanu para tinde nu.

<sup>16</sup> Purtí zándaca ulá lu xheela lu, hermana. Zacaca lii, hermanu, zándaca ulá lu xheela lu'.

<sup>17</sup> Ni naca tu dxi uní' né Dios laatu la? nga ca aca tu yanna, partí nga ni gudixhe Señor para cada tobi de laatu.

Nga ca nga rabe irá cani runi cre Cristu.

<sup>18</sup> Pa uni' né Dios tobi ni ma guca circuncidar la? zacá guiaana. O pa uni' né be tobi ni ca'ru gaca circuncidar la? cadí guni pur gaca circuncidar.

<sup>19</sup> Gasti naca pa guca circuncidar cabe o pa co', sínunque ni naquiiñe nga uzuuba cabe stiidxa Dios,

<sup>20</sup> Cada tobi guiaana né ni naca dxi uni' né Señor laa.

<sup>21</sup> Pa nacu esclavu dxi uni' né Señor lii la? qué chi izaala'dxu'. Peru laca pa rulí zanda ireeu de laani la? biyubi modo gu'nu ni.

<sup>22</sup> Purti ni naca esclavu dxi uni' né Señor laa la? neca naca ru esclavu peru ma bindaa Señor laa. Ne cani cadí naca esclavu dxi uni' né be laa la? ma naca esclavu stibe.

<sup>23</sup> Ma uzí' Dios laatu, ne naro'ba gudixe be saca tu. Nga runi cadí udii tu lugar icá tu yaga lu ná binni guidxilayú.

<sup>24</sup> Hermanu ca', modo naca tu dxi uni' né Dios laatu? zacá laibani nezalú Dios yanna.

<sup>25</sup> Qué ñabi di Señor naa xi gabe cani ca'ru ichaganá', peru racaladxe gulidxe laaca', ne cadí idxibi tu icaa tu ni. Jneza ni partí cayacané Dios naa gune ni.

<sup>26</sup> Naa rabe jma galán guiaana tu casi nuu tu ca, partí nagana xpida nu ca dxi ri'.

<sup>27</sup> Pa ma napu xheelu la? cadí gu'nu pur ixale lu de laabe. Peru pa ca'ru icha-

ganá lu la? cadí uyubu ichaganou'.

<sup>28</sup> Peru pa ichaganá ti hombre la? cadí cuchee, ne pa ichaganá ti binni dxaaapa laca cadí cuchee. Peru xi si la? zaca ni nagana para cani ichaganá', ne ñacaladxe nula'ya laatu de irá nga.

<sup>29</sup> Hermanu ca', ndi nga ni cayabe laatu. Ma huaxié' dxi riaadxla laanu. Nga runi cadí izaala'dxi tu ni nuu ndaani guidxilayú ri'. Cani ma napa xheela la? guni xhiiña Dios bia' runi cani qué gapa xheela'.

<sup>30</sup> Ne cani nuu triste la? cadí ulabi ca ni. Cani cayeche la? guni sica ni cadí cayeche', ne cani rizi' la? guni sica cadí sti cazi'.

<sup>31</sup> Ne cani caquiiñe de ni nuu ndaani guidxilayú ri la? cadí para nga si ibani ca'. Purti ma cadí di guidxilayú cadu'ya nu ri'.

<sup>32</sup> Ñacaladxe nibani tu sin niguu xaique tu gasti'. Purti ti hombre ni ca'ru ichaganá zanda ucaa ique xhiiña Señor ne xi zanda guni para chu'la'dxi Señor.

<sup>33</sup> Peru ti hombre ni ma bichaganá' jma cá ique ni nuu ndaani guidxilayú ri' ne xi zanda guni para chu'la'dxi xheela'.

<sup>34</sup> Laca zacaca nga ma adxé gunaa ni ma bichaganá' ne ni ca'ru ichaganá'. Purti ni ca'ru ichaganá la? jma cá ique xhiiña Señor ne ximodo zanda guiaana cuerpu sti ne ladxitó' para Señor. Peru gunaa ni ma bichaganá' jma

cá ique ni nuu ndaani guidxilayú ri ne xi zanda guni para chu'la'dxi xheela'.

<sup>35</sup> Cayabe ndi laatu para bien stitu, ne cadi para cuua doo laatu. Racaladxe acanía laatu guni tu ni jneza ne ni nacha'hui', ti cadi chu' xiixa ucueeza laatu de ganaxhii tu Señor.

<sup>36</sup> Pa nuu tuuxa ruuya ma cayo'xho xiñi dxaapa ne ca'ru ichaganá', ne na cadi galán nga sínunque jma galán pa ichaganá be la? zaa guni ni cului'la'dxi'. Cadi cuchee pa ucheela laabe.

<sup>37</sup> Peru pa nuu stobi na jma jneza gapa xiñi dxaapa sin ichaganá', ne gasti cucueeza laa de guni ni rului'la'dxi la? laca jneza cayuni pa zacá na ladxidó'.

<sup>38</sup> Nga runi jneza cayuni ni cuchela xiñi dxaapa. Ne ni qué na ucheela xiñi dxaapa la? jma rusi jneza cayuni.

<sup>39</sup> Ora ma bichaganá ti gunaa la? qué zanda gapa stobi laga nabani xheela', purti zacá na ley. Peru ora ma guti xheela be la? ma zanda ichaganá be tutiisi acala'dxi be, peru gaca ni ti xpinni Señor.

<sup>40</sup> Peru para naa zuluá sia' jma nayeche zabani be pa guiaana be stubi be, ne rabe nga ni cayabi Espíritu sti Dios naa.

## 8

*Ni ma gu'ta lu bidó'*

<sup>1</sup> Yanna chi uzeete ca endaró ni ma gu'ta lu bidó'. Irá nu rabi nu ma nanna nu xi guni né nu ni. Ne pa

zinanda nu ni nanna si nu la? nga para uchá nu enda naró' stinu. Peru pa ganaxhii nu ca hermanu stinu, zacané saa nu inisi nu lu stiidxa Dios.

<sup>2</sup> Pa nuu tuuxa ruzulú ma nanna xiixa la? ca'ru ganna bia' naquiiñe ganna.

<sup>3</sup> Peru ni nadxii Dios la? runibiá' Dios laa.

<sup>4</sup> Yanna huaxa ma chi uzeete ca endaró ni ma gu'ta lu bidó'. Laanu nanna nu, gasti nga ti bidó' ndaani guidxilayú, ne iruti ru stobi jma que tobi lucha Dios.

<sup>5</sup> Nuu stale ni napa cabe de dios, cásica ni cá xaibá' zaqueca ni nuu ndaani guidxilayú. Ne zacá para laacabe nuu stale dios ne stale señor.

<sup>6</sup> Peru para laanu la? tobi lucha si Dios nuu ne nga nga Dios Bixhoze nu, ne de laa beeda irá xixé cosa, ne para laa nabani nu. Ne zaqueca tobi lucha si Señor Jesucristu, ne pur laa nuu irá xixé cosa, ne pur laa nabani nu.

<sup>7</sup> Peru cadi irá binni riene chaahui pa tobi lucha si Dios nuu, ne nuu ru hermanu de yanna ridi'di ru bidó' lu xquenda biaani'. Ngue runi ora ro ca ni ma gu'ta lu bidó' ruzulú ca cuchee ca', purti cayó ca ni ma gu'ta lu bidó'.

<sup>8</sup> Nezalú Dios la? cadi jma nacha'hui nu pa idó' no, ne zaqueca cadi cuché' nu pa qué idó' no.

<sup>9</sup> Peru xi si la? laguuya gá cadi purti si ma riene tu irá nga gueda uchenda tu cani jma huaxié' riene.

<sup>10</sup> Zanda quixhe nu ti ejem-plu: gabí nu lii ma riene

chaahui lu irá nga, ne chí lu ruua mexa ra yu'du sti ca bidó'. Ne gueda gu'ya sti hermanu ni cadi zuhuua chaahui lii. Laca zuquiinde laa go ni ma gu'ta lu bidó'.

<sup>11</sup> Ne zándaca pur ni ma nannu ca initilú sti hermanu ni huaxié' riene. Laca nda guti Cristu pur laa.

<sup>12</sup> Ne zacá gu'nú pur uchee ca hermanu ni huaxié' riene la? cuchee neu Cristu.

<sup>13</sup> Pur nga runi rabe pa pur ni gahua usaba hermanu stinne la? ma qué ziuu ru dxi gahua beela ni ma gu'ta lu bidó', ti qué usaba laabe.

## 9

### *Ni zanda guni ti apóstol*

<sup>1</sup> Naa naca apóstol sti Señor Jesucristu ne cadi caya yaga lu ná iruti binni guidxilayú. Biiya pia' Jesús, Señor stinne', ne laatu nga ni bine ganar lu dxiiña stibe.

<sup>2</sup> Zándaca chu' tu qué guni cre pa apóstol naa, peru laatu huaxa nanna tu naca ni, purti ra bini cre tu Cristu bihuinni dxandí apóstol naa.

<sup>3</sup> Ndi nga ni rabe cani racala'dxi ganna pa dxandí naca ni o pa co'.

<sup>4</sup> Lácaxa qué gapa du derechu idó' do ne idé' du.

<sup>5</sup> Nee qué gapa du derechu ichaganá du ti hermana ne sa né du laa, casi bichaganá ca xcaadxi apóstol ne ca bi'chi Señor ne Pedru la?

<sup>6</sup> Lácaxa naa sia' ne Bernabé qué gapa du derechu us-aana du xhiiña du para guni du xhiiña Señor.

<sup>7</sup> Lácaxa ni rie guerra ngue ca uyubi ni iquiiñe'. Nee nuu tu rudxiiba ti yaga cuananaxhi ne qué go xcuananaxhi ni la? Lácaxa nuu tu rigapa vaca ne qué re' leche stime.

<sup>8</sup> Nee ruluí' de naa sia' biale ni canié ri la? ñee cadi laca zacá na ley la?

<sup>9</sup> Sicarí cá lu ley sti Moisés: "Cadi cu' lu guixhe xii ruua buey ora cayuni dxiiña." Ne cadi uní' Dios zacá partí si rizaala'dxi ca buey,

<sup>10</sup> sínunque uní' be ni casi ti ejemplu para laanu. Ni rucaa zurcu la? nanna ziaxa saca cayuni dxiiña'. Ne zaqueca ni riguibi semiá, laca nanna ziaxa saca cayuni dxiiña'.

<sup>11</sup> Zaqueca pa ma bidxi'ba du ni reeda de Espíritu Santo lade tu la? ñee cadi jneza icaa du xiixa de laatu ni acané para ibani du la?

<sup>12</sup> Pa ruluí' jneza acané tu ca xcaadxi la? ñee cadi jma rusi jneza acané tu laadu la?

Peru qué huanaba du ni laatu partí rabi du zaa gua du irá ni laca laadu, ti cadi cuaqui du xiixa ni ucueeza stiidxa Cristu.

<sup>13</sup> Nee qué ganna tu pa endaró ni nuu ndaani yu'du sti Dios nga ro cani runi dxiiña ndaani yu'du que la? Ne zaqueca cani runi dxiiña lu altar, laca ro ca ni nexhe lu altar.

<sup>14</sup> Zacaca nga gudixhe Señor ni para cani canayuí' de evangeliu, ibani ca de evangeliu.

<sup>15</sup> Necá zacá ni la? peru

qué huayune pur icaa ni, ne cadi para udii tu ni yanna cucaa ni rari'. Purti para naa jma galán ñate que ñaxha cabe naa enda nayeche ni napa ri': cayune xhiiña Señor sin guiaxa'.

<sup>16</sup> Pa ñaxa saca cayué stiidxa Cristu la? ma cadi cayune gasti', purti cuchiiña naa güe ni. Ne pa qué güe ni la? nanna xi gueda iree xa' ya'.

<sup>17</sup> Pa de naa ñale ñune ni la? ñanda nicá lua niguixe cabe naa. Peru cadi de naa biale gune ni, sínunque biaana ni ladxi naya'.

<sup>18</sup> Zacá nga laani. Ni riaxa la? nga enda nayeche napa ra cayué stiidxa Cristu sin guiaxa', sin nicaa irá ni nicaa saca cayué ni.

<sup>19</sup> Necá cadi caya yaga lu ná iruti', peru laca naa bine pur icaya yaga lu ná irá para gune ganar jma stale binni.

<sup>20</sup> Lade ca judíu la? bibane casi judíu para gune ganar ca judíu. Ne lade cani nabani xa'na ley la? laca bine irá ni na ley para gune ganar cani nabani xa'na ley, necá ma cadi caya yaga lu ná ley.

<sup>21</sup> Zaqueca ra nuu cani nabani sin ley, bine casi ñaca qué ganna ley para gune ganar cani nabani sin ley. Peru rune ni na Dios ne nabane xa'na ley sti Cristu.

<sup>22</sup> Lade cani huaxié' riene rune sica huaxié' riene'. Rune zacá lade irá cabe tílasi zacá ganda ula'ya caadxi.

<sup>23</sup> Rune irá nga tílasi guni cre binni stiidxa Cristu, ti

zacá laca ne naa guieche nia ni.

<sup>24</sup> Nee qué ganna tu pa irá ni rie carrera ruxooñe', peru tobi si ricaa premiu la? Nga runi lauyubi uxooñe tu para icaa tu ni.

<sup>25</sup> Irá cani cuyubi guni ganar la? rapa ca laaca', ne runi ca ni para icaa ca premiu neca chupa chonna si gubidxa chi iquiiñe ni laaca'. Peru laanu la? zacaa nu tobi ni qué ziuu dxi initilú.

<sup>26</sup> Nga runi rune tirá ruxooñe casi tobi ni cá ique guni ganar, ne laca rune casi tobi ni rucaa, ni qué runi si invite.

<sup>27</sup> Rucueza laca naa purti rune mandar naa, quenquita bisiide xcaadxi binni ne naa pia' qué iree ndua'.

## 10

### *Enda rinanda bidó'*

<sup>1</sup> Hermanu ca', racaladxe usietenala'dxe laatu xi uca ca bixhoze gola nu ni uzá né Moisés chiqué. De irá ca uzá ca xaguete za sti Dios que, ne udi'di ca Nisadó' Xiñá'.

<sup>2</sup> Ra udi'di né cabe Moisés xaguete za ne nisadó' que la? bisihuinni cabe nuu cabe para chi nanda cabe laa.

<sup>3</sup> Ne irá cabe gudó cabe endaró ni beeda de ibá',

<sup>4</sup> ne zaqueca irá cabe güe' cabe nisa ni bidii Dios laacabe, ni bidá cue' dxa guie que. Ne guie que nga Cristu ni uzá né laacabe.

<sup>5</sup> Necá ne irá nga, peru stale de laacabe qué ñuni ni riula'dxi Dios. Ngue runi binitilú cabe ndaani gui'xhi'.

<sup>6</sup> Yanna, irá ni bizaaca cabe que la? naca cani ejemplu para laanu, ti cadi chu'la'dxi nu ni cadi jneza casi bi'ni cabe.

<sup>7</sup> Nin usisaca tu bidó' casi cá lu Xqui'chi Dios bi'ni caadxi de laacabe, ra na: "Guri ca binni que, gudó ca ne güe' ca ne biasa ca', gudxite ca modo na ique ca'."

<sup>8</sup> Ne cadi chu' né nu gunaa, casi bi'ni caadxi de laacabe, ne ti dxi si guti veintitrés mil de laacabe.

<sup>9</sup> Nin uyubi nu uché' né nu Dios de ra ma qué zanda guni huantar laanu, casi bi'ni caadxi de laacabe ne biquichi beenda laaca guti ca'.

<sup>10</sup> Nin quiche ruua tu pur ni guni Dios, casi bi'ni caadxi de laacabe, ne beeda ti ángel ni runutilú, biiti laaca'.

<sup>11</sup> Irá nga bizaaca ca bixhoze gola nu ne ucuá ni lu Xqui'chi Dios para izi'di nu idu'ya gá nu laanu, cani nabani nu ra ma zeda iluxe guidxilayú ri'.

<sup>12</sup> Nga runi pa nuu tu na ma zuhuua chaahui la? guyua gá qué guiaiba.

<sup>13</sup> Irá binni ridi'di enda naná ni cadi'di tu ca. Peru jneza runi Dios, ne qué zudii lugar gueeda xiixa luguiá tu ni qué zanda gua tu, sínunque laga zacané laatu tidi tu ni ora idxiña tu ni, ti ganda gua tu ni.

<sup>14</sup> Pur nga runi hermanu ni nadxiee ca', lausaana bidó', ne cadi guni cre tu laaca'.

<sup>15</sup> Ni cayabe laatu ri la? nanna cayabe ni binni nuu

xpiaani', ne laatu zudii tu cuenta pa jneza ni.

<sup>16</sup> Ora runi nu casi bi'ni Señor gueela ma chi igaa que la? ricaa nu copa ni ma uluu Dios ndaaya', ti chu' nu ndaaya pur rini sti Cristu. Zaquea ora ricaa nu pan, rindaa nu ridó' no. Laca runi nu ni para ihuinni cacaas nu ni nexhe icaa nu saca ucuá cuerpu sti Cristu lu cruz.

<sup>17</sup> Necá stale nu, peru raca nu tobi si ra indaa nu dxa pan que para idó' no, purti tobi si ni.

<sup>18</sup> Laguuya modo runi cani za de Israel. Cani ro ni ma gu'ta lu altar sti Dios, ñee cadi pur ni ro cabe que, raca cabe tobi si ne altar que la?

<sup>19</sup> Xi na tu cayabe laatu pue. Ñee cayabe laatu naca bidó' tuuxa, o risaca ni ra'ta lú ni la?

<sup>20</sup> Co', sínunque ndi nga ni cayabe laatu: Irá ni riguixhe cani qué runi cre Dios lu bidó' stica la? cadi cusiga'de di cabe ni Dios, sínunque cusiga'de cabe ni ca binidxaba', ne qué racaladxe dia' gaca tu tobi si ne binidxaba'.

<sup>21</sup> Qué zanda di gue tu ruua copa sti Señor ne copa sti ca binidxaba', ne qué zanda di cui tu ruua mexa sti Señor ne ruua mexa sti ca binidxaba'.

<sup>22</sup> Ñee racala'dxi nu uchiichi nu Dios la? ñee jma nandxó' no que laabe la?

*Xi zanda guni ca xpinni  
Cristu*

<sup>23</sup> Na cabe, libre binni guni ni gacala'dxi'. Dxandí ni, peru nuu de laani gasti zabee

ndu nu. Dxandí libre binni guni intiisi, pero cadi irá ni zacané ca hermanu stinu inicii lu stiidxa Dios.

<sup>24</sup> Naquiiñe uyubi nu acané nu stobi ne cadi uyubi nu para laasi nu.

<sup>25</sup> Zaa go to intiisi beela ni ridoo luguaa, pero sin inaba diidxa tu pa gu'ta ni lu bidó'.

<sup>26</sup> Purti sti Señor idubi naca guidxilayú ne irá ni nuu ndaani ni.

<sup>27</sup> Ne pa guni invitar tobi ni qué runi cre Cristu lii ti endaró ne gapu gana cheu'la? intisi uzuhuua cabe lú lu gudó, sin inaba diidxa lu xixa de laani.

<sup>28</sup> Peru pa chu' tuuxa gabi lii ma gu'ta endaró que lu bidó' la? óraque cadi go diou' ni pur ni gudxi ni lii que, ti cadi uchenda ni laabe.

<sup>29</sup> Qué zuchenda ni lii, pero laga pa uchenda ni laabe ya'.

Zándaca chu' tu na': "Nee partí uchenda ni stobi usaa de gune ni, neca qué uchenda ni naa la?

<sup>30</sup> Pa rudiee diuxquixe Dios pur endaró ni gahua la? xiñee na cabe cuchee pa gahua ni."

<sup>31</sup> Ndi nga laani: pa go to o pa gue tu, o intiisi guni tu, laguni irá ni para usisaca tu Dios,

<sup>32</sup> ne cadi guni tu gasti ni uchenda ca judíu, nin ca binni ni cadi judíu, nin ca xpinni Dios,

<sup>33</sup> sínique laguni casi rune': ruyube ni chu'la'dxi irá cabe. Qué ruyube ni

acané naa sia', sínique ni acané stale binni, ti ilá ca'.

## 11

<sup>1</sup> Lachinanda ejemplu stinne casi zinanda ejemplu sti Cristu.

*Xi nexhe guni gunaa ra cultu*

<sup>2</sup> Hermanu ca', rieche nia laatu partí qué riuu dxi usi-aanda tu naa, ne de yanna zi-nanda tu irá ni bisiide laatu, casi bisiide ni laatu.

<sup>3</sup> Peru racaladxe ganna tu, Cristu nga xaíque sti irá hombre, ne hombre nga xaíque sti gunaa, ne Dios nga xaíque sti Cristu.

<sup>4</sup> Tutiisi hombre iní' né Dios o güi stiidxa Dios ra cultu nuu sombreru ique la? cadi culuí' pa Cristu si nga xaíque sti'.

<sup>5</sup> Peru tutiisi gunaa iní' né Dios o güi né binni ni bilu'í' Dios laa xie ique la? rusituí lú xheela', partí casi ñaca nuraa cabe ique.

<sup>6</sup> Pa nuu tuuxa gunaa qué na quiba lari ique la? laca ugá ique. Peru pa huandí rituí lú gunaa igá ique o iraa la? naquiiñe udxiba lari ique.

<sup>7</sup> Qué gapa hombre xidé utaagu ique, partí bizá' Dios laabe casi laa para usihuinni be pabiá' risaca Dios, pero gunaa la? uyá' para usihuinni pabiá' risaca hombre.

<sup>8</sup> Purti cadi lu xcustiá gunaa biree hombre, sínique lu xcustiá hombre biree gunaa.

<sup>9</sup> Ne cadi uyá' hombre para gunaa, sínunque gunaa uyá' para hombre.

<sup>10</sup> Pur nga runi napa gunaa xidé utaagu ique para ihuinni napa tu runi mandar laa, partí cayuuya ca ángel laa.

<sup>11</sup> Peru nezalú Dios la? qué ñuu hombre pa qué ñuu gunaa, ne qué ñuu gunaa pa qué ñuu hombre.

<sup>12</sup> Partí de hombre beeda gunaa, peru yanna rale hombre de gunaa, peru irá xixé ni reeda de Dios.

<sup>13</sup> Xi na tu ya'. Nee jneza iní' né gunaa Dios xie ique la?

<sup>14</sup> Irá binni nanna nitúi lú hombre pa nudii lugar nigaa guicha ique.

<sup>15</sup> Peru pa udii gunaa lugar igaa guicha ique la? jma pe sicarú, partí para nga napa cabe guicha ique cabe, para utaagu ni ique cabe.

<sup>16</sup> Pa nuu tuuxa qué na guni irá nga la? ganna dxichi nga ca runi irá ca xpinni Dios, laadu ne ca xcaadxi.

*Cadi jneza runi cabe ni bisaana Cristu gaca'*

<sup>17</sup> Lu ni chi tidxe laatu ri, qué zabe laatu cayeche nia laatu. Partí runi tu cultu Peru cadi jneza. Nga runi lugar de ñacané cani laatu para nuzuhuaa chaahui tu la? lágala jma rusi cuchee tu.

<sup>18</sup> Tobi la? ma gunna qué riuu tu tobi si ra cultu, ne rune cre caadxi de cani gudxi cabe naa.

<sup>19</sup> Partí nanna naquiiñé gaca ni zacá pa nuu caadxi ni

cuchee lade tu, ti ihuinni uná nga ni cayuni jneza.

<sup>20</sup> Peru pur modo nuu tu ca, ma cadi cayuni tu endaró xhi que casi gudixhe Señor gaca ni,

<sup>21</sup> sínunque cada tobi ricaa endaró xhi sti sin cueza ca xcaadxi, ne nuu ni candaana ru', ne laca nuu dede rixudxi.

<sup>22</sup> Nee qué gapa tu lidxi tu ra ño to ne ra ñe' tu la? Partí modo cayuni tu ca ruluí' qué racala'dxi tu idxaaga tu ca xcaadxi xpinni Dios ne ruluí' racala'dxi tu usituí tu lú cani qué gapa gastí'. Xi gabe laatu pue. Nee zieche nia laatu pur ni cayuni tu ca la? Qué zanda di'.

*Endaró xhi sti Señor  
(Mt. 26.26-29; Mr. 14.22-25; Lc. 22.14-20)*

<sup>23</sup> Ni bisiide laatu la? biziide ni de Señor, ne ndi nga ni bi'ni be gueela pe bitoo cabe laabe que. Gucuaa be pan,

<sup>24</sup> ne biluxe bidii si be diuxquixe Dios undaa be ni ne na be: "Ndi nga cuerpu stinne ni rudiee pur laatu. Ne clásica cayuni nu rarí yanna gueela la? zacaca nga racaladxe guni tu para guietenala'dxi tu naa."

<sup>25</sup> Zaquea bi'ni né be copa que. Biluxe si gudó xhi cabe para na be: "Copa ri nga rini stinne ne ra ixii ni zaguixhe Bixhoze ti modo cubi chu' né binni laa tobi si. Cada gue tu ni la? laguni ni para guietenala'dxi tu naa."

<sup>26</sup> Partí cada go to pan ne gue tu ruua copa casi bisiidi Cristu laanu la? culuí' tu binni guti Cristu pur

laatu. Ne zuni tu ni dede dxi ibigueta be.

*Modo icaa cabe Endaró  
xhi sti Señor*

<sup>27</sup> Yanna tutiisi go pan ne gue ruaa copa sti Señor ne nanna cadi cayuni ni na Dios la? zugui'ba donda luguiá', purti cuchee né cuerpu ne rini sti Señor.

<sup>28</sup> Nga runi cada tobi gu'ya chaahui xi modo nuu para go pan ne gue ruaa copa que.

<sup>29</sup> Purti tutiisi go ni ne gue ni casi ñaca ni intiisi endaró ne qué izaala'dxi pa cuerpu sti Señor ni la? zusaba ná Dios laa pur modo bi'ni ni.

<sup>30</sup> Ne pur nga stale de laatu huaxié' napa stipa ne stale huará, ne laca nuu ni ma guti.

<sup>31</sup> Pa nidu'ya chaahui nu ximodo nuu nu la? ma qué ñaba ná nu.

<sup>32</sup> Peru ora rusaba ná Señor laanu la? runi be ni para usiene be laanu, ti cadi initilú né nu binni ni zinanda guidxilayú.

<sup>33</sup> Nga runi, hermanu stinne ca', ora idxiña tu para guni tu endaroxhi que, lacueza irá tu uzulú tu juntu.

<sup>34</sup> Ne pa nuu tobi candaana la? go ca ralidxi, ti cadi guni tu cultu para guiaiba ná si tu. Cani biaadxa nuzeete rarí la? zusiene laatu ora chaa ra nuu tu.

## 12

*Gracia ni rudii Espíritu  
Santu*

<sup>1</sup> Hermanu ca', racaladxe guiene tu de ca gracia ni rudii Espíritu Santu.

<sup>2</sup> Ma nanna tu dxi qué ñuni cre tu Dios la? uzá renda tu lu neza sti ca bidó' ni qué riní'.

<sup>3</sup> Pur nga runi racaladxe usiene laatu ndi': iruti zanda cu' dí Jesús pa cusiní' Espíritu sti Dios laa. Zaqueca iruti zanda iní' Jesús nga Señor pa cadi Espíritu Santu cusiní' laa.

<sup>4</sup> Sicarí nga zeeda ni: adxé adxé gracia ricaa cada tobi ni runi cre Cristu, peru tobi si Espíritu Santu rudii irá cani.

<sup>5</sup> Zaqueca adxé adxé modo guni nu xhiiña Señor, peru tobi si Señor nuu.

<sup>6</sup> Laca adxé adxé ni runi cada tobi de laanu, peru tobi si Dios racané laanu guni nu irá ni.

<sup>7</sup> Rudii Espíritu Santu xixa gracia cada tobi de laanu para acané saa nu.

<sup>8</sup> Gudixhe Dios xi gracia udii Espíritu que cada tobi. Nuu tu ucuaa gracia para guiene chaahui ti iní' jneza, ne nuu tu ucuaa gracia para usiidi ni jma nagana, peru tobi si Espíritu bidii iropa ni.

<sup>9</sup> Ne laca Espíritu queca bidii fe stobi, ne laca laa bidii poder stobi para usianda binni huará.

<sup>10</sup> Stobi bidii be poder laa para guni milagru, ne stobi bidii be gracia laa para güi né binni ni gabí Dios laa, ne stobi para ganna uná nga espíritu ni zeeda de Dios ne uná nga ni cadi zeeda de Dios, ne stobi para iní' idioma ni qué niziidi', ne stobi para usiene binni xi uní' ngue.

<sup>11</sup> Peru Espíritu que si runi irá ni, purti cada tobi rudii be laa ni racala'dxi be.

*Irá nu naca nu tobi si*

<sup>12</sup> Zanda uchaaga nu cuerpu stinu ca xpinni Cristu. Ti cuerpu napa stale ndaa peru tobi si laa. Zacaca nga ca xpinni Cristu. Necá stale nu peru tobi si laanu.

<sup>13</sup> Naca nu tobi si cuerpu purti uyú' nisa nu pur tobi si Espíritu. Tutiisi naca nu, pa judíu o pa cadi judíu, pa esclavu o pa cadi esclavu peru irá nu ma ucuaa nu tobi si Espíritu.

<sup>14</sup> Cadi tindaa si napa cuerpu stinu, sínuque stale ndaa.

<sup>15</sup> Laga pa niná ti chu ñee cadi de cuerpu que laa purti cadi bataná laa, ñee pur nga cadi zeeda ni lu cuerpu que la?

<sup>16</sup> Zaqueca pa niná ti chu diaga cadi de lu cuerpu laa purti cadi guielú laa, ñee pur nga cadi zeeda ni lu cuerpu que la?

<sup>17</sup> Purti pa ñaca puru si guielú ñaca cuerpu stinu la? ximodo ñuna diaga nu ya'. O ximodo ñu' xii nu pa ñaca puru si diaga ñapa cuerpu stinu.

<sup>18</sup> Peru cadi zacá ni, sínuque cada ndaa gudixhe chaahui Dios lu cuerpu modo ucala'dxi'.

<sup>19</sup> Pa ñaca tobi si ni naca irá ni la? paraa ñuu cuerpu ya'.

<sup>20</sup> Peru modo nuu ni la? dxandí stale ndaa ni, peru tobi si cuerpu.

<sup>21</sup> Qué zanda di ini' guielú nu, gabi bataná nu: "Cadi caquiiñe dia' lii." Nin ique nu qué zanda gabi ñee nu: "Cadi caquiiñe dia' laatu."

<sup>22</sup> Sínuque tindaa de cuerpu stinu ni ruluí' huaxié' riquiïñe la? ngue pe nga ni jma riquiïñe'.

<sup>23</sup> Ne ca ndaa ni jma huaxié' risaca la? jma pe rusicha'hui nu laaca'. Ne ca ndaa ni rituí lú nu ihuinni la? jma pe rapa chaahui nu laaca'.

<sup>24</sup> Ne ca ndaa ni gasti naca ihuinni la? cadi caquiiñe guiaapa chaahui'. Zacá pe gudixhe Dios gaca cuerpu stinu. Jma bisichaahui be cani caquiiñe uzuchaahui',

<sup>25</sup> ti cadi chu' dinde irá ni sínuque gapa saa cani laa-caní.

<sup>26</sup> Pa acaná tindaa la? zacaná irá xixé, ne zaqueca pa chu' tu usisaca tindaa la? laca zieche né irá ca xcadxi laa.

<sup>27</sup> Laatu nga cuerpu sti Cristu, ne cada tobi naca tindaa de laani.

<sup>28</sup> Lade ca xpinni Cristu la? nirudó' ulí Dios ca apóstol, rairopa cani rui' né binni ni rabi be laaca', raguionna cani rusiidi', ne óraque cani runi milagru, cani rusianda binni huará, cani racané stobi, cani nexhe xhiiña Dios ladxi ná', ne cani riní' idioma ni qué niziidi'.

<sup>29</sup> Peru cadi irá xpinni Cristu naca apóstol ne laca cadi irá rui' né binni ni gabi Dios laa, ne cadi irá rusiidi', ne cadi irá runi milagru,

<sup>30</sup> ne cadi irá napa poder para usianda binni huará, ne cadi irá rini' idioma ni qué niziidi', ne zaqueca cadi irá rusiene binni ni uni' ngue.

<sup>31</sup> Necá adxé adxé gracia rudii Dios cada tobi, peru lauyubi gapa tu ca gracia ni jma riquiñe'. Yanna ma chi ulué laatu ti neza ni jma rusi sicarú.

## 13

### *Enda ranaxhii*

<sup>1</sup> Pa ninié irá idioma ni rini' irá binni guidxilayú ne dede ni rini' ca ángel, peru qué ñanaxhiee binni la? ñeda aca casi guiba ni rixidxi laa o casi chin ni rixidxi reciu.

<sup>2</sup> Ne pa ñapa gracia ñueña binni ni ñabi Dios naa ne ñene irá ni naga'chi ni qué riene binni, ne ñanna irá xixé ni zanda ganna binni, ne ñapa stale fe dede nutuba dani de ra zuba, peru qué ñanaxhiee binni la? gasti nga naa.

<sup>3</sup> Zaqueca pa niguiize irá ni napa lu ca pobre para ño ca', ne dede nudiee cuerpu stinne nicá gui, peru qué ñanaxhiee laaca la? abati niquiiñe ni naa.

<sup>4</sup> Pa nadxii lu stobi la? qué zadxiichi né gá lu laa, ne ziá lu laa. Pa nadxii lu stobi la? qué zuyubu tidu lú, ne qué zuchá lu enda naró' stiu' lú, ne qué zu'nu lii nandxó',

<sup>5</sup> ne qué zaníu' xiixa diidxa para guniná lu laa, qué zuyubu para lii siou'. Cadi necá gasti si guni lii maca cadxiichi neu laa, ne qué ziuu neu laa xiana.

<sup>6</sup> Pa nadxii lu stobi la? qué zieche lu ora uchée, sínueque ora guni jneza.

<sup>7</sup> Ne pa nadxii lu laabe la? zuni huantar lu laabe ne zuni cre lu laabe. Intiica queeda, nuu neu laabe tobi si ne qué zaree lu gana.

<sup>8</sup> Zadxiña dxi ma cadi naquiiñe güi cabe ni gabi Dios laacabe, ne qué zaní cabe idioma ni qué niziidi cabe, ne qué zaquiiñe irá enda biaani ni riquiñe yanna. Peru qué ziuu dxi initilú enda ranaxhii.

<sup>9</sup> Caadxi si riene nu nagasi ri', ne zacaca rui nu ni gabi Dios laanu bia' randa si,

<sup>10</sup> peru zadxiña dxi ihuinni irá ni naya'ni', ne dxi que ma qué zaquiiñe di ni nanna nu yanna ri'.

<sup>11</sup> Dxi guca xcuidi la? unié casi rini' xcuidi, uni' ique casi rini' ique xcuidi ne biene bia' riene xcuidi. Peru dxi ma biniise bisaana irá enda xcuidi que.

<sup>12</sup> Nachuundu cadu'ya nu yanna ri', casi ñaca nidu'ya nu irá cosa lu ti espeju yooxho', peru zadxiña dxi idu'ya chaahui nu cani casi ridu'ya saa nu lú nu yanna. Caadxi si riene nagasi ri', peru zadxiña dxi guiene chaahue irá cosa, casi runibiá' chaahui Dios naa.

<sup>13</sup> De lade irá nga la? ziaana chonna cosa ni jma risaca: guni cre nu Dios, ne icá lú nu laa, ne ganaxhii saa nu. Peru ni jma risaca lade guionna nga la? nga enda ranaxhii.

## 14

*Enda riní' adxé idioma*

<sup>1</sup> Laucaa ique ganaxhii saa tu de idubi ladxidó' to, ne laca lauyubi gapa tu ca gracia ni rudii Espíritu Santu, peru nirudo' gracia para güi tu stiidxa Dios.

<sup>2</sup> Purti ora caní' tobi idioma ni iruti riní' la? cadi caní' né di be binni guidxilayú, purti qué zanda guiene binni guidxilayú laabe, sínunque caní' né be Dios. Cusini' Espíritu Santu laabe xiixa ni ca'ru usiene Dios binni.

<sup>3</sup> Peru tobi ni rui' stiidxa Dios la? riní' né binni para acané laaca iniisi ca lu neza sti Dios, ne para usieche laaca', ne para cuaquí dxí ladxidó' ca'.

<sup>4</sup> Ni riní' sti idioma adxé la? racané laca laa, peru ni rui' stiidxa Dios, racané irá xpinni Cristu.

<sup>5</sup> Ñacaladxe nudii Espíritu gracia irá tu para niní' tu adxé idioma, peru ni jma ñacaladxe nga ñapa tu gracia para ñui' tu stiidxa Dios. Jma risaca ni rui' stiidxa Dios que ni riní' adxé idioma, purti pa qué chu' tu gabi binni xi na ni uní' ngue la? qué zacané di ni para uzuhuaa chaahui ca xpinni Cristu.

<sup>6</sup> Hermanu ca', ximodo ñacaniá laatu pa ñaa ra nuu tu ne ninié adxé idioma ne qué ñue nia laatu ni bilui' Dios naa, ne qué nusiene laatu ni ca'ru ganna tu, ne qué ñue nia laatu stiidxa Dios, ne qué nusiide laatu gasti ya'.

<sup>7</sup> Cadi nabani flauta ni ruxhidxi cabe, nin arpa, peru pa qué iree la'na stidxi cani la? ximodo ganna binni xi son que caxidxi ya'.

<sup>8</sup> Zaqueca pa icá corneta ne qué iree la'na la? nuu xa tu nanna pa che guerra.

<sup>9</sup> Zacaca nga zeda gaca tu. Pa iní' tu ni qué riene binni la? ximodo ndi ganna cabe xi caní' tu. Casi ñaca caní' stubi tu.

<sup>10</sup> Nabé stale idioma nuu ndaani guidxilayú ri', peru irá ni nuu xi riní'.

<sup>11</sup> Peru pa qué randa riene nu xi na ca diidxa ni caní' tobi la? rulu' adxé binni laabe ne adxé binni laanu.

<sup>12</sup> Zacaca laatu, yáquexa racala'dxi tu gapa tu gracia ni rudii Espíritu Santu la? lauyubi gapa tu ca gracia ni jma racané irá ca xpinni Cristu.

<sup>13</sup> Ngue runi, ni riní' adxé idioma la? naquiñe inaba lu Dios guiene ni para usiene ni binni.

<sup>14</sup> Purti pa inié nia Dios sti idioma adxé la? espíritu si stinne caní' né laabe peru sin ne xquenda biaane'.

<sup>15</sup> Yanna, xi gune'. Sicarí gune': zanié nia laabe ne espíritu, peru laca zanié nia laabe ne xquenda biaane'. Zuunda nia laabe ne espíritu, peru laca zuunda nia laabe ne xquenda biaane'.

<sup>16</sup> Pacaa, pa udiuu diuxquixe Dios ne espíritu si la? laga cani qué ñene ya'. Ximodo udii né cabe lii diuxquixe Dios.

<sup>17</sup> Necá pa galán bidii lu

diuxquixe Dios, Peru qué ñacanéu stobi que.

<sup>18</sup> Rudiee diuxquixe Dios purti jma rinié adxé idioma que irá tu,

<sup>19</sup> Peru ora nuua ra cayaca cultu la? jma riuladxe inié neca gaayu si diidxa Peru ne xquenda biaane' que inié chii mil diidxa de adxé idioma. Purti ora rinié ne xquenda biaane la? rusiide binni.

<sup>20</sup> Hermanu ca', cadi iní ique tu casi rini' ique xcuidi, sínunque lainí ique casi rini' ique ni huaniisi, Peru lagaca casi badu huiini luguiá enda malu.

<sup>21</sup> Sicarí cá lu Xqui'chi Dios: "Zanié nia ca binni ri de ruua hombre ni rini' adxé idioma, ne de ruua binni de adxé guidxi, Peru nin ne zacá qué zucaa diaga ca naa, na Dios."

<sup>22</sup> Zacá rihuinni ora rini' binni adxé idioma, riquiíñe ni casi ti seña para cani qué runi cre, ne cadi para cani runi cre. Peru ora güi cabe xixa ni biluí' Dios laacabe la? nga riquiíñe para cani ma runi cre ne cadi para cani qué runi cre.

<sup>23</sup> Nga runi ora cayuni tu cultu, pa irá tu caní' tu adxé idioma ne gueda chuu caadxi ni qué gapa gracia que, o ni qué runi cre, ñee qué zaná ca ngue cayaca ique tu la?

<sup>24</sup> Peru pa irá tu cayuí' tu stiidxa Dios ne chu' tobi ni qué runi cre o tobi ni qué gapa gracia iní adxé idioma la? ziuu ngue razón pur ni caní' tu que, ne pur laani zuuya paraa cuchee,

<sup>25</sup> ne zahuinni irá ni ga'chi ndaani ladxidó'. Oraque ziba rilú ne zusisaca Dios, ne zaní' dxandí nuu né Dios laatu.

*Modo naquiiñe aca cultu*

<sup>26</sup> Yanna ndi nga laani, hermanu ca': ora guni tu cultu la? tobi gu'nda ti cantu, ne stobi usiidi xiixa, ne stobi güi né laatu xiixa ni biluí' Dios laa, ne stobi iní adxé idioma, ne stobi usiene ni uní' be. Peru irá ni laguni para acané saa tu.

<sup>27</sup> Ora nuu tu caní' adxé idioma la? zaa iní' chupa o chonna si, Peru tobi gá, ne óraque guiasa stobi usiene ni iní' cabe que.

<sup>28</sup> Peru pa qué guinni iruti tu usiene ni iní' cabe la? jma galán cadi uzuhuua cabe iní' cabe, sínunque cada tobi iní' né Dios stubi.

<sup>29</sup> Zaueca cani rui' ni gabí Dios laa. Laca zanda iní' chupa o chonna, ne ca xcaadxi que guuya chaahui pa jneza caní' cabe.

<sup>30</sup> Peru pa uluí' Dios xixa nacubi tobi de cani zuba cucaa diaga raqué la? igani ni caní' que, para uzulú ngue.

<sup>31</sup> Purti tu gabí Dios laa xixa iní' la? zaa iní', Peru tobi gá, tobi gá, ti irá tu iziidi tu, ne acané saa tu para udxii lú tu ni.

<sup>32</sup> Ni rui' stiidxa Dios naquiiñe guni mandar espíritu sti'.

<sup>33</sup> Purti qué riula'dxi Dios chu' tu hueru hueru, sínunque riula'dxi be gata chaahui irá cosa.

Cásica irá ra raca cultu sti ca xpinni Cristu la?

<sup>34</sup> zaqueeca lade tu, cadi iní ca gunaa, purti cadi ne laa-cabe nexhe iní' cabe. Napa cabe xidé uzuuba cabe diidxa, purti nga ca cá lu ley.

<sup>35</sup> Ne pa racala'dxi cabe ganna cabe xiixa la? inaba diidxa cabe xheela cabe ralidxi cabe, purti cadi galán iní' gunaa ora cayaca cultu.

<sup>36</sup> Ñee na tu de laatu biale stiidxa Dios la? o na tu deru laatu huayuna diaga tu ni.

<sup>37</sup> Pa nuu tu na zanda güi né binni stiidxa Dios, o na ma bidii Espíritu Santu laa xiixa gracia la? napa xidé icaa ca diidxa ni cucaa lú tu ri casi stiidxa Señor.

<sup>38</sup> Peru pa qué na be icaa be ni la? cadi ulabi tu laabe.

<sup>39</sup> Nga nga laani, laucaa ique güi né tu ca xcaadxi stiidxa Dios ne cadi cuee tu de iní' cabe adxé idioma ni rusini' Dios laacabe.

<sup>40</sup> Peru ni rabe sia' laatu nga quixhe chaahui tu modo guni tu ca cultu stitu ti gaca cani jneza.

## 15

### Bibani Cristu

<sup>1</sup> Yanna la? hermanu ca', chi usietenadaladxe laatu de evangeliu ni byue nia laatu. Laani nga bini cre tu, ne ma zuhuua chaahui tu lú ni.

<sup>2</sup> Pa gapa tu ni casi byue nia ni laatu la? zalá tu, pa dxandí ma bini cre tu.

<sup>3</sup> Nirudó' bisiide laatu ni biziide'. Ne ndi nga laani: guti Cristu para biaxa stonda nu, casi cá lu Xqui'chi Dios aca ni.

<sup>4</sup> Bigaachi be ne bibani be rabionna gubidxa, casi cá lu Xqui'chi Dios.

<sup>5</sup> Oraque uyé be ra nuu Pedru ne laca uyé be ra nuu irá ca apóstol.

<sup>6</sup> Laca uyé be ra nuu jma de gaayu gayuaa hermanu tobi si lugar. Stale de laaca nabani ru de yanna, ne xcaadxi de laaca ma guti.

<sup>7</sup> Ne uyé be ra nuu Jacobo ne óraque ra nuu irá ca apóstol.

<sup>8</sup> Naa zeda gaca casi ba'du ni gule ca'ru izaa xpeeu, purti de últimu bihuinni be ra nuua'.

<sup>9</sup> Jma huaxié' naa para ca xcaadxi apóstol, ne qué iquiiñe para gabi cabe naa apóstol purti uzaya nanda ca xpinni Dios.

<sup>10</sup> Peru yanna ma naca ni naca' purti uca Dios nacha'hui ne naa, ne cadi pur gana si bi'ni be ni, purti huayune xhiiña be jma que ca xcaadxi apóstol. Peru cadi naa dia' bine ni, sínuque ucané be naa para gunda bine ni.

<sup>11</sup> Peru gasti naca tu bi'ni dxiiña lade tu, pa naa o pa laacabe, purti tobi si ni rusi'di du, ne nga nga ni bini cre tu.

### Zabani ca xpinni Cristu

<sup>12</sup> Ma bisi'di du laatu bibani Cristu de lade gue'tu'. Yanna xiñee nuu ru de laatu na cadi dxandí ribani gue'tu'.

<sup>13</sup> Purti pa qué ribani gue'tu la? nin Cristu qué nibani.

<sup>14</sup> Ne pa qué nibani Cristu la? pur gana si canayuí du stiidxa be, ne laca pur gana si bini cre tu,

<sup>15</sup> ne canausiguii du ra cayuí du stiidxa Dios, partí canayuí du bisibani be Cristu, Peru pa qué ribani gue'tu la? cadi dxandí ni.

<sup>16</sup> Purti pa qué ribani gue'tu la? laca qué nibani Cristu.

<sup>17</sup> Ne pa qué nibani Cristu la? pur gana si runi cre tu laabe ne qué nixá stonda tu.

<sup>18</sup> Ne laca ma binitilú ca xpinni Cristu ni ma guti.

<sup>19</sup> Ne pa nicá lú nu Cristu para ndaani guidxilayú ri si la? ñaana nu jma triste lade irá binni.

<sup>20</sup> Peru ndi nga laani: dxandí bibani Cristu de lade gue'tu', ne nirudó' laabe biasa be lade irá xixé cani ma guti.

<sup>21</sup> Purti cásica pur tobi hombre bizulú enda guti la? zaqueca pur stobi hombre biuu enda ribani de lade gue'tu'.

<sup>22</sup> Cásica rati irá binni partí za de Adán la? zaqueca zebani irá cani aca né Cristu tobi si.

<sup>23</sup> Sicarí nga gudixhe Dios aca ni: nirudó' ibani Cristu, ne dxi queeda la? óraque ibani ca xpinni.

<sup>24</sup> Ne raqué nga iluxé ni, ra quixhe dxi Cristu irá xixé ni runi mandar ndaani guidxilayú, partí zunitilú be irá ni cadi jneza ni nuu lu guidxilayú, ne óraque ma zudii be ca xpinni be Dios Bixhoze be para guni mandar.

<sup>25</sup> Purti napa be xidé guni mandar be dede cuaquí dxí Dios irá cani cadi nuu né laabe tobi si.

<sup>26</sup> Ne ni unitilú be último naga enda guti.

<sup>27</sup> Sicarí cá ni lu Xqui'chi Dios: "Ma ula'qui Dios irá xixé cosa xa ñee be." Peru ra na ni irá xixé cosa ca la? cadi cuzeete di ni né Dios nexhe xa ñee be, partí laa gudixhe irá ni xa ñee be.

<sup>28</sup> Gudixhe Bixhoze be irá ni xa ñee be, ne ora ma runi mandar be irá ni la? laca zuni mandar Bixhoze be laabe, ti laa aca xaíque sti irá ni.

<sup>29</sup> Pa cadi huandí ribani gue'tu la? xiñee nuu tu riuu nisa xcuenta cani ma guti pue. Xi para runi cabe ni pa qué lica ziuu dxi ibani gue'tu'.

<sup>30</sup> Ne laadu ya', xiñee rudí' du lugar riuu xpida du naxoo irá hora.

<sup>31</sup> Hermanu ca', irá dxi nuaa para gate', ne zanda ganna tu dxandí ni, bia'ca dxandí rieche nia laatu pur ni bi'ni Jesucristu Señor stinu luguiá tu.

<sup>32</sup> Naa zanda pe gabe laatu casi ñaca udinde nia mani duxhu ndaani guidxi Efeso pur Cristu, Peru xi nibee ndua' pa qué ribani gue'tu'. Ne pa ñaca cadi dxandí ni la? niní nu casi na dichu que: "Laidó' ne laidé', partí qué ganna nu pa nabani ru nu ixí'."

<sup>33</sup> Peru cadi udii tu lugar chu' tu quite laatu. Casi na cabe: "Pa idxaagu ni nadxaba la? zacá ni lii."

<sup>34</sup> Lacuu xpiaani tu ne cadi uchee ru tu, purti nuu de laatu ca'ru gunibíá' chaahui Dios. Cayabe ni laatu para ituí lú tu.

*Ximodo ibani gue'tu'*

<sup>35</sup> Peru zanda ca chu' tu inaba diidxa': "Ximodo ibani gue'tu ne ximodo cuerpu guiasa né cabe."

<sup>36</sup> Aque qué riene tu xa. Nee qué ganna tu pa intiisi biidxi udxiiba tu napa xidé gati para indani la?

<sup>37</sup> Ora rigui'ba ti biidxi', trigu o intiica biidxi', cadi biidxi queca iree, sínunque ma yaga huiini'.

<sup>38</sup> Ne Dios nga udii xpandaga ni, casi laa racala'dxi', ne maca gudixhe be xi bandaga gapa ni.

<sup>39</sup> Ne zaqueca cadi tobi si cuerpu nuu. Adxé cuerpu sti hombre para cuerpu sti mani', ne laca adxé cuerpu sti mani huiini para cuerpu sti benda.

<sup>40</sup> Nuu ni bizá' Dios para ibá' ne nuu ni bizá' be para ndaani guidxilayú, peru adxé modo sicarú ni nuu para ibá' ne adxé modo sicarú ni nuu para ndaani guidxilayú.

<sup>41</sup> Ne adxé nga biaani sti gubidxa para biaani sti beeú, ne laca adxé ni para biaani sti ca luceru, ne laca adxé adxé biaani sti cada luceru.

<sup>42</sup> Zacaca nga enda ribani gue'tu'. Riu'dxu cuerpu ni riuu ndaani yu, peru dxi guiasa ni la? zaca ni ti cuerpu ni qué ziu'dxu'.

<sup>43</sup> Ora rigaachi ni ndaani yu qué iquiiñe ni, peru dxi guiasa ni zaca ni ti cuerpu sicarú. Ora rigaachi ni ndaani yu, qué gapa ni stipa, peru dxi guiasa ni huaxa ma napa ni stipa.

<sup>44</sup> Ora rigaachi ni ndaani yu, naca ni cuerpu ni riquiiñe para ndaani guidxilayú ri', peru dxi guiasa ni, zaca ni cuerpu ni iquiiñe ibá'.

<sup>45</sup> Sicarí cá lu Xqui'chi Dios: "Adán, primé hombre uca binni nabani." Peru zanda gabi nu Cristu nga rairopa Adán, ne laa naca ti espíritu ni rudii enda nabani.

<sup>46</sup> Ne zacá nga laani. Cadi nirudó' reeda cuerpu ni iquiiñe para ibá' sínunque ni iquiiñe para ndaani guidxilayú, ne óraque ru nanda ni iquiiñe para ibá'.

<sup>47</sup> Za primé hombre que de guidxilayú, purti de yu uyá', ne stobi que za de ibá'.

<sup>48</sup> Para enda nabani ndaani guidxilayú ri la? zeda gaca nu casi primé hombre ni uyá' de yu que, peru para enda nabani ibá' la? zaca nu casi ni beeda de ibá' que.

<sup>49</sup> Cásica rindée nu hombre ni uyá' de yu que yanna, za queca ziuu dxi chi ndee nu ni beeda de ibá' que.

<sup>50</sup> Racaladxe gabe laatu, hermanu ca', qué zanda chu' cuerpu ni napa nu ndaani guidxilayú ri ra runi mandar Dios, purti qué zanda chu' ni riu'dxu lade cani qué riu'dxu'.

<sup>51</sup> Laguuya chaahui ni cucaa rarí dí' purti racaladxe

guiene tu ni iruti huayene. Cadi irá nu zati nu, peru irá nu zuchaa Dios laanu

<sup>52</sup> dxi xhidxi últimu trompeta que. Ne zaca ni ti ratu huiini casi ora riguiñe laga cabe. Purti zaxidxi trompeta que ne óraque zandisa Dios ca gue'tu', ne ziasa né ca ti cuerpu ni qué ziu'dxu', ne zuchaa be irá nu.

<sup>53</sup> Purti riquiñe aca cuerpu ni riu'dxu ne ni rati ri ti cuerpu ni qué zati.

<sup>54</sup> Ne ora ma napa nu cuerpu ni qué ziu'dxu ne ni qué zati que la? dxi que nga aca ni casi cá lu Xqui'chi Dios: "Ma biluxé enda guti, purti ma bini ganar enda naban.

<sup>55</sup> Ma qué zanda guniná ru enda guti, ne ma qué zanda guni ganar ni."

<sup>56</sup> Ra gasti pecadu la? qué zanda guniná enda guti, ne qué ñanda ñuni pecadu gasti pa qué ñuu ley.

<sup>57</sup> Peru gudí' nu diuxquixe Dios, purti laa nga acané laanu quixhe dxí nu ni pur ni bi'ni Jesucristu Señor stinu.

<sup>58</sup> Nga runi, hermanu stinne ni nadxiee ca', lauzuhuaa chaahui', ne cadi iree cue' tu, ne qué chu' dxi usaana tu de guni tu xhiiña Señor bia' ra ganda ti', purti maca nanna tu cadi pur gana si cayuni tu ni.

## 16

*Ra bichaaga ca xpinni Cristu*

<sup>1</sup> Rarí chi uzeete de ofrenda ni cadopa para ca

xpinni Cristu. Modo ca gudixhe guni ca hermanu ni nuu Galacia la? zaqueca laguni.

<sup>2</sup> Cada tobi de laatu, bia' acané Dios laa guni ganar la? cuee chu tindaa de lú ni cada domingu, ne lagapa ni ti ma cadi idopa ofrenda ora guenda'.

<sup>3</sup> Laatu cui tu tu chiné ni Jerusalén, ne naa ma useenda nia laacabe carta ora chindaya'.

<sup>4</sup> Ne pa naquiiñe chaa la? ziniá laacabe.

*Ra cá ique Pablu che ra nuu ca binni Corinto*

<sup>5</sup> Napa xidé tide Macedonia viaje chaa ri'. De raqué iree chaa ra nuu tu.

<sup>6</sup> Zándaca guiaana nia laatu caadxi, o pacaa la? ra nuu tu utiide ca beeu nananda, ne óraque ma acané tu naa chuaa neza ladu tiica chaa'.

<sup>7</sup> Purti qué racaladxe tide sia' ra nuu tu yanna, sínuque racaladxe guiaana nia laatu xadxí huiini', pa na Señor.

<sup>8</sup> Peru ziaana Efeso dede dxi Pentecostés,

<sup>9</sup> purti zuxale ndaga puerta rarí para gune dxiiña ni iree ndu para Dios, ne laca nuu stale ni racala'dxi ucceeza dxiiña que.

<sup>10</sup> Pa che Timoteu ra nuu tu la? laguuya ximodo guiaa be lade tu ti cadi idxibi be, purti xhiiña Señor canayuni be cásica cayune'.

<sup>11</sup> Nga runi, nin tobi de laatu cadi udxii deche laabe, sínuque lauzuhuaa laabe neza ne enda nayeche para

gueeda be ra nuua', purti ma cabeza laabe, laabe ne ca xcaadxi hermanu.

<sup>12</sup> Rarí chi tidxe laatu de Apolo, hermanu stinu. Birá ucuaya lú be niné be ca xcaadxi hermanu ra nuu tu, peru qué na be che be yanna. Peru zie be ora ganda.

<sup>13</sup> Ne laatu la? lagataná ne lauzuhuaa chaahui lu ni runi cre tu. Lagaca hombre ne laudxii lú.

<sup>14</sup> Ne intiisi guni tu, laguni ne amor.

<sup>15</sup> Hermanu ca', maca nanna tu nirudó' Estéfanas ne ca binni lidxi bini cre lade irá binni Acaya, ne ma gudixhe ique ca acané ca irá ca xpinni Cristu. Ne ma gudixhe ique ca guiaana ca para si acané ca ca xpinni Cristu.

<sup>16</sup> Rinaba laatu uzuuba tu stiidxa irá hermanu casi laacabe, ne irá cani runi né laatu xhiña Señor.

<sup>17</sup> Necá qué ñanda ñeeda irá tu rari', peru cayeché purti beeda Estéfanas ne Fortunato ne Acaico, beda guni ca ni ñuni tu.

<sup>18</sup> Bisieche cabe ladxiduá' ne ladxidó' to. Laganna pabiá' risaca ca hermanu casi laacabe.

### *Diuxi*

<sup>19</sup> Laicaa stiuxi ca xpinni Cristu ni nuu Asia, ne zaqueca laicaa stale diuxi sti ca xcaadxi xpinni Señor, Aquila ne Priscila ne ca binni ni rie cultu ralidxi ca'.

<sup>20</sup> Laicaa stiuxi irá hermanu, ne laquidxi saa.

<sup>21</sup> Naa nga Pablu. Ne naya pia' cucaa diuxi ri'.

<sup>22</sup> Pa nuu tu qué na ganax-hii Señor Jesucristu la? dí nuu. Pa ñanda si ma ñeeda Señor stinu.

<sup>23</sup> Señor Jesucristu cu' ndaaya laatu.

<sup>24</sup> Nadxiee irá tu pur Cristu Jesús. Amén.

# RAIROPA GUI'CHI BICAA SAN PABLULU CA XPINNI CRISTU NI NUU CORINTO

<sup>1</sup> Naa nga Pablu. Naca apóstol sti Jesucristu partí gudixhe Dios gaca ni. Naa ne hermanu Timoteu cucá' du gui'chi ri lú tu, hermanu ca', irá tu casi nuu tu ndaani guidxi Corinto ne laca idubi naca Acaya.

<sup>2</sup> Dios Bixhoze nu ne Señor Jesucristu cu' ndaaya laatu ne quixhe dxí ladxidó' to.

*Irá nagana udí'di Pablu*

<sup>3</sup> Udí' nu diuxquixe Dios, Bixhoze Jesucristu Señor stinu, partí laca Bixhoze nu laa ne riá laanu. Laabe nga Dios stinu ne riguixhe dxí be ladxidó' no.

<sup>4</sup> Rusieche be laanu ora tiica acaná ladxidó' no, ne zacá rizi'di nu usieche nu stobi ni cayacaná ladxidó', cásica bisieche be laanu.

<sup>5</sup> Cadidi du stale ra nagana casi udí'di Cristu chiqué, peru bia'ca cadale enda naná ca la? bia' cá ca cusieche be laadu.

<sup>6</sup> Ne pa cayacaná du la? cayacaná du para acané du laatu guieche tu ne para ilá tu. Purtí zacané Dios laadu tidi du ni, ne zusieche laadu. Zacá laca zanda tidi tu ni naná casi cadidi du sin quiche rúa tu, purti nanna tu laca zusieche be laatu.

<sup>7</sup> Ne cadi nuu du xizaa pur laatu partí nanna du cásica nuu né tu laadu tobi si lu enda naná, zacaca zacaa né tu laadu enda nayeche ni rudii Dios.

<sup>8</sup> Hermanu ca', racala'dxi du ganna tu pabiá' ucaná du dxi nuu du Asia. De tantu naná ni beeda luguiá du raqué, zácxaxa du ma qué ñanda ñuni huantar ru du. Rabi du raqué ñati du.

<sup>9</sup> Para laadu rului' ma nexhe gati du. Peru guca ni zacá ti cadi icá lú du zanda ulá du laca laadu sínuque icá lú du Dios si zanda ulá laadu, partí laa dede gue'tu rusibani.

<sup>10</sup> Ne dxandí bilá be laadu de lu ná enda guti que, ne nanna dxichi du zulá ru be laadu ora tiisi idxiña sti enda guti zacá laadu,

<sup>11</sup> pa acané tu laadu, iní né tu Dios pur laadu. Purtí pa stale binni canaba acané Dios laadu la? laca stale binni zudii diuxquixe laa ora ma ucané laadu.

*Xiñee qué ñe gá Pablu Corinto*

<sup>12</sup> Laadu nanna dxichi du huazá du jneza lade irá binni, ne jma rusi lade tu. De ndaani ladxidó' do nanna du dxandí ni, ne nga ni jma rusieche laadu. Purtí irá ni huayuni du, huayuni du de idubi ladxidó' do, casi na Dios. Cadi beeda ni de xquenda biaani du, sínuque ucané Dios laadu pur enda nacha'hui sti' para gunda bini du zacá.

<sup>13-14</sup> Ne ora rucá' du gui'chi lú tu la? rucá' du ni ganda gu'nda tu ne ni

ganda guiene tu. Ma bizulú tu cayene tu zieche né tu laadu dxi gueeda Jesucristu, Señor stinu, cásica zieche né du laatu dxi que. Yanna racaladxe guiene chaahui tu ni.

<sup>15-16</sup> Nga runi gudixhe nigganna laatu ora ziaa Macedonia ne laca ora nibigueta', para nusieche laatu chupa tiru. Oraque ma ñacané tu naa para ñaa Judea.

<sup>17</sup> Ñee na tu unié sia' ni la? Cadi zácaxa tu rune casi runi binni guidxilayú, rini' zie neca nanna qué zie.

<sup>18</sup> Cásica qué rusiguii Dios la? zacaca qué huayabi du laatu zuni du xiixa ni nanna du qué zuni du.

<sup>19</sup> Naa ne Silvanu ne Timoteu byuí du stiidxa Cristu Jesús Xiiñi Dios lade tu. Ximodo ñanda ñabi du laatu zuni du xiixa pa nanna du qué zuni du ni, nanna nda du qué ñuu dxi ñuni Cristu zacá.

<sup>20</sup> Sínuque laape be beda guni be irá ni ma bidii stiidxa Dios gaca'. Ngue runi ora riní né nu Dios riní nu "Amén" purti nanna nu zaca ni, casi guca stiidxa Dios dxi beeda Cristu, ne zacá rusisaca nu Dios.

<sup>21</sup> Dios huayacané laanu uzuhuá' chaahui nu lu neza sti Cristu, ne laca laa ulee chu laanu para laa.

<sup>22</sup> Ne uluu Espíritu Santu ndaani ladxitidó' no casi ti seña dxandí zudii laanu ni ma uní' udii, ne laca Espíritu que nga seña ma stibe laanu.

<sup>23</sup> Nanna Dios xi pur qué huayaa ra nuu tu. Ca'ru chaa

purti qué racaladxe gune na'ya laatu. Gate pa cadi dxandí ni.

<sup>24</sup> Cadi cuyubi du quixhe du xi guni cre tu, purti ma zuhuua chaahui tu lu ni runi cre tu. Ni cuyubi du la? nga acané du guieche tu.

## 2

<sup>1</sup> Nga runi qué nina'ya nigungue na'ya laatu sti tiru.

<sup>2</sup> Purti pa ñune na'ya laatu la? tu ru nusieche naa pa cadi cani bine na'ya que.

<sup>3</sup> Nga runi biseenda gui'chi que ra nuu tu, ne bicaa irá ni bicaa que, purti rabe lugar de nusieche tu naa laga ñuniná tu naa. Nanna dxi'che pa guieche la? laca zieche tu.

<sup>4</sup> Nabé nagana uca ni para naa, dede ucaná ladxitiduá' ne biete nisa lua ora cucaa gui'chi que lú tu, peru bine ni, cadi para gune na'ya laatu, sínuque para ganna tu pabiá' nadxiee laatu.

<sup>5</sup> Cadi naa sia' ucana'ya ra bichee tobi de laatu, sínuque de ti modo la? irá tu ucaná tu. Qué racaladxe gune ni jma naro'ba, nga runi unié "de ti modo".

*Guni perdonar cabe ni bichee lade cabe*

<sup>6</sup> Bia' ma bisaba ná tu hermanu ni bichee que la? bia' cá si laguni.

<sup>7</sup> Lausaana dxí nga yanna ne lauyubi usiaanda tu ni bi'ni be que, ne lausieche laabe ti cadi acaná ladxitidó' be dede bia' ra ma qué zanda.

<sup>8</sup> Rinaba laatu ulu' tu laabe dxandí nadxii tu laabe.

<sup>9</sup> Bicaa gui'chi que lú tu, para guuya pa zuzuuba tu stiidxa de irá ni gabe laatu.

<sup>10</sup> Yanna, tutiica guni perdonar tu la? naa laca zune perdonar laa. Ni huayune perdonar la? huayune ni nezalú Cristu ne bine ni partí ma bini perdonar tu ni.

<sup>11</sup> Guni nu zacá ti cadi quixhe dxí binidxaba laanu, partí ma nanna nu ximodo runi be dxiiña'.

### *Ra nuu Pablu Troas*

<sup>12</sup> Dxi yendaya Troas zigüé stiidxa Cristu. Ne neca bix-hale Señor neza para gune dxiiña raqué,

<sup>13</sup> Peru qué ñanda ñuu dxí ladxiduá' partí qué nidxela hermanu Titu, ngue runi biree raqué, uyaa Macedonia.

### *Racané Cristu laanu quixhe dxí nu irá'*

<sup>14</sup> Peru diuxquixe Dios qué rudii lugar quixhe dxí xiixa laanu, ne raca ni zacá partí nuu né nu Cristu Jesús tobi si. Ne riquiñe laanu para ireeche stiidxa', casi riahui ti xho' naxhi.

<sup>15</sup> Partí para Dios naca nu casi ti xho' naxhi ra cayuí nu stiidxa Cristu. Careeche ni lade cani ilá, ne zaqueca lade cani cananiti.

<sup>16</sup> Para cani cananiti la? naca nu casi ti xho' ni rusi-etenala'dxi laaca de enda guti ni cabeza laaca'. Peru para cani ilá la? naca nu casi ti xho' naxhi sti enda nabani ni udii Dios laaca'. Tuu ndi ñanda ñuni irá nga.

<sup>17</sup> Cadi canayuí du stiidxa Dios para guni ganar du,

sínuque rui du ni de idubi ladxidó' do casi nexhe guni ca xpinni Cristu, partí ulí Dios laadu. Ne laa nanna dxandí ni.

## 3

### *Ra guta sti modo ixá stonda binni*

<sup>1</sup> Ora riní du zacá, ñee na tu ma chi ibigueta gabi du laatu tu naca du la? Ñee naquiñe chiné du gui'chi ra nuu tu para ganna tu tu naca du, casi runi xcaadxi la? o naquiñe gabi du laatu ucaa tu tu naca du lu ti gui'chi sa né du la?

<sup>2</sup> Cadi zacá di nga laani, sínuque laatu zeda gaca tu casi ti carta ni cá ndaani ladxidó' do, ne irá binni ruuya ni ne ruunda ni.

<sup>3</sup> Ne laca zeda gaca tu casi ti carta ni bicaa Cristu, ne rizá né du ni. Ne cadi ucuá né ni tinta sínuque ne Espíritu sti Dios ni nabani, ne cadi cá ni lu guie sínuque ndaani ladxidó' binni.

<sup>4</sup> Riní du zacá partí racané Cristu laadu ganna dxichi du Dios bi'ni ni.

<sup>5</sup> Nanna du gasti qué zanda guni du de laasi du, sínuque irá ni reeda de Dios.

<sup>6</sup> Laa bisiene laadu para ganda usi'di du binni modo gudixhe chu' né cabe laa tobi si, ma cadi pur ley ni cá lu gui'chi', sínuque pur Espíritu Santu. Partí riguixhe ley gati binni, peru Espíritu Santu rusibani.

<sup>7</sup> Bihuinni enda nandxó' sti Dios dxi ucuua Moisés ley ni ucuá lu guie que, ne bizaani lú dede qué ñanda ñuuya

dxi ca binni Israel lú. Peru chaahui gá binitilú biaani que. Ne pa bihuinni enda nandxó' sti Dios ra ucuá ley ni riguixhe gati binni la?

<sup>8</sup> jma rusi zahuinni enda nandxó' stibe ra icaa binni ni cudii Espíritu Santu.

<sup>9</sup> Pa bia' cá bisaca ley ni rudxiiba donda ique binni la? jma rusi risaca stiidxa Cristu ni canayuí du, purti pur laani ma zanda ixá stonda nu.

<sup>10</sup> Nandxó' ley chiqué, peru yanna ma qué risaca ni, purti ma beeda ni jma nandxó'.

<sup>11</sup> Pa bihuinni enda nandxó' lu ni qué nindaa la? jma rusi zahuinni enda nandxó' lu ni qué ziuu dxi initilú.

<sup>12</sup> Nga nga ni cá lú du, ne nga runi riní du sin idxibi du.

<sup>13</sup> Qué runi du casi bi'ni Moisés, biseegu ti lari lú para qué ñuuya ca binni Israel ra binitilú biaani ni bizaani lú que.

<sup>14</sup> Peru cadi lú si Moisés bieegu', sínunque ne xquenda biaani ca binni que. Ne dede yanna ruluí' ye'gu ru lu xquenda biaani cabe, purti qué riene cabe ora ru'nda cabe lu Xqui'chi' Dios ni ucuá chiqué. Qué huaxele xquenda biaani cabe, purti Cristu si zanda uxhele ni.

<sup>15</sup> Ne dxandí dede yanna ora gu'nda cabe ni bicaa Moisés, qué riene cabe ni.

<sup>16</sup> Peru pa uyubi cabe Señor la? zaxele xquenda biaani cabe.

<sup>17</sup> Tobi si Señor ne Espíritu Santu. Ne ra ma nuu Espíritu stibe la? ma cadi cá cabe yaga lu ná ley.

<sup>18</sup> Laanu ma cadi da'gu lari que lú nu, sínunque ma naca nu casi ti espeju ra rihuinni enda nandxó' sti Señor, ne ze dxi zirooba enda nandxó' stibe luguiá nu, ziyaca nu casi laabe, purti laabe cayuni be ni, ne laabe nga Espíritu Santu.

## 4

<sup>1</sup> Dios bisaana dxiiña ri ladxi ná du purti guca nacha'hui ne laadu. Nga runi qué riré' du gana.

<sup>2</sup> Ne sicarí runi du dxiiña': qué ruca'chi du gasti ne qué runi du gasti ni nitúi lú du pa ñanna binni. Purti cadi canaguite du binni ne cadi canauchá' du stiidxa Dios, sínunque canayuí du ni dxandi'. Ne zacá zanna irá binni jneza cayuni du nezalú Dios.

<sup>3</sup> Peru pa ruluí' nacahui stiidxa Cristu ni canayuí du la? nacahui ni para cani cananiti.

<sup>4</sup> Qué runi cre ca purti rusicahui binidxaba xquenda biaani ca ti cadi guiene ca evangeliu ni rusihuinni enda nandxó' sti Cristu. Laa ruluí' laanu ximodo Dios.

<sup>5</sup> Cadi canayuí né du binni tu naca du, sínunque canayuí du Jesucristu nga Señor. Ne laadu la? naca du casi mozo stitu purti nadxii du Jesús.

<sup>6</sup> Dios ca ni uní' chu' biaani dxi bizá' guidxilayú, laca laa bizaani ndaani ladxidó' no yanna, ti ganda gunibiá' nu

enda nandxó' sti ni rusi-huinni Jesucristu.

*Ibani nu pur ni runi cre nu*

<sup>7</sup> Nabé risaca ni bisaana né Dios laadu, peru laadu gasti nga laadu. Zeda gaca du casi guisu de yu, ne Dios cayuni irá ni ne enda nandxó' sti'.

<sup>8</sup> Ladu tiisi chuu du cabeza ni nagana laadu, peru rului' be laadu modo iré' du de laani. Stale tiru qué riene du xiñee reeda ni luguiá du, peru qué riré' du gana.

<sup>9</sup> Nuu stale tu canaladxi laadu, peru qué rusaana Dios laadu. Necá huayuniná cabe laadu dede rului' ma qué zanda guisasa du, peru riasa du runi seguir du.

<sup>10</sup> Ladu tiica chuu du canananda cabe guuti cabe laadu casi bi'ni cabe Jesús, peru rilá du, ne zacá rihuinni nabani Jesús ne cayapa laadu.

<sup>11</sup> Xpinni Cristu laadu, nga runi irá dxi zadxagalú du enda guti, peru nabani ru du, ti ihuinni canacaa du enda nabani stibe lu cuerpu ni rati ri'.

<sup>12</sup> Ndi nga laani: rizá nanda enda guti laadu partí cayuí du stiidxa Cristu, peru laatu, cudii ni enda nabani ni qué zaluxe laatu.

<sup>13</sup> Casi cá lu Xqui'chi Dios: "Bine cre, nga runi unié'." Ne zacaca laadu. Runi cre pe du Dios, nga runi riní du sin idxibi du.

<sup>14</sup> Purtí nanna du laabe bisibani be Jesús de lade gue'tu', ne laca zusibani be laadu casi bisibani be laa,

para uchiña be laanu ra nuu be.

<sup>15</sup> Huadidi du irá nga para acané du laatu, ti icca jma stale binni ni cudii Dios, ne zacá jma stale binni udii di-uxquixe Dios para usisaca laa.

<sup>16</sup> Nga runi qué riré' du gana. Necá ze dxi ziyaana xcuerpu du sin stipa, peru espíritu studu jma rusi ziyapa stipa.

<sup>17</sup> Purtí cadi naro'ba enda naná ni nuu luguiá du ri', tobi zidi'di si ni, ne zudii ni laadu ti enda nayeche nabé naro'ba ni qué ziuu dxi iluxe.

<sup>18</sup> Nga runi cadi cazaala'dxi du ni cadu'ya du yanna ri', sínunque cabeza du ni chi ihuinni ru'. Purtí zanitilú ni rihuinni yanna ri', peru qué ziuu dxi initilú ni qué rihuinni.

## 5

<sup>1</sup> Zeda gaca cuerpu stinu casi ti yoo ra nabeza nu laga nuu nu ndaani guidxilayú, ne nanna nu pa initilú ni, nuu stobi bizá' Dios para laanu ibá', ni qué ziuu dxi initilú.

<sup>2</sup> Yanna para laanu pa ñanda si ma nibixhi nu ndaani yoo ni nuu ibá' que.

<sup>3</sup> Casi ñaca nibaqui nu lari para nuseegu laanu ti qué ñaana nu sin cuerpu.

<sup>4</sup> Laga nabani ru nu ndaani guidxilayú ri' cacaala'dxi nu casi ñaca nuá nu xiixa nanaa. Cadi partí racala'dxi nu gati nu. Zacá la? ñaana nu sin cuerpu. Ni racala'dxi

nu la? icaa nu cuerpu cubi que.

<sup>5</sup> Para nga pe nga bi'ni Dios dxiña luguiá nu ne ma bidii laanu Espíritu Santu casi ti seña zuni ni ma uní.

<sup>6</sup> Nga nga cá lú nu, ne nanna nu laga napa ru nu cuerpu ri la? qué zanda chu' nu ra nuu Señor.

<sup>7</sup> Rinanda nu ni runi cre nu ne cadi ni ridu'ya nu.

<sup>8</sup> Peru casi rabe laatu ca, cá lú nu idu'ya nu ni, ne dede rabi nu zaa ñati nu ne nusaana nu cuerpu ri para ñuu nu ra nuu Señor.

<sup>9</sup> Peru cuyubi nu guni nu ni chu'la'dxi be, pa nuu ru nu rari', o pa chuu nu ra nuu be.

<sup>10</sup> Purti irá nu napa nu xidé idxiña nu nezalú Cristu para quixe laanu ni bini nu laga nabani nu ndaani guidxilayú ri', pa jneza o pa cadi jneza.

### *Modo chu' né binni Dios tobi si*

<sup>11</sup> Laadu ridxibi du Señor, nga runi ruyubi du ximodo usiene du binni stiidxa be. Dios nanna tu naca du, ne zacaca ribeza du ganna tu ni.

<sup>12</sup> Cadi cudxi'ba du laca laadu, sínunque cayabi si du laatu ni dxandí', ti ganda guieche né tu laadu ne para gapa tu xi gabí tu cani rudxi-iba tuuxa pur ni rihuinni de luguiá si, neca cadi dxandí ni ca ngue.

<sup>13</sup> Pa ruluí' cayaca ique du la? cayaca ni para usisaca du Dios, ne pa ruluí' nuu xpiaani du la? nuu ni para ganda acané du laatu.

<sup>14</sup> Ma biene du tobi si guti pur irá', ne nga casi ñaca guti

irá'. Nga runi, intiica guni du, runi du ni partí nadxii du Cristu.

<sup>15</sup> Cristu guti pur irá nu ti bia' dxi ibani nu ma cadi ibani nu para laanu sínunque para laabe. Laabe nga guti be ne bibani be para laanu.

<sup>16</sup> Chiqué qué nisaca be para laadu, partí nisi biyubi du binni risaca ndaani guidxilayú ri'. Peru ma qué rulabi du tu naca binni, ne nga runi ma adxé modo ridu'ya du laabe yanna.

<sup>17</sup> Purti cani ma nuu né laabe tobi si, ma adxé ni cá ique, casi ñaca ma nacubi. Ma ulee Dios laa de modo uzá chiqué, ma irá ni nacubi para laa.

<sup>18</sup> De Dios zeeda irá nga. Laa bichiña laanu ra nuu para chu' né nu laa tobi si pur ni bi'ni Cristu, ne laca laabe ulí be laadu güi né du binni stiidxa be para ganda chu' né ca laabe tobi si.

<sup>19</sup> Ndi nga laani: pur ni bi'ni Cristu, biyubi be chu' né be binni tobi si, ne ma qué zaguu be cuenta ni huachée né ca laabe. Nga na stiidxa be ni bisaana né be laadu güi né du binni.

<sup>20</sup> Biseenda Cristu laadu gueda tidi du laatu uyubi tu chu' né tu Dios tobi si, casi ñaca Dios canaba laatu guni tu ni.

<sup>21</sup> Qué ñuu dxi nuchee Cristu, peru bidxiiba Dios irá stonda nu luguiá be ne nga runi ra gaca né nu laabe tobi si ma gastí donda nuu luguiá nu nezalú Dios.

**6**

<sup>1</sup> Runi né du Dios dxiiña', ne canaba du laatu usihuinni tu cadi pur gana si uca be nacha'hui ne laatu.

<sup>2</sup> Purti sicarí cá lu Xqui'chi be ra caní' né be binni: Bigaanda stidxi tu naa, dxi pe ma nuaa para ucaa dia'ga laatu,

ne ucaniá laatu dxi ma gudixhe ula'ya binni.

Nga na be. Ne dxandí ma bidxiña dxi acané be binni, ne yanna ri nga na be ulá be laaca'.

<sup>3</sup> Runi du xhiiña du jneza sin uché' né du iruti', ti qué gapa ca xi pur iní' ca laadu nin ni canayuí du.

<sup>4</sup> Laga irá modo racala'dxi du usihuinni du xhiiña Dios cayuni du. Nga runi huadidi du stale ni naná ne qué huaxhacala'dxi du, neca guiaadxa ni caqui'ñe du o gueeda xiixa naná luguiá du.

<sup>5</sup> Huaguiñe cabe laadu, huaseguyoo cabe laadu, huayuni né cabe laadu ruidu pur ni canayuí du. Huayuni du dxiiña sin iziila'dxi du, huabee xcaanda du, huayaana du sin idó' do.

<sup>6</sup> Ne laca sicarí usihuinni du dxandí xhiiña Dios cayuni du: nabani du modo na, riene chaahui du ni canayuí du, qué rixhacala'dxi du de gaca du nacha'hui ne binni, nuu né Espíritu Santu laadu, nadxii du binni de idubi ladxidó' do,

<sup>7</sup> rui du ni dxandí ne racané Dios laadu lu irá ni. Qué rizá né du xiixa ni ucá'lú né du, sínunque rizá du modo na Dios ne nga si nga racané

laadu ora ugaani cabe xiixa luguiá du, ne nga ca rucá' lú né du cani cadi cayuni jneza.

<sup>8</sup> Nuu tu rudxiiba laadu ne nuu tu rudxii deche laadu. Nuu tu riní' laadu ne nuu tu rusicaca laadu. Napa cabe laadu casi ni rusiguii, peru cadi dxandí rusiguii du.

<sup>9</sup> Nuu tiru runi cabe sica ni qué runibiá' cabe laadu neca runibiá' cabe laadu, ne nuu tiru usihuinni cabe runibiá' chaahui cabe laadu. Nuu tiru ruluí' ma chi gati du Peru de yanna nabani du. Huayuniná cabe laadu Peru qué huayati du.

<sup>10</sup> Necá racaná ladxidó' do Peru nayeche nuu du, ne neca qué gapa du gasti Peru stale ni rudi' du binni, purti neca ruluí' qué gapa du gasti, ma bidii Señor laadu irá ni.

<sup>11</sup> Hermanu de Corinto ca', huaní né du laatu sin uca'chi du gasti'. Huayabi du laatu irá ni nuu ndaaní ladxidó' do.

<sup>12</sup> Laadu nabé nadxii du laatu, Peru laatu huaxié' nadxii tu laadu.

<sup>13</sup> Canié nia laatu casi ñaca tu xiiñe', ne rinaba laatu ganaxhii tu naa casi nadxiee laatu.

*Laanu nga yu'du sti Dios*

<sup>14</sup> Cadi gaca né tu cani qué runi cre tobi si, purti zacá zeda gaca tu casi ti buey ni cadi cá né xcompañeru. Zanda xa guiu'cha ni jneza ni cadi jneza, o zanda xa guiu'cha biaani guelacahui.

<sup>15</sup> Zanda xa sa né Cristu binidxaba tobi si. O zanda xa sa chupa tobi si, tobi runi cre Cristu, stobi qué runi cre.

16 Zanda xa chu' né yu'du  
sti Dios ca bidó' tobi si. Laatu  
nga yu'du sti Dios ni nabani,  
casi cá lu Xqui'chi ra na:  
Zabeza nia laacabe ne za-  
zaya lade cabe,  
ne zaca Dios stícabe ne zaca  
cabe xpinne'.  
17 Ne laca cá ra na be:  
Lairee de lade cabe ne laix-  
ele de laacabe,  
ne cadi cana tu ni cadi nayá  
para naa,  
ti icaa laatu,  
18 ne gaca Bixhoze tu,  
ne laatu gaca tu xiiñe'.  
Zacá na Dios ni runi mandar  
irá'.

## 7

<sup>1</sup> Nga runi, hermanu ni  
nadxiee ca', yáquexa ma bidii  
stiidxa be laanu la? usiá nu  
laanu de irá ni runi dxaba  
xcuerpu nu ne espíritu stinu,  
ti sa nu modo pe naquiiñe  
sa ca xpinni be, cani ridxibi  
laabe.

*Cayeche Pablu ma bichaa  
ca binni Corinto*

<sup>2</sup> Laganaxhii laadu. Qué  
huaché' né du iruti', ne qué  
huayuni du pur uchee iruti',  
ne qué huaguite du iruti'.

<sup>3</sup> Cadi cayabe ni laatu para  
udxiiba donda ique tu, partí  
maca gudxe laatu napa laatu  
ndaani ladxiduá'. Pa gati nu  
o pa ibani nu Peru nuaa nia  
laatu tobi si.

<sup>4</sup> Napa confianza laatu ne  
nabé rieche nia laatu. Necá  
nuaa lu enda naná, Peru  
nayeche nuaa ne cadi caree  
gana.

<sup>5</sup> Dede dxi bedandá du  
Macedonia, qué ganda chu'  
dxi ladxidó' do. Ladu tiica

iré' du nuu ni cuchiiña laadu.  
Qué riaadxa tu ucaa lú laadu  
ne cadxibi ladxidó' do.

<sup>6</sup> Peru rusieche Dios ni cay-  
acaná ladxidó', ne bisieche  
laadu ra bedandá Titu.

<sup>7</sup> Bieche du ra bedandá  
be, Peru cadi nga si, sínueque  
laca bieche du ra byuí' né  
be laadu pabiá' bisieche tu  
laabe. Gudxi be laadu pabiá'  
napa tu gana gu'ya tu naa, ne  
pabiá' ucaná ladxidó' to pur  
ni guca que, ne pabiá' riree  
tu favor stinne', ne jma rusi  
bieche ora gunna nga.

<sup>8</sup> Ora biiya ucaná tu chupa  
chonna gubidxa ra bicaa  
gui'chi que lú tu, rabe pa  
ñanna qué nucaa ni. Peru  
ma cadi cayeeda di malaya  
naa.

<sup>9</sup> Ma cayeche', cadi partí  
bininá ni laatu, sínueque partí  
biquiíñe ni para bixelete tu de  
ni cadi jneza. Ucaná tu modo  
na Dios ne zacá qué nuniti tu  
gasti pur ni bini du.

<sup>10</sup> Partí ora racaná ladx-  
idó' binni modo na Dios la?  
rudxii lú ca neza ilá ca',  
ne qué reeda malaya laaca  
xiñee biyubi ca neza que.  
Peru ora acaná ladxidó' cabe  
modo racaná cani qué runi  
cre Dios la? zati cabe.

<sup>11</sup> Laguuya si pabiá' galán  
biree ni para laatu ra ucaná  
ladxidó' to modo na Dios,  
pabiá' ucuá ique tu guni tu ni  
jneza ti ihuinni nga ni cuyubi  
tu guni tu, pabiá' bidxiichi né  
tu laca laatu ne pabiá' bidxi-  
ibi tu, pabiá' gupa tu gana  
gu'ya tu naa, ne pabiá' biyubi  
tu usaba ná tu ni bichee que.  
De irá modo bisihuinni tu ma

gasti donda luguiá tu de ni cuze'te nu ri'.

<sup>12</sup> Cadi ni bichee si que cá ique ra bicaa gui'chi que lú tu, nin ni bichee né be que, sínunque jma bine ni para ului' Dios laatu pabiá' risaca du para laatu.

<sup>13</sup> Yanna ma nuu dxí ladxidó' do ne laca nabé cayeche du partí nayeche beeda Titu pur irá modo bisieche tu laa.

<sup>14</sup> Pa bidxiiba laatu nezalú be ante che be ra nuu tu la? cadi catuí lua ti bine ni, partí cásica dxandí irá ni huayabi du laatu la? zaqueca dxandí ni gudxe laabe que.

<sup>15</sup> Ne jma rusi ranaxhii be laatu ora rietenala'dxi be modo bizuuba tu diidxa' ne modo bichagalú tu laabe, qué ñaca tu nayá', ne bidxibi tu laabe.

<sup>16</sup> Cayeche partí ma nanna cadi naquiiñe chuaa xizaa pa zuni tu jneza.

## 8

### *Laudii ne gana*

<sup>1</sup> Hermanu ca', racala'dxi du güi né du laatu modo huayacané Dios ca hermanu ni nuu Macedonia.

<sup>2</sup> Necá huadi'di cabe ra nagana peru nayeche nuu cabe. Nga runi necá huaxié' napa cabe Peru huadii cabe de idubi ladxidó' cabe para acané cabe stobi.

<sup>3</sup> Cayabe ni laatu partí nanna dxandí ni. Bidii cabe de idubi ladxidó' cabe bia' gunda, ne dede ni qué gapa cabe bidii cabe.

<sup>4</sup> Nabé ucuá cabe lú du udí' du lugar acané cabe ca xcaadxi hermanu,

<sup>5</sup> ne cadi nga si, sínunque bi'ni ru cabe jma: nirudó' bidii cabe xpida cabe Señor, ne óraque bisaana cabe ni ladxi ná du, casi na Dios guni cabe.

<sup>6</sup> Yanna ma cayabi du Titu che ra nuu tu para unduuxe ni bizulú lade tu chiqué, acané laatu utopa tu ti ofrenda para ca xpinni Cristu ni caquiiñe'.

<sup>7</sup> De irá modo ma dxi'ba tu: runi cre tu Cristu de idubi ladxidó' to, ne ma nabé riene tu, ne nanna tu güi né tu ni stobi, ne runi tu xhiiña Dios ne stale gana, ne nadxii tu laadu. Yanna riaadxa si izidi tu acané tu ca xcaadxi xpinni Cristu.

<sup>8</sup> Cadi cayune mandar laatu guni tu ni, sínunque cuzeete ni bi'ni ca xcaadxi, ti ihuinni pa dxandí nadxii tu ca hermanu.

<sup>9</sup> Partí ma nanna tu pabiá' guca Jesucristu Señor stinu nacha'hui ne laanu. Necá stibe irá', Peru beda ganna be xii nga enda pobre partí nadxii be laatu, ne bi'ni be ni ti ganda icaa tu irá ni cayaadxa laatu.

<sup>10</sup> Naa rabe galán para laatu unduuxe tu ni bizulú tu udubiza que. Ne gana bizulú tu acané tu.

<sup>11</sup> Zacaca yanna launduuxe ni ne gana casi bizulú tu ni, ne lachinanda bia' napa tu.

<sup>12</sup> Pa udii binni de idubi ladxidó', ziula'dxi Dios ni bia' tiica laani. Nanna be pabiá' napa binni, ne qué zanaba be laa ni qué gapa.

<sup>13</sup> Cadi cayabe laatu udii tu

dede irá stitu stobi,

<sup>14</sup> sínunque para gapa tu bia'ca, bia'ca. Laga napa tu yanna la? laudii cani huaxié' napa, ne ora ma qué gapa tu ne napa cabe la? ma laacabe udii cabe laatu, ne zacá ziaana tu bia'ca.

<sup>15</sup> Casi cá ni lu Xqui'chi Dios: "Ni bitopa stale la? qué ñaana ru sti', ne ni bitopa huaxié' qué ñaadxa sti'."

<sup>16</sup> Diuxquixe Dios saca bisiaa Titu laatu, ne yanna ricá ique Titu acané laatu casi ricá ique laatu.

<sup>17</sup> De ndaani ladxidó' be biale che be ra nuu tu parti nadxii be laatu ne cadi parti si bisaana nia ni laabe.

<sup>18</sup> Chi use'nda né du laabe dxa hermanu ni nabé huay-acané ireeche stiidxa Dios que. Irá ca xpinni Cristu rudxiiba laa.

<sup>19</sup> Ne laaca ulí ca laabe chiné be laadu ra chi saana du ni ma bidopa. Cayuni du irá ni para usisaca du Señor ne ti ihuinni napa du gana acané du.

<sup>20</sup> Qué racala'dxi du ini' binni laadu runi bidxichi ni cutopa du ri'.

<sup>21</sup> Nga runi cuyubi du guni du irá ni jneza, cadi nezalú Señor si, sínunque ne nezalú binni.

<sup>22</sup> Laca cuse'nda né du Titu ne hermanu que sti hermanu. Huadu'ya du dxandí napa be gana guni be dxiiña ne jma rusi cá ique be ni yanna parti ma nanna be napa tu gana acané tu.

<sup>23</sup> Pa chu' tu inaba diidxa laatu tu naca Titu la? lagabi laaca huazá né be

naa, ne tobi si huayuni né be naa dxiiña ra ucané du laatu. Ne pa inaba diidxa cabe de xhupa hermanu que la? lagabi laacabe ca xpinni Cristu biseenda laaca ne dxandí rusicaca ca Cristu pur modo nabani ca'.

<sup>24</sup> Yanna lauluí' laacabe nadxii tu laacabe ti ganna irá ca xpinni Cristu ni, ti cadi na ca ruchee ra ruchaya enda naró' stitu.

## 9

<sup>1</sup> Nanna zacané tu ca xpinni Cristu sin ca ucaa guí'chi lú tu.

<sup>2</sup> Ma nanna qué raxha ique tu para guni tu ni. Nga runi rudxiiba laatu lade ca binni Macedonia. Gudxe laaca', laatu de udubiza bizulú tu cayacané tu. Ne ora gunna cabe cayuni tu ni la? ucané ni casi irá cabe para bilui'la'dxi cabe bi'ni cabe ni.

<sup>3</sup> Peru cuseenda ca hermanu ri ra nuu tu para quixhená ca laatu, ti ihuinni dxandí ni bizeete de laatu,

<sup>4</sup> quenquita chiné tuuxa de Macedonia naa ne pa gu'ya ca'ru iluxe utopa tu ni la? zatuí lua parti unié zuni tu ni, ne laatu jma rusi zatuí lú tu.

<sup>5</sup> Nga runi unaba ca hermanu ri che ca', parti modo ruuya ni la? ruluí' naquiiñe sa niru cabe lua' ti acané cabe laatu iluxe idopa ni ma uní' tu zudii tu. Pa ma nuu ni la? zahuinni cadi cudii tu ni parti canaba du ni laatu, sínunque de idubi ladxidó' to cayuni tu ni.

*Ni rudxiiba stale, ricaa stale*

<sup>6</sup> Laguietenala'dxi' ni rudxiiba huaxié' la? huaxié' ricaa, ne ni rudxiiba stale la? ricaa stale.

<sup>7</sup> Cada tobi udii bia' rul'i'la'dxi', ne cadi acaná ladxidó' ti ma bidii ni, nin udii ni purti canaba cabe ni laa, purti nadxii Dios ni rudii ni laa de idubi ladxidó'.

<sup>8</sup> Dios zanda utale ni napa tu, ti qué chu' dxi guiaadxa ni iquiiñe tu, ne gapa tu para acané tu lu irá xhiiña Dios ni cayaca.

<sup>9</sup> Casi cá ni lu Xqui'chi Dios: Rucheeche ná be ni napa be ne rudii be ni ca pobre.

Qué ziuu dxi guiaana be de aca be nacha'hui'.

<sup>10</sup> Dios rudii biidxi para udx'i'ba nu, ne endaró para idó' no, ne laca laa udii laatu ni iquiiñe tu para acané tu lu xhiiña', ti idale xpinni ra guni tu ni.

<sup>11</sup> Qué ziuu dxi guiaadxa laatu gasti ni iquiiñe para acané tu cani caquiiñe', ne zacá ra chi saana du ni udii tu ca la? zudii cabe diuxquixe Dios.

<sup>12</sup> Purti ora racané nu ca hermanu zacá la? riquiñe ni chupa modo. Tobi la? rapa ca ni caquiiñe ca', ne stobi la? stale binni rudii diuxquixe Dios.

<sup>13</sup> Pur ni chi guni tu ca, zahuinni cuzuuba tu stiidxa Cristu, ne ora gu'ya cabe ni la? zusisaca cabe Dios. Ne zudii cabe diuxquixe laa purti nabé ucané tu laacabe ne cadi laasi cabe, sínunque irá'.

<sup>14</sup> Ne zacá zanaxhii cabe laatu ne zani' né cabe Dios pur laatu purti ma bisihuinni tu enda nacha'hui sti Dios lu xpida tu.

<sup>15</sup> Diuxquixe Dios saca bidii Xiiñi pur laanu, de nin qué zanda idxela nu diidxa para iní nu pabiá' sicarú ni bi'ni be pur laanu.

## 10

*Naca Pablu xaique stícabe*

<sup>1</sup> Naa nga Pablu. Cayaca nacha'hui ne laatu ne canié nia laatu ne diidxa nadó' casi naca Cristu caní' né laatu. Nuu tu na ridxibe inié ora nuua lade tu. Ixele sia', óraque ru ma canié'.

<sup>2</sup> Peru gabe ca' laatu, laguni jneza ti cadi tinde nia laatu ora chaa ra nuu tu, purti qué zadxibe inié nia cani na cadi dxandí xhiiña Dios ndi canayune'.

<sup>3</sup> Necá binni guidxilayú laadu peru qué rucá' lú du casi rucaa lú binni guidxilayú.

<sup>4</sup> Purti ni riqui'ñe du para ucá' lú né du la? cadi casi ni riquiñe binni guidxilayú, sínunque nandxó' ni casi nandxó' Dios ni bidii cani laadu para uchiá né du inti-ica ni quixhe cabe para cadi chindá stiidxa Dios ra nuu cabe.

<sup>5</sup> Ruse'gu du ruaa cani riguiñe yu stiidxa Dios, cani raca nandxó' ne riguixhe xiixa para qué chu' tu gunibiá' Dios. Ruyubi du ucueeza du irá ni rini' ique binni guidxilayú, ti iní' ique ca ni na Cristu.

<sup>6</sup> Ne ora ma irá tu uní tu zuzuuba tu diidxa la? zusaba ná du de laatu ni qué guni ni.

<sup>7</sup> Laatu ruuya tu ni ri-huinni si. Pa nuu de laatu na ma xpinni Cristu laa la? ganna dxichi laca xpinni Cristu naa.

<sup>8</sup> Ne neca nabé ruzeete naca xaique stitu, peru qué rituí lua inié ni, partí bisaana Señor naa guuya inisi tu lu jneza, ne cadi para guutua ñee laatu.

<sup>9</sup> Cadi zácaxa tu cuchibe sia' laatu pur ni rucaa lu ca gui'chi ni ruseenda ra nuu tu.

<sup>10</sup> Nuu tu na ridinde nia laatu ne rinié naduxhu lu gui'chi ni rucaa lú tu, peru ora ma nuaa ra nuu tu ma qué rului' pa zanda gune xiixa, ne qué ganna inié'.

<sup>11</sup> Ganna ca cani caní' zacá, cásica ni rucaa lu gui'chi ora nuaa zitu de laatu la? zacaca zanié ora chaa ra nuu tu.

<sup>12</sup> Zitu zuhuaa lua uchaaga naa cani rudxiiba laca laa. Gasti xpiaani cabe. Laca laacabe riní' cabe pa jneza cayuni cabe ne qué ruyubi cabe xi na Dios, ne ruchaaga bia' saa cabe ni runi cabe.

<sup>13</sup> Laadu qué zuni du dxiiña ni qué niguixhe Dios guni du ne óraque udxi'ba du laadu ti bini du ni. Dios riguixhe ra guni du dxiiña', ne biseenda laadu dede ra nuu tu ndaani guidxi Corinto.

<sup>14</sup> Ne cadi cayú' du lú ni gudixhe Dios para stobi, partí nirudó' laadu yegüí du stiidxa Cristu lade tu.

<sup>15</sup> Qué rudxi'ba du laadu lu xhiiña stobi, sínunque ribeza

du idale fe stitu ti irooba xhiiña du lade tu sin tidi du bia' ra ma nexhe guni du dxiiña'.

<sup>16</sup> Ne óraque ma zanda chi güi du stiidxa Cristu ca xcaadxi guidxi ni nuu cherica de xquidxi tu, ra iruti ca'ru guni dxiiña', partí qué zudxi'ba du laadu lu xhiiña stobi.

<sup>17</sup> Casi cá lu Xqui'chi Dios: "Tu acala'dxi udxiiba laa la? iní' ni bi'ni Señor pur laa."

<sup>18</sup> Partí qué risaca ni rudxiiba laca laa, sínunque ni rudxiiba Señor laa, ngue nga risaca.

## 11

### *Caní cadi dxandí apóstol*

<sup>1</sup> Pa ñanda si qué nucueeza tu naa ninié caadxi ni rului' enda huati. Laudii lugar iní ni.

<sup>2</sup> Celoso naa ne laatu, casi celoso Dios ne laatu, partí napa laatu casi ti binni dx-aaa ni ma bidiee para ichaganá Cristu, ne racaladxe uchiña laatu ra nuu be nayá.

<sup>3</sup> Peru cadxibe chu' tu usiguii laatu casi bisiguii beenda que Eva, quite ique tu ne ma cadi chi nanda tu Cristu de idubi ladxitó' to.

<sup>4</sup> Partí ruuya rucaa diaga tu cani reda usiidi laatu stiidxa stobi, cadi stiidxa Jesús ni yegüí né du laatu chiqué. Ne oraqueca ricaa tu sti espíritu adxé para ni ma napa tu ca, ne runi cre tu adxé modo ilá tu.

<sup>5</sup> Zuluá' cadi jma huaxié' risaca' para ca xcaadxi ni zinanda tu ca, cani na apóstol laa.

<sup>6</sup> Necá huaxié' naa para inié', peru riene chaahue ni rusiide', ne hualué ni laatu lu irá ni huayune'.

<sup>7</sup> Ñee bichee ra byue nia laatu stiidxa Dios sin ñaxa la? Bine casi ñaca gasti nga naa para udxiba laatu.

<sup>8</sup> Casi ñaca ulana sti ca xcaadxi xpinni Cristu ra ucuua ni biseenda ca lua' para gunda bine dxiiña lade tu.

<sup>9</sup> Purti ca dxi nuua lade tu ne biaadxa xixa naa la? qué ninaba nin tobi de laatu ñacané naa, sínunque bedané ca hermanu de Macedonia ni caquiiñe', ne zacá qué nuguaya gasti laatu ne qué ziuu dxi gune ni.

<sup>10</sup> Napa stiidxa Cristu ndaani ladxiduá', ne zanda guni cre tu ni cayabe laatu ri'. Huayune dxiiña idubi Acaya sin gujaxa', ne iruti zanda gaxha naa enda nayeche ni rapa ora rune ni zacá.

<sup>11</sup> Xiñee na tu rinié zacá ya'. Ñee purti cadi nadxiee laatu la? Dios nanna pabiá' nadxiee laatu.

<sup>12</sup> Peru zune rua' casi cayune ri para useegua ruua cani ruyubi isaca purti runi dxiiña cásica rune'.

<sup>13</sup> Cadi dxandí apóstol laacabe. Canausiguii si cabe binni, rutiidi cabe laacabe pur apóstol sti Cristu.

<sup>14</sup> Cadi enda ridxagayaa nga purti binidxaba laca rutidi laa casi tobi ni zeeda de Dios.

<sup>15</sup> Zacaca runi ca xpinni be, ma na ca nacha'hui ca para guni cre binni laaca'. Peru

zadxiña dxi uquixe Dios ni laaca'.

<sup>16</sup> Chi tidxe laatu sti tiru, cadi gapa tu naa de ni nahuati. Peru pa na tu nahuate la? laudii lugar naa inié casi riní' ni nahuati, ti laca ganda udxiba naa caadxi.

<sup>17</sup> Rarí huaxa cadi Señor cayabi naa xi inié', sínunque canié huate sia' partí cudxiiba laca naa.

<sup>18</sup> Yáquexa stale tu rudxiiba laca laa pur ni runi ndaani guidxilayú la? naa laca zune ni.

<sup>19</sup> Laatu na tu nuu xpiaani tu, peru oraqueca rucaa diga tu cani caní' enda huati.

<sup>20</sup> Rudii tu lugar ucaa cabe laatu yaga, ne uxhii cabe laatu ne quite cabe laatu para gaxha cabe stitu, ne guni cabe menu laatu, ne capa cabe ruaa tu.

<sup>21</sup> Rituí lua gabe ni laatu, qué ñapa du valor ñuni du laatu zacá.

### *Irá ra huayacaná Pablo*

Peru pa nuu tu qué ridxibi udxiba laça laa la? naa laca qué zadxibe gune ni, necá inié casi riní' ni nahuati.

<sup>22</sup> Pa na cabe hebreu laa-cabe la? naa laca hebreu naa. Pa binni Israel laacabe la? naa laaca. Pa za cabe de Abraham la? naa laca zaya de Abraham.

<sup>23</sup> Pa na cabe runi cabe xhiiña Cristu la? naa jma rusi rune ni. Canié huate sia' rarí'. Huayune dxiiña jma que laacabe, huadiiñe jma que laacabe, huayeguayuaa jma que laacabe. Stale tiru

huayuaa naxoo, de yacadó' guuti cabe naa.

<sup>24</sup> Gaayu tiru udiñe ca judíu naa, cada tiru ne treinta y nueve chicotasu.

<sup>25</sup> Chonna tiru uluu cabe palu naa, ne bichá cabe guie naa ti tiru, ne chonna tiru biaazi barcu ra ziaa ne bixuba laahua lu nisadó' ti dxi ne ti queela'.

<sup>26</sup> Huazaya irá ladu, ne stale tiru huayuaa naxoo ra biree guiigu ne ra biree gubaana lua', ne lade binni xquidxe', ne lade cani cadi binni xquidxe', ndaani guidxi ne ndaani gui'xhi', ne lu nisadó'. Laca huayuaa naxoo lade cani na hermanu laa peru cadi dxandi'.

<sup>27</sup> Huayune dxiiña naná dede ra bidxaga', ne nabé huabee xcaanda', huayaana sin gahua', huayate nisa. Ne laca stale tiru gasti ni gahua', huayaca na'nda ne huayaana sin lari gacua'.

<sup>28</sup> Peru cadi nga si, sínunque nuu ru ni cuchiiña naa. Nuua xizaa pur irá cani ma bini cre Cristu irá ra huaya'. Riguaa xa ique laaca'.

<sup>29</sup> Ne pa nuu tobi qué ganda uzuhuaa chaahui', ñee na tu qué racaná ladriduá' casi ñaca naa cayaca ni la? O pa nuu tu cayuni pur guiaba stobi, ñee na tu qué rudu naa la?

<sup>30</sup> Peru pa naquiiñe uchaya enda naró' stinne la? zuzeete ni rusihuinni gasti qué zanda gune stube'.

<sup>31</sup> Dios, Bixhoze Jesucristu Señor stinu, ni qué ziuu dxi

guiaana dxí de isaca, nanna cadi cusiguiee'.

<sup>32</sup> Dxi nuua Damasco zuba ti gobernador ni bicuí rey Aretas, ne bizuhuaa gendarme ra puerta sti guidxi que para inaaze naa, useguyoo naa.

<sup>33</sup> Peru uluu ca hermanu naa ndaani ti dxumi su, undete ca naa ra ventana sti lindaa ni nuu guidxi que, ne zacá bila'ya de lu ná be.

## 12

*Irá ni biluí' Señor laabe*

<sup>1</sup> Qué zabee ndua' gasti udxiiba laca naa. Ni jma naquiiñe nga uzeete irá ni biluí' Señor naa ne ni biiya casi ñaca lu bacaanda'.

<sup>2</sup> Runebia'ya ti hombre ni runi cre Cristu, ma raca catorce aña undisa Dios laabe yené laabe ibá', peru qué ganna dia' pa ne cuerpu stibe uyé o pa sin cuerpu. Dios si nanna.

<sup>3</sup> Peru nanna uyé be, casi rabe laatu ca, pa ne cuerpu o pa espíritu si stibe nga qué ganna dia'. Dios si nanna.

<sup>4</sup> Peru biasa be uyé be, ne ni bina diaga be raqué la? iruti zanda iní' ni, ne cadi nexhe iní' binni ni.

<sup>5</sup> Ñanda nuchaya enda naró' stibe, peru qué zuchaya enda naró' stinne sin uzeete cani rusihuinni gasti qué zanda gune stube'.

<sup>6</sup> Neca pe ñacaladxe nudxiiba laca naa, qué niree ni enda huati partí dxandí ni. Peru qué rune ni, ti iruti udxiiba naa jma que bia' ruuya cabe naca ne bia' inié'.

<sup>7</sup> Nabé sicarú ni bilui' Dios naa ne ñanda ñabe naa risaca partí biiya irá ni. Peru para cadi gune ni, beeda ti yuuba lugua'ya casi ra ridaabi guichi. Biseenda binidxaba ni para guniná naa.

<sup>8</sup> Ma chonna tiru unaba lu Señor cuee ni de naa.

<sup>9</sup> Peru na rabi naa: "Naa nuua para acaníá lii, ne nga si caquiiñu". Partí jma ri-huinni enda nandxó' stinne ora cayaadxa stipa lii." Nga runi jma rieche ora huaxié' stipa napa', partí óraque jma rusi rihuinni enda nandxó' sti Cristu lugua'ya'.

<sup>10</sup> Ne nga ca runi rieche ora racana'ya pur Cristu ne ora rudxii deche cabe naa, ne ora qué gapa ni caquiiñe', ne ora riladxi cabe naa, ne ora nuua lu ni nagana, partí nanna ora riaadxa stipa naa la? jma rusi racané Cristu naa.

<sup>11</sup> Ma bidxiiba laca naa casi runi tobi ni nahuati, peru laatu biquinde tu naa gune ni. Laatu nga nudxiiba tu naa. Necá qué risaca gastí', peru qué risaca ni na apóstol laa que jma que naa, ne rusisaca sica tu laaca'.

<sup>12</sup> Bine dxiiña lade tu sin nixhacaladxe', ne bihuinni dxandí apóstol naa pur ca seña ne milagru ne dxiiña nandxó' ni biiya tu bine lade tu.

<sup>13</sup> Ti modo si qué ñune laatu casi bine ca xcaadxi xpinni Cristu: qué ñabe laatu ñacané tu naa. Laguni perdonar naa pa cadi jneza ni bine laatu ca.

*Ra cuzeete Pablu pabiá' nadxii laacabe*

<sup>14</sup> Ma ne ndi raguionna tiru chaa ra nuu tu. Peru laca qué zanaba acané tu naa partí cadi cuyube stitu sínueque laatu. Cadi naquiiñe utopa lú binni para bix-hoze ne jñaa, sínueque bix-hoze cabe ne jñaa cabe nga utopa lú para laacabe.

<sup>15</sup> Qué zia'ya unite irá ni napa pur laatu, dede nin xpida qué zia'ya para ganda acaníá laatu iniisi tu. Peru ruzuluá' sia' laga jma cayanaxhiee laatu la? jma huaxié' nadxii tu naa.

<sup>16</sup> Ruluí' nuu de laatu na bisiguiée laatu ne udxite sia' laatu, neca nanna ca' qué nudiee lugar ñua' tu naa.

<sup>17</sup> O na tu udxite laatu ra biseenda cani uyé ra nuu tu que la?

<sup>18</sup> Unié nia Titu chi ganna laatu, ne biseenda nia laa sti hermanu. Nee udxite si Titu laatu dxi uyé la? Nee cadi tobi si modo uzá du, ne cadi iropa du bini du dxiiña de idubi ladxidó' do lade tu la?

<sup>19</sup> Zándaca ma na tu cuyubi si du guiana du bien ne laatu. Peru cadi zacá di ni, sínueque caní du nezalú Dios ni na Cristu iní du. Ne cayuni du ni, hermanu ni nadxiee ca', para acané du laatu.

<sup>20</sup> Partí cadxibe chindaya cadi cayuni tu casi ñuuladxe ñuni tu. Ne zaqueca zándaca qué chu'la'dxi tu modo chaa ra nuu tu. Cadxibe gueda ndaya laatu nuu dinde tu, cada tobi qué na tidi stobi lú, cadxiichi tu, cada tobi

cuyubi para laa si, caní' saa tu, cayaani ná saa tu, cada tobi cudxiiba laca laa, ne cadi cayuni tu cultu jneza.

<sup>21</sup> Ne laca cadxibe guni laatu gueda usituí Dios stinne lua ne guuna ora guuya nuu caadxi de laatu ni huachee dede ma xadxí, ne ca'ru inaba perdón, ca'ru usaana enda rapa jnadxxii ne irá ni cadi jneza ni riula'dxi xcuerpu.

## 13

*Ra culidxe Pablu laacabe*

<sup>1</sup> Ma ne ndi raguionna tiru chi ganna laatu, ne ora ma nuua ra nuu tu pa gueda nduu tobi xqueja stobi la? gabe ca' laatu, qué zaguixhe chaahue ni cayaca lade tu pa qué iní' chupa o chonaa dxandí ni.

<sup>2</sup> Dxi yeganna laatu rairopa tiru que, gudxe irá tu, casi cani bichee chiquez zaqueca ca xcaadxi, pa guenda ra nuu tu sti tiru la? ma qué zutiide dia' ni zacá si. Ne yanna laga ca'ru chaa', cayabe ni laatu sti tiru.

<sup>3</sup> Ne ora ma nuua ra nuu tu, zuuya dxichi tu dxandí Cristu rusiní' naa. Nga nga racala'dxi tu ganna tu. Ne Cristu la? qué ridxbi laatu, sínunque rusihuinni enda nandxó' sti lade tu.

<sup>4</sup> Necá bisaana be enda nandxó' stibe para ucuá be lu cruz, peru yanna ma nabani be pur enda nandxó' sti Dios. Zaqueca uca du lade tu, ruluí' gasti nga laadu, peru laca zabani du pur enda

nandxó' sti Dios, purti nuu né du laabe tobi si, ti ganda acané du laatu.

<sup>5</sup> Laguuya chaahui ximodo nuu tu, pa zuhuua chaahui tu lu ni runi cre tu. Laguuya chaahui laca laatu. Ñee qué ganna tu pa ma nuu Cristu ndaani ladxidó' to, pa dxandí mā runi cre tu laa la?

<sup>6</sup> Ne rabe zudii tu cuenta dxandí xpinni Cristu laadu.

<sup>7</sup> Rinaba du lu Dios cadi uchee tu, cadi purti si racala'dxi du udxiba binni laadu, sínunque racala'dxi du de laatu guiale guni tu jneza, zaa naca udxiba tu laadu.

<sup>8</sup> Purti qué zanda ucá' lú du cani cayuni jneza, sínunque ziú' né du laaca tobi si.

<sup>9</sup> Nga runi zieche du pa cayuni tu jneza, necá ma qué isaca du para laatu. Ne qué ziaana dxí du de iní né du Dios ti ganda ibani pe tu modo na.

<sup>10</sup> Cucaa ca' gui'chi ri lú tu ti ma qué gapa xidé tinde nia laatu ora chaa ra nuu tu. Purti bisaana Señor naa guuya inisi tu lu jneza ne cadi para guutua ñee laatu.

<sup>11</sup> Yanna sicarú guiaana tu, hermanu ca'. Lauyubi guni tu jneza ne guieche tu, ne lauyubi chu' tu tobi si sin chu' dinde tu. Nadxxii Dios laatu, ne zaguixhe dxí ladxidó' to, ne ziuu lade tu.

<sup>12</sup> Laugapa diuxi saa ne laquidxi saa.

<sup>13</sup> Irá ca xpinni Cristu cuseenda stiuxi tu.

<sup>14</sup> Señor Jesucristu cu' ndaaya laatu, ne laganna nadxxii Dios laatu ne nuu né Espíritu Santu irá tu. Amén.

# GUI'CHI BICAA SAN PABLULU CA XPINNI CRISTU NI NUU GALACIA

<sup>1</sup> Naa nga Pablu, apóstol sti Jesucristu. Cadi binni ulí naa ne cadi binni biseenda naa, sínunque Jesucristu biseenda naa, laa ne Bixhoze ni bisibani laa de lade gue'tu'.

<sup>2</sup> Naa ne ca hermanu ni nuu né naa rari' cucá' du gui'chi ri lú tu, xpinni Cristu ca', irá tu casi nuu tu Galacia.

<sup>3</sup> Dios Bixhoze nu ne Jesucristu Señor stinu cu' ndaaya laatu ne quixhe dxí ladxidó' to.

<sup>4</sup> Jesucristu bidii xpida para gudixe irá stonda nu ti ganda ilá nu de irá ni nadxaba ni nuu ndaani guidxilayú ri', casi na Dios Bixhoze nu guni be ni.

<sup>5</sup> Qué chu' dxi guiaana dxí de isaca be. Amén.

*Tobi si modo rilá binni*

<sup>6</sup> Nabé cadxagayaa pabiá' nagueenda caxele tu de Dios. Laa nda bichiña laatu ra nuu, ra uca Cristu nacha'hui ne laanu. Ne yanna ma adxé modo cayuni cre tu ilá tu.

<sup>7</sup> Peru gasti ru modo ilá nu. Caguite si cabe laatu nga, ne racala'dxi cabe utiixhi cabe stiidxa Cristu.

<sup>8</sup> Tutiica güi né laatu sti modo ilá tu, cadi casi ni ma byuí né du laatu ca la? dí nuu, tutiica naca, neca pa naa pia' o ti ángel ni guiete de ibá'.

<sup>9</sup> Maca gudxe ni laatu ti tiru, ne yanna chi tidxe ni laatu sti tiru. Pa chu' tu güi né laatu sti modo ilá tu ne cadi casi ni ma biziidi tu ca la? dí nuu ngue.

<sup>10</sup> Xi na tu yanna. Ñee cuyube guiaana bien ne binni la? o cuyube guiaana bien ne Dios. Ñee ruyube gune ni chu'la'dxi binni la? Pa ñaca nuyube ñune ni chu'la'dxi binni la? ma cadi xhiña Cristu cayune'.

*Modo bizulú byuí' Pablu stiidxa Cristu*

<sup>11</sup> Peru racaladxe guiene tu, hermanu ca', cadi de binni di zeeda evangeliu ni byue nia laatu ca.

<sup>12</sup> Purti ninla qué nicaa ni de binni la? ne ninla qué niziide ni de binni, sínunque Jesucristu biluí' ni naa.

<sup>13</sup> Ma nanna tu modo uzaya dxi yenanda ni runi cre ca judíu. Uzaya nanda ca xpinni Cristu, cani ulí Dios. Qué lica ña'ya laaca', dede ucaladxe nuniteluá' laaca'.

<sup>14</sup> Ne laca ma bina diaga tu pabiá' udide lú stale binni xquidxe ni bia'ca naa purti jma yenanda ni runi cre ca judíu ne jma ucuá ique gune irá ni bi'ni ca bixhoze gola du.

<sup>15</sup> Dede dxi ca'ru gale maca ulí Dios naa ne ulee chu naa pur enda nacha'hui sti'. Ne dxi ma uyula'dxi be gunebia'ya Xiiñi be la?

<sup>16</sup> biluí' be laa naa para chi güe stiidxa lade cani cadi judíu. Peru qué nuyube nusidi binni naa.

<sup>17</sup> Qué ñaa ra nuu ca apóstol ni nuu ndaani guidxi Jerusalén, cani maca naca apóstol chiqué, sínunque uyaa Arabia. De raqué bigueta Damasco sti tiru.

<sup>18</sup> Bindaa chonna iza para uyaa Jerusalén. Dxi que ru binebia'ya Pedru, ne biaana nia laa quince dia.

<sup>19</sup> Ne laca biiya Jacobo bi'chi Señor. Nin ru sti apóstol qué ñuuya'.

<sup>20</sup> Cadi canié sia' irá ni cucaa lú tu ri', sínunque nanna Dios dxandí ni.

<sup>21</sup> De raqué biree uyaa Siria ne Cilicia.

<sup>22</sup> Peru ca'ru gunibiá' ca xpinni Cristu ni nuu Judea naa chiqué.

<sup>23</sup> Bina diaga si cabe na binni: "Dxa ni uzá nanda laanu chiqué, ni ucalá'dxi nunitilú ni runi cre nu que, yanna ma ne laa canayuí'ni."

<sup>24</sup> Ne bidii cabe diuxquixe Dios partí ma bine cre.

## 2

### *Pablu ne xcaadxi apóstol*

<sup>1</sup> Lu sti catorce añu bigueta Jerusalén, naa ne Bernabé, ne yeniá Titu.

<sup>2</sup> Uyaa partí bilui' Dios naa chaa', ne raqué unié nia ca xaíque sti ca xpinni Cristu, naa sia' ne laaca'. Bisiene laaca xi canayué lade cani cadi judíu ti gu'ya ca jneza ni, pacaa qué zaquiiñe dxiiña ni ma bine ne ni cayune'.

<sup>3</sup> Nuu né Titu laadu raqué, Peru qué nucaa cabe laa ñaca circuncidar, neca cadi judíu laa.

<sup>4</sup> Peru uyuu caadxi hombre lade du na, aca circuncidar be. Na ca hermanu laaca', peru cadi dxandi'. Qué nuluí' ca tu naca ca', para gunda biuu ca lade du. Beda undaachi si ca ximodo nabani du yanna ra ma cadi cá du yaga lu ná ley, ra ma nuu né du Cristu tobi si. Ucalá'dxi ca nucaa ca laadu yaga sti tiru.

<sup>5</sup> Peru qué nudí' du lugar ñaca ni na ca', nin ti ratu huiini', purti racala'dxi du guiaana né tu ni dxandí evangeliu sti Cristu.

<sup>6</sup> Gasti nacubi qué ñabi cani nuu de xaíque sti ca xpinni Cristu naa, Ne qué rulabe tu naca cabe, purti nezalú Dios bia'ca risaca tobi risaca stobi.

<sup>7</sup> Qué ñabi cabe naa gasti sínunque biene cabe gudixhe Dios naa para güe stiidxa Cristu lade cani cadi judíu, cásica gudixhe be Pedru chi güi ni lade ca judíu.

<sup>8</sup> Purti ni gudixhe ca gaca Pedru apóstol lade ca judíu la? ngue ca gudixhe naa gaca apóstol lade cani cadi judíu.

<sup>9</sup> Naca Jacobo ne Pedru ne Juan xaíque lade ca xpinni Cristu ni nuu Jerusalén. Ne ora biene ca dxandí nuu né Dios naa la? bidii ná ca laadu, naa ne Bernabé, casi ti seña ma nuu né ca laadu tobi si, ti laadu chuu du ra nuu cani cadi judíu, ne laaca che ca ra nuu ca judíu.

<sup>10</sup> Ni unaba si cabe laadu la? acané du ca pobre, ne maca cá ique uyube guna nga de idubi ladxiduá'.

*Ra gudinde né Pablo Pedru*

<sup>11</sup> Peru dxi bedandá Pedru ndaani guidxi Antioquía la? udinde nia laa. Gudxe laabe cadi jneza bi'ni be, ne dxandí bichee be.

<sup>12</sup> Purti dxi ca'ru quedandá ca hermanu judíu ni biseenda Jacobo la? gudó né be ca hermanu ni cadi judíu tobi si. Peru beeda si ca hermanu que, bixebe de cani cadi judíu ne ma qué ño né ru be laaca', purti bidxibi be cani beeda que, cani na naquiiñe gaca circuncidar ca xippli Cristu.

<sup>13</sup> Ne yenanda ca xcaadxi hermanu judíu ni nuu raqué ni bi'ni be, neca nanna ca cadi jneza ni. Dede Bernabé yenanda laacabe.

<sup>14</sup> Peru ora biiya cadi cudxii lú cabe guni cabe jneza casi na stiidxa Cristu la? rabe Pedru nezalú irá cani nuu raqué: "Neca judíu lii peru cadi zinanda lu irá ni runi ca judíu, sínunque nabani lu casi nabani cani cadi judíu. Yanna xiñee cayabi lu cani cadi judíu naquiiñe ibani ca casi nabani ca judíu."

### *Pur fe si rilá binni*

<sup>15</sup> Hermanu de Galacia ca', laadu judíu laadu dede dxi gule du, ne qué ñuu dxi nibani du sin ley sti Dios casi nabani cani cadi judíu.

<sup>16</sup> Peru ra beda ganna du iruti zuxhá Dios stonda purti si guni ni na ley sínunque ra guni cre Jesucristu la? laadu laca bini cre du para bixá stonda du. Peru bixá ni purti

bi'ni cre du laabe ne cadi purti runi du ni na ley. Iruti qué zaxá stonda pur guni ni na ley.

<sup>17</sup> Yanna, pa cuyubi du ixá stonda du ra guni cre du Cristu la? rihuinni laca binni ruchee laadu, casi cani cadi judíu. Ñee zabi du Cristu bi'ni ni laadu la? Qué ziuu dxi.

<sup>18</sup> Peru pa ñaca ñabe binni qué zanda ixá stonda ca purti si guni ca ni na ley, ne óraque nucaa laaca ñuni ca irá ni na ni la? óraque huaxa nuchee'.

<sup>19</sup> Purti ma gute para ley. Laape ni biiti ni naa ti ma ibane para Dios.

<sup>20</sup> Ne naa gute ra guti Cristu lu cruz. Ma cadi naa dia' ndi nabane', ma Cristu nabani lugua'ya', ne modo nabane yanna ri la? nabane ni purti rune cre Xiiñi Dios ni nadxii naa ne bidii xpida pur naa.

<sup>21</sup> Qué rucaa naya ni cudii Dios laadu para ilá du, purti pa ñaca rixá stonda binni ra guni ni na ley la? pur gana si beda gati Cristu.

## 3

### *Qué rulá ley binni*

<sup>1</sup> Aque nahuati tu xa, hermanu de Galacia ca'. Tu udxite laatu para iree chu tu de ni dxandi'. Modo bisiá du stiidxa du ra byuí du stiidxa Cristu lade tu la? casi ñaca biiya dxichi tu ra cá be lu cruz.

<sup>2</sup> Lagabi naa, ñee ucuaa tu Espíritu Santu purti bi'ni tu ni

na ley la? o purti bini cre tu ni bina diaga tu.

<sup>3</sup> Ñee dede racá ridxiña tu de nahuati tu la? Bizulú tu enda nabani cubi ni napa tu ca ra ucuaa tu Espíritu Santu. Yanna xiñee cuyubi tu unduuxé tu stubi si tu.

<sup>4</sup> Ñee pur gana si udi'di tu irá ni ma udi'di tu ca la? Tila ucané ni laatu biene tu xcaadxi.

<sup>5</sup> Dios ruchá ladxidó' to de Espíritu Santu ne rusihuinni enda nandxó' sti lade tu. Ñee na tu runi be ni purti zinanda tu ley la? Cadi pur nga di', sínunque runi be ni purti runi cre tu stiidxa be ni bina diaga tu.

<sup>6</sup> Abraham laca bini cre ni gudxi Dios laa, ne zacá bixhá Dios stonda.

<sup>7</sup> Nga runi, laganna dxichi irá cani runi cre la? ca ngue nga xiiñi Abraham.

<sup>8</sup> Lu Xqui'chi Dios rihuinni maca uni' Dios dede chiqué zaxá stonda cani cadi judíu ra guni cre. Ne uni' be ni ra gudxi be Abraham ca diidxa sicarú ri', na be rabi be laa: "Pur lii zaguaa ndaaya idubi naca guidxilayú."

<sup>9</sup> Racá ridu'ya nu, uluu Dios ndaaya Abraham purti bini cre, ne pa guni cre nu casi bini cre be que la? ne laanu ziu' nu ndaaya ni uyuu be que.

<sup>10</sup> Maca cá lu Xqui'chi Dios: "Dí nuu irá cani qué guni irá xixé ni na ley." Nga runi, dí nuu cani cuyubi llá ra guni ni na ley, purti iruti zanda guni irá ni na ni sin uchée.

<sup>11</sup> Rihuinni dxichi qué zaxá stonda binni nezalú Dios tisi guni ni na ley. Purti sicari cá lu Xqui'chi Dios: "Ni ma bixá stonda ra bini cre la? zabani."

<sup>12</sup> Qué riete gasti de enda runi cre lu ley, sínunque na ni: "Ni acala'dxi ibani xa'na ley la? napa xidé guni irá xixé ni na ni."

<sup>13</sup> Chiqué uyuu dí sti Dios luguiá irá nu purti qué ñanda ñuni nu irá ni na ley, pero yanna ma bilá Cristu laanu de laani. Laa ucuaa ni jlugar nu ra guti lu cruz. Purti cá ni lu Xqui'chi Dios: "Dí nuu irá ni icá lu cruz."

<sup>14</sup> Ne pur ni bi'ni Cristu que, ma zanda icaa cani cadi judíu irá ni bidii stiidxa Dios Abraham zudii laa, ne laca ma irá nu zanda icaa nu Espíritu Santu ni bidii stiidxa Dios useenda ra nuu cani guni cre.

*Qué zanda uchiá ley ni uni' Dios*

<sup>15</sup> Hermanu ca', chi tixhe ti ejemplu de binni guidxilayú. Ora udii stiidxa tuuxa stobi, ne icá ni lú gui'chi ne iropa ca guni firmar ca la? iruti zanda uchiá ni, nin cu' ru xcaadxi diidxa lú ni.

<sup>16</sup> Yanna, bidii stiidxa Dios Abraham zaguu ndaaya laa ne xiiñi' ne ni za de familia sti'. Qué ñabi di be laa, "ca xiiñi'", sínunque bizeete be tobi si, ne ngue nga Cristu.

<sup>17</sup> Ndi nga ni cayabe laatu: Bidii stiidxa Dios ulá Abraham ra guni cre, ne casi ñaca bini firmar ni. Nga runi qué zanda uchiá ley ni ma uni' be

que, purti maca uní' be ni dxi ca'rú gata ley, ne udi'di ru tapa gayuaa treinta iza para beda gata ley.

<sup>18</sup> Ne pa ñanda nilá nu ra ñuni nu ni na ley que la? ma qué nilá nu modo bilá Abraham ra bini cre ni gudxi Dios laa.

<sup>19</sup> Yanna xi para nuu ley ya'. Nirudó' bidii stiidxa Dios Abraham. Oraque ru gudixhe ley para ihuinni ruchee binni. Gudixhe gá be ni laga si gueeda dxa ni za de Abraham, ni bizeete be dxi bidii stiidxa be laa que. Ne dxi bidii be ley la? bidii be ni ca ángel para udii ca ni Moisés. De laa ma udii ni ca xcaadxi.

<sup>20</sup> Peru dxi bidii stiidxa be ulá be binni la? sin Moisés ne ca ángel, sínunque laasi be bi'ni be ni.

### *Xiñee gu'ta ley*

<sup>21</sup> Xi na tu, ñee nuu dinde né ley sti Moisés ni bidii stiidxa Dios guni que la? Qué ziuu dxi. Nuu xi pur gudixhe Dios ley, peru qué zanda ilá binni pur laani. Purti pa ñuu xiixa ley ni ñanda nudii enda nabani ni qué zaluxe la? ne nga si nixá stonda cani ñuni ni na ni.

<sup>22</sup> Peru lu Xqui'chi Dios na: "Irá xixé binni bichee ne qué zanda iree de lu ná enda ruchee que." Nga runi gudixhe Dios icaa nu enda nabani que ra guni cre nu Cristu.

<sup>23</sup> Dxi ca'rú gueeda Cristu la? casi ñaca nuseguyoo ley que laanu, laga idxiña dxi

ulu' Dios laanu ximodo ilá nu ra guni cre nu laabe.

<sup>24</sup> Ne irá ca dxi que gupa ley que laanu, ne bilu' laanu xi guni nu, casi rapa cabe ba'du ora zeda niisi. Peru dxi ma beeda Cristu la? bini cre nu laa, para bixhá Dios stonda nu.

<sup>25</sup> Ne ma cadi cayapa ley que laanu, purti ma runi cre nu Cristu. Ma cadi naquiiñe chu' tu gapa laanu.

<sup>26</sup> Yanna ma xiiñi Dios laatu purti ma runi cre tu Cristu Jesús ne nuu né tu laa tobi si.

<sup>27</sup> Irá ni ma uyuu nisa purti ma Xpinni Cristu laa la? nuu né Cristu tobi si.

<sup>28</sup> Ne zacá ma tobi si laanu. Ma cadi adxé judíu ne ni cadi judíu, ne ma cadi adxé mozo ne xpixuaana', ne cadi jma risaca hombre que guanaa, sínunque ma tobi si irá nu purti ma nuu né nu Cristu Jesús tobi si.

<sup>29</sup> Ne pa ma naca nu xpinni Cristu la? dxandí za nu de Abraham, ne zacaa né nu laa ni bidii stiidxa Dios udii laa que.

## 4

<sup>1</sup> Chi tixhe ti ejemplu de ni canié ri'. Ora nahuiini ti ba'du ni chi guiaana né irá sti bixhoze la? qué zanda di iní' xi gaca ni, purti laga nahuiini ru be, nuu be casi ñuu ti mozo, neca stibe irá ni.

<sup>2</sup> Napa ru be tu cayuya laabe ne cayuni mandar laabe, laabe ne stibe, dede dxi idxiña dxi ma gudixhe bixhoze be icaa be ni.

<sup>3</sup> Zacaca uca binni dxi ca'ru queeda Cristu. Uyuu ca casi ba'du purti ucuá ru ca yaga lu irá ni na binni guidxilayú.

<sup>4</sup> Peru gunda dxi gudixhe Dios useenda Xiiñi'. Gule be de ti gunaa ne biniisi be xa'na ley sti ca judíu.

<sup>5</sup> Biseenda Dios laabe beda ulá be laanu de lu ná ley que ti iccaa laanu casi xiiñi'.

<sup>6</sup> Ne para ihuinni ma xiiñi laanu la? uluu Espíritu sti Xiiñi ndaanii ladxidó' no. Ne Espíritu que rabi laanu gabi nu laabe Bixhoze nu.

<sup>7</sup> Nga runi ma cadi mozo stibe laanu, sínunque ma bi'ní be laanu xiiñi be, ne pa xiiñi be laanu la? zacaa nu ni udii be ca xiiñi be.

*Nuu Pablu xizaa pur ca xpinni Cristu ni nuu Galacia*

<sup>8</sup> Dxi ca'ru gunibiá' tu Dios la? ucuá tu yaga lu ná ni cadi dxandí Dios.

<sup>9</sup> Peru yanna ma beda gunibiá' tu Dios, o gabi nu ma beda gunibiá' be laatu la? ximodo zanda ibigueta chi nanda tu ni na binni guidxilayú guni tu ya'. Rului' racala'dxi tu icá tu yaga lu ná ni sti tiru. Qué iquiiñe ni ne qué zanda acané ni laatu.

<sup>10</sup> De yanna rapa tu laní ne ca beeú ni na tu jma nandxó', ne zaqueca ca dxi ne ca iza.

<sup>11</sup> Cadxibe nia laatu, quenquita pur gana si bine dxiiña lade tu.

<sup>12</sup> Hermanu ca', rinaba laatu guni tu casi bine', purti naa beda gaca casi binni laatu, ma cadi casi judíu.

Cadi cayabe laatu huachee né tu naa.

<sup>13</sup> Laaca tu nanna tu huara'ya dxi bizuluá' byue nia laatu stiidxa Cristu. Nga runi biaana lade tu.

<sup>14</sup> Necá huara'ya chiqué, qué nudxii deche tu naa, ne qué nibixhila'dxi tu enda huará stinne que, sínunque bichagalú tu naa casi nuchagalú tu ti ángel biseenda Dios, ne casi ñuni tu Cristu Jesús.

<sup>15</sup> Uná irá enda nayeche ni gupa né tu naa que pue. Purti nanna dxi'che pa ñanda si dede guielú tu ñaxha tu nudii tu naa chiqué.

<sup>16</sup> Nee bisaana tu de ganaxhii tu naa purti si gudxe laatu ni dxandí la?

<sup>17</sup> Nuu tu ruyubi laatu, peru cadi para acané laatu, sínunque para uxhale si laatu de laadu ne de ni bisi'di du laatu, ti chi nanda tu laaca'.

<sup>18</sup> Galán pa uyubi cabe stobi peru pa para acané cabe laa. Nga ca riuladxe', ne cadi ora si nuua nia laatu.

<sup>19</sup> Xiiñe ca', pur laatu caya-cana'ya sti tiru. Nuua nia ti yuuba casi ti gunaa ora chi gapa ba'du', ne ziaana yuuba ri ndaanii ladxiduá' dede ora ma usihuinni tu cayuni mandar Cristu ndaanii ladxidó' to.

<sup>20</sup> Nacaladxe ñuua nia laatu yanna ca, ti ñue nia laatu diidxa', ne ma qué nucaa irá ni cucaa ri', purti qué idxela xi gune nia laatu.

*Ejemplu sti Agar ne Sara*

<sup>21</sup> Lagabi naa, cani racala'dxi ibani xa'na ley.

Ñee qué huayuna diaga tu xi na Xqui'chi Dios la?

<sup>22</sup> Riete ra gupa Abraham chupa xiiñi'. Tobi la? xiiñi xcriada ne stobi que, xiiñi xheela'.

<sup>23</sup> Ni gupa criada que gule casi rale tutiisi badu huiini', peru stobi que gule purti bidii stiidxa Dios gale.

<sup>24</sup> Nuu nga casi ti ejemplu. Iropa gunaa que zeda gaca casi iropa modo gudixhe Dios chu' né binni laa tobi si. Tobi que nga casi ra bidii be ley lu dani Sinaí, ne nga nga gabi nu Agar. Cani za de Agar que la? puru binni runi mandar laaca'.

<sup>25</sup> Zanda usaca nu laaca cani nabani xa'na ley ni bidii Dios Moisés lu dani Sinaí ni nuu Arabia que, ne nga nga ca binni Jerusalén purti de yanna cá ca yaga lu ná ley que.

<sup>26</sup> Peru nuu sti Jerusalén ibá', sti ca xpinni Cristu, cani ma cadi cá yaga lu ná ley, ne lade binni Jerusalén cubi que ziupa nu.

<sup>27</sup> Sicarí cá lu Xqui'chi Dios: Lii, gunaa ni qué ñanda ñapa ba'du', bieche'.

Biccaa ridxi de enda nayeche', lii ni qué huayuu dxi ganna xii nga xhiuba ba'du', purti jma stale xiiñi gunaa ni bisaana xheela laa, que xiiñi gunaa ni nabeza né xheela'.

<sup>28</sup> Hermanu ca', laanu naca nu casi Isaac ni gule purti bidii stiidxa Dios gale que.

<sup>29</sup> Ne casi uzabi nanda xiiñi criada que xiiñi xheela pe Abraham la? zaqueca cayaca

yanna. Rizabi nanda cani nabani xa'na ley ca xpinni Cristu.

<sup>30</sup> Peru xi na Xqui'chi Dios ya'. Cá ra gudxi Dios Abraham iladxi criada que, purti qué zanda icaa xiiñi criada ni chi caa xiiñi xpixuaana'.

<sup>31</sup> Ne laanu la? hermanu ca', zeda gaca nu casi xiiñi xheela pe Abraham ne cadi casi xiiñi criada que.

## 5

### *Lauzuhuaa dxichi'*

<sup>1</sup> Ma cadi cá nu yaga, purti ma undadi Cristu laanu. Yanna lauzuhuaa dxichi ti cadi ibigueta icá tu yaga.

<sup>2</sup> Naa nga Pablu, ne cayabe laatu pa gaca circuncidar tu la? ma iruti raca tu Cristu.

<sup>3</sup> Sti tiru chi tidxe laatu, irá hombre ni gaca circuncidar la? napa xidé guni irá ni na ley.

<sup>4</sup> Pa nuu de laatu cuyubi uxhá Dios stonda ra guni ni na ley la? ma bixele de Cristu ne ma biccaa ná ni cudii Dios laanu para ilá nu.

<sup>5</sup> Purti laanu dede dxi bini cre nu Cristu ma nuu né Espíritu Santu laanu, ne nga runi nanna nu zuxhá Dios stonda nu.

<sup>6</sup> Ne pa ma xpinni Cristu laanu la? tobi si rudii ni pa uca circuncidar nu o pa co'. Ni risaca nga guni cre nu. Ne pa dxandí runi cre nu, zahuinni ni ra ganaxhii ni binni.

<sup>7</sup> Laatu bizulú tu jneza, yenanda tu ni dxandi'. Yanna tu bicueeza laatu de chi nanda tu ni.

<sup>8</sup> Ni cá ique tu yanna ca la? cadí zeeda ni de Dios ni uní né laatu para chi nanda tu laa.

<sup>9</sup> Cadi guiaanda laatu ni na cabe que: "Ne caadxi si levadura riasa idubi naca cuba pan."

<sup>10</sup> Peru nanna dxi'che qué zabi'xhi pe tu, purti nuu né nu Señor tobi si. Ne laca nanna zusaba ná Dios cani cuchiiña laatu ca, tutiica naca.

<sup>11</sup> Hermanu ca', pa ñaca canausiide naquiiñe gaca circuncidar binni la? ma qué nizabi nanda cabe naa, casi runi cabe ora rue nia laacabe naquiiñe guni cre cabe guti Cristu lu cruz para ilá cabe.

<sup>12</sup> Ne cani cuchiiña laatu ca, cani cayabi laatu gaca circuncidar tu, ugá tu lu xcuerpu tu la? ñacaladxe nugá cabe idubi naca cabe tobi si tiru.

<sup>13</sup> Hermanu ca', cadí uni' né Dios laatu para icá tu yaga, peru xi si la? cadí pur nga guni tu intiica na ique tu, sínunque laganaxhii stobi ne lagacané laa.

<sup>14</sup> Pa guni tu ni na ca diidxa ri la? zuni tu irá ni na Dios: "Gunaxhii stobi cásica nadxii lu lii."

<sup>15</sup> Peru pa caya'sa saa tu ne nisi cayaani ná saa tu la? laguuya gá qué utililú saa tu laatu.

### *Adxé ni na Espíritu Santu para ni na binni*

<sup>16</sup> Ndi nga ni cayabe laatu: Lasá modo rusidi Espíritu Santu laatu, ne óraque ma qué zinanda tu ni na ique tu.

<sup>17</sup> Purti adxé ni na Espíritu Santu guni tu ne adxé ni na ique tu, ne zacá nudinde cani, ne iropa cani caguba yu cani laatu. Nga runi qué zanda guni tu ni racala'dxi tu.

<sup>18</sup> Peru pa cayuni tu ni na Espíritu la? ma cadi nuu tu xa'na ley.

<sup>19</sup> Rihuinni dxichi irá ni runi cani zinanda ni na ique: riuu né ni cadi xheela', ricá ique ni nadxaba', ne nisi nga si ruyubi guni.

<sup>20</sup> Rusisaca bidó' ne runi brujería. Raca nanala'dxi stobi ne ruyubi diidxa', ne rapa envidia, ne ruyubi para laa si. Gasti si aca' maca cadxiichi, ne ruyubi xpinni.

<sup>21</sup> Rizabila'dxi sti stobi, ne ruuti binni. Rixudxi, ne rizá gueela', ne cadi nga si, sínunque runi ru jma ni cadi jneza. Laguuya gá laatu, purti qué ziuu cani runi irá nga ra runi mandar Dios. Maca huayabe ni laatu ne ma cayabe ni laatu sti tiru.

<sup>22</sup> Peru cani zinanda ni na Espíritu Santu la? nadxii binni ne nayeche nuu, ne nuu dxí ladxidó'. Qué rixhacala'dxi stobi, ne qué runiná binni, ne nacha'hui'. Qué zaree chu de neza sti Dios,

<sup>23</sup> ne nadó', ne rapa xpia'. Pa chi nanda nu irá nga la? qué zuché' né nu nin ti ley.

<sup>24</sup> Ora ma xpinni Cristu laanu la? ma qué rinanda nu irá ni uyula'dxi nu chiqué, purti ma guti irá nga para laanu, ma cadi nabani nu modo na ique nu.

<sup>25</sup> Yáquexa ma napa nu enda nabani ni rudii Espíritu Santu la? chi nanda nu Espíritu que.

<sup>26</sup> Cadi galán udxiba nu laca laanu, pacaa zuchiichi saa nu. Ne cadi chu' envidia lade nu.

## 6

### Gacané saa nu

<sup>1</sup> Hermanu ca', pa gu'ya tu cuchee tobi de laatu la? laatu, cani zinanda Espíritu Santu, laulidxe laabe ne diidxa nadó'. Ne laca laguuya gá laatu, purti laca zanda chu' ni uquiinde laatu, ne guiaba tu.

<sup>2</sup> Pa nuu tu cadi'di ra nagana la? lagacané laa, ne zacá zuni tu ni gudixhe Cristu guni nu.

<sup>3</sup> Pa nuu tu na naca tuuxa ne iruti naca la? cusiguii laca laa.

<sup>4</sup> Cada tobi gu'ya chaahui ni cayuni, ne pa nanna jneza ni cayuni la? zieche né ni, ne qué zazaala'dxi ni cayuni stobi,

<sup>5</sup> purti cada tobi zua' donda stí'.

<sup>6</sup> Irá ni caziidi stiidxa Dios la? naquiiñe acané ni cusiidi laa.

<sup>7</sup> Cadi quite tu laca laatu, zácxaxa tu zanda quite tu Dios. Iruti qué zanda quite laabe, purti irá ni udxiba binni, ngue ca cuee.

<sup>8</sup> Tu uyubi guni ni na ique la? zanitilú, peru tu uyubi ni na Espíritu Santu la? zudii Espíritu Santu laa enda nabani ni qué zaluxe.

<sup>9</sup> Nga runi cadi iré' nu gana de guni nu jneza purti zadxiña dxi iree ndu ni bini nu, pa qué cui sa nu atrá.

<sup>10</sup> Ora tiica ganda acané nu binni la? guni nu ni, peru jma pe naquiiñe guni nu ni lade ca hermanu.

### Ni risaca nezalú Dios

<sup>11</sup> Laguuya', de naya cucaa ca letra ro' ri'.

<sup>12</sup> Cani racala'dxi ucaa laatu gaca circuncidar tu la? cayuni ca ni para usisaca binni laaca', ne para cadi chu' tu sabi nanda laaca casi rizabi nanda cabe cani rigüí né binni guti Cristu lu cruz para ulá binni.

<sup>13</sup> Purti nin cani raca circuncidar qué runi ni na ley. Racala'dxi ca gaca circuncidar tu ti ganda isaca ca ra icá tu seña ca lu xcuerpu tu, purti zacá ma cayuni tu ni na ca'.

<sup>14</sup> Naa la? qué zudxiiba laca naa pa cadi pur ni bi'ní Cristu pur naa ra guti lu cruz. Purti ra guti be lu cruz que la? guti guidxilayú para naa, ne naa gute para laa.

<sup>15</sup> Ni nuu né Cristu tobi si la? tobi si rudii ni pa uca circuncidar o pa qué ñaca, purti cadi nga ni risaca nezalú Dios, sínuque ni risaca nga uchaa Dios laanu.

<sup>16</sup> Pa zacá ziuu nu la? zata dxí ladxidó' no, ne zallasela'dxi Dios laanu, laanu ne irá cani dxandí xpinni.

<sup>17</sup> Ma cadi ucaa lú ru tu ni bisiide laatu, purti nabé ma ucana'ya lu xhiiña Cristu, ne ca pesu ni cá lade ri'

rusihuinni dxandí xhiiña be  
cayune'.

<sup>18</sup> Jesucristu Señor stinu  
cu' ndaaya laatu, hermanu  
stinne ca'. Amén.

# GUI'CHI BICAA SAN PABLULU CA XPINNI CRISTU NI NUU EFESO

<sup>1</sup> Naa nga Pablul. Naca apóstol sti Jesucristu partí gudixhe Dios gaca ni. Cucaa gui'chi ri lú tu, hermanu ca', casi nuu tu ndaani guidxi Efeso. Ma xpinni Dios laatu partí ma runi cre tu Cristu Jesús.

<sup>2</sup> Dios Bixhoze nu ne Señor Jesucristu cu' ndaaya laatu ne quixhe dxí ladxidó' to.

*Modo uca Dios nacha'hui ne laanu*

<sup>3</sup> Nabé sicarú ni rudii Dios Bixhoze Jesucristu laanu de ibá'. Ma nuu ndaaya stibe luguiá nu partí nuu né nu Cristu tobi si. Nga runi udí' nu diuxquixe laabe.

<sup>4</sup> Dede dxi ca'rú cha guidxilayú, maca ulí be laanu para gaca nu xiiñi be. Ne gudixhe be gaca ni ra chu' né nu Cristu tobi si. Ne zacá ma qué zudxiiba be donda ique nu, sínunque zusiá be ladxidó' no.

<sup>5</sup> Nadxii be laanu, nga runi dede chique maca gudixhe be gueeda Cristu para uchiña laanu ra nuu be ti gaca nu xiiñi be. Ne gudixhe be ni zacá partí zacá gucala'dxi be gaca ni.

<sup>6</sup> Nga runi cadi guiaana dxí nu de usisaca nu laabe pur modo guca be nacha'hui ne laanu, ne pur irá ni bidii be

laanu ra uca né nu Xiiñi be ni nadxii be tobi si.

<sup>7</sup> Nabé nadxii be laanu, nga runi guti Xiiñi be para bilá laanu, ne bisiá laanu de irá ni huaché' nu.

<sup>8-9</sup> Ne bisihuinni be pabiá' nadxii be laanu ra bixhele be xquenda biaani nu ti ganna nu irá ni gudixhe be gaca', ne guiene nu ni qué ñene binni chique.

<sup>10</sup> Ne ndi nga ni gudixhe be gaca': chu' irá ni nuu ibá' ne irá ni nuu ndaani guidxilayú tobi si, ne gaca Cristu xaíque sti irá xixé. Ne zaca ni, ganda si xhi ni.

<sup>11</sup> Irá ni ma gudixhe be gaca la? runi be casi racala'dxi be. Ne dede chique gulí be laanu para chu' né nu Cristu tobi si, ne para icaa né nu irá ca xpinni be ni chi udii be laaca'.

<sup>12</sup> Nirudo' laadu bini cre du Cristu, ne gudixhe Dios laadu para usihuinni du enda nandxo' sti', ti usisaca binni laa.

<sup>13</sup> Laatu laca bini cre tu ra bina diaga tu ca diidxa ni dxandi', ca diidxa sicarú ni bisiene laatu ximodo ilá tu. Ne ra bini cre tu Cristu, uluu Dios Espíritu Santu ndaani ladxidó' to casi ti seña ma xpinni laatu. Purti maca uní zudii laabe cani guni cre.

<sup>14</sup> Ne Espíritu que nga rusiene laanu dxandi' zacaa nu irá ni ma bidii stiidxa Dios udii ca xpinni, dxi nexhe icaa ca ni. Usisaca nu Dios pur enda nandxo' sti'.

*Canaba Pablu usiene Dios cani ma runi cre*

<sup>15</sup> Nga runi dede dxi gunna ma runi cre tu Señor, ne

pabiá' nadxii tu irá ca xpinni  
Dios la?

<sup>16</sup> qué huayaana dxie de  
udiee diuxquixe Dios pur  
laatu, ne cada inié nia laabe  
ruzeete laatu lú be.

<sup>17</sup> Rinaba usiene Espíritu  
stibe laatu ximodo laabe, ti  
gunibiá' chaahui tu laabe.  
Laabe nga Dios sti Jesucristu  
Señor stinu, ne laabe nga Bix-  
hoze nu ni nandxo'.

<sup>18</sup> Ne laca rinaba lú be ux-  
hele be xquenda biaani tu  
ti guiene tu pabiá' galán ne  
pabiá' risaca ni nexhe udii be  
irá ca xpinni be.

<sup>19</sup> Ne rinaba laabe usiene  
be laatu pabiá' nandxo' be  
para acané be laanu, cani  
runi cre nu laabe. Enda  
nandxo' ri ca nga bisihuinni  
be

<sup>20</sup> ra undisa be Cristu de  
lade gue'tu', ne bicuí be laa  
cue' be ibá'.

<sup>21</sup> Bi'ni be laa xaíque sti irá  
canni runi mandar, ne irá cani  
risaca, ne irá cani nandxo',  
ne tutiica ni zanda uze'te nu.  
Cristu nga xaíque sti irá xixé  
ni ma nuu, ne irá xixé ni  
gueeda ru'.

<sup>22</sup> Gudixhe Dios irá xixé  
ni xañee be, ne bi'ni laabe  
xaíque sti ca xpinni be.

<sup>23</sup> Ca xpinni be zeda gaca  
casi cuerpu stibe, ne laabe  
nga ique ni. Pa sin laabe  
gasti nga ca xpinni be partu  
laabe nga xaíque stica', ne  
laabe naaze be irá xixé.

## 2

Bilá Dios laanu partu  
nadxii laanu

<sup>1</sup> Chiqué guca tu casi gue'tu  
para Dios, partu nisi bichee  
tu ne bi'ni tu ni cadi jneza.

<sup>2</sup> Yenanda tu ni na binni  
guidxilayú ne bi'ni tu ni  
na xaíque sti ca binidxaba',  
partu laa nga runi dxiiña  
ndaani ladxitdó' cani qué na  
uzuuba stiidxa Dios.

<sup>3</sup> Irá nu bibani nu zacá  
chiqué, bini nu ni gupa nu  
gana, bini nu irá ni na ique  
nu ne ni na xquenda biaani  
nu. Ne pur irá nga uyuu  
xiana sti Dios luguiá nu, casi  
nuu ni luguiá ca xcaadxi  
yanna.

<sup>4</sup> Peru nabé bilasela'dxi  
Dios laanu partu nadxii  
laanu.

<sup>5</sup> Nga runi ra bisibani  
Cristu, casi ñaca ne laanu  
bisibani, partu chiqué gupa  
laanu casi gue'tu pur irá ni  
biché' nu. Peru ma bilá nu  
partu nacha'hui be ne laanu.

<sup>6</sup> Ne laca ra bisibani be  
Cristu Jesús la? casi ñaca  
bisibani be ne laanu para cui  
né nu laa ibá'.

<sup>7</sup> Ne bi'ni be ni zacá para  
usihuinni be stobi dxi pabiá'  
nadxii be laanu ne pabiá'  
nacha'hui be ne laanu ra ma  
naca né nu Cristu Jesús tobi  
si.

<sup>8</sup> Pur enda nacha'hui stibe  
bilá be laatu, ne bi'ni be ni  
partu bini cre tu, ne cadi pur  
xiixa ni bi'ni tu, sínuque de  
laabe zeeda ni.

<sup>9</sup> Iruti qué zalá pur ni guni,  
ti qué chu' tu udxiiiba laca  
laa.

<sup>10</sup> Laabe bizá' be laanu  
chiqué, ne yanna casi ñaca  
ma bi'ni be laanu nacubi ra  
uca né nu Cristu Jesús tobi si,  
para ganda guni nu ni jneza

casi gudixhe be guni nu.

*Naca nu tobi si pur Cristu*

<sup>11</sup> Laguietenala'dxi ni guca tu chiqué. Cadi judíu laatu, purti qué ñale tu lade cani ulí Dios dede chiqué, ne qué gapa tu seña sti circuncisión casi napa ca', ne laaca zácxaxa ca qué ñuu dxi ñaca tu xpinni Dios.

<sup>12</sup> Ne dxi ca'ru chu' né tu Cristu tobi si la? laca qué ñuu né tu ca judíu tobi si. Nin qué ñanna tu ximodo beda gaca ca xpinni Dios, nin xi bidii stiidxa guni para laaca'. Uzá tu ndaani guidxilayú sin ñunibiá' tu Dios, ne qué nibeza tu gasti de laa.

<sup>13</sup> Zitu uyyu tu de laabe chiqué, peru yanna ma bichiña Cristu laatu ra nuu be, ra uca né tu laa tobi si, purti guti, bixhii rini sti pur laatu.

<sup>14</sup> Ne laca laa gudixhe dxí lu enda ridinde sti ca judíu ne cani cadi judíu, ne bi'ni laacabe tobi si ra ulee enda ridinde que lade cabe. Casi ñaca uyyu ti lindaa galahui de laacabe chiqué purti guca nanala'dxi saa cabe, peru ma bixhá be lindaa que.

<sup>15</sup> Ra guti be lu cruz la? raqué bixhá be ley ra zeeda irá ni naquiiñe guni ca judíu. Zacá nga gudixhe dxí be lu enda ridinde sti ca judíu ne cani cadi judíu, purti irá ca uca né ca laabe tobi si.

<sup>16</sup> Ne laca ra guti be lu cruz la? raqué gudixhe dxí be enda ridinde sti iropa guidxi que, ne bi'ni be laaca tobi si,

ne bichiña be laaca ra nuu Dios.

<sup>17</sup> Dxi beeda be byuí' né be irá binni diidxa de enda nayeche ni rucueza lu enda ridinde. Byuí' né be ni cani uyyu gaxha de Dios, ca judíu, ne laca byuí' né be ni laatu neca uyyu tu zitu de Dios chiqué.

<sup>18</sup> Ne yanna pur ni bi'ni be, ma irá xixé nu randa ridxiña nu ra nuu Dios, cásica ca judíu zaqueca cani cadi judíu, purti tobi si Espíritu Santu napa nu ndaani ladxidó' no.

<sup>19</sup> Chiqué guca tu casi cani nabeza xquidxi binni, peru yanna ma co', purti ma naca tu binni xquidxi ca xpinni Dios, ne ma binni lidxi Dios laatu.

<sup>20</sup> Zeda gaca tu casi ti yoo ni cabí lu cimientu undaa ca apóstol ne ca profeta. Ne Jesucristu nga ni naaze yoo que.

<sup>21</sup> Laabe naaze be ni, nga runi cabí chaahui ni, caya'ta chaahui ca guie stini, ne carrooba ni, dede idxiña dxi gaca ni ti yu'du ro' ni maca ulee chu be para Dios.

<sup>22</sup> Ne laatu, hermanu ca', ra uca né tu Cristu tobi si, laca uca né tu irá ca xpinni tobi si, casi ñaca irá xixé nu naca nu ti yoo ra nabeza Espíritu sti Dios.

### 3

*Gudixhe Dios Pablu chi güi  
stiidxa lade cani cadi judíu*

<sup>1</sup> Qué riaana dxie de inié nia Dios pur laatu. Naa nga Pablu, ne yeguayuua yanna

ri purti byue nia laatu stiidxa Cristu.

<sup>2</sup> Zuluá' ma nanna tu modo guca Dios nacha'hui ne naa, gudixhe naa güe nia laatu stiidxa Cristu.

<sup>3</sup> Bilui' naa ni iruti ñanna chiqué, bisiene pe naa de laani. Ma ru bizeete ni lu gui'chi ri'.

<sup>4</sup> Ne ora gu'nda tu ni la? zanna tu dxandí riene stiidxa Cristu ni iruti ñanna chiqué.

<sup>5</sup> Chiqué qué nusiene Dios ni iruti', peru yanna ma bisiene ni ca apóstol sti' ne ca xcaadxi ni rui' stiidxa'. Espíritu stibe bisiene ni laadu.

<sup>6</sup> Ndi nga ni bilui' be laadu: ma cadi ca judíu si chi icaa ni bidii stiidxa be udii be ca xpinni be, sínunque né cani cadi judíu, ra guni cre ca stiidxa Cristu. Ne ma tobi si laaca ne ca judíu ni ma bini cre, ne tobi si zacaa né ca ca judíu ni ma bidii stiidxa Dios udii cani guni cre Cristu Jesús.

<sup>7</sup> Qué risaca dia', peru gulí Dios naa güe stiidxa', purti guca nacha'hui ne naa. Ne zanda gune ni purti nuu né enda nandxó' stibe naa.

<sup>8</sup> Necá jma huaxié' risaca lade irá ca xpinni Dios, peru gudixhe naa chiniá ca diidxa de enda nayeche lade tu, cani cadi judíu, para güe nia laatu pabiá' risaca ni napa Cristu para laanu.

<sup>9</sup> Ma xadxí gudixhe Dios ni bizá' irá xixé ni nuu, xi chi guni yanna, peru qué nului' be ni binni. Yanna

ma gudixhe be ni ladxi naya para güe ni.

<sup>10</sup> Gupa be ni chiqué ti usihuinni be ni luguiá ca xpinni Cristu yanna para gu'ya cani nandxó' ne irá cani risaca ibá' pabiá' jneza irá ni riguixhe be gaca'.

<sup>11</sup> Dede dxi ca'ru cha guidxilayú maca gudixhe be guseenda be Señor Jesucristu, ne yanna ma guca ni gudixhe be que.

<sup>12</sup> Laanu ma guca né nu Cristu tobi si ra bini cre nu laa, nga runi ma zanda idxiña nu ra nuu Dios sin idixibi nu.

<sup>13</sup> Hermanu ca', cadi chu' tu triste ti cayacana'ya pur laatu, sínunque laguieche purti zacá rihuinni pabiá' risaca tu.

### *Naro'ba amor ni napa Cristu para laanu*

<sup>14</sup> Ora rietenaladxe irá ni gudixhe Dios ne ni ma bi'ní la? ruzuxi'be xa ñee. Laa nga Bixhoze Jesucristu Señor stinu.

<sup>15</sup> Ne de laabe za irá xixé, clásica cani nuu ibá' zaqueca cani nuu ndaani guidxilayú.

<sup>16</sup> Qué gapa enda nandxó' stibe paraa iluxe, ne rinaba laabe udii Espíritu stibe laatu de lú ni, bia' caquiiñe tu para uzuhua chaahui tu.

<sup>17</sup> Rinaba laabe acané be laatu guni cre chaahui tu, ti ganda cueza pe Cristu ndaani ladxitdó' to, ne icaa xcu xpida tu lu amor sti', ti qué lica iniibi tu.

<sup>18</sup> Rinaba lu Dios gusiene laatu ne irá ca xpinni pabiá' naro'ba amor ni napa Cristu

para laanu. Zeda aca ni casi xiixa ni nabé nalaga, ne ziula', ne guete', ne nasoo.

<sup>19</sup> Rinaba ganda guiene tu pabiá' nadxii be laanu, neca nanna iruti qué zanda guiene chaahui pe pabiá' ni. Peru rinaba lu Dios gusiene laatu xcaadxi ti idxá tipa ladxidó' to de irá ni naca.

<sup>20</sup> Yanna, gusisaca nu Dios ni nandxó'. Laa zanda guni jma que bia' iní ique nu inaba nu laa. Ne rihuinni enda nandxó' stibe ca luguiá nu.

<sup>21</sup> Qué chu' dxi guiaana dxí binni de usisaca laabe pur enda nandxó' stibe ni bihuinni luguiá ca xpinni be ra bilá Cristu laaca'. Amén.

## 4

*Tobi si naca xpinni Cristu*

<sup>1</sup> Yeguayuaa partí rune xhiña Señor. Yáquexa ma ulí Dios laatu para gaca tu xpinni la? rinaba laatu sa tu jneza.

<sup>2</sup> Cadi udxiba tu laca laatu, sínunque lagaca nadó', ne cadi casi ze tu idxiichi né tu stobi. Lagacané saa ti ihuinni nadxii saa tu.

<sup>3</sup> Ma bi'ni Espíritu Santu laatu tobi si. Nga runi cadi chu' dinde tu, ti cadi ilaa saa tu.

<sup>4</sup> Ti cuerpu si napa Cristu, ne nga nga ca xpinni, ne tobi si Espíritu nuu, ne laca tobi si ni chi udii Dios irá nu.

<sup>5</sup> Tobi si Señor nuu, ne tobi si ni runi cre nu, ne tobi si xi pur riuu nisa irá binni.

<sup>6</sup> Laca tobi si Dios nuu, ne laa nga Bixhoze irá nu, ne riquiñe laanu para guni nu

xhijiña', ne nuu ndaani ladxidó' no.

<sup>7</sup> Peru cada tobi nu napa nu dxiiña ni zanda guni nu, bia' gracia bidii Cristu laanu.

<sup>8</sup> Casi cá lu Xqui'chi Dios: Dxi biasa be ze be ibá' la? gudixhe dxí be cani bicaa lú laabe, ne bidii be gracia binni para guni xhijiña be.

<sup>9</sup> Xi rini' ni ra na ni "biasa be ze be ibá'" ya'. Rini' ni nirudó' biete be ndaani guidxilayú.

<sup>10</sup> Ne ni biete que ca nga ni gudxi'ba', para cadi guiaana tobi si lugar, sínunque chu' irá ladu.

<sup>11</sup> Gudixhe be caadxi xpinni be para gaca apóstol, ne xcaadxi para güi né binni ni ului' Dios laa, ne xcaadxi para sa né stiidxa Cristu, gabi binni ximodo ilá, ne xcaadxi para gaca pastor, ne xcaadxi para gaca maistru.

<sup>12</sup> Bidii be dxiiña que laaca para acané ca ca xcaadxi hermanu izidi guni xhiña Dios, ti uzuhuaa chaahui irá xixé xpinni be.

<sup>13</sup> Ne zuni cabe dxiiña que, dede ora ma gaca nu tobi si lu ni runi cre nu, ne gunibiá' chaahui nu Xiiñi Dios. Zacá zaniisi nu lu stiidxa Cristu dede idxiña dxi gaca nu casi laa.

<sup>14</sup> Ne ma qué zinanda nu intiica nacubi ni canausidi binni, casi runi xcuidi, ti dxi rarí sti dxi rarica'. Qué zinanda nu ni riguixhe binni nexhená para cuee chu laanu de ni jneza,

<sup>15</sup> sínunque zinanda nu ni dxandi', ne zanaxhii saa nu,

ti jma rusi gaca né nu Cristu tobi si. Laa nga xaíque stinu.

<sup>16</sup> Laanu zeda aca nu casi cuerpu stibe, ne ma gudixhe chaahui be laanu casi nexhe chaahui irá ndaa lu ti cuerpu, ne bi'ni be laanu tobi si, casi gui'di cada ndaa lu ti cuerpu, para cadi iree cue' nu. Pa jneza cayuni cada ndaa de ti cuerpu dxiiña la? jneza zaniisi binni que. Zaueca laanu, pa cada tobi nu guni nu dxiiña ni gcuua nu la? ze dxi jma rusi ziuzuuhuá' chaahui nu ne ziyanaxhii saa nu.

*Naquiiñe usihuinni xpinni  
Cristu nacubi xpida*

<sup>17</sup> Yanna chi tidxe laatu xiixa, casi ñaca Señor cayabi ni laatu: ma cadi ibani tu casi nabani cani qué runibiá' Dios, partí nabani ca casi na ique ca', ne abati zaquiiñe ni laaca',

<sup>18</sup> ne nacahui xquenda biaani ca'. Qué gapa ca enda nabani ni rudii Dios, partí naguidxi ladxidó' ca ne qué na ca guiene ca'.

<sup>19</sup> Qué rituí lú ca guni ca intiica ni na ique ca', ne irá ni nadxaba', dede bia' gapa ca gana.

<sup>20</sup> Peru laatu la? cadi nga di nga biziidi tu ra biziidi tu stiidxa Cristu.

<sup>21</sup> Pa dxandí stiidxa be bina diaga tu ne biziidi tu ni zeeda de laabe la?

<sup>22</sup> ma cadi ucaa ique tu ni ucuá ique tu chiqué, partí udxite si ni laatu bi'ni tu ni cadi jneza.

<sup>23</sup> Ma naquiiñe usihuinni tu ma nacubi tu dede ndaani

ladxidó' to ne idubi xquenda biaani tu.

<sup>24</sup> Naquiiñe ibani tu modo naguixhe Dios ne usihuinni tu dxandí ma adxé laatu yanna, partí ma nayá xpida tu ne runi tu ni jneza.

<sup>25</sup> Nga runi lausaana de usiguii tu, ne ora güi tu diidxa lainí' ni dxandí', partí irá nu ma naca né nu Cristu tobi si.

<sup>26</sup> Ne pa idxiichi tu la? cadi udii tu lugar guiaazi gubidxa cadxiichi ru tu, sínunque lauyubi tidi ni nagueenda. Pacaa zuchee tu.

<sup>27</sup> Cadi udii tu lugar aca xcustu binidxaba'.

<sup>28</sup> Ni uca gubaana la? ma cadi cuana', sínunque ma iquiiñe ná para guni dxiiña jneza, ti ganda gapa xiixa para acané cani qué gapa gastí'.

<sup>29</sup> Cadi iní' tu diidxa ni guniná stobi, sínunque lainí' diidxa jneza ni zanda acané stobi uzuhuua chaahui', ne ni acané tutiica guna diaga ni iní' tu.

<sup>30</sup> Ne cadi guniná tu Espíritu sti Dios, partí uluu Dios laabe ndaani ladxidó' to ti ihuinni ma sti laatu. Ne ziaana né be laatu dede dxi gueda caa Cristu ca xpinni.

<sup>31</sup> Lausaana de aca nanala'dxi tu binni, ne de idxiichi né tu laaca', ne de chu' tu xiana, ne de guni char tu tuuxa o cu' dí tu laa. Lausaana de uyubi tu izaaca stobi xiixa.

<sup>32</sup> Ni guni tu la? lagaca nacha'hui ne stobi, ne lailasela'dxi saa. Laguni perdonar saa casi bini perdonar

Dios laatu ra guca né tu  
Cristu tobi si.

## 5

*Modo naquiiñe ibani  
xpinni Cristu*

<sup>1</sup> Ma xiiñi Dios laatu ne nadxii laatu. Yanna lau-caala'dxi gaca tu casi laa.

<sup>2</sup> Intiica guni tu lausihuinni nadxii saa tu casi nadxii Cristu laanu. Gunax-hii be laanu dede uná be bisiga'de be xpida be Dios para biaxa stonda nu. Ne uyula'dxi Dios ni bi'ni be que dede guca ni casi ti xho'naxhi para laa.

<sup>3</sup> Yáquexa ma xpinni Dios laatu la? ma cadi lica guiete enda rapa jnadxii lade tu, nin guni tu gasti ru ni nadxaba', nin uyubi tu gapa tu xiixa para laasi tu.

<sup>4</sup> Cadi usituí tu lú stobi pur ni iní tu, ne cadi iní tu diidxa guidxa nin diidxa huati, sínunque laudii diuxquixe Dios.

<sup>5</sup> Ma nanna tu, nin tobi de cani riuu né ni cadi xheela', nin cani runi ru ni nadxaba', nin cani ruyubi gapa para laasi, qué ziuu ra runi mandar Cristu ne Dios. Purti ni ruyubi gapa para laasi la? rusisaca ni nuu ndaani guidxilayú ne ma qué rusisaca Dios.

<sup>6</sup> Cadi udii tu lugar chu'tu quite laatu, gabi laatu zaa guni tu irá nga. Cadi ucaa diaga tu laaca', purti nuu xiana sti Dios luguiá irá cani qué nauzuuba stiidxa'.

<sup>7</sup> Cadi chu' né tu laacabe tobi si lu enda ruchee sticabe ca.

<sup>8</sup> Chiqué la? casi ñaca uyuu tu ra nacahui, peru yanna ma nuu tu ra naya'ni', purti ma nuu né tu Cristu tobi si. Yanna, lasá casi naquiiñe sa cani ma nuu ra naya'ni'.

<sup>9</sup> Purti pa canazá tu ra naya'ni la? zaca tu nacha'hui', ne zuni tu ni jneza, ne qué zusiguii tu.

<sup>10</sup> Lauyubi ganna tu xii nga riula'dxi Señor.

<sup>11</sup> Cadi idxaaga tu cani canayuni ni cadi jneza, purti casi ñaca canazá ca lu guelacahui, sínunque lasá jneza ti ului' tu laacabe cuchee cabe.

<sup>12</sup> Purti dede nituí lua nuzeete ni runi cabe ra naga'chi'.

<sup>13</sup> Peru pa chu' cabe ra naya'ni la? zuuya cabe xi naca ni cayuni cabe. Purti ma bizaani biaani sti Cristu laacabe.

<sup>14</sup> Casi cá ni lú Xqui'chi Dios:

Bibani, lii ni nisiaasi'.

Biasa de lade gue'tu',

ne zuzaani Cristu lii.

<sup>15</sup> Yanna, laguuya chaahui ximodo sa tu, cadi casi cani qué riene, sínunque casi cani nuu xpiaani'.

<sup>16</sup> Laguni ni iree ndu laga zanda, purti nabé cayuni binni ni cadi jneza ca dxi ri'.

<sup>17</sup> Nga runi, cadi aca huati tu, sínunque lauyubi ganna tu xi na Señor.

<sup>18</sup> Cadi xhudxi tu, purti zuntilú ni laatu, sínunque laudii lugar idxá ladxidó' to de Espíritu Santu.

<sup>19</sup> Ora cayuí' tu diidxa la? lauzeete ni cá lu ca salmo, ne lu ca cantu, ne lu ca himno ni ruunda né tu Dios. Laguunda ne lausisaca Señor de idubi ladxidó' to.

<sup>20</sup> Cadi guiaana dxí tu de udii tu diuxquixe Dios Bixhoze nu saca irá ni rudii laanu partí xpinni Jesucristu laanu.

*Modo ibani né binni xheela ne xiñi'*

<sup>21</sup> Cada tobi de laatu guni ni chu'la'dxi stobi, partí ridxbi tu Dios.

<sup>22</sup> Ne laatu, ca gunaa ni ma bichaganá', lauzuuba stiidxa xheela tu casi ruzuuba tu stiidxa Señor.

<sup>23</sup> Partí xheela tu nga xaíque stitu, casi naca Cristu xaíque sti ca xpinni. Laa bilá laacabe, ne yanna ma naca cabe cuerpu sti'.

<sup>24</sup> Ne cásica ruzuuba ca xpinni be stiidxa be la? zacaca naquiiñe uzuuba tu stiidxa xheela tu de intiica.

<sup>25</sup> Ne laatu, ca hombre ni ma bichaganá', laganaxhii xheela tu cásica gunaxhii Cristu ca xpinni, dede bidii xpida pur laaca'.

<sup>26</sup> Ne zacá ulee chu laacabe de ni nadxaba', ne bisiá ladxidó' cabe ra uyuu nisa cabe, partí bini cre cabe stiidxa'.

<sup>27</sup> Ne zadxiña dxi uchiña laacabe ra nuu, ma bia ladxidó' cabe, ma gasti donda luguiá cabe, casi ti lari ni nayá guie' ni qué gapa nin ti guisi huiini ra nacuuxhu', nin tindaa ra cadi galán.

<sup>28</sup> Laca naquiiñe ganaxhii hombre xheela casi nadxii

cuerpu sti'. Ni nadxii xheela la? nadxii laca laa.

<sup>29</sup> Partí iruti raca nanala'dxi cuerpu sti', sínunque ruyaana ni ne ranaxhii ni. Ne zacaca runi Cristu ca xpinni.

<sup>30</sup> Zeda gaca ca xpinni be casi cuerpu stibe. Cada tobi de laanu naca nu tindaa, casi beela stibe ne dxita stibe.

<sup>31</sup> Sicarí na lu Xqui'chi Dios: "Zusaana hombre bixhoze ne jñaa para ichaganá xheela', ne neca chupa cabe peru zaca cabe tobi si."

<sup>32</sup> Rusiidi ca diidxa ca laanu xiixa ni risaca, neca nagana guiene nu ni, partí rabe ruzeete ni modo nuu né Cristu ca xpinni tobi si.

<sup>33</sup> Peru laca rusiidi ni naquiiñe ganaxhii hombre xheela casi nadxii laca laa, ne irá gunaa guni ni na xheela'.

## 6

<sup>1</sup> Ba'du ca', lauzuuba stiidxa bixhoze tu ne jñaa tu, partí nga nga jneza guni ca xpinni Cristu.

<sup>2</sup> Lade ca mandamiento zeeda tobi na: "Bizuuba stiidxa bixho'zo ne jñoou." Ne nga nga primé mandamiento ra riete xi icaa nu pa guni nu ni na ni.

<sup>3</sup> Partí na ni pa guni nu zacá la? zabani nu nayeche', ne zabani nu xadixí ndaani guidxilayú ri'.

<sup>4</sup> Hermanu ca', cadi guni tu xiixa para uchiichi si tu xiñi tu, sínunque lausidi laacabe ne laulidxe laacabe. Lausiniisi laacabe modo na Señor.

*Modo guni xpinni Cristu  
xhiiña binni*

<sup>5</sup> Ne laatu, cani cayuni xhiiña binni, lauzuuba stiidxa xpixuaana tu. Laidxibi laaca', ne laguni dxiiña de idubi ladxidó' to, casi ñaca xhiiña Cristu cayuni tu.

<sup>6</sup> Laguni dxiiña cadi ora si cayuuya cabe, para guiaana tu bien ne laacabe, sínunque laguni ni na Dios de idubi ladxidó' to, partí xhiiña Cristu cayuni tu.

<sup>7</sup> Laguni xhiiña tu ne gana partí cadi xhiiña binni cayuni tu, sínunque xhiiña Señor.

<sup>8</sup> Partí ma nanna tu zaguixe Señor cada tobi bia' ni jneza guni, pa cayuni xhiiña binni o pa laca xhiiña cayuni.

<sup>9</sup> Zacaca laatu, hermanu ca', lagaca nacha'hui ne cani cayuni xhiiña tu sin uchibi tu laaca'. Laguietenala'dxi tobi si xpixuaana né tu laacabe. Ne laa nga Señor ni nuu ibá'. Ne bia'ca risaca tobi risaca stobi nezalú be.

*Lachuu listu casi soldadu*

<sup>10</sup> Yanna la? hermanu ca', lachuu né Señor tobi si, ti uzuhuua chaahui tu, partí nabé nandxo' be ne zacané be laatu.

<sup>11</sup> Casi nuu ni riquiñe soldadu para cadi usaba enemigu sti laa la? zacaca laiquiñe irá ni ma bidii Dios laatu para cadi usaba binidxaba laatu ne enda nexhená sti'.

<sup>12</sup> Partí cadi binni guidxilayú cadinde né nu, sínunque cadinde né nu ca xaíque sti ca binidxaba', ca espíritu ni

runi mandar ndaani guidxilayú cahui ri', ne irá ca espíritu malu ni nuu neza ibá'.

<sup>13</sup> Nga runi, laiquiñe irá ni ma bidii Dios laatu, ti cadi cui sa tu atrá ora ucaa lú ni nadxaba laatu, ne ti ganda uzuhuua dxichi tu ora ma gudixhe dxí tu ni.

<sup>14</sup> Casi cayabe laatu ca, lachuu listu casi soldadu. Ruxhii ca cinturón ndaani ca ti cadi uchiiña xhaba ca laaca'. Zacaca laatu lauzuhuua chaahui lu ni dxandi', ti cadi chu' ni uchiiña laatu. Laca rucaa cabe xixa xpechu cabe para cadi tidi ni guniná laacabe. Zacaca laguni ni jneza ti qué ganda cu' xquichi binidxaba lade tu.

<sup>15</sup> Ne casi rucaa ñee soldadu zapatu para sa né ora chi tinde la? zacaca lachuu listu para güi tu stiidxa Cristu ni riguixhe dxí ladxidó' binni.

<sup>16</sup> Ne nuu ru ni riquiñe cabe. Rinaaze cabe escudu para qué cui flecha laacabe. Zacaca lauzuhuua dxichi lu ni runicre tu ti ganda usuí tu ca flecha ni cá gui ni undaa binidxaba laatu.

<sup>17</sup> Ne laca riguu soldadu cascú ique ti ilá ique. Zacaca laatu, laguietenala'dxi ma bilá tu, ti cadi utiixhi binidxaba ique tu. Ne rinaaze soldadu espada para ucaa lú né. Laatu laaca, laucaa lú ne espada ni rudii Espíritu Santu laatu, ne nga stiidxa Dios.

<sup>18</sup> Ne cadi guiaana dxí tu de iní' né tu Dios. Lainaba ni naquiñe inaba tu, ne laguni

ni modo ului' Espíritu Santu laatu. Lagataná cadi cui sa tu atrá, ne lainaba pur irá ca xpinni Dios.

<sup>19</sup> Laca lainaba lu Dios pur naa ti ganna xi gabe binni ora inié', ne ti cadi idxibe usiene tutiica de stiidxa Cristu ni iruti ñanna chiqué.

<sup>20</sup> Necá caya cadena yanna, peru biseenda be naa güe nia binni ca diidxa ri xcuenta be. Lainaba laabe acané be naa güe nia ni binni casi racala'dxi be guné'.

*Diuxi*

<sup>21</sup> Chi useenda hermanu Tíquico ni nadxiee ra nuu tu. Qué rusaana ná be xhiiña Señor. Ne laabe zabi be laatu ximodo nuua', ne xi cayune'.

<sup>22</sup> Purti para nga cuseenda laabe, para gabi be laatu xi-modo nuu du, ne para acané be indisa ique tu.

<sup>23</sup> Hermanu ca', rinaba lu Dios Bixhoze nu ne Señor Jesucristu, quixhe dxí ladxidó' to ne acané laatu ganaxhii saa tu ne guni cre tu jma.

<sup>24</sup> Dios cu' ndaaya irá cani qué riaana dxí de ganaxhii Jesucristu Señor stinu. Amén.

# GUI'CHI BICAA SAN PABLULU CA XPINNI CRISTU NI NUU FILIPOS

<sup>1</sup> Naa nga Pablu. Naa ne Timoteu runi du xhiiña Jesucristu, ne cucá' du gui'chi ri lú tu, hermanu ca', ca xpinni Dios ni nuu ndaani guidxi Filipos, laatu ne ca xaíque stitu ne ca diácono ni nuu lade tu.

<sup>2</sup> Dios Bixhoze nu ne Señor Jesucristu cu' ndaaya laatu ne quixhe dxí ladxidó' to.

*Caní' né Pablu Dios pur cani ma bini cre*

<sup>3</sup> Cada guedasilú tu naa, nabé rudiee diuxquixe Dios,

<sup>4</sup> ne rieche ora inié nia laa pur laatu.

<sup>5</sup> Purti dede dxí bizulú bini cre tu qué huayaana dxí tu de acané tu naa ra canayué stiidxa Cristu.

<sup>6</sup> Dede chiqué bizulú Dios cayuni laatu nacha'hui', ne nanna qué zusaana ndahui be ni sínunque de ra iluxe ni dxí gueeda Jesucristu.

<sup>7</sup> Cadi cosa de enda ridxagayaa nga isaca tu para naa bia' cá, purti didi laaga tu ndaani ladxiduá', ne tobi si huayuni né tu naa dxiiña ni bidii Dios naa. Qué huasi-aanda tu naa ra yeguayuaa casi nuaa yanna ri', nin ra zuhuua lu justicia para inié dxandí ni na stiidxa Cristu, ne jneza chi nanda binni ni.

<sup>8</sup> Dios nanna pabiá' nadxiee irá tu, casi nadxii Cristu laanu,

<sup>9</sup> ne rinaba laabe acané be laatu jma rusi ganaxhii saa tu ne guiene chaahui tu xi racala'dxi be,

<sup>10</sup> ti ganna tu cui tu ni dxandí risaca. Zacá zabani tu jneza, ne qué zadxela donda luguiá tu dxí gueeda Cristu.

<sup>11</sup> Ne zacané Jesucristu laatu ganda iquiiñe xpida tu para udxiiiba cabe ne usisaca cabe Dios ra gu'ya cabe pabiá' jneza nabani tu.

*Para si Cristu nabane'*

<sup>12</sup> Hermanu ca', racaladxe ganna tu, cadi cucueza irá ni cazaaca ri de ireeche stiidxa Cristu, sínunque laga cayacané ni para ireeche ni jma.

<sup>13</sup> Purti ma nanna irá ca dxu ni rapa ralidxi rey yeguayuaa purti rune xhiiña Cristu.

<sup>14</sup> Ne stale de ca hermanu ora bi'ya ca yeguayuaa la? jma rusi bidxii lú ca güi ca stiidxa Cristu. Ma qué rituí lú ca ne cayacané Señor laaca cadi idxibi ca'.

<sup>15</sup> Huandí nuu caadxí canayuí' stiidxa Cristu purti nanala'dxi ca naa, ne para uchiichi si ca naa, peru laca nuu xcaadxí canayuí' ni de idubi ladxidó'.

<sup>16-17</sup> Runi ca ni ti nadxii ca naa, ne nanna ca nuaa rarí purti gula'qui Dios naa güé stiidxa Cristu nezalú cani runi mandar. Peru ca xcaadxí que la? cayuni ni purti cuyubi si ca para laca laaca', ne cadi dxandí xhiiña Cristu cayuni ca'. Cuyubi si

ca modo gaca ni jma nagana para naa ra yeguayuaa ri'.

<sup>18</sup> Peru para naa la? gasti naca ti cayuni cabe ni, purti pa cayuni cabe ni de idubi ladxidó' cabe o pa co', peru stiidxa Cristu canayuí' cabe, ne nga nga ni rusieche naa.

Ne qué ziaana dxie de guieche',

<sup>19</sup> purti caní' né tu Dios pur naa, ne laca cayacané Espíritu sti Jesucristu naa, ne nanna zacané irá nga para iree de ra nuua ri'.

<sup>20</sup> Peru ni jma cá ique' ne ni jma racaladxe nga cadi ch'u' dxi ituí lua güe stiidxa Cristu, sínunque inié sin idxibe', casi bine chiqué, ti usisaca Cristu pa ibane rua' o pa gate'.

<sup>21</sup> Purti para si Cristu nabane', ne gasti naca pa gate'. Jma rusi sicarú nga para naa.

<sup>22</sup> Peru pa zanda ru gune xhiiña Señor laga nabane la? qué ganna xi cue', enda nabani la? o enda guti.

<sup>23</sup> Nuua inchupa. Qué idxela xi gune'. Ñacaladxe ñate para ñuua ra nuu Cristu, purti nga jma galán para naa.

<sup>24</sup> Peru ruuya jma galán para laatu pa ibane rua' xcaadxi.

<sup>25</sup> Ne nga runi nanna zi-aana nia rua' laatu para acaniá laatu iniisi tu lu stiidxa Cristu, ne jma rusi guieche né tu ni runi cre tu.

<sup>26</sup> Ne ora ma nuua lade tu sti tiru la? jma rusi zieche né tu naa, ne zusicaca tu Cristu pur modo ucané naa.

<sup>27</sup> Xi si la? lasá jneza casi na stiidxa Cristu, ne zacá pa

chaa ra nuu tu o pa nuua sti ladu, zanna nuu tu tobi si, ne zuhuua chaahui tu, ne irá xixé tu naca tu tobi si, cucaa lú tu para ireeche stiidxa Cristu ni ma bini cre tu.

<sup>28</sup> Cadi idxibi tu cani rucaa lú laatu, purti zacá zanna ca nexhe initilú ca', peru laatu ma bilá Dios laatu ne nuu né laatu.

<sup>29</sup> Dichoso de laatu purti cadi cayuni cre si tu Cristu, sínunque ne cayacaná tu pur laa.

<sup>30</sup> Ma nuu né tu naa tobi si lu enda naná ni cadide ri'. Ma biiya tu irá ni udide pur Cristu chiqué, ne cadide rua' ni de yanna.

## 2

### *Ejemplu sti Jesucristu*

<sup>1</sup> Pa rusieche Cristu laatu ne nuu dxí ladxidó' to purti nadxii laatu, ne nuu né Espíritu sti laatu, ne nanna tu ganaxhii tu ne ilaseladxii tu stobi la?

<sup>2</sup> lauchá ladxiduá' de enda nayeche'. Lachuu tobi si ne laganaxhii saa, lagaca tobi si lu ni quixhe tu guni tu, ne tobi si icá ique tu.

<sup>3</sup> Cadi guni tu xiixa para si tidi tu lú stobi, nin para ch'u' tu udxiba laatu, sínunque cada tobi gaca nadó' ne usisaca stobi, ne cadi laca laa.

<sup>4</sup> Cadi sti si tu ma cá ique tu, sínunque laucaa ique ni caquiiñe stobi.

<sup>5</sup> Laguietenala'dxi pabiá' nadó' uca Cristu Jesús dxi uzá ndaani guidxilayú, ne lachinanda ejemplu sti'.

<sup>6</sup> Necá Dios laabe Peru qué  
ña be tu naca be,

<sup>7</sup> Sínuque bisaana be enda  
Dios que para beda gaca  
be casi ti mozo ra gule be  
ndaani guidxilayú.

<sup>8</sup> Ne ra ma naca be binni  
guidxilayú, bidii be lugar uca  
be bia' ri ti', ne bizuuba be  
diidxa dede uná be guti be  
lu cruz casi rati cani qué  
iquiñe'.

<sup>9</sup> Ngue runi ma bidxiiba  
Dios laabe ne bisisaca laabe  
jma que irá xixé,

<sup>10</sup> Ti ora guiete lá be guzux-  
ibi irá cani nuu ibá' ne  
irá cani nuu ndaani guidxi-  
layú ne irá cani nuu xaguete  
guidxilayú,

<sup>11</sup> Ne inf' ca nezalú irá': "Je-  
sucristu nga Señor", ne zacá  
usisaca ca Dios Bixhoze be.

### *Modo ibani xpinni Cristu ndaani guidxilayú*

<sup>12</sup> Hermanu stinne ni  
nadxiee ca', cásica bizuuba  
tu stiidxa dxi nuua ra nuu  
tu la? jma rusi yanna nuua  
zitu de laatu. Laucaala'dxi  
guni tu ni jneza, dede dxi ilá  
chaahui tu. Lagaca nadó' ne  
laidxibi.

<sup>13</sup> Purti cadí stubi tu nuu  
tu, sínuque nuu Dios caya-  
cané laatu ului'la'dxi tu guni  
tu ni na, ne zaqueca ti ganda  
guni tu ni.

<sup>14</sup> Laguni irá ni sin quiche  
ruaa tu ne sin tinde tu,

<sup>15</sup> Ti qué chu' tu gapa xi  
pur inf' laatu, ne ti ihuinni  
ma xiiñi Dios laatu, ne nayá  
ladxidó' to neca nabeza tu  
ndaani guidxilayú ni nadx-  
aba', lade binni ni runi ni  
na ique sin gapa xpia'. Zeda

gaca tu casi biaani ndaani  
guidxilayú cahui ri',

<sup>16</sup> Purti ra güi né tu laacabe  
diidxa ni rudii enda nabani,  
casi ñaca cuzaani tu lade  
cabe. Zacá zieche nia laatu  
dxi gueeda Cristu, ra ganna  
cadi pur gana si guzaya bine  
dxiiña lade tu.

<sup>17</sup> Zeda gaca fe stitu casi  
ti ofrenda ni racaladxe  
usiga'de Dios, ne pa naquiiñe  
uxhiee rini stinne para izaa  
chaahui ni la? zune ni de  
idubi ladxiduá', ti guieche nu  
tobi si.

<sup>18</sup> Purti racaladxe guieche  
tu, ne laatu, cadi naa sia'.

### *Timoteu ne Epafroditó*

<sup>19</sup> Ribeza acané Señor Jesús  
naa ti guiuba guseenda Tim-  
oteu ra nuu tu chi guuya xi  
ze xa tu para ganda gata dxí  
ladxiduá'.

<sup>20</sup> Laasi be lade irá ni runi  
né naa dxiiña zanaxhii laatu  
casi nadxiee laatu, ne zacané  
laatu de idubi ladxidó'.

<sup>21</sup> Purti ca xcadxi la? jma  
ricá ique ca laca laaca', ne  
qué rizaala'dxi ca xhiña  
Cristu.

<sup>22</sup> Peru ma nanna tu pabiá'  
rudxii lú Timoteu dxiiña  
ne modo huayacané naa ra  
canayué stiidxa Cristu, casi  
ñaca xiiñe laa.

<sup>23</sup> Nga runi racaladxe  
guiuba guseenda laabe, Peru  
cabeza sia' ihuinni xi ziaa xa'  
rari'.

<sup>24</sup> Peru laca nanna  
zuseenda Señor naa ra nuu  
tu.

<sup>25</sup> Biseenda tu Hermanu  
Epafroditó ra nuua para  
acané naa, ne dxandí bini né  
be naa dxiiña'. Tobi si bicaa  
lú né be naa ni ucalá'dxi

nucueeza dxiiña ri'. Peru zuluá' naquiiñe useenda laabe ra nuu tu yanna

<sup>26</sup> purti nabé ma cabana be laatu ne nuu be xizaa gunna tu uca huará be.

<sup>27</sup> Zacá uca ni, uca huará be dede bilá ñati be, peru biá Dios laabe, ne cadi laasi be sínuque ne naa. Pacaa la? jma rusi naro'ba yuuba ñuuaa nia'.

<sup>28</sup> Nga runi cuseenda laabe nagueenda, ti guieche tu ora gu'ya tu laabe, ne ma cadi chuaa xizaa.

<sup>29</sup> Lauchaga lú laabe ne stale enda nayeche'. Bi'chi tu nga laabe neza Señor. Ne laganaxhii irá casi laabe ca.

<sup>30</sup> Purti dede bilá ñati be runi xhiiña Cristu. Nin qué lica ña be xpida be, nudii be ni ra ucané be naa xcuenta tu.

### 3

*Rusiá Dios ladxidó' cani runi cre*

<sup>1</sup> Yanna la? hermanu ca', lauyubi enda nayeche ra nuu Señor. Qué rixhacaladxe dia' de ucaa ngueca ngueca, ne zaquiiñe ni laatu.

<sup>2</sup> Canazá caadxí ni qué iquiiñe', na naquiiñe iruugu tindaa lu xcuerpu binni para gaca xpinni Dios. Laguuya gá qué chi chite cabe laatu.

<sup>3</sup> Purti cadi tisi iruugu tindaa lu xcuerpu binni xpinni Dios laa, sínuque laanu nga xpinni Dios purti laanu runi nu ni na de idubi ladxidó' no, ne nanna nu qué zulá di xiixa ni guni nu laanu,

sínuque Cristu si zanda ulá laanu.

<sup>4</sup> Necá naa ñanda nicá lua nila'ya pur ni naca'. Pa nuu tuuxa na zanda ilá pur ni naca la? naa jma rusi ñanda ninié ni.

<sup>5</sup> Bini circuncidar cabe naa lu xhono gubidxa de gule'. Zaya de Benjamín, xiiñi Israel. Hebreu naa de dxi gule', xiiñi hebreu. De enda rinanda ley sti ca judíu la? fariseu naa.

<sup>6</sup> Nabé gunaxhiee ni zinanda ca judíu, dede uzaya nanda ca xpinni Cristu, ucaladxe ñuute laaca'. Ne de na cabe ibani binni jneza casi na ley la? iruti ñanda niguu xqueja'.

<sup>7</sup> Irá nga bisaca para naa chique perú qué lica pe rizaladxe cani, purti ni risaca para naa yanna la? nga Cristu.

<sup>8</sup> Ne cadi nga si, sínuque irá ni ma qué iquiiñe ni para naa, purti ma binebia'ya Cristu Jesús Señor stinne', ne laa si risaca para naa. Bisaana irá xixé ni para zinanda laabe, ne ma casi guixi ni para naa, purti ni jma racaladxe nga laabe,

<sup>9</sup> ne aca nia laabe tobi si, cadi purti bia ladxiduá' ra bine ni na ley, sínuque bia ni ra bine cre Cristu. Ne nanna rusiá Dios ladxidó' cani runi cre.

<sup>10</sup> Ni racaladxe sia' nga gunebia'ya chaahue Cristu, ne ganna xii nga enda nandxo' ni undisa laabe de lade gue'tu'. Laca racaladxe acana'ya casi ucaná be, dede ma cadi izaaladxe xpida casi

qué nizaala'dxi be xpida be,  
 11 tílasi ganda ibane nia ti  
 vida cubi casi tobi ni ma  
 bibani de lade gue'tu'.

*Premiu ni naguixhe Dios  
 ibá'*

12 Naa ca nanna ca'ru  
 ugaanda irá nga, ca'ru izaa  
 chaahui ni racala'dxi Cristu  
 gaca', peru huaziaa tia' ndi',  
 tílasi ganda ugaanda irá ni  
 gudixhe be gaca'.

13 Hermanu ca', cadi rabe  
 dia' ma bigaanda irá nga,  
 peru ni rune la? rusiaanda  
 irá ni ma udi'di', ne rudxiee  
 lua' ni cabeza naa neza ziaa',

14 ti ganda chindaya icaa  
 premiu ni naguixhe Dios ibá'  
 para cani nuu né Cristu Jesús  
 tobi si.

15 Nga ca nga naquiiñe  
 ucaa ique irá cani ma  
 zuhuua chaahui lu stiidxa  
 Dios. Pa nuu tuuxa na cadi  
 zacá ni la? zuluí' Dios laa.

16 Peru xi si la? naquiiñe  
 guni nu ne ibani nu bia' ma  
 bizi'di nu.

17 Hermanu ca', lachin  
 nanda modo rune', ne laca  
 laundaachi cani ma nabani  
 zacá.

18 Ma ru huayabe ndi laatu,  
 ne dede nanda nisa lua chi  
 tidxe ni laatu sti tiru. Nuu  
 stale lade ca xpinni Cristu  
 cadi cusihuinni pa dxandí  
 guti Cristu pur laanu lu cruz.

19 Zanitilú cabe partí  
 ri-nanda cabe intiisi ului'la'dxi  
 cabe ne rieche né cabe ni  
 nusituí lú cabe. Nisi ni nuu  
 ndaani guidxilayú ri ricá  
 ique cabe.

20 Peru laanu binni de ibá'  
 laanu, ne cabeza nu gueeda

Señor Jesucristu de raqué, ti  
 laa bilá laanu.

21 Zuchaa be cuerpu yu  
 uwdxu napa nu ri' para gaca ni  
 casi cuerpu stibe ni qué ziuu  
 dxi guiu'dxu'. Zuni né be ni  
 enda nandxo' stibe ni napa  
 be, ni rinaaze né be irá xixé.

## 4

*Lauzuhuua chaahui lu  
 neza sti Señor*

1 Hermanu stinne ca',  
 nadxiee laatu ne ribana  
 laatu. Laatu nga enda  
 nayeche stinne', partí zeda  
 gaca tu casi ti premiu ni bidii  
 Dios naa. Yanna racaladxe  
 gabe laatu uzuhuua chaahui  
 tu lu neza sti Señor.

2 Rinaba hermana Evodia  
 ne hermana Síntique chu' ca  
 tobi si, partí benda ca neza  
 Señor.

3 Ne lii la? hermanu, bini  
 neu naa dxiiña sin nixha  
 cala'dxu'. Rinaba lii acanéu  
 ca gunaa ca partí huayuni né  
 ca naa xhiiña Cristu, laaca ne  
 Clemente ne xcaadxi. Cá lá  
 cabe lu libru ra cá lá irá cani  
 ma napa enda nabani ni qué  
 zaluxe.

4 Laguieche irá dxi partí  
 xpinni Señor laatu. Ne sti  
 tiru rabe laatu, laguieche'.

5 Lagaca nacha'hui dede  
 izaabi stiidxa tu. Ma zeda  
 dxiiña dxi gueeda Señor.

6 Cadi chu' tu xizaa de  
 gasti', sínunque laini' né Dios.  
 Lainaba laa irá ni caquiiñe  
 tu, ne laudii diuxquixe laa.

7 Ne óraque zaguixhe dxí  
 ladxidó' to dede iruti zanda  
 guiene ximodo ni. Ma qué  
 zadxibi ladxidó' to, ne zata

dxí xquenda biaani tu, purti  
nuu né tu Cristu Jesús tobi si.

*Laucaa ique ni jneza si*

<sup>8</sup> Yanna hermanu ca', ma para iluxe gui'chi ri', racal-adxe gabe laatu, ucaa ique tu ni dxandí si, ne ni naquiiñe ulabi nu, ne ni jneza, ne ni nacha'hui', ne ni rusieche binni, ne ni guiaba laaca'. Laquixhe xquenda biaani tu lu ni jneza ne ni dxandí risaca.

<sup>9</sup> Ne lachinanda ni bisiide laatu, ni bisaana nia laatu guni tu, ni bina diaga tu unié', zaqueca ni biiya tu bine'. Laguni zacá, ne zaguixhe dxí Dios ladxidó' to.

*Ucané ca binni Fililos Pablu*

<sup>10</sup> Nabé cayeche ne cudee diuxquixe Señor purti ma cayacané tu naa sti tiru. Cadi cayabe dia' bisiaanda tu naa purti bindaa tu para biseenda tu, sínunque nanna qué nidxela tu ximodo ñuni tu ni.

<sup>11</sup> Ne laca cadi cayabe laatu huayaadxa naa xiixa, purti ma biaa guieche nia bia' tiica napa'.

<sup>12</sup> Nanna xii nga enda pobre ne laca huayapa stale. Ma biziide ibane ratiisi ne sica tiisi, zuhuua stale endaró lua la? o gasti', dede guiaana si ni napa', o qué lica gapa gasti'.

<sup>13</sup> Intiisi zanda gune purti nuu né Cristu naa ne racané naa.

<sup>14</sup> Peru galán bi'ni tu, ucané tu naa dxi caquiiñe ni.

<sup>15</sup> Hermanu de Filipos ca', rietenala'dxi tu dxi nacubi canayué stiidxa Cristu, dxi biree de Macedonia que, laasi tu lade irá ca xpinni Cristu ulee tu lu ofrenda stitu biseenda tu lua'. Ne bi'ni tu ni purti dxandí bieche né tu stiidxa Dios ni bisiide laatu.

<sup>16</sup> Zaqueca dxi uyuaa Tesalónica, jma que ti tiru biseenda tu ni caquiiñe'.

<sup>17</sup> Cadi cuyube usiga'de binni naa, sínunque cayuuladxe cayuni tu ni purti zacá cadale stitu ra nuu Dios.

<sup>18</sup> Ne ni biseenda né tu Epafroditó que la? ma napa jma que bia' caquiiñe'. Zeda gaca ni casi ti ofrenda cusiga'de tu Dios ne casi ti xho' naxhi ni ziula'dxi be icaa be.

<sup>19</sup> Intiisi iquiiñe tu zudii Dios stinna ni laatu, purti nuu né tu Cristu Jesús tobi si. Zabee be ni lu irá ni napa be ibá'.

<sup>20</sup> Laabe nga Dios stinu, ne qué ziuu dxi guiaana dxí de isaca be. Amén.

*Diuxi*

<sup>21</sup> Laudii diuxi irá ca xpinni Cristu Jesús. Ne laiccaa stiuxi ca hermanu nuu né naa rarí'.

<sup>22</sup> Laiccaa stiuxi irá ca xpinni Cristu, nirudó' sti cani nuu ralidxi César.

<sup>23</sup> Jesucristu Señor stinu cu' ndaaya irá tu. Amén.

# GUI'CHI BICAA SAN PABLULU CA XPINNI CRISTU NI NUU COLOSAS

<sup>1</sup> Naa nga Pablul. Naca apóstol sti Jesucristu purti gudixhe Dios gaca ni. Naa ne hermanu Timoteu

<sup>2</sup> cucá' du gui'chi ri lú tu, hermanu ca', ca xpinni Dios ni nuu ndaani guidxi Colosas, cani runi cre Cristu. Dios Bixhoze nu cu' ndaaya laatu ne quixhe dxí ladxidó' to.

*Cani' né Pablul Dios pur cani ma bini cre*

<sup>3</sup> Cada iní né du Dios Bixhoze Jesucristu Señor stinu rudi' du diuxquixe laa pur laatu.

<sup>4</sup> Purti gunna du pabiá' runi cre tu Cristu, ne nadxii tu irá ca xpinni Dios.

<sup>5</sup> Ne runi tu zacá purti dede dxí ucuaa tu ca diidxa ni dxandí', ma nanna tu xi nuu chaahui para laatu ibá', ne nga nga ni cá lú tu yanna.

<sup>6</sup> Ne ma careeche ca diidxa que idubi naca guidxilayú. Caree ndu ni, ne cadale cani runi cre, cásica huayaca lade tu dede dxí binibiá' tu enda nacha'hui sti Dios ne gunna tu dxandí nadxii laanu.

<sup>7</sup> Laani nga bisiidi Epafras laatu. Nadxii du laabe ne huayuni né be laadu dxiiña'. Bi'ní be xhiña Cristu lade tu sin niree be gana.

<sup>8</sup> Laabe gudxi be laadu pabiá' nadxii saa tu, casi

rakané Cristu ca xpinni ganaxhii saa.

<sup>9</sup> Nga runi dede dxí gunna du ni, qué huayaana dxí du de iní né du Dios pur laatu. Rinaba du laabe udii Espíritu Santu enda biaani laatu ne usiene laatu ti ganna pe tu xi racala'dxi be guni tu,

<sup>10</sup> para ganda sa tu modo naquiñe sa ca xpinni Señor ne guni tu ni jma chu'la'dxi'. Zacá zaree ndu xpida tu, ne jma ziyunibiá' chaahui tu Dios.

<sup>11</sup> Ne laca rinaba du laabe udii be stipa laatu ne enda nandxo' stibe, ti ganda guieche tu neca gueeda stale enda naná luguiá tu, ne cadi ixhacala'dxi tu,

<sup>12</sup> ne ganda udii tu diuxquixe Dios Bixhoze nu saca bisisaca laanu ne uluu laanu ra naya'ni ti ganda icaa nu ni napa para ca xpinni.

<sup>13</sup> Ulee be laanu lu ná guelacahui ne ma uluu be laanu lu ná Xiiñi be ni nadxii be.

<sup>14</sup> Laa bilá laanu ne bixhá stonda nu ra guti pur laanu.

## *Irá ni bi'ni Xiiñi Dios*

<sup>15</sup> Qué randa ridu'ya nu Dios, peru bisihuinni Xiiñi be tu naca be, purti casi laabe Xiiñi be, ne maca nuu Xiiñi be ante cha irá xixé ni nuu.

<sup>16</sup> Dxí bizá' be irá xixé ni nuu ibá' ne ni nuu guidxilayú la? Xiiñi be bi'ní irá ni, casi ni rihuinni, zaqueca ni qué rihuinni, ni nandxo' ne ni runi mandar. Laa bizá' irá ni, ne para laa uyá' ni.

<sup>17</sup> Maca nuu Xiiñi be que dxi ca'ru cha irá ni, ne laa naaze irá ni. Nga runi nexhe chaahui ru ni.

<sup>18</sup> Ne cadi nga si, sínunque laca laa nga xaíque sti ca xpinni. Laabe naaze be ca xpinni be. Zeda gaca ni casi ti cuerpu. Ca xpinni be nga cuerpu ca, ne laabe nga ique ni. De laabe biale cuerpu que purti nirudó' laabe bibani be de lade gue'tu para isaca be jma que irá xixé.

<sup>19</sup> Purti ucalá'dxi Dios aca be irá ni naca.

<sup>20</sup> Ne laca pur laabe gudixhe Dios chu' né irá xixé ni bizá' tobi si, cásica cani nuu ibá', zaqueca cani nuu ndaani guidxilayú. Guca ni ra guti be lu cruz.

<sup>21</sup> Chiqué qué ñuu né tu Dios tobi si, sínunque bicaa lú tu laa ra bi'ni tu ni cadi jneza, peru yanna ma bi'ni pur chu' né tu laa tobi si,

<sup>22</sup> ra guti Cristu lu cruz dxi naca binni guidxilayú. Ne bi'ni be ni para cuee chu be laatu de ni nadxaba', ti idxiña tu ra nuu be ma nayá ladxidó' to, ne ma cadi dxi'ba donda ique tu.

<sup>23</sup> Peru naquiñe cadi ichaacha tu de ni runi cre tu, sínunque lazuhuuaa dxichi casi ti yaga napa xcu guete'. Dede dxi bina diaga tu stiidxa Cristu ma nanna tu xi cabeza laatu. Yanna cadi ixhacala'dxi tu de cueza tu ni. Stiidxa be ca nga careeche idubi naca guidxilayú. Naa naca tobi de cani canaucheeche ni.

*Gudixhe Dios Pablu acané*

### *ca xpinni*

<sup>24</sup> Cayeche cadide ra nagana yanna para acaniá laatu. Purti lu cuerpu stinne cazaa chaahui enda naná beda tidi Cristu pur ca xpinni. Ca xpinni be ca nga cuerpu stibe.

<sup>25</sup> Naa beda gaca tobi de cani runi dxiiña lade ca xpinni be, purti gudixhe Dios ti dxiiña ladxi naya para acaniá laatu, usiide laatu stiidxa sin usiadxa gasti lú ni.

<sup>26</sup> Ma biluí' be ca xpinni be ni qué niná be nuluí' be iruti dede dxi uyá' guidxilayú.

<sup>27</sup> Gudixhe be uluí' be ni laaca ti ganna ca pabiá' sicarú ni gudixhe be guni be para irá xixé binni. Ndi nga ni gudixhe be gaca': gapa tu Cristu ndaani ladxidó' to, ne zacá zasaca né tu laa ra nuu be.

<sup>28</sup> Canayuí né du irá binni stiidxa Cristu. Canaguixhe ná du laaca', ne canausí'di du laaca para iniisi chaahui ca lu stiidxa Cristu.

<sup>29</sup> Nga runi cayune dxiiña bia' ganda ti', bia' stipa ni cudii Cristu naa.

## 2

<sup>1</sup> Racaladxe ganna tu pabiá' cuyube acaniá laatu, laatu ne cani nuu ndaani guidxi Laodicea, ne irá ca xcaadxi ni qué huayuuya lúa'.

<sup>2</sup> Tílasi zacá guieche ladxidó' cabe ne ganaxhii saa cabe ti chu' cabe tobi si, ne guiene chaahui cabe ni ma bini cre cabe ti ganda guieche né cabe ni, ra ganna

dxichi cabe dxandí ni. Ne zacá zunibiá' chaahui cabe ni qué nului' Dios binni chiqué, ne nga nga Cristu.

<sup>3</sup> Lu ná be nuu irá enda biaani ne enda riene.

<sup>4</sup> Cayabe ni laatu ti cadi tutiica iní' diidxa sicarú maca ziguni cre tu laa.

<sup>5</sup> Necá cadi nuua nia laatu, peru nuu né ladxiduá' laatu, ne rieche ganna ze tu jneza ne cadi cusaana tu de guni cre tu Cristu.

<sup>6</sup> Cásica bisiguenda tu gaca tu xpinni Señor Jesucristu la? zaçaca lasá né laa tobi si.

<sup>7</sup> Lausaana idubi xpida tu lu ná be ti ma de laabe iree ni usiniisi laatu casi ricaa xcu ti yaga ndaani yu. Ne lauzuhuaa dxiichi lu ni runi cre tu casi biziidi tu ni. Ne cadi guiaana dxí tu de udii tu diuxquixe Dios.

*Pabiá' ma bichaa xpinni Cristu*

<sup>8</sup> Laguuya gá laatu né cani canayuí' ni biree de xquenda biaani binni. Cadi dxandí ni, sínunque binni guidxilayú guidixhe ni casi na ca naca guidxilayú, ne cadi de Cristu zeeda ni.

<sup>9</sup> Purti irá xixé ni naca Dios uyuu luguiá Cristu dxi naca binni guidxilayú.

<sup>10</sup> Ne laatu ma stitu irá ni, purti ma nuu né tu Cristu tobi si. Ne laa nga xaíque sti irá espíritu ni runi mandar ne ni nandxo'.

<sup>11</sup> Ne ra uca né tu Cristu tobi si la? laca uca circuncidár tu, peru cadi casi raca circuncidar cani ricaa seña lu xcuerpu, sínunque bini circuncidar Cristu laatu ra ulee laatu de lu ná enda ruchee.

<sup>12</sup> Ne ra uyuu nisa tu casi ñaca bigaachi né tu laabe, ne laca casi ñaca bibani né tu laabe, purti bini cre tu nandxo' Dios ni bisibani laabe de lade gue'tu'.

<sup>13</sup> Chiqué uyuu tu casi gue'tu pur irá stonda tu ne purti qué ñapa tu ley sti Dios. Peru yanna ra bisibani Dios Cristu, bisibani ne laatu ne bixhá stonda tu.

<sup>14</sup> Bixhá be irá donda dxi'ba ique nu sti ni biché' né nu ley stibe. Casi ñaca bicaa be ni lu cruz ne raqué binitilú ni.

<sup>15</sup> Ra guti Cristu lu cruz raqué guidixhe dxí ca binidxaba ni racala'dxi unitilú xhialma nu. Bisituí be lú ca nezalú binni ra bisihuinni be ma laabe naaze be laaca'.

*Cadi tutiica ma zinanda tu*

<sup>16</sup> Nga runi cadi izaala'dxi tu pa iní' cabe laatu pur ni go to o pur ni gue tu, nin pa qué rapa tu dxi ro' nin ra iree beeu huiini', nin dxi enda riziila'dxi'.

<sup>17</sup> Gu'ta irá nga para chinanda binni dxi ca'ru gueeda Cristu, naca ni casi bandá sti Cristu. Peru yanna ma beeda Cristu la? ma laa pe naquiñe chi nanda cabe.

<sup>18</sup> Cadi ulabi tu cani racala'dxi cuee laatu de ni napa Dios para laatu, cani runi laa nadó', ne rusisaca ca ángel. Riuu cabe lú ni qué riene cabe ne raca cabe nandxo' pur ni rini' ique si cabe.

<sup>19</sup> Ma cadi nuu né cabe Cristu tobi si. Laa nga ique sti cuerpu, ne ca xpinni be nga cuerpu ca. Laabe rudii

be irá ni iquiiñe ca para iniisi  
ca ne gaca ca tobi si casi  
gudixhe Dios gaca ni.

<sup>20</sup> Ma guti né tu Cristu. Nga  
runi ma gue'tu laatu para irá  
ni riguixhe binni guidxilayú  
chi nanda nu. Ne pa zacá ni  
la? xiñee runi ru tu ni na  
cabe, casi ñaca runi mandar  
ru binni guidxilayú laatu.

<sup>21</sup> Rabi cabe laatu: "Cadi  
cana tu ndi', cadi go to nga,  
ne cadi inaaze tu ndica'."

<sup>22</sup> Irá ni na cabe cadi cana  
tu ca la? zanitilú ora iquiiñe  
binni laa. De binni guidx-  
ilayú zeeda irá ni rusiidi  
cabe ne ni riguixhe cabe guni  
binni.

<sup>23</sup> Dxandí ruluí' riene cabe  
purti nabé rinanda cabe  
modo gudixhe cabe usisaca  
binni ca ángel, ne runi cabe  
laacabe huaxié', ne runiná  
cabe laacabe. Peru qué  
rucueza irá nga laacabe de  
guni cabe ni na ique cabe.

### 3

#### *Lauyubi ni zeeda de ibá'*

<sup>1</sup> Yáquexa ma bibani né  
tu Cristu de lade gue'tu la?  
lauyubi gapa tu ni zeeda de  
ibá' ra zuba Cristu cue' Dios.

<sup>2</sup> Laucaa ique ni nuu ibá',  
ne cadi ni nuu ndaani guidx-  
ilayú.

<sup>3</sup> Purti guti né tu Cristu, ne  
yanna ma nuu né xpida tu  
laa ra nuu Dios.

<sup>4</sup> Cristu nga enda nabani  
stin, ne dxi ihuinni be la?  
laca zahuinni né tu laabe ne  
zasaca né tu laabe.

<sup>5</sup> Nga runi, lagaxha irá  
ni zeeda de guidxilayú ri  
ndaani ladxidó' to. Nin tobi

de laatu cadi chu' né ni cadi  
xheela', nin guni gasti ni  
nadxaba'. Cadi chi nanda tu  
ni na ique tu, nin ului'ladx  
tu guni tu ni cadi jneza. Ne  
cadi nisi bidxichi ma cá ique  
tu gapa tu, purti ra guni tu  
zacá la? ma nga nga ni cu-  
sisaca tu, ne cadi Dios.

<sup>6</sup> Pur irá nga zusaba ná  
Dios cani qué ruzuuba sti-  
idxa'.

<sup>7</sup> Zacaca bibani tu chiqué,  
bi'ni tu irá nga.

<sup>8</sup> Peru lausaana ni yanna.  
Cadi guni tu xiana, cadi idxi-  
ichi tu, cadi uyubi tu guniná  
tu stobi, cadi cu' dí tu binni,  
ne cadi iní' tu diidxa guidxa.

<sup>9</sup> Ne cadi usiguii saa tu,  
purti ma bisaana tu ni uca tu  
chiqué, ma qué runi tu irá ni  
bi'ni tu.

<sup>10</sup> Ma adxé laatu yanna.  
Ma bichaa Dios laatu, ne ze  
dxi jma rusi ziuchaa laatu,  
cayuni laatu casi laa, dede  
gunibiá' chaahui tu laa.

<sup>11</sup> Yanna ma gasti naca pa  
judíu binni o pa cadi judíu,  
nin pa uca circuncidar o  
pa co'. Gasti naca pa de  
adxé guidxi, ne pa qué ganna  
gastí', nin pa esclavu o pa co'.  
Sínuque ni risaca nga gaca ca  
xpinni Cristu ne gapa ca laa  
ndaani ladxidó' ca'.

<sup>12</sup> Nadxii Dios laatu ne  
ulí laatu para laa. Nga  
runi laguiá binni ne lagaca  
nacha'hui ne laaca'. Cadi  
udxiiba tu laca laatu, la-  
gaca nadó', cadi idxiichi tu  
neca uyubi cabe uchiichi  
cabe laatu.

<sup>13</sup> Cadi ixhacala'dxi saa tu,  
ne laguni perdonar ni guni

stobi laatu. Casi bini perdonar Cristu laatu, zacaca laguni.

<sup>14</sup> Peru jma naquiiñe ganaxhii saa tu, partí zacá zaca pe tu tobi si.

<sup>15</sup> Laudii lugar quixhe dxí Dios ladxidó' to, partí para nga uní né laatu gaca tu tobi si. Ne laudii diuxquixe laa.

<sup>16</sup> Lauchá tipa ladxidó' to de stiidxa Cristu. Lausiidi saa ne laquixhená saa ne stale enda biaani'. Laguunda salmo ne himno ne cantu sti Dios, ne maca cudii tu diuxquixe laa ndaani ladxidó' to.

<sup>17</sup> Irá ni guni tu ne irá ni iní tu, laguni ni casi naquiiñe guni ca xpinni Señor Jesús. Ne laudii diuxquixe Dios Bixhoze nu, ne zucaa diaga laatu partí xpinni Jesús laatu.

*Modo ibani né binni xheela ne xiiñi'*

<sup>18</sup> Hermana ca', lauzuuba stiidxa xheela tu, partí zacá naquiiñe guni ca xpinni Señor.

<sup>19</sup> Ne laatu, hermanu ca', laganaxhii xheela tu ne cadi aca né tu laaca naduxhu'.

<sup>20</sup> Ne laatu, ba'du ca', lauzuuba stiidxa bixhoze tu ne jñaa tu de irá', partí nga riula'dxi Señor.

<sup>21</sup> Hermanu ca', cadi uyubi tu uchiichi tu xiiñi tu, ti cadi iree ca gana.

*Modo guni xpinni Cristu xiiñi binni*

<sup>22</sup> Laatu, cani cayuni xiiñi binni, lauzuuba stiidxa xpixuaana tu, cadi ora si cayuuya ca para

guiaana tu bien ne laaca', sínuque laguni ni de idubi ladxidó' to partí ridxibi tu Dios.

<sup>23</sup> Irá ni guni tu la? laguni ni de idubi ladxidó' to, casi ñaca xhiña Señor cayuni tu, cadi xhiña binni.

<sup>24</sup> Ma nanna tu naguixhe chaahui Señor ni udii laatu saca bi'ní tu dxiiñi'. Partí xhiña Cristu cayuni tu, ne laa nga xpixuaana pe tu.

<sup>25</sup> Peru tu guni ni cadi jneza la? ziaba ná pur ni bi'ní'. Partí nezalú Dios, bia'ca risaca tobi risaca stobi.

## 4

<sup>1</sup> Laatu, cani napa ni cayuni xhiña', cadi quite si tu laaca', sínuque laguni ni jneza para laaca'. Laguietenala'dxi laca napa tu xpixuaana tu ibá'.

*Laini' né Dios*

<sup>2</sup> Cadi guiaana dxí tu de iní né tu Dios, ne lagataná ora cayuni tu ni, ne laudii diuxquixe laa.

<sup>3</sup> Laca laini' né Dios uxhale ti neza para güi du stiidxa Cristu ni qué ñanna binni chiqué. Purtí pur laani yeguayuaa.

<sup>4</sup> Ne lainaba ganda usiene chaahue ni binni casi nexhe gune ni.

<sup>5</sup> Lasá jneza nezalú cani qué runi cre, ti iree ndu ni guni tu lade ca'.

<sup>6</sup> Lagüi' diidxa jneza, ni guiaba binni. Lauyubi ganna tu modo icabi tu laaca'.

*Diuxi*

<sup>7</sup> Zabi hermanu Tíquico laatu ximodo nuaa'. Nadxii

du laa ne qué huasaana de guni né laadu xhiiña Señor.

<sup>8</sup> Para nga nga cuseenda laabe ra nuu tu, para gabi be laatu ximodo nuu du, ne para acané be laatu udxii lú tu.

<sup>9</sup> Ziné hermanu Onésimo laabe, binni xquidxi tu que. Laca nadxii du laa, ne qué riaana dxí de guni xhiiña Señor. Iropa cabe zabi cabe laatu xi irá cayaca rari'.

<sup>10</sup> Laicaa stiuxi Aristarco ni yeguayuua nia', ne sti Marcu xprimu Bernabé. Casi huayabe laatu, pa che be ra nuu tu la? lauchagalú laabe.

<sup>11</sup> Ne laca laicaa stiuxi Jesús ni rabi cabe Justu que. De lade ca hermanu judíu, guionna si cabe huayacané cabe naa güe nia binni modo runi mandar Dios. Ne nabé huasieche cabe naa.

<sup>12</sup> Ne laicaa stiuxi Epafras, binni xquidxi tu ni cayuni xhiiña Cristu. Qué riaana dxí be de iní né be Dios pur laatu de idubi ladxitó' be. Rinaba be uzuhuaa chaahui tu, ne ucaa ique tu guni tu irá ni na Dios.

<sup>13</sup> Naa nanna pabiá' riguu xa ique be laatu, laatu ne cani nuu ndaani guidxi Laodicea ne Hierápolis.

<sup>14</sup> Laicaa stiuxi Doctor Lucas, hermanu ni nadxii nu, ne sti Demas.

<sup>15</sup> Laudii diuxi ca hermanu ni nuu ndaani guidxi Laodicea. Laca laudii diuxi hermana Ninfas ne cani rie cultu ralidxi.

<sup>16</sup> Ora ma biuunda gui'chi ri lade tu la? lauseenda ni ra nuu ca hermanu ni nuu Laodicea. Ne laaca useenda

ca gui'chi ni bicaa lú ca gu'nda tu.

<sup>17</sup> Lagabi Arquipo gu'ya unduuxe chaahui dxiiña ni bisaana Señor ladxi ná'.

<sup>18</sup> Rari' ma naa pia' cucaa diuxi ri'. Naa nga Pablu. Laguietenala'dxi yeguayuua. Dios cu' ndaaya laatu. Amén.

# PRIME GUI'CHI BICAA SAN PABLУ LU CA XPINNI CRISTU NI NUU TESALONICA

<sup>1</sup> Naa nga Pablu. Naa ne Silvanu ne Timoteu cucá' du gui'chi ri lú tu, hermanu ca', ca xpinni Cristu ni nuu ndaani guidxi Tesalónica, cani ma nuu né Dios Bixhoze nu ne Señor Jesucristu tobi si. Rinaba laacabe cu' cabe ndaaya laatu ne quixhe dxí cabe ladxidó' to.

<sup>2</sup> Qué riaana dxí du de udí' du diuxquixe Dios pur irá tu, ne cada iní né du laabe ruze'te du laatu.

<sup>3</sup> Runi tu xhiiña Dios partí runi cre tu laa ne nadxii tu laa, ne qué huasaana tu de icá lú tu Jesucristu Señor stinu. Ne irá nga ruze'te du lu Dios ora riní né du laa.

<sup>4</sup> Hermanu ca', nadxii Dios laatu, ne nanna dxichi du gulí be laatu.

<sup>5</sup> Purtí dxí ucuua tu stiidxa Cristu la? qué nicaa tu ni pur modo byuí né du ni laatu, sínunque partí bi'ni Espíritu Santu dxiiña luguiá tu. Ne uní du de idubi ladxidó' do partí nanna du dxandí ni cayuí du. Laaca tu nanna tu ximodo uzá du lade tu para gunda ucané du laatu.

*Rieche Pablu modo runi  
cre binni Tesalónica*

<sup>6</sup> Ne dxí ma ucuua tu stiidxa Dios la? bizulú tu bibani tu modo ca bi'ya tu uzá du

lade tu, modo bilui' Señor laatu. Ne bisieche Espíritu Santo laatu ra ucuua tu ca diidxa que, neca udi'di tu ra nagana.

<sup>7</sup> Zacá guca tu ti ejemplu para irá ca xpinni Cristu ni nuu Macedonia ne ni nuu Acaya,

<sup>8</sup> partí laatu bicheeche tu stiidxa Señor irá ladu. Ne cadi binni Macedonia ne Acaya si nanna pabiá' runi cre tu Dios, sínunque dede cani nuu zitu ma nanna ni. Ne yanna ma cadi naquiiñe güi né du ni laacabe,

<sup>9</sup> partí ma laape cabe cayuí' cabe modo bichagalú tu laadu dxi uyuu du ra nuu tu, ne modo bisaana tu ca bidó' para cayuni tu ni na tobi lucha Dios ni nabani.

<sup>10</sup> Laca cayuí' cabe pabiá' cá lú tu ibigueta Xiiñi Dios de ibá'. Cuzeete Jesús ni bisi-bani be de lade gue'tu que. Laa zulá laanu dxi usaba ná be binni guidxilayú.

## 2

### *Modo bi'ni Pablu dxiiña Tesalónica*

<sup>1</sup> Hermanu ca', laaca tu nanna tu cadi pur gana si uyuu du ra nuu tu.

<sup>2</sup> Nanna tu neca udinde né cabe laadu ne bininá cabe laadu ndaani guidxi Filipos Peru ucané Dios laadu para gunda bidxiña du xquidxi tu ne byuí né du laatu stiidxa be sin nidxibi du, neca uyuu tu biçaa lú laadu.

<sup>3</sup> Nanna du jneza ni bisi'di du laatu, ne qué nusigui du para niguite du binni nicaa stiidxa du.

<sup>4</sup> Bisaana Dios stiidxa ladxi  
ná du partí nanna zanda güi  
du ni jneza, ne zacá cayuí du  
ni. Laa nanna xi nuu ndaani  
ladxidó' do, ne cuyubi du  
guni du ni chu'la'dxi be ne  
cadi ni chu'la'dxi binni.

<sup>5</sup> Laatu nanna tu qué ñuu  
dxi nugá du laatu ne qué ñuu  
dxi tuyubi du nicaa si du  
xpueltu tu. Dios nanna nayá  
ladxidó' do.

<sup>6</sup> Qué tuyubi du nisaca  
du lade tu, nin lade xcaadxi  
binni, neca ñanda nisaca du  
partí Cristu biseenda laadu.

<sup>7</sup> Sínuque uca du nadó' ne  
laatu, casi runi ti gunaa ne ca  
xiiñi', rusiniisi laaca'.

<sup>8</sup> Pa ñanda la? cadi stiidxa  
Dios si nudí' du laatu, sínuque  
ne xpida pe du, tantu nadxii  
du laatu.

<sup>9</sup> Hermanu ca', laatu  
nanna tu bini du dxiiña ridxí  
ne huaxhinni para gupa du  
ni udidi né du dxi laga cayuí  
né du laatu stiidxa Cristu, ti  
cadi gua nin tobi tu laadu.

<sup>10</sup> Xpinni Cristu ca', biiya  
tu modo uzá du lade tu, ne  
laca biiya Dios. Ne pur modo  
uzá du que la? bihuinni  
xpinni Dios laadu. Bini du  
jneza, ne qué gapa binni xi  
pur udxiiba donda ique du,  
partí qué nuché' du.

<sup>11</sup> Nanna dxichi tu uní né  
du cada tobi tu casi riní' né  
bixhoze binni laa. Ucané du  
laatu para cadi iree tu gana,

<sup>12</sup> ne gudxi du laatu sa tu  
casi naquiiñe sa ca xpinni  
Dios. Laa guridxi laatu  
para ganda chu' tu ra runi  
mandar, ne gu'ya tu enda  
nandxó' sti'.

<sup>13</sup> Qué riaana dxí du de  
udí' du diuxquixe Dios partí  
ucuaa tu ca diidxa byuí né du  
laatu casi stiidxa Dios ne cadi  
casi stiidxa binni. Ne dxandí  
stiidxa Dios ni. Ne dede  
dxi bini cre tu ni, cayuni ni  
dxiiña ndaani ladxidó' to.

<sup>14</sup> Hermanu ca', dxi bin  
iná ca binni xquidxi tu laatu  
la? bizaaca tu casi bizaaca  
ca xpinni Dios ni nuu Judea,  
cani ma bini cre Cristu Jesús.  
Neca judíu laacabe peru laca  
ca judíu bininá laacabe.

<sup>15</sup> Ne laca judíu biiti Señor  
Jesucristu, ne laca biiti ca ca  
profeta chiqué, cani byuí' né  
laaca stiidxa Dios, ne yanna  
ma uladxi ca laadu. Qué runi  
cabe ni na Dios, ne ridxela  
saa né cabe irá binni.

<sup>16</sup> Racala'dxi cabe ucueza  
cabe laadu de güi né du ca  
binni ni cadi judíu diidxa', ti  
cadi ilá ca'. Ne zacá caazaa  
chaahui stonda ca judíu, ne  
yanna huaxa ma nuu pe xi  
ana sti Dios luguiá ca'.

### Cá ique Pablu ibigueta Tosalónica

<sup>17</sup> Hermanu ca', biré' du ra  
nuu tu caadxi, peru ladxidó'  
do biaana né laatu, ne pa  
ñanda si guiuba nidu'ya du  
laatu.

<sup>18</sup> Ucalá'dxi du ñuu du.  
Naa, jma que ti tiru biyube  
ñaa', peru biceeza binidx  
aba laadu.

<sup>19</sup> Laatu nga cá lú du  
usieche tu laadu, ne usi  
huinni tu xhiña du dxi  
gueeda Jesucristu Señor  
stiu, ti ganda guieche né du  
ni bini du. Nga runi napa du  
gana idu'ya du laatu.

<sup>20</sup> Purti laatu nga raca né du nandxó' ne rieche né du.

### 3

<sup>1-2</sup> Tantu cá ique du laatu dede ma qué ñanda nibeba du jma. Bise'nda du hermanu Timoteu ra nuu tu para ganna du xi ze xatu. Ma iropa si du biaana du ndaani guidxi Atenas. Nabé huayuni né Timoteu laadu xhiiña Dios, ne rizá né laadu ra canayú né du binni stiidxa Cristu. Nga runi bise'nda du laa ra nuu tu para acané laatu uzuhuaa chaahui tu ne guieche né tu ni runi cre tu,

<sup>3</sup> ti cadi chu' tu iree gana ne enda naná cadi'di tu ca. Maca nanna tu irá nu napa nu xidé tidi nu zacá.

<sup>4</sup> Dxi nuu ru du lade tu gudxi ca du laatu zeeda enda naná luguiá nu, ne ma biiya tu cayaca ni zacá.

<sup>5</sup> Nga runi, biiya sia' ma qué ganda chu' dxí ladxiduá'la? biseenda tobi yeguuya pa de yanna zuhuaa dxiichi tu lu ni runi cre tu. Purti nuua xizaa pa ma gudxite binidxaba ique tu, bichiá dxiiña bine lade tu.

<sup>6</sup> Peru yanna ma bigueta Timoteu de Tesalónica. Bisieche be laadu ra na be, de yanna runi cre tu casi chique né nadxii saa ru tu. Ne laca gudxi be laadu rieche tu ora rietenala'dxi tu laadu, ne cásica laadu zaqueca laatu napa tu gana gu'ya tu laadu.

<sup>7</sup> Zacá nga laani, hermanu ca', neca nabé naná ni cadi di du, peru bieche du ora

gunna du zuhuaa dxiichi ru tu.

<sup>8</sup> Yanna ma undisa ique du, ne ma nuu du gana partí gunna du qué huaree chu tu de Señor.

<sup>9</sup> Dede qué idxela du diidxa udí' né du diuxquixe Dios pur laatu ne pur irá modo huasieche tu laadu nezalú be.

<sup>10</sup> Ridxí ne huaxhinni caní né du laabe, canaba du laabe idu'ya du laatu para acané du laatu izaa chaahui ra riadxa ru guni cre tu.

<sup>11</sup> Rinaba du acané Dios Bixhoze nu ne Jesucristu Señor stinu laadu ti ganda chi ganna du laatu.

<sup>12</sup> Ne acané Señor laatu jma rusi ganaxhii saa tu ne ganaxhii tu irá binni casi nadxii du laatu.

<sup>13</sup> Ne cadi ibi'xhi ique tu sínuque guiaana tu para laa si, ti cadi quiba donda ique tu nezalú Dios Bixhoze nu dxi quedané Señor Jesús irá xpinni.

### 4

*Modo racala'dxi Dios ibani ca xpinni*

<sup>1</sup> Hermanu ca', bisi'di du laatu modo racala'dxi Dios sa tu, ne cayuni tu ni. Yanna rinaba du laatu jma rusi guni tu ni. Cayabi du ni laatu partí ma xpinni Jesús laanu.

<sup>2</sup> Ma nanna tu xi irá gudixhe Jesús gabí du laatu guni tu.

<sup>3</sup> Ni racala'dxi Dios nga sa tu jneza, cadi chu' né tu ni cadi xheela tu.

<sup>4</sup> Ne cada tobi tu lacueza né xheela tu modo riula'dxi

Dios, ne laganaxhii laa purti risaca.

<sup>5</sup> Cadi guni tu casi runi cani qué runibíá' Dios, rapa ca xheela ca para si gaca xcustu ca'.

<sup>6</sup> Nin tobi de laatu qué chi chite tu hermanu stitu de ni cuze'te du ri', purti nabé naná zusaba ná Señor ni guni ni. Maca gudxi du ni laatu.

<sup>7</sup> Purti uní' né Dios laanu para guni nu ni nacha'hui', cadi ni nadxaba'.

<sup>8</sup> Cani qué ulabi ni cayabi du laatu ri la? cadi zácxaxa cadi culabi binni guidxilayú, sínunque cadi culabi Dios. Laa nda bidii laanu Espíritu Santu sti'.

<sup>9</sup> De enda ranaxhii saa la? cadi naquiiñe ucaa gui'chi lú tu, purti maca bisiidi Dios laatu guni tu ni.

<sup>10</sup> Ne rihuinni cayuni tu ni, purti nadxii tu irá ca hermanu ni nuu idubi Macedonia. Peru rinaba du laatu, hermanu ca', laganaxhii jma que bia' nadxii tu yanna.

<sup>11</sup> Cadi ma canazá tu cherí cherica', sínunque laucaa ique xhiiña si tu, ne laguni dxiiña', casi gudxi du laatu guni tu.

<sup>12</sup> Zacá qué zapa cani qué runi cre Cristu xi pur ini' laatu, ne qué ziaadxa laatu gasti'.

### *Modo ibigueta Señor*

<sup>13</sup> Hermanu ca', racala'dxi du ganna tu xi raca binni ora ma guti, ti qué chu' tu triste casi cani qué nuyubi nulá Cristu laa.

<sup>14</sup> Runi cre nu clásica guti Jesús ne bisibani Dios laa zaca zusibani be cani guti ma runi cre laa para guedané ca laa.

<sup>15</sup> Nga runi racala'dxi du ganna tu xi na Dios: pa nabani nu dxi ibigueta Señor, qué zazá niru nu lú cani ma guti.

<sup>16</sup> Purti sicarí nga chi aca ni. Zacá ti ridxi casi ora cayuni mandar tuuxa, ne laca zucaa tobi de ca ángel ni jma risaca ridxi, ne zaxidxi trompeta sti Dios, ne ziete Señor de ibá'. Nirudó' ibani ca xpinni Cristu ni ma guti,

<sup>17</sup> ne óraque laanu cani nabani, guiasa né nu laaca tobi si lu bi para idxaaga nu Señor lade za. Ma qué ziuu ru dxi ixele nu de laa.

<sup>18</sup> Lagüí' ni lade tu para guieche saa tu.

## 5

<sup>1</sup> Hermanu ca', cadi naquiiñe ucaa xi bee o xi dxi gueeda Señor,

<sup>2</sup> purti maca nanna dxichi tu dxi gueeda be la? mala guiuu be, casi riuu gubaana huaxhinni.

<sup>3</sup> Rului' gasti chi gaca, nuu dxí guidxi, mala inaaze be laaca casi rinaaze yuuba ti gunaa ora ma gunda dxi gapa ba'du'. Zacá zazaaca cabe, ne óraque ma qué zalá cabe.

<sup>4</sup> Peru laatu, hermanu ca', ma biree tu ra nacahui, ma qué zanda inaaze dxi que laatu, purti cabeza tu ni.

<sup>5</sup> Ma cadi nuu tu lu guelacahui, purti ma zinanda tu ni

dxandí ni gudixhe Dios, casi ñaca cuzaani be laatu.

<sup>6</sup> Yanna, gataná nu ne cu' xpiaani nu. Cadi gaca nu casi cani qué runi cre, casi ñaca nisiaasi ca'.

<sup>7</sup> Parti huaxhinni nga rasi binni ne laca huaxhinni rix-udxi.

<sup>8</sup> Peru laanu, zanda gabi nu ma birá gueela para laanu. Nga runi naquiiñe cu' xpiaani nu, uzuhuá' dxichi nu lu ni runi cre nu ne ganaxhii saa nu, ne guietenala'dxi nu ma bilá nu. Irá nga zapa laanu.

<sup>9</sup> Parti cadi gudixhe Dios laanu para guiba ná nu, sínunque para ganda ilá nu pur Jesucristu Señor stinu.

<sup>10</sup> Laa guti pur laanu ti ganda cueza né nu laa tobi si, pa nabani ru nu, o ma guti nu dxi gueeda.

<sup>11</sup> Nga runi lausieche saa cásica cayuni tu, ne cada tobi uyubi uzuhuaa chaahui stobi.

*Ra culidxe Pablu ca hermanu*

<sup>12</sup> Hermanu ca', rinaba du laatu icaa tu stiidxa cani runi dxiiña lade tu, cani za niru lú tu ne rabi laatu xi na Señor guni tu.

<sup>13</sup> Lausisaca laacabe ne laganaxhii laacabe parti cayuni cabe dxiiña que. Ne cadi chu' dinde tu.

<sup>14</sup> Hermanu ca', laulidxe cani nachaaba lade tu, cani qué na guni dxiiña'. Lagané cani cadxibi, ne cani ca'ru uzuhuaa chaahui, ne cadi ixhacala'dxi tu laaca'.

<sup>15</sup> Laguuya gá qué chi uquixe tu ni guni binni laatu,

sínunque lagaca nacha'hui ne irá hermanu, ne zaqueca cani qué runi cre.

<sup>16</sup> Cadi usaana tu de guieche tu,

<sup>17</sup> ne lainí' né Dios sin guiaana dxí tu.

<sup>18</sup> Intiica izaaca tu, laudii diuxquixe Dios parti nga nga ni na be guni cani ma nuu né Cristu Jesús tobi si.

<sup>19</sup> Laudii lugar guni Espíritu Santu dxiiña luguiá tu.

<sup>20</sup> Laicaa stiidxa cani rui' né laatu ni rabi Dios laa.

<sup>21</sup> Lauyubi uná nga ni jneza, ne nga laguiaana né.

<sup>22</sup> Ne laixele de irá xixé ni nadxaba'.

<sup>23</sup> Dios riguixhe dxí ladxidó' no, ne rinaba du laa usiá pe xpida tu ne xquenda biaani tu ne espíritu stitu, ne idubi naca tu, ti qué quiba donda ique tu dxi gueeda Jesucristu Señor stinu.

<sup>24</sup> Zuni Dios irá nga luguiá tu, parti runi ni riní', ne laa uní' né laatu.

<sup>25</sup> Hermanu ca', lainí' né Dios pur laadu.

<sup>26</sup> Laudii stale diuxi irá hermanu ne laquidxi dxiiichi laaca'.

<sup>27</sup> Señor bidii naa dxiiña ri', nga runi cayabe laatu gu'nda tu gui'chi ri nezalú irá ca hermanu.

<sup>28</sup> Jesucristu Señor stinu cu' ndaaya laatu. Amén.

# RAIROPA GUI'CHI BICAA SAN PABLULU CA XPINNI CRISTU NI NUU TESALONICA

<sup>1</sup> Naa nga Pablu. Naa ne Silvanu ne Timoteu cucá' du gui'chi ri lú tu, hermanu ca', ca xpinni Cristu ni nuu ndaani guidxi Tesalónica, cani ma nuu né Dios Bixhoze nu ne Señor Jesucristu tobi si.

<sup>2</sup> Rinaba laacabe cu' cabe ndaaya laatu ne quixhe dxí cabe ladxitdó' to.

*Modo usaba ná Dios cani qué nulabi laa*

<sup>3</sup> Hermanu ca', naquiiñe cadi guiaana dxí du de udí' du diuxquixe Dios pur laatu. Jneza guni du ni partí cadu'ya du ze dxí jma rusi ziuni cre tu, ne jma rusi cayanaxhii saa tu, de irá xixé tu.

<sup>4</sup> Nga runi ratiica chuu du lade ca xpinni Dios ruluí du pabiá' rieche né du laatu. Rui né du laaca pabiá' runi cre tu ne modo qué huaxhacala'dxi tu neca cayaani ná cabe laatu ne cadi'di tu ra nagana.

<sup>5</sup> Zacá nga rihuinni jneza runi Dios. Cayacaná tu yanna partí xpinni be laatu, perú zacané ni para ihuinni ma nuu tu para chu' tu ra runi mandar be.

<sup>6</sup> Peru zuni Dios jneza. Zusaba ná cani cayaani ná laatu ca.

<sup>7</sup> Ne laca zudii iziila'dxi cani cayacaná casi laanu. Zuni be ni dxi guiete Señor Jesús de ibá' ne ca ángel ni jma nandxó' sti'.

<sup>8</sup> Purti ziete lade bele para usaba ná cani qué nicaa stiidxa', ne qué ñunibiá' Dios.

<sup>9</sup> Zundaa be laaca ra qué ziuu dxi iree ca lu ná enda naná, ne qué ziuu ca ra nuu be, ne qué zuuya ca enda sicarú ne enda nandxó' stibe,

<sup>10</sup> dxí gueeda be para usisaca ca xpinni be laabe. Irá ca zudxiiba ca laabe. Ne laatu ziuu tu lade cabe partí bini cre tu stiidxa be ni byuí né du laatu.

<sup>11</sup> Pur nga runi qué riaana dxí du de iní né du Dios pur laatu ti ganda usihuinni tu cadi pur gana si gulí be laatu. Laca rinaba du laabe acané be laatu ne enda nandxó' stibe, ti gaca tu nacha'hui bia' gudixhe be gaca tu, ne acané be laatu lu dxiiña ni cayuni tu partí runi cre tu Cristu.

<sup>12</sup> Zacá zusisaca tu Jesucristu Señor stinu pur modo nabani tu, ne laa zusisaca laatu partí uca ca nacha'hui ne laatu, laa ne Dios.

## 2

*Zeeda ti hombre ne enda nandxó' sti binidxaba'*

<sup>1</sup> Hermanu ca', rari ma chi uze'te du dxi gueeda Señor Jesucristu, dxí gueda caa laanu.

<sup>2</sup> Rinaba du laatu cadi chu' tuuxa utiixhi ique tu nin cu' xizaa laatu, gabi laatu ma beeda Señor. Cadi guni cre tu laacabe neca na cabe Espíritu

Santu bilui' ni laacabe, o nga uní' cabe ra cultu, nin pa guiete ni lu xiixa gui'chi useenda cabe lú tu na cabe laadu bise'nda du ni.

<sup>3</sup> Nin de ti modo qué chi udii tu lugar usiguii cabe laatu. Purti qué zadxiña dxi que, dede qué gaca irá ni ma nexhe gaca'. Ziasa stale binni zucaa lú Dios, ne laca zeeda ti hombre nuu né binidxaba', ni ma nexhe initilú.

<sup>4</sup> Zucaa lú be irá ni zeeda de Dios ne irá ni quixhe binni usisaca. Dede zadxiña dxi cui be jlugar Dios ndaani yu'du sti', ma na be Dios laabe.

<sup>5</sup> Qué rietenala'dxi tu gudxe ni laatu dxi nuua lade tu la?

<sup>6</sup> Peru nuu ni cucueeza de gueeda be ante ganda xhi be, ne laatu nanna tu tu laa.

<sup>7</sup> Ma cayaca xhiiña be, peru qué zeeda be dede qué ixele ni cucueeza laabe que.

<sup>8</sup> Oraque zeeda be, peru zadxiña dxi guuti Señor Jesús laabe ne bi iree ndaani ruaa. Casi gu'ya be gueeda Jesús, zunitilú enda nandxó' sti laabe.

<sup>9</sup> Zedané hombre que enda nandxó' sti binidxaba'. Zuché be lú binni, zácxaxa ca cayuni be milagru ne stale enda ridxagayaa.

<sup>10</sup> Zuni be irá ni ganda para quite be cani maca nexhe initilú, cani qué niná nicaa ni dxandí para nilá.

<sup>11-12</sup> Qué riná ca guni cre ca ni, nga runi rudii Dios lugar irenda ca' ne guni cre ca ni cadi dxandí', ti zacá guiaiba

ná ca parti jma uyuula'dxi ca ni nadxaba'.

### *Maca ulí Dios laatu*

<sup>13</sup> Nadxii Señor laatu, hermanu ca', ne naquiiñe cadi guiaana dxi du de udí' du diuxquixe Dios pur laatu, partí maca gulí be laatu dede dxi bizulú guidxilayú, para ilá tu ra usiá Espíritu Santu ladxidó' to ne guni cre tu ni dxandí'.

<sup>14</sup> Para nga uní' né be laatu ra byuí né du laatu stiidxa Jesucristu Señor stinu, ti ganda isaca né tu laa.

<sup>15</sup> Hermanu ca' lauzuhuaa chaahui', ne cadi usiaanda tu irá ni bisi'di du laatu dxi nuu du lade tu, nin ni huacá' du lú tu.

<sup>16-17</sup> Nabé nadxii Dios laanu ne uca nacha'hui ne laanu, nga runi bidii laanu ti enda nayeche ni qué zaluxe, ne gudixhe ni sicarú para laanu. Yanna rinaba du laabe ne Jesucristu Señor stinu usieche cabe ladxidó' to ne acané cabe laatu iní' tu ne guni tu puru si ni nach'hui'.

## 3

### *Lainí' né Dios pur laadu*

<sup>1</sup> Hermanu ca', ma para iluxe du, rinaba du laatu iní' né tu Dios pur laadu ti guiuba ireeche stiidxa Señor, ne icaa cabe ni irá ladu casi ucuaa tu ni.

<sup>2</sup> Ne lainaba lu Dios ulá laadu de lu ná cani qué na guni jneza, cani runi ni na ique, partí cadi irá binni runi cre'.

<sup>3</sup> Peru zuni Señor ni ma uní', zuzuhuaa chaahui laatu ne zapa laatu de irá ni nadxaba'.

<sup>4</sup> Nanna dxichi du caya-cané Señor laatu, nga runi cayuni tu ni gabí du laatu ne zuni ru tu ni.

<sup>5</sup> Señor gacané laatu ganna tu pabiá' nadxii Dios laatu, ne guni tu casi bi'ni Cristu: cadi ixhacala'dxi tu.

*Tu qué guni dxiiña' cadi go*

<sup>6</sup> Hermanu ca', cayabi du laatu casi ñaca Señor Jesucristu ñabi ni laatu, laixele de tutiica hermanu ni qué na guni dxiiña ne qué na guni casi bisi'di du laatu.

<sup>7</sup> Maca nanna tu naquiiñe guni tu casi bini du dxi uyú' du lade tu. Qué ñu' si du lade tu sínunque bini du dxiiña'.

<sup>8</sup> Ne qué nidó' si du xqueta binni, sínunque bini du dxiiña ridxí ne huaxhinni bia' ra gunda ti', para cadi gua nin tobi tu laadu.

<sup>9</sup> Necá jneza nudii tu laadu ni nibani né du pur ni naca du, peru bini du ni para uluí du laatu ximodo guni tu.

<sup>10</sup> Purti gudxi ca du laatu dxi nuu du lade tu, tu qué guni dxiiña la? cadi go.

<sup>11</sup> Cuze'te du ni partí gunna du nuu de laatu qué na guni dxiiña', canaundaachi si ni cayuni stobi.

<sup>12</sup> Yanna racala'dxi du ulidxe du cani qué na guni dxiiña ca, ne gabí du laaca guni ca dxiiña jneza ti gapa ca ni ibani né ca', partí nga nga ni na Jesucristu Señor stinu.

<sup>13</sup> Ne laatu la? hermanu ca', cadi ixhacala'dxi tu de guni tu jneza.

<sup>14</sup> Pa nuu tuuxa qué na guni ni cucá' du ri la? laguya chaahui tu laa ne cadi idxaaga tu laa, ti ituí lú.

<sup>15</sup> Peru cadi gapa tu laa casi ni nanala'dxi laatu, sínunque laulidxe laa casi enda bi'chi'.

*Señor cu' ndaya laatu*

<sup>16</sup> Riguixhe dxí Señor ladxidó' no, ne laa pe quixhe dxí ladxidó' to irá dxi ne intiica gueeda luguiá tu. Chu' né Señor irá xixé tu.

<sup>17</sup> Naa nga Pablu. Naa pia' cucaa diuxi ri'. Sicarí rucaa lu irá ca gui'chi stinne', ti ihuinni naa rucaa cani.

<sup>18</sup> Jesucristu Señor stinu cu' ndaaya irá tu. Amén.

# PRIME GUI'CHI BICAA SAN PABLULU TIMOTEU

<sup>1</sup> Naa nga Pablu. Naca apóstol sti Jesucristu partí nga nga ni na Dios ne Señor Jesucristu. Gudixhe Dios ulá laanu ra guni cre nu Jesucristu, ne nga runi ma cá lú nu laa.

<sup>2</sup> Cucaa gui'chi ri lú lu, Timoteu, xiiñe neza Jesucristu Señor stinu. Dios Bixhoze nu ne Señor Jesucristu gu'ya lii ne cu' ndaaya lii ne quixhe dxí ladxidó' lo'.

*Xi guni né Timoteu cani  
rusiidi ni cadi dxandi'*

<sup>3</sup> Dxi ma chi guiaaxha guenda Macedonia, gudxe lii guiaanu Efeso, ne ngaca nga racaladxe gabe lii yanna. Zaa nuu lu racá para ucueezu lú cani canausiidi ni cadi dxandi'.

<sup>4</sup> Ne ga'bu laaca usaana ca ca cuentu yooxho', ne de usirooba ca historia sti ca bixhoze gola nu. Rutinde diidxa si ni laacabe, ne qué racané ni ganna binni ni gudixhe Dios gaca ra guni cre binni laa.

<sup>5</sup> Cayabe lii gu'nu ni ti acanéu laacabe guia ladxidó' cabe, ne cadi chu' ni uchiiña xquenda biaani cabe, ne guni cre cabe de idubi ladxidó' cabe ti ganda ganaxhii saa cabe.

<sup>6</sup> Nuu tu biree chu de irá nga, ne ma nisi ni qué iquiiñe ricaa yu né ca'.

<sup>7</sup> Raçala'dxi cabe usiidi cabe xi na Dios, pero qué riene cabe xi na be ne qué riene cabe ni riní' cabe. Peru rusiidi cabe casi ñaca nanna cabe.

<sup>8</sup> Nanna nu jneza ley ni bidii Dios Moisés, pero pa iquiiñe cabe ni casi gudixhe be ni.

<sup>9</sup> Naquiiñe guietenala'dxi nu qué ra'ta ley para cani cayuni jneza sínunque para cani cuchee, cani qué na uzuba diidxa', cani qué runi ni na Dios sínunque ni na ique, cani qué rizaala'dxi pa nuu Dios sínunque jma ricá ique ni nuu ndaani guidxilayú ri', cani guuti bixhoze o jñaa, o binni,

<sup>10</sup> cani riuu né ni cadi xheela', ca muxe', cani riba'na xiiñi binni, cani rusiguii, ne cani runi jurar iní' ni dxandí pero qué runi ni. Para ca nga nga gu'ta ley ne para tutiica ucaa lú ni jneza iziidi binni.

<sup>11</sup> Rihuinni jneza ni partí nga ca na ca diidxa galán ni biaana ladxi naya güe', stiidxa Dios ni nandxó' ne risaca.

## *Modo biá Dios Pablu*

<sup>12</sup> Cayacané Jesucristu Señor stinu naa cayune dxiña ri'. Ne rudiee diuxquixe laa saca bisisaca naa bia' para gune xhiiña'.

<sup>13</sup> Bi'ni be ni neca unié laabe chiqué, uzaya nanda ca xpinni be, ne udinde nia laaca'. Peru biá Dios naa partí ca'ru gune cre dxi bine ni, ne qué ganna xi cayune'.

<sup>14</sup> Nabé guca Señor nacha'hui ne naa, ucané naa bine cre laa ne gunaxhiee laa. Zacá runi be ora ma nuu né nu Cristu Jesús tobi si.

<sup>15</sup> Dxandí ni chi uezete ri', ne irá binni nicaa ni de idubi ladxidó': beeda Cristu Jesús ndaani guidxilayú, beda ulá cani cuchee. Naa ca' jma bichee'.

<sup>16</sup> Nga runi bilasela'dxi Dios naa, partí zacá jma bihuinni enda nacha'hui sti Jesucristu, para gu'ya cani ma nexhe guni cre laabe, xi bi'ni be naa, ne laca gapa ca enda nabani ni qué zaluxe.

<sup>17</sup> Qué ziuu dxi guiaana dxí Dios de guni mandar guidxilayú. Qué ridu'ya nu laa, ne qué zati. Laa nga tobi lucha Dios ni nabani. Nga runi usisaca nu laa ne udí' nu diuxquixe laa.

<sup>18</sup> Cusaana nia lii dxiiña ri', Timoteu xiiñe'. Ma nannu xi uní' ca hermanu chiqué, dxi bizeete ca ni gudxi Dios laaca de lii. Bietenala'dxi xi na cabe ti udxii lú lu xhiña lu sin cui sa lu atrá.

<sup>19</sup> Cadi guiaana dxiu de guni cre lu Cristu ne cadi gu'nu ni nannu cadi jneza, partí nuu tu huayuni ni nanna cadi jneza, ne biaba.

<sup>20</sup> Zacá bi'ni Himeneu ne Alejandru. Ma bisaana laaca lu ná binidxaba ti iziidi ca cadi iní' ca Dios.

## 2

### *Modo iní' né binni Dios*

<sup>1</sup> Nirudó' chi tidxe lii gu'yu iní' né cabe Dios pur irá xixé binni, ne inaba cabe laa cu' ndaaya laaca', ne

acané laaca', ne udii cabe diuxquixe laa pur irá ca'.

<sup>2</sup> Naquiiñe iní né nu Dios pur presidente ne irá ni runi mandar, ti ganda chu' dxí xquidxi nu, ne ibani nu sin cu' xa ique nu gasti'. Ne ibani nu modo racala'dxi Dios ti qué gapa binni xi pur iní' laanu.

<sup>3-4</sup> Zacá nga riula'dxi Dios iní' né tu laa, ne jneza ni. Laa bilá laanu, ne racala'dxi ulá irá binni, ne ganna ca ni dxandi'.

<sup>5</sup> Tobi lucha Dios nuu, ne tobi si tu zanda iní' né laabe pur laanu, Jesucristu ni beda gaca binni guidxilayu.

<sup>6</sup> Dxi bidxiña dxi gudixhe Dios ihuinni racala'dxi ulá irá binni la? beda gati Cristu, beda tixe saca ilá cabe.

<sup>7</sup> Ne nga runi biseenda naa güé nia cani cadi judíu sti-idxa', usiide laaca ni dxandí ti guni cre ca'. Dxandí ni canié', cadi cusiguiee', partí ma xpinni Cristu naa.

<sup>8</sup> Racaladxe iní' né ca hermanu de irá guidxi Dios, peru gu'ya chaahui ca pa nayá ladxidó' ca', pa cadi cadxiichi ca', pa cadi nuu dinde né ca iruti para guni ca ni.

<sup>9</sup> Ne ca hermana la? cadi gacu ca lari ni cadi jneza gacu xpinni Cristu, nin uyubi ca chu'la'dxi binni laaca pur modo guni ca ique ca' o gaze ca oro o perla o gacu ca lari nabé risaca,

<sup>10</sup> sínueque uyubi ca chu'la'dxi binni laaca partí nacha'hui ca ne runi ca jneza casi naquiiñe guni ca xpinni

Dios.

<sup>11</sup> Ne cui dxí ca ra cultu ucaa diaga ca' ti iziidi ca'.

<sup>12</sup> Qué rina'ya usiidi gunaa ra cultu nin gapa ca xiixa dxiiña para guni mandar ca hombre, sínunque ucaa diaga ca sin iní' ca'.

<sup>13</sup> Purti nirudó' bizá' Dios Adán, óraque ru bizá' Eva.

<sup>14</sup> Ne cadi Adán di bisiguii binidxaba', sínunque Eva, ne laa bichee.

<sup>15</sup> Peru zalá gunaa ra gapa xiiñi pa guni cre ne ganaxhii Dios ne gaca nacha'hui ne chu' xpiaani'.

### 3

*Modo ibani ca xaíque sti xpinni Cristu*

<sup>1</sup> Casi na cabe que: Pa nuu tuuxa cá ique gaca xaíque sti ca xpinni Cristu la? jneza ni cá ique guni.

<sup>2</sup> Peru ganna ca, naquiiñe ibani jneza, cadi gapa chupa chonna gunaa, sínunque xheela si, ne ganna ucueeza laa ne cu' xpiaani', ne cadi guni gasti para iní' binni laa. Ne naquiiñe chu' para uchagalú binni ora tiica geda guiete ralidxi, ne ganna usiidi'.

<sup>3</sup> Naquiiñe gaca ni tobi ni qué rixudxi ne qué ruyubi diidxa ne qué runi ni cadi jneza para si gapa bidxichi, sínunque tobi ni nacha'hui', ne nadó', ne cadi nisi cá ique gapa bidxichi,

<sup>4</sup> tobi ni nanna guni mandar ndaani lidxi ne usiidi ca xiiñiuzuuba diidxa sin icabi ruua.

<sup>5</sup> Purti pa qué ganna be guni mandar be ndaani lidxi be la? ximodo zanda gapa be ca xpinni Dios ya'.

<sup>6</sup> Cadi gaca ni tobi ni deru cayuni cre, paxa ora gueda udxiba laca laa ne guiaba ná casi biaba ná binidxaba'.

<sup>7</sup> Naquiiñe gaca ni tobi ni risaca, cadi nezalú ca hermanu si, sínunque ne nezalú cani qué runi cre, ti cadi chu' tu iní' laabe para gaca ni na binidxaba'.

<sup>8</sup> Zaqueca ni gaca diácono, gaca ni tobi nabani jneza ne runi ni riní', ne qué rixudxi, ne qué runi ni cadi jneza para si gapa bidxichi,

<sup>9</sup> ne chi nanda ni biluí' Dios laanu guni cre nu, sin iree chu de laani.

<sup>10</sup> Naquiiñe ihuinni pa zaquiiñe be para dxiiña ca, óraque ru icca be ni.

<sup>11</sup> Zaqueca ca gunaa ni guni dxiiña ca, laca naquiiñe ibani jneza, cadi iní' binni, ganda ucueeza laa, ne cadi quite si binni.

<sup>12</sup> Diácono laca naquiiñe cadi gapa chupa chonna gunaa, sínunque xheela si, ne ganna guni mandar ndaani lidxi ne ucueeza lú ca xiiñi'.

<sup>13</sup> Purti diácono ni runi xhiiña jneza la? rudxiiba cabe laa, ne óraque jma rusi zanda güi né binni modo runi cre Cristu Jesús.

*Nandxó' ni runi cre nu*

<sup>14</sup> Ma naguixhe chaa ra nuu lu', peru cucaa ga'ya ndi lú lu',

<sup>15</sup> quenquita indaa guenda'. Peru ma nannu

ximodo naquiiñe gu'nu dxiiña lade ca xpinni Dios ni nabani. Laacabe cayapa cabe stiidxa be ndaani guidxilayú ri', ne cucueeza cabe cani rucaa lú ni.

<sup>16</sup> Iruti zanda iní' cadi nandxó' ni runi cre nu, neca nagana guiene binni ni casi ze'. Ndi nga laani: Beda gaca Dios binni guidxi-layú: bisihuinni Espíritu Santu qué nuchee be, ne biiya ca ángel laabe. Bireeche stiidxa be lade irá binni, uyuu tu bini cre laabe, ne bigueta be ibá'.

## 4

### *Ziuu tu iree chu*

<sup>1</sup> Cayabi dxichi Espíritu Santu laanu, dxi mayaca gueeda Cristu ziuu tu iree chu de ni runi cre nu, zinanda enda rusiguii ne irá ni rusiidi binidxaba'.

<sup>2</sup> Zuna diaga cabe ni de rruaa cani nabé rusiguii dede ma qué racaná ladxidó'.

<sup>3</sup> Zabee ca de ichaganá binni ne laca zabee ca de go binni xiixa endaró, neca Dios bizá' ca endaró ca para go ca xpinni ne udii ca diuxquixe laa.

<sup>4</sup> Nazaaca irá ni bizá' Dios. Qué gapa nu xi pur udxí' nu nin tobi de laani, sínunque icaa nu ni, ne udí' nu diuxquixe laa.

<sup>5</sup> Zanda idó' no ni, purti ra udí' nu diuxquixe laabe riguu be ndaaya ni.

*Modo ibani Timoteu lade ca hermanu*

<sup>6</sup> Pa gusiudu ca hermanu casi cayabe lii ri la? zu'nu xhiiña Jesucristu jneza, ne laga cayu'nu ni la? zidxá ladxidó' lo de stiidxa Dios ni runi cre nu, ca diidxa galán ni maca zinanda lu de ma xadxí.

<sup>7</sup> Cadi quitu stiempu lu luguiá ca cuentu yooxho ni ricaa yu né binni, sínunque bicaa ique sa lu gaxha de Dios.

<sup>8</sup> Caadxi si racané ejerciciu cuerpu stinu para gapa stipa, peru ni zacané pe laanu la? nga uyubi nu sa nu gaxha de Dios, purti nga zaquiiñe laanu lu enda nabani ni napa nu yanna ri' ne ni gueeda ru'.

<sup>9</sup> Dxandí ni, ne irá binni nicaa ni de idubi ladxidó'.

<sup>10</sup> Nga runi laanu runi nu dxiiña', ne rudxí' lú nu ni nagana, purti ma cá lú nu Dios ni nabani, ni cayapa irá binni, jma rusi cani runi cre laa.

<sup>11</sup> Gudxi ca hermanu guni irá nga, ne bisiidi chaahui ni laaca'.

<sup>12</sup> Biyubi modo iníu', bi'ní jneza, gunaxhii ca xcaadxi, bini cre de idubi ladxidó' lo', ne bibani nayá para uluí' lu cani ma runi cre ximodo sa ca', ti cadi udxii deche ca lii tisi nahuiini lu'.

<sup>13</sup> Laga cabeza lu guenda', bichiña irá ca hermanu, binda né laaca stiidxa Dios, bisiidi chaahui ca hermanu ne ucané laaca udxii lú ca lu xhiiña Dios.

<sup>14</sup> Biquiíñe gracia ni uní Dios icoou dxi gudixhe ná ca hermanu gola luguiá lu'.

<sup>15</sup> Bicaala'dxi gu'nu irá ni cayabe lii ri', de idubi ladxi-dó' lo', ti gu'ya cabe ze dxi ziylene lu jma.

<sup>16</sup> Biiya ibani lu jneza ne zaqueca biiya usiidi lu ni jneza ne cadi iree chu lu de laani. Pa chi nanda lu irá ni cayabe lii ri la? zalá lu' ne laca zulá lu cani cusiidi lu'.

## 5

*Modo guni Timoteu xhiña  
Dios*

<sup>1</sup> Cadi tinde neu ti hermanu ni ma nagola, sínunque uní' né laa ne diidxa nadó' casi niní' neu bixho'zo'. Ne gupa cani nahuiini casi bi'chi lu'

<sup>2</sup> Ne zaqueca ca gunaa gola, laca gupa laaca casi jñoo', ne ca binni dxaapa huiini casi biza'nu sin iní' ique lu gasti de laaca'.

<sup>3</sup> Gucané ca viuda ni huandí qué gapa tu gu'ya laa.

<sup>4</sup> Peru cadi naquiiñe gacané nu ca viuda ni napa xiiñi o xiaga, purti naquiiñe iziidi ca xiiñi cabe gacané laacabe saca bisiniisi cabe laaca', purti nga nga riula'dxi Dios guni binni, ne jneza ni.

<sup>5</sup> Ni dxandí viuda, qué gapa tu gu'ya laa la? ma Dios si cá lú, ne zaní' né laa ridxi ne huaxhinni.

<sup>6</sup> Peru viuda nabani modo na ique la? cadi ulabi tu laa. Casi ñaca ma guti.

<sup>7</sup> Gudxi laacabe guni cabe irá ni cayabe lii ri', ti cadi iní' binni laacabe.

<sup>8</sup> Ti hermanu ni qué ulabi ca lisaa ne jma rusi pa qué ulabi ca binni lidxi, ma biree de ni runi cre, ne zeda aca

jma nadxaba que ni qué runi cre.

<sup>9</sup> Lu gui'chi ra ricá lá ca viuda, laucaa lá ca viuda si ni ma bisaa sesenta añu, ni qué nibeza né stobi laga nabani xheela'.

<sup>10</sup> Laguuya pa runibiá' binni laabe pur xiixa nacha'hui huayuni be, casi pa jneza bisiniisi be xiiñi be, pa huachagalú be binni ralidxi be, pa huayacané be ca hermanu sin aca be nayá', pa huayacané be cani cadi'di ra nagana, o stobi stobi enda nacha'hui ni bi'ni be.

<sup>11</sup> Peru cadi ucaa tu lá ca viuda nahuiini ru', purti zuquiinde laaca ichaganá ca ne ma zusaana ca xhiña Cristu,

<sup>12</sup> neca ma bidii stiidxa ca guni ca ni. Zacá zagui'ba donda ique ca'.

<sup>13</sup> Ne cadi nga si, sínunque laca riaa cabe enda nachaaba', ma canazá cabe yoo pur yoo. Ne ni jma rusi feu riziidi cabe uchá cabe cuentu ne riguu ruua cabe ratiisi ne riní' cabe ni cadi jneza iní' cabe.

<sup>14</sup> Nga runi racaladxe ichaganá ca viuda ni nahuiini ru', gapa ca xiiñi ca', ne cui ca yoo, ti cadi gapa binni xi pur iní' ca xpinni Cristu.

<sup>15</sup> Purti nuu caadxi de laaca ma bitiixhi binidxaba ique.

<sup>16</sup> Pa nuu tuuxa hermanu o hermana napa viuda lade binni lidxi, naquiiñe acané laabe, ti cadi gua ca xpinni Cristu laabe ne zacá zuganda ni idopa para ca vi-

uda ni dxandí qué gapa tu gu'ya laa.

<sup>17</sup> Naquiiñe udii tu ni ibani né ca hermanu gola naca xáique lade tu, cani cayuni xhiiña jneza, jma rusi cani qué rusaana ná de güi stiidxa Dios ne usiidi'.

<sup>18</sup> Purti na Xqui'chi Dios: "Cadi cu' lu guixhe xii ruua buey laga cayuni dxiiña." Ne laca na ni: "Naquiiñe guiaxa ni runi dxiiña".

<sup>19</sup> Cadi ucaa dia'gu pa gueda nduu tuuxa xqueja ti hermanu gola pa cadi né ca chupa chonna hermanu ni bi'ya dxandí bichee be.

<sup>20</sup> Peru tutiica cuchee la? udinde né laa nezalú irá hermanu, ti idxibi ca xcaadxi.

<sup>21</sup> Chi tidxe ca' lii nezalú Dios ne Señor Jesucristu ne ca ángel sti', bi'ni irá ni cayabe lii ri'. Bisaba ná cani uchee, tutiica naca.

<sup>22</sup> Cadi casi zeu' quixhu tuuxa guni xhiiña Dios, ne cadi chi chuu lu lu enda ruchee sti stobi, sínunque biyubi cadi uchee lu'.

<sup>23</sup> Para ma cadi aca huará xhaata lu la? cadi gueu' nisa si, sínunque ne caadxi vinu.

<sup>24</sup> Nuu tu rihuinni cuchee de ca yanna. Ne nuu la? dede dxi cuidxi Dios cuenta laa ihuinni ni.

<sup>25</sup> Zaqueca irá enda nacha'hui guni binni rihuinni dxichi, ne neca qué nihiunni ni yanna, peru qué ziaana ni ra naga'chi'.

## 6

<sup>1</sup> Hermanu ni cayuni xhiiña binni la? naquiiñeuzuuba stiidxa xpixuaana ti

qué chu' tu ini' Dios nin ni rusi'di nu.

<sup>2</sup> Ne pa laca hermanu xpixuaana be la? cadi pur nga qué izaala'dxi be guni be ni na, sínunque jma rusi ucaa ique be guni be xhiiña', purti hermanu stibe ni nadxii be cayacané be. Byui' ni ne bisiidi ni.

*Enda ruyubi gapa bidxichi*

<sup>3</sup> Tutiica usiidi adxé para ni gudxe lii ca, ne qué ricaa stiidxa Jesucristu Señor stinu nin ni runi cre nu la?

<sup>4</sup> zeda gaca tobi ni rudxi-iba laca laa ne qué ganna gasti'. Cadi nazaaca, nisi cuyubi icca yu né xiixa didixa'. Racá nga ruzulú enda ruyubi tidi lú stobi, enda ridinde, enda runiná saa ne diidxa', ne enda qué runi cre saa.

<sup>5</sup> Qué riaana dxí cabe de tinde cabe, purti ma bicahui xquenda biaani cabe, ma qué ganna cabe xii nga dxandi'. Zácxaxa cabe ti modo para gapa binni bidxichi nga chi nanda Cristu. Bixelete de laacabe.

<sup>6</sup> Dxandí ricu ca xpinni Cristu, pa guieche né ca bia' napa si ca'.

<sup>7</sup> Gasti qué ñedané nu ndaani guidxilayú ne gasti qué ziné nu ra chuu nu.

<sup>8</sup> Nga runi, zaa naca gapa nu bidxichi, inque si napa nu ni idó' no ne ni gacu nu, nga si guieche né nu.

<sup>9</sup> Cani ruyubi gapa bidxichi la? riaba ndaani ná binidxaba', ne rizabila'dxi ni qué iquiiñe', ni runiná si binni.

Rusiu'dxu ni xpida cabe ne runutilú ni laacabe.

<sup>10</sup> Enda ranaxhii bidxichi nga xcu enda ruchee. Nuu tu huaree chu de Dios pur laani ne nabé huayacaná.

*Guni Timoteu irá ni bi-aana ladxi ná' sin idxibi*

<sup>11</sup> Peru lii, yáquexa ma xpinni Dios lii, bixele de irá nga. Bi'ni pur ibani lu jneza ne pur sa lu gaxha de Dios. Cadi usaanu de guni cre lu laa, ne gunaxhii laa de idubi ladxidó' lo'. Cadi iree lu gana, ne uca nadó'.

<sup>12</sup> Bidxii lú ni runi cre lu'; Ma napu enda nabani ni qué zaluxe, biiya gá qué chi undaa lu ni, partí para nga uní' né Dios lii, ne uní' lu nezalú stale binni ma runi cre lu Cristu.

<sup>13-14</sup> Yanna, ni chi tidxe lii rarí di la? chi tidxe ni lii nezalú Dios ni rudii enda nabani irá xixé, ne nezalú Jesucristu ni qué nidxibi niní' ni dxandí dxi zuhuua lú Poncio Pilatu. Nezalú cabe cayabe lii gu'nu irá ni biaana ladxi nou' gu'nu', ne bi'ni ni jneza casi nexhe gu'nu ni, dede dxi gueeda Jesucristu Señor stinu.

<sup>15</sup> Zuseenda Dios laabe dxi gudixhe gueeda be. Laa nga tobi lucha Dios ni risaca ne ni nandxo', xaíque sti irá rey ne irá xixé ni runi mandar.

<sup>16</sup> Laa ti qué ziuu dxi gati', ne nabé naya'ni ra nuu dede iruti qué zanda idxiña. Nin ti binni guidxilayú qué huayuya laa ne qué zanda gu'ya laa. Lausisaca laabe partí iruti ru nandxo' casi laabe. Amén.

<sup>17</sup> Gudxi cani napa bidxichi cadi aca nayá né ca xpidxichi ca', ne cadi icá lú ca ni partí zanda guiaana ca sin gasti'. Sínuque icá lú ca Dios ni nabani partí laa rudii laanu irá ni usieche laanu.

<sup>18</sup> Gudxi laacabe gaca cabe nacha'hui', gacané cabe binni de idubi ladxidó' cabe, ne cadi gaca cabe naguibi', sínuque iquiiñe cabe xpidxichi cabe para acané cabe stobi.

<sup>19</sup> Zacá zutopa lú cabe ni dxandí risaca ne ni iquiiñe laacabe stobi dxi, ne ma qué zundaa cabe enda nabani ni qué zaluxe.

<sup>20</sup> Timoteu, gupa dxichi dxiiña ni biaana neu'. Qué chi ucaa dia'gu ca diidxa ricaa yu né cabe ni cadi zeeda de Dios, nin ni na cabe enda biaani peru cadi dxandi'.

<sup>21</sup> Nuu caadxi zinanda ni, ne biree chu de ni runi cre. Dios cu' ndaaya lii. Amén.

# RAIROPA GUI'CHI BICAA SAN PABLУ LU TIMOTEU

<sup>1</sup> Naa nga Pablu. Naca apóstol sti Jesucristu partí gudixhe Dios gaca ni. Canayué nia binni stiidxa enda nabani ricaa nu ra riu' né nu Cristu Jesús tobi si.

<sup>2</sup> Cucaa gui'chi ri lú lu, Timoteu, xiiñe ni nadxiee'. Rinaba lu Dios Bixhoze nu ne Cristu Jesús Señor stinu guía lii, cu' ndaaya lii, ne quixhe dxí ladxidó' lo'.

*Usihuinni Timoteu xi runi cre*

<sup>3</sup> Zinanda Dios de idubi ladxiduá' casi bi'ni ca bixhoze gola', ne cada inié nia laabe ridxi ne huaxhinni rinaba laabe pur lii, ne rudiee diuxquixe laabe.

<sup>4</sup> Rietenaladxe pabiá' biina lu dxí biree ra nuu lu'. Yanna ñacalandxe ñuuya lii ti nidzá ladxiduá' de enda nayeche'.

<sup>5</sup> Laca rietenaladxe pabiá' runi cre lu Dios casi bini cre jñoou bida ne jñoou', Na Loida ne Na Eunice. Ne nanna zacaca runi cre lu de idubi ladxidó' lo'.

<sup>6</sup> Dxí gudixhe naya luguiá lu', bidii Dios gracia lii para gu'nu xhiiña'. Biquiñe ni casi zeda yu'nu', cadi gapu siou' ni.

<sup>7</sup> Partí bidii Dios laanu Espíritu sti', cadi para guni laanu namuxé, sínueque para udii stipa laanu udxí' lú nu, ne acané laanu ganaxhii nu binni, ne cu' xpiaani nu.

<sup>8</sup> Nga runi cayabe lii güi lu stiidxa Señor sin idxi'bu ne cadi ituí lú lu tisi yeguayuaa pur laabe, sínueque uyuu né laadu lu enda naná ni nexhé para cani güi stiidxa be, bia' stipa udii Dios lii.

<sup>9</sup> Laa bilá laanu ne ulee chu laanu para laa, cadi pur ni bini nu, sínueque partí nga ucaladxi be. Dede dxí ca'ru cha guidxilayú maca gudixhe be gaca be nacha'hui ne laanu ra chu' né nu Cristu Jesús tobi si.

<sup>10</sup> Yanna ma bihuinni ni ra beda ulá Jesucristu laanu lu ná enda guti, ne beda udii enda nabani ni qué zaluxe cani guni cre stiidxa'.

<sup>11</sup> Gulí Dios naa güe stiidxa', ne biseenda naa chi usiide ni cani cadi judíu.

<sup>12</sup> Nga runi cayacana'ya yanna. Peru cadi catuí lua', partí ma nanna dxí'che tu rune cre, ne nanna dxí'che zanda gapa be irá ni gudixhe lu ná be dede dxí gueeda be.

<sup>13</sup> Yenanda ni bisiide lii partí nga nga ni dxandí'. Cadi ixele lu de ni runi cre nu, nin usaanu de ganaxhii lu binni. Zanda ganaxhii saa nu partí nuu né nu Cristu Jesús tobi si.

<sup>14</sup> Napa nu Espíritu Santu ndaani ladxidó' no, ne laa zacané lii gu'nu ni bisaana Dios ladxi nou'.

<sup>15</sup> Nannu xi bi'ni ca de Asia naa. Bisaana ca naa stube', ra zeeda Figelo ne Hermógenes.

<sup>16</sup> Peru rinaba lu Dios guía hermanu Onesíforo ne binni lidxi partí stale tiru bisieche

naa. Neaca yeguayuaa qué nitúi lú be,

<sup>17</sup> sínunque casi bedandá be Roma beda yubi be naa dede ra bidxela be naa.

<sup>18</sup> Ne nannu pabiá' ucané be laanu ndaani guidxi Efeso. Rinaba lu Dios guiá laabe dxi cuidxi cuenta binni.

## 2

*Casi ti soldadu sti Jesucristu*

<sup>1</sup> Ne lii la? xiiñe', ma nannu nuu Dios para acané cani nuu né Cristu Jesús tobi si. Bidii lugar acané be lii.

<sup>2</sup> Irá ni bi'yu bisiide binni, bisiidi ni cani nannu zanda usiidi ni stobi.

<sup>3</sup> Guca soldadu cha'hui sti Jesucristu. Cadi ixhacala'dxu ora tidi lu ra nagana.

<sup>4</sup> Qué zanda gaca tuuxa soldadu ne gapa sti dxiiña tobi si tiru, purti naquiiñe guiaana be para guni be irá ni na xaíque stibe.

<sup>5</sup> Zaquea ni riguite juegu laca naquiiñe quite jneza, pacaa qué zacaa premiu.

<sup>6</sup> Ne ni guni dxiiña rañaa la? nirudó' laa icaa ni udii rañaa sti'.

<sup>7</sup> Biiya chaahui ni cayabe lii ri', ne zusiene Señor lii irá ni.

<sup>8</sup> Bietenala'dxi xi na stiidxa Cristu ni canayué'. Za be de David ne bibani be de lade gue'tu'.

<sup>9</sup> Cayacana'ya ne yeguayuaa casi gubaana purti cayué stiidxa be que. Naa yeguayuaa peru stiidxa be cadi yeguyoo.

<sup>10</sup> Qué riguiche ruua tide irá ni, para gacaniá cani gulí

Dios, ti laca ganda ilá ca ra gacané ca Jesucristu tobi si, ne gapa ca enda nayeche ni qué zaluxe.

<sup>11</sup> Ndi nga laani:

Pa gati né nu laabe la?  
laca zabani né nu laabe.

<sup>12</sup> Ne pa gacaná nu pur laabe  
la?

laca zuni mandar né nu  
laabe.

Pa udxí' deche nu laabe la?  
laabe laca zudxii deche be  
laanu.

<sup>13</sup> Peru neca uché' né nu  
laabe,  
laabe qué zuchee né be  
laanu,  
purti qué zuchee né Dios ni  
ma uní'.

*Guni Timoteu dxiiña casi  
riula'dxi Dios*

<sup>14</sup> Bisietenala'dxi ca hermanu irá nga, ne gudxi laaca nezalú Señor cadi icaa yu ca xiixa diidxa huati si, purti qué racané ni iruti', sínunque ruchenda si ni cani guna diga ni.

<sup>15</sup> Bicaala'dxi gu'nu dxiiña modo chu'la'dxi Dios ti qué gapu xi pur ituí lú lu nezalú. Bisiidi stiidxa be jneza.

<sup>16</sup> Cadi icaa yu lu diidxa ni cadi zeeda de Dios, nin intiica diidxa ni qué racané iruti', purti cani runi zacá la? ze dxi jma rusi zixele ca de Dios.

<sup>17</sup> Zeda gaca ni casi ti enda huará ni ruuti ne ricá, Zareeche ni lade binni. Zacá canausiidi Himeneu ne Fileto.

<sup>18</sup> Ma qué runi cre ca ni dxandi', ne na ca ma bisibani Dios ca gue'tu'. Zacá caguu cabe xizaa caadxi ni ma runi cre.

<sup>19</sup> Peru cani ma xpinni Dios la? qué zanda ibi'xhi', purti ma stibe laaca', casi cá lu gui'chi': "Runibiá' Señor uná nga ni dxandí xpinni." Ne laca cá: "Ni dxandí xpinni Señor la? naquiiñe ixele de irá ni cadi jneza."

<sup>20</sup> Ndaani ti yoo ro' nuu traste de oro ne de plata, ne laca nuu de yaga ne de yu, caadxi para ora aca xiixa risaca ne xcaadxi para irá dxi.

<sup>21</sup> Para iqui'ñe nu lu xiixa ni risaca ne guni nu xhiiña Señor la? naquiiñe ixele nu de irá ni nadxaba', ne óraque zaqui'ñe nu para intiisi ni nacha'hui'.

<sup>22</sup> Stale ni cadi jneza riguba yu cani nahuiini ru'. Bixele de laacani ne bidxii lú ibani lu jneza. Bini cre Dios ne gunaxhii binni ne biyubi cadi tinde tu, lii ne irá cani canaba lu Dios de idubi ladxidó' para acané laaca'.

<sup>23</sup> Cadi ulabi lu diidxa huati si ni qué riní' gastí', purti ma nannu rutinde si ni binni.

<sup>24</sup> Bi'ni casi naquiiñe guni cani cayuni xhiiña Señor: cadi uyubu diidxa', sínuque guca nacha'hui ne irá binni, bisiidi laacabe jneza ne cadi iree lu gana.

<sup>25</sup> Uní' ne diidxa nadó' ora culidxe lu cani qué na icaa stiidxa Dios. Zanda ca ucuudxi be ladxidó' ca', inaba ca perdón laabe, ne ganna ca xiinga dxandi'.

<sup>26</sup> Ne zacá zaxele lú ca ne zaree ca lu ná binidxaba ra

naaze laaca parauzuuba ca stiidxa'.

### 3

*Dxi queeda Cristu*

<sup>1</sup> Laca naquiiñe gannu jma nagana zaca ni ora mayaca izaa xhi guidxilayú.

<sup>2</sup> Purti zuyubi binni para laa si, ne nisi bidxichi zacá ique ca'. Zuni ca laaca nandxó' ne zaca ca nayá', ne zuguiñe yu ca stiidxa Dios. Ma qué zuzuuba ca stiidxa jñaa ca ne bixhoze ca' ne qué zulabi ca laacabe. Zabani ca modo na ique ca' ne nin zanna ca pa nuu Dios.

<sup>3</sup> Qué zanaxhii ca binni ne qué ziá ca iruti', ne nisi zazá ca zaní' ca binni. Qué zanda ucueeza ca laca laaca de guni ca ni na ique ca'. Zuniná cabe binni ne zaca nanala'dxi cabe irá ni jneza.

<sup>4</sup> Zutoo cabe xhamigu cabe, ne qué zuni lú cabe guni cabe intiisi, ne zudxiiba cabe laca laacabe. Zuyubi cabe ni chu'la'dxi cabe lugar de nuyubi cabe Dios.

<sup>5</sup> Zaná cabe runi cre cabe Dios, pero qué zusihuinni cabe enda nandxó' sti'.

Qué chi idxaagu casi laacabe.

<sup>6</sup> Lade cabe zeeda cani richuu ralidxi binni riguite ique ca gunaa nahuiini ique, cani nanna nabé huachee, cani rinanda irá ni rului'la'dxi'.

<sup>7</sup> Ruyubi ca iziidi ca de irá', pero qué zanda guiene ca ni dxandi'.

<sup>8</sup> Chiqué uyyu chupa bruju bicaa lú Moisés, Janes ne

Jambres. Casi bi'ni cabe que, zaqueca cayuni cani canaucaa lú ni dxandí yanna. Ma bicahui xquenda biaani cabe ne ma qué zaquiiñe cabe para lade cani runi cre.

<sup>9</sup> Peru qué zaguite cabe binni xadxí, purti zuuya ca nahuati si cabe, ne zeda iluxe cabe casi cani bicaa lú Moisés que.

*Ni na Pablu guni Timoteu*

<sup>10</sup> Peru lii, ma nanna chaahui lu ni bisiide' ne modo bibane', xi cá ique gune', ne xi rune cre. Qué huaxhacaladxe iruti', sínunque huayanaxhiee' irá', ne nannu irá ni udide

<sup>11</sup> ra uzabi nanda cabe naa, ne irá modo ucana'ya'. Ne laca nannu xi bizaaca ndaani guidxi Antioquía, Listra ne Iconio, pabiá' uzá nanda cabe naa, peru bilá Señor naa de irá ni.

<sup>12</sup> Zacaca zaca irá ni racala'dxi sa modo na Cristu Jesús, zazabi nanda cabe laaca'.

<sup>13</sup> Peru cani canauchee ne canausiguii la? ze dxi jma rusi zinitilú ca'. Caguite ca binni ne caguite binidxaba laaca'.

<sup>14</sup> Peru lii, qué chi undaa lu ni ma biziidi lu', ni nanna dxichi lu dxandí'. Runibióu' ni bisiidi ni lii,

<sup>15</sup> purti dede dxi nahuiini lu biziidi lu ni cá lu Xqui'chi Dios ni zanda usiene lii xi-modo ilá binni ra guni cre Cristu Jesús.

<sup>16</sup> Irá Xqui'chi Dios, Espíritu Santu uní' xi icá, ne nuu ni para usiidi ni laanu ne para ulidxe ni laanu ne para gabi

ni laanu paraa cuché' nu ne para acané ni laanu ibani nu casi na Dios,

<sup>17</sup> ti iziidi chaahui ca xpinni Dios para ganda guni irá ni riree ndu.

## 4

<sup>1</sup> Zeeda Jesucristu casi rey para cuidxi cuenta irá binni. Nezalú be ne nezalú Dios cayabe lii

<sup>2</sup> güi lu stiidxa be. Byuí ni ora tiisi, pa ruluí zacaa cabe ni o neca ruluí qué zacaa cabe ni. Bicuudxi laacabe, bilui' laacabe paraa cuchee cabe, ne bilidxe laacabe. Záca bisiidi laacabe sin ixhacala'dxu'.

<sup>3</sup> Purti zadxiña dxi ma qué zaná cabe ucaa diaga cabe cani rusiidi ni dxandí', sínunque zuyubi cabe adxé adxé tu usiidi laacabe ni chu'la'dxi cabe.

<sup>4</sup> Zudxii deche cabe ni zeeda de Dios ne jma zacá ique cabe ni riguixhe binni.

<sup>5</sup> Peru lii, biiya qué chi utiixhi cabe i'cu', ne cadi ix-hacala'dxi lu enda naná ni gueeda luguiá lu'. Bicaa ique güi lu stiidxa Cristu ne bi'ni irá ni bisaana Dios ladxi nou'.

<sup>6</sup> Ma nanna mayaca guuti cabe naa. Ma cadxiña xhiora'.

<sup>7</sup> Bine xhiiña Dios dede bia' ra gunda ti', qué nixelete de ni rune cre. Casi ñaca bixooñe ne irá stipa stinne', ne yanna ma yendaya lu raya.

<sup>8</sup> Cabeza ti premiu naa saca bine xhiiña jneza. Zudii Señor ni naa dxi ganda dxi icaa ni. Laa huaxa juez ni runi jneza. Cadi para naa

sia' napa be, sínueque ne para  
irá ni cá lú guiuba ganda dxi  
gueeda be partí nadxii laabe.

*Ra canaba Pablu gueeda  
Timoteu*

<sup>9</sup> Biyubi gueda guuyu naa  
nagueenda.

<sup>10</sup> Partí ma bisaana Demas  
naa. Jma cá ique ni nuu  
ndaani guidxilayú ri', ne ma  
ze Tesalónica. Crescente ze  
Galacia, ne Titu ze Dalmacia.

<sup>11</sup> Ma Lucas si nuu ne  
naa rari'. Biyubi Marcu  
guedanéu ora gueedu', partí  
zanda acané naa lu xhiña  
Dios.

<sup>12</sup> Ma ze Tíquico Efeso. Naa  
biseenda laa raqué.

<sup>13</sup> Dané xhamarra ni  
bisaana Troas, ralidxi Carpu,  
ora gueedu', ne ca libru  
stinne'. Ne qué chi usiaandu  
ca gui'chi stinne'.

<sup>14</sup> Nabé huayuniná Ale-  
jandru, herrero que, naa.  
Zuquixe Señor irá ni laabe.

<sup>15</sup> Biiya gá lii ne laabe,  
partí nabé huacaa lú be ni  
rusi'di nu.

<sup>16</sup> Primé tiru bichiña cabe  
naa ra nuu justicia iruti qué  
ñacané naa. Irá ca bisaana  
ca naa. Rinaba lu Dios cadi  
uquixe ni laacabe.

<sup>17</sup> Peru Señor huaxa qué  
nixele de naa ne ucané naa  
biree de raqué. Casi ñaca  
bilá naa de rúa lion, ne zacá  
gunda yegüé stiidxa Cristu  
lade irá cani cadi judíu.

<sup>18</sup> Ne nanna zulá Señor naa  
de irá ni nadxaba', ne zapa  
chaahui naa dede idxiña dxi  
chiné naa ibá' ra runi man-  
dar. Qué chu' dxi guiaana  
dxi nu de usisaca nu laabe.  
Amén.

*Diuxi ne ndaaya'*

<sup>19</sup> Bidii diuxi Prisca ne  
Aquila ne irá binni lidxi  
Onesíforo.

<sup>20</sup> Biaana Erasto ndaani  
guidxi Corinto. Ne Trófimo  
huará, bisaana laa Mileto.

<sup>21</sup> Biyubi gueedu ante  
ganda ca beeú nanda. Ucuua  
stiuxi Eubulo, Pudente,  
Linu, Claudia, ne ca xcadxi  
hermanu.

<sup>22</sup> Chu' né Señor Jesucristu  
lii ne cu' Dios ndaaya irá tu.  
Amén.

# GUI'CHI BICAA SAN PABLULU TITU

<sup>1</sup> Naa nga Pablu ne naca apóstol sti Jesucristu para acaniá cani ma gulí Dios, ti guni cre chaahui ca', ne usiide laaca ni dxandí', ti ibani ca modo na be

<sup>2</sup> ne iccaa ca enda nabani ni qué zaluxe. Qué rusiguii be, ne dede dxi ca'ru cha guidxilayú uní' be zacaa nu enda nabani ca.

<sup>3</sup> Bidxiña dxi uluí' be ni binni ne bisaana be ni ladxi naya güe ni. Cayune ni purti laabe gudxi be naa gune ni. Laabe bilá be laanu.

<sup>4</sup> Cucaa gui'chi ri lú lu, Titu, xiiñe neza Jesucristu ni runi cre nu. Rinaba lu Dios Bixhoze nu ne Señor Jesucristu, ni bilá laanu, cu' ndaaya lii ne quixhe dxí ladxitdó' lo'.

*Xi irá naquiiñe guni Titu Creta*

<sup>5</sup> Bisaana lii lu isla Creta para unduuxe lu dxiiña bizulú nu, ne irá guidxi cui lu ti hermanu gola, quixhe lu laa sa niru lú ca xpinni Cristu ni nuu ndaani guidxi que, casi bisiide lii gu'nu ni.

<sup>6</sup> Naquiiñe cui lu tobi ni nabani jneza, ni qué gapa chupa chonna gunaa sínueque xheela si. Ne gu'yu pa runi cre ca xiiñi be Cristu ne pa qué riní' binni laaca purti rizá gueela ca ne qué ruzuuba ca diidxa'.

<sup>7</sup> Purti ora ma naca cabe xaíque la? ma biaana xhiñá

Dios lu ná cabe. Nga runi naquiiñe gaca ni tobi ni nabani jneza, ne cadi tobi ni ruyubi gaca ni na si, nin ni nandá' ique, nin ni rixudxi, nin ni ruyubi diidxa', ne nin ni runi ni cadi jneza para si gapa bidxichi.

<sup>8</sup> Sínueque gaca ni tobi ni nuu para uchagalú binni ora tiica gueda guiete ralidxi, ni nacha'hui', ni nanna ucueeza laa, ne ni runi jneza, ni rucaala'dxi guni ni na Dios, ne qué runi ni na ique.

<sup>9</sup> Gaca ni tobi ni runi cre stiidxa Cristu casi pe biziidi ni, ti ganda acané xcaadxi ra usiidi ni, ne laca para ganda useegu ruua cani rucaa lú ni.

<sup>10</sup> Purti cayasa stale cucaa lú ni yanna, jma rusi lade ca judíu ni ma bini cre Cristu. Rini' ca ni zeeda si de xiga ique ca', ne riguite ca binni.

<sup>11</sup> Ca nga nga naquiiñe guieegu ruua, purti canauchenda ca caadxi hermanu ne idubi familia sti'. Cusiidi cabe laaca ni cadi jneza, ne cayuni cabe ni para si gapa cabe ni idxá cue' cabe.

<sup>12</sup> Laca tobi de laacabe, ti hombre nuu xpiaani de Creta, uní' xi naca ca binni xquidxi ra na: "Ca binni laadu nisi rusiguii ca'. Zeda gaca ca casi bi'cu', nalá ca ne nachaaba ca'."

<sup>13</sup> Ne dxandí ni, nga runi cayabe lii aca néu laacabe naduxhu', ti iziidi cabe chi nanda cabe stiidxa Cristu jneza,

<sup>14</sup> ne ma cadi ulabi cabe irá cuentu ribee ca judíu, nin

ni riguixhe binni ni qué riná  
iccaa ni dxandí'.

<sup>15</sup> Para cani cá ique  
ni nacha'hui la? irá ni  
nacha'hui para laaca'. Peru  
para cani qué runi cre, cani  
cá ique ni nadxaba la? gasti  
ni nacha'hui para laaca',  
purti dede xquenda biaani  
ca ne ladxido' ca nayuudxu'.

<sup>16</sup> Na ca runi cre ca Dios,  
peru pur ni runi ca rihuinni  
cadi dxandí ni. Feu xpia' ca',  
ne qué runa ca'. Qué za-  
quiñe ca para ni nacha'hui'.

## 2

*Ni usiidi Titu ca hermanu*

<sup>1</sup> Peru lii bisiidi casi na  
stiidxa Cristu.

<sup>2</sup> Bisiidi ca hermanu ni ma  
nagola sa ca jneza, ucueeza  
ca laaca', ne cu' xpiaani ca'.  
Cadi iree chu ca de ni runi  
cre ca', ne cadi guiaana dxí  
ca de ganaxhii saa ca', ne  
cadi iree ca gana.

<sup>3</sup> Zaqueca bisiidi ca her-  
mana ni ma nagola sa modo  
naquiñe sa ca xpinni Dios.  
Cadi iní' cabe binni ne cadi  
xhudxi cabe, sínunque usiidi  
ca ni jneza pur modo ibani  
ca',

<sup>4</sup> para gu'ya ca gunaa ni  
nahuiini ru', ti ganaxhii ca  
xheela ca ne ca xiñi ca',

<sup>5</sup> cu' xpiaani ca' ne guiaana  
ca para si xheela ca', guni  
ca xhiña ca jneza, gaca ca  
nacha'hui ne binni, ne uzu-  
uba ca stiidxa xheela ca', ti  
qué gapa binni xi pur iní'  
stiidxa Dios.

<sup>6</sup> Laca bisiidi cani nahuiini  
ru cu' xpiaani'.

<sup>7</sup> Uzá jneza, bilu' laacabe  
modo ibani cabe. Ne za-  
queca ora usiidi lu laacabe,  
bisiidi laacabe jneza ne cadi  
quite neu laacabe.

<sup>8</sup> Biyubi modo iní' lu ti qué  
gapa cabe xi pur iní' cabe lii.  
Zacá zatuí lú tutiica ucaa lú  
ni rusiidi lu', purti qué zadxe-  
ela ximodo ga'ni ná laanu.

<sup>9</sup> Bilidxe cani runi xhiña  
binni uzuuba ca stiidxa xpix-  
uaana ca', ne guni ca ni  
usieche laaca'. Cadi icabi  
ruaa ca',

<sup>10</sup> nin cuana ca sti xpix-  
uaana ca', sínunque guni ca  
xhiña ca jneza, ti zacá gu'ya  
irá binni pabiá' sicarú stiidxa  
Dios ni bilá laanu.

<sup>11</sup> Ma bihuinni pabiá'  
nacha'hui Dios, ne pur enda  
nacha'hui stibe ca zanda ilá  
irá binni.

<sup>12</sup> Ne laca pur laani rusi-  
idi be laanu usaana nu irá  
ni bini nu dxi ca'ru gunibiá'  
nu laabe, ne irá ni riula'dxi  
binni guidxilayú guni, ti ma  
cadi ibani nu ndaani guidx-  
ilayú ri modo na ique nu,  
sínunque modo riula'dxi be,

<sup>13</sup> laga cabeza nu enda  
nayeche uní' be udii be  
laanu, o zanda gabi nu  
dxi idu'ya nu enda nandxó'  
guedané Jesucristu, Dios  
stinu ni bilá laanu.

<sup>14</sup> Laa bidii xpida pur  
laanu para bilá laanu de lu  
ná enda nadxaba', ne bisiá  
laanu para gaca nu xpinni  
pe' ne icá ique nu guni nu ni  
jneza.

<sup>15</sup> Bisiidi irá nga laacabe,  
ucané laacabe cadi cui sa  
cabe atrá, ne bilidxe laacabe,

qué chi dxi'bu'. Biiya gá qué uchee lu', ti qué gapa cabe xi pur ma qué ulabi cabe lii.

### 3

<sup>1</sup> Bisietenala'dxi laacabeuzuuba cabe stiidxa presidente ne cani runi mandar ndaani xquidxi cabe sin ucaa lú cabe laaca', ne chu' cabe para guni cabe intiica ni jneza.

<sup>2</sup> Cadi iní' cabe binni, ne cadi uyubi cabe diidxa', sínunque gaca cabe nadó', ne gaca cabe nacha'hui ne irá binni.

<sup>3</sup> Purti laanu laca guca nu nahuati chiqué, qué nuzu'ba nu stiidxa Dios, ne uzá renda nu, ucuá nu yaga lu ná irá enda nadxaba bilui'la'dxi nu guni nu. Bibani nu para si guniná nu stobi ne tidi nu lú, ne uca nañala'dxi saa nu.

<sup>4</sup> Peru bidxiña dxi bilui' Dios pabiá' nadxii laanu ra bilá laanu.

<sup>5</sup> Bilá be laanu cadi partibini nu xiixa enda nacha'hui, sínunque partí biá be laanu. Bisiá be ladxidó' no, bisaana be laanu casi nacubi ne bidij be Espíritu Santu laanu acané laanu ma cadi ibani nu casi bibani nu chiqué.

<sup>6</sup> Bichá tipa be ladxidó' no de Espíritu Santu pur ni bi'ni Jesucristu pur laanu.

<sup>7</sup> Ne zacá bixá stonda nu pur enda nacha'hui stibe, ne yanna ma cá lú nu udii be laanu enda nabani ni qué zaluxe.

<sup>8</sup> Dxandí ni, ne racaladxe gu'ya lu iziidi chaahui cabe ni, ti ucaa ique irá ni ma runi cre Dios guni jneza. Nga nga

ni risaca ne ni riquiñe para irá binni.

<sup>9</sup> Peru cadi udii lugar icaa yu né cabe diidxa huati, nin usirooba cabe historia sti ca bixhoze gola cabe nin tinde diidxa cabe pur ley sti Moisés, partí enda huati si nga riuu né cabe ne gasti zabee ndu cabe ne laani.

<sup>10</sup> Pa nuu tuuxa nisi rutinde ca hermanu la? udinde né laa bia' chupa tiru, ne pa qué na ulabi lii la? uladxi laa.

<sup>11</sup> Ne bia' ni bi'ni be ca, nannu ma biree chu be, ne laca laabe biyubi be quiba donda ique be.

<sup>12</sup> Chi useenda Artemas o Tíquico ra nuu lu'. Casi chindá cabe bi'ni pur chi guuyu naa Nicópolis, partí raqué rabe utiide ca beeu nanda ri'.

<sup>13</sup> Ucané Apolo ne abogadu Zenas bia' ganda. Bidii ni caquiiñe ca ti cadi guiaadxaasti laaca neza che ca'.

<sup>14</sup> Ne zacá zaziidi ca xpinni nu gaca nacha'hui ne acané cani caquiiñe', ti iquiiñe xpida ca'.

### Diuxi

<sup>15</sup> Irá ni nuu né naa rari cuseenda stiuxi lu'. Bidii diuxi irá cani nadxii nu, cani runi cre ni runi cre nu. Dios cu' ndaaya irá xixé tu. Amén.

# GUI'CHI BICAA SAN PABLULU FILIMON

<sup>1</sup> Naa nga Pablu. Yeguayuaa purti cayune xhiiña Jesucristu. Naa ne Timoteu cucá' du gui'chi ri lú lu', Filimón, hermanu ni nadxii du, ni runi né laadu dxiiña tobi si,

<sup>2</sup> ne lú irá ca xpinni Cristu ni rie cultu rali'dxu', ne lú hermana Apia ne hermanu Arquipo ni runi né laanu xhiiña Dios.

<sup>3</sup> Dios Bixhoze nu ne Señor Jesucristu cu' ndaaya laatu ne quixhe dxí ladxidó' to.

*Pabiá' nadxii Filimón Señor*

<sup>4</sup> Cada inié nia Dios ruzeete lii ne rudiee diuxquixe laa,

<sup>5</sup> purti ma gunna pabiá' runi cre lu Señor Jesús ne pabiá' nadxii lu laa ne irá ca xpinni Dios.

<sup>6</sup> Nuu tu bini cre ra bi'ya pabiá' zinandu ni runi cre lu'. Rinaba lu Dios acané laacabe guiene chaahui cabe pabiá' sicarú irá ni rudii Cristu ca xpinni.

<sup>7</sup> Nabé nayeché nuaa', ne ma nuu gana ladxiduá' pur modo huayanaxhii lu ca xpinni Dios, purti huasieche lu ladxidó' irá ca'.

*Canaba Pablu Filimón uchagalú Onésimo*

<sup>8</sup> Yáquexa naca apóstol sti Cristu ñanda niguixhe xi nu'nu',

<sup>9</sup> Peru jma racaladxe inaba ni lii purti nadxii saa

nu. Tobi la? ma nagola', ne stobi, yeguayuaa purti cayune xhiiña Cristu.

<sup>10</sup> Rinaba lii pur Onésimo xiiñe neza Cristu. Ndaani lidxi guiiba ri uca be xiiñe ra ucaniá laabe bini cre be.

<sup>11</sup> Chiqué qué niquiíñe be de esclavu stiu', peru yanna ma zaquiíñe be para lii ne para nää.

<sup>12</sup> Cudxigueta laabe ra nuu lu'. Bichagalú laabe casi nuchagalú lu naa.

<sup>13</sup> Ñacaladxe ñaana nia laabe ra nuua ri', ra yeguayuaa purti byue stiidxa Cristu, para ñacané be naa casi ñacanéu naa pa ñuu lu rari'.

<sup>14</sup> Peru qué zune gasti sin ganna xi nou'. Qué racaladxe gu'nu xiixa purti si cayabe ni lii, sínunque purti guiale ni de ndaani ladxidó' lo'.

<sup>15</sup> Zándaca bixele be de lii nadxí huiini ti icoou piou' laabe yanna.

<sup>16</sup> Ma cadi casi esclavu si sínunque ma casi bi'chi lu ni nadxii lu'. Nadxiee laabe, lii jma rusi naquiiñe ganaxhii lu laabe. Gupa laabe casi xpinni lu ne casi bi'chi lu neza Señor.

<sup>17</sup> Yanna, pa napu naa casi tobi ni runi neu dxiiña tobi si la? bichagalú laabe casi nuchagalú lu naa.

<sup>18</sup> Ne pa huayuni be lii xiixa o nuzaabi be lii la? naa quixe ni.

<sup>19</sup> Rarí naa pia' cucaa ndi': Naa quixe ni, sin gabe lii laca nuzaabi lu naa xpida lu'.

<sup>20</sup> Bi'ni ni canaba lii ri purti ma xpinni Señor lii.

Bisieche ladxiduá' casi enda  
bi'chi neza Cristu.

<sup>21</sup> Cucaa ndi lú lu', ti rabe  
zuni lu ni canaba ri', ne  
nanna zu'nu jma que nga.

<sup>22</sup> Laca rinaba lii guni  
chaahui lu ra guiaana'. Purti  
nanna canaba tu lu Dios  
chaa ra nuu tu, ne rabe  
zacabi be laatu. Zuseenda  
be naa ra nuu tu.

*Diuxi*

<sup>23</sup> Ucuua stiuxi Epafras ni  
yeguayuua nia partí cayuni  
xhiña Cristu Jesús,

<sup>24</sup> ne sti Marcu ne  
Aristarco ne Demas ne  
Lucas, cani cayacané naa.

<sup>25</sup> Jesucristu Señor stinu cu'  
ndaaya laatu. Amén.

# GUI'CHI UCUA LU CA BINNI HEBREU

*Xiiñi pe Dios beda iní' né laanu*

<sup>1</sup> Stale tiru ne stale modo huani' né Dios ca bixhoze gola nu. Chiqué, ora racala'dxi be gabi be laaca xixa la? uní' né be ti profeta para gabi ni laaca'.

<sup>2</sup> Peru yanna ri ma Xiiñi pe be biseenda be, beda iní' né laanu. Ne ma bisaana be idubi naca guidxilayú, ne irá xixé ni nuu, lu ná Xiiñi be, purti ne laa bizá' né ni laabe.

<sup>3</sup> Bia'ca nandxó' be nandxó' Xiiñi be, ne casi laabe Xiiñi be. Nandxó' Xiiñi be, ne laa naaze guidxilayú lu ná', ne ni iní' la? napa xidé gaca'. Ra biluxe bixhá Xiiñi be xpecadu nu, bigueta ra nuu be ibá', ne ma zuba cue' be ra cayuni mandar be.

*Jma risaca Xiiñi Dios que ca ángel*

<sup>4</sup> Jma bisisaca Dios laabe que ca ángel, purti Xiiñi laabe, ne nga runi dxi'ba be ca ángel.

<sup>5</sup> Qué ñuu dxi ñabi Dios tobi de ca ángel Xiiñi', peru Jesucristu gudxi be ni laa, na be:

Lii nga Xiiñe'.

Dede yanadxí zusihuinne Xiiñe lii.

Bigueta bizeete be Jesucristu sti tiru, na be:

Naa nga Bixhoze be, ne laabe nga Xiiñe'.

<sup>6</sup> Ne dxi biseenda be Xiiñi be lugola ndaani guidxilayú, uní' be na be:  
Irá ángel stinne zusuxibi xa ñee be.

<sup>7</sup> Chiqué bicaa ti profeta ca diidxa ri lu Xqui'chi Dios:  
Runi Dios ca ángel sti casi bi, ne nuu tiru runi be laaca casi bele.

<sup>8</sup> Peru ra riete Xiiñi Dios la? na ni bicaa salmo que rabi laabe:  
Lii nga Dios,  
ne qué ziuu dxi guiaana dxí de guni mandar lu',  
ne zuni mandar lu jneza.

<sup>9</sup> Rucaa ique lu guni lu ni nacha'hui',  
ne nanala'dxi lu ni nadxaba'.  
Nga runi ma bisieche Dios stiu' lii jma que irá xixé.

<sup>10</sup> Ne laca na ni bicaa salmo que rabi laabe:  
Señor, lii bizá' lu guidxilayú dxi uyá',  
ne laca lii nga bizá' lu ibá'.

<sup>11</sup> Zadxiña dxi initilú irá ni bizá' lu',  
peru lii nuu rou'.

Zio'xho guidxilayú ne ibá'  
casi rio'xho xhaba binni.

<sup>12</sup> Ne zutopa lu cani casi ru-topa binni xhaba,  
ne zaca cani nacubi.

Peru lii la? zaqué si nuu lu',  
ne qué zuchaa lu',

ne qué zazaa xhiza lu'.  
<sup>13</sup> Laca cá lu gui'chi ra na Dios rabi Xiiñi':

Gudá' cui gá lu cuee  
laga quixhe dxie irá cani ru-  
caa lú lii,  
dede ora ma biaba ca xa ñee lu'.  
Peru qué huayuu dxi gabí be tobi de ca ángel stibe zacá.

<sup>14</sup> Purti ca ángel la? espíritu si laaca', ne runi ca xhiiña be. Ruseenda be laaca rigacané ca ca xpinni be ni chi ilá.

## 2

### *Naquiïñe ulabi nu modo nexhe ilá nu*

<sup>1</sup> Nga runi laanu, yáquexa ma Xiiñi pe Dios beeda iní' né laanu la? jma pe naquiïñe ulabi nu stiidxa Xiiñi be ni byui' né cabe laanu que. Pacaa la? zándaca ixele nu de laani chaahui chaahui'.

<sup>2</sup> Chiqué la? ángel gudxi binni xi na Dios guni ca', ne bisaca ni uní' ca que. Purti tu qué nulabi ca diidxa que, ne qué ñuni ni na cani la? bisaba ná Dios laaca purti bichee ca'.

<sup>3</sup> Yanna, ñee na tu cadi jma nagueenda usaba ná be laanu pa qué ulabi nu stiidxa Señor Xiiñi be ni beeda ulá laanu que la? Purti nirudó' Señor uní' modo ilá binni. De raqué cani bina diaga ni de rrua be byui' né ca ni laanu, casi bina diaga ca ni.

<sup>4</sup> Laca bisihuinni Dios dxandí ni uní' cabe que purti bihuinni nuu né enda nandxó' sti laacabe, ne bi'ni cabe stale milagru ne ni bidxagayaa binni. Ne laca bidii laacabe Espíritu Santu para ucané laacabe, ne cada tobi bi'ni dxiiña bia' gracia bidii Espíritu que laa.

*Beda aca Cristu casi ca  
bi'chi'*

<sup>5</sup> Cadi ángel di gudixhe Dios guni mandar guidxilayú ora ma uca nacubi casi

bize'te du nagasi, sínuque binni.

<sup>6</sup> Lu ti salmo cá ra caní' né tobi Dios:

Tu naca hombre para guiete-nala'dxi lu laa.

Tu naca binni para ulabi lu laaca'.

<sup>7</sup> Lii bizá' lu laaca ne bi'ni lu laaca jma huaxié' que ca ángel,

peru cadi para guiaana ca zacá.

Nabé bisisaca lu laaca', de bisaanu irá xixé ni bizá' lu ladxi ná ca'

<sup>8</sup> para guni mandar ca ni.

Ne dxandí bisaana Dios irá ni nuu ndaani guidxilayú lu ná binni para guni mandar. Ca'ru sica guni mandar binni irá ni yanna ri', neca ma gudixhe be ni lu ná ca'.

<sup>9</sup> Peru ridu'ya nu Jesús, ma cayuni ni. Beda gaca be binni guidxilayú, ne laga nuu be guidxilayú la? laca uca be jma huaxié' que ca ángel. Bidii be lugar bininá enda guti laabe purti nga ni ucaladxi Dios, gati be jlugar irá xixé binni guidxilayú. Nga runi yanna ma nandxó' be ne nabé ma bisisaca Dios laabe.

<sup>10</sup> Dios bizá' irá xixé ni nuu, ne napa irá ni ladxi ná'. Peru bidii be Jesús Xiiñi be beda acaná, purti biiya be pa qué ñacaná Xiiñi be la? que ñanda niquiiñe para nizá niru lú irá ca xpinni ni chi nduu ra nuu be.

<sup>11</sup> Purti tobi si Bixhoze cani bia ladxidó' ne ni bisiá ni que, ne nga runi qué rituí lú guni bi'chi ca xpinni.

<sup>12</sup> Cá ni lu gui'chi ra na be rabi be Bixhoze be:  
Zusiide ca biche de lii,  
ne ra idxiña ca zuunda cantú para usisaca lii nezalú ca'.

<sup>13</sup> Ne nuu sti lugar ra na be:  
Dios si cá lua'.  
Ne bigueta na be:  
Rarí nuaq nia ca xiiñe ni bidii Dios naa.

<sup>14</sup> Binni guidxilayú laanu.  
Laabe laca beda gaca be binni guidxilayú para gunda guti be. Ne ra guti be que, gudixhe dxí be lu enda nandxo' sti binidxaba', partí chique la? binidxaba nga gunaaze dxiichi enda guti lu ná'.

<sup>15</sup> Bi'ni Jesús zaqué ti ma qué idxibi nu enda guti, partí nuu binni de tantu ridxibi gati rulu' ma naaze enda guti laa idubi nabani.

<sup>16</sup> Cadi beeda Jesús ndaani guidxilayú para acané ca ángel, sínunque beda acané be cani za de Abraham.

<sup>17</sup> Gupa be xidé guca be casi pe ca bi'chi be, partí zacá si zanda guía be laanu, ne uzuhuaa be lu Dios pur laanu casi runi ti sacerdote gola ni runi xhiiña jneza. Ne laca zacá gunda gudixe be ni biché' nu.

<sup>18</sup> Bi'ni binidxaba pur nuchee be, ne naná guca ni para laabe. Nga runi zanda acané be cani cuquiinde binidxaba laa.

### 3

*Jma risaca Jesús que Moisés*

<sup>1</sup> Hermanu ca', ne laatu zeeda tu lade cani ulee chu

Dios para laa. Nga runi laguietenala'dxi Cristu Jesús. Biseenda Dios laabe guidxilayú, beda gaca be sacerdote gola stinu.

<sup>2</sup> Jneza bi'ni be irá ni biseenda Dios laabe beda guni be ndaani guidxilayú, casi bi'ni Moisés chique. Laca jneza bi'ni ne gupa chaahui ca xpinni Dios.

<sup>3</sup> Peru qué zanda uchaaga nu Moisés Jesús partí jma risaca Jesús que laabe, zanda gabí nu casi ti yoo, jma risaca xpixuaana ni que cani runi si dxiiña ndaani ni.

<sup>4</sup> Irá yoo napa xpixuaana', peru Dios nga xpixuaana irá xixé ni nuu.

<sup>5</sup> Dxandí bi'ni Moisés xhiiña Dios xpixuaana jneza, ne gupa chaahui ca xpinni be, ne uní' ni gudxi be laa iní', ni chi tidxi be binni.

<sup>6</sup> Peru Cristu la? Xiiñi pe Dios laa ne runi xhiiña Bixhoze jneza. Bisaana Bixhoze be laabe gu'ya be ca binni lidxi. Laanu nga ca binni lidxi Bixhoze be pa qué usaana nu de guni cre nu laabe ne cueza nu ne stale enda nayeche dxi gueda caa be laanu.

*Ra naguixhe Dios iziila'dxi ca xpinni*

<sup>7</sup> Guietenala'dxi nu ra cá lu Xqui'chi Dios ni uní' Espíritu Santo. Ndi nga na be:

Pa iní' né Dios laatu yanadxí,

<sup>8</sup> cadi guni tu ladxitó' to naguidxi casi bi'ni ca bixhoze gola tu dxi uzá ca ndaani gui'chi ne bichiichi ca laabe.

<sup>9</sup> Casi na be:

Idubi naca cuarenta añu bichiichi cabe naa, ne biyubi cabe pabiá' zanda guna huantar laacabe, neca biiya cabe irá ni bine para laacabe ca dxi que.

<sup>10</sup> Nga runi bidxiiche nia laa-cabe ne gudxe óraque: "Nisi canauchee ca binni ri".

Qué riná ca guni ca ni rabe'."

<sup>11</sup> Nga runi bidxiiche nia laa-cabe

ne bine ti juramentu, qué ziuu dxi chu' cabe ra nudiee laacabe para niziila'dxi cabe.

<sup>12</sup> Yanna hermanu ca', laguuya gá laatu, cadi laca aca ladxidó' to nadxaba' ne qué guni cre tu Dios ni nabani, pacaa zaxele tu de laa.

<sup>13</sup> Ni guni tu la? cada tobi ulidxe stobi irá dxi laga zanda, ti cadi uchee tobi de laatu sin ganna, ne aca naguidxi ladxidó', ne ma qué ulabi Dios.

<sup>14</sup> Purti naca pe nu xpinni Cristu, pa qué icha'cha nu de ni runi cre nu, cásica bini cre nu dxi ucuua nu stiidxa'.

<sup>15</sup> Sti tiru cusietenala'dxe laatu ni cá lu Xqui'chi Dios ra na:

Yanadxí ca, pa iní' né Dios laatu,

cadi guni tu ladxidó' to naguidxi

casi bi'ní cani bichiichi laabe que.

<sup>16</sup> Tuu nga cuzeete be ra na be bina diaga stiidxa Dios ne qué nulabi ni. Cuzeete be cani ulee Moisés ndaani guidxi Egipto.

<sup>17</sup> Nabé bidxiichi né Dios laacabe idubi cuarenta añu uzá cabe ndaani gui'xhi que, purti qué ñaana dxí cabe de nuchee né cabe laa. Nga runi ndaani gui'xhi que guti cabe.

<sup>18</sup> Purti bi'ni Dios ti jura-mentu, qué zuguu laacabe ra niziila'dxi cabe saca qué nuzuuba cabe stiidxa'.

<sup>19</sup> Zacá ridu'ya nu qué ñanda ñuu ca binni Israel ra ze ca para niziila'dxi ca purti qué ñuni cre ca'.

## 4

<sup>1</sup> Ne pa zacá uca ca binni que la? yanna laanu naquiiñe gataná nu ti qué aca nu casi uca cabe, ne ma qué chu' nu ra iziila'dxi nu, neca ma gudixhe Dios icaa nu ni.

<sup>2</sup> Purti laca ma bina diaga nu stiidxa be casi bina diaga cabe, peru qué niquiiñe ni para laacabe purti bina diaga cabe Peru qué qué ñuni cre cabe ni.

<sup>3</sup> Peru laanu ma ucuua nu stiidxa Dios, nga runi ziú' nu ra chi udii laanu para iziila'dxi nu, neca laacabe qué ñuu cabe. Casi cá ni lu gui'chi ra bizeete Dios de laacabe:

Bidxiiche nia laacabe  
ne bine ti juramentu ma qué  
ziuu dxi chu' cabe ra  
niziila'dxi cabe.

Qué ñuu ca binni que ra niziila'dxi ca', cadi ti ca'ru aca chaahui ni, purti maca gudixhe chaahui Dios ni dede dxi uyá' guidxilayú.

<sup>4</sup> Cá ca diidxa ri lu Xqui'chi Dios:

Lu gadxe gubidxa de cuzá'  
Dios guidxilayú bizi-  
ila'dxi de irá dxiiña ni  
bi'ní'.

<sup>5</sup> Ne laca cá ca diidxa ri lú ni:  
Qué ziuu dxi chu' ca ra nizi-  
ila'dxi ca'.

<sup>6</sup> Qué ñuu ca binni que ra  
niziila'dxi ca', purti qué  
nuzuuba ca stiidxa Dios,  
peru nuu tu ziuu purti ma  
gudixhe Dios aca ni.

<sup>7</sup> Udi'di ru stale iza de bichee  
ca binni que, bisiní' Dios  
David, ne cá ni lu Xqui'chi be  
ra na David:

Pa iní' né Dios laatu yanadxí  
cadi guni tu ladxidó' to  
naguidxi.

Zacá nanna nu gudixhe ru  
Dios ti dxi iní' né laanu, ne  
yanna nga laani.

<sup>8</sup> Purti dxi ma guti ca binni  
ni bichee que la? gunda  
biuu né Josué ca xcaadxi que  
ndaani guidxi ra na Dios izi-  
ila'dxi ca'. Pacaa la? qué  
nuzeete ru Dios sti dxi.

<sup>9</sup> Nga runi nanna nu chi udii  
ru Dios ca xpinni ra iziila'dxi  
chaahui ca'.

<sup>10</sup> Ne irá ni chu' raqué zazi-  
ila'dxi de xhiiña', casi bizi-  
ila'dxi Dios dxi binduuxe  
xhiiña bizá' guidxilayú.

<sup>11</sup> Nga runi huaziuu ti nu ndi  
para ganda chu' nu ra chi  
iziila'dxi nu, ne cadí guiaiba  
nu casi biaba ca binni ni qué  
nuzuuba stiidxa Dios que.

<sup>12</sup> Stiidxa Dios la? rudií  
enda nabani laanu, ne  
nandxó' ni. Jma naduxhu  
ni que ti puñal ni naduxhu  
iropa ladu, purti zanda  
guiaazi ni dede jma guete',  
dede ndaani dxita. Ora ma  
yendá stiidxa be que ndaani

ladxidó' no la? ribee irá  
ni nuu ndaani ladxidó' no,  
ne ni cá lu xquenda biaani  
nu, para ganna nu ximodo  
laanu.

<sup>13</sup> Gasti nuu ndaani guidx-  
ilayú ni qué zanda gu'ya  
Dios. Ruuya dxichi be irá  
xixé ni nuu, ne laabe cuidxi  
be cuenta laanu.

### *Jesús, sacerdote gola*

<sup>14</sup> Napa nu ti sacerdote  
gola ni nabé nandxó', ni riní'  
pur laanu, ne nga nga Jesús,  
Xiiñi Dios ni ma nuu ra nuu  
Bixhoze. Nga runi naquiiñe  
cadi icha'cha nu de ni ma  
runi cre nu.

<sup>15</sup> Beda gaca sacerdote gola  
stinu binni guidxilayú ne  
udi'di irá ni rididi nu. Xi si  
la? qué nuchee be. Zanda  
guiá be laanu purti nanna  
pe be xii nga nagana para  
laanu, ne zanda acané be  
laanu ora ma qué ganda sa  
nu.

<sup>16</sup> Nga runi zanda idxiña  
nu ra nuu Dios stinu ni  
nadxi laanu sin idxibi nu,  
purti nacha'hui be, riá be  
laanu, ne zacá zacané be  
laanu ora caqui'ñe nu tu  
acané laanu.

## 5

<sup>1</sup> Gulí Dios ca sacerdote  
gola para iní' né laa pur  
binni, ne para quixhe ca ni  
guedané binni usiga'de Dios  
lu altar, ne para idxiña né  
ca rini sti mani ni ma guti  
ra nuu Dios, para guiá ni  
huachee ca binni que.

<sup>2</sup> Peru qué rixhacala'dxi  
cabe cani qué riene ne cani  
ruchee, purti laca binni

guidxilayú laacabe ne laca zanda uchee cabe.

<sup>3</sup> Ne purti ruchee cabe la? laca naquiiñe quedané cabe ni usiga'de cabe Dios para guiaxa stonda cabe, casi runi cabe pur binni.

<sup>4</sup> Peru iruti zanda gudxiiba laca laa aca sacerdote gola, sínunque Dios nga ribí tu aca ni, casi ulí Aarón, primé sacerdote gola.

<sup>5</sup> Nin Cristu qué nudxiiba laca laa, sínunque Dios ulí laabe para aca be sacerdote gola stinu. Purti maca cá lu Xqui'chi Dios ra na rabi laabe:

Lii nga Xiiñe'.

Dede yanadxí zusihuinne Xiiñe lii.

<sup>6</sup> Ne laca cá sti lugar lu Xqui'chi Dios ra na rabi laabe:

Lii nga sacerdote gola, ne qué ziuu dxi guiaana dxi de aca lu ni, casi Melquisedec.

<sup>7</sup> Dxi uyyu Cristu ndaani guidxilayú, unaba lu Dios nulá laa de enda guti que, dede biina ne bicaa ridxi. Bicaa diaga Dios laabe purti qué nudxiiba be laca laabe sínunque bi'ni be irá ni na.

<sup>8</sup> Peru neca Xiiñi Dios laabe, udí'di be irá enda naná que para biziidi beuzuuba be diidxa'.

<sup>9</sup> Bi'ni be irá ni gudixhe Bixhoze be guni be, ne pur ni bi'ni be ca zalá irá caniuzuuba stiidxa be.

<sup>10</sup> Ne ma bi'ni Dios laabe sacerdote gola, casi Melquisedec.

*Nagana ibigueta tobi ni usaana de guni cre*

<sup>11</sup> Napa stale ni nusiide laatu de irá ndi', peru nagana usiene ni laatu yanna purti huaxié' rucaa ique tu iziidi tu.

<sup>12</sup> Ma xadxí de bini cre tu, mápeca ñanda nusiidi tu stobi, peru naquiiñe uzulú tu iziidi tu stiidxa Dios sti tiru, purti nin ra jma qué igana ca'ru guiene tu. Nuu tu casi ba'du', leche si zanda gue tu, qué zanda go to gueta.

<sup>13</sup> Purti cani re' leche si la? nga casi ca binni ni ca'ru guiene chaahui ni rusidi stiidxa Dios laanu guni nu, purti para laani, ba'du cayadxi ru laacabe.

<sup>14</sup> Peru cani ma zanda go gueta la? nga cani ma nanna uná nga jneza ne uná nga ni cadí jneza, purti ma biaa ca guni ca jneza.

## 6

<sup>1</sup> Nga runi, naquiiñe ucá' ique nu iniisi nu lu stiidxa Dios ne cadí guiaana nu casi cani deru cuzulú caziidi de Cristu. Dede dxi bizulú nu, ma bizi'di nu naquiiñe guni cre nu Dios ne usaana nu modo bibani nu dxi ca'ru gubibiá' nu stiidxa'.

<sup>2</sup> Ma bizi'di nu de enda riuu nisa, ne ma bizi'di nu ni runi ca hermanu gola, riguixhe ná ca luguiá sti hermanu para chu' ndaaya'. Ne ma nanna nu ziuu dxi guiasa binni de lade gue'tu', ne óraque zabidxi Dios cuenta laanu, ne qué ziuu dxi idxaa ni iní' be dxi que.

<sup>3</sup> Peru cadi tiisi ma bizi'di nu bia' cá, guiaana dxí nu, sínunque huaziuu ti nu ndi', pa na Dios.

<sup>4</sup> Pa gusaana tobi de guni cre Cristu la? iruti zanda uchiña laa ra nuu be sti tiru. Purti ma biene stiidxa be ne ma biiya enda nacha'hui sti Dios, ne ma ucuaa Espíritu Santu.

<sup>5</sup> Ma bidii cuenta galán stiidxa Dios, ne laca ma biene xi chi aca dxí usihuinni Dios enda nandxó' sti'.

<sup>6</sup> Ne pa usaana be irá ni la? ma qué zanda ru uchaa be laabe, ne casi ñaca cabigueta cucaa be Cristu lu cruz sti tiru pur ni nuu ndaani ladxidó' be, ne cayuni be para uxidxi cabe Cristu.

<sup>7</sup> Zeda aca binni casi ti layú ni re' irá nisa guie ni guiaiba lú. Pa cuee ndu layú que xiixa para ni runi dxiiña lú la? zaguu Dios ndaaya ni.

<sup>8</sup> Peru pa nisi guixi ne gui'xhi udii ni la? qué iquiiñe ni para gasti', ne ziaba dí sti Dios luguiá ni, ne zia'qui ni.

### Zuni Dios ni ma uní'

<sup>9</sup> Peru neca cayabe irá ndi laatu, hermanu ni nadxiee ca', nanna ziuu tu ndaaya', ti nanna ma bilá tu.

<sup>10</sup> Nanna jneza runi Dios, ne qué zusiaanda irá enda nacha'hui ni huayuni tu ca xpinni purti nadxii tu laa. Huayacané tu laaca ne cayané ru tu laaca dede yanna.

<sup>11</sup> Ne racaladxe cadi guiaana dxí nin tobi de laatu de guni xhiiña be ne enda

nayeche', ti icaa tu irá ni racala'dxi be udii be laatu.

<sup>12</sup> Cadi ichaaba tu, sínunque laguni casi cani ma napa ni bidii stiidxa Dios udii binni. Cacaa cabe ni purti runi cre cabe ne cadi caree cabe gana.

<sup>13</sup> Guietenala'dxi nu de dxí bidii stiidxa Dios Abraham. Bini jurar be pur laca laabe purti iruti ru jma nandxó' que laabe para ñuni jurar be pur laa.

<sup>14</sup> Na be rabi be Abraham: "Dxandí zaguua ndaaya lii ne zutale ca xiiñi lu'."

<sup>15</sup> Ne uleza Abraham sin nixhacala'dxi dede bidxiña dxí ucuaa ni uní' Dios zudii laa.

<sup>16</sup> Ora runi jurar binni la? runi jurar pur tobi ni jma nandxó' que laa, ti guni cre ni caní' né be que dxandí zuni be ni.

<sup>17</sup> Peru iruti ru jma nandxó' que Dios. Nga runi bini jurar be pur laca laabe ti ganna dxichi cani cudii stiidxa be que dxandí zuni be ni ma uní' be, ne qué zuchaa be gasti'.

<sup>18</sup> Ra uní' be ne ra bini jurar be que bisaa be ni chupa, ne nanna nu qué zusigui be. Ne irá nga rusieche laanu, laanu cani biyubi nu acané be laanu, ne cá lú nu ni bidii stiidxa be udii be laanu.

<sup>19-20</sup> Nanna dxichi nu zuni be irá ni ma uní' be, ne nga naga ni naaze dxichi ladxidó' no ti qué iniibi nu, casi rinaaze ancla barcu para qué iniibi. Nga runi ma cadi cá lú nu ni nnu ndaani guidxilayú ri', sínunque ni nexhe ibá' para laanu ra

ma nuu Jesús zuhuua lu Bixhoze pur laanu, ne qué ziuu dxi guiaana dxí be de aca be sacerdote gola casi Melquisedec.

## 7

*Jesús zeda gaca casi Melquisedec*

<sup>1</sup> Melquisedec ca nga uca rey de Salem, ne laca uca sacerdote sti Dios ni nandxó'. Guietenala'dxi nu ni uca dxi zeeda Abraham de ra yetixhe dxí ca rey que. Biree Melquisedec bichagalú laabe ne uluu ndaaya laabe.

<sup>2</sup> Oraque ulee be tindaa tindaa lu irá ni né be, bidii be laa casi ti diezmo ni ricaa sacerdote. Ni rini' lá Melquisedec la? "rey ni runi mandar jneza". Ne laca gudxi cabe laabe "rey ni riguixhe dxí lu enda ridinde", partii nga ni rini' diidxa Salem.

<sup>3</sup> Ra cá de laabe lu Xqui'chi Dios la? qué riete gasti de bixhoze be nin jñaa be nin bixhoze gola be, nin dxi gule be nin dxi guti be. Ne zacá zeda aca be casi Xiiñi Dios, partii qué riete pa uyuu dxi biree be de sacerdote gola.

<sup>4</sup> Laguuya si pabiá' bisaca be, partii dede Abraham bixhoze gola nu bidii laabe tindaa tindaa de lu irá ni guxha ca rey que.

<sup>5</sup> Lu ley sti Moisés cá, ulí Dios ca xiiñi Leví aca sacerdote, ne gudxi laacabe icaa cabe diezmo dede sti ca bi'chi cabe neca laca za ca de Abraham casi laacabe.

<sup>6</sup> Peru Melquisedec, neca cadi xiiñi Leví laa, ucuua diezmo ni bidii Abraham laa, ne uluu ndaaya Abraham. Abraham nda bidii stiidxa Dios laa.

<sup>7</sup> Peru rarí ridu'ya nu uluu Melquisedec ndaaya laabe, ne irá binni nanna jma risaca ni riguu ndaaya que ni riuu ndaaya'.

<sup>8</sup> Ca sacerdote ni riccaa diezmo yanna ri la? binni guidxilayú laaca', ne zadxiña dxi gati ca', peru Melquisedec qué riete lu Xqui'chi Dios pa guti.

<sup>9</sup> Ca xiiñi Leví ni nuu de sacerdote yanna la? rudii binni laaca diezmo. Peru zanda gabi nu casi ñaca laca bidii cabe diezmo Melquisedec chique', ra bidii Abraham ni laabe, dxi yechagalú be laa que.

<sup>10</sup> Parti neca ca'ru gale Leví chique', peru xiiñi Abraham laa, ne ra bidii Abraham diezmo Melquisedec la? casi ñaca ne laabe bidii be.

<sup>11</sup> Pa qué ñuu sacerdote ni za de Leví, qué ña'ta di ley. Yanna pa ñanda nusiá cabe ladxitdó' binni bi'ni ni na ley que la? ma qué niquiñe ñeeda sti sacerdote casi Melquisedec ni cadi za de Aarón.

<sup>12</sup> Ne ra bidxaa sacerdote la? laca bidxaa ley.

<sup>13</sup> Ne sacerdote cubi ni cuze'te nu ri la? nga Jesucristu, ne cadi za be de familia sti Leví, sínunque za be de adxé xiiñi Israel, ne nin tobi de familia stibe qué ñaca sacerdote.

<sup>14</sup> Parti irá binni nanna

gule Jesús Señor stinu lade ca xiiñi Judá, ne qué ñuu dxi nuzeete Moisés Judá dxi uní tuu nga aca sacerdote.

<sup>15-16</sup> Ne rihuinni dxichi jma risaca Cristu que ca xcaadxi sacerdote, partí casi Melquisedec laa. Guca be Sacerdote Peru cadi partí gule be lade familia ni na ley gaca sacerdote, sínunque partí nandxó' be; qué ziuu dxi gati be.

<sup>17</sup> Partí cá lu Xqui'chi Dios ra na rabi Xiiñi':

Lii nga sacerdote gola casi Melquisedec,  
ne qué ziuu dxi iree lu de laani.

<sup>18</sup> Zacá ma ucuá ná ley ni guta chiqué partí qué ñanda ñuni gastí'.

<sup>19</sup> Qué ñanda nusiá ni ladxidó' binni. Nga runi gudixhe Dios sti modo ni dxandí zaquiñe para uchiña laanu ra nuu.

<sup>20-21</sup> Dxi uní' Dios tu aca sacerdote lade ca xiiñi Israel la? qué ñuni di juramentu.

Peru dxi uní' be aca Cristu sacerdote la? dxi que huaxa bi'ni be juramentu. Casi cá lu Xqui'chi be ra na:

Ma bi'ni Dios ti juramentu, ne qué ziuu dxi uchiá ni.

Ne ndi nga na be dxi bi'ni be juramentu que, na be rabi be Xiiñi be:

Lii nga sacerdote casi Melquisedec,

ne qué ziuu dxi iree lu de gacu ni.

<sup>22</sup> Nga runi nanna dxichi nu jma zanda uchiña Jesús laanu ra nuu Dios que ca sacerdote uyuu chiqué.

23 Dxi ca'rú gueeda Jesús la? qué ñanda ñaana ti sacerdote si, partí rati, ne óraque riuu stobi adxé.

24 Peru qué ziuu dxi gati Jesús, nga runi qué ziuu dxi iree de aca sacerdote stinu.

<sup>25</sup> Zanda ulá be cani uchiña be ra nuu Dios ne ma qué zanitilú ca', partí qué ziuu dxi gati be, ne nuu be para iní' né be Dios pur laaca'.

<sup>26</sup> Ne sacerdote casi pe laabe ca, nga ni caqui'ñe nu. Nacha'hui be ne nayá ladxidó' be, partí qué ñuu dxi nuchee be. Qué ñaca né be cani cuchee tobi si, ne ma bidxiiba Dios laabe ibá'.

<sup>27</sup> Adxé laabe para ca sacerdote ni uyuu chiqué, partí ca ngue la? irá dxi gupa ca xidé biiti ca tuuxa maní', ne biné' ca rini stime lu altar para usiga'de ca Dios. Nirudó' runi cabe ni para guiaxa xpecadu pe cabe, ne óraque ru guni cabe ni para sti binni. Peru Cristu la? ti tiru si bisiga'de rini sti' Dios pur irá nu, dxi guti be que, ne ma cadi naquiñe guni ru be ni sti tiru.

<sup>28</sup> Cani uca sacerdote gola partí cá lu ley sti Moisés aca ca ni la? bichee ca', partí binni guidxilayú laaca'. Peru bi'ni Dios ti juramentu ra gudixhe aca Xiiñi sacerdote gola. Nga nuu jlugar ley yanna. Ne qué ñuu dxi nuchee Xiiñi be que.

<sup>1</sup> Lade irá ni cucaa lu  
gui'chi ri la? ndi nga ni  
jma racaladxe ganna tu:  
iruti ru stobi casi Jesucristu,  
sacerdote gola stinu ni ma  
nuu ibá', zuba cue' Dios ni  
nandxo'.

<sup>2</sup> Ma nuu be de sacerdote  
ndaani ti yu'du ni dxandí  
yu'du ni biciú Dios, cadi ni  
biciú binni.

<sup>3</sup> Irá sacerdote gola nuu  
para quixhe ca ni guedané  
binni usiga'de Dios lu altar,  
ne para idxiña né ca rini  
sti mani ni ma guti ra nuu  
Dios para guia ni huachée ca  
binni que. Jesucristu, sac-  
erdote gola stinu, laca gupa  
xidé bisiga'de xiixa Dios.

<sup>4</sup> Pa ñuu ru be ndaani  
guidxilayú la? qué ñaca be  
sacerdote purti nuu ru sacer-  
dote caguixhe ni chi usiga'de  
cabe Dios casi na ley sti  
Moisés guni cabe.

<sup>5</sup> Peru yu'du ni nuu ca sac-  
erdote ndaani la? zeda aca  
ni casi bandá si sti yu'du ni  
nuu ibá' que. Guietenala'dxi  
nu xi guadx Dios Moisés dxi  
ma chi ucuí yu'du que, na  
Dios rabi laabe: "Biiya gu'nu  
ni casi pe ni bilué lii lu dani  
que."

<sup>6</sup> Peru jma risaca xhiiña  
Cristu que xhiiña ca xcadaxi  
sacerdote que, purti ra bi'ní  
Dios laabe sacerdote gola la?  
laca gudxhe ti modo cubi  
chu' né nu laa tobi si, ti modo  
jma galán para ni gudxhe ra  
bidii stiidxa Moisés que. Jma  
galán ni purti jma naro'ba ni  
bidii stiidxa be guni be para  
laanu.

<sup>7</sup> Pa ñaca ñanda ñuu né

binni Dios tobi si modo  
gudixhe ni chiqué la? ma  
qué niquiñe niguixhe sti  
modo yanna.

<sup>8</sup> Bizeete be qué niquiñe  
ni guta chiqué purti nisi  
bichee ca binni que. Cá lu  
Xqui'chi be ra na be:  
Binni Israel ne binni Judá ca':  
Zadxiña dxi quixhe sti modo  
chu' né tu naa tobi si,

<sup>9</sup> peru cadi casi gudxhe para  
ca bixhoze gola tu dxi  
uluua naya ná ca para  
ulee laaca de ndaani  
guidxi Egipto.

Purti qué ñuni ca ni gudxhe  
laaca ñuni ca'.

Nga runi bisaana laaca'.

<sup>10</sup> Ndi nga chi gune para ca  
binni Israel dxi idxiña  
dxi que:

zucaa ca mandamiento  
stinne lu xquenda  
biaani ca ne ndaani  
ladhidó' ca',

ne óraque huaxa zapa ca naa  
de Dios stica',  
ne zaca ca xpinne'.

<sup>11</sup> Ne óraque ma cadi  
naquiene usiidi cabe  
bi'chi cabe nin binni  
xquidxi cabe para  
gunibía' ca tuu nga  
Señor,

purti irá cabe zunibía' cabe  
naa dede ni jma  
nahuiini hasta ni jma  
huaniisi lade cabe.

<sup>12</sup> Zuxhaya stonda cabe,  
ne qué ziuu dxi guietenal-  
adxe pa uyuu dxi  
bichee né cabe naa.  
Nga nga ni guadx be laaca'.

<sup>13</sup> Ne ra bizeete be ti modo  
cubi, rihuinni para laabe ma  
bio'xho stobi que, ne ora ma

bio'xho xiixa la? ma chi initilú.

## 9

*Yu'du ni nuu ndaani  
guidxilayú ne ni nuu ibá'*

<sup>1</sup> Yanna rarí chi du'ya nu ximodo uyuu né Dios ca xpinni chiqué, ne ximodo nuu né laanu yanna. Chiqué gudixhe be ximodo guni ca binni que cultu, ne bizá' cabe ti yu'du para aca ni ndaani'.

<sup>2</sup> Bicuí cabe ti carpa ne nga uyé de yu'du stícabe. Naca ni chupa ndaa, ne ndaani tindaa que la? nuu candeleru de oro ne mexa ra nexhe ca pan ni ma uyuu ndaaya'. Ne rabi cabe ni "Lugar Ra Nandxó".

<sup>3</sup> Para chu' cabe ndaani sti ndaa que la? napa cabe xidé tidi cabe ti cortina, ne raqué nga rabi cabe ni "Lugar Ra Jma Nandxó".

<sup>4</sup> Nuu ti altar de oro ndaani ni ra riguu cabe gu'xhu', ne laca nuu ti gueña de oro ni napa cabe casi ti seña ma bidii stiidxa Dios laacabe aca cabe xpinni, ne ndaani ni nuu ca guie ra cá ca mandamiento ni bidii Dios Moisés que, ne laca nuu ti rii de oro ra dxá caadxi maná ne vara sti Aarón ni ulee bandaga chiqué.

<sup>5</sup> Ne luguiá gueña que zuhuua chupa figura casi ángel sicarú dede ria'qui biaani', ne ruchii bandá sti xhiaa cani ra ruchá cabe rini sti ca mani ni rusiga'de cabe Dios. Peru nagasi qué zanda uze'te nu xi riní' irá ni.

<sup>6</sup> Zacá nga nexhe chaahui irá ni nuu ndaani carpa que, ne irá dxi riuu ca sacerdote ndaani primé ndaa que para riguni xhiiña'.

<sup>7</sup> Peru rairopa ndaa que la? sacerdote gola si riuu, ne neca laabe la? peru ti tiru si zanda chu' be lu tubiza. Ne para chu' be, napa be xidé chiné be rini ni usiga'de be Dios pur irá ni bichee ca binni que iza que sin ganna, ne ni bichee be.

<sup>8</sup> Racá rihuinni cusiidi Espíritu Santu laanu, laga zuhuua ru primé ndaa que la? qué ñanda ñuu binni Lugar Ra Jma Nandxó' que.

<sup>9</sup> Ne irá nga nuu casi ti ejemplu para laanu yanna. Purti neca biiti ca sacerdote que mani', ne bichá ca rini stime lu altar, peru neca zacá, qué ñanda ña pe ladxidó' ca binni que.

<sup>10</sup> Bisiidi ca sacerdote que laaca xi na ley zanda go ca', ne xi zanda gue ca ne ximodo usiá ca ladi ca', peru biquiñe irá nga laga si quixhe Dios ni jma riquiñe'.

<sup>11</sup> Peru ma beeda Cristu, ne ma laa naca sacerdote gola. Ne pur laa ma ucuaa nu irá ni galán ni bidii stiidxa Dios chiqué zudii binni, ne yanna ma cayuni be dxiiña ndaani yu'du stibe, yu'du ni jma galán ne jma nandxó' que irá yu'du', purti cadi binni bizá' ni, ne cadi ndaani guidxilayú nuu ni.

<sup>12</sup> Ma adxé laabe para ca xcaadxi sacerdote gola que, purti ra biuu be ndaani Lugar Ra Jma Nandxó' que la?

maca tobi si tiru biuu be, peru qué ñuu né be rini sti chiva nin sti yuze huiini', sínunque rini pe stibe, ne nga nga ni bilá laanu.

<sup>13</sup> Chiqué ora uchee né tuuxa ley sti Moisés la? ruchá cabe rini sti yuze ne sti chiva luguiá be, ne laca ruzaaqui cabe ti yuze huiini, ne ruchá cabe dé stime luguiá be para tidi ni bichee be que, ne aca be nayá, peru de luguiá si.

<sup>14</sup> Ne pa biquiñe irá nga para bisiá laacabe la? jma rusi nandxó' rini sti Cristu, partí ucané Espíritu ni bidii Dios laabe gudixhe be xpida be casi ti ofrenda ni nayá ne bisiga'de be ni Dios. Ne rini bixhii be que nga usiá ladxitdó' no de irá ni biché' nu chiqué, ne uchaa laanu ti ibani nu casi na Dios ni nabani.

<sup>15</sup> Ne pur ni bi'ní Cristu que, ma bidii stiidxa Dios binni guidxilayú sti tiru, ma gudixhe ti modo chu' né cabe laa tobi si. Chiqué laca bidii stiidxa be ca bixhoze gola nu, peru bichee né ca laabe. Peru ra guti Cristu, raqué biaxa xpecadu irá', cásica cani uní' né be chiqué, zaqueca cani caní' né be yanna, para udii be laaca enda nabani ni qué zaluxe.

<sup>16</sup> Ora ma chi gati binni la? rusaana testamentu. Peru neca cá ni lu gui'chi', qué zaca ni pa ca'ru gati be.

<sup>17</sup> Partí laga nabani ru ni bi'ní ni que la? qué zanda icaa cabe ni.

<sup>18</sup> Nga runi dxi bidii stiidxa Dios ca xpinni chiqué la? uca

firmar né ni rini.

<sup>19</sup> Guietenala'dxi nu xi modo uca ni: biinda né Moisés ca binni que irá ca mandamiento ni cá lu ley que, ne óraque ucuaa be ti lari de lana xiñá' ne ti rama hisopo, bigadxe be ni de rini sti yuze huiini ne sti chiva, ne nisa, ne biruba be ni lu libru ra cá ley sti Dios que, ne laca biruba be ni luguiá ca binni que.

<sup>20</sup> Ne rabi be ca binni que: "Ndi nga rini ni cayuni firmar ca mandamiento ni caguixhe Dios para guni tu."

<sup>21</sup> Ne óraque biruba Moisés rini que ndaani yu'du que ne lu ni riquiñe para cultu stícabe.

<sup>22</sup> Pur ni cá lu ley nanna nu irá ni guia naquiiñe guia ne rini, ne pa qué ixii rini la? qué zanda guiaxa xpecadu cabe.

*Rini sti Cristu rusiá binni de ni huachee*

<sup>23</sup> Carpa ni bizá' Moisés que, ne irá ni uyuu ndaani ni que la? caadxi si rulu' cani laanu ximodo ibá'. Randa ria cani ra idxá cani rini sti mani'. Peru naquiiñe guia ni nuu ibá' ne rini sti tuuxa ni jma risaca que mani'.

<sup>24</sup> Nga runi ra nuu Cristu yanna la? cadí ndaani yu'du ni biciú binni, sínunque ibá' biuu be, caní' né be Dios pur laanu. Partí ca yu'du ni nuu ndaani guidxilayú la? naca cani casi bandá si sti ni nuu ibá'.

<sup>25</sup> Ne ma qué zaguixhe ru be xpida be sti tiru para guiaxa xpecadu binni, casi runi ca xcaadxi sacerdote

gola, cada iza riuu ca ndaani Lugar Ra Jma Nandxó', riuu né ca rini, peru cadi stica'.

<sup>26</sup> Pa ñuni be casi runi ca la? nanna panda tiru ñati be dede dxi uyá' guidxilayú ya'. Peru cadi zacá di nga laani, sínunque dxi gunda dxi la? beda uxhii be rini stibe para guiaxa xpecadu binni ne ma qué ziuu ru dxi guni be ni.

<sup>27</sup> Irá binni guidxilayú napa xidé gati ti tiru, ne óraque ma cuidxi Dios cuenta laaca'.

<sup>28</sup> Zacaca beda gati Cristu ti tiru si para guiaxa xpecadu irá binni guidxilayú, ne ziuu dxi ibigueta be rairopa tiru peru ma cadi para quixe be ni huachee binni, sínunque para ulá chaahui be cani cabeza laabe.

## 10

<sup>1</sup> Qué ñanda di nudii ley sti Moisés irá ni galán ni ma gudixhe Dios para binni guidxilayú, peru zanda gabi nu naca ni casi bandá sti ni qué nihuinni chiqué. Purti neca bi'ni binni casi cá lu ley que, bixhii ca rini sti mani para bisiga'de ca Dios, peru neca ne nga qué ñanda ña chaahui ladxidó' ca', ne cada iza ribigueta ca para guni ca ni sti tiru.

<sup>2</sup> Pa ñaca nusiá rini ni ruxhii cabe que ladxidó' cabe la? ma ñaana dxí cabe de ñuni cabe ni, purti ñanna cabe ma bia ladxidó' cabe.

<sup>3</sup> Peru cadi zacá di nga laani, sínunque cada iza ora uxhii cabe rini que la? jma

rusi rietenala'dxi cabe ni huachee cabe.

<sup>4</sup> Purti qué zanda ixá stonda binni ne rini sti yuze ne sti chiva.

<sup>5</sup> Nga runi dxi bedandá Cristu ndaani guidxilayú, na rabi Bixhoze:

Qué ñuula'dxu nicoou rini sti mani', nin xiixa nusiga'de cabe lii, sínunque gudixhe lu naa gueda aca binni guidxilayú.

<sup>6</sup> Ne qué ñuula'dxi lu irá ni ruzaaqi cabe, ne rini ni ruxhii cabe para guiaxa stonda cabe.

<sup>7</sup> Nga runi rabe lii: "Dios stinne', rari nuua para gune ni na lu', casi cá ni lu Xqui'chi lu de naa."

<sup>8</sup> Rari ridu'ya nu xi na Jesucristu. Na be qué racala'dxi Dios uxhii cabe rini sti mani', nin usiga'de cabe xiixa laa, nin uzaaqi cabe tuuxa mani para guiaxa stonda cabe, neca nga cá lu ley guni cabe.

<sup>9</sup> Oraque na be: "Rari nuua para gune ni na lu'." Ne ra uní' be zacá la? bichiá be enda ruxhii rini sti mani para guiaxa pecadu, ne bisi-huinni be chi guni be ni ma gudixhe Dios aca'.

<sup>10</sup> Ne yanna ma uca ni gudixhe Dios que, purti ma bidii Jesucristu xpida para guiaxa stonda nu tobi si tiru, ne pur ni bi'ni be que ma bia ladxidó' no.

<sup>11</sup> Irá dxi ma nuu ca sacerdote, ma cuxhii rini sti mani', peru qué ziuu dxi quixe rini que ni bichee binni.

12 Peru Jesús la? ti tiru si bixhii rini sti', ne ngue si para biaxa irá ni. Oraque ze be ibá' ne ma zuba be cue' Dios.

13 Ne raqué cabeza be dede dxi ma guta dxí irá ni rucaa lú laabe xa ñee be.

14 Ti ofrenda si bisiga'de be Dios chiqué, ne ma cadi naquiiñe ru gasti para guia ladxidó' irá cani ma bixá stonda.

15 Ne nanna nu dxandí ni bize'te nu ca, partí rusiene Espíritu Santu ni laanu pur ni cá lu Xqui'chi Dios ra na:

16 Dxi ganda dxi que, zaguixhe sti modo chu' né cabe naa tobi si, ne dxi que zucaa ca mandamiento stinne lu xquenda biaani cabe ne ndaani ladxidó' cabe.

17 Ne laca na Señor: Ma qué ziuu ru dxi guieten naladxe pa uyuu dxi bichee né cabe naa.

18 Zacá nga laani, pa ma bixhá Dios stonda nu la? ma cadi naquiiñe quixhe nu xiixa lu altar para guiaxa stonda nu.

### *Idxiña nu ra nuu Dios*

19 Chiqué la? sacerdote gola si zanda chu' ndaani Lugar Ra Jma Nandxó' sti yu'du que. Peru yanna laanu, hermanu ca', ma zanda chu' nu Lugar Ra Jma Nandxó' ni nuu ibá', partí bixhii Jesucristu rini sti pur laanu.

20 Ra guti be que la? bixhele be ti neza cubi para laanu, ne ma biu' nu lu neza sti enda nabani que dede guiu' nu ibá'. Zanda gabi

nu ma undadi be cortina ni ucuá ndaani yu'du que, ne ma zanda guiu' nu.

21 Ne ma napa nu ti sacerdote gola ni nuu para gu'ya ca xpinni Dios.

22 Nga runi idxiña nu ruuu Dios de idubi ladxidó' no, ne guni cre pe nu zacané laanu, partí ma bisiá rini sti Cristu ladxidó' no de irá ni biché' nu, ne ma bia cuerpu stinu ne nisa yá ra uyú' nisa nu.

23 Yanna, inaaze dxiichi nu ni ma runi cre nu, partí nanna nu qué zaguite si ni bidii stiidxá laanu, sínunque zuni ni ma uní.

24 Ne naquiiñe ucá' ique nu acané saa nu para ganaxhii nu jma, ne guni nu ni nacha'hui'.

25 Ne cadi guni nu casi cani rusaana de che cultu, sínunque cada tobi acané stobi para indisa ique, ne jma rusi yanna partí cadu'ya nu ma zeda dxiña dxi gueeda Jesucristu Señor stícanu.

26 Partí pa ma nanna nu xii nga jneza, peru uyubi nu uché' nu la? ma gasti zanda usiga'de nu Dios para guiaxa stonda nu.

27 Ne pa nuu tu guni zacá la? ganna dxichi zusaba ná Dios laa dxi usaba gui para unitilú irá ni bicaa lú laa.

28 Chiqué pa uchee né tuxa ley sti Moisés, ne iní chupa o chonna dxandí ni la? maca zigati ngue, ne neca ninaba be nilá be, qué ñanda.

29 Ne pa zacá bi'ní cabe cani bichee né ley sti Moisés la? jma rusi naná zaca para

cani udxii deche Espíritu sti  
Dios ni nadxii laaca', ne casi  
ñaca ruutu ñee ca Xiiñi Dios  
parti qué rulabi ca rini ni  
bixhii para ihuinni dxandí  
zuní Dios ni ma uní'. Ne laca  
rini que bisiá ladxidó' ca'.

<sup>30</sup> Ma nanna nu ca diidxa  
ni uní' Dios chiqué: "Xuenta  
nuu ni, ne naa uquixe ni laa-  
cabe", na be. Ne laca cá ca di-  
idxa ri lu gui'chi': "Zuzuhuaa  
ca xpinni Dios nezalú para  
iní' ca xi huayuni ca'."

<sup>31</sup> Nabé naná zaca para  
cani cuchee ora gueda  
guiaba ca lu ná Dios ni  
nabani.

<sup>32</sup> Peru laguietenala'dxi  
dxi nacubi binibiá' tu stiidxa  
Cristu, qué nixhacala'dxi tu,  
neca nabé naná ni udi'di tu.

<sup>33</sup> Gunaaze cabe caadxi de  
laatu, bininá cabe laaca ne  
bini burla cabe laaca nezalú  
binni, peru qué nusaana tu  
laaca', sínunque biaana né tu  
laaca'.

<sup>34</sup> Ne zaqueca qué nusaana  
tu ca hermanu ni bieguyoo,  
ne qué niguu xa ique tu dxi  
ucuaa cani nanala'dxi laatu  
stitu, parti nanna tu jma  
galán ni napa tu ibá', ne ngue  
la? qué ziuu dxi initi lú.

<sup>35</sup> Ne pa zacá uzá tu chiqué  
la? zaqueca guni tu yanna,  
ne cadí usaana tu de guni cre  
tu Dios, parti naro'ba ni chi  
udii laatu.

<sup>36</sup> Naquiiñe cadí ixha-  
calá'dxi tu, ti ganda guni tu  
ni na Dios ne icaa tu ni ma  
uní' zudii laatu.

<sup>37</sup> Cá ca diidxa ri lu  
Xqui'chi Dios:

Nagueenda zeda dxiña dxi  
nexhe gueeda Señor.

Ma qué zanda di'.

<sup>38</sup> Zabani cani ma bia ladx-  
idó' parti runi cre ca'.  
Peru ni ibigueta atrá la?  
ma qué zieche nia dia'  
laaca',  
na Señor.

<sup>39</sup> Peru laanu la? cadí zeeda  
nu lade cani ribigueta atrá  
ne rinitilú, sínunque lade cani  
napa enda nabani ni qué za-  
luxe parti runi cre.

## 11

*Ni dxandí runi cre Dios*

<sup>1</sup> Pa dxandí runi cre nu  
Dios la? qué zagú' xa ique  
nu de ni cabeza nu udii be  
laanu, ne neca ca'ru ihuinni  
irá ni, peru casi ñaca ma  
cadu'ya nu ni yanna, parti  
runi cre nu laabe.

<sup>2</sup> Bieche né Dios ca bixhoze  
gola nu chiqué parti bini cre  
ca laa.

<sup>3</sup> Runi cre nu Dios, nga  
runi nanna nu uyá' guidxi-  
layú ra uní' be gaca ni. Dxi  
ca'ru iní' be, qué nihuinni  
gasti', peru yanna ma ridu'ya  
nu ni.

<sup>4</sup> Rarí chi du'ya nu modo  
bini cre caadxi de ca bixhoze  
gola nu chiqué. Parti bini  
cre Abel Dios, nga runi jma  
uyuula'dxi Dios ni bisiga'de  
be laa, que ni bisiga'de Caín.  
Ne pur nga runi uní' Dios ma  
nayá ladxidó' be, ne ucuaa  
ni bisiga'de be laa que. Zacá  
ridu'ya nu neca ma guti be  
peru de yanna ruzeete cabe  
pabiá' bini cre be Dios.

<sup>5</sup> Ne laca parti bini cre  
Enoc Dios, nga runi undisa  
Dios laa, yené laa ibá' sin  
ñati, ne biyubi cabe laa,

peru qué nidxela cabe laa, purti ma undisa Dios laa. Lu Xqui'chi Dios rabi laanu, ante che be ibá', uyuula'dxi Dios ni bi'ni be.

<sup>6</sup> Peru qué zanda guni binni ni riula'dxi Dios pa qué runi cre. Purti para idxiña cabe laabe la? napa cabe xidé guni cre cabe nuu be ne rulabi be cani uyubi laabe.

<sup>7</sup> Ne laca purti bini cre Noé Dios, nga runi bizuuba stiidxa Dios ra gudxi Dios laa xi chi aca. Ne neca ca'ru gu'ya be ni, peru bi'ni be ni na Dios, bizá' be arca ra bilá né be binni lidxi be que. Pur modo bini cre be que bisihuinni be pabiá' cuchee binni guidxilayú, ne bieche né Dios laabe, purti rieche né cani runi cre laa.

<sup>8</sup> Abraham laca purti bini cre Dios, nga runi bizuuba stiidxa'. Biree de xquidxi sin ganna paraa che', ucuaa neza, uyé guidxi ni gudxi Dios laa zudii laa ne ca xiiñi'.

<sup>9</sup> Ne neca casi ñaca nuu be xquidxi binni, peru biaana be ndaani guidxi ni ma gudxi Dios laabe zudii laabe que. Biaana be raqué purti bini cre be Dios, neca ndaani carpa si uleza be, ne zaqueca uleza ca xiiñi be, Isaac ne Jacob, purti ne laaca bidii stiidxa Dios.

<sup>10</sup> Bi'ni be zaqué purti cá lú be iccaa be guidxi ni bicuí Dios para laabe ibá', guidxi ni qué ziuu dxi initilú.

<sup>11</sup> Laca zanda guietenala'dxi nu, qué ñanda ñapa Sara xiiñi'. Peru neca ma udi'di de ra ñapa be xiiñi be

la? beda gapa be tobi purti bini cre be zuni Dios ni ma gudxi laabe.

<sup>12</sup> Zacá ridu'ya nu neca nabé ma huanisi Abraham para gapa xiiñi', peru beda idale xiiñi casi luceru ne casi yuxi sti nisadó'.

<sup>13</sup> Irá cabe guti cabe runi cre ru cabe Dios. Neca ca'ru iccaa cabe ni bidii stiidxa Dios zudii laacabe, peru casi ñaca biiya cabe ni de zitu ne bieche né cabe ni. Ne uní cabe cadi ndaani guidxilayú ri nga xquidxi cabe sínuque zidi'di si cabe ndaani ni.

<sup>14</sup> Purti ni iní' zacá la? ri-huinni cabeza chu' ndaani xquidxi pe'.

<sup>15</sup> Purti pa nucaa ique cabe nibigueta cabe guidxi ra biree cabe la? ñanda ca nibigueta cabe raqué. Peru cadi nga di nga ni ucalá'dxi cabe,

<sup>16</sup> sínuque ucalá'dxi cabe ti guidxi ni jma galán, o zanda gabí nu guidxi ni nuu ibá'. Ne pur nga runi qué rituí lú Dios aca Dios sticabe. Ne ma naguixhe chaahui ti guidxi para laacabe.

<sup>17</sup> Chiqué bitiidi Dios Abraham ti prueba para gu'ya pa dxandí runi cre be laa, ne bisihuinni dxandí runi cre be. Purti uná be udixhe be tobi lucha xiiñi be para nusiga'de be laa Dios, neca ma gudxi Dios laabe, na rabi laabe:

<sup>18</sup> "De Isaac nga uzulú idale xiiñi lu'."

<sup>19</sup> Bi'ni be zaqué purti ma runibiá' be Dios ne ma nanna be dede gue'tu zanda usibani. Zacá zanda gabí nu casi ñaca guti Isaac ne

bigueta bibani para ucuaa bixhoze laa sti tiru.

<sup>20</sup> Dxi uluu Isaac ndaaya Jacob ne Esaú ne gudxi laaca xi chi aca dxi ma guti la? gunda uní Isaac de ni chi aca ru partí bini cre Dios.

<sup>21</sup> Jacob laca partí bini cre Dios, nga runi dxi ma chi gati uluu ndaaya iropa xiiñi José, ne neca ma lu ti bastón zucá be Peru bisisaca be Dios.

<sup>22</sup> Dxi mayaca gati José bietenala'dxi gudxi Dios laa napa ca israelita xidé iree ca de ndaani guidxi Egipto, para gudixhe xi guni né cabe dxita sti dxi iree cabe. Bi'ni be zaqué partí bini cre be ni uní Dios que.

<sup>23</sup> Ora gule Moisés la? biyya bixhoze be ne jñaa be pabiá' galán laabe, para bicaachi ca laabe chonaa bee, ne qué nidhibi ca ni na rey Faraón. Bi'ni cabe zaqué partí bini cre cabe Dios.

<sup>24</sup> Ne zaqueca bini cre Moisés Dios dxi ma huaniisi, ngue runi qué ñuula'dxi ñaca xiiñi xiñi dxaapa rey Faraón.

<sup>25</sup> Partí neca ñeche né be irá ni ñapa be, Peru chupa chonaa si gubidxa, ne qué ñuula'dxi Dios ni. Ne pur nga ulí be acaná né be ca binni xquidxi be.

<sup>26</sup> Para laabe la? jma risaca acaná be casi ucaná Cristu, que ñapa be irá ni nuu ndaani guidxi Egipto, partí bicaa ique be ni chi udii Dios laabe.

<sup>27</sup> Ne laaca partí bini cre be Dios, ngue runi biree be de ndaani guidxi Egipto sin nidhibi be rey que neca

cadxiichi né laabe, ne bidxii lú be neza ze be partí casi ñaca cayuuya be Dios neca qué rihuinni.

<sup>28</sup> Ne laca partí bini cre be Dios, nga runi bi'ni be ni gudxi Dios laabe, biné' be rini irá ra puerta sti ca binni Israel dxa gueela que, ti qué guiuu ángel guuti lugola stica'.

<sup>29</sup> Ne laca partí bini cre cabe Dios, nga runi gunda udi'di cabe Nisadó' Xiñá que, casi ñaca nidi'di cabe ra nabidxi. Ne ra ucalá'dxi ca binni Egipto nidi'di casi udi'di cabe la? bilaahua ca'.

<sup>30</sup> Ne laca partí bini cre ca binni Israel Dios, nga runi biaba lindaa sti guidxi Jericó dxi bidii ca vuelta guidxi que gadxe gubidxa.

<sup>31</sup> Zaueca Rahab, gunaa dxaba que, bilá dxi bini-tilú irá binni xquidxi partí bini cre Dios ne bichagalú ca xpinni be dxi yeundaachi ca ndaani xquidxi.

<sup>32</sup> Xi ru zanda gabe laatu ya'. Ñuuladxe ñue nia laatu de Gedeón ne Barac ne Sansón ne Jefté ne David ne Samuel ne ca profeta. Peru ma qué zanda.

<sup>33</sup> Irá cabe bini cre cabe Dios. Nga runi gunda gudixhe dxi cabe rey, ne bini mandar cabe jneza, ne ucané Dios laacabe casi bidii stiidxa zacané laacabe. Ne laca bini cre cabe, nga runi gunda biseegu cabe ruua lion,

<sup>34</sup> ne bisu' cabe gui naro'ba', ne bilá cabe de ra ñati cabe ne espada. Ne cani ridhibi para ucaa lú la? bicaa

lú ca sin nidxibi ca' dede gunda binidé ca ca dxu ni bicaa lú laaca'.

<sup>35</sup> Laca uyyu caadxi gunaa runi cre Dios, guti binni lidxi ne bibani. Ne laca uyyu xcaadxi xpinni Dios guti ra bininá cabe laa partí runi cre Dios, ne qué niná ca nilá ca', partí nanna ca jma galán gati ca ti ibani né ca Dios.

<sup>36</sup> Ne uyyu xcaadxi ni bini burla cabe laa, ne gudiñe cabe laa dede bindiibi cabe cadena laa ne biseguyoo cabe laa.

<sup>37</sup> Nuu tu guti partí bichá cabe guie laa, ne nuu ni bi'ni cabe laa chupa ndaa, ne nuu ni bitiidi cabe ra nagana para nuxhele cabe laa de Dios ne nuu ni biiti cabe de espada. Ne nuu ni uzá nacu xquidi dendxu ne xquidi chiva, guti zí ca', ne nagana uca para laaca', ne ucáná ca'.

<sup>38</sup> Tan nacha'hui cabe, cadí para laacabe guiaana cabe lade binni guidxilayú ni nadxaba'. Uzá ca gui'xhi ne lade dani ne ndaani cueva ne ndaani bize'.

<sup>39</sup> Bieche né Dios irá cabe pur modo bini cre cabe, peru ca'ru icaa cabe ni uni' Dios udii laacabe guti cabe.

<sup>40</sup> Partí ma gudixhe xiixa jma galán, ne cadí para laasi cabe sínunque ne para laanu. Nga runi na cueza cabe icaa né cabe ni laanu.

## 12

*Idu'ya dxí nu Jesús*

<sup>1</sup> Ma bidu'ya nu modo uzá ca binni ni bini cre Dios chiqué. Zaqueca laanu,

udxi' lú nu sa nu lu neza ni gudixhe Dios para laanu sin ixhacala'dxi nu. Ne para ganda chindá nu la? naquiñe usaana nu irá ni rucueza laanu, ne zaqueca usaana nu de uché' nu, ti ma cadi icá nu yaga lu ná ni.

<sup>2</sup> Cadi guiaana dxí nu de idu'ya dxí nu Jesús, partí nirudó' laa uzá lu neza udixhe Dios sa cani runi cre laa, ne yendá de ra nexhe chindá. Guietenala'dxi nu pabiá' naná guca para laabe ra ucuá be lu cruz que, peru qué nizaala'dxi be gati be zaqué, partí nanna be nabé zieche be ora ma udi'di be ni. Ne zaqué uca ni, udi'di si irá enda naná stibe que la? ze be ibá', ne ma zuba be cue' Dios ni nandxo'.

<sup>3</sup> Laguuya si laatu pabiá' bininá cani ruchee laabe, ne ora guietenala'dxi tu modo udi'di be que la? qué zadxaga tu, ne qué zabí sa tu atrá.

<sup>4</sup> Zándaca nabé naná cayaca para laatu ra cucaa lú cani ruchee laatu, peru ca'ru chindá tu dede ra gati tu.

<sup>5</sup> Rului' ma biaanda laatu ni cá lu Xqui'chi Dios ra na: Xiiñe', cadi udxii dechu Dios ora tinde né lii, ne cadi guiaanu triste ora usaba ná lii.

<sup>6</sup> Partí ridinde né be cani nadxii be, ne rusaba ná be cani ma napa be casi xiiñi be.

<sup>7</sup> Cadi ixhacala'dxi tu ti cusaba ná be laatu, partí cayuni be casi runi binni xiiñi'. Lácaixa nuu xiiñi binni ni qué rusaba ná bixhoze laa.

8 Peru pa qué rusaba ná Dios laatu casi rusaba ná ca xcaadxi la? cadi xiiñi pe laatu sínque napa laatu casi xiiñi gui'xhi si.

9 Dxi nahui'ni nu la? rusaba ná bixhoze nu laanu, ne ridxbi nu laa. Yanna jma rusi udí' nu lugar guni mandar Bixhoze nu ni nuu ibá' laanu, ti icaa nu enda nabani.

10 Chupa chonna si iza bini mandar bixhoze nu ne jñaa nu laanu, ne udiñe ca laanu para izi'di nu bia' nanna ca'.

Peru Dios nanna xi caqui'ñé nu, ne nga runi rusaba ná laanu, ti gaca nu nacha'hui casi laa.

11 Dxandí iruti rieche ora cayaba ná', sínque riaana triste partí naná ni. Peru nabé racané ni cani nuu para iziidi', partí ora ma udi'di ni la? zuuya cabe ma zanda sa cabe jma jneza, ne ma nuu dxí ladxidó' cabe.

### *Cadi udxii deche binni Dios*

12 Nga runi pa ma bidxaga tu la? lacuu stipa ná tu ne ñee tu,

13 ne lasá jneza sin iree chu tu, partí zacá zacané tu zuuhuaa chaahui stobi ni rulú' chi guiba.

14 Laguni bia' ganda para cadi chu' dinde né tu iruti', ne lagapa xpida tu nayá partí tu cadi nayá xpida la? qué zanda gu'ya Señor.

15 Laguuya gá nin tobi de laatu cadi udxii deche Dios ora racala'dxi gacané laatu, ne zaqueca nin tobi de laatu cadi aca casi xculá rusindá intiica gata cue'.

16 Ne nin tobi de laatu cadi chu' né tuuxa ni cadi xheela', ne nin tobi cadi usaana de ganaxhii ni zeeda de Dios, casi bi'ni Esaú chiqué. Pur ti bladu endaró si bitoo irá derechu ni gupa de enda lugola sti'.

17 Ne nanna tu ximodo beeda iree ni laabe. Purti ora ucalá'dxi be nicaa be ndaaya sti bixhoze be, ma qué niná bixhoze be, ne neca biina be peru ma huadxí ngue para uchaa be ni bi'ni be.

18 Ma bidxiña tu ra nuu Dios, peru cadi casi bidxiña ca binni Israel laabe lu dani Sinaí chiqué. Bidxiña cabe ñee dani que, ne bihuinni bele, ne biseegu guelacahui idubi dani que, ne biete ti bi yooxho ne nisa guie.

19 Bina diaga cabe uxdxi trompeta, ne bizulú Dios uní' né laacabe. Peru de tantu bidxibi cabe, unaba cabe ma cadi iní' ru be.

20 Ma qué ñanda ñuni huantar cabe ni caní' be que, purti na be rabi be laaca': "Tutiica uxhaata ñee lu dani ri' napa xidé gati', naca ni binni o maní'. Lauchá guie laa o laguuti laa ne flecha."

21 De tantu bidxibi cabe irá ni cayuuya cabe que, dede Moisés na: "De tantu cadxibe dede cayaca dí'te!"

22 Peru laatu, ma bidxiña tu ra nuu Dios. Casi ñaca ma nuu pe tu ra nuu be ibá', ne zuuhuaa ñee tu lu dani Sion, ne nuu tu ndaani guidxi Jerusalén, xquidxi Dios ni nabani, peru cuzeete Jerusalén ni nuu ibá' cadi ni nuu ndaani guidxilayú. Ne

raqué nuu irá ca ángel stibe, nin iruti qué ñanda nugaba laaca'.

<sup>23</sup> Ne laca nuu ca xpinni Dios ni bibani chiqué, cani ma biuu ibá', zanda gabi nu ma xquidxi ca ibá'. Casi cayabe laatu ca, ma bidxiña tu ra nuu Dios ni cuidxi cuenta irá binni, ne laca ra nuu be nuu ca espíritu sti irá ca binni ni nacha'hui ni uyuu chiqué, cani ma bisiá be ladxidó'.

<sup>24</sup> Ne laca ma bidxiña tu ra nuu Jesús, ni bedaguni ni gudixhe Dios gaca para ganda chu' né binni laa tobi si. Bixhii Jesús rini sti', ne jma risaca rini ni bixhii be que, que rini ni bixhii Abel.

<sup>25</sup> Laguuya gá cadi chu' dxi ma qué na tu ucaa diaga tu ora iní' né Dios laatu. Purti pa qué nilá cani qué nulabi laabe ra bilidxe be laaca ndaani guidxilayú la? jma rusi qué zalá nu pa qué ulabi nu laabe yanna ra culidxe be laanu de ibá'.

<sup>26</sup> Dxi uní' né be laaca que la? biniibi dxacha guidxilayú, peru yanna na be rabi be laanu: "Zuniibe rua' guidxilayú sti tiru si, ne cadi guidxilayú si, sínunque ne ibá'."

<sup>27</sup> Ne ra bizeete be uniibi ru be guidxilayú la? zanda guiene nu zadxiña dxi inibi irá xixé ni bizá' be, ne zanitilú cani óraque, para guiaana ni qué ziuu dxi initilú.

<sup>28</sup> Qué ziuu dxi iluxe enda runi mandar sti Dios ne ma uluu laanu lade ni. Nga runi cadi guiaana dxí nu de

udi' nu diuxquixe laabe ne ganaxhii nu laabe de idubi ladxidó' no, ne idxibi nu laabe ne guni nu ni na be ti guieche né be laanu.

<sup>29</sup> Purti laabe nga Dios stinu ne zeda aca be casi gui ni runidé irá ni nadxaba'.

## 13

*Modo guni binni ni  
chu'la'dxi Dios*

<sup>1</sup> Cadi guiaana dxí tu de ganaxhii saa tu casi enda bi'chi'.

<sup>2</sup> Cadi guiaanda laatu uchagalú tu cani zeeda de sti guidxi, purti ra huayuni cabe zacá la? nuu tu huachagalú ángel sin ganna.

<sup>3</sup> Laguietenala'dxi cani yeguyoo, casi ñaca yeguyoo né tu laaca', ne zaqueca cani cayacaná, casi ñaca cayacaná né tu laaca'.

<sup>4</sup> Cadi gapa tu enda xheela casi enda riguite. Cani ma bichaganá la? cadi uchee né xheela', purti zusaba ná Dios cani rapa jnadxii ne cani riuu né xheela stobi.

<sup>5</sup> Cadi ibani tu para gapa si tu bidxichi, sínunque laguieche né bia' tiica napa tu, purti na Dios rabi laanu: "Qué zusaana laatu ne qué ziaana dxie de acaniá laatu."

<sup>6</sup> Nga runi zanda iní nu sin chu' nu xizaa: "Rácané Señor naa. Nga runi qué zadxibe ni guni binni naa."

<sup>7</sup> Laguietenala'dxi ca hermanu ni uca xaíque stitu, ni byuí' né laatu stiidxa Dios. Laguuya modo biree ndu

xhiiña cabe, ne laguni cre Dios casi bini cre cabe.

<sup>8</sup> Qué ziuu dxi idxaa Jesucristu de ni naca. Cásica laabe neegue', zaqueca yanadxí, ne zaqué si guiaana be.

<sup>9</sup> Cadi udii tu lugar chu' tu quite laatu, usiidi laatu cadi go to xiixa ti jma uzuhuua dxiichi tu, purti qué huayané ni cani runi ni. Dios si zanda uzuhuua chaahui laanu.

<sup>10</sup> Casi ñaca ñapa nu ti altar ibá', ne zanda icaa nu ni nexhe lú ni para go espíritu stinu. Peru nin tobi de ca sacerdote ni zinanda ley, qué zanda go ni nexhe lu altar que.

<sup>11</sup> Chiqué ruuti cabe mani', ne riné sacerdote gola rini stime ndaani Lugar Ra Jma Nandxó' para guiaxa xpecadu binni. Peru cuerpu stime, ruzaaqui cabe laa zitu huiini de ra nabeza binni.

<sup>12</sup> Zaqueca bi'ní cabe Jesús; biiti cabe laa zitu huiini de guidxi, ne raqué bixhii rini sti para biaxa stonda binni.

<sup>13</sup> Para ca binni que, qué nisaca Jesús. Nga runi yesaana ca laabe zitu huiini de guidxi. Peru yanna laanu chuu nu ra nuu be neca laca qué risaca nu para laaca'.

<sup>14</sup> Purti gasti guidxi ra zanda guiaana nu ndaani guidxilayú ri ni qué zanitilú. Nga runi cabeza nu ni gueeda ru', ni qué zanitilú.

<sup>15</sup> Yáquexa ma bichiña Jesucristu laanu ra nuu Dios la? cadi guiaana dxí nu de usisaca nu Dios purti ra udxiba nu laa pur irá ni

huayuni para laanu la? casi ñaca cusiga'de nu laa xiixa galán.

<sup>16</sup> Cadi usiaanda tu aca tu nacha'hui ne binni, ne udii tu tindaa de ni napa tu cani qué gapa, purti casi ñaca nusiga'de tu ni Dios ne nga ni riula'dxi'.

<sup>17</sup> Lauzuuba stiidxa cani nuu de xaíque stitu. Laguni ni gabi ca laatu purti qué rixhacala'dxi ca de gapa ca laatu, ti nanna ca Dios iní pa jneza cayuni ca'. Pa guni tu zacá la? zieche né cabe xhiiña cabe, ne qué zaca ni naná para laacabe, ne jma rusi zanda acané cabe laatu.

<sup>18</sup> Lainí' né Dios pur laadu, purti nanna du nayá ladxidó' do nezalú be, ne ni racala'dxi du nga irá ni guni du, guni du jneza.

<sup>19</sup> Ne jma rusi canaba lú tu iní' né tu Dios ti ganda ibigueta ra nuu tu nagueenda.

### Ndaaya ne diuxi

<sup>20</sup> Señor Jesucristu nga Pastor ni nandxó' stinu ni rapa chaahui laanu. Purti ra gudixhe Dios sti modo chu' né binni laa tobi si la? uca firmar ni ne rini stibe, peru bisibani Dios laabe de lade que'tu'.

<sup>21</sup> Yanna rinaba lu Dios, ni riguixhe dxí ladxidó' binni, udii laatu irá ni naquiiñe tu para ganda guni tu ni na, ti irá nu aca nu modo racala'dxi aca nu. Ne zanda aca ni purti ma runi cre nu Jesucristu. Cadi guiaana dxí nu de usisaca nu laabe. Amén.

<sup>22</sup> Hermanu ca', rinaba laatu cadi ixhacala'dxi tu ca diidxa ni rulidxe laatu ri', purti cadi xirooba di gui'chi biçaa lú tu.

<sup>23</sup> Laucaa diaga ni chi tidxe laatu ri': Ma bindaa cabe hermanu Timoteu, ne pa gueeda nagueenda la? ziniá laa ra nuu tu ora chaa'.

<sup>24</sup> Laudii diuxi irá cani napa tu de xaíque lade tu, ne irá ca hermanu. Ne laicaa diuxi sti ca hermanu de Italia.

<sup>25</sup> Dios cu' ndaaya irá tu. Amén.

## GUI'CHI BICAA SANTIAGU

<sup>1</sup> Naa nga Santiagu. Rune xhiiña Dios ne xhiiña Señor Jesucristu. Lu gui'chi ri cu-gapa diu'xe laatu, hermanu ca', cani za de ca doce xiiñi Israel, cani reeche ndase lade stale guidxi.

*Zusiene Dios ni inaba ni laa*

<sup>2</sup> Hermanu ca', laguieche né intiica enda naná gueeda luguiá tu.

<sup>3</sup> Purti nanna tu pa tidi tu ni sin iree chu tu de ni runi cre tu, zacané ni laatu iziidi tu cadi iree tu gana.

<sup>4</sup> Lauyubi iziidi tu uzuhuua chaahui tu sin ixhacala'dxi tu, intiica gueeda. Zacá zaniisi tu lu stiidxa Dios. Ziene chaahui tu ni na, ne zuni tu ni.

<sup>5</sup> Pa nuu tuuxa de laatu ca'ru guiene chaahui xi naquiiñe guni la? inaba lu Dios usiene laa ne zusiene Dios laa. Purti tutiica inaba', rudii Dios ni laa de idubi ladxidó' sin tinde né laa.

<sup>6</sup> Peru ora inaba be la? naquiiñe guni cre be zacaa be ni canaba be que, ne cadi cu' xa ique be pa zudii Dios ni o pa co'. Purti ni riguu xa ique zeda aca casi ola sti nisadó', riguiñe ntaa bi laa cherí cherica'.

<sup>7</sup> Nga runi, ni inaba ne cu' xa ique la? cadi cueza icaa xiixa de Dios.

<sup>8</sup> Purti ni ti dxi runi cre, sti dxi ma qué ganna pa runi cre

la? qué zanda udxii lú neza ze'.

<sup>9</sup> Ti hermanu ni qué gapa gasti ndaani guidxilayú ri naquiiñe guieche purti risaca nezalú Dios.

<sup>10</sup> Zaqueca ti hermanu ni napa bidxichi, laca naquiiñe guieche purti ma nanna qué risaca nezalú Dios tisi napa bidxichi. Purti zanitilú irá ni napa be que, casi rinitilú guie' gui'xhi'.

<sup>11</sup> Ora riree gubidxa nabé nandá', riguii yaga gui'xhi que ne riaba ca guie' que. Zacá rinitilú enda sicarú sti'. Zacaca zanitilú ricu laga canazá canayubi gapa jma bidxichi.

*Ora gueeda ni nagana*

<sup>12</sup> Zieche ladxidó' cani tidi ni naná sin ixhacala'dxi', purti pa qué ixhacala'dxi cabe la? zudii Dios laacabe enda nabani ni qué zaluxe. Nga nga premiu uní udii irá cani nadxii laa.

<sup>13</sup> Ora chu' ni uquiinde laanu uché' nu la? cadi zácxaxa nu Dios cuquiinde laanu, purti qué zanda uquiinde ni nadxaba Dios, ne qué ruquiinde Dios iruti'.

<sup>14</sup> Ni riula'dxi nu ni cadi jneza, nga nga ni ruquiinde laanu, purti ricá ique nu ni, ne zacá randa riguba yu ni laanu dede inaaze dxichi ni laanu.

<sup>15</sup> Ne ni qué usaana de icá ique ni cadi jneza la? zuchee. Ne ni qué usaana de uchee la? zati.

<sup>16</sup> Laguiene chaahui, hermanu ca':

<sup>17</sup> Irá ni nacha'hui ne irá ni dxandí sicarú reeda de ibá'.

Zeeda ni de Dios ni bizá' ca biaani sti ibá', ne laa rudii ni laanu. Qué ziuu dxi uchaa be tu naca be, nin ti guisi.

<sup>18</sup> Bidii be enda nabani laanu ra bini cre nu stiidxa be ni rusiene laanu ni dxandí', ne bi'ní be ni partí de laabe biale guni be ni, ti nirudó' laanu iré' ndu nu lade irá ni bizá' be.

### *Ni dxandí cayuni ni na Dios*

<sup>19</sup> Hermanu ni nadxiee ca', lachuu para ucaa diaga tu, pero cadi nisi undaa ruaa si tu xiixa, ne cadi casi ze tu idxiichi tu.

<sup>20</sup> Purtí ora cadxiichi tuxa la? qué zanda guni ni chu'ladxí Dios.

<sup>21</sup> Nga runi lacuee irá ni nadxaba de ndaani ladxidó' to, ne lausaana irá ni cadi jneza. Laucaala'dxi chi nanda tu stiidxa Dios ni ma ucuá xcu ndaani ladxidó' to, purti nga nga ni zanda ulá laatu.

<sup>22</sup> Laguietenala'dxi naquiiñe guni tu ni na ca diidxa ca, ne cadi ucaa diaga si tu cani. Pa zacá cayuni tu la? caguite si tu laca laatu.

<sup>23</sup> Purtí tobi ni ucaa diaga stiidxa Dios sin guni ni na ni la? zeda aca casi tobi ni bi'ya laa lu ti espeju.

<sup>24</sup> Biiya si be laabe, biree be ze be, ne bisiaanda be ximodo laabe.

<sup>25</sup> Peru pa izi'di chaahui nu ley sti Cristu ni jma risaca, ne izaala'dxi nu guni nu ni na ni, sin usia'nda nu ni ma bina diaga nu la? zaguu Dios ndaaya irá ni runi nu.

<sup>26</sup> Pa nuu tobi de laatu zácaха runi ni na Dios, pero qué rucueza ruaa de iní' ni cadi jneza la? caguite laca laa, partí cadi dxandí cayuni ni na Dios.

<sup>27</sup> Ndi nga ni na Dios Bixhoze nu: Pa dxandí racala'dxi nu guni nu ni na, acané nu ca bizabi ne ca viuda ni cadi'di ra nagana, ne ibani nu jneza, ma cadi casi nabani ca binni ni qué rulabi Dios.

## 2

### *Bia'ca ulabi nu tobi ulabi nu stobi*

<sup>1</sup> Hermanu ca', yáquexa ma runi cre tu Jesucristu Señor stinu ni jma risaca lade irá xixé la? lausaana de usisaca tu binni pur ni naca ndaani guidxilayú.

<sup>2</sup> Purtí pa chu' ti hombre ra cayuni tu cultu, nuu aníu de oro ná' ne nacu lari risaca, ne chu' stobi nabé pobre nacu lari yuxe,

<sup>3</sup> ne jma ulabi tu ni nacu lari cha'hui que, ne gabi tu laa: "Gurí rarí jma galán", ne gabi tu pobre que: "Bizuhuaa racá, o gurí xa ñee ri" la?

<sup>4</sup> zacá culabi tu tobi jma que stobi, ne runi tu ni purti cadi jneza ni cá ique tu.

<sup>5</sup> Hermanu ni nadxiee ca', laucaa diaga: gulí Dios ca pobre ndaani guidxilayú ri ti isaca ca ra guni cre ca laa, ne icca ca irá ni naguixhe chaahui be ra runi mandar be para icca cani nadxii laabe.

<sup>6</sup> Peru laatu qué rulabi tu ca pobre. Ñee, cadi ni napa

bidxichi nga ni ruxhii laatu la? ne cadi laca laacabe nga riguba yu cabe laatu ra nuu juez la?

<sup>7</sup> Ne cadi laca laacabe riguu dí cabe Cristu ni naca tu xpinni la?

<sup>8</sup> Cá ti ley lu Xqui'chi Dios ni jma risaca, na ni: "Gunaxhii stobi cásica nadxii lu lii." Ne pa dxandí cayuni tu casi na ni ca la? jneza cayuni tu.

<sup>9</sup> Peru pa rulabi tu tobi jma que stobi la? cuchee tu, ne zagui'ba donda ique tu, partí cadi cayuni tu casi na ley que.

<sup>10</sup> Necá ti mandamientu si uchee né cabe lade irá xixé, peru pur tobi que zagui'ba donda ique cabe, casi ñaca ma bichee né cabe idubi naca ley.

<sup>11</sup> Dios uní: "Cadi chu' neu ni cadi xheelu'." Ne laca laa uní: "Cadi guutu'." Yanna pa qué riuu neu ni cadi xheelu', peru ruuti lu la? cuchee neu ley.

<sup>12</sup> Laatu ma zinanda tu ley sti Cristu ni qué rucaa binni yaga, peru jma rusi naquiiñe guni tu jneza ne zaqueca iní tu.

<sup>13</sup> Ne pa qué guiá tu stobi la? qué ziá Dios laatu, sínunque zudxiiba donda ique tu. Peru pa guiá tu stobi la? Dios laca ziá laatu.

### *Ximodo ihuinni pa runi cre tobi*

<sup>14</sup> Hermanu stinne ca', pur gana si iní tobi runi cre pa qué runi jneza. Ñee na tu zanda ilá be partí si na be runi cre be la?

<sup>15</sup> Pa qué gapa ti hermanu o ti hermana ni cuaqui' ne nin ni tidi né dxi,

<sup>16</sup> ne ñabi tobi de laatu laa: "Sicarú uyé, uyuu xidxaa ne gudó de ra idxá lu", peru qué nudii laabe ni caquiiñe be la? ñee na tu ucané ngue laabe la?

<sup>17</sup> Zacaca nga cani na runi cre peru qué runi jneza. Qué iquiiñe modo runi cre cabe que.

<sup>18</sup> Zándaca chu' tu na': "Lii runi cre lu peru naa rune jneza." Ximodo zanda ganna pa dxandí runi cre lu, pa qué ru'nu jneza. Naa zanda ulué lii dxandí rune cre partí rune jneza.

<sup>19</sup> Lii nou' runi cre lu tobi si Dios nuu. Jneza nga. Peru nga ca runi cre ca binidxaba ne raca diti ca'.

<sup>20</sup> Pa runi cre lu ne qué gu'nu jneza la? pur gana si runi cre lu'. Ñee, qué riene lu nga la? hombre huati.

<sup>21</sup> Xi pur bixhá Dios stonda Abraham, bixhoze gola nu ya'. Partí jneza bi'ni be ra bidii be xiiñi be ñati para nusiga'de be laa.

<sup>22</sup> Bihuinni bini cre be partí bi'ni be jneza. Nga runi bisaca fe stibe nezalú Dios.

<sup>23</sup> Zacá uca ni casi cá lu Xqui'chi Dios ra na: "Bini cre Abraham Dios, ne nga runi uní' Dios ma qué uzaabi be gastí." Ne gudxi cabe laabe xhamigu Dios.

<sup>24</sup> Ma biiya tu, neca rabi nu ma runi cre nu, peru qué zaxá stonda nu pa qué guni nu jneza.

<sup>25</sup> Zacaca bizaaca lú Rahab, casi cá lu Xqui'chi Dios. Chiqué uca be ti gunaa dxaba', peru bichagalú be ca xpinni Dios ni biseenda Josué xquidxi be, ne bilui' be laaca sti neza che ca ti qué igaa ca'. Nee, cadi pur ni bi'ni be que bixhá Dios stonda be la?

<sup>26</sup> Purti cásica qué iquiiñe xcuerpu nu sin espíritu stinu la? zaqueca nga qué iquiiñe modo runi cre nu pa qué guni nu jneza.

### 3

#### *Xi naca ludxi binni*

<sup>1</sup> Hermanu stinne ca', cadi stale de laatu uyubi aca maistru, purti naquiiñe guni binni ni usiidi', pacaa jma rusi naná zaca para laa dxi uzuhuaa nezalú Dios.

<sup>2</sup> Irá nu ruché' nu. Peru pa nuu tuuxa qué riuu ora iní' ni cadi jneza la? laa huaxa ma biziidi guni ni na Dios, ne ma zanda ucueeza laca laa de guni intiica ni cadi jneza.

<sup>3</sup> Riguu binni frenu ruaa mani para guni ni na ca', ne pur frenu si que la? randa riné cabe laame ladu acala'dxi cabe.

<sup>4</sup> Laca zaqueca barcu, neca naro'ba ni peru raca mandar ni pur ti timón huiini'. Ne ora acala'dxi bi yooxho chiné ni ladu na la? rucueeza timón huiini que ni para udxii lú ni ladu na ni cusá ni que.

<sup>5</sup> Yanna, casi frenu ne casi timón que la? zaqueca nga ludxi nu. Neca nahuiini ni peru naro'ba ni runi ni. Laguuya si laatu pabiá'

nahuiini ti batee, peru zanda ucaa gui ni ti gui'xhi ro'.

<sup>6</sup> Ne ludxi nu laca zeda aca casi ti batee, ne casi xiixa ni dxá de enda nadxaba'. De ra nuu binidxaba biaaxha batee que, ne rucaa gui irá ni runi nu. Nuu ni lade xcuerpu nu, ne rusiu'dxu ni idubi nu.

<sup>7</sup> Zanda idó' irá clase mani', mani huiini', beenda', ne ca mani ni nuu ndaani nisadó', ne ma huasidó' binni laaca'.

<sup>8</sup> Peru qué zanda usidó' no ludxi nu, ne qué zanda ucueeza nu ni, purti nadxaba ni. Casi ñaca napa ni venenu ni ruuti.

<sup>9</sup> Riqui'ñé nu ni para udí' nu diuxquixe Dios Bixhoze nu, ne laca laani rigú' dí né nu binni ni bizá' Dios casi laa.

<sup>10</sup> Ruaa ca rusicaca né nu Dios, ne ruaa queca rigú' dí né nu binni. Hermanu stinne ca', cadi jneza guni nu zacá.

<sup>11</sup> Zanda xa iree nisa naxhi ne nisa xi de ti ra candani nisa.

<sup>12</sup> Hermanu stinne ca', ñee zanda udii yaga du'ga aceituna, ne yaga uvas udii du'ga la? Zacaca qué zanda indani nisa naxhi ra candani nisa xi.

#### *Ni dxandí riene*

<sup>13</sup> Pa nuu de laatu riene ne nuu xpiaani la? uluí' ni pur modo nabani sin udxiba laca laa, ti ihuinni dxandí riene.

<sup>14</sup> Peru pa go dí laatu xiñee didi stobi lú tu, ne cada tobi uyubi para laa si la? cadi zácaxa tu riene tu purti cadi dxandí ni.

<sup>15</sup> Cadi de Dios zeeda irá nga, sínunque zeeda ni de guidxilayú. Zacá runi binni ni qué runibiá' Dios, ne de binidxaba zeeda ni.

<sup>16</sup> Purti pa cayó dí laatu xiñee didi stobi lú tu, ne cada tobi cuyubi para laa si la? qué zanda chu' tu tobi si, ne nisi zuni tu ni cadi jneza.

<sup>17</sup> Peru ni ma bisiene Dios laa la? ma qué lica zucaa ique ni nadxaba', qué zuyubi diidxa', ne qué zucaa lú, sínunque zaca nadó' ne ziuu razón. Ziá binni ne zuni stale enda nacha'hui de idubi ladxidó', ne cadi para udxiba binni laa.

<sup>18</sup> Zaree ndu xhiiña cani runi pur chu' binni tobi si, purti cayuni ca jneza ne laca cayacané ca ca xcaadxi guni jneza.

## 4

### *Ni nadxii guidxilayú*

<sup>1</sup> Xiñee ridinde tu ne rindaa saa tu pue. Ñee cadi zeeda ni purti cada tobi ruyubi ni chu'ladxí si la?

<sup>2</sup> Purti nuu de laatu ora cayuula'dxi xiixa ne qué ganda icaa la? dede ñanda ñuuti para nicaa ni. Ridinde diidxa tu ne ridxela saa tu, purti racala'dxi tu ni napa stobi peru qué idxela tu ximodo gapa tu ni. Qué ricaa tu ni racala'dxi tu purti qué rinaba tu ni Dios.

<sup>3</sup> O pacaa la? rinaba tu ni, peru qué rudii be ni laatu purti cadi jneza ni cá ique tu ora canaba tu ni, sínunque racala'dxi si tu ni para chi chite tu.

<sup>4</sup> Laatu zeda aca tu casi tobi ni cuchee né xheela'. Ñee qué ganna tu qué zanda ganaxhii nu Dios ne ganaxhii ca nu guidxilayú la? Pa chu' né nu binni guidxilayú tobi si la? cucá' lú nu Dios.

<sup>5</sup> Lu Xqui'chi Dios nuu ra cá ca diidxa ri': "Espíritu Santu ni bidii Dios laanu racala'dxi laanu para laasi." Ñee na tu cá si ni lu gui'chi la?

<sup>6</sup> Peru qué rusaana dxí Dios de acané laanu. Laca cá lu Xqui'chi be: "Rudxii deche Dios cani rudxiiba laca laa, ne racané cani qué rudxiiba laca laa."

<sup>7</sup> Laudii lugar guni mandar Dios laatu, ne cadi ulabi tu binidxaba', stubi stubi zaxele de laatu.

<sup>8</sup> Laidxiña gaxha de Dios, ne laa zadxiña gaxha de laatu. Gabe ca' laatu, cani cuchee né Dios ca', lausiá xpida tu casi ñaca niguibí ná tu. Ne zaqueca laatu, cani racala'dxi ganaxhii Dios ne ganaxhii ca guidxilayú, lausiá ladxidó' to.

<sup>9</sup> Cadi quite né tu enda ruchee, sínunque lachuu xizaa, ne lachuu triste ne laguuna'. Lugar de nuxidxi tu, laguuna', ne lugar de ñeche tu, lachuu triste.

<sup>10</sup> Lagaca nadó' nezalú Señor, ne laa zusisaca laatu.

*Iruti udxiba donda ique stobi*

<sup>11</sup> Hermanu ca', cadi iní saa tu, purti pa iní tu ti hermanu stitu, ne udxiba tu donda ique la? cadi laasi be caní' tu sínunque laca caní' tu ley ne na tu cadi jneza ni. Ne

pa iní' tu zacá la? lugar de  
ñuni tu ni na ley que, laga cu-  
sisaca tu laatu jma que laani.

<sup>12</sup> Dios gudixhe ni, ne laa  
si zanda udxiba donda ique  
binni, ne laca laa si zanda ulá  
o utililú. Lii, iruti naca lu  
para udxiba lu donda ique  
stobi.

### *Zeda aca enda nabani casi gupa*

<sup>13</sup> Yanna laucaa diaga ni  
chinié ri', partí nuu de laatu  
na: "Yanadxí o ixí ziuu nu tal  
guidxi, ne ziaana nu raqué  
tubiza. Raqué zazí nu ne  
zutó' no para cuee nu stale  
bidxichi."

<sup>14</sup> Xiñee riní' tu zacá, nin  
qué ganna tu xi chi aca ixí'.  
Ñee na tu ze ru enda nabani  
napa tu ca la? Cadi zacá di  
nga laani, sínunque zeda aca  
enda nabani stinu casi gupa  
riaba siadó' ne sti ratu ma  
gasti'.

<sup>15</sup> Ndi nga ni niní' tu: "Pa  
na Señor la? zabani nu ne  
zuni nu ndi ne ndica'."

<sup>16</sup> Peru laatu runi tu laatu  
nandxó' partí qué ribeza tu  
xi na xa Dios. Ne irá ni guni  
zacá la? cuchee.

<sup>17</sup> Cani ma nanna xii nga  
jneza ne qué guni ni la?  
cuchee né Dios.

## 5

### *Caguixhená Santiagu ca ricu*

<sup>1</sup> Yanna, laucaa diaga, ricu  
ca'. Laguuna ne laucaa ridxi  
pur enda naná ni chi gueeda  
luguiá tu.

<sup>2</sup> Ma qué zaquiiñe irá  
bidxichi ni napa tu ca, ne

mápeca cayó bandaa xhaba  
tu.

<sup>3</sup> Ma cá tini oro ne plata  
stitu, ne zusihuinni tini que  
stonda tu, partí zunidé ni  
laatu casi runi gui. Cutopa lú  
tu bidxichi para iquiiñe laatu  
stobi dxi, peru laca laani usi-  
huinni ni stonda tu dxi usaba  
ná Dios laatu.

<sup>4</sup> Huaguite si tu cani  
huachuugu semiá stitu, ne  
qué huaguixe tu laaca', ne  
yanna casi ñaca culuí' ni  
laatu. Ne ma bina diaga  
Señor Dios stidxi cani ulee  
né laatu guela.

<sup>5</sup> Ndaani guidxilayú ri  
huayapa tu irá ni huaya-  
calá'dxi tu, ne huayuni tu  
irá ni gapa tu gana. Huachá  
tu ladxidó' to casi ti yuze ni  
caroo para gati'.

<sup>6</sup> Huadxiiba tu donda ique  
cani nayá ladxidó', huayuuti  
tu laaca sin indisa ná ca lú tu.

### *Tidi binni ra nagana sin ixhacala'dxi'*

<sup>7</sup> Peru laatu, hermanu  
ca', cadi ixhacala'dxi tu  
irá ni cayuni cabe laatu  
ca. Lacueza ganda dxi  
gueeda Señor. Laguuya  
modo runi cani riguu biní:  
qué rixhacala'dxi ca laga  
cabeza ca guiba primé nisa  
guie ne rairopa para cuee ca  
guela.

<sup>8</sup> Zaqueca laatu, neca caza-  
aca tu irá nga, cadi ixha-  
calá'dxi tu, ne cadi cui sa tu  
atrá, partí ma zeda yuba dxi  
gueeda Señor.

<sup>9</sup> Hermanu stinne ca', cadi  
cu' saa tu xqueja tu, ti qué  
quia donda ique tu, partí

ma zeeda Dios gaxha, ne laa udxiiba donda ique cabe.

<sup>10</sup> Hermanu stinne ca', laguni casi bi'ni ca profeta ni byuí' né binni stiidxa Señor chiqué. Qué nixhacala'dxi ca neca udi'di ca ra nagana.

<sup>11</sup> Ridu'ya nu yanna pabiá' nayeche biaana cabe ora ma udi'di cabe ra nagana sin nixhacala'dxi cabe. Casi uca Job: nabé naná ni beeda luguiá be, peru qué nibí sa be atrá. Ne nanna tu xi bi'ni Señor para laabe óraque, partí riá Señor binni, ne rilasel'a'dxi laaca'.

<sup>12</sup> Yanna laiziidi chaahui ni chi tidxe laatu ri': cadi guni jurar tu, nin pur ibá', nin pur guidxilayú, nin pur intica, sínunque lainí' "Ya" o "Co", ne nga si, ti cadi quiba donda ique tu.

*Naquiiñe iní' né binni Dios*

<sup>13</sup> Pa nuu tobi de laatu cadi'di ra nagana la? iní' né Dios. Pa nuu ni cayeche la? gu'nda cantu.

<sup>14</sup> Pa nuu tobi de laatu huará la? useenda caa ca hermanu gola de lade cani runi cre, iní' né ca Dios pur laabe ne xhubi ca aceite ladi be laga canaba ca lu Señor acané laabe.

<sup>15</sup> Ne pa dxandí runi cre ca zuni Dios ni canaba ca la? zalá be, ne zandisa Señor laabe, ne pa huachee be la? zuxhá Señor stonda be.

<sup>16</sup> Pa nuu tobi de laatu nanna ma bichee la? gabi ca xcaadxi hermanu xi bi'ni', ne cada tobi de laatu iní' né Dios pur ca xcaadxi, ti aca tu nazaaca de irá modo. Ora rini' né ca xpinni Dios laa

de idubi ladxidó' ca la? ru-gaanda stiidxa ca lú be.

<sup>17</sup> Uca profeta Elías binni guidxilayú casi laanu, ne ti tiru unaba be lu Dios de idubi ladxidó' be cadi usaba nisa guie, ne zaqué uca ni. Qué ñaba nisa guie guidxi que chonna izá aronda'.

<sup>18</sup> Bigueta uni' né be Dios Peru ngue ma canaba be guíaba nisa guie, ne dxi que ru' biaba nisa guie ne bigueta biree guela.

<sup>19</sup> Hermanu ca', pa iree chu tobi de laatu de ni dxandí', ne ganda udxigueta stobi laabe la?

<sup>20</sup> ganna ni bidxigueta laabe que, tutiica ni udxigueta tobi ni ma biree chu la? zulá ngue de lu ná enda guti ne zaxá stonda ngue.

# PRIME GUI'CHI BICAA SAN PEDRU

*Cucaa Pedru gui'chi lu  
cani reche ndase*

<sup>1</sup> Naa nga Pedru. Naca apóstol sti Jesucristu. Cucaa gui'chi ri lu ca xpinni Dios ni ma cadi nabeza xquidxi, cani reche ndase neza Ponto, Galacia, Capadocia, Asia, ne Bitinia.

<sup>2</sup> Hermanu ca', gulí Dios Bixhoze nu laatu casi gudixhe guni chiqué. Guridxi be laatu ra uni' né Espíritu Santu laatu para guia ladxidó' to ne rini sti Jesucristu ne para uzuuba tu stiidxa'. Dios ucheeche ndaaya laatu ne quixhe dxí pe ladxidó' to.

*Ni cabeza laanu ibá'*

<sup>3</sup> Usisaca nu Dios, Bixhoze Jesucristu, Señor stinu. Nabé bilaseladxí be laanu, nga runi bidii be laanu ti enda nabani cubi, casi ñaca gule nu sti tiru. Ne uca ni ra bisibani be Jesucristu de lade gue'tu'. Yanna ma nanna dxichi nu laca zabani nu,

<sup>4</sup> ne zacaa nu ni cayapa chaahui be para laanu ibá'. Qué zanda initilú ni, nin guiu'dxu ni, nin guio'xho ni.

<sup>5</sup> Laatu runi cre tu Dios, nga runi cayapa laatu ne enda nandxó' sti' laga cabeza tu ulá be laatu de cani nuu ndaani guidxilayú ri'. Ma nexhe guni be ni dxí izaa xhi guidxilayú.

<sup>6</sup> Ne pur irá nga rieche tu, neca naquiiñe acaná tu caadxí yanna ri', peru tobi zidi'di si nga.

<sup>7</sup> Zeda gaca fe stitu casi oro. Ne casi rutiidi cabe oro lu gui para ihuinni pa dxandí oro la? zacaca cadi'di tu ra naná para ihuinni pa dxandí runi cre tu. Ne pa tidi tu ni sin guiba tu la? zasaca fe stitu jma que oro, purti oro rinitilú. Nga runi pa usihuinni tu dxandí runi cre tu Dios la? zudxiiba be laatu ne zusisaca be laatu dxí gueeda Jesucristu.

<sup>8</sup> Qué huayuuya tu laabe Peru nadxii tu laabe. Ne neca qué ruuya tu laabe, Peru runi cre tu laabe ne rieche tu dede qué ridxela tu xi iní tu, de tantu ridxá ladxidó' to de enda nayeche'.

<sup>9</sup> Purti nanna tu bilá be xhialma tu. Ne bi'ni be ni purti bini cre tu.

<sup>10</sup> Chiqué bizeete ca profeta de ni cudii Dios laanu yanna ri', ne nabé undaa ique né cabe ñene cabe xii ni.

<sup>11</sup> Bisiene Espíritu sti Cristu laaca de enda naná ni chi tidi Cristu, ne pabiá' zasaca be ora ma udi'di be ni. Biyubi cabe ñanna cabe tu laabe ne padxí gaca irá ni cayabi Espíritu que laacabe.

<sup>12</sup> Peru gudxi Dios laacabe cadi para laacabe ni caní Espíritu que, sínunque para laanu. Ne ca diidxa que ca nga ma bina diaga tu de ruan cani byu' né laatu stiidxa Cristu. Gunda bisiidi cabe ni laatu pur enda nandxó' sti Espíritu Santu ni biseenda

Dios de ibá'. Ne tan sicarú irá ni la? dede ca ángel ñuula'dxi ca ñene chaahui ca ni.

*Na Dios gaca nu nacha'hui'*

<sup>13</sup> Nga runi lacuu xpiaani tu ne laguni ni dxandí risaca. Laquixhe idubi xquenda biaani tu lu ni cabeza tu udii Dios laatu dxi gueeda Jesucristu.

<sup>14</sup> Lagaca casi ba'du ni ruzuuba diidxa', ne ma cadi guni tu ni na ique tu casi bi'ni tu dxi ca'ru gunibiá' tu Dios.

<sup>15</sup> Lagaca nacha'hui de irá ni guni tu casi nacha'hui Dios ni uní' né laatu para gaca tu xpinni.

<sup>16</sup> Casi cá lú Xqui'chi Dios ra na: "Lagaca nacha'hui", partí zacá naa."

<sup>17</sup> Nga runi pa ma rabi tu laabe Bixhoze tu la? laidxibi la' laabe bia' dxi nabani tu ndaani guidxilayú. Qué zudxiiba be donda ique tobi jma que stobi sínunque cada tobi bia' ni bi'ni'.

<sup>18</sup> Ma bílā Dios laatu de irá enda qué iquiiñe ni bisaana né ca bixhoze gola tu laatu. Ne nanna ca tu bi'ni be ni ra gudixe be irá ni nuzaabi tu. Peru qué niguixe né be ni xiixa ni rinitilú casi oro ne plata,

<sup>19</sup> sínunque gudixe né be ni rini sti Jesucristu ni risaca jma que irá xixé. Laa guti casi ca dendxu huiini ni bisiga'de cabe Dios chiqué. Ulí cabe ni jma galán ne ni nazaaca para bisiga'de cabe laa.

<sup>20</sup> De ante cha guidxilayú maca gudixhe Dios gaca

Cristu zacá, peru deru bisihuinni be ni para bien stitu.

<sup>21</sup> Purti pur Cristu runi cre tu laabe. Laabe bisibani be Cristu de lade gue'tu', ne bisisaca be laa. Nga runi runi cre tu laabe ne cá lú tu laabe.

<sup>22</sup> Hermanu ca', dede dxi ucané Espíritu Santu laatuuzuuba tu stiidxa Cristu la? bia ladxidó' to, ne ma zanda ganaxhii tu hermanu stitu. Ne zacá laguni, laganaxhii saa de idubi ladxidó' to.

<sup>23</sup> Laatu ma gule tu sti tiru, ma cadi de binni guidxilayú ni rati, sínunque gule tu de stiidxa Dios ni qué ziuu dxi initilú ne ni rudii enda nabani.

<sup>24</sup> Casi na lu Xqui'chi Dios: Irá binni zeda gaca casi yaga gui'xhi', ne enda risaca stícabe zeda gaca casi guie' stini. Ne casi ribidxi yaga gui'xhi ne riaba guie' sti la? zacaca zadi'di enda risaca sticabe.

<sup>25</sup> Peru stiidxa Señor qué ziuu dxi initilú. Ne laani nga ca diidxa byuí né cabe laatu, ni rulá binni.

## 2

<sup>1</sup> Lausaana de icá ique tu ni cadi jneza, ne lausaana de usigui tu. Cadi gaca tu nacha'hui de luguiá si, ne cadi gache lú tu sti stobi, ne cadi sa né tu cuentu.

<sup>2</sup> Lagaca casi ba'du deru gule, rului'la'dxi gue leche. Zacaca laatu laului'la'dxi ganna tu stiidxa Dios ti jma rusi guiene tu para ilá tu.

<sup>3</sup> Pa dxandí ma bidii tu cuenta pabiá' nacha'hui Señor la? laguni zacá.

*Cristu guie ni nabani*

<sup>4</sup> Laidxiña ra nuu Señor. Laabe zeda gaca be ti guie ni nabani. Qué nisaca be nezalú binni peru Dios gulí laabe ne bisisaca laabe.

<sup>5</sup> Laatu laca zeda gaca tu guie ni nabani. Nga runi laudii lugar iquiiñe Dios laatu ra ucuí xhiu'du ni qué rihuinni. Chiqué bisiga'de ca sacerdote dendxu Dios. Yanna ma racala'dxi be iquiiñe be laatu casi sacerdote stibe para usiga'de tu laabe ni riale ndaani ladxidó'to. Nga huaxa ziula'dxi be icaa be, ne zanda guni tu ni purti runi cre tu Jesucristu.

<sup>6</sup> Cá lu Xqui'chi Dios ra na: Caguixhe Cristu ndaani guidxi Sion casi ti guie para inaaze dxichi yu'du stinne', ne yu'du ca nga ca xpinne'.

Laabe nga ni ulié ni jma risaca. Tu guni cre laabe la? qué ziuu dxi gueeda malaya laa.

<sup>7</sup> Risaca be para laatu, cani runi cre laabe. Peru para cani qué runi cre la? zeda gaca be casi ni cá lu Xqui'chi Dios:

Guie ni bisa'bi cani cucuí yoo que,

guie que pe naaze yoo que yanna.

<sup>8</sup> Laca cá ni sicarí': Zaca be casi ti guie ni irenda ñee cabe para guiaba cabe,

purti qué rulabi cabe stiidxa be, ne maca nexhe guiaba cani runi zacá.

*Ca xpinni Dios*

<sup>9</sup> Peru laatu la? gulí pe Dios laatu para gaca tu xpinni, ne naca tu casi sacerdote para guni tu xhiiña rey stinu ni nuu ibá'. Ma naca tu ti guidxi ni ulee chu be para laabe. Ma sti pe be laatu. Ne gudixhe be gaca ni zacá para gabí tu binni rihuinni pabiá' nandxó' be pur ni runi be, purti ulee be laatu de lu guelacahui ne uluu be laatu lu biaani sicarú stibe.

<sup>10</sup> Qué ñaca tu xpinni be chiqué, peru yanna ma xpinni be laatu, ne zaqueca iruti ña laatu, peru ma biá be laatu.

*Enda ruzuuba diidxa'*

<sup>11</sup> Hermanu ni nadxiee ca', laatu nuu tu ndaani guidxi-layú casi ni canazá xquidxi binni. Nga runi rinaba laatu cadi ucaa ique tu ni cadi jneza, purti irá nga riguba yu laatu ladu initilú xhialma tu.

<sup>12</sup> Lasá jneza lade cani qué runi cre Dios, neca riní' cabe laatu ne napa cabe laatu casi binni malu, peru zuuya cabe pabiá' jneza runi tu, ne zacá zusisaca cabe Dios dxi cuidxi cuenta irá xixé.

<sup>13</sup> Lauzuuba stiidxa irá cani runi mandar ndaani guidxilayú, purti nga ni racala'dxi Señor, naca ni presidente ni jma risaca lade cani runi mandar,

<sup>14</sup> o naca ni cani ruseenda be para usaba ná cani ruchee ne para udxiba cani runi jneza.

<sup>15</sup> Purti sicarí nga racala'dxi Dios guni tu: guni tu jneza para useegu tu ruua ca binni huati ni qué ganna xi riní.

<sup>16</sup> Ma qué rucaa Dios laatu guni tu ni na ley para ilá tu, perú cadi tisi qué rucaa be laatu guni tu ni la? uchee né tu ni, sínunque laibani modo riula'dxi Dios, purti ma stibe laatu.

<sup>17</sup> Laguni respetar irá binni. Laganaxhii irá ca hermanu. Laidxibi Dios. Laguni respetar presidente.

### *Xi guni tu ora acaná tu*

<sup>18</sup> Hermanu ca' ni napa xpixuaana', lauzuuba stiidxa ca', ne laguni respetar laaca'. Ne cadi ni nacha'hui ne ni nadó' si, sínunque ne cani naduxhu'.

<sup>19</sup> Purti zaguu Dios ndaaya laatu pa qué idxiichi tu ora tinde né cabe laatu neca cadi cuchee tu, ne guni tu ni purti racala'dxi tu guni tu ni na Dios.

<sup>20</sup> Pa guiba ná tu purti cuchee tu, ne qué idxiichi tu, ñee na tu ma cayuni tu xiixa nga la? Peru pa guiba ná tu neca cadi cuchee tu, ne qué idxiichi tu la? óraque huaxa cayuni tu xiixa para guieche né Dios laatu.

<sup>21</sup> Para nga uní' né be laatu, purti laca ucaná Cristu pur laatu. Yanna laguni casi bi'ni Cristu.

<sup>22</sup> Laabe qué nuchee be ne qué nusiguii be,

<sup>23</sup> ne ora uluu dí cabe laabe, qué niguu dí be laaca'. Ne ora ucaná be, qué ñabi be laaca gapa gá si ca laaca',

sínunque bisaana be irá ni lu ná Dios ti laa ruuya irá cosa jneza.

<sup>24</sup> Byua' be irá stonda nu lu cuerpu stibe dxi ucuá be lu cruz que, para ma cadi ibani nu lu pecadu sínunque ibani nu jneza casi na Dios. Ne sti ni ucaná be que la? laatu bilá tu.

<sup>25</sup> Chiqué bireeche ndase tu casi dendxu ni cananiti, perú yanna ma bigueta tu ra nuu Cristu. Laa nga Pastor stitu ni cayapa xhialma tu.

## 3

### *Ximodo ibani cani ma bichaganá'*

<sup>1</sup> Hermana ca', lauzuuba stiidxa xheela tu, purti pa nuu de laaca qué runi cre stiidxa Cristu la? zándaca iguudxi

<sup>2</sup> ra gu'ya runi xheela jneza ne runi respetar laa. Ne zacá cadi naquiiñe iní' pe tu para ucuudxi tu laaca'.

<sup>3</sup> Cadi ucaa ique tu enda ruzuchaahui de luguiá si, casi modo guni tu ique tu, o gaze tu oro, o gacu tu lari ni jma risaca,

<sup>4</sup> sínunque laucaa ique gaca tu nacha'hui ne binni, ne gaca tu nadó', purti nga nga enda sicarú ni risaca nezalú Dios, ne nga nga enda sicarú ni qué rinitilú.

<sup>5</sup> Zacá nga bizuchaahui ca gunaa ni uyuu chiqué, cani uzá gaxha de Dios. Bini cre ca Dios de idubi ladxidó' ca', ne bizuuba ca stiidxa xheela ca'.

<sup>6</sup> Casi bi'ni Sara, bizuuba stiidxa Abraham dede gudxi

laa señor sti'. Ne zaca tu casi Sara, pa guni tu jneza, ne qué idxibi tu.

<sup>7</sup> Zacaca laatu, hermanu ca', lauyubi modo guiene tu xheela tu. Lagaca nacha'hui ne laacabe, cadi partí si jma nadá cabe que laatu, sínunque ne laca partí ma bidii Dios laacabe enda nabani ni qué zaluxé, cásica bidii ni laatu pur enda nacha'hui sti'. Záca laguni ti cadi uchiiña gasti laatu ora iní' né tu Dios.

*Cani cayacaná partí cayuni jneza*

<sup>8</sup> Yanna la? cayabe irá tu: lachuu tobi si, ne lailasel'a'dxi saa, ne laganax-hii saa casi enda bi'chi'. Lagaca nacha'hui ne cadi udxiiba tu laca laatu.

<sup>9</sup> Necá uchee né binni laatu, cadi uquixe tu ni laaca', ne pa cu' dí ca laatu, cadi cu' dí tu laaca', sínunque lainaba lu Dios cu' ndaaya laaca'. Purtí nga nga bi'ni Dios ne laatu, uní' né laatu para cu' ndaaya laatu.

<sup>10</sup> Sicarí cá lu Xqui'chi Dios: Ni racala'dxi ibani nayeche' ne tidi dxi galán la?  
ucueeza de iní' ni cadi jneza ne ucueeza ruaa de usiguii,  
<sup>11</sup> ixele de ni nadxaba' ne guni ni jneza, uyubi ximodo idxaaga irá binni,

ne guni ni de idubi ladxitó'.  
<sup>12</sup> Purtí rapa Señor cani runi jneza, ne rucaa diaga be laaca ora iní' né ca laabe, Peru rudxii deche be cani runi ni nadxaba'.

<sup>13</sup> Tu zanda ga'ni ná laatu pa puru si ni jneza cuyubi tu guni tu ya'.

<sup>14</sup> Peru pa cayuni tu jneza ne acaná tu la? dichoso de laatu. Cadi idxibi tu binni guidxilayú, ne cadi uchibi iruti laatu,

<sup>15</sup> sínunque lausisaca Cristu ndaani ladxitó' to. Laguietinala'dxi laa nga Señor stitu. Ne lagataná para icabi tu cani racala'dxi ganna xii nga runi cre tu, Peru laicabi laaca ne diidxa nadó' ne respetu.

<sup>16</sup> Lasá jneza ti ganna tu nayá ladxitó' to. Ne zacá zatuí lú cani cananí' laatu partí si xpinni Cristu laatu, ra gu'ya ca dxandí runi tu jneza.

<sup>17</sup> Pa acaná tu ra cayuni tu jneza la? zaa, pa nga ni na Dios. Peru pa acaná tu ra cuchee tu la? laatu cuyubi tu ni.

<sup>18</sup> Purtí Cristu laca ucaná, dede guti para biaxa ni biché' nu. Ti tiru si guti be pur irá nu. Qué ñuu dxi nuchee be Peru ucaná be sti irá ni biché' nu, para uchiña be laanu ra nuu Dios. Gutí cuerpu stibe, Peru qué ñati xhialma be.

<sup>19</sup> Ne uyé xhialma be que, yeguí né ca espíritu yeguyoo diidxa'.

<sup>20</sup> Qué nuzuuba ca alma que diidxa chiqué dxi bizá' Noé arca. Laga cuzá' Noé arca que, qué nixhacala'dxi Dios, uleza pa ninaba ca perdón laa. Peru xhono si binni bilá ndaani arca que ra undisa nisa ni.

<sup>21</sup> Ne zanda gabi nu zeda gaca nisa que casi ra uyú' nisa nu para bilá nu. Ne uyú' nisa nu, cadi para usiá nisa que ra nabiidi ladi nu, sínunque para usihuinni nu ma bia ladxidó' no ne canaba nu lu Dios acané laanu sa nu modo na. Bilá be laanu purti bibani Cristu de lade gue'tu'.

<sup>22</sup> Ne ma nuu Cristu ibá' zuba cue' Dios, ne irá ca ángel ne cani runi mandar ne cani nandxó' ruzuuba ca stiidxa be.

## 4

*Iquiiñe tu gracia bidii Dios laatu*

<sup>1</sup> Nga runi cásica ucaná cuerpu sti Cristu la? zaqueca laatu laca cadi idxibi tu acaná tu, purti ni ma ucaná pur Cristu la? casi ñaca ma guti para enda ruchee,

<sup>2</sup> ti ibani para guni ni na Dios, bia' dxi ibani ndaani guidxilayú ri', ne cadi ni na ique.

<sup>3</sup> Ma bia' cati de guni tu irá ni runi cani qué runibiá' Dios. Chiqué uyuu né tu laacabe tobi si lu irá viciu. Ucuá ique tu ni cadi jneza, uxudxi tu, bi'ní tu saa para xhudxi si tu, ne yenanda tu ca bidó', neca nexhe cadi chi nanda tu laaca'.

<sup>4</sup> Yanna ma ridxagayaa cabe xiñee qué rizá né tu laacabe lu irá ni cadi jneza ni runi cabe ne nga runi riní' cabe laatu.

<sup>5</sup> Peru napa cabe xidé uzuhuaa cabe nezalú Dios ni ma nuu para cuidxi cuenta

irá xixé, cásica cani nabani zaqueca cani ma guti.

<sup>6</sup> Nga runi bireeche stiidxa Cristu lade cani ma guti. Guti ca casi rati irá binni guidxilayú peru nabani né xhialma ca Dios.

<sup>7</sup> Ma zeda dxiña dxi iluxe irá xixé ni nuu ndaani guidxilayú. Nga runi lacuu xpi-aani tu ne cadi ucaa ique tu ni cadi jneza, ti ganda iní' né tu Dios de idubi ladxidó' to.

<sup>8</sup> Ne ni jma naquiiñe la? ganaxhii saa tu, purti pa nadxii tu stobi la? neca uchee né laatu qué zuquixe tu ni laa.

<sup>9</sup> Lauchagalú saa sin quiche ruaa tu.

<sup>10</sup> Cada tobi iquiiñe gracia ni bidii Dios laa para acané ca xcaadxi, para ihuinni jneza cayuni né gracia bidii Dios laa.

<sup>11</sup> Ni napa gracia para iní la? güi né binni stiidxa Dios. Ne ni napa gracia para acané stobi la? guni ni bia' stipa ni bidii Dios laa. Ne irá xixé ni guni tu, laguni ni para gusisaca tu Dios purti xhiña Jesucristu cayuni tu. Cadi guiaana dxí nu de usisaca nu laabe, ne qué ziaana dxí be de guni mandar be.

*Ximodo tidi xpinni Cristu ni nagana*

<sup>12</sup> Hermanu ni nadxiee ca', cadi idxagayaa tu ora gueeda xiixa ni nabé naná luguiá tu, maca nanna tu zaca ni.

<sup>13</sup> Sínunque lagueche purti cayacaná tu casi ucaná Cristu, ne zacá zadxá ladxidó' to de enda nayeche dxi

gueeda be, dxi ihuinni pabiá' risaca be.

<sup>14</sup> Dichoso de laatu pa cu' dí cabe laatu tisi xpinni Cristu laatu, purti nuu né Espíritu sti Dios ni nandxó' laatu. Laacabe rinjí' cabe laabe peru laatu rusisaca tu laabe.

<sup>15</sup> Peru pa acaná tu, cadi gaca ni pur ni huayuni tu, cadi guuti tu, cadi cuana tu, nin guni tu xiixa ru ni cadi jneza, nin cu' ruan tu ratiica si.

<sup>16</sup> Peru pa acaná tuuxa purti runi cre Cristu la? cadi ituí lú, sínunque udii di-uxquixe Dios purti xpinni Cristu laa.

<sup>17</sup> Ma bidxiña hora cu' bia' Dios stonda xpinni, ne pa uzulú né be laanu la? xi gaca xa de cani qué rizaala'dxi stidxa be ya'.

<sup>18</sup> Casi cá ni lu Xqui'chi be: "Pa nagana ilá ni nacha'hui la? xi gaca xa de cani qué runi cre Dios, ne cani qué runi jneza ya'."

<sup>19</sup> Nga runi, pa cayacaná tu purti nga nga ni gudixhe Dios para laatu la? cadi guiaana dxí tu de guni tu jneza ne lausaana xhalma tu lu ná Dios ni bizá' laanu, purti laa qué zusaana laatu.

## 5

*Culidxe Pedru ca xpinni Cristu*

<sup>1</sup> Yanna la? chinié nia cani naca hermanu gola lade ca xpinni Cristu. Naa laca naca hermanu gola casi laatu. Naa biiya pia' ra ucaná Cristu, ne ziuaa lu enda

nandxó' stibe, casi laatu, dxi ganda dxi ihuinni ni.

<sup>2</sup> Rinaba laatu, hermanu gola ca', lagapa ca xpinni Dios, cani bisaana be lu ná tu. Laguni ni de idubi ladxidó' to casi racala'dxi Dios, ne cadi purti napa tu xidé guni tu ni, nin pur bidxichi, sínunque laguni ni de idubi ladxidó' to.

<sup>3</sup> Cadi guni mandar tu laa-gabe casi ñaca laatu nga xpixuaana cabe, sínunque lasá jneza ti gu'ya cabe ximodo ibani cabe.

<sup>4</sup> Ti ora gueeda Pastor ni naca xaíque sti irá xixé nu la? zudii laatu ti premiu ni qué ziuu dxi initilú.

<sup>5</sup> Zaqueca laatu, hermanu ni nahuiini ru', lauzuuba sti-idxa ca hermanu gola. Ne irá tu laizaala'dxi saa, sin udxiiba tu laca laatu, purti cá lu gui'chi ra na ni: "Nanala'dxi Dios ni runi cani rudxiiba laca laa, peru racané be cani qué rudxiiba laca laa."

<sup>6</sup> Laganna gasti nga laatu nezalú Dios ni nandxó', ti udxiiba be laatu dxi naguixhe be guni be ni.

<sup>7</sup> Cadi chu' tu xizaa, sínunque laquixhe irá ni lu ná be, purti laabe cayapa be laatu.

<sup>8</sup> Lacuu xpiiani tu ne lagataná, purti canazá binidxaba', enemigu stitu, canananda laatu casi ti lion ni canaguu beedxe', canayubi tu uxuixe.

<sup>9</sup> Lauzuhuaa dxíichi lu ni runi cre tu, ne laucaa lú laabe, purti nanna tu cadi laasi tu cadi'di tu ni, sínunque

zacaca cayacaná ca hermanu  
stitu ni nuu irá ladu.

<sup>10</sup> Ne ora ma ucaná tu  
caadxi la? jma rusi zaniisi  
tu lu stiidxa Dios, zuzuhuaa  
chaahui be laatu, ne zudii be  
stipa laatu ne zuni be laatu  
naguidxi. Laabe racané be  
laanu, uní né be laanu para  
isaca né nu Jesucristu lu  
enda nandxó' sti ni qué ziuu  
dxi iluxe.

<sup>11</sup> Laabe qué ziuu dxi  
guiaana dxí be de isaca be  
ne guni mandar be. Amén.

*Diuxi*

<sup>12</sup> Napa Silvanu casi ti her-  
manu ni qué riree chu lu  
jneza Dios. Laa ucané naa  
bicaa gui'chi huiini ri lú  
tu. Bicaa ni para acaniá  
laatu indisa ique tu ne para  
gabe laatu irá ni bidii Dios  
laatu, irá ni rusihuinni pabiá'  
nadxxii laatu. Yanna cadi  
ichaacha tu de ni runi cre tu.

<sup>13</sup> Ca xpinni Cristu ni nuu  
Babilonia, cani gulí Dios  
cásica gulí laatu, cuseenda  
ca stiuxi tu, ne Marcu xiiñe  
laca cuseenda stiuxi tu.

<sup>14</sup> Laugapa diuxi saa ne  
laquidxi saa purti hermanu  
laatu.

Gata dxí ladxidó' to irá tu,  
ca xpinni Jesucristu. Amén.

## RAIROPA GUI'CHI BICAA SAN PEDRU

*Cucaa Pedru gui'chi lu ca xpinni Cristu*

<sup>1</sup> Naa nga Simón Pedru. Rune xhiiña Jesucristu ne naca apóstol sti'. Cucaa gui'chi ri lu irá cani ma runi cre casi runi cre du. Jneza runi Jesucristu, Dios stinu ni bilá laanu, ucané para bini cre tu casi pe runi cre du. Nabé risaca modo runi cre nu.

<sup>2</sup> Lauyubi gunibiá' chaahui tu Dios ne Jesús Señor stinu ti jma rusi cu' ca ndaaya laatu ne quixhe dxí ca ladxidó' to.

*Ximodo gaca ca xpinni Cristu*

<sup>3</sup> Nandxó' Dios ne ma gudixhe irá ni caqui'ñe nu para ibani nu modo na, ne zacaa nu ni ra gunibiá' chaahui nu Jesús. Laa guridxi laanu ra bilui' laanu enda nandxó' ne enda nacha'hui sti'.

<sup>4</sup> Ne laca pur enda nandxó' stibe ca bidii stiidxa be guni be ni nabé galán para laanu, ne nabé risaca ni, purti zudii be laanu Espíritu stibe ti gaca nu casi laabe, ne zalá nu de irá enda nadxaba ni rinanda binni ndaani guidxilayú ri'.

<sup>5</sup> Ma biiya tu irá ni runi be para laanu, ne yáquexa ma runi cre tu la? laucaa ique sa tu jneza, ne cadi nga si sínunque lauyubi guiene chaahui tu stiidxa Dios.

<sup>6</sup> Zacané ni laatu iziidi tu ucueeza tu laatu de guni tu ni na ique tu, ne ma cadi iree tu gana, ne laudii xpida tu Dios para guni tu ni na.

<sup>7</sup> Ne laca lauyubi gaca tu nacha'hui ne binni, ne laganaxhii laaca de idubi ladxidó' to.

<sup>8</sup> Pa uyubi tu guni tu irá nga la? zanda iquiiñe Jesucristu Señor stinu laatu, ne zahuinni cadi pur gana si runibiá' tu laabe.

<sup>9</sup> Peru pa qué uyubi tu guni tu ni la? zeda aca tu casi ni nacheepa lú, o casi ni huaxié' riná. Ne cani rizá zacá ruluí ma bisiaanda pa bisiá Dios ladxidó'.

<sup>10</sup> Nga runi, hermanu ca', lauyubi usihuinni tu dxandí uní' né Dios laatu ne ulí laatu. Zacá qué ziuu dxi guiaaba tu,

<sup>11</sup> ne zuxhele ndaga Dios puerta para laatu ora ma chi chuu tu ra nuu Jesucristu Señor stinu ni bilá laanu. Laa qué ziuu dxi guiaana dxí de guni mandar.

<sup>12</sup> Nga runi qué ziaana dxie de usietenaladxe irá ndi laatu, neca ma ucuaa tu ni dxandí ne ma zuhuua chaahui tu lú ni.

<sup>13</sup> Ne laga nabane rua' la? rabe naquiiñe usietenaladxe laatu para gataná tu.

<sup>14</sup> Purti ma bilui' Señor Jesucristu naa mayaca usaana guidxilayú ri'.

<sup>15</sup> Peru rabe chi acaniá laatu bia' ganda ti' laga nuaa rua', ti qué chu' dxi guiaanda ni laatu neca ma gute'.

*Cani bi'ya enda nandxó' sti  
Cristu*

<sup>16</sup> Dxi bisi'di du laatu de enda nandxó' sti Jesucristu Señor stinu ne gudxi du laatu zabigueta be guidxilayú la? cadi de xiga ique si du biree ni, sínunque bidu'ya pe du enda nandxó' stibe.

<sup>17</sup> Purti dxi bisisaca Dios laabe la? ne laadu nuu du raqué, ne bidu'ya du pabiá'bizaani ladi be óraque, dede riaqui biaani', ne bina diaga du ra uní' tobi de ibá', na: "Ndi nga Xiiñe ni nadxiee', ne ni rusieche naa."

<sup>18</sup> Bina diaga pe du ca díidxa que, purti nuu né du Señor lu dani ra uní' Dios ni nandxó'.

<sup>19</sup> Ne pur ni bidu'ya du ne ni bina diaga du que, jma rusi runi cre du irá ni bicaa ca profeta sti Dios chiqué. Laatu laca zuni tu jneza pa ulabi chaahui tu ni bicaa cabe, purti naca ni casi ti biaani ruzaani lu guelacahui, laga si idxiña dxi gueeda Cristu. Purti dxi gueeda be zeda gaca casi ora ma birá gueela ne ma cuzani xpiaani dxi, purti zuuya chaahui tu ne ziene tu irá ni.

<sup>20</sup> Peru laguietenala'dxi': cadi nisi ze si usiidi binni stiidxa Dios casi räcala'dxi'.

<sup>21</sup> Purti dede nin ca profeta sti Dios qué nusiidi ca ni ucal'a'dxi si ca', sínunque uní' ca ni na Dios casi gudxi Espíritu Santu ni laaca'.

## 2

*Cani rusiidi ni cadi dxandi'  
(Judas 4-13)*

<sup>1</sup> Chiqué laca uyuu profeta lade ca binni Israel ni na profeta sti Dios laa, peru cadi dxandí ni. Ne zaqueca zaca lade tu, ziuu tu usiidi laatu ni cadi dxandí zeeda de Dios. Zaguite cabe laatu ne enda rusiguii stícabe ne zudxii deche cabe Señor ni bilá laa-cabe, peru nagueenda zanitilú cabe.

<sup>2</sup> Stale binni zinanda laa-cabe ne zuni irá enda nadxaba ni runi cabe, ne pur laaca zaguiñe yu binni sti-idxa Cristu ne neza sti'.

<sup>3</sup> Nisi bidxichi ricá ique cabe, nga runi zaguite cabe laatu ne zusiidi cabe laatu intiica ni cadi dxandí para si gaxha cabe stitu. Peru dede ma xadxí maca bidxiiba Dios donda ique cabe, ne qué zalá cabe de lu ná'.

<sup>4</sup> Purti nin ca ángel ni bichee chiqué qué ná Dios laaca' sínunque uladxi laaca', biseenda laaca gabíá ne biseguyoo laaca ra nacahui, cá ca cadena laga cabeza ca dxi cuidxi be cuenta irá xixé.

<sup>5</sup> Zaqueca qué ná be ca binni ni qué nulabi laabe chiqué, sínunque biseenda be ti nisa ro' dede bilaahua ca', ne guti irá ca'. Peru bilá be Noé ni gudxi laaca nusaana ca irá enda ruchee stica', laasi ne xcadxe binni.

<sup>6</sup> Laca qué ná be binni Sodoma ne Gomorra, biza-aqui be laaca dede gucadé ca'. Bi'ni be ni ti idxibi irá binni ni qué rulabi laabe, ne ganna ca xi cabeza laaca'.

<sup>7</sup> Peru dxi binitilú be Sodoma la? bilá be Lot, ti hombre runi jneza ni nabeza

ndaani guidxi que, purti laa si qué ñuula'dxi modo nabani ca binni que.

<sup>8</sup> Irá dxi racaná ladxidó' be ora gu'ya be ne guna diaga be irá enda nadxaba cayuni ca binni que, purti laabe runi be jneza.

<sup>9</sup> Zacá nga rulá Dios ni zinanda laa ora cadi'di ca ra nagana, peru cani qué rulabi laabe la? rusaana be laaca para guiaiba ná ca dxi cuidxi be cuenta irá'.

<sup>10</sup> Ne jma rusi zusaba ná be cani canayuni ni na ique ne canananda intiica chu'la'dxi', cani qué na guni mandar Señor laa. Raca ca nandxó' ne qué rulabi ca iruti'. Qué ridxibi ca', nin para guni ca burla cani risaca ibá'.

<sup>11</sup> Nin ca ángel jma risaca ca ne jma nandxó' ca' qué riguu dí ca laacabe nezalú Dios.

<sup>12</sup> Peru laacabe nabani cabe casi mani purti qué gapa cabe enda biaani'. Riguiñe yu cabe ni qué riene cabe. Ne casi mani rale para igaa si ne gati la? zaqueca zaca cabe.

<sup>13</sup> Zaguixe cabe ni bi'ni cabe. Zacañá cabe casi bininá cabe stobi. Enda nayeche stícabe nga guni cabe intiica na ique cabe idubi dxi. Ora ro né cabe laatu nisi cá ique cabe ni nadxaba' ne runi yudxu cabe lade tu dede rini' binni laatu.

<sup>14</sup> Qué zanda gu'ya cabe ti gunaa maca racala'dxi cabe chu' né cabe laa, ne qué lica rixhacala'dxi cabe de uchee cabe, ne zacá ruquiinde cabe cani cadi zuhuua chaahui lu

neza sti Señor. Ma biaa cabe yuubi cabe para laasi cabe. Peru ma dxi'ba dí ique cabe.

<sup>15</sup> Cananiti cabe purti bisaana cabe neza cha'hui sti Dios, ne ma ucuaa cabe neza uzá Balaam, xiiñi Beor, ni bichee né Dios para si guni ganar bidxichi.

<sup>16</sup> Peru gudó Balaam echada pur enda nadxaba sti', ra uní' né ti burru laa casi riní' binni, ne raqué biaana dxí enda huati sti profeta que.

<sup>17</sup> Qué iquiiñe cabe. Zeda gaca cabe casi bizé sin nisa, o casi za ni riné bi yooxho'.

<sup>18</sup> Ninóu' nuu xpiaani cabe para iní' cabe, peru qué iquiiñe ni riní' cabe. Pur irá enda nadxaba ni runi cabe ruquiinde cabe cani deru biree lade cani runi ni cadi jneza.

<sup>19</sup> Rabi cabe laaca jma galán ora cadi cá binni yaga purti zacá zanda guni cabe intiica gacala'dxi cabe, peru laape cabe cá cabe yaga lu enda nadxaba', purti intiica ni qué ganda usaana nu la? cá nu yaga lu ná ni.

<sup>20</sup> Ne pa ibigueta tobi ni ma binibiá' Jesucristu ne chu' lu ná enda nadxaba sti guidxilayú ri sti tiru la? zanaaze dxíichi ni laa ne nabé naná zaca para laa, jma que dxi ca'ru gunibiá' Señor stinu ni bilá laanu.

<sup>21</sup> Jma galán ñaca para laabe pa qué ñunibiá' be neza cha'hui sti Señor, que ibigueta be ora ma binibiá' be ni ne ixele be de ni gudixhe Dios chi nanda nu.

<sup>22</sup> Nuu ti dichu na: "Ribigueta bi'cu ra bidxi'ba' ne bihui ni ma guze nisa nayá ribigueta ndaani nisa beñe." Zacaca zeda gaca cani ribigueta lu enda nadxaba sti tiru.

### 3

#### *Dxi ibigueta Cristu*

<sup>1</sup> Hermanu ni nadxiee ca', ma ne ndi rairopa gui'chi ucaa lú tu, ne lu iropa ni cusi-etenaladxe laatu ti iní' ique tu ni jneza.

<sup>2</sup> Laguietenala'dxi ni uní' ca profeta sti Dios chiqué, ne ni guidixhe Señor ni bilá laanu guni nu, casi bisiidi ca apóstol ni laatu.

<sup>3</sup> Nirudó' laguiene ni chi tidxe laatu rarí di': dxi mayaca gueeda Señor ziasa caadxi ni nabani casi na ique, ne zuni burla Dios.

<sup>4</sup> Zaná ca': "Cadi na be zeeda be la? xi guca xa yanna ca'ru gueeda be. Ma guti ca bixhoze gola du, peru ze ru guidxilayú clásica laa dxi nabani cabe ne dede dxi uyá' ni."

<sup>5</sup> Peru ndi nga ni qué na ca binni que guiene, dede chiqué maca nuu ibá', ne ra uní' Dios cha guidxilayú, uyá' ni. Ndaani nisa biree guidxilayú, ne lu nisa nuu ni de yanna.

<sup>6</sup> Ne laca nisa binitilú guidxilayú chiqué, dxi bilaahua ni que.

<sup>7</sup> Peru ibá' ne guidxilayú ni nuu yanna ri la? cadí nisa di unitilú cani, sínueque ma guidixhe Dios unitilú ni ne gui. Ne laca gui que unitilú

irá cani qué rulabi laabe, dxi cuidxi be cuenta laaca'.

<sup>8</sup> Peru laatu la? hermanu ni nadxiee ca', cadí guiaanda laatu: para Señor la? ti dxi nga casi ti mil iza, ne ti mil iza casi ti dxi.

<sup>9</sup> Cadi de que canda Señor para guni ni ma uní' casi na caadxi binni, sínueque cabeza be inaba irá binni perdón laabe, purti qué racala'dxi be initilú nin tobi.

<sup>10</sup> Peru qué zabi be iruti padxí gueeda be, sínueque zaca ni casi reeda gubaana huaxhinni, qué zaguixhená be irutí'. Zaxidxi laa ra initilú ibá' ne zacá gui irá luceru dede initilú, ne zaqueca zacá gui guidxilayú ne irá ni nuu ndaani ni.

<sup>11</sup> Yáquexa ma nanna tu ximodo chí initilú irá ni la? lauyubi udii tu idubi xpida tu Dios para guni tu ni na,

<sup>12</sup> laga cabeza tu dxi sti', ne laguni pur gaca ni nagueenda. Zacá gui xaibá' dxi que, ne zia ca luceru.

<sup>13</sup> Peru laanu cabeza nu, casi bidii stiidxa be, ti guidxilayú cubi ne ti ibá' cubi ra gasti enda nadxaba'.

<sup>14</sup> Nga runi, hermanu ni nadxiee ca', laga cabeza tu gueeda be la? laguni pur idxela be laatu cayuni tu jneza ne gasti donda nuu luguiá tu ne nuu né tu laabe tobi si.

<sup>15</sup> Ne laguietenala'dxi cabeza Señor stinu sin ixhacala'dxi purti racala'dxi ilá binni. Ne nga ca huacaa hermanu Pablu ni nadxii nu lu ca gui'chi ni huaseenda lú

tu, purti zacá bisiene Dios ni laa.

<sup>16</sup> Ne ruzeete be ni lu irá ca gui'chi ni huacaa be, lade cani nuu caadxi ni nagaña guiene nu. Binni ni qué riene, ni cadi zuhuua chaahui la? ricaa ni adxé modo, casi runi cabe xcaadxi Xqui'chi Dios. Peru zanitilú cabe pur ni cayuni cabe.

<sup>17</sup> Nga runi hermanu ni nadxiee ca', yáquexa ma nanna tu ni la? laguuya cadi chi nanda tu ni rusiidi binni ni qué ruzuuba stiidxa Dios ti cadi guiaaba tu de ra ma zuhuua dxiichi tu.

<sup>18</sup> Sínuque lauyubi gunibiá' chaahui tu Señor Jesucristu ni bilá laanu, ne laca lauyubi gaca tu nacha'hui casi laabe. Laabe jma risaca be lade irá xixé, ne qué ziuu dxi guiana dxí be de isaca be. Amen.

# PRIME GUI'CHI BICAA SAN JUAN

## *Stiidxa enda nabani*

<sup>1</sup> Chi güe nia laatu stiidxa Jesucristu ni rudii laanu enda nabani ni qué zaluxe. Maca nuu be dxi uyá' guidxilayú ne bidxiña dxi biuu be ndaani guidxilayú ne bina diaga du laabe ne bidu'ya du laabe. Bidu'ya dxichi du laabe ne gudana du laabe,

<sup>2</sup> ne ma cayué nia laatu ni bidu'ya du que. Racal-adxe guiene tu cadi uyá' be sínunque maca nuu be dxi uyá' guidxilayú. Uyuu be ra nuu Bixhoze be peru beeda be ra nuu du ne binibiá' du laabe.

<sup>3</sup> Cayué nia laatu ni bidu'ya du ne ni bina diaga du, ti chu' né tu laadu tobi si casi nuu né nu Dios tobi si ne Jesucristu Xiiñi'.

<sup>4</sup> Ne cucaa ni lu gui'chi ri para laatu ti guieche chaahui tu pur irá ni.

## *Dios zeda gaca biaani*

<sup>5</sup> Cayabi du laatu ni bisiidi Jesucristu laadu, ne ndi nga laani: Dios zeda gaca casi biaani', ne enda ruchee stinu zeda gaca casi guelacahui, ne gasti guelacahui ra nuu be.

<sup>6</sup> Nga runi pa gabí nu nuu né nu laabe tobi si Peru canauché' nu la? cusiguii nu ne cadi dxandí nuu né nu laabe tobi si.

<sup>7</sup> Peru pa dxandí sa né nu laabe ra naya'ni la? ma irá nu zaca nu tobi si ne zusiá

rini sti Jesucristu Xiiñi be laanu de irá ni huaché' nu.

<sup>8</sup> Pa gabí nu qué huaché' nu la? cusiguii nu laca laanu ne qué lica ganna nu xii nga ni dxandí'.

<sup>9</sup> Peru pa uxhuba donda nu lú be nanna dxichi nu zuni be ni ma uni' be, zuxhá be stonda nu ne zusiá be ladxidó' no de irá ni nadxaba', purti jneza ni runi be.

<sup>10</sup> Pa gabí nu qué huaché' nu la? caní nu rusiguii be, ne cadi dxandí ma ucuaa nu stiidxa be.

## 2

### *Nuu tu caní' pur laanu*

<sup>1</sup> Xiiñe huiine ca', cucaa irá ndi lú tu para cadi uchee tu. Peru pa chu' tu uchee la? napa nu tu caní' né Dios pur laanu, Jesucristu ni qué ñuu dxi nuchee.

<sup>2</sup> Laabe gudixe be saca bixá stonda nu, ne cadi sti si nu, sínunque ne sti irá xixé binni guidxilayú.

<sup>3</sup> Pa cayuni nu ni gudixhe Cristu guni nu la? zacá nanna dxichi nu runibiá' nu laa.

<sup>4</sup> Tutiica na runibiá' laabe, Peru qué runi ni na be la? cusiguii, ne qué lica ganna xii nga ni dxandí'.

<sup>5</sup> Peru ni runi ni na be la? nadxii laabe de idubi ladxidó'. Zacá rihuinni dxandí nuu né nu laabe tobi si, pa guni nu ni na be.

<sup>6</sup> Ni na nuu né Dios tobi si la? naquiiñe sa casi uzá Cristu.

### *Ni nexhe guni nu*

<sup>7</sup> Hermanu ca', cadi caguixhe xiixa nacubi guni

tu, sínunque cucaa ni maca nanna tu dede dxi bizulú tu bicaa diaga tu stiidxa Dios. Ne ndi nga laani: "Laganaxhii saa." Maca gu'ta ni dede chiqué ne maca bina diaga tu ni.

<sup>8</sup> Peru casi ñaca nacubi ni yanna, purti ma beeda Cristu ni dxandí biaani', ne ma cadi canazá nu lu guelacahui casi chiqué. Ma cayaca ni bina diaga tu guni tu que, purti bi'ni Cristu ni, ne laatu laca cayuni tu ni purti ma nadxii saa tu.

<sup>9</sup> Ni na ma nuu ra naya'ni peru nanala'dxi stobi la? nuu ru ra nacahui.

<sup>10</sup> Ni nadxii stobi la? canazá ra naya'ni ne qué ziuu ni usaba laa.

<sup>11</sup> Peru ni nanala'dxi stobi la? nuu ru lu guelacahui ne qué ganna pa ladu che', purti canazá ra nacahui ne ma bisicheepa ni lú.

<sup>12</sup> Cucaa ndi lú tu, xiiñe huiine ca', purti ma guca perdonar ni bichee tu pur ni bi'ni Cristu.

<sup>13</sup> Cucaa ndi lú tu, cani jma huaniisi, purti ma runibiá' tu Cristu ni maca nuu dxi uyá' guidxilayú. Cucaa ndi lú tu, cani zeda niisi ru' purti ma gudivhe dxí tu binidxaba'.

Ni ma bicaa lú tu, xiiñe huiine ca', bicaa ni purti ma runibiá' tu Dios.

<sup>14</sup> Ni ma bicaa lu cani ma huaniisi la? bicaa ni purti ma runibiá' tu Cristu ni maca nuu dxi uyá' guidxilayú. Ne ni bicaa lu cani zeda niisi ru la? bicaa ni purti ma zuhuua dxichi tu ne ma napa tu stiidxa Dios ndaani ladxidó' to

ne ma gudivhe dxí tu binidxaba'.

<sup>15</sup> Cadi ganaxhii tu guidxilayú nin ni nuu ndaani'. Ni nadxii guidxilayú la? cadi nadxii Dios.

<sup>16</sup> Ndaani guidxilayú ri' riula'dxi binni guni ni na ique ne gapa irá ni gu'ya', ne gaca tuuxa nezalú ca xcaadxi. Peru cadi de Dios zeeda irá nga, sínunque de binni guidxilayú.

<sup>17</sup> Canitilú guidxilayú ne irá ni nuu ndaani ni que, peru qué ziuu dxi initilú ni guni ni na Dios.

*Ni dxandí ne enda rusiguii*

<sup>18</sup> Xiiñe huiine ca', ma cadxiña dxi iluxe guidxilayú. Ma huayuna diaga tu ziasa tobi ucaa lú Cristu, ne de ca yanna ma nuu stale cayuni casi chi guni ngue. Nga runi nanna nu ma cadxiña dxi que.

<sup>19</sup> Uyuu cabe lade nu peru cadi de laanu laacabe. Purti pa ñaca de laanu laacabe la? ñaana né cabe laanu. Biree cabe ti ihuinni cadi irá ni nuu né laanu de laanu laa.

<sup>20</sup> Peru laatu, ma bidii Cristu Espíritu Santu laatu ne irá tu riene tu xii nga dxandi'.

<sup>21</sup> Cadi cucaa ndi lú tu purti qué ganna tu ni dxandi', sínunque purti nanna tu ni, nga runi cucaa ni lú tu. Ne ma nanna tu, ni zinanda ni dxandi' la? qué rusiguii.

<sup>22</sup> Tuu nga rusiguii pue. Ni na cadi dxandi' Jesús nga ni nexhe gueeda que. Ni iní zacá la? nga nga ni cucaa lú

Cristu ca, partí qué na guni cre laabe, nin Bixhoze be.

<sup>23</sup> Ni qué runi cre Xiiñi Dios la? laca qué runi cre Dios. Peru ni nuu né Xiiñi be tobi si la? laca ma nuu né laabe tobi si.

<sup>24</sup> Cadi ixele tu de ni ma bina diaga tu dede dxi bizulú bini cre tu. Pa gapa tu ni ndaani ladxidó' to la? qué zaxele tu de Dios nin de Xiiñi'.

<sup>25</sup> Ma bidii stiidxa Jesucristu udii laanu enda nabani ni qué zaluxe.

<sup>26</sup> Biccaa nga lú tu partí nuu tu racala'dxi quite laatu.

<sup>27</sup> Peru laatu, ma bidii Jesucristu laatu Espíritu Santu. Ma cadi caquiiñe tu tu usiidi laatu, partí irá ni naquiiñe ganna tu, zusiidi Espíritu que laatu. Qué zusiguii be laatu sínuque zabi be laatu ni dxandí'. Laguiaana né Cristu tobi si, casi cayabi be laatu guni tu.

<sup>28</sup> Nga nga laani, xiiñe huiine ca', cadi ixele tu de Cristu ti cadi idxibi tu ora gueeda be ne cadi ituí lú tu ora gu'ya tu laabe.

<sup>29</sup> Pa ma nanna tu jneza ni runi Jesucristu la? laca ñanna tu xiiñi Dios cani runi jneza.

### 3

#### *Ca xiiñi Dios*

<sup>1</sup> Laguuya si pabiá' nadxii Dios laanu dede rabi laanu xiiñi'. Ne dxandí xiiñi be laanu. Qué ganna binni pa xiiñi be laanu ne qué riene ca laanu partí qué runibiá' ca laabe.

<sup>2</sup> Hermanu ni nadxiee ca', ma xiiñi Dios laanu, peru

ca'ru ganna nu ximodo pe chi aca nu dxi gueeda Cristu. Ni nanna si nu la? zaca nu casi laa partí zadu'ya nu ximodo pe laa.

<sup>3</sup> Ne irá cani cá lú gueeda be para gaca ca zacá la? ruyubi cadi uchee casi qué ruchee Jesucristu.

<sup>4</sup> Ora cuchee binni la? cadi cayuni ni gudixhe Dios gaca', ne nga nga pecadu.

<sup>5</sup> Laatu ma nanna tu beeda uxhá Jesucristu stonda nu, ne laa gasti donda luguiá'.

<sup>6</sup> Nga runi cani nuu né laabe tobi si, qué ziaana lu ná enda ruchee, ne ni qué uyubi iree de lu ná ni la? qué runibiá' laabe ne qué ganna ximodo laabe.

<sup>7</sup> Cadi udii tu lugar chu' tu quite laatu, xiiñe huiine ca'. Ni nabani jneza la? nga nga ni ma bia ladxidó' casi nayá ladxidó' be.

<sup>8</sup> Peru ni nisi canauchee la? xpinni binidxaba laa, partí dede bizulú binidxaba nisi cuchee. Nga runi beeda Xiiñi Dios, beda uchiá xhiiña binidxaba'.

<sup>9</sup> Ca xiiñi Dios la? zuyubi cadi uchee partí ma za ca de Dios. Ma qué ziula'dxi ca uchee ca', partí ma xiiñi Dios laaca'.

<sup>10</sup> Sicarí nga rihuinni uná xiiñi Dios ne uná xiiñi binidxaba': tutica qué guni jneza ne cadi nadxii stobi la? cadi xiiñi Dios laa.

#### *Ganaxhii saa nu*

<sup>11</sup> Nga nga ni bina diaga tu dede dxi bizulú bini cre tu: naquiiñe ganaxhii saa nu.

<sup>12</sup> Cadi gaca nu casi Caín, purti laa xpinni binidxaba laa. Biiti bi'chi purti si bi'chi bi'ní jneza ne laa co'.

<sup>13</sup> Hermanu stinne ca', cadi idxagayaa tu pa gaca nanala'dxi binni laatu.

<sup>14</sup> Laanu ma biré' nu lu ná enda guti, ma napa nu enda nabani ni qué zaluxe. Rihuinni ni purti nadxii nu binni. Ni cadi nadxii binni la? nuu ru lu ná enda guti.

<sup>15</sup> Ni nanala'dxi stobi la? zeda aca casi cani ruuti binni. Ne nanna tu qué gapa cani ruuti binni enda nabani ni qué zaluxe.

<sup>16</sup> Bilu'í Jesucristu laanu xi pe nga enda ranaxhii ra guti pur laanu. Ne laanu laca naquiiñe quixhe nu xpida nu pur stobi.

<sup>17</sup> Pa nuu tuuxa napa ni caquiiñe ne gu'ya qué gapa stobi gastí', ne qué guiá laabe la? ximodo na nadxii Dios.

<sup>18</sup> Xiiñe huiine ca', cadi gabi si nu nadxii nu binni sínunque ganaxhii nu laaca de idubi ladxidó' no ne usihuinni nu ni ra acané nu laaca'.

### *Ximodo rihuinni uná nga xpinni Dios*

<sup>19</sup> Zacá zanda ganna nu dxandí xpinni Dios laanu ne zanda chu' dxí ladxidó' no nezalú.

<sup>20</sup> Ne pa nuu nu xizaa purti cayabi ladxidó' no laanu cadi jneza cayuni nu la? guietenala'dxi nu, jma nandxó' Dios que laani ne laa nanna irá ni nuu ndaani ni.

<sup>21</sup> Peru hermanu ca', pa cayabi ladxidó' no laanu

cayuni nu ni na Dios la? zanda idxiña nu laa sin idxibi nu,

<sup>22</sup> ne intiica inaba nu laabe zudii be laanu purti cuzu'ba nu stiidxa be ne cuyubi nu guni nu ni riula'dxi be.

<sup>23</sup> Ne ndi nga ni gudxi be laanu guni nu: guni cre nu Jesucristu Xiiñi be, ne ganaxhii saa nu casi gudxi laanu guni nu.

<sup>24</sup> Cani guni ni na be ca, nuu né laabe tobi si ne laabe nuu né be laa. Nanna nu nuu né be laanu purti bidii be Espíritu stibe laanu.

## 4

### *Ximodo ganna nu uná ni napa Espíritu sti Dios*

<sup>1</sup> Hermanu ni nadxiee ca', cadi tutiica na cusiní Dios laa maca ziguni cre tu, sínunque laguuya chaahui pa dxandí napa be Espíritu sti Dios. Purti ma canazá stale ni cananí zacá.

<sup>2</sup> Sicarí zanna tu pa Espíritu sti Dios napa cabe o pa co': ni runi cre beda gaca Jesucristu binni guidxilayú, laa napa Espíritu sti Dios.

<sup>3</sup> Ne pa qué runi cre cabe zacá la? qué gapa cabe Espíritu sti Dios sínunque napa cabe espíritu sti ni gueda ucaa lú Cristu que. Ma ru huayuna diaga tu zeeda be ne mápeca nuu be ndaani guidxilayú.

<sup>4</sup> Xiiñe huiine ca', laatu xiiñi Dios laatu, ne ma gudixhe dxí tu cani rusigui que, purti jma nandxó' ni nuu né laatu que ni nuu né cani zinanda guidxilayú.

<sup>5</sup> Laacabe guidxilayú zinanda cabe. Nga runi de guidxilayú ribee cabe ni rui' cabe, ne rucaa diaga cani zinanda guidxilayú laacabe.

<sup>6</sup> Peru laanu zinanda nu Dios ne rucaa diaga cani runibiá' Dios laanu; peru cani qué runibiá' Dios qué rucaa diaga laanu. Zacá rihuinni uná nga riní' ni rabi Dios laa, ne uná riní' ni rabi dxa ni rusiguii que laa.

*De Dios reeda enda ranaxhii*

<sup>7</sup> Hermanu ni nadxiee ca', naquiiñe ganaxhii saa nu purti nadxii Dios irá nu. Nga runi ni ganaxhii binni zacá la? xiiñi Dios laa ne runibiá' Dios.

<sup>8</sup> Peru ni cadi nadxii stobi la? qué huayuu dxi gunibiá' Dios, purti de Dios nga reeda enda ranaxhii.

<sup>9</sup> Biluí' laanu pabiá' nadxii laanu ra biseenda tobi lucha Xiiñi ndaani guidxilayú, beda udii laanu enda nabani ni qué zaluxe.

<sup>10</sup> Ne sicarí rihuinni xi pe nga enda ranaxhii: cadi laanu gunaxhii nu laabe, sínunque laabe gunaxhii be laanu ne biseenda be Xiiñi be beda tixe irá ni huaché' né nu laabe.

<sup>11</sup> Hermanu ni nadxiee ca', pa nadxii Dios laanu bia' cá la? laca naquiiñe ganaxhii saa nu.

<sup>12</sup> Iruti qué huayuu dxi gu'ya Dios, peru pa nadxii saa nu la? nuu né be laanu tobi si ne rihuinni dxandí nadxii nu laabe.

<sup>13</sup> Nanna nu dxandí nuu né nu laabe tobi si, ne laabe nuu

né be laanu tobi si, purti bidii be laanu Espíritu stibe.

<sup>14</sup> Bidu'ya du beeda Xiiñi be ne ma cayuí né du binni biseenda be laa beda ulá binni guidxilayú.

<sup>15</sup> Tutjica runi cre dxandí Xiiñi Dios Jesús ne riní' ni nezalú binni la? nuu né Dios tobi si, ne Dios nuu né laa tobi si.

<sup>16</sup> Nanna nu ne runi cre nu nadxii Dios laanu. De Dios nga reeda enda ranaxhii. Nga runi ora nadxii saa nu rihuinni nuu né nu Dios tobi si, ne Dios nuu né laanu tobi si.

<sup>17</sup> Ne ora ma dxandí nadxii nu Dios la? ma qué zadxbi nu cuidxi be cuenta laanu, purti nanna nu nuu né nu laabe tobi si, casi nuu né Jesucristu laabe tobi si, neca nuu nu ndaani guidxilayú.

<sup>18</sup> Peru pa ridxibi nu idxiña dxi que la? cadxibi ru nu gusaba ná be laanu ne rihuinni ca'ru ganaxhii chaahui nu laabe, purti qué zanda idxibi nu tobi ni nadxii nu, ne ni nanna nu nadxii laanu.

<sup>19</sup> Nadxii nu laabe purti nirudó' laabe gunaxhii be laanu.

<sup>20</sup> Pa nuu tu na nadxii Dios peru nanala'dxi stobi la? rusiguii. Purti pa qué zanda ganaxhii be stobi, nin ne ruuya be laa la? ximodo zanda ganaxhii be Dios qué ruuya be laa ya'.

<sup>21</sup> Ndi nga ni gudixhe Cristu guni nu: ni ganaxhii Dios la? laca naquiiñe ganaxhii binni.

## 5

*Zanda quixhe dxí nu enda nadxaba'*

<sup>1</sup> Pa ma runi cre nu Jesús nga Cristu ni biseenda Dios la? ma xiiñi Dios laanu. Ne pa nadxii nu Dios Bixhoze nu la? laca zanaxhii nu ca xiiñi'.

<sup>2</sup> Pa nadxii nu Dios ne runi nu ni na la? rihuinni laca nadxii nu ca xiiñi'.

<sup>3</sup> Sicarí nga ganaxhii nu Dios: guni nu ni na. Ne cadi nagana ni na be guni nu,

<sup>4</sup> purti pa ma xiiñi be laanu la? zanda quixhe dxí nu irá enda nadxaba ni nuu ndaani guidxilayú. Zanda guni nu ni purti ma runi cre nu Cristu.

<sup>5</sup> Iruti qué zanda quixhe dxí enda nadxaba sti guidxilayú ri' pa qué runi cre Jesús nga Xiiñi Dios.

*Ximodo rihuinni tuu nga Cristu*

<sup>6</sup> Ra uyuu nisa Jesucristu ne ra guti bihuinni tu laa. Cadi ra uyuu nisa si bihuinni Dios biseenda laa, sínunque ne ra bixhii be rini ra guti be. Nga ni rabi Espíritu Santu laanu, ne dxandí ni rini'.

<sup>7</sup> Chonna nuu ibá' na dxandí ni: Dios Padre ne Xiiñi ne Espíritu Santu. Chonna cabe Peru tobi si laacabe.

<sup>8</sup> Ne nuu chonna modo ndaani guidxilayú rihuinni dxandí ni: tobi ra uyuu nisa be, stobi ra guti be, ne laca rabi Espíritu Santu laanu dxandí ni. Ne ni na Espíritu Santu la? ngue ca rini' xhupa ca.

<sup>9</sup> Ricaa nu ni rabi binni laanu, ne jma rusi naquiiñe

icaa nu ni rabi Dios laanu. Rabi be laanu Xiiñi be Jesús.

<sup>10</sup> Ni runi cre Xiiñi Dios la? rabi ladxidó' laa dxandí ni na Dios. Peru ni qué runi cre Dios la? na rusiguii Dios purti ma gudxi Dios laanu Xiiñi Jesús peru qué ñuni cre.

<sup>11</sup> Ndi nga ni gudxi be laanu: zudii be laanu enda nabani ni qué zaluxe, ne nuu ni lu ná Xiiñi be.

<sup>12</sup> Ni ma nuu né Xiiñi be tobi si la? ma napa enda nabani ca, Peru ni cadi nuu né Xiiñi be tobi si la? qué gapa enda nabani ni qué zaluxe.

*Gasti xi pur chu' nu xizaa*

<sup>13</sup> Cucaa ndi lú tu, cani ma runi cre Xiiñi Dios, ti ganna tu ma napa tu enda nabani ni qué zaluxe.

<sup>14</sup> Nanna dxichi nu pa inaba nu ni riula'dxi Dios gaca la? zucaa diaga laanu.

<sup>15</sup> Cásica nanna nu zucaa diaga be laanu la? zaqueca nanna nu zudii be ni.

<sup>16</sup> Pa gu'ya tu cuchee ti hermanu, Peru cadi enda ruchee para unitilú la? lainí né Dios pur laabe ne zudii laabe enda nabani, pa dxandí cadi enda ruchee ni runitilú ni. Nuu enda ruchee ni runitilú, ne cadi cayabe laatu iní né tu Dios pur cani ruchee zacá.

<sup>17</sup> Irá enda ruchee nga pecadu nezalú Dios, Peru nuu enda ruchee ni qué runitilú pe'.

<sup>18</sup> Nanna nu qué riaana cani ma xiiñi Dios lu ná enda ruchee, purti rapa Jesucristu Xiiñi Dios laaca', ne qué zaga'na binidxaba laaca'.

<sup>19</sup> Nanna nu xpinni Dios  
laanu, ne laca nanna nu  
naaze dxiichi binidxaba  
idubi guidxilayú.

<sup>20</sup> Laca nanna nu ma beeda  
Xiiñi Dios, ne bisiene laanu ti  
gunibiá' nu tobi lucha Dios.  
Nuu né nu Jesucristu Xiiñi be  
tobi si. Laa nga tobi lucha  
Dios, ni maca nuu dxi uyá'  
guidxilayú ne laa rudii enda  
nabani ni qué zaluxe.

<sup>21</sup> Xiiñe huiine ca', cadi  
ucuí tu stobi jlugar Dios, nin  
binni nin xiixa ru'. Amén.

## RAIROPA GUI'CHI BICAA SAN JUAN

*Ni dxandí ne enda ranax-hii*

<sup>1</sup> Naa naca ti hermanu gola. Cucaa gui'chi ri lú tu, xpinni Cristu ca', irá xixé tu casi nuu tu racá. Dios ulí laatu. Dxandí nadxiee laatu ne cadi naa sia'sínuque ne irá cani runibiá' ni dxandi'.

<sup>2</sup> Nadxii du laatu purti zinanda tu ni dxandí' casi zinanda du. Napa nu ni ndaani ladxidó' no ne qué ziuu dxi iree chu nu de laani.

<sup>3</sup> Dios Bixhoze nu ne Señor Jesucristu cu' ndaaya laatu ne ilasela'dxi laatu ne quixhe dxi ladxidó' to. Nanna zuni cabe zacá purti nadxii cabe laatu.

<sup>4</sup> Nabé bieche ora biiya zinanda caadxí de laatu ni dxandí casi gudixhe Dios Bixhoze nu guni nu.

<sup>5</sup> Yanna hermanu ca', rinaba laatu ganaxhii saa nu. Cadi nacubi ni cayabe laatu guni tu ri' sínuque maca nanna nu ni dede dxi bizulú bini cre nu.

<sup>6</sup> Pa nadxii saa nu la? cayuni nu ni na Dios guni nu, purti ni na be guni nu nga ganaxhii saa nu, casi bina diaga tu de chiqué.

### *Cani canausiguii*

<sup>7</sup> Nuu stale canazá canausiguii, ma na ca cadi dxandí beda aca Cristu binni guidxilayú. Cani caní' zacá

la? cusiguii, ne cucaa lú Cristu.

<sup>8</sup> Laguuya gá qué chi guiaana xhiña tu sin iree ndu. Lauyubi icaa tu irá ni napa Dios para laatu.

<sup>9</sup> Ni iree chu de ni bisiidi Cristu la? qué runibiá' Dios. Peru ni chi nanda ni bisiidi Cristu la? laa huaxa dxandí runibiá' Dios, Bixhoze nu ne Xiiñi'.

<sup>10</sup> Pa che tuuxa chi ganna laatu ne gacala'dxi usiidi adxé para ca diidxa ri la? cadi uchagalú tu laa ralidxi tu nin gabi tu laa Dios cu' ndaaya laa.

<sup>11</sup> Purti ni gabi laabe zacá la? cayacané laabe lu xhiña be.

### *Diuxi*

<sup>12</sup> Napa rua' stale ni ñabe laatu peru qué na'ya ucaa ni lu gui'chi', purti cá ique chaa ra nuu tu para güe nia pia' ni laatu, ti izaa chaahui enda nayeche stinu.

<sup>13</sup> Cuseenda ca xpinni Cristu ni nuu rarí stiuxi tu. Laca ulí Dios laaca casi ulí laatu.

# RAGUIONNA GUI'CHI BICAA SAN JUAN

*Pabiá' jneza runi Gayu*

<sup>1</sup> Naa naca ti hermanu gola. Cucaa gui'chi ri lú lu', Gayu xhamigua ni dxandí nadxiee'.

<sup>2</sup> Hermanu ni nadxiee', rinaba lu Dios cu' ndaaya lii de irá modo, ne guni lii naguidxi nazaaca, cásica cayacané lii sa lu gaxha de laa.

<sup>3</sup> Nabé bieche beeda caadxi hermanu gudxi naa pabiá' jneza canazá lu purti zinanda lu ni dxandí'.

<sup>4</sup> Gasti ru ni rusieche naa jma que ganna zinanda ca xiñe ni dxandí'.

<sup>5</sup> Hermanu ni nadxiee', jneza runi lu ora racanéu ca hermanu, ne jma rusi cani zeeda de sti guidxi.

<sup>6</sup> Huayuí' né cabe ca hermanu de rarí pabiá' nadxii lu laacabe. Yanna, ucané la' laacabe de ni caquiiñe cabe para che cabe ra nexhe che cabe, casi na Dios aca ni.

<sup>7</sup> Biree cabe ziguni cabe xhiiña Jesucristu, ne qué huaná cabe acané cani qué runibiá' Dios laacabe.

<sup>8</sup> Nga runi naquiiñe gua nu laacabe ti acané nu laacabe güi cabe stiidxa Dios.

*Ra cuchee Diótrefe*

<sup>9</sup> Bicaa gui'chi lu ca xpinni Cristu ni nuu racá, peru qué na Diótrefe ulabi ni rabi du,

purti racala'dxi aca xaíque stícabe.

<sup>10</sup> Nga runi ora chaa racá la? zulidxe laabe xiñee cusiguii be binni, canazá be cananí' be laadu, ne cadi nga si sínuque qué ruchagalú be ca hermanu. Ne ora racala'dxi ca xcaadxi guni ni la? ribee be laaca de guni ca ni ne qué riná be chu' ca ra cultu.

<sup>11</sup> Hermanu ni nadxiee', cadi chi nandu ni cadi cayuni jneza sínuque ni cayuni jneza. Purti ni cayuni jneza la? xpinni Dios laa, peru ni canauchee la? qué huayuu dxi gu'ya Dios.

*Za'bi stiidxa Demetriu*

<sup>12</sup> Irá binni ruzeete pabiá' jneza runi Demetriu ne ri-huinni dxandí ni. Laadu laca rui né du ni binni, ne nanna tu qué rusiguii du.

*Diuxi*

<sup>13</sup> Napa stale ni gabe lii peru qué na'ya ucaa ni,

<sup>14</sup> purti rabe mayaca guuya lii. Oraque zanda güi nu diiidxa'.

<sup>15</sup> Gata dxí ladxitdó' lo'. Cuseenda ca xhamigu lu stiuxi lu'. Bigapa diuxi la' cada tobi de ca xhamigu nu.

## GUI'CHI BICAA SAN JUDAS

*Cucaa Judas gui'chi lu cani ulí Dios*

<sup>1</sup> Naa nga Judas bi'chi Jacobo, ne rune xhiiña Jesucristu. Cucaa gui'chi ri lú tu, hermanu ca'. Nadxii Dios laatu ne ulí laatu para laa, ne ma cayapa Jesucristu laatu.

<sup>2</sup> Dios ilasel'a'dxi laatu ne quixhe dxí ladxidó' to ne ganaxhii laatu.

*Cani rusiidi ni cadi dxandí'  
(2 Pedro 2.1-17)*

<sup>3</sup> Hermanu ni nadxiee ca', ma xadxí rabe nucaa ti gui'chi lú tu para nusiide laatu de modo bilá nu, peru yanna ruuya jma naquiiñe inaba laatu cadi idxibi tu ucaa lú tu cani na cadi jneza modo runi cre tu Cristu. Laatu nanna tu zacá bidii Dios ni laatu ne qué ziuu dxi uchaa ni.

<sup>4</sup> Purti sin ganna nu ma biuu caadxi ni qué runi cre Dios lade nu. Ricaa cabe enda nacha'hui sti Dios para guni cabe ni na ique cabe. Ne zacá qué rusihuinni cabe pa Dios nga tobi lucha xaíque sti irá binni, laa ne Jesucristu Señor stinu. Dede chique maca cá lu Xqui'chi Dios xi enda naná gueda iluxe né cabe.

<sup>5</sup> Maca nanna tu ni, peru racaladxe usietenaladxe laatu ni guca ca binni xquidxi nu. Necá ulee Dios laacabe de ndaani guidxi Egipto, peru bidxiña dxi

binitilú caadxi de laacabe, cani qué ñuni cre laa.

<sup>6</sup> Ne ca ángel ni qué niná ñaana ra bisaana Dios laaca la? bisaana ca ni, ne yanna ma nuseguyoo Dios laaca xa'na guelacahui ni qué zalux, para cueza ca dxi cuidxi Dios cuenta laaca'.

<sup>7</sup> Ne cásica bizaaca ca ángel que, zaqueca guca ca binni Sodoma ne Gomorra ne ca guidxi ni nuu gaxha de laaca'. Bisaba Dios gui ne binitilú laacabe purti uyuu né cabe ni cadi xheela cabe ne uyuu né cabe muxe'. Yanna guietenala'dxi nu ni ti cadi guni nu casi bi'ni cabe que, purti irá tu guni zacá zalá lu gui ni qué ziuu dxi gyuí'.

<sup>8</sup> Zaqueca canazá ca hombre ni cayabe laatu ri'. Para laacabe la? ni ixuí' lú cabe nga ni dxandí', ne runi dxaba saa cabe xcuerpu cabe. Qué ruzuuba cabe stiidxa Dios ne riguu dí cabe cani risaca nezalú Dios.

<sup>9</sup> Dxi udinde né ángel Miguel binidxaba' runi xcuerpu gue'tu Moisés, qué niguu dí be laa sínunque gudxi be laa: "Ladxi ná Dios rusaana lii", necá naca nda be ángel ni jma nandxo'.

<sup>10</sup> Peru ca hombre ni cayabe laatu ri la? riguu dí cabe ni qué riene cabe. Runi cabe ni na ique cabe casi runi mani', ne nga ni runitilú laacabe.

<sup>11</sup> Gapa gá si cabe laacabe, purti cayuni cabe casi bi'ni Caín, ne pur bidxichi ma biree chu cabe casi biree chu Balaam. Ne casi bicaa lú

Coré Dios chiqué la? zaqueca cayuni cabe, ne zaqueca zanitilú cabe.

<sup>12</sup> Ro to gueta juntu partí nadxii saa tu. Ne laacabe reda chuu cabe lade tu ne runi yuudxu cabe partí qué rituí lú cabe ne qué rulabi cabe iruti', sínunque cá ique cabe de laasi cabe. Zeda gaca cabe casi za sin gupa, riné bi laaca cherí cherica'. Laca zeda gaca cabe casi yaga ni qué ricá cuananaxhi lú neca ma gunda xhi, ne casi yaga ni ma bibidxi dede xcu ne ma guxha cabe laa.

<sup>13</sup> Ne zeda gaca cabe casi ola sti nisadó' ora riasa ni naro'ba ne ruchiacha ni bupu. Zaqueca rucheeche cabe enda nadxaba stícabe. Laca naca cabe casi luceru ni canazá renda. Ma nexhe chaahui ti lugar ra nacahui do' para laacabe. Raqué nga chu' cabe ne raqué nga guiaana ca cabe.

<sup>14</sup> Laca de laacabe uní Enoc dxi bisini' Dios laa, ne Enoc nga tobi de ca xiiñi xiiñi Adán. Na be: "Casi ñaca biiya zedané Señor jma de chii mil xpinni,

<sup>15</sup> zeeda para cuidxi cuenta binni ne para udxiba donda ique irá cani qué ñuni jneza, pur irá enda nadxaba stica', ne pur modo uluu dí ca laabe."

<sup>16</sup> Peru laga ca'ru gueeda be la? nisi canadxiichi stubi ca', ne cananí' ca binni, riñanda ca irá enda nadxaba ni na ique ca'. Rudxiiba ca laca laaca' ne nuu tiru rugá ca binni para si udii laaca ni racala'dxi ca'.

*Culidxe Judas cani runi cre*

<sup>17</sup> Peru laatu, hermanu ni nadxiee ca', laguietenala'dxi xi na ca apóstol sti Jesucristu Señor stinu chiqué.

<sup>18</sup> Gudxi cabe laatu: "Dxi mayaca iluxe guidxilayú, stale binni zuxidxi stiidxa Cristu, ne zazá ca modo na xquenda biaani huati ca'."

<sup>19</sup> Ne ma cayuya tu cayaca ni. Ma nuu cani cuyubi indaa saa ca xpinni Cristu. Nisi cá ique ca ni nuu ndaani guidxilayú, ne qué gapa ca Espíritu sti Dios.

<sup>20</sup> Peru laatu, hermanu ni nadxiee ca', lauyubi uzuhuaa chaahui tu lu ni runi cre tu, ne lainaba acané Espíritu Santu laatu ora iní' né tu Dios.

<sup>21</sup> Cadi ixele tu de Dios ni nadxii laatu laga cabeza tu dxi udii Señor Jesucristu laanu enda nabani ni qué zaluxe. Ne zuni be ni partí rilaseladxii be laanu.

<sup>22</sup> Lagacané cani ca'ru uzuhuaa chaahui lu ni runi cre.

<sup>23</sup> Laguni pur ulá tu laacabe casi ñaca cabee tu laacabe lu gui, ne laguiá irá binni ni qué runibiá' Dios. Lagacané laaca', peru laguya gá qué chi cá enda nadxaba stica laatu. Laixele de enda ruchee stícabe casi rixele tu de xixa ni ribixhila'dxi tu.

*Uisisaca nu Dios*

<sup>24-25</sup> Tobi lucha si Dios nuu ni ulá laanu. Ne laabe jma riene be ne randa rapa be laatu para cadi guiaba tu. Zuchiña be laatu ra nuu be, ma nayá ladxidó' to ne

nayeche tu. Cadi guiaana dxí  
nu de usisaca nu laabe ne  
udxi'ba nu laabe, purti qué  
ziuu dxi guiaana dxí de isaca  
be ne de aca be nandxó'.  
Amen.

# NI BILUI' JESUCRISTU APOSTOL SAN JUAN

<sup>1</sup> Ndi nga ni bilui' Dios Jesucristu para ulu'i ca xpinni xi ma zeda dxiña dxi aca'. Biseenda be ti ángel stibe beda ulu'i ni Juan, tobi de ca xpinni be.

<sup>2</sup> Ne laa bicaa irá ni bi'ya', ni gudxi Dios Jesucristu ulu'i laa.

<sup>3</sup> Dichoso cani gu'nda gui'chi ri ne cani ucaa diaga ni cá lú ni, ne icaa ni na ni, purti ma zeda dxiña dxi gaca ni ma uní' Dios chi aca.

*Ni bicaa Juan lu ca xpinni Cristu ni nuu Asia*

<sup>4</sup> Naa nga Juan. Cucaa gui'chi ri lu ca xpinni Cristu ni nuu ndaani gadxe guidxi sti Asia. Qué huayuu dxi guiaadxa Dios, ne nuu be yanna ne nexhe gueeda be. Rinaba laabe cu' be ndaaya laatu ne quixhe dxí be ladxitidó' to, laabe ne gadxe espíritu ni ruzuhuaa lú be ra zuba be lu trono,

<sup>5</sup> ne Jesucristu ni rului' laanu ni dxandí ne jneza runi ni. Nirudó' laa bibani de lade gue'tu', ne runi mandar irá xaíque ni nuu ndaani guidxilayú. Nadxii be laanu ne bisiá né be rini stibe ladxitidó' no.

<sup>6</sup> Bidxiiba be laanu casi cani runi mandar ne bi'ní be laanu sacerdote para guni nu xhiiña Dios Bixhoze be. Iruti ru nandxo' casi laabe. Cadi

guiaana dxí de usisaca binni laabe. Amén.

<sup>7</sup> Zuuya tu zeeda be lade za. Ne irá binni zuuya laabe, dede ni bindizi lanza laabe, ne zuuna cabe ora gu'ya cabe laabe. Dxandí zacá zaca ni.

<sup>8</sup> Na Señor Dios ni jma nandxo':

—Naa bizuluá' irá', ne naa unduuxe ni, casi zeeda A ne Z lu alfabetu. Nuaa yanna, qué huayuu dxi guiaadxa', ne qué ziuu dxi guiaadxa'.

*Ra bi'ya Juan enda nandxo': sti Cristu*

<sup>9</sup> Hermanu stitu naa ne nuaa nia laatu tobi si ra cayaná tu ne lu enda runi mandar sti Dios. Ne laca huayacané Jesucristu naa cadi ixhacaladxe', casi cayacané laatu. Biseguyoo cabe naa lu isla Patmos purti canayué stiidxa Dios ne irá ni nanna de Jesucristu.

<sup>10</sup> Raqué nuaa ti domingu, dxá ladxitiduá' de Espíritu Santu ne bina dia'ga ucuá ti ridxi neza deche casi ti trompeta,

<sup>11</sup> na rabi naa:

—Naa bizuluá' irá', ne naa unduuxe ni, casi ca letra A ne Z. Bicaa ni gu'ya lu ri lu gui'chi ne biseenda ni lu ca xpinni Cristu ni nuu ndaani gadxe guidxi sti Asia. Cuzeete Efeso, Esmirna, Pérgamo, Tiatira, Sardis, Filadelfia, ne Laodicea.

<sup>12</sup> Para bidxieta lua' guuya tu caní' né naa, ne biiya gadxe candeleru de oro.

<sup>13</sup> Ne galahui de laacani biiya zuhuuaa tuuxa rului' ti hombre, nabaqui ti gamixa'

de yanni ñee ne xi' ti cinturón de oro xpechu.

<sup>14</sup> Naquichi bé guicha ique casi be ne ruzaani guielú be casi bele.

<sup>15</sup> Ne ruzaani ñee be casi bronce ni uluu cabe lu gui para bisiá cabe. Ne zeda aca stidxi be casi rixidxi ra cadi'di stale nisa.

<sup>16</sup> Naaze be gadxe luceru lu ná be ladu derechu, ne nugasa ruaa be ti espada naduxhu iropa ladu, ne ruzaani lú be casi ruzaani gubidxa.

<sup>17</sup> Ora biiya laabe biaba xa ñee be casi tobi ni ma guti. Peru gudixhe ná be luguia'ya ne rabi be naa:

—Cadi idxibi lu'. Naa bizuluá' irá', ne naa unduuxe ni.

<sup>18</sup> Naa nabane'. Gute peru bibane ne ma qué ziuu ru dxi gate'. Naaze ca llave sti enda guti ne sti ra riaana ca gue'tu'.

<sup>19</sup> Yanna bicaa ni bi'ya lu ri', ni nuu yanna ne ni queeda ru'.

<sup>20</sup> Ndi nga rini' ni bi'ya lu ca: gadxe luceru bi'ya lu naaze que la? nga cani cayapa ca xpinne ni nuu gadxe guidxi que, tobi cada guidxi. Ne gadxe candeleru ca, nga cani runi cre ni nuu ndaani ca guidxi que.

## 2

*Ni gudxi Cristu Juan gabi cani nuu Efeso*

<sup>1</sup> Bicaa ni chi tidxe lii rarí di la? lu ni cayapa ca xpinne ni nuu Efeso: "Sicarí na dxá ni naaze gadxe luceru lu ná ne

canazá lade gadxe candeleru de oro que:

<sup>2</sup> Nanna xi irá runi tu, pabiá' huayuni tu dxiiña ne pabiá' cadi caxhacala'dxi tu ne qué ridxaaga tu cani nadxaba'. Ne cadi casi ze tu ninanda tu ni na apóstol laa, sínunque biyubi tu pa dxandí ni laaca' ne biiya tu cadi dxandí ni laaca'.

<sup>3</sup> Qué huaxhacala'dxi tu. Huayacaná tu ne nabé huayuni tu xhiiña' purti nadxii tu naa ne qué huabí sa tu atrá.

<sup>4</sup> Xi si la? ma cadi nadxii tu naa casi chiqué.

<sup>5</sup> Laguietenala'dxi pabiá' ma bixelete tu de naa ne lainaba perdón Dios ne laguni xhiiña' casi bi'ni tu chiqué. Pacaa la? nagueenda ziaa ra nuu tu ne zaxha candeleru stitu laatu.

<sup>6</sup> Peru nuu ru ni runi tu jneza. Nanala'dxi tu ni runi cani rabi cabe "nicolaíta". Naa laca nanaladxe ni.

<sup>7</sup> Ni racala'dxi guiene la? ucaa diaga ni cayabi Espíritu Santu ca xpinne': Irá ni quixhe dxí ni uquiinde laa la? zudiee laa go cuananaxhi sti yaga ni rudii enda nabani ni nuu ndaani jardín sti Dios."

*Ni gabi be cani nuu Esmirna*

<sup>8</sup> Ni chi tidxe lii rarí di la? bicaa lu ni cayapa ca xpinne ni nuu Esmirna: "Sicarí na ni bizulú irá', ne ni unduuxe ni, ni guti ne bibani:

<sup>9</sup> Nanna xi irá runi tu ne irá ra nagana ni huadí'di tu. Pobre laatu peru napa tu ni dxandí risaca. Nanna pabiá'

riguu dí cabe laatu, cani na judíu laa peru cadi dxandí ni. Xpinni binidxaba laacabe.

<sup>10</sup> Cadi idxibi tu irá enda naná chi gueeda luguiá tu. Zuseguyoo binidxaba caadxi de laatu para gu'ya pa zanda uxhele irá tu de ni runi cre tu. Zandaa ni bia' chii gu-bidxa. Peru qué chi ixele tu dede dxi gati tu, ne zudiee laatu enda nabani casi ti premiu.

<sup>11</sup> Ni racala'dxi guiene la? ucaa diaga ni cayabi Espíritu Santu ca xpinne': Ni qué ixele la? qué ziuu lu rairopa enda guti."

*Ni gabi be cani nuu Tiatira  
Pérgamo*

<sup>12</sup> Ne ni chi tidxe lii rarí di la? bicaa lu ni cayapa ca xpinne ni nuu Pérgamo: "Sicarí na ni napa espada naduxhu iropa ladu que:

<sup>13</sup> Nanna xi irá runi tu. Nanna nabeza tu ra runi mandar binidxaba'. Peru qué huaree chu tu ne qué huasaana tu de guni cre tu naa, nin dxi biiya tu bitti cabe Antipas, ra nabeza binidxaba que. Laa qué ñaana dxí de ñui' stiidxa'.

<sup>14</sup> Ra cuchee si tu la? nuu caadxi lade tu ni zinanda ni bisiidi Balaam, dxa ni gudxi Balac guni para uchee ca binni Israel que. Yo, na ca binni Israel, gudó ca ni gu'ta lu bidó' ne uyuu né ca ni cadi xheela ca'.

<sup>15</sup> Ne laca nuu caadxi lade tu qué ná usaana ni rusiidi ca nicolaíta, ne nanaladxe ni.

<sup>16</sup> Nga runi cayabe laatu inaba tu perdón Dios ne us-aana tu xpia' tu. Pacaa nagueenda ziaa ra nuu tu ne zadinde nia laaca ne espada nasa ruua ri'.

<sup>17</sup> Ni racala'dxi guiene la? ucaa diaga ni cayabi Espíritu Santu ca xpinne': Ni quixhe dxí irá ni uquiinde laa la? zuyaana laa endaró ni napa ibá' ne zudiee laa ti guie quichi cá ti lá cubi lú ni iruti ganna, sínunque ni icaa si ni que."

*Ni gabi be cani nuu Tiatira*

<sup>18</sup> Ne ni chi tidxe lii rarí di la? bicaa lu ni cayapa xpinne ni nuu Tiatira: "Sicarí na Xiñi Dios ni ruzaani guielú casi bele ne ñee casi bronce ni bisiá cabe que:

<sup>19</sup> Nanna xi irá runi tu, pabiá' nadxii tu naa, pabiá' runi cre tu, pabiá' runi tu xhiiña', ne pabiá' qué rix-hacala'dxi tu. Jma runi tu xhiiña yanna que chiqué.

<sup>20</sup> Xi si la? rudii tu lugar guiaana Jezabel lade tu. Na be Dios cayabi laabe xi iní' be peru cusigui si be, caguite be ca xpinne para chu' né ni cadi xheela' ne go ni ma gu'ta lu bidó'.

<sup>21</sup> Huadiee dxi laabe para ninaba be perdón Dios, peru qué na be usaana be modo nabani be.

<sup>22</sup> Yanna chi usaba naya laabe, zaca huará be. Ne zusaba naya cani rucaa diaga laabe pa qué guiaana dxí ca'.

<sup>23</sup> Ne zuute ca xpinne be. Zacá zanna irá xpinne nanna xi cá lu xquenda biaani binni

ne xi nuu ndaani ladxidó'. Ne zaguixe cada tobi de laatu bia' ni bi'ni'.

<sup>24</sup> Peru ca xcaadxi de laatu ni cadi zinanda modo nabani cabe ca, ne qué huaziidi ni na cabe enda nuu xpiaani sti binidxaba', ma qué zuguaya rua' laaca gasti'.

<sup>25</sup> Xi si la? guiaana ca casi nuu ca yanna dede ora chaa ra nuu ca'.

<sup>26</sup> Ni quixhe dxí irá ni uqui-inde laa ne guni ni rabe dede ra iluxe guidxilayú la? zudiee laaca guni mandar ca ca xcaadxi binni,

<sup>27</sup> casi bidii Bixhoze ni naa. Zuni mandar cabe casi ñaca ne ti bara de guiba', ne zunidé cabe ca binni que casi racadé guisu.

<sup>28</sup> Ne zudiee laacabe luceru ni rindani siadó'.

<sup>29</sup> Ni racala'dxi guiene la? ucaa diaga ni cayabi Espíritu Santu ca xpinne'."

### 3

#### *Ni gabi be cani nuu Sardis*

<sup>1</sup> Ne ni chi tidxe lii rarí di la? bicaa lu ni cayapa ca xpinne ni nuu Sardis: "Sicarí na ni napa gadxe espíritu sti Dios ne gadxe luceru que: Nanna xi irá runi tu. Ma guti tu, neca za'bi diidxa nabani tu."

<sup>2</sup> Ca'ru ixele chaahui pe tu, nuu xcaadxi ra zinanda tu ni jneza. Yanna, laibani, lauzuhuaa dxiichi lu ni napa ru tu, purti mayaca initilú ni.

<sup>3</sup> Laguietenala'dxi ni ma biziidi tu. Lachinanda ni ne lainaba perdón Dios. Pa qué guni tu ni la? ziaa ra

nuu tu sin ganna tu, casi rie gubaana'.

<sup>4</sup> Peru nuu ru xcaadxi lade tu ni qué ninanda modo ze tu. Ma bia ladxidó' cabe casi ñaca nacu cabe lari quichi', ne zazá né cabe naa saca qué niree chu cabe de naa.

<sup>5</sup> Ni riguixhe dxí irá ni uquiinde laa la? zacu lari quichi ne qué zuxhaya lá lu gui'chi ra cá lá ni napa enda nabani ni qué zaluxe. Zanié xpinne laaca nezalú Bixhoze' ne nezalú ca ángel.

<sup>6</sup> Ni racala'dxi guiene la? ucaa diaga ni cayabi Espíritu Santu ca xpinne'."

#### *Ni gabi be cani nuu Filadelfia*

<sup>7</sup> Ne ni chi tidxe lii rarí di la? bicaa lu ni cayapa ca xpinne ni nuu Filadelfia: "Sicarí na tobi lucha Señor ni qué rusiguii: Naaze llave sti rey David, ne ora uxhele iruti zanda useegu', ne ora useegua' iruti zanda uxhele'.

<sup>8</sup> Nanna xi irá runi tu. Ma bixhele puerta para laatu, ne iruti zanda useegu ni. Purti neca huaxié' laatu para ucaa lú tu ni cadi jneza, peru huacaa tu stiidxa ne huasihuinni tu xpinne laatu.

<sup>9</sup> Nga runi zuchiña ca xpinne binidxaba uzuxibi xa ñee tu, cani na judíu laa peru cadi dxandí ni, cusiguii si ca'. Zune ni para ganna ca nadxiee laatu.

<sup>10</sup> Bizuuba tu stiidxa ra gudxe laatu cadi ixhacala'dxi tu. Nga runi zapa laatu dxi gueeda enda naná idubi

naca guidxilayú para ihuinni uná nga xpinne'.

<sup>11</sup> Nagueenda zenda'. Cadi undaa tu ni ma napa tu ti qué chu' tu gaxha laatu ni nexhe icaa tu.

<sup>12</sup> Ni quixhe dxí irá ni uqui-inde laa la? zune laa casi ti pilar ndaani xhiu'du Dios stinne' ne qué ziuu dxi iree raqué. Zucaa lá Dios stinne lucuá cabe ne lá xquidxi Dios stinne', Jerusalén cubi ni guiete de ibá' ra nuu Dios stinne'. Ne zucaa la'ya lucuá cabe, ti lá cubi.

<sup>13</sup> Ni racala'dxi guiene la? ucaa diaga ni cayabi Espíritu Santu ca xpinne'."

### *Ni gabi be cani nuu Laodicea*

<sup>14</sup> Ne ni chi tidxe lii rarí di la? bicaa lu ni cayapa ca xpinne ni nuu Laodicea: "Sicarí na ni qué rusiguii sínunque irá ni riní' la? jneza ni, ne de laa zeeda irá ni bizá' Dios:

<sup>15</sup> Nanna xi irá runi tu. Nanna cadi cayuni pe tu ni rabe', ne ca'ru usaana chaahui tu ni. Casí ñaca cadi nandá' tu ne cadi nananda tu, sínunque nadxaa si. Jma galán pa ñaca tu nananda o nandá'.

<sup>16</sup> Peru partí nadxaa si tu la? zabee laatu de ra nuua', casi ñaca nidxiba laatu.

<sup>17</sup> Na tu ricu laatu, qué huazaaca tu gasti', ne gasti cayaadxa laatu. Nin ganna tu pa biree uniti tu dede ñá binni laatu. Qué gapa tu gasti', nin ni gacu tu, ne nacheepa lú tu.

<sup>18</sup> Nga runi cayabe laatu sí tu oro cha'hui lua', ti dxandí aca tu ricu, ne laca sí tu lari quichi gacu tu ti qué ituí lú tu nuu tu xie ladi tu. Ne laca lasí' coliriu idaa guielú tu para iná tu.

<sup>19</sup> Rulidxe cani nadxiee ne ridinde nia laaca'. Nga runi lainaba perdón Dios ne laguni xhiiña ne gana.

<sup>20</sup> Laguuya' zuhuaa ra puerta ladxidó' to, cuxhidxe naya'. Ni ucaa diaga stidxe ne uxhele ladxidó' guiuua la? casi ñaca zahua xhie nia laa, ne laa zo xhi né naa.

<sup>21</sup> Tu quixhe dxí irá ni uquiinde laa la? zuni mandar ne naa casi cayune mandar nia Bixhoze', partí gudixhe dxie ni biquiinde naa.

<sup>22</sup> Ni racala'dxi guiene la? ucaa diaga ni cayabi Espíritu Santu xpinne'."

## 4

### *Cusisaca cabe Dios ibá'*

<sup>1</sup> Udi'di si irá nga la? biya dxie ne biiya zuxele ndaga ti puerta ibá', ne na dxa ridxi bina dia'ga ruluí' trompeta que, rabi naa:

—Udxi'ba rarí', ulué lii irá ni chi aca ru'.

<sup>2</sup> Oraque pe dxá ladxiduá' de Espíritu Santu, ne biiya zuhuaa ti asientu raqué, ti trono ra ribí ni runi mandar, ne zuba tuuxa lú ni.

<sup>3</sup> Ne ruzaani ni zuba raqué casi ti guie jaspe o cornalina. Naguu ti arcu iris le' trono que, ruluí' guie esmeralda.

<sup>4</sup> Nuu trono que galahui de sti veinticuatro trono. Ne

zuba ti binni gola lu cada trono, nacu lari quichi ne nuu corona de oro ique.

<sup>5</sup> Biree xpiaani rayu lu trono ni nuu galahui que, ne ucuá ridxi ne uxdixi rayu. Cá gui gadxe ndaa guiri bidxi nezalú trono que. Zeda gaca cani gadxe Espíritu sti Dios.

<sup>6</sup> Ne nexhe casi lapa nisa ra lu trono que, ruluí' espeju naya'ni'.

Nuu tapa bultu nabani cue' trono que, tobi cada ladu, napa stale guielú nezalú ne neza deche.

<sup>7</sup> Primé que ruluí' ti lion ne rairopa que ruluí' yuze. Raguionna que napa lú binni, ne raidapa que ruluí' ti bisiá canapapa.

<sup>8</sup> Cada bultu que napa xhoopa xhiaa, cá guielú xaguete ne luguiá'. Ne idubi dxi idubi gueela cucaa ca ridxi:

Tobi lucha Señor Dios ni jma nandxó',  
ni nuu yanna ne qué huayuu dxi guiaadxa', ne qué ziuu dxi guiaadxa'.

<sup>9</sup> Cusisaca ca ni zuba lu trono que, ni qué ziuu dxi gati', ne cudii ca diuxquixe laabe. Cada guni ca ni,

<sup>10</sup> ruzuxibi idubi veinticuatro binni gola que nezalú ni zuba lu trono ni qué ziuu dxi gati que. Ne riguixhe ca corona stica nezalú be, ne na ca':

<sup>11</sup> Señor Dios stidu,  
lii siou' nga naquiñe udxi'ba du  
ne usisaca du ne iní du nandxó' lo'.

Purti lii bizá' lu irá xixé ni nuu.

Uyá' ni ne nuu ru ni purti nga ni na lu'.

## 5

*Ra qué idxela gá cabe tu uxhele gui'chi'*

<sup>1</sup> Ne biiya naaze ni zuba lu trono que ti gui'chi lu ná' ladu derechu, cá nezalú ne neza deche. Dopa ni, ne gui'di né ni gadxe sellu.

<sup>2</sup> Ne biiya ti ángel nandxó' cucaa ridxi:

—Tu risaca bia' para uxhele gui'chi ri ne indadi ca sellu stini.

<sup>3</sup> Peru iruti nuu para uxhele ni, nin ibá', nin guidxilayú, nin xaguete guidxilayú. Dede nin para guuya dxí si ca ni qué ñanda.

<sup>4</sup> Ne bicaa ridxi biina purti qué nidxela iruti ni nuu para uxhele gui'chi que, nin ñuunda ni, nin ñuuya dxí ni.

<sup>5</sup> Oraque na tobi de ca binni gola que rabi naa:

—Cadi gu'na lu'. Nuu tobi ni nuu para uxhele ni, tobi ni zeeda lade xfamilia Judá, za de David, ne zeda aca casi ti lion. Laa nuu para indadi gadxe sellu stini que, ne uxhele ni, purti gudixhe dxí irá ni bicaa lú laa.

<sup>6</sup> Oraque biiya zuhuua ti Dendxu huiini nezalú trono que, galahui de ca bultu ne ca binni gola que, rihuinni ra biiti cabe laa. Napa gadxe cachu ne gadxe guielú, ne ca guielú que rini' gadxe espíritu sti Dios ni biseenda idubi guidxilayú.

<sup>7</sup> Ucuua be gui'chi naaze ni zuba lu trono que.

<sup>8</sup> Ne casi unaaze be gui'chi que bizuxibi idapa bultu que ne ca binni gola que nezalú be. Cada binni gola napa ti arpa ne ti brasera de oro dxá de gu'xhu rindá' naxhi. Zeda aca gu'xhu que stiidxa ca xpinni Dios ra uní' né ca laa.

<sup>9</sup> Cayuunda ca ti cantu cubi. Sicarí na ni:

Lii risaca lu bia' para icaa lu  
gui'chi ca ne indadi lu  
ca sellu stini.

Purti guti lu ne uzí' neu laadu  
rini stiu' para Dios,

irá du ni za du de irá ladu,  
de irá guidxi ne de irá  
idioma ni riní' binni.

<sup>10</sup> Ne bi'ni lu laadu sacerdote  
para guni du xhiñña  
Dios,

ne rey para guni mandar du  
binni guidxilayú.

<sup>11</sup> Oraque biiya dxie ne  
bina dia'ga stidxi jma ángel,  
de nin iruti ñanda nugaba  
laaca', naguu ca le' trono  
que, ne stidxi ca bultu que,  
ne stidxi ca binni gola que.

<sup>12</sup> Cucaa ca ridxi:  
Risaca Dendxu huiini biiti  
cabe que.

Naquiiñe udxiba nu laa  
purti nandxo'  
ne risaca ne riene ne napa  
stipa.

<sup>13</sup> Ne laca bina dia'ga stidxi  
irá ni bizá' Dios, irá ni nuu  
ibá' ne ni nuu ndaani guidxilayú  
ne xaguete guidxilayú  
ne ndaani nisadó' na ca':  
Cadi guiaana dxí nu de  
udxi'ba nu ne usisaca

nu ni zuba lu trono ca,  
ne Dendxu huiini'.

Stícabe irá enda risaca ne irá  
enda nandxo'.

<sup>14</sup> Ne na idapa bultu que:  
—Zacá aca ni.

Ne bizuxibi ca binni gola  
que bisisaca ca ni qué ziuu  
dxi gati'.

## 6

*Ra uladi gadxe sellu*

<sup>1</sup> Biiya ora bixhele Dendxu  
huiini que primé sellu ne  
uní' tobi de ca bultu que casi  
ora rixidxi rayu, na:

—Gudá' gu'yú'.

<sup>2</sup> Biiya ti mani quichi', ne  
naaze ni dxi'ba laame que ti  
bara. Bidii cabe laa ti la'pa  
ne biree zitixhe dxí cani ucaa  
lú laa.

<sup>3</sup> Ora bixhele be rairopa  
sellu bina dia'ga na rairopa  
bultu que rabi naa:

—Gudá' gu'yú'.

<sup>4</sup> Biree sti mani xiñá', ne  
ucuua ni dxi'ba laame que  
ti espada ro' ne orde para  
guni yaya ndaani guidxilayú  
ne guni pur guuti saa binni.

<sup>5</sup> Ora bixhele be raguionna  
sellu bina dia'ga na  
raguionna bultu que rabi  
naa:

—Gudá' gu'yú'.

Biya dxie ne biiya ti mani  
yaase' ne naaze ni dxi'ba  
laame ti balanza.

<sup>6</sup> Ne bina dia'ga ti ridxi  
lade ca bultu que na:

—Ti litru arroz zasaca bia'  
ti dxi dxiiña ne bia' cá ca  
zasaca chonna litru xuba'.  
Peru cadi guni yuudxu tu  
aceite ne vinu.

<sup>7</sup> Ora bixhele be raidapa sellu bina dia'ga na raidapa bultu que rabi naa:

—Gudá' gu'yu'.

<sup>8</sup> Biya dxie ne biiya ti mani guchi, dxi'ba tobi laame lá "Enda guti". Ne nanda stobi laa lá "Ra riaana ca gue'tu". Ucuua Enda guti que orde chi guuti binni galaa de galaa guidxilayú. Nuu tu zati ra cadinde, nuu tu zati de enda rindaana, nuu tu zati de enda huará, ne nuu tu zuuti mani duxhu laa.

<sup>9</sup> Ora undadi be ra izaa gaayu sellu que, biiya xa'na altar nexhe xhialma cani biiti binni laa purti qué ñaana dxí ca de ñui' né ca binni stiidxa Dios.

<sup>10</sup> Cucaa ridxi ca':

—Tobi lucha Señor ni qué rusiguii, padxí udxiba lu donda ique ca binni nuu ndaani guidxilayú ni biiti laadu, ne uquixe lu ni laaca'.

<sup>11</sup> Para bidii cabe laaca lari quichi gacu ca', ne gudxi cabe laaca iziila'dxi ca laga si izaa ca', purti riaadxa gati xcaadxi hermanu ni cayuni ru xhiiña Cristu casi bi'ni ca'.

<sup>12</sup> Ora undadi be ra izaa xhoopa sellu que biya dxie ne uca ti xu ro'. Biyaase lana gubidxa ne bixiñá rini bee.

<sup>13</sup> Ne biaba ca luceru cá ibá' guidxilayú casi riaba du'ga ri'ni ora rundubi bi yooxho'.

<sup>14</sup> Ne bidopa ibá' casi ridopa gui'chi', ne biduuba irá dani ne irá isla de jlugar.

<sup>15</sup> Ne irá ni runi mandar ndaani guidxilayú ne irá binni risaca ne irá binni napa ne irá capitán ne irá ca

justicia ne irá ni cá yaga ne ni cadi cá yaga, irá cabe bicachi lú cabe ndaani cueva ne lade ca guie sti dani.

<sup>16</sup> Ne na cabe rabi cabe ca dani ne ca guie que:

—Laguiaba luguiá du, laucaachi laadu ti qué gu'ya ni zuba lu trono que laadu ne cadi usaba ná Dendxu huiini que laadu.

<sup>17</sup> Purti ma gunda dxi ro' nexhe guiaiba ná binni, ne tuu ndi zanda guni huantar ni.

## 7

*Cani ibi lade cani za de Israel*

<sup>1</sup> Udi'di si irá nga la? biiya tapa ángel zuhuua idapa ladu guidxilayú, cucueza ca bi, ti cadi lica undubi bi lu guidxilayú, nin lu nisadó' nin lu yaga.

<sup>2</sup> Ne laca biiya zeeda sti ángel de neza rindani gubidxa, né sellu sti Dios ni nabani. Biccaa ridxi tapa ángel ni ma ucuaa orde guniná layú ne nisadó',

<sup>3</sup> na rabi laacabe:

—Cadi guniná tu layú nin nisadó' nin ca yaga dede qué ucá' du sellu sti Dios stinu lucuá ca xpinni.

<sup>4</sup> Biluxe ucuaa si cabe sellu que, bina dia'ga panda tu ucuaa ni, ti gayuaa cuarenta y cuatro mil lade cani za de Israel:

<sup>5</sup> doce mil ni za de Judá, doce mil ni za de Rubén, doce mil ni za de Gad,

<sup>6</sup> doce mil ni za de Aser, doce mil ni za de Neftalí, doce mil ni za de Manasés,

<sup>7</sup> doce mil ni za de Simeón, doce mil ni za de Leví, doce mil ni za de Isacar,

<sup>8</sup> doce mil ni za de Zabulón, doce mil ni za de José, ne doce mil ni za de Benjamín.

*Ra cisisaca irá xpinni  
Dios laa*

<sup>9</sup> Udi'di si irá nga biya dxie ne biiya zuhuaa jma binni nezalú trono ne nezalú Dendxu huiini que, dede iruti ñanda nugaba laaca'. Za ca de irá ladu ne de irá guidxi ne irá idioma rini' binni. Nacu cabe lari quichi', ne naaze cabe ziñā.

<sup>10</sup> Irá cabe cucaa cabe ridxi:

Dios stinu ni zuba lu trono bilá laanu,

laa ne Dendxu huiini'.

<sup>11</sup> Naguu irá ángel le' trono que, laani ne ca binni gola ne idapa bultu que. Ne biaba rilú ca nezalú trono que, bisisaca ca Dios,

<sup>12</sup> na ca':

Amén. Qué chu' dxi guiaana dxí nu de usisaca nu Dios stinu ne udi' nu diuxquixe laa.

Stibe irá enda nandxo', irá enda biaani', irá enda risaca ne irá stipa.

<sup>13</sup> Oraque na tobi de ca binni gola que rabi naa:

—Tu ca nga nacu lari quichi ca, ne padé beeda ca'.

<sup>14</sup> Para rabe laabe:

—Qué ganna dia', señor. Lii nannu tu laacabe.

Para na be rabi be naa:

—Ca nga nga ni udi'di ra jma nagana ne udiibi ca xhaba ca' ne bisiquichi né ca ni rini sti Dendxu huiini'.

<sup>15</sup> Nga runi zuhuaa cabe nezalú trono sti Dios, cusisaca cabe laa ridxi ne huaxhinni ndaani yu'du ro' sti'. Ne zapa ni zuba lu trono ca laacabe.

<sup>16</sup> Qué zandaana cabe ne qué zati cabe nisa. Qué zuza-aqui gubidxa laacabe ne qué zaca nandá' cabe.

<sup>17</sup> Purti zapa Dendxu huiini ni zuhuaa nezalú trono que laacabe casi riaapa dendxu'. Ziné laacabe ra candani nisa rudii enda nabani. Ne zucuiidxi Dios irá nisa riete lú cabe.

## 8

*Ra izaa gadxe sellu iladi'*

<sup>1</sup> Ora undadi be ra izaa gadxe sellu que, dxí do' uyuu ibá' bia' galaa ora.

<sup>2</sup> Ne biiya gadxe ángel ni ruzuhuaa nezalú Dios, bidii cabe laaca gadxe trompeta.

<sup>3</sup> Oraque beeda sti ángel naaze ti braseru de oro, bizuhuaa ra nuu altar. Bidii cabe laa stale gu'xhu para uguucha ni stiidxa ca xpinni Dios ra uní' né ca laa, ne quixhe ni lu altar de oro ni nuu nezalú trono que.

<sup>4</sup> Udxiba né gu'xhu que stiidxa ca xpinni Dios dede ra nuu Dios.

<sup>5</sup> Oraque ucuaa be braseru que bichá be de gui ni nexhe lu altar que, bisindaa be ni guidxilayú. Uca ruidu ne uxidxi rayu ne uyuu xpiáani rayu ne uca xu.

*Ra uxidxi trompeta*

<sup>6</sup> Ne uyuu gadxe ángel ni naaze trompeta que listu para uxhidxi.

<sup>7</sup> Ra bixhidxi primé ángel que trompeta biaba granizu ne gui ndaani guidxilayú, iropa ni nucha ni rini. Casi ñaca guidxilayú chonna ndaa, uya'qui tindaa guidxilayú, yaga ne guixi nagá' ni nuu lú ni.

<sup>8</sup> Ra bixhidxi rairopa ángel que trompeta biaba casi ti dani cá gui ndaani nisadó' ne guca tindaa ni rini.

<sup>9</sup> Binitalú caadxi mani ni nuu ndaani nisadó' que. Bi-aana xhupa de bia' ni guti que qué ninitilú. Zaqueca uca ca barcu.

<sup>10</sup> Ra bixhidxi raguionna ángel que trompeta biaba ti luceru ro' de ibá', caya'qui casi ti guiri bidxi. Biaba ni luguiá caadxi guiigu ne ra candani nisa, peru biaana xhupa tantu de bia' ra biaba ni que.

<sup>11</sup> "Ajenjo" lá luceru que, xiixa ni nandá' casi xculá'. Bindá nisa biaba ni lú que ne guti stale binni ni güe' ni.

<sup>12</sup> Ra bixhidxi raidapa ángel que trompeta ucaná tindaa gubidxa ne tindaa beeu ne caadxi luceru. Ne biaana tindaa dxi ne tindaa gueela sin biaani'.

<sup>13</sup> Bigueta biya dxie ne bina dia'ga canapapa ti ángel galahui ibá', cucaa ridxi:

—Ria'ya cani nuu ndaani guidxilayú. Nagana zaca para laaca ora uxhidxi xhonna ángel ca trompeta.

## 9

<sup>1</sup> Ra bixhidxi ra izaa gaayu ángel que trompeta biiya biree ti luceru de ibá' biaba

guidxilayú ne bidii cabe laa llave sti ti bizé ro' ni qué gapa ra iluxe.

<sup>2</sup> Bixhele ruaa bizé que ne biree gu'xhu ndaani ni casi ora caya'qui ti zuquii ro'. Bisicahui gu'xhu que lu gubidxa ne lu bi.

<sup>3</sup> Biree jma gusú lade gu'xhu que, canapapa ndaani guidxilayú, ne uca came casi meuxubi ne gunda biquichi came binni.

<sup>4</sup> Ne gudxi cabe laacame cadí guniná came ca guixi ga' ni nuu ndaani guidxilayú nin ca yaga nin gasti ni nagá', sínunque ca binni si ni cadí cá sellu sti Dios lucuá.

<sup>5</sup> Peru cadí para guuti came laaca', sínunque para guniná si came laaca gaayu beeu. Zuquiichi came laaca casi ruquiichi meuxubi.

<sup>6</sup> Zuyubi binni gati ca dxi que, peru qué zanda. Ne para laacabe pa ñanda si ñati cabe, peru zaxele enda guti de laacabe.

<sup>7</sup> Zeda aca came casi caballu ni nuu listu para che guerra. Nuu casi la'pa de oro ique came ne casi lú binni lú cámé.

<sup>8</sup> Napa came guicha ique came casi guicha ique gunaa, ne laya came casi laya lion.

<sup>9</sup> Nanda xiixa xpechu came casi guiiba para cadí acaná came ne rixidxi xhiaa came casi rixidxi ra zidi'di stale carretón ziuxooñe ra cayaca guerra.

<sup>10</sup> Napa came xcola came casi xcola meuxubi. Lu punta ni nuu ni guniná né came binni idubi gaayu beeu

que.

<sup>11</sup> Naca ángel sti bizé que xaíque stícame. Abadón lá ángel que diidxa hebreu, ne diidxa griegu la? Apolión. Ni rini' ni la? "Ni runutilú".

<sup>12</sup> Ma udi'di ti yuuba'. Ri-aadxa ru xhupa.

<sup>13</sup> Ra bixhidxi ra izaa xhoopa ángel que trompeta bina dia'ga ucuá ti ridxi lade idapa cachu sti altar de oro ni zuhuua nezalú Dios que.

<sup>14</sup> Na ni rabi ni ángel ni bixhidxi trompeta que:

—Bixhedxe idapa ángel ni liibi uriá guiigu Eufrates.

<sup>15</sup> Ne bixedxe idapa ángel ni ma nexhe para dxi idxiña hora ne dxi ne beeú ne iza guuti ca caadxi binni, ne guiaana xhupa tantu de bia' gati que.

<sup>16</sup> Bina dia'ga panda soldadu stica', bia' chupa millón, dxi'ba mani'.

<sup>17</sup> Sicarí nga modo biiya ca caballu ne cani dxi'ba laacame. Nanda guiba xiñá ne azul, ne naguchi xpechu cani dxi'ba laacame que. Ne ique came zeda aca casi ique lion, ne caree bele ne gu'xhu ne azufre ndaani ruaa came.

<sup>18</sup> Ne biiti ni biree ndaani ruaa came que caadxi binni.

<sup>19</sup> Runiná né came ni riree ndaani ruaa came, ne laca runiná né came xcola came. Purti casi beenda xcola came, napa ique.

<sup>20</sup> Ca xcaadxi binni ni qué ñati lu guionna plaga que, nin ne zacá qué ninaba ca perdón Dios para nusaana ca irá ni runi ca'. Ne qué ñaana

dxí ca de nusisaca ca binidxaba' nin bidó' de oro ne de plata ne de bronce ne de guie ne de yaga, neca qué zanda iní' cani nin gu'ya cani nin sa cani.

<sup>21</sup> Nin qué niná ca nusaana ca de ñuuti ca binni nin de ñuni ca brujería nin de ñuu né ca ni cadi xheela ca', ne nin de niba'na ca'.

## 10

*Angel naaze gui'chi'*

<sup>1</sup> Oraque biiya zeda yete sti ángel de ibá', nandxo', renda ti za ne nuu arcu iris ique. Ruzaani lú casi gubidxa ne rului' bele ñee.

<sup>2</sup> Naaze be ti gui'chi zuxele' ne bizuhuaa ñee be ladu derechu lu nisadó' ne ladu biga lu guidxilayú.

<sup>3</sup> Biccaa be ridxi casi ora riguu beedxe lion ne uxdxi gadxe rayu, bicabi laabe.

<sup>4</sup> Casi uxdxi rayu que, ucaladxe nucaa xi na cani, perú bina dia'ga uni' tobi de ibá', na rabi naa:

—Cadi ucoou, purti cadi para ganna binni ni.

<sup>5</sup> Ne undisa ná dxa ángel ni biiya zuhuua ñee lu nisadó' ne lu guidxilayú que ibá',

<sup>6</sup> ne bini jurar pur ni qué ziuu dxi gati', ni bizá' ibá' ne irá ni nuu ndaani' ne guidxilayú ne irá ni nuu ndaani', ne nisadó' ne irá ni nuu ndaani', na:

—Ma qué zandaa ru',

<sup>7</sup> ma chi aca ni gudxi Dios ca profeta aca', ucaa si ra izaa gadxe ángel que trompeta. Oraque zului'

Dios binni ni qué nihuinni chiqué.

<sup>8</sup> Bigueta uní' dxa ni uní' né naa de ibá' que, na rabi naa:

—Yecaa gui'chi zuxele naaze ángel ni zuhuua ñee lu nisadó' ne lu guidxilayú ca.

<sup>9</sup> Oraque uyaa ra nuu ángel que, gudxe laa udii naa gui'chi que, para na rabi naa:

—Gucuua, gudó ni. Nanaxhi dxiña zaca ni ndaani ruua lu', peru ora ma nuu ni ndaani lu zaca ni nandá'.

<sup>10</sup> Para ucuaa gui'chi naaze ángel que, gudahua'. Ne dxandí nanaxhi dxiña uca ni ndaani ruua', peru biluxe si gudahua ni, nandá uca ni ndaane'.

<sup>11</sup> Oraque rabi cabe naa:

—Napu xidé güi neu binni diidxa sti tiru, ga'bu laaca xi na Dios chi aca stale guidxi ni riní' adxé adxé idioma, de ra irá idioma riní' binni, ne stale de cani runi mandar.

## 11

*Cani chi useenda Dios güi stiidxa'*

<sup>1</sup> Oraque bidii cabe naa ti gueere casi ti metru ne rabi cabe naa:

—Biasa, uluu bia' yu'du ro' sti Dios ne altar. Ne bigaba panda cusisaca laabe raqué.

<sup>2</sup> Peru cadi cu' bia' lu patiu stini ni nuu fuera, partí ma bidii Dios ni ca binni cadi judíu, ne zuutu ñee ca xquidxi Dios chonna iza aronda'.

<sup>3</sup> Zuseenda chupa xpinne de lutu chi güi stiidxa ti mil chupa gayuaa sesenta dia.

<sup>4</sup> Zeda aca cabe iropa yaga olivo ne iropa candeleru ni zuhuua nezalú Señor, xpixuaana guidxilayú.

<sup>5</sup> Pa chu' tu gacala'dxi guniná laacabe zaree gui ndaani ruua cabe zuzaaqui laa. Zacá zati tutiica ucaa lú laacabe.

<sup>6</sup> Nandxo' cabe. Zanda useegu cabe ibá' ti cadi guiba nisa guie biá' tica dxi güi cabe stiidxa Dios. Ne laca zanda guni cabe nisa rini ne guniná cabe guidxilayú bia' tica acala'dxi cabe ne adxé adxé plaga.

<sup>7</sup> Peru ora ma biluxe xhiña cabe zaree ti mani ngola ndaani dxa bizé que, zucaa lú laacabe ne zaguixhe dxí laacabe dede zuuti laacabe.

<sup>8</sup> Ziaana xcuerpu cabe lu calle sti guidxi ro' ra ucuá Señor stinu lu cruz. Zeda aca guidxi que casi Sodoma ne Egipto.

<sup>9</sup> Zuuya dxí binni laacabe chonna gubidxa aronda', binni de irá guidxi ne de irá idioma, ne qué zaná ca igaachi cabe.

<sup>10</sup> Zieche binni ma guti cabe dede zuni ca saa ne zusiga'de saa ca xiixa partí nabé bininá cabe laaca'.

<sup>11</sup> Peru tidi si chonna gubidxa aronda que, zusibani Dios laacabe ne zuzuhsuaa cabe ne irá ni gu'ya laacabe zadxibi.

<sup>12</sup> Oraque zuna diaga cabe zaní' né tuuxa laacabe de ibá', zabi laacabe:

—Laqui'ba rari'.

Ne zaguib'a cabe lade ti za nezalú cani nanala'dxi laacabe.

<sup>13</sup> Ne zaca ti xu ro', zanitilú tindaa de guidxi que ne zati gadxe mil binni. Nabé zadxibi ca xcaadxi binni que ne zusisaca ca Dios ni nuu ibá'.

<sup>14</sup> Racá iluxe rairopa yuuba', peru zeeda ru stobi.

*Ra izaa gadxe trompeta xhidxi*

<sup>15</sup> Oraque biiya bixhidxi ra izaa gadxe ángel que trompeta ucuá stale ridxi ibá', na:

Ma bidxiña dxi guiaana irá xixé ni runi mandar ladxi ná Dios ne Cristu sti', ne qué ziaana dxí de guni mandar.

<sup>16</sup> Ne bizuxibi ca binni gola zuba lu trono que, bisisaca ca Dios,

<sup>17</sup> na ca':

Señor Dios ni nandxo', nuu lu ne qué huayuu dxi guiaadxa lu ne qué ziuu dxi.

Diuxquixe pe lii partí ma bilui' lu enda nandxo' stiu';

ma bizulú lu guni mandar lu'.

<sup>18</sup> Bidxiichi binni guidxilayú, peru ma bidxiña dxi usaba ná lu laaca' ne cuidxu cuenta cani ma guti.

Zaguixe lu cani bi'ni xhiña lu', byui' stiidxa lu',

cani biaana para lii siou' ne bisisaca lii,

cani risaca ne cani qué risaca.

Ne zunitilú lu cani binitilú guidxilayú.

<sup>19</sup> Oraque bixelete yu'du ro' sti Dios ni nuu ibá', ne bihuinni lugar ni jma nandxo'. Uyuu xpiaani rayu, uxidxi

rayu, uca ruidu, uca xu ne biaba granizu.

## 12

*Ra bihuinni ti gunaa ne ti dragón*

<sup>1</sup> Oraque bihuinni ti seña ro' ibá', ti gunaa renda gubidxa, nexhe beeua xa ñee, ne nuu ti la'pa de doce luceru ique.

<sup>2</sup> Naça xiiñi be ne cucaa be ridxi, cayuuba ndaani be, partí mayaca gale badu huiini'.

<sup>3</sup> Bihuinni ru sti seña ibá', ngue ma ti dragón ngola xiñá', napa gadxe ique ne cada ique nuu ti la'pa', ne napa chii cachu.

<sup>4</sup> Gudiñe xcola me caadxi luceru, biaba guidxilayú. Bizuhuaa me nezalú gunaa que para gabi me xiiñi casi gale.

<sup>5</sup> Uxana gunaa que ti badu nguiuu huiini ni nexhe guni mandar, casi ñaca ne ti guiba'. Peru casi gule badu huiini que ucuaa Dios laa yené laa ra nuu trono sti'.

<sup>6</sup> Ne bixooñe gunaa que biaazi gui'xhi', yeguaana ti lugar ra naguixhe chaahui Dios para guiaapa ti mil chupa gayuaa sesenta dia.

<sup>7</sup> Oraque udinde cabe ibá'. Bicaa lú Miguel, tobi de ca xáique sti ca ángel, ne ca xpinni dxa dragón. Laca bicaa lú dragón ne ca xpinni.

<sup>8</sup> Peru qué ñanda ñuni ganar ca'. Ma qué ñanda ñuu ca ibá'.

<sup>9</sup> Ulá me ndaani guidxilayú, laame ne ca xpinni

me. Laame nga dxa beenda yooxho ni lá diablu ne binidxaba', ni rusiguii irá binni que.

<sup>10</sup> Oraque bina dia'ga ucuá ti ridxi de ibá:

—Ma bidxiña dxi ulá Dios stitu laanu. Ma chi usihuinni enda nandxó' sti', chi guni mandar, laa ne Cristu sti'. Purti ma uladxi be ni uluu xqueja ca hermanu stinu, dxa ni uluu xqueja ca nezalú be ridxi ne huaxhinni que.

<sup>11</sup> Gunda gudixhe dxí ca laabe purti guti Dendxu huiini que pur laaca', ne purti qué nidxibi ca ñui' ca xpinni Cristu laaca', neca nanna ca zándaca gati ca'. Qué ña ca xpida ca'.

<sup>12</sup> Laguieche', cani nuu ibá', peru lagapa gá si laatu cani nuu ndaani guidxilayú ne ndaani nisadó', purti ma biete binidxaba ra nuu tu ne cayó dí laa ti nanna ma huaxié' dxi napa.

<sup>13</sup> Ora bi'ya dragón que ma ulá ndaani guidxilayú, uzabi nanda jñaa badu huiini que.

<sup>14</sup> Peru bidii cabe chupa xhiaa ro' casi xhiaa bisiá gu-naa que para gunda bipapa ne zacá bilá de lu ná mani que. Uyé be ndaani gui'xhi ra nexhe chaahui guiaapa be chonna iza aronda'.

<sup>15</sup> Peru bindaa mani que nisa ndaani ruaa. Ne uca ni casi guigu para niné ni laabe.

<sup>16</sup> Peru ucané guidxilayú laabe, güe' nisa que.

<sup>17</sup> Jma rusi gudó dí laame óraque, bidxiichi né me gu-naa que. Para biree me

zitinde né me cani za de laabe, cani ruzuuba stiidxa Dios ne zinanda stiidxa Jesu-cristu.

## 13

*Ra biree chupa mani ngola*

<sup>1</sup> Bizuhuua uriá nisadó' ne biiya biree ti mani ngola ndaani nisa, napa gadxe ique ne chii cachu. Nuu ti la'pa cada xcachu ne cá ti diidxa lu cada ique me ni riguu dí Dios.

<sup>2</sup> Sicarí nga mani ni biiya que: ruluí' me beedxe', ne casi ñee oso ñee me, ne casi ruua lion ruua me. Bicuí dragón que laame guni mandar me jlugar, ne bidii laame enda nandxó' sti'.

<sup>3</sup> Biiya ucaná ti ique me dede ruluí' ñati me, peru bianda ni, ne nabé bidx-agayaa binni ne yenanda laame.

<sup>4</sup> Bisisaca ca dragón que purti bicuí laame guni mandar me ne laca bisisaca ca laame, na ca':

—Iruti ru casi mani ri', ne iruti zanda ucaa lú laame.

<sup>5</sup> Gucuua me lugar uní' me stale diidxa guidxa ne uluu dí me Dios, ne bini mandar me cuarenta y dos beeu.

<sup>6</sup> Zacá bi'ni me, uní' me Dios, uluu dí me laa ne yu'du sti' ne irá ni nuu ibá'.

<sup>7</sup> Laca bidii Dios lugar ucaa lú me ca xpinni dede quixhe dxí me laaca', ne zaqueca guni mandar me irá guidxi, irá ladu, irá binni riní' adxé adxé idioma.

<sup>8</sup> Ne bisisaca irá binni ni nuu guidxilayú laame, cani cadi cá lá lu gui'chi

sti Dendxu huiini ni guti que. Dede dxi ca'ru cha guidxilayú ucuá lá cani chi caa enda nabani ni qué zaluxe lu gui'chi que.

<sup>9</sup> Ni racala'dxi guiene la? ucaa diaga.

<sup>10</sup> Ni useguyoo binni la? laca zieguyoo, ne ni guuti né espada la? laca né espada zati. Rarí nga naquiiñe cadi ixhacala'dxi ca xpinni Dios ne cadi usaana ca de guni cre ca'.

<sup>11</sup> Oraque biiya biree sti mani ngola ndaani yu, napa chupa cachu casi xcachu dendxu', peru rucaa ridxi casi dragón.

<sup>12</sup> Ucuaa me irá enda runi mandar sti dxa mani ucaná ique dede bilá ñati que, ne bini mandar me nezalú. Ne bi'ni me para bizuxibi irá binni nuu ndaani guidxilayú xa ñee ni bianda ique que.

<sup>13</sup> Laca gunda bi'ni me stale ni bidxagayaa binni dede bisaba me gui de ibá' ndaani guidxilayú.

<sup>14</sup> Zacá udxite me binni, ne irá ni ucuaa me lugar guni me nezalú dxa mani ucaná ne espada Peru qué ñati que. Ne bicaa me irá binni uzá' ti bidó' chura mani que.

<sup>15</sup> Ne laca bidii Dios lugar bisibani me bidó' que ti ganda iní', ne guuti irá ni qué na usisaca laa.

<sup>16</sup> Ne na me ucaa irá binni ti seña lu ná ladu derechu o lucuá — cani risaca ne cani qué risaca, ricu ne pobre, ni cá yaga ne ni cadi cá yaga.

<sup>17</sup> Iruti qué ñanda nutoo nin nizi' pa qué gapa seña

que, ne nga nga lá mani que o número sti'.

<sup>18</sup> Rarí nga riquiñe enda biaani'. Tu napa enda biaani la? cuee número sti mani que. Riní' ni lá ti hombre. Ne ndi nga número que: xhoopa gayuua sesenta y seis.

## 14

*Ra bi'nda 144,000 binni*

<sup>1</sup> Oraque biya dxie ne biiya zuhuua Dendxu huiini que lu dani Sion. Zuhuua né ti gayuua cuarenta y cuatro mil binni laabe, ni cá lá be ne lá Bixhoze be lucuá.

<sup>2</sup> Ne bina dia'ga ti ruidu casi ora rixidxi stale nisa ne casi ora rixidxilaa rayu ne casi ora cuxhidxi stale binni arpa.

<sup>3</sup> Cayuunda cabe ti cantu cubi nezalú trono ne nezalú idapa bultu ne ca binni gola que. Iruti ru ñanda niziidi cantu que, sínunque ti gayuua cuarenta y cuatro mil que si ni bilá lade irá binni guidxilayú.

<sup>4</sup> Ca ngue nga cani qué ñuni dxaba laa luguiá gunaa, sínunque bibani ca jneza, ne canananda ca Dendxu huiini que ladu tiica che'. Bilá cabe lade irá binni, casi ñaca nirudó' laacabe gu'de cabe Dios ne Dendxu huiini que.

<sup>5</sup> Qué ñuu dxi nusiguii cabe. Nayá ladxidó' cabe ra zuhuua cabe nezalú trono sti Dios.

*Ra bicaa chonna ángel ridxi*

<sup>6</sup> Oraque biiya sti ángel zipapa galahui ibá', zigüí né binni stiidxa Cristu ni qué

ziuu dxi initilú. Zigüí né be ni binni de irá ladu, de irá guidxi, ni rini' adxé adxé idioma.

<sup>7</sup> Bicaa be ridxi, rabi be laaca':

—Laidxibi Dios ne lausisaca laa, purti ma bidxiña dxi cuidxi cuenta binni. Lausisaca ni bizá' ibá' ne guidxilayú ne nisadó' ne ra rindani nisa.

<sup>8</sup> Nanda sti ángel laabe, na:

—Ma binitilú Babilonia, guidxi ro' que, purti bicaa ni enda nadxaba stini xcaadxi guidxi, casi ñaca nuxhudxi ni laaca'.

<sup>9</sup> De raqué nanda sti ángel, zeda ucaa ridxi:

—Gapa gá si cani usisaca mani que ne bidó' sti', ne udii lugar icá seña que lu ná o lucuá.

<sup>10</sup> Parti ma nexhe xi chi aca cabe, qué zagu'ba ná Dios ra usaba ná laacabe. Ziui cabe lade bele ra caya'qui azufre nezalú ca ángel sti Dios ne Dendxu huiini que.

<sup>11</sup> Ne qué ziuu dxi gyui' gui ra cayacaná cabe que. Qué lica zaziila'dxi cani rusisaca mani que ne bidó' sti' o ricaa seña sti', nin ridxi nin huaxhinni.

<sup>12</sup> Rarí nga riquiñe cadi ixhacala'dxi ca xpinni Dios ni runi ni na ne qué rixele de Jesús.

<sup>13</sup> Oraque bina dia'ga uní né tuuxa naa de ibá' rabi naa:

—Bicaa ni chi tidxe lii ri': "Dede yanadxí dichoso cani gati nuu né Señor tobi si." Dxandí ca diidxa ca,

na Espíritu Santu, purti zaziila'dxi cabe de irá dxiiña bi'ní cabe.

### *Ma gunda dxi*

<sup>14</sup> Oraque biya dxie ne biya ti za quichi', ne zuba tobi lu za que ruluí' Hombre Biseenda Dios. Nuu ti la'pa de oro ique ne naaze ti gandxu naduxhu'.

<sup>15</sup> Biree sti ángel ndaani yu'du ro' ni nuu ibá', bicaa ridxi ni zuba lu za que, na:

—Uluu gandxu stiu', bichiña cani ma nuu para idxiña, purti ma gunda dxi idopa ca' casi semiá ora ma nuu para iruugu'.

<sup>16</sup> Para uluu ni zuba lu za que gandxu sti', bitopa ca xpinni Dios ni nuu ndaani guidxilayú.

<sup>17</sup> Oraque biree sti ángel ndaani yu'du ro' que, laca naaze ti gandxu duxhu'.

<sup>18</sup> Ne biree sti ángel ra nuu altar ni rapa gui ni nexhe lu altar que. Bicaa be ridxi ángel ni naaze gandxu que, rabi be laa:

—Uluu gandxu stiu' bichugu ca be'za uvas ni nuu ndaani guidxilayú, purti ma güi cani.

<sup>19</sup> Para uluu ángel que gandxu sti', bitopa cani ne bichá cani ndaani pila para ixii cani. Zacá nga usaba ná Dios cani qué ñuni cre laa.

<sup>20</sup> Ulee cabe ca uvas que de ndaani guidxi, yeguutu ñee cabe cani. Biree zia'rini ndaani pila que dede bigaanda ni ndaani yanni caballu. Gu'ta ni bia' chonna

gayuua kilómetru idubi uriá pila que.

## 15

*Ra ma chi iluxe enda naná*

<sup>1</sup> Biiya sti seña naro'ba ibá' dede bidxagayaa. Biyya gadxe ángel naaze gadxe plaga, ma ra iluxe enda naná, purti ma ne nga tidi xiana sti Dios.

<sup>2</sup> Ne laca biiya xiixa ruluí espeju nucha gui, ti lapa si nexhe ni casi ra'ta nisadó'. Ne uriá ni zuhuua cani qué nusisaca dxa mani ngola que ne bidó' sti', ne qué nicaa seña stime. Naaze cabe arpa ni bidii Dios laacabe.

<sup>3</sup> Cayuunda cabe cantu bi'nda Moisés ni bi'ní xhiiña Dios que, ne sti Dendxu huiini que. Na ni:  
Naro'ba ne de enda ridxagayaa irá ni runi lu', Señor Dios ni jma nandxó'. Jneza ne sicarú irá ni riguixhe lu', lii ni runi mandar irá guidxi.

<sup>4</sup> Tuu nga qué idxibi lii ne usisaca lii ya', Señor, purti iruti ru casi lii.

Ne zeda uzuxibi irá binni xa ñee lu' purti ma bihuinni jneza ni runi lu'.

<sup>5</sup> Oraque biya dxie ne biyya zuxele yu'du ro' sti Dios ni nuu ibá', lugar ni jma nandxó'.

<sup>6</sup> Ne biree gadxe ángel naaze plaga que ndaani ni, nacu lari quichi', nayá guie' dede ruzaani', ne xi' cinturón de oro xpechu cabe.

<sup>7</sup> Bidii ti bultu nabani que cada tobi de laacabe ti copa

de oro. Dxá ca copa que de xiana sti Dios ni qué ziuu dxi gati'.

<sup>8</sup> Ne bichá enda risaca ne enda nandxó' sti Dios yu'du que de gu'xhu'. Ne iruti ñanda ñuu dede ora ma birá idubi gadxe plaga ni né ca ángel que.

## 16

*Ra bindaate cabe copa ra dxá xiana sti Dios*

<sup>1</sup> Bina dia'ga ucuá ti ridxi ndaani yu'du ro', na rabi gadxe ángel que:

—Lachiundaate gadxe copa ra dxá xiana sti Dios ca ndaani guidxilayú.

<sup>2</sup> Para biree ti ángel, yedulaate copa sti lu guidxilayú, ne biree gui'dxu yu'udxu nabé riuuba ladi irá binni napa seña sti mani que ne rusicaca bidó' stime.

<sup>3</sup> Oraque bindaate rairopa ángel que copa sti lu nisadó', ne uca ni rini casi rini sti gue'tu'. Ne guti irá ni nuu ndaani nisadó'.

<sup>4</sup> Raguionna ángel que bindaate copa sti luguiá irá guiigu ne irá ra candani nisa, ne uca cani rini.

<sup>5</sup> Ne bina dia'ga na ángel sti nisa:

—Jneza bi'ní lu ra bisaba ná lu ca binni ri', Señor Dios, tobi lucha ni nacha'hui'. Qué huayuu dxi guiaadxa lu', ne nuu lu'.

<sup>6</sup> Purti bixhii cabe rini sti ca xpinni Dios ne cani byu'i' stiidxa lu'. Yanna ma biquixe lu ni laacabe, bigué' lu laacabe rini. Nga biyubi cabe.

<sup>7</sup> Laca bina dia'ga na tuuxa de lu altar:

—Dxandi', Señor Dios ni jma nandxo', jneza guridxi lu cuenta ca binni que.

<sup>8</sup> Raidapa ángel que bindaate copa sti lu gubidxa ne dede biree bele lu gubidxa bizaacu binni.

<sup>9</sup> Nabé bidxuí' ladi irá binni, peru nin ne zaqué qué ninaba ca perdón Dios, ne qué nusisaca ca laa, lágala uluu dí ca laa xiñee biseenda ca plaga que.

<sup>10</sup> Ra izaa gaayu ángel que bindaate copa sti lu trono sti dxa mani que, ne bicahui do' ra runi mandar me, ne biduyuuba laacabe dede gudó yaa cabe ludxi cabe.

<sup>11</sup> Peru nin ne zaqué qué ninaba cabe perdón Dios para nusaana cabe irá ni cayuni cabe, lágala uluu dí cabe Dios ni nuu ibá' purti cayuuba ladi cabe rabiree gui'dxu'.

<sup>12</sup> Ra izaa xhoopa ángel que bindaate copa sti lu guigu Eufrates ne bibidxi nisa stini para tidi ca rey ni zeeda de neza rindani gubidxa.

<sup>13</sup> Oraque biiya biree chonnan espíritu dxaba casi bidxi ñee gaa ndaani ruua dragón ne ndaani ruua dxa mani que, ne ndaani ruua ni na profeta laa peru cadi dxandí ni.

<sup>14</sup> Espíritu sti binidxaba laaca', ne gunda bi'ni ca milagru. Yeutopa ca irá ni runi mandar ndaani guidxilayú para aca ca tobi si ucaa lú ca Dios ni jma

nandxo' dxi uzulú cuidxi cuenta binni.

<sup>15</sup> Na Señor:

—Laguuya', zenda casi reeda gubaana'. Dichoso ni nexhená ne nacu lari ora guenda', ti cadi gu'ya binni laa xie ladi ne itui lú.

<sup>16</sup> Ne bichiña ca cani runi mandar que ti lugar rabi cabe Armagedón, diidxa hebreu.

<sup>17</sup> Ra izaa gadxe ángel que bindaate copa sti lu bi, ne ucuá ti ridxi de lu trono ni nuu ndaani yu'du ro' ibá', na ni:

—Ma biluxe irá ni.

<sup>18</sup> Oraque uyuu xpiaani rayu ne uca ruidu ne uxdxi rayu ne uca ti xu ro', jma naro'ba que ni huayaca dede dxi nuu binni guidxilayú.

<sup>19</sup> Uca guidxi ro' que chonnan ndaa, ne bixá irá guidxi ndaani guidxilayú. Ne bietenala'dxi Dios pabiá' bichee ca binni Babilonia ne bisaba ná laacabe.

<sup>20</sup> Binitilú irá isla ne irá dani.

<sup>21</sup> Biaba granizu ro' luguiá binni. Nanaa ni bia' cuarenta kilu. Ne uluu dí cabe Dios xiñee biseenda plaga ro' que luguiá cabe.

## 17

*Ra guiana ná gunaa dxaba'*

<sup>1</sup> Oraque bidxiña tobi de ca ángel ni naaze ca copa que, ne na rabi naa:

—Gudá' ulué lii modo chi guiana ná gunaa dxaba ni zuba lu nisadó'.

<sup>2</sup> Uyuu né cani runi mandar ndaani guidxilayú laabe ne bicaa be enda nadxaba

stibe irá binni, casi ñaca nux-hudxi be laaca'.

<sup>3</sup> Lu irá ni cului' Espíritu Santu naa, casi ñaca yené ti ángel naa ndaani gui'xhi'. Raqué biiya ti gunaa dxiba ti mani ngola xiñá'. Cá jma diidxa ladi mani que ni riguu dí Dios, ne napa me gadxe ique me ne chii xcachu me.

<sup>4</sup> Nacu gunaa que lari xiñá ne moradu, ne naze oro ne guie ni risaca ne perla. Naaze be ti copa de oro ne casi ñaca ndaani ni dxá irá enda nayuudxu ni bi'ni be, casi ra biuu né be ni cadi xheela be.

<sup>5</sup> Cá ti lá lucuá be, iruti qué riene chaahui'. Ndi nga laani: "Babilonia, guidxi ro' que, jñaa irá gunaa dxaba ne irá ni runi enda nadxaba idubi guidxilayú."

<sup>6</sup> Oraque biiya naxudxi be. Bixhudxi rini sti ca xpinni Dios ne sti cani guti ra canayuí' stiidxa Jesús laabe. Nabé bidxagayaa ora biiya laabe.

<sup>7</sup> Oraque na ángel que rabi naa:

—Xiñee cadxagayaa lu'. Nagana guiene binni ni bi'yu ca, peru zabe lii xi rini' irá ni, casi mani napa gadxe ique ne chii cachu ca ne gunaa ni dxiba laame.

<sup>8</sup> Mani ngola ni bi'yu ca la? uyuu me chiqué peru yanna ma co'. Zaree me ndaani dxa bizé que ante initilú chaahui me. Dede dxi ca'ru cha guidxilayú maca ucuá lá binni ni gapa enda nabani ni qué zaluxe. Ne zadxagayaa cani cadi cá lá lu gui'chi que ora gu'ya mani ngola

ca, purti uyuu me chiqué ne yanna ma co' Peru zahuinni me sti tiru.

<sup>9</sup> Rarí riquiñe enda bi-aani'. Gadxe ique ca la? rini' gadxe dani ra ribí gunaa ca.

<sup>10</sup> Ne laca rini' cani gadxe rey. Gaayu de laaca ma biasa ne zuba tobi yanna. Gueeda ru stobi, ne ora gueeda ngue qué zandaa di'.

<sup>11</sup> Mani ngola ni uyuu chiqué ne yanna ma co' ca la? nga nga ra izaa xhono rey neca naca me tobi de gadxe que. De raqué ma initilú pe me.

<sup>12</sup> Chii cachu ni bi'yu ca la? nga chii rey ni ca'ru cui'. Peru zabí ca de rey caadxi laga zuba mani ca.

<sup>13</sup> Ne ziuu ca tobi si, zudii ca guni mandar mani ca jlu-gar ca'.

<sup>14</sup> Zucaa lú ca Dendxu hui-ini que Peru zaguixhe dxí laaca', purti laa nga Xaíque sti irá rey ne irá ni runi mandar. Ne cani nuu né laabe la? guridxi Dios laaca ne ulí laaca para aca ca xpinni be ne qué zusaana ca laabe.

<sup>15</sup> Ne laca na ángel que rabi naa:

—Nisadó' ni bi'yu zuba gunaa dxaba que lú la? rini' ni guidxi ne binni ni riní' adxé adxé idioma.

<sup>16</sup> Ne zaca nanala'dxi chii cachu ni napa mani que dxa gunaa dxaba que, ne zusaana ca laabe xie ladi be sin gastí'. Zo ca xpeela be ne zuzaaqui ca laabe.

<sup>17</sup> Bi'ni cabe ni bilui'lá'dxi cabe ra uyuu cabe tobi si, ne bidii cabe guni mandar mani

ngola que, peru uluu Dios ni ndaani ladxitdó' cabe para gaca ni ma gudixhe gaca'.

<sup>18</sup> Ne gunaa ni bi'yu ca la? zeda aca ti guidxi ro'. Laani runi mandar ni irá rey ni nuu ndaani guidxilayú.

## 18

### *Ra riete ziaba Babilonia*

<sup>1</sup> Udi'di si irá nga, biyya zeda yete sti ángel de ibá' ni nabé risaca ne dede ria'qui biaani ladi be ne biaani ndaani guidxilayú ra biete be.

<sup>2</sup> Cucaa be ridxi:

—Ma biaba Babilonia, ma binitilú guidxi ro' que. Ma uca ni lidxi binidxaba ne ca espíritu sti' ne ca mani huiini ripapa ni ribixhila'dxi binni.

<sup>3</sup> Purti bicaa ni enda nadxaba stini binni irá guidxi, casi ñaca bixhudxi ni laaca'. Ne casi ñaca uca ni jnadxii cani runi mandar ndaani guidxilayú. Ne ra udxite ni xpidxichi ni lu enda nadxaba bisirricu ni cani rutoor ndaani guidxilayú.

<sup>4</sup> Oraque bina dia'ga uni' stobi de ibá', na:

—Lairee de ndaani guidxi ca, xpinne ca', ti qué chu' tu lu enda ruchee stini, ne qué inaaze enda naná ni gueeda luguiá ni laatu.

<sup>5</sup> Purti huachee ni dede nucCAA ique enda ruchee stini ibá', ne qué huasiaanda Dios irá ni huayuni ni.

<sup>6</sup> Laguni laani casi bi'ni ni laatu. Lauquixe laani chupa tantu ni bi'ni ni laatu. Laugué' ni chupa tantu jma

naduxhu que ni bigué' ni laatu.

<sup>7</sup> Biyubi ni irá ni ucaladxi ni. Yanna lausaba ná ni bia' queca. Na ni: "Rarí zuba casi reina. Cadi viuda naa, ne qué ziuu dxi acana'ya".

<sup>8</sup> Nga runi ti dxi si ziaba stale plaga luguiá ni. Ziuu tu gati zi', ziuu tu gu'na', ziuu tu gati', ne ziuu tu icá gui, purti nandxó' señor Dios ni bidxiiba donda ique ni.

<sup>9</sup> Zuuna cani runi mandar ndaani guidxilayú, cani gupa laani casi jnadxii ne uyuu né ni lu irá enda nadxaba stini ora gu'ya ca ma cá gui ni.

<sup>10</sup> Zaxele ca de laani. Zadxibi ca enda naná stini. Ne zaná ca':

—Lástima, Babilonia, guidxi ro'. Nandxó' lo', peru tobi ze si binitilú lu'.

<sup>11</sup> Za queca zuuna cani rutoo. Zuuna né ca guidxi que, purti ma iruti sí irá stica':

<sup>12</sup> oro, plata, guie ni risaca, perla, lari cha'hui', seda, lari moradu ne naxiñá', irá clase yaga rindá' naxhi, irá ni uyá' de marfil, ne de yaga risaca, ne de bronce ne de guiba' ne de mármol,

<sup>13</sup> canela ne irá guixi rindá' naxhi, ne gu'xhu rindá' naxhi, ne mirra, ne nisa rindá' naxhi, ne vinu, ne aceite, harina cha'hui', ne trigu. Ne laca rutoo cabe yuze, dendxu', mani', carretón, ne dede binni.

<sup>14</sup> Zabi cabe guidxi que:

—Ma qué gapu irá ni uyula'dxu que. Ma qué ziuu dxi ibigueta irá enda risaca ni gupu que.

<sup>15</sup> Cani uca ricu ra bitoo irá ni lu guidxi que zaxele de laani. Zadxibi ca enda naná stini. Zuuna né ca ni ne ziá ca ni,

<sup>16</sup> ne zaná ca':

—Lástima guidxo ro' que. Zeda gaca ni casi ti gunaa nacu lari cha'hui', moradu ne naxiñá' ne naze oro ne guie ni risaca ne perla,

<sup>17</sup> ne tobi ze si binitilú irá enda risaca que.

Irá ni runi dxiiña lu barcu ne ca xaíque stica', ne cani ze lú ni ne irá ni runi dxiiña lu nisadó', cayuuya ca ni de zitu.

<sup>18</sup> Ne ora bi'ya ca caree gu'xhu ra cacá gui ni la? bicaa ca ridxi:

—Gasti ru sti guidxi casi guidxi ro' ri'.

<sup>19</sup> Bichá ca yu ique ca', bina ca ne bicaa ca ridxi:

—Lástima guidxi ro' ca. Bisirricu ni irá ni napa barcu ne xpidxichi ni, ne tobi ze si binitilú ni.

<sup>20</sup> Peru laguieche né ni bizaaca ni ca, laatu cani nuu ibá', ne ca apóstol, ne cani rui' stiidxa Dios, ne irá ca xpinni. Purti ra bisaba ná Dios ni, biquixe laani ni bi'ni ni laatu.

<sup>21</sup> Oraque uluu ná ti ángel nandxó' ti guie casi guie sti molinu, bindaa ndaani nisadó', ne na:

—Zacaca zalá Babilonia, guidxi ro' que, ne qué zahuinni ru ni.

<sup>22</sup> Qué ziuu ru dxi uxhidxi cabe arpa lu calle stiu', nin flauta nin trompeta, ne iruti qué lica zuni dxiiña', nin molineru nin iruti ru'.

<sup>23</sup> Qué zahuinni biaani ra nuu lu', ne qué zaca enda xheela'. Ziaana dxí irá ni, neca jma gutaná ca xpinni lu para utoo para irá binni ndaani guidxilayú, ne udxite lu ique irá binni ne brujería stiu'.

<sup>24</sup> Ndaani guidxi ca bixii rini sti cani byui' stiidxa Dios ne ca xpinni be, ne rini sti irá cani biiti binni.

## 19

<sup>1</sup> Udi'di si irá nga, bina dia'ga cacá ridxi ibá', casi ora cucaa stale binni ridxi, na ca':

¡Aleluya! Usisaca nu Dios stinu purti nandxó' ne bilá laanu.

<sup>2</sup> Jneza ribidxi be cuenta binni  
purti ma bisaba ná be dxa gunaa dxaba ni bicaa enda nadxaba sti binni guidxilayú.

Biquixe be laa saca biiti ca xpinni be.

<sup>3</sup> Bigueta na ca':

—Usisaca nu Dios. Qué ziuu dxi gyuí' guidxi que.

<sup>4</sup> Oraque bizuxibi idubi veinticuatro binni gola ne ca bultu nabani que, bisisaca ca Dios ra zuba lu trono, na ca':

—¡Amén! ¡Usisaca nu Dios!

<sup>5</sup> Ne ucuá ti ridxi de lu trono que, na:

Lausisaca Dios stinu, irá tu, cani runi xhiiña be, ne irá ni ridxibi laabe,  
cani risaca ne cani qué risaca.

*Ra ichaganá Dendxu huini'*

6 Laca bina dia'ga ti ridxi casi ora rucaa ridxi stale binni, ne casi ora rixidxi ra zidi'di stale nisa ne casi rixidxi rayu ro', na:

Usisaca nu Señor Dios stinu ni jma nandxo',  
purti ma bizulú cayuni mandar.

7 Guieche nu dede idxá ladxitdó' no de enda nayeche', ne usisaca nu laabe,  
purti ma bidxiña dxi ichaganá Dendxu huiini que,  
ma zuchaahui ni chi chaganá'.

8 Nacu lari cha'hui', nayá ne ruzaani'.

Laa zanda gacu ni purti zeda gaca lari que casi enda nacha'hui ni bi'ni ca xpinni Dios.

9 Oraque na ángel que rabi naa:

—Bic和平 ni chi tidxe lii ri': Dichoso cani ma nexhe che enda xheela sti Dendxu huiini'.

Ne laca rabi be naa:

—Dios uni' ca diidxa ca, ne dxandí cani.

10 Bizuxi'be xa ñee ángel que, nusicaca laa, peru óraque na:

—Cadi gu'nu nga. Naa laca rune xhiiña Dios casi ru'nu', lii ne ca xcaadxi hermanu stiu' ni qué riree chu lu stiidxa Jesú. Bisisaca Dios.

Stiidxa Jesú rui' cani rabi Dios laa xi iní'.

*Ni dxi'ba caballu quichi'*

11 Oraque biiya zuxele ibá' ne biree ti caballu quichi'. Nuu tobi runi jneza pe' ne riní' irá ni dxandí', ne laa

dxi'ba laame. Jneza rucaa lú be ne jneza ribidxi be cuenta.

12 Ruzaani guielú be casi bele, ne nuu jma la'pa ique be. Né be ti lá iruti ru ganna sínueque laasi be.

13 Nadxé' daata xhaba be de rini, ne lá be Stiidxa Dios.

14 Nanda ejércitu ni nuu ibá' laabe, dxi'ba ca mani quichi ne nacu ca lari cha'hui', naquichi bé ne nayá guie'.

15 Nasa ruua be ti es-pada naduxhu iropa ladu ni quixhe dxí né be ca guidxi ni ucaa lú laabe, ne zuni mandar be laaca', ne zaca be naduxhu ne laaca'. Zuniná be laaca casi rutu ñee cabe uvas ra usaba be xiana sti Dios ni nandxo' luguiá ca'.

16 Cá caadxi diidxa lu xhaba be ne lu co're be, na: "Xaíque sti irá rey ne irá ni runi mandar."

17 Oraque biiya ti ángel zuhuaa lu gubidxa bicaa ridxi irá mani huiini ripapa, na:

—Latá', laidxiña ra endaró xhi ro' chi udii Dios.

18 Latá' go to xpeela ca rey ne ca comandante ne irá ni rinaaze guiba', xpeela caballu ne ni dxi'ba laaca', xpeela irá binni, cani cá yaga ne cani cadi cá yaga, cani risaca ne cani qué risaca.

19 Ne biiya dxa mani ngola que ne ca rey sti guidxilayú ne ejércitu stica'. Bidxiña ca para ucaa lú ca dxa ni dxi'ba caballu quichi que ne ejércitu sti'.

20 Bigaa dxa mani ngola que, laa ne ni byuí' stiidxa' ne ni bi'ni milagru nezalú

que. Pur irá milagru que biciuudxi binni para ucuaa seña sti mani que ne bisisaca bidó' stime. Iropa ca ulá ca lu bele ra caya'qui azufre, idubi nabani ca'.

<sup>21</sup> Ne ca xcaadxi que la? guti né ca espada ni nasa ruua dxa ni dxi'ba caballu que, ne gudó ca mani huiini que xpeela ca dede ra bidxá ca'.

## 20

### *Ra yeguyoo binidxaba'*

<sup>1</sup> Udi'di si irá nga biiya zeda yete ti ángel de ibá', naaze llave sti dxa bizé ro' que ne ti cadena ro'.

<sup>2</sup> Unaaze be dragón, dxa beenda yooxho ni rabi cabe binidxaba que, bindiibi be laa ti mil iza.

<sup>3</sup> Bisaba be laa ndaani dxa bizé que. Raqué biseguyoo be laa. Biseegu dxiichi be ruua ni ti ma cadi usiguii binni. Izaa si ti mil iza, óraque ma undaa cabe laa caadxi.

<sup>4</sup> De raqué biiya caadxi trono zuba cani ma gudixhe Dios cu' bia' stonda binni. Laca biiya xhialma cani bigá cabe yanni purti canayuí xpinni Jesús laa, ne canayuí stiidxa Dios, ne qué nuzuxibi ca xa ñee dxa mani ngola que ne xpidó', ne qué nudii ca lugar nicá seña stime lu-cuá ca' nin lu ná ca'. Biiya bibani cabe ne bini mandar né cabe Cristu ti mil iza.

<sup>5</sup> Nga nga primé ra bibani gue'tu'. Peru ca xcaadxi gue'tu la? que nibani di ca'

dede ora ma udi'di mil iza que.

<sup>6</sup> Dichoso cani ibani primé que. Ma bia ladxidó' ca'. Ma qué zanda guniná rairopa enda guti laacabe, sínuque zaca cabe sacerdote para guni cabe xhiiña Dios ne xhiiña Cristu, ne zuni mandar né cabe laa ti mil iza.

<sup>7</sup> Tidi si ti mil iza que zunda cabi binidxaba de ra yeguyoo.

<sup>8</sup> Zacá zusiguii binni idubi naca guidxilayú. Zusiguii Gog ne Magog ne zuni laacabe tobi si para ucaa lú né cabe laa. Nabé stale cabe, casi yuxi sti nisadó'.

<sup>9</sup> Ne biiya zeda gui'ba cabe bia' xilaga guidxilayú, uluu cabe le' ra nuu ca xpinni Dios ne dxa guidxi nadxii Dios que. Peru biseenda Dios gui de ibá' binidé laacabe.

<sup>10</sup> Ne ulá dxa binidxaba bisiguii laacabe que lu gui ne azufre ra ma nuu dxa mani ngola que ne ni byui' stiidxa'. Qué ziuu dxi iree ca raqué, ne zacaná ca ridxí ne huaxhinni.

### *Ra cuidxi Dios cuenta binni*

<sup>11</sup> De raqué biiya ti trono ro' naquichi bé, ne biiya zuba Dios lú ni. Bixelete guidxilayú ne ibá' de ra nuu be, ne ma gasti lugar ra ñaana ca'.

<sup>12</sup> Biiya zuhuua cani ma guti nezalú Dios, cani risaca ne cani qué risaca. Ne bixelete caadxi libru, ne laca bixelete libru de enda nabani. Ne guridxi be cuenta cani ma guti, casi cá lu libru que ni bi'ni ca'.

<sup>13</sup> Biree ca gue'tu ni nuu ndaani nisadó' ne biree irá gue'tu ni nuu ra riaana cani cabeza cuidxi Dios cuenta laa. Ne bidxiiba Dios donda ique irá cabe, cada tobi ne ni bi'ni'.

<sup>14</sup> Oraque ulá enda guti ne jlugar lu gui que. Nga nga rairopa enda guti.

<sup>15</sup> Raqueca ulá cani cadi cá lá lu libru de enda nabani que.

## 21

*Ibá' cubi ne guidxilayú cubi*

<sup>1</sup> Udi'di si nga biiya ti ibá' cubi ne ti guidxilayú cubi, purti ma binitilú ibá' ni uyuu chiqué ne guidxilayú laaca, ne ma gasti nisadó'.

<sup>2</sup> Biiya dxi'che Jerusalén cubi, guidxi ro' sti Dios, zeda yete de ibá' de ra nuu Dios. Zuchaahui casi ti gunaa ora chi chaganá'.

<sup>3</sup> Bina dia'ga ucuá ti ridxi reciu de ibá', na:

—Biiya', ma nabeza Dios lade binni. Laape be zabeza né be laaca'. Zaca ca xpinni be, ne laabe zaca be Dios stica'.

<sup>4</sup> Zuchaa be nisa riete lú ca', ne ma qué ziuu ru enda guti nin enda ruuna nin enda racaná ladxidó' nin yuuba', purti ma udi'di irá ni uyuu chiqué.

<sup>5</sup> Oraque na ni zuba lu trono que: "Biiya', cayune irá xixé cosa nacubi." Ne laca na:

—Dxandí irá diidxa ri', zanda guni cre lu ni.

<sup>6</sup> Bigueta rabi be naa:

—Ma uca irá ni nexhe aca'. Naa bizuluá', naa unduuxe', casi ca letra A ne Z. Ni cayati nisa la? gueeda ra nuua', zusiga'de laa nisa ni rudii enda nabani.

<sup>7</sup> Tu qué cui sa atrá la? zacaa irá nga. Naa zaca Dios stica' ne laaca zaca ca xiiñe'.

<sup>8</sup> Peru cani namuxé', cani qué runi cre, cani qué iquiñé', cani ruuti binni, cani riuu né ni cadi xheela', cani runi brujería, cani ruzuxibi xa ñee bidó', ne cani rusiguii, ira xixé ca zalá ca lu gui ne azufre. Nga nga rairopa enda guti.

*Jerusalén cubi*

<sup>9</sup> Nuu gadxe ángel naaze gadxe copa ra dxá último xcadxe plaga. Beeda tobi na rabi naa:

—Gudá' ulué lii novia, xheela Dendxú huiini'.

<sup>10</sup> Lu ni cului' Espíritu Santu naa que, yené ángel que naa lu ti dani ro' ne nasoo, ne bilui' naa Jerusalén guidxi ro' sti Dios zeda yete de ibá' de ra nuu Dios,

<sup>11</sup> dede ria'qui biaani guidxi que de enda nandxó' sti Dios. Zeda aca xpiaani ni casi ti guie ni nabé risaca. Ruluí' ni jaspe, rihuinni biaani ni casi vidriu.

<sup>12</sup> Napa ni ti lindaa naro'ba ne nasoo, ne napa lindaa que doce puerta'. Zuhuaa ti ángel cada ra puerta', ne cá lá doce tribu ni za de Israel lu ca puerta', tobi cada tobi.

<sup>13</sup> Napa ni chonna puerta neza rindani gubidxa, chonna guia', chonna neza

riaazi gubidxa, chonna  
guete'.

<sup>14</sup> Zuba ni lu doce guie, ne  
cada guie cá lá ca apóstol  
sti Dendxu huiini que, bia'si  
doce.

<sup>15</sup> Naaze ángel ni caní' né  
naa que ti vara de oro para  
cu' bia' né guidxi que ne  
puerta' ne lindaa stini.

<sup>16</sup> Bia'ca ziuula guidxi que  
bia' queca de xilaga. Uluu  
bia' ángel que ni. Napa  
ni chupa mīl chupa gayuua  
kilómetru de ziuula', ne de  
nasoo, ne bia' queca de xi-  
laga.

<sup>17</sup> Oraque uluu bia' be lin-  
daa stini. Napa ni sesenta  
y cuatro metru. Biquiñe be  
metru casi riquiñe binni.

<sup>18</sup> Naca lindaa que de guie  
jaspe, ne guidxi que de oro  
cha'hui casi vidriu ni nayá.

<sup>19</sup> Zuchaahui ca guie ni  
zuba ni lú de irá clase guie  
risaca. Primé que zuchaahui  
ne guie lá jaspe, rairopa  
zafiro, raguionna ágata,  
raidapa esmeralda,

<sup>20</sup> raigaayu ónica, lu  
xhoopa que cornalina, lu  
gadxe que crisólito, lu xhono  
berilo, lu ga' topacio, lu chii  
crisoprasa, lu once jacinto,  
ne lu doce que amatista.

<sup>21</sup> Idubi doce puerta stini  
naca de perla, cada puerta  
naca de ti perla si, ne de oro  
cha'hui calle ro' stini, dede  
rihuinni biaani casi vidriu.

<sup>22</sup> Qué ñuuya nin ti yu'du  
ndaani guidxi que, parti  
Señor Dios ni nandxó', laa  
ne Dendxu huiini que, naca  
yu'du stini.

<sup>23</sup> Ruzaani enda nandxó'  
sti Dios ni, ngue runi cadi  
caquiiñe ni gubidxa nin  
beeu. Ne Dendxu que nga  
biaani stini.

<sup>24</sup> Irá xixé binni ni ma  
bilá zazá lu biaani stini, ne  
irá xixé rey ni bini mandar  
ndaani guidxilayú zedané  
enda risaca sti ra nuu ni.

<sup>25</sup> Qué zieegu puerta stini  
ridxí ne qué zaxhinni raqué.

<sup>26</sup> Ziné cabe enda nandxó'  
ne enda risaca sti irá xixé  
guidxi ra nuu ni.

<sup>27</sup> Peru qué ziuu dxi chu'  
xiixa ni nabiidi raqué, nin ni  
qué iquiiñe', nin ni rusiguii,  
sínuque ziuu cani cá si lá lu  
libru de enda nabani ni napa  
Dendxu huiini que.

## 22

<sup>1</sup> Oraque biluí' ángel que  
naa ti guiigu nayá guie'.  
Ne ndaani ni riree nisa  
ni rudii enda nabani, ne  
naya'ni dxindxi ni casi  
vidriu. Candani ni ra nuu  
trono sti Dios ne sti Dendxu  
huiini que.

<sup>2</sup> Didi ni galahui calle ro'  
sti guidxi que, ne iropa uriá  
ni zuhuua yaga rudii enda  
nabani. Ricá cuananaxhi  
lu ni irá beeu, ne riquiñe  
bandaga stini para usianda  
binni.

<sup>3</sup> Qué ziuu gasti ni nadxaba  
raqué sínuque trono sti Dios  
ne sti Dendxu huiini chu'  
raqué ne zusisaca ca xpinni  
be laabe.

<sup>4</sup> Zuuya dxichi pe ca laabe  
ne zacá lá be lucuá ca'.

<sup>5</sup> Qué zaxhinni raqué, ne  
ma qué zaquiiñe cani nuu  
raqué linterna nin xpiaani

gubidxa purti Señor Dios nga gaca biaani stícabe. Ne qué ziuu dxi guiaana dxí de guni mandar cabe.

*Ma cadxiña dxi gueeda Cristu*

<sup>6</sup> De raqué na ángel que rabi naa:

—Dxandí ca diidxa ri', ne zanda guni cre lu cani. Señor Dios ni bisiní' ca profeta, laa biseenda ángel stí' beda ului' ca xpinni xi ma zeda dxíña dxi gaca'.

<sup>7</sup> Na Señor:

—Nagueenda zenda'.

Dichoso cani ulabi stiidxa Dios ni cá lu gui'chi ri'.

<sup>8</sup> Biya dxi'che ne bina dia'ga irá ni guca ri'. Biluxe si bina dia'ga' ne biiya cani, bizuxi'be xa ñee ángel cului' ni naa que para nusisaca laa,

<sup>9</sup> peru na rabi naa:

—Cadi gu'nu nga purti naa laca cayune xhiiña Dios casi cayu'nu', lii ne ca hermanu stiu' ni rui' ni gabí Dios laa ne irá xixé ni rulabi ni cá lu gui'chi ri'. Lausisaca Dios.

<sup>10</sup> Ne laca rabi be naa:

—Cadi ucaachi lu irá ni cá lu gui'chi ri', purti mayaca idxiña dxi gaca irá ni.

<sup>11</sup> Peru laga ca'ru ganda dxi gaca ni la? cani cuchee la? zuchee ru ca', ne cani cayuni ni nadxaba la? zuni ru ca ni, peru cani nacha'hui la? zuni ru ca enda nacha'hui' ne cani ma biree chu para Dios la? qué zaxele de laa.

<sup>12</sup> —Zacá zaca ni. Zenda nagueenda ne zedaniá ni usiga'de binni, cada tobi bia' ni bi'ni'.

<sup>13</sup> Maca nuua dxi bizulú irá ni, ne zaluxe irá ni, naa nuua rua'. Naa bizuluá' naa unduuxe', casi ca letra A ne Z.

<sup>14</sup> Dichoso cani guia ladxidó' casi ñaca niguibi xhaba, purti laaca zacaa ca cuananaxhi ni rudii enda nabani ne ziuu ca ra puerta sti guidxi que.

<sup>15</sup> Peru cani qué runi cre ne cani runi brujería ne cani riuu né ni cadi xheela' ne cani ruuti binni ne cani ruzuxibi xa ñee bidó' ne cani rusigui la? irá xixé ca zi-aana ca fuera.

<sup>16</sup> Ne laca na Jesús:

—Cuseenda ángel stinne chi usiene ni ca xpinne'. Za David de naa ne naa zaya de laa. Naa nga luceru ruzaani siadó'.

<sup>17</sup> Na Espíritu Santu ne xheela Dendxu huiini que:

—Gudá'.

Ne ni guna diaga la? iní':

—Gudá'.

Ni cayati nisa la? gueda güé nisa ni rudii enda nabani sin quixe gastí'.

<sup>18</sup> Irá xixé tu, cani ucaa diaga stiidxa Dios ni cá lu gui'chi ri', gabe ca' laatu: lu gui'chi ri zeeda ca plaga ni chi usaba Dios luguiá binni, ne pa chu' tu cu' xcaadxi didixa lu ni cá rarí la? Dios laca zaguu lu plaga stí'.

<sup>19</sup> Ne zaqueca, pa chu' tu cuee xiixa lu stiidxa Dios ni cá lu gui'chi ri la? zuxhá Dios lá lu libru de enda nabani, ne ma qué ziuu ndaani xquidxi Dios ni riete lu gui'chi ri'.

<sup>20</sup> Na ni caní':

—Dxandí zenda nagueenda.

—Zacá gaca ni. Gudá' <sup>21</sup>Jesucristu Señor stinu cu'  
Señor Jesús. ndaaya irá tu. Amen.